



Diidz ne rdeed guielmban

Mixtepec Zapotec New Testament



Contents

XTIIDZ NDZON DIOS MINE PQUIAA MATEW	1
XTIIDZ NDZON DIOS MINE PQUIAA MARCW	54
XTIIDZ NDZON DIOS MINE PQUIAA LUC	87
XTIIDZ NDZON DIOS MINE PQUIAA JUAN	143
MINE BEEN ZHA NE PXEEL JESÚS BNEE XTIIDZ ME	184
GUITS NE PXEEL PABL LO ZHA ROMA	233
GUITS NE GLO PXEEL PABL LO ZHA CORINT	255
BROP GUITS NE PXEEL PABL LO ZHA CORINT	277
GUITS NE PXEEL PABL LO ZHA GALÁS	292
GUITS NE PXEEL PABL LO ZHA EFÉS	301
GUITS NE PXEEL PABL LO ZHA FILIP	309
GUITS NE PXEEL PABL LO ZHA COLÓS	315
GUITS NE GLO PXEEL PABL LO ZHA TESALÓNICA	320
BROP GUITS NE PXEEL PABL LO ZHA TESALÓNICA	325
GUITS NE GLO PXEEL PABL LO TIMOTÉ	328
BROP GUITS NE PXEEL PABL LO TIMOTÉ	335
GUITS NE PXEEL PABL LO TIT	340
GUITS NE PXEEL PABL LO FILEMÓN	343
GUITS NE BEY LO GRĚ ZHA ISRAEL	345
GUITS NE PQUIAA SANTIAGW	361
GUITS NE GLO PQUIAA PEDR	367
BROP GUITS NE PQUIAA PEDR	373
GUITS NE GLO PQUIAA JUAN	377
BROP GUITS NE PQUIAA JUAN	383
BION GUITS NE PQUIAA JUAN	384
GUITS NE PQUIAA JUDAS	385
MINE BDEED DIOS DIIDZ GOŃ JUAN	387



Diidz ne rdeed guielmban

New Testament in Zapotec, Mixtepec (MX:zpm:Zapotec, Mixtepec)

Language: Zapotec, Mixtepec

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 1998 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-06-27 from source files dated 2017-06-26.

74ff4c69-986c-5978-a93d-e1428a641492

ISBN: 978-1-5313-0754-7

XTIIDZ NDZON DIOS MINE PQUIAA

MATEW

1 Jesús meṇ ne pxeel̄ Dios ga, lo xtií Abraham, lo xtií David, ga brieequia me. Lëë grë xmengoldoo me nu:

² Abraham goc pxoz Isaac, Isaac goc pxoz Jacob, Jacob goc pxoz Judá (bio zla xpëed Jacob),

³ Judá goc pxoz Far ni Zar (Tamar brieelë tsiel Judá),

Far goc pxoz Srom, Srom goc pxoz Aram.

⁴ Aram goc pxoz Minadab, Minadab goc pxoz Naasón, Naasón goc pxoz Salmon.

⁵ Salmóngoc pxoz Booz (Rahab brieelë tsiel Salmon),

Booz goc pxoz Obed (Rut brieelë tsiel Booz),

Obed goc pxoz Isaí.

⁶ Isaí goc pxoz rey David, David goc pxoz Salomón (lëë Salomón ga gop tsiel Urí wnaa ne bionie David).

⁷ Salomón goc pxoz Roboam, Roboam goc pxoz Abí, Abí goc pxoz Asá,

⁸ Asá goc pxoz Josafat, Josafat goc pxoz Joram, Joram goc pxoz Uzí.

⁹ Uzí goc pxoz Jotam, Jotam goc pxoz Acáz, Acáz goc pxoz Ezequí.

¹⁰ Ezequí goc pxoz Manasés, Manasés goc pxoz Amón, Amón goc pxoz Josí,

¹¹ Josí goc pxoz Jeconí (bio zla xpëed Josí).

Leṇ dze ne nac Jeconí mëed, leṇ dze co güeybee zhoo zha Babiloin grë zha Israel, beynie zho zho Babiloin.

¹² Babiloin, ga gol tib xpëed Jeconí brieelë Salatiel, Salatiel goc pxoz Zorobabel.

¹³ Zorobabel goc pxoz Abiud, Abiud goc pxoz Liaquim, Liaquim goc pxoz Azor.

¹⁴ Azor goc pxoz Sadoc, Sadoc goc pxoz Aquim, Aquim goc pxoz Liud.

¹⁵ Liud goc pxoz Leazar, Leazar goc pxoz Matán, Matán goc pxoz Jacob.

¹⁶ Jacob co nagon goc pxoz José, meṇ ne ptsieelnia Marí.

Marí goc xniaa Jesús, Meṇ ne nacle diidz ga cxeel̄ Dios guiaad lo guidzliu.

¹⁷ Zig choopchop bdziṇ lo dii co, dzig-oraá brieequia Jesús. Tsiida zho wban desde Abraham haxta David; stsiida zho wban desde Salomón haxta leṇ dze ne bey zho Babiloin; stsiida zho wban desde leṇ dze co haxta bdziṇ dze ne goc me mëed.

Gol Jesús

(Lc. 2:1-7)

¹⁸ Znu bzhaac Marí grop José leṇ dze ne ziaadyob gal Jesús. Gard ctsieelnia Marí loxaque xtiidz me no ne laa me ycaa José, zeene bnabey Espíritu Sant pquialo tib mëed zdoo me. ¹⁹ Zeene bien Joséw, miṇe been me gocladz me mazd nsaan me Marí; sac sca rnabey ley ni zienalpaa me miṇe rnabey ley; per laa me gocladz zhlianse nzozit me, sacne racladzd me nriee xquiel̄to Marí. ²⁰ Zhgab co no me, tibaque blulo tib xanj̄l Dios lo me lo mcaal̄.

—José (xiag David) —rëb anjl co—, peet tsienied guic luu, pcaania Marí gac me tsiel luu; sac gon̄ mëdyeen̄ ne zoney me ga, Espíritu Sant bnabey pquialo win zdoo me. ²¹ Zeene gal̄ dze ne laa win gal, JESUS cueelë luu win, sca grielë win sac win csilaa grë menladz win lo dol̄.

²²Ga briequia mine bnee Dios padzeela, zeene bzeet zha ne biadnee xtiidz mew, rëb zho:

²³Bii zan to ganle zeene laa tib mөөd-bgui yquiaalo zdoo tib wnaayeen ne gard gnee mgui lo.

Zeene laa win gal, Emanuel grielë win. (Emanuel nac zig nacne rnee ne: Dioszhal ziaad lo ne.)

²⁴Zeene bna José laa guic me goc tibli; bin me xtiidz anjl co laa me ptsieelnia Marí. ²⁵Laa me wban tipse grop me per ib bgaald me Marí, haxta bded dze ne laa mëdyeen co gol. Bdzin dzew, laa win gol, dzigo bleelë José win JESUS.

Güeygan bla zha rac Jesús

2 Tib guiedz win ne ndxie xtan Judé lë Belén, ga gol Jesús. Lëetse len dze co zob men ne lë Herod nac me rey ne rnabey dan co.

Goc palal dzew, laa bla zha ne runbey lo mel ziaad nëz ne rlan ngbidz bdzin Jerusalén, ²bnabdiidz zho rëb zho:

—¿Pa lo dien no mëed ne gac men ne gnabey ladz to nu, mëed ne griin gol ga? Bdzion no tib mel nëz ne no no, mel co blu lo no laa win gol-le, min co ne ziaad no nu ziaaddzian no win.

³⁻⁴Grë menguedz Jerusalén, zeene bin zhow bzee zdoo zho. Laa Herod, riendraa me zha gun me, bnabey me pcaalsa grë zha ne nac pxoz non, grë zha ne rseed miech ley, bnabdiidz me lo zho dien pa lo nac diidz gal Men ne nole diidz cxeel Dios guiaad lo guidzliu ga.

⁵Dzigo rëbchaa zho lo me:

—Belén, guiedz ne ngab Judé ga none gal men co, sac scale zhubnee lo guits ne pquiaa zha ne pxeel Dios padzeela biadteed xtiidz me, zeene psiaab me guic zho znu bnee zho:

⁶Tej Belén,

niicle ne winraaw lo grë guiedz ne ngab Judé, per nroob nona;

sac gon ga griequia tib men ne gnabey,

men ne so yquiaanap grë men Israel, ne nac zho zha ne ngab lo naa.

⁷Nacne zhlianse bnabey Herod gocredz gza zha rac co, bnabdiidz me lo zho dien blapaa dze rac psilo gon zho blan mel co.

⁸Blozhse ga, dzigo pxeel me zho Belén, rëb me lo zho:

—Ga goltsie goltsieguib mëed co. Zigne gdziel to win, goltëniegazh diidz lo naa nu, zeena ye naa ga gagan naa win.

⁹Blozhse sca pso me diidz lo zho, laa zho bio nëz stib laa zho zie. Laa mel ne gon zho briequia nëz ne ziaad zho ga, laa ma neraque lo zho; haxta bdzin ma ngali guic yu ne no mëdyeen co, gataa laa ma blëz.

¹⁰⁻¹¹Zeene gon zho laa mel co blëz ga, per nli rley zho. Bzëeb zho len yu co, gon zho laa mëdyeen co no ga grop xniaa win, dzigo pquitsgzhiz zho lo win, bnee zho tib xtiidz zho lo win. Blozh ga blee zho ncuane zienie zho lo win, blee zho or, blee zho tiblo yaalnex, ni tiblo nceit nex rnee zho mirr, bgad zho lo win.

¹²Zeene laa gza zha rac co wbi Belén, laa ne nieted zho Jerusalén, stible nëz bzhén zho zey zho; sac bnee Dios lo zho lo mcaal, rëb me tsienied zho diidz lo Herod.

¹³Laa gza zha rac co zey, zeene güeylulo tib xanjl Dios lo José lëetse nixguies me, rëb anjl co lo me:

—José, na zeena guche i pcaanie mëdyeen qui nëz grop xniaa win, golsë nëz Egipt, sac laa Herod yquiaguib win gut me win. Egipt, ga cuëznie to win, na naaque guialnie diidz lo to zeene laa to gbi ga.

¹⁴Guieel cogazh guche José, pcaanie me mëdyeen co nëz grop xniaa win, laa zho ziese nëz Egipt; ¹⁵ga blëz me haxta bdzin dze ne laa Herod gut. Ga briequia mine bnee zha ne biadteed xtiidz Dios padzeela, zeene znu bnee zho: “Nëz

Egipt no xpëed naa, zeene bredz naa me.”

Bnabey Herod gut grë mëedlas

¹⁶ Laa zeene gon Herod wbiredraa gza men rac co nienie zho diidz lo me, per nli blëe me. Ntseeb rac me, pxeel me zha ne güey Belén ni grëraa guiedz ne ndxie gax ga, güeygut zho grëse mëedbgui yeen ne no grë guiedz co, desde win ne golvëz, haxta win ne rap chop iz. Tibaque nan me sca ngaa mëdyeen ne nac Jesús ga niet win, sac blee me cuent zhile gac chop iz psilo gon gza zha rac co blan mel co. ¹⁷ Guielnëdox ne bio grë miech co, ga briequia mine bzeet Jeremí men ne biadteed xtiidz Dios padzeela, zeene znu rëb me:

¹⁸ Tib redz nroob ne zëeb len guiedz Ramá.

Grë wnaa Judá, zha ne ziaad lo xtii Raquel,
mbanse rac zho, roon zho no zho xquielnë xpëed zho;
zha rna zha ne cchoobladz zdoo zho, sac laa xpëed zho gut.

¹⁹ Goc palal dzew laa Herod gut, dzigo pxeel Dios tib xanj me güeynee lo José lo mcaal zaatne no José nëz Egipt, rëb me lo José:

²⁰ —José, guche i, pcaanie mëdyeen qui nëz grop xniaa win, golbire nëz Israel stib; laa zha ne quianal win ga gutle.

²¹ Dzigo brieenie José mëdyeen co ga grop xniaa win, bio me nëz laa me wbyre zeynie win nëz Israel. ²² Per zeene bin José lëeque tib xpëed Herod men ne lë Arquelá, men co biaan xlugar Herod zobnabey xtan Judé, bdzieb José ndzinnie me mëdyeen co nëz co. Dzigo bneeque Dios lo me lo mcaal tsie me nëz Galilé.

²³ Gol zho Galilé, bdzinaque zho guiedz Nazaret, ga wbannie zho mëdyeen co. Ga briequia mine bzeet grë zha ne biadteed xtiidz Dios padzeela, zeene

rëb zho: men Nazaret guiab miech nac Jesús.

Psilo Juan Bautist noseed me miech

(Mr. 1:1-8; Lc. 3:1-9, 15-17; Jn. 1:19-28)

3 Len dze ne psilo Juan Bautist noseed Juan miech xtan zha Judé, dan zit ne no me ga; ² rnee me lo zho:

—¡Golsaan xquielntseeb to, golvab lo Dios gon me to perdon grëtaa dol ne ziyun to; sac gon laa dze bdzinle laa me csilo gnabey!

³ Lëe Juan Bautist ga bzeet profet Isá, zeene znu pquiaa me:

Bii zon miech ganle zeene laa tib tsi men zëeb tib dan zit, rnee me:

“Golzhixcuaa nëz ne ted men ne rnabey, golsaan grë guielntseeb ne run to.”

⁴ Niapse guits lad camell niaa xab Juan, guid nac ncuane ndxie len me, ni niapse nguzhanch ni dzin dan row me.

⁵ Nzian grë menguedz Jerusalén, grë men Judé, grë men ne no gax ro guiubee Jordán, rriee zho riequiaadiag zho zhiwseed me. ⁶ Grë zha ne rxobdol grëse xtol zho, dzigo rchoobnis me zho ro guiubee co.

⁷ Laa zeene ran me grë zha farisé, zha saducé ne rdzin lo me ga racladz zho ye zho chobnis, dzigo rnee me lo zho:

—¡Miech ngoopdol, masaque nac to zig nac mee! Nan to na lëe, loxaque chobnis to laa to laale lo grë guielnëdox ne ziaadyob. ⁸ Led scada gon, none zace gban to zeena glu nli dib zdoo to psaan to grë xquielntseeb to. ⁹ Ni gacnitsde to guiab to loxaque por nacse to xtii Abraham, laa Dios csilaale to; sac gneli naa lo to ganle telne gacladz Dios, haxta grë quie zac gnabey me tsaalow miech ne gac zha xtii Abraham. ¹⁰ Nanle to ganle, grë yag nex, zeene rquiad nex low led rruga, rlozh ga rliaala lo gui, ga reca. Scadaa nagon gdzieelo miech ne gband zigne racladz Dios, sac rriequia

laa me nzhenle xquibyag me cchug me yag ne sca nac.

¹¹ Nli tib wrobnisse nu rnedz naa lo to, nacesw zig tib señ, sac lëë gdib rluw laa to psaan xquielntseeb to, laa to bzëëb xnëz Dios. Sangue men ne no guiaad ga, mesi Espíritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nli-gaa tib men non nac me, tel naa peet nond naa, per ni par tib ngundziin ne glit lab me raguiald naa gac naa. ¹² Laa me guiaad zig tib zha ne rbeeguizh zhobx-til, sac zha co rlozhse runmbe zho zhob, rgotsow zhow, laa paj rielaal zho lo gui, ga reca. Per gui ne gzëëg grë paj ne guiadbee me ga, gdziind dze guiuuw.

Brobnis Jesús

(Mr. 1:9-11; Lc. 3:21-22)

¹³ Len dze co brieë Jesús nëz Galilé zie me nëz ro guiubee Jordán, laa me zie par cchoobnis Juan me. Bdzin me ¹⁴ nëd Juan cchoobnis Juan me, rëb Juan lo me:

—Lëda i gon, naa none guial lo luu cchoobnis luu naa.

¹⁵ Dzigo rëb me lo Juan:

—Nli scaw, per mazd pchoobnis naa, sac gon ib nonguiela dziuun ne mine rnabey Dios.

Dzigoraa pchoobnis Juan me. ¹⁶ Laa me zieriee lo nis zeene laa zhan gbaa bzhiäl, gonpaa me zig rlu tib palom rlu Espíritu Sant laa me ziad-zëëb bdzin me guic me, ¹⁷ ni blu zëëb tib tsi men co nëz gbaa rnee me:

—Xpëëd naa gon nac men qui, rleynie naa me, men nziuu nac me lo naa.

Gocladz mendox niungüet ma Jesús

(Mr. 1:12-13; Lc. 4:1-13)

4 Zeene blozh brobnis Jesús, dzigo güeynie Espíritu Sant me tib dan zit, zaatne guiend miech; ga gocladz mendox niungüet ma me niun me mine racladz ma.

² Zeene goc choo ngbidz choo guieel no me dan co ni tib lë peet rowd me, laa me pcaabedz ³ hor co bdzin mendox zaatne no me ga, rëb ma:

—Telne nli Xpëëd Dios nac luu, bnabey tsaalo grë quie rii ncuaañe gow luu.

⁴ Dzigo pquiab me rëb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

⁵ Blozh ga güeynie ma me Jerusalén, blep ma me glaa guic yadoo nroob ne zob lad guiedz co, ⁶ rëb ma lo me:

—Telne nli Xpëëd Dios nac luu, brin-gaa nu, benque led znu zhobnee lo Xtiidz Dios: “Znabey Dios grë xanjl me yquiaanap luu, zha queedz luu, zeena ni tib quie ycaand ni luu.”

⁷ Pquiab me rëb me lo ma:

—Psoladz ganle, noque stib zaatne znu rnee lo Xtiidz Dios: “Bien, Dios nac men ne rnabey luu, nodne quitnie luu me gnab luu lo me ncuaañe nod gun me.”

⁸ Blozh ga bii güeynie ma me glaa tib guic gui, ga blu ma grëse guiedz ne ndxie dib lo guidzliu lo me, ni blu ma grëse ncuaañ ndaan ne rap tib tib guiedz co, ⁹ rëb ma lo me:

—Bui ganle, grëse ncuaañ qui gon gnedz naa lo luu telne squitsgzhib luu lo naa niina, gunnon luu naa.

¹⁰ Horco pquiab me rëb me lo ma:

—iBiche lo naa nu mendox! Znu gon zhobnee lo Xtiidz Dios: “Diosse nac men ne rnabey, mese none gunnon luu, lo me riegual yquitsgzhib luu; ni mine rnabey me min co none gun luu.”

¹¹ Dzigoraa biche ma lo me, dzigo bdzin bla anjl bdeed zho ncuaañe dow me.

Psilo Jesús pseed me miech nëz Galilé

(Mr. 1:14-15; Lc. 4:14-15)

¹² Zeene bin Jesús laa Juan biab ladzguiib, dzigo brieë me ga güey me nëz Galilé, guiedz ne lë Nazaret.

¹³ Zhisaque goca, brieque me ga güey me Capernaum tib guiedz ne ndxie gax ro Nisdoo Galilé, zaatne nac xtan zha xtii Zabulón ni zha xtii Neftalí. ¹⁴ Ga brieque quia mine bzeet Isá (meñ ne pxeel Dios padzeela biadnee xtiidz me), zeene psiaab Dios guic Isá rëb Isá:

¹⁵ Grëse menzit ne ndxie xtan Galilé, nëz dan ro guiubee Jordán, gax ro Nisdoo Galilé, zaatne goccheñ Zabulón ni Neftalí;

¹⁶ miech ne no lo ncow nac zho, per niina tib biini nroob biab lo zho. Ladzniale guielgut no zho, per laa biini co biab lo zho par greec zho ga.

¹⁷ Ga psilo Jesús pseed me miech, rnee me lo zho csaan zho xquieñtseeb zho, gbig zho lo Dios, sac laa dze ne csilo gnabey Dios ziaadgaxle.

Bredz Jesús tap ngoozmeļ

(Mr. 1:16-20; Lc. 5:1-11)

¹⁸ Leñ dze co, tib dze zieded Jesús gax ro Nisdoo Galilé gon me chop ngoozmeļ, tib zho lë Simón Pedr, stib zho lë Ndrés; grop bets zho lëetse laa zho noron guieñ ne rgaa meļ lo nis. ¹⁹ Dzigo bredz me zho, rëb me lo zho:

—¡Goltë goltënaļ zhits naa! ¡Laa naa cxel to tsie to stib gooz, tsietop to grë miech ne sëëb xnëz Dios!

²⁰ Horcogazh psan zho guieñ ne rgaa meļ ga, laa zho zianaļ zhits me.

²¹ Zhisaque bzë me ro nis co, gon me laa Jacob ni Juan (lëë grop xingan men ne lë Zebedé ga) no tib len barcw gza pxoz zho, noquiaabdie zho guieñ ne rgaa meļ; dzigo bredz me zho. ²² Zigne bredz me zho biaanñieque pxoz zho barcw ga, laa zho zianaļ zhits me.

Zëëb diidz grëtaa milagr ne run Jesús

²³ Dipse xtan zha Galilé, guiedz ne rdzintaa Jesús rie me grë yadoo ne zob lad guiedz co rseed me miech Xtiidz Dios,

rnee me lo zho zha racladz Dios gban zho, ni runguiac me grë meñ rzacnë, tel pe guielguiidztaa rzac zho.

²⁴ Tel pa lotaaw zëëb diidz scataa run me grë milagr, haxta nëz Siria bin miecha. Nzian grë meñ co brieë ga bdzinnie zho grë zhimguidz zho lo me: no grë meñ rzacnë co noguitnie mendox, no zho rlan guielguidz gutye, no zho gutoo dipse xcuerp, no zho rlan grë pe stib guielguidz, nogaa zho rlan grë pe yoo; grëse zho beënguiac me zho. ²⁵ Zaatne zieetaa me, miech guizhiu ne naļ zhits me, grë zha Galilé, grë zha Decápolis, grë zha Jerusalén, grë zha Judé, haxta grë zha ne no stib nëz ro guiubee Jordán.

Cho nac zha ne wen zie

(Lc. 6:20-23)

5 Tib dzew, gon Jesús laa grë miech guizhiu co bdzin lo me, dzigo bzoquia me glaa tib guic gui win. Ga zob me, bdzin grë xpëëdscuel me lo me, ² dzigo psilo me pseed me zho, rëb me:

³ —¡Wen zie zha ne rienñ ib none gbig zho lo Dios, sac ib dzin zho zaatne rnabey me!

⁴ ¡Wen zie zha ne mban rac roon niina, sac schoobladz Dios zdoo zho!

⁵ ¡Wen zie zha ndooladz, zha ne zienie guic gban zigne rnabey Dios, sac scaania zho guidzliu ne gdeed me lo zho!

⁶ ¡Wen zie zha ne racladz gun grë mine rnabey Dios, rzac zhow zigne rzac zha ne rcaabedz, zha ne rnabгаа zhis, sac ible zacnie Dios zho parne grieelo gun zhow!

⁷ ¡Wen zie zha ne rquia zdoo miech, sac zigne rquia zdoo zho samiech zho scaque Dios squia zdoo me zho!

⁸ ¡Wen zie zha ne mbele zdoo, zha ne biaanmbele lo xtoļ, sac zanlo zho Dios!

⁹ ¡Wen zie zha ne noxco zaacse gban miech, tilđ zho, sac masaque mëëd gac zho lo Dios!

¹⁰Wen zie zha ne loxaque porne quiayun zho mine rnabey Dios, rquianał miech zho, sac ible zdziñ zho zaatne rnabey me!

¹¹Zig nac to, zeene csilo grë miech yquiaago zho to, ctsidil zho to, yquiadi-idzguizh zho to loxaque ne riladz to naa, iwen zie to ga! ¹²Wen golco zdoo to, nguieel golgac, sac gon tib guiełnzaac nroob ne gneedz Dios lo to! Golsoladz ganle, scaque been zho grë zha ne pxeel me padzeela biadnee xtiidz me.

Nac to zig nac zed, zig nac biini

(Mr. 9:50; Lc. 14:34-35)

¹³Masaque nac to lo guidzliu rii zig nac zed. Nanle to ganle pa lotaa rquiin zed, per telne nzhida, ¿pa dien rquiina? Wlen g dīb rliaala lo guizh, zaatne rded rzë miech rzëeni zhow!

¹⁴Nac to zig tib biini ne noziini lo guidzliu. Grielod tsongueets to, sac tib guiedz ne ndxie glaa tib guic gui, grielod tsongueetsa. ¹⁵Golguien ganle nacd biini parne tsolana, sinque parne gziiniw lo grë miech ne no len yu. ¹⁶Zaacse sca golgac, mine rquiin min co golgun, masaque lëew gac zig tib biini; zeena zeene gan miech biini co zien zho ganle pa lotaa men nroob nac Pxoz to men ne no gbaa.

¹⁷Guiabde to togo bod laa naa zial zialtichee naa ley ne psan Moisés, o grëgaa mine bnee zha ne biadteed xtiidz Dios padzeela; sac led mincod zial naa, sinque laa naa zial gun naaw zigne no gaca. ¹⁸Gneli naa lo to ganle: Laga niaa guidzliu rii, laga niaa gbaa, ib none gac mine zhobnee lo ley, mine bneegaa zha ne biadteed xtiidz Dios, ni tib lë paat gdzëda. ¹⁹Gacxe waa zha ne quiits tib ley niicle mine mazdraa wina, ni cseed zho miecha zigne run zho ga, ib tedsod zha nac zha ne mazdraa win guiaan lo grë zha ne ygaa zaatne rnabey Dios. Sangué zha ne guna zigne rnabeya, ni cseed zho miech

scaque tsienal zhow, zha cosi nroob gacnon zho lo grë zha ne gdziñ zaatne rnabey Dios.

²⁰Rso naa diidz lo to sca, zaacse golgac gunde to zigne run grë maistr ley, grë zha farisé; sac telne tsoxcod to gban to zigne racladz Dios, grielod gdziñ to zaatne rnabey me.

Nodne gut miech

(Lc. 12:57-59)

²¹Led nanle to ganle, no tib ley ne biaan lo xmengol to padzeela, rneew: “Gute luu samiech luu”; rnabeya zha ne gut samiech, ib none guetaque zho, quizhgazh zho dol co. ²²Sca rnee ley co, per zig nac zha ne gon në rac zdoo ran samiech, rriequia beetle zho ga, ye zho riegual quizh falt co. Zig nac zha ne gnee pe tib diidznë lo samiech, none gacredz zho lo wxtis zeena gunquizh zho zho dol co; zha ne quiegaa samiech, lëëque zha rguib guey zho gabil ga.

²³Gacxe waa tel ziesan to tib gon, per lo pcoogle zo to rsoladz to rdilnie to tib samiech to, ²⁴gase golsan gon co, goltsie goltsienabgazh perdon lo zha ne rlëe to lo ga, gbireraa to dzigo gdeed to gon co. ²⁵Zha ne sca rlëenie to, goltsoxcod pront golguiaan wen; zeena tsiezod zho to lo wxtis, sac tel laa zho tsiezo to lo wxtis ib znabey wxtis tso to ladzguiib. ²⁶Gneli naa lo to ganle grieede to ga, haxtaque lozh quizh to grë dimi ne gnab wxtis lo to.

Nodne tsonie miech zha ne led tsieeld zho

²⁷Nanlaque to ganle zha rnee stib ley ne biaan lo xmengol to, rneew: “Zha ne nole tsieel, zigtaa mguiw zigtaa wnaaw, nodne tsonie zho zha ne led tsieeld zho.” ²⁸Per zig nac zha ne gon, ran tib wnaa ni rsilo zho riogui zho tsonie zho wnaa co, laa zho bdiitsle ley co.

²⁹Gacxe waa, bziaalo to miñe rquiaqui runctal to xtoḷ to, mazd golcueegazha; niicle teḷ bziaalo derech tow. Peet nacd nitlo tib lëque xcuerp to, lëdle dib nacsew tsietsoobe gabiḷ. ³⁰Laa teḷ niagaa tow, miñe rquiaqui runctal to xtoḷ to, niicle teḷ nia derech tow, golchuggazha. Peet nacd nitlo tib nia to, lëdle nitlo to leñ gabiḷ dib nacse xcuerp to.

Nodne csëbtsieel miech

(Mt. 19:9; Mr. 10:11-12; Lc. 16:18)

³¹No stib ley znu rnee: “Mgui ne racladz csaan tsieel, zac ctso zho; totsaque gdeed zho tib guits lo wnaa, zaatne raquiet ne laa zho psaan wnaa.”

³²Per gni naa lo to ganle: telne quiangobd tsieel zho stib mgui, ni rsëbtsieel zho, lëëque zha rguib ga yquianie tsieel zho stib mgui. Mgui ne ctsieelnia wnaa co, doḷ ga guñ zho, sac gon nole tsieel wnaa co.

Nodne yquidie miech

³³Ziyon to ganle zha nac stib ley ne biaan lo xmengol to rneew: “Zha ne gzeet lë Dios par glu zun zho miñe bnee zho, yase zeene gdeed zho tib gona, guñgaa zho pe tib dziina, ib none guñ zhow.”

³⁴Per gni naa lo to ganle: nodne sca gzeet to lë Dios, per ni gbaa nodne ne sca gzeet to, sac gon ga nac zaatne zob Dios; ³⁵per ni guidzliu, sac lo guidzliu nac zaatne zo ni me; per ni Jerusalén, sac ga nac guiedz nroob ne rnabey me; ³⁶guiaabgaa to gzeet to guic to. Gunscade to, sac gon zig nac guic to, per ni tib guitsguic to grielod csan nquits to, grielodgaa csan ngas tow. ³⁷Gacxe waa ncuane rgobey to zrieelo gun to, golguiab: “zun naaw”, togo riengaa to grieloda, golguiab: “grieloda”; tsoode to dieen cho gzeet to, sac gon led Diosdraa rnabey miñ co.

Nodne ctsire miech guieḷnë

(Lc. 6:27-36)

³⁸No stib ley znu rnee: “Teḷ cuee zho tib bziaalo luu, guiaand luu scase bleequ stib bziaalo zho, teḷ cueegaa zho tib lay luu, scaque been bleee stib lay zho.” ³⁹Sangue naa laa naa rso diidz lo to gon, gunscade to; zha ne gacntseeb lo to, gacndaande to lo zho. Teḷ cap zho lo to, tiblise golgac, ib gunde to glisague nia to.

⁴⁰Zha ne tsiezo to lo wxtis, ni lozh ga haxta gla zho xibiaagw to, golsaan güey zhow haxta xabnaḷ to goldeed lo zho. ⁴¹Zeene grieequia zha ne gnabey to güey to xyo zho tib grol hor, golgüeya, haxta tib hor goltsie güey tow. ⁴²Zha ne gnabtaa pe cos lo to, goldeeda; zig nac zha ne ziadtiñ, goldeed ncuane ziadtiñ zho, ctsirede to zho scase.

⁴³Ziyonle to ganle no zha ne znu rnee: “Zha ne rdzieel xtiidz luu bleyne zho, scagaa zha ne rlëe lo luu, blëenie zho.”

⁴⁴Per led scada gon, ñnone zaacse gac to lo zha ne rlëe lo to! ;Zha ne rgodee to, golnab lo Dios gunlay me zho! ⁴⁵Zeena sca glu nli xpëed meñ ne zob gbaa nac to. Golgan ganle teḷ me rnabey me rziini ngbidz lo grëse miech, zigtaa lo zha wena, zigtagaa lo zha ntseeba; scaque nisguie me rsiaaba rquiin zho grëse zho, rbed me dien cho ngable lo me, chogaa ngabd lo me. ⁴⁶;Gase nasca golwi! Teḷ loxaque zha ne ndzieeldiidz to zha cose rleyne to, ñniacxe zgaa to guieḷnzaac ne gdeed Dios? Haxta zha ne mazdraa ntseeb run miñ co. ⁴⁷Teḷ loxaque zha ne nacse menlidz to, lo zha cose zaacse rnee to, ;pe lëe guieḷwen ga na rlu to? Haxta zha ne runbeyd Dios run miñ co. ⁴⁸Goltsoxco sca ndzinli golgac, zigne rleyne Pxoze to (meñ ne zob gbaa) grëse miech, scaque none gun to.

Zha ne run xyudar samiech

6 Zeene gun to xyudar samiech to, ib gunde to zaatne ndxiepa miech ga so to glu to xquielwen to, par gan zho mine run to. Teine sca gun to, ygaade to guielnzaac ne gdeed PxoZ to men ne zob gbaa. ²Gacxe waa, zeene gun to xyudar zha ne guiend pe yquiu, gooldide tow zigne run grè zha ne rquiaalo rquia zdo samiech; sac zha co tel pe ncuane rgad zho, rzo zho len yadoo, rzo zho ro nèz rlozhd yquiaabdzie zhow par gacnana miecha, zeena zha ne gona guiab zho: ¡Zha wentaa zha qui! ¡Gneli naa lo to ganle ne sca rianzuiu zho lo miech, lèele gdib guielnzaac ne yгаа zho ga!

³Golguien sca, zeene gun to xyudar zha ne no tib liaadz, choot lo gzodiidzde tow, per ni zha ne mazdraa ndzieeldidz to nodne gacnana. ⁴Dzigo scagaa PxoZ to nroob guielnzaac ne gneedz me lo to, sac tel me grèsew ran me.

Zha gzodiidznie miech Dios

(Lc. 11:2-4, 34-36;
12:22-31, 33-34; 16:13)

⁵Scaque zeene gzodiidznie to me, gunde to zigne run grè zha ne rquiaalo miech wen nac zho. Sac tel zha co zeene rzodiidznie zho me, rzo zho zaatne ganpaa miech zho, zig nac len yadoo, zig nac len guiedz zaatne rded rzè miech. Gneli naa lo to ganle lèele guielnzaac ne yгаа zho ga. ⁶Golguien zeene gzodiidznie to me, golsèeb len lidz to dziits golsioog ro yu, ga golzodiidznie me. Ible tedsod nroob guielnzaac gneedz me lo to, sac nicle ncuane mazdraa ngeets zhliana, ran mew.

⁷Ni zeene nozodiidznie to me, gunde to ncuane nonee to lèew rlozh, lèew rsilo zigne run grè zha ne runbeyd me. Sac zha co rzac zho por nroob diidz gnee zho, por nzian vuelt gnee zhow dzigo squiaadiag mew. ⁸Guncade to, sac me

ne nac me PxoZ to gardle gnee to xliaadz to lo me laa me nanle pe nac ncuane rquiu to. ⁹Gacxe waa zeene gzodiidznie to me, znu golnee:

Dios, luu ne nac luu PxoZ no, zob luu gbaa;

luue nac men ne mazdraa ndzon.

¹⁰Luu nac men ne gnabey no, mine gnabeytaa luu zigne raca gbaa, scaque none gaca lo guidzliu nu.

¹¹Been guielnzaac bneedz ncuane dioow no nadze.

¹²Bzhiguiel been no perdon grèse dol ne ziodziuu no lo luu, zigne rdziuu no samiech no perdon grè falt ne run zho lo no.

¹³Gdeete luu diidz yquiu mendox no, been guielnzaac bla no lo ma.

Luu nac men ne rnabey, men ne rap poder, men ne mazdraa nroob. Mine rnab no nu, ndionpaa no zun luuw.

¹⁴Sca nagon none gnee to. Ni golgona ganle, zha ne gon gun samiech zho perdon tel pe nactaa falt ne been zho lo zho, scaque PxoZ to men ne zob gbaa, zun me zho perdon. ¹⁵Zha ne gund samiech zho perdon, niicle megaa gund me perdon xtol zho.

¹⁶Stiba, zeene nocuan to nozodiidznie to me, gunmbande to lo to. Sac grè zha ne rquiaalo miech wen nac zho, sca run zho; zeene nocuan zho xtsiinpaa run zho runmban zho lo zho par gan miech laa zho nocuan. Gneli naa lo to ganle, zha ne sca run lèele guielnzaac ne yгаа zho ga. ¹⁷⁻¹⁸Guncade to, nguieel golgac ine golzèe biegw guic to, golquiu lo to, zeena ni tib choot guiend laa to nocuan, loxaque PxoZ to gacnana, sac grèse ncuane rac ngeets ran mew. Grèse ncuane rac, me rana, me nac men ne gneedz tib guielnzaac nroob lo to.

¹⁹Tsienalde to loxaque dien zha gapchen to lo guidzliu rii, sac nac ncuane lo guidzliu rii rban ngbaana, rnitlo mxila, haxta noxtseeb guioochena.

²⁰Mazd goltsoxco yгаа to guielnzaac ndzon ne no gbaa, sac mine no gbaa, led yed min co guioochen, led yed min co cuan ngbaan, led yedgaaw gnitlo mxil. ²¹Golgona ganle, guielnzaac ne gon gunlo to, ga glu pa gdziñ xalm to, sac zaatne gunlo to guielnzaac co ga nac zaatne gdziñ xalm to.

²²Rriequia nac bziaalo to zig nac tib biini. Telne niapse lo grë ncuane ndzinli rwi to, dzigo gdipse xcuerp to no lo guielbiini. ²³Laa telne loxaque lo grë ncuane nonguield rwi to, dzigo gdipse xcuerp to no lo guielcow ga. iZha rnazhe lo guielcow co, tel lëëque biini noyac guielcow!

²⁴Golgona ganle, grielod gon gleynie to dimi, ni gleynieque to Dios. Ib none telne Dios rleynie to, me none gleynie to, togo dimigaaw, dimi golleynie.

²⁵Gacxe waa, gni naa lo to ganle: Tsođe to zhgab dien zha gban to lo guidzliu rii, pa griee pe gow to, pe guie to, pe gacwxabгаа to. Stiba, iñiacxe mazdraa non guielwagw lo xquielmban to? Xabгаа tow, iñiacxe mazdraa nona lo xcuerp to? ²⁶Golwi lo grë mguin ganle, led yed ma rquia gon, led yed ma rquia wlaap, led yed ma rgotsow pe guielgon, per row ma, sac Pxož to men ne zob gbaa, men co rdeed ncuane row ma. iTel to gon, mazdraa non to lo grë mguin co! ²⁷Ni lalnu paat rquiinda tant tso to zhgab. Telne guiab to tso to zhgab dien zha gacnool xtse to spalal yeense, iñiacxe zrieelo to gunnool tow?

²⁸Zig nac lar, ipe nacne tant tso to zhgab dien pe gacwxab to? Pe rwide to lo grë guiee ne ganle zëëb dan, zha rooba, led yeda rio zhgab dien zha gacwxaba, per niow rnaw; ²⁹gni naa lo to ganle, per ni rey Salomón con grë xab niazh me, blud me scataa niow.

³⁰Gase na ganle golwi, niicxe grë guiee dan co na, zna dze zob nguiaw,

gzhe widz laaw bidzle, laaw tseclе, ni scataa niow rgacwxab Diosa, ipe lel to dzigo ygacwxabd me, niicle ne squi gard guien to dib zdoо to gnalo to me?

³¹Tsođe to zhgab sca guiab to: “iBay pa griee pe dioow ne, pa griee pe dio ne, pa griee pe dziaacwxab ne?” ³²Grë miech ne runbeyd Dios, tibaque zhgab co rio zho. Sangue to golsoladz ganle, Pxož to men ne zob gbaa, nanle me pe nac grë xliaadz to, ³³me nac men ne gneedz ncuane yquiiin to, per ib none glo tsoxco to gban to zigne rnabey me. ³⁴Golguien sca tsođe to zhgab dien zha ted to gzhe widz, sac gzhe widz co zhaalaeue xco ne ziaad. Tib tib dze zhaase zhaase zhgab ne ziaadniew.

Nodne gzee zdoо ne cho zha rac

(Lc. 6:37-38, 41-42)

7 Blozh ga rëbchaa me lo zho: —Golguien, ib gunde to në gac zdoо to zeene ran to ncuane nonguield ne run stib miech, sac to tozhal gunquizh zhow; zeena scagaa Dios, guncsad me to. ²Sac gon tel zha rzac to samiech to, scasaque sac Dios to.

³iLëda ga gon tso to lozhd gzee zdoо to dien cho pe run, ni nenda mazdraa mine run to! ⁴iPe ro to glisqui to mine run stib zho, ni tel mazdraa nac mine run to? ⁵iGolguien sca glude to ncuane nacle to! Glo goltsoxco ndzinli gac to, dzigo lozh ga zac tsienee to lo stib zho zha gacndzinli zho.

⁶Ndzon nac Xtiidz Dios, gdeete tow lo zha ne rlëëniew, sac gon rriequia lo mëcw ga gdeed tow, ib zun zho mine run mëcw zacntseeb zho lo to. Naca zig nac quie perl, gdeete tow lo zha ne rleynieda, sac gon rriequia lo nguts ga gdeed tow, tel ngutsa niicle ncuane mazdraa non glaal zho lo ma, loxaque gzëëni maw.

Ncuaañe gnabtaa ne zгаа new

(Mr. 1:22; Lc. 6:31, 43-44,
47-49; 11:9-13; 13:24-27)

⁷'Ncuaañe rquiin to, goľnaba lo Dios, scagaa me zneedz mew. Goľguib teľ pe racladz to, me nac meñ ne gacnie to gdziel tow. Goľcuedzľe me, scagaa me scaania me to. ⁸Sac grěse zha ne rbig lo me nrab zho ncuaañe rquiin zho, rdeed mew. Zha ne rguib ncuaañe racladz, rannie me zho rdziel zhow. Zha ne rbedzľe me, rcaania me zho.

⁹'Golwi ganľe, zig nac to zeene nrab xpěďd to guiet gow win, ħniacxe ziazħ to co to tib quie nia win? ¹⁰Zeene nragaa win meľ, ħniacxe zdeed to tib meľ lo win? ¹¹Led rioxco to ľeě niapse ncuaañe wen rdeed to lo xpěďd to, niicle ne miech ntseeb nac to. Teľne sca rioxco to xpěďd to, peľeľ Pxoż to dzigo, meñ ne zob gbaa, tsoxcod me to. Ib tedsod grěse zha ne gnab lo me gdeed me ncuaañe rquiin zho, zdeed mew.

¹²'Zha ne racladz ndzinľi gac miech lo zho, none glo zho zaacse gac zho lo miech. Zigtaa ley ne psanľ Moisesá, zigtagaa miñe bnee grě zha ne biadteed xtiidz Dios padzeelaw, sca rnabeya.

¹³⁻¹⁴'Goľtsoxco sca tsienalľ to miñe rnabey Dios, niicle ne nac guieľmban co zig nac zeene rzě ne tib něz nia. Zhis zha ne rzěěb něz co, per něz co zгаа miech guieľmban ndzon ne rdeed Dios. Sac goñ zha ne mban zigne notaa guic zho, rrieequia tib něz nzhen ga zie zho; ndal miech ne zie něz co, per něz ne nitlo zho ga zie zho.

¹⁵'Nsin goľso lo zha ne gacladz yquidie to gně zho xtiidz Dios noteed zho, niicle ndooladz rlu zho pale cho grě mēcwxiiľ yeenľ, per zha ntseeba, masaque nac zho zig grě coyot blě. ¹⁶Zigne runbey miech tib yag por nex ne rquia low, scaque wen wen goľwi zha nac ncuaañe runľ zho, dzigo ga gunbey

to cho nac zho. Sac goñ zig nac uv, rquiada lo yag guiets; niicle guigwgaaw rquiada lo grě ľbě guiets. ¹⁷Tib tib yag nex rdeedsew xnexa. Tib yag wen, nex wen rquia low; scagaa yag ncuana, nex ncuaañe rquia low. ¹⁸Grieelod yquia nex ncuaañe tib lo yag ne rquia nex wen, ni grieelodгаа yquia nex wen tib lo yag ncuaañe. ¹⁹Gacxe waa grě yag ne rquia nex ncuaañe, paat rquiinda, ľeě gdib rruga, rloħ ga rzěěg zhow. ²⁰Minľ co nagon rne naa lo to, zha ne sca guiaad, por ncuaañe runľ zho ga gunbey to cho nac zho.

²¹'Grě zha ne rnee noxco zho miñe rnabey Dios, no zho lega rneesew. Nenda haxta rnee zho, naa nac meñ ne rnabey zho, per gdziñd zho zaatne rnabey Pxoż naa. Sac zha ne nľipaa runľ miñe rnabey me, zha cose gdziñ ga. ²²Galľ dze co, nzian zha ne grieequia gně lo naa: "Conque rdziunbey no luu, blactaa name bio no bionee no Xtiidz luu lo miech, nzian milagr ne bdziunľ no, haxta menđox bdziunľcooñ no zeene bzeet no ľe luu." ²³Niicle sca gně zho, ib ycaaniad naa zho, soněz naa zho; sac ni ľalnu beend zho ncuaañe ndzinľi.

²⁴'Zha ne rquiaadiag miñe rne naa, ni rioxco zho rban zhow zigne naca, rrieequia nac zho ga zig tib zha ndzielguic ne bzaa lidz zaatne nac tib lo quie. ²⁵Niicle riab guiedox per peet racd lidz zho, niicle rriee medox, nis naal ne raclo rded zaatne zoba ga, per rbixcheda.

²⁶'Laa grě zha ne rquiaadiag xtidz naa, ni rioxcod zho gban zhow zigne naca, ziaad gac zho ga zig tib zha nxen ne güeyzoob lidz zaatne nac tib lo yuzħ. ²⁷Znuse bnitlo lidz zho, sac zeene biab guiedox, lo medox ne briee, lo nis naal ne goclo bded zaatne zoba, znuse bixchew, ni stib ľew biaand.

²⁸Zeene bloħ bnee Jesús, grě miech ne noquiaadiag ga, per nľi rzee zdoo zho goñ zho zha rseed me, ²⁹sac rlu meñ rn-

abey nac me, led yed me rseed miech zig rseed grë maistr ley.

Biac tib mgui ne rlan lepr

(Mr. 1:40-45; Lc. 5:12-16)

8 Laa Jesús ziad-zëëb cho gui win co, miech guizhiu ne naļ zhits me, ²tibaque brieequia tib mgui ne rlan guiedzdox ne lë lepr, wbig me pquiits-gzhib me lo Jesús, rëb me:

—Tebaa siguieel luu gunguiac luu naa.

³Dzigo pxobnia Jesús guic mgui, rëb Jesús:

—Zunguiac naa luu. ¡Niinagazh laa luu guiaaꞁmbe!

Horcogazha laa grë guiedz co bnitlo.

⁴Dzigo rëbchaa Jesús lo me:

—Bina ganle, choot lo gzodiidzd luu gon zha biac luu; sinque güey lo pxoz güeyṣan gon ne rieguiaļ gdeed luu zigne rnabey ley ne psan Moisés, zeena gan zho ganle laa luu biacle.

Biac tib zha ne rquia dziin tib lo menguiib

(Lc. 7:1-10)

⁵Loxaque bdzin Jesús guiedz Capernaum, laa tib men ne rnabey lo xmenguiib zha Roma bdzinle lo me, rnab men co gunguiac Jesús tib zha ne quia xtsiin me, rëb me:

⁶—Been tib guieļnzaac beenguiac tib zha ne rquia xtsin naa, laa zho nix lidz naa ib gacd griaļ zho, mban rac zho yoobdox ne rquia zho.

⁷Dzigo rëbchaa Jesús:

—Peet nacda, na së naa guio ne gunguiac naa zho.

⁸—Coo —rëb menguiib co—, rieguiaļd csodziin naa luu sëe luu haxta lidz naa. Nanpaa naa zrieelo luu nugazh gnabey luu guiac zho. ⁹Sac zig nac naa no zha ne rnabey lo naa, ni ron naa mine rnabey zho; scagaa tel guiep naa

tib lo zhaguiib ne rnabey naa: “Güey nu”, rie zho; rnegaa naa: “Dë nu”, riaad zho; zha ne runгаа dziin lo naaw, mine rnabeytaa naa zho, run zhow. Scaque luu nagon nanpaa naa zrieelo sca gnabey luu guiac xmoz naa.

¹⁰Zeene gon Jesús sca rnee men co, rley me, rëb me lo grë zha ne zienaļ zhits me ga:

—Lo grë zha Israel, gard gon gan naa tib zha ne squitaa dib zdoo rnal Dios. ¹¹Ni goļquiaadiaga ganle, zdzin dze grële zha zit ne squi gnalo Dios, zha co ygaa sobnie Abraham, sobnie Isaac ni Jacob zaatne rnabey Dios. ¹²Laa grë zha Israel, niicle nac zho zha ne nac didz gdzin ga, leļ lo ncow nëz ley guiaaꞁ zho, ga tso zho goonnë zho, haxta gow lay zho lo guieļnëdox co.

¹³Blozh ga rëbchaa me lo menguiib co:

—Bzë nasca, gocnan ganle zigne bliladzse luu guiac xmoz luu, sca gaca. Horcogazha laa moz co biac.

Biac xniadzoop Pedr

(Mr. 1:29-34; Lc. 4:38-41)

¹⁴Laa zeene bdzin Jesús lidz Pedr, gon me laa xniadzoop Pedr nix rlan xlëe.

¹⁵Dzigo bded me zaatne nix zhuz co, zigne bzhen me nia zhuz laa xlëe co blëz. Horcogazh guche zhuz beenlo zhuz ncuane dow zho.

¹⁶Ziedzele dzew, laa ngbidz rzëëblew, zeene bdzin grë miech co, nzian grë zha ne nosacsi mendox bdzinne zho lo me. Grëse zho beenguiac me, goctox me lo grë mendox ne nosacsi zho ga, benxoon me ma; ni zha ne rlangaa pe stib guielguidz, grëse zho beenguiac me.

¹⁷Ga brieequia mine bzeet Isá, men ne biadteed xtiidz Dios lo miech padzeela, zeene rëb me: “Grëse xquieļnë ne, grëse guielguidz ne rziaac ne, me biw.”

Zha ne racladz sēēb xnēz Jesús

(Mr. 4:35-41; Lc. 8:22-25; 9:57-62)

¹⁸ Zeene gon Jesús scataa ndal miech ne goclo lo me ga, dzigo bnabey me xpēēdscuel me gzhixcuaa zho, sac laa zho no tedquia stib nēz ro nisdoo co. ¹⁹ Dzigo wbig tib men ne nac maistr ley lo me, rēb maistr co:

—Zaatne tsietaa luu gon, sēnal naa zhits luu.

²⁰ Dzigo rēbchaa me:

—Gocnaḡa ganle, naa ne nac naa Mgui ne pxeel Dios, peet rapd naa nu, mazd zig nac grē mēz, grē mguin, rap ma zhiblee ma, rap ma zhiptsieez ma; per naa per ni zaatne gaguies naa quianied naa.

²¹ Wbigaque stib zha ne rzēnal le zhits me, rēb zho:

—Ye naa gon sēnal naa zhits luu, per bzhiguiel bneedz diidzbey cuēz naa gangazh naa tsoliu pxoz naa.

²² Pquiab me rēb me:

—Dēnal zhits naa. Psaan, nzian grē zha gut no, tsow tsiequeets zho samengut zho.

²³ Dzigo laa me bzēēbnie xpēēdscuel me tib len barcw, laa zho zie. ²⁴⁻²⁵ Laa zho zie lo nis co, tibaque zeene psilo brie tib medox, masaque rlis me lo nis co, laaw psilo rzēēb len barcw. Dzigo lēlēd güey zho güeycuaan zho me, sac lēētaque nixguies me.

—Ligier ganle —rēb zho—, ble mcaal lo luu. ¡Bui ganle laa ne nitlo lo nis rii, csaand luu guet ne nu!

²⁶ Dzigo rēbchaa me lo zho:

—¿Pe nacre squitaa rdzieb to? ¡Gardaque dzigo lēē gliladz to cho nac naa!

Dzigo guche me, bnee me lo me co, bnee me lo nis co cuedzew. Horcogazha blēz me co, niicle nis cow laaw bredze. ²⁷ Zeene gon zhow, bzee zdoo zho.

—Bay chozhe waa nac men rii —nee zho—. ¿Zha nac ne haxta me, haxta nis ron xtiidz me?

Meḡ Gadar ne nosacsi menḡox

(Mr. 5:1-20; Lc. 8:26-39)

²⁸ Laa zho bdziḡdze stib nēz ro nisdoo co, zaatne nac xtan zha Gadar, zeene brieequia chop mgui ne nosacsi menḡox, bdziḡ lo Jesús ga. Zha ntseeba, rdzieb miech zho, choot rdete nēz co. Len baa brie grop mgui co bdziḡ zho ga, ²⁹ nguedz roptsie zho nee zho:

—¡Peet guḡd luu no Jesús, psaan no! Rdziunbey no luu, Xpēēd Dios nac luu. Ne nligaa been guieḡnzaac csacsid luu no niinaga.

³⁰⁻³¹ Zitlaaque ga ndxie tib dzoon nguts notop lag, dzigo bnab grē menḡox co lo Jesús rēb ma:

—Telne cuee luu no nu, bzhiguiel bneedz diidz lose grē nguts qui gdziḡ no.

³² —Niinaga sca goḡtsie —rēb me.

Zigne psaan menḡox co grop mgui co, güey ma bdziḡ ma lo grē nguts co. Horco psilo grē nguts co, rquiaa ma corr güeypix ma tib ro yeedox ne quia ro nisdoo co, bliaal ma lo nis, grēse ma gut.

³³ Zha ne quianap grē nguts co, gzase zho bzhooḡ. Güey zho lad guiedz güeyzodiidz zho zha goc grē nguts co, ni bzodiidz zho zha biac grop mgui ne nosacsi menḡox ga. ³⁴ Grēse miech co, brie zho zieso zho. Zeene bdziḡ zho gon zho laa Jesús zo ga, dzigo bnab zho lo me siguiel me gbi me xtan zho.

Biac tib men ne gutoo

(Mr. 2:1-12; Lc. 5:17-26)

9 Dzigo wbiireque bzēēb zho len barcw, bdziḡ zho guiedz Capernaum stib, sac ga nac zaatne rbēz Jesús len dze co. ² Zhisaque goc bdziḡ me, laa zho bdziḡniele tib men rzacnē lo me, dipse men co gutoo, ib gacd sē me. Lo yag zhoob me bdziḡnie zho me ga.

Zeene gon̄ Jesús dib zdoos grē zha co rnaloo zho ne me gunguiac meñ rzacnē co, rēbchaa me lo meñ rzacnē co:

—¡Nley bloo zdoos luu xin! ¡Laa naa beñle perdon grēse xtoł luu!

³ Ga zob blalaa maistr ley, zeene gon̄ zho sca bnee me, bza zdoos zho rēb zho: “¡Quiaguitnie meñ qui Dios gon̄ squi rzē xtiidz me!” ⁴ Bienga Jesús sca rza zdoos zho, dzigo rēbchaa me:

—Lēda i gon̄ squi rza zdoos to. ⁵ Nli nganda guiab ne lo miech: “Laa naa beñle perdon grēse xtoł luu”; per grielod lega guiab ne laa ne gunguiac zho. ⁶ Gacnan̄ to sca ganle naa ne nac naa Mgui ne pxeel Dios, ible rap naa poder par gun̄ naa miech perdon.

Dzigo rēbchaa me lo meñ rzacnē co:

—¡Niinagazh guche i, bi yag ne bzhoob luu i, zeene bzē!

⁷ Zigne sca bnee me, laa mgui co bzoli, laa me zey. ⁸ Grē miech guizhiu ne ndxie ga, zeene gon̄ zho sca beenguiac me mgui co, bdzieb zho. Psilo zho rdeed zho xquizh lo Dios, scataa poder ne bdeed Dios lo me.

Bredz Jesús Matew

(Mr. 2:13-17; Lc. 5:27-32)

⁹ Blozh ga laa Jesús briece ga. Ro nēz zieded me gon̄ me tib meñ lē Matew, lēetaque laa meñ co zob lo mezha zaatne razh dimi ne rey lo zha Roma; sac me rcaania dimi co. Dzigo bredz Jesús me tsienal̄ me zhits Jesús. Ga guso me, laa me zienal̄.

¹⁰ Bded ga güeynie me Jesús tib wagw lidz me. Grē zha ne rcaania dimi ne razh lo zha Roma, grē zha ne zēeb diidz nac zha ntseeb, tipse brenie Jesús zho grē xpēēdsuel me.

¹¹ Blalaa zha farisé, gon̄ zho sca tipse zobnie me grē zha co, bded ga, rēbchaa zho lo xpēēdsuel me:

—¡Mod scataa na rownie xmaistr to grē zha ngoopdol̄, grē zha beed ne nac recaudador!

¹² Bin Jesús sca quianee zho, dzigo rēbchaa me lo zho:

—Nanle to ganle, zha ne run̄ rmed, zaatne no zha rzacnē ga rquiin zho, ¿niacxe squiin zho zaatne no zha ne ndip ndaan?

¹³ Golsoladz ganle znu rnee Dios: “Laa naa racladz gacndooladz miech, yquia zdoos zho samiech zho, racladzdaxe naa waa guiaad zho dieen̄ peraa guiaadlogon zho lo naa.” Mazd ganle goltsie, tsow golsob golguien̄ dien̄ zha nacne sca rnee me. Tel̄ naa, zialguibd naa miech wen, sinque laa naa zialguib grē zha ngoopdol̄.

¿Pe nacne rcuand xpēēdsuel Jesús?

(Mr. 2:18-22; Lc. 5:33-39)

¹⁴ Bdzinaque xpēēdsuel Juan Bautist, bnabdiidz zho lo Jesús, rēb zho:

—¿Pe nac waa ib rcuand xpēēdsuel luu? Ni no grē no zha farisé, zhiga zhiga laa no rcuanle.

¹⁵ Pquiab me rēb me lo zho:

—Zaatne nadien̄ noyac tib guieltsieel, ¿pe niacxe lega csilo grē zha ne ndxie lo lni tso zho guielnē, ycuan zho, ni ran̄ zho laa mgui ne notsieelna zo lo zho? Per dzin̄ dze zeene laa mgui co gbiche, ni zeene laa dze co gdzin̄, dzigoson̄ nagon̄ riegual̄ tso zho guielnē, riegual̄ ycuan zho.

¹⁶ Ranle to ganle, zha ne rquiaabdie tib lē lar, yquiaad zho lar cub lad lar gox, sac zha ne sca gun̄ paat yquiind wquiaabdie co. Zeene laa lar cub gbe, lēēque lēēw gun̄nat zaatne nriez lar gox.

¹⁷ Scaque tsod zha ne cotsow vin cub tib len̄ guid ne padzeela noquiin, sac stsiez nziu cuba; dzigo niicle guid cow, niicle nziugaaw laaw nitlo ga. Gacxe, tel̄ nziu cuba none len̄ guid cubaque tsotsowa.

Brieëban tib mëdwnaa yeen

(Mr. 5:21-43; Lc. 8:40-56)

¹⁸Lëëtaaque sca quianee Jesús lo xpëëdsuel Juan Bautist, zeene bdziñ tib mgui ne nac zha non yadoo. Zigne bdziñ me pquitsgzhìb me lo Jesús, rëb me:

—Been tib guieInzaac së luu guio ne lidz naa. Laa tib xpëdwnaa naa blozh nina, per nanpaa naa telne cxobnia luu guic win, zbeeban luu win.

¹⁹Dzigo bio Jesús nëz zienal me zhits men co, gza xpëëdsuel me. ²⁰Lad grë miech ne zienal ga, lad co no tib men wnaa, gocle tsiipchop iz rlan me tib guielguidz, rzac me zigne rzac grë men wnaa gzob mëë, tibaque rlan mew ib rbëzda.

Ga zie me, zeene wbig me nëz zhits Jesús, bzhen me ro lar ne mbix Jesús, ²¹sac tibaque güeynie guic me, ziac me totsaque yгаа xab Jesús nia me. ²²Dzigo wbiere lo Jesús, dze bui Jesús lo me.

—Xin —rëb Jesús—, peet tsienied guic luu. Laa luu biac sacne bliladz luu naa.

Gataa laa wnaa co biac lo guielguidz co.

²³Laa zeene bdziñ Jesús lidz men rnabey co, laa zha ne rool ndxie, noquiaa zho grë di ne rac lo ngutoo, grëraa zha ne ndxie ga, nguiedz zëëb tsi zho roon zho, tib ruid ne rac. ²⁴Dzigo rëbchaa me lo zho:

—Golree nëz ley, sac gon gute mëëd qui, nixguisse win.

Zha ne rlëë, zha ne rzhidzniegaa me, laa zho brieë ley. ²⁵Dzigo laa me bzëëb len yu zaatne nix mëëd co, bzhen me nia win. ¡Horcogazha laa win guche!

²⁶Grëse guiedz ne ndxie dib gax ga, gocnan miech scataa milagr nroob ne been me, bleeban me mëëd co.

Biac chop zha ne rold lo ni tib zha ngop

²⁷Zeene laa Jesús wbi ga, nëz zie me brieenal chop zha ne rold lo zhits me, nguiedz rbedz zho rnee zho:

—¡Jesús, xingan David, pquia zdoo no!

²⁸Bdziñ Jesús yu ne rbëz me, laa zho wbig lo me. Dzigo rëbchaa me lo zho:

—¿Dib zdoo to dzigo lëë riladz to zrieelo gunguiac naa to?

—Dib zdoo now —rëb zho.

²⁹Dzigo pquiaania me zhits bziaalo zho, ni rëb me:

—Mine bliladz to i nasca, laaw gac nina zigne bliladz tow.

³⁰¡Horcogazha laa lo grop zha co biac!

Dzigo pso Jesús diidz lo zho choot lo gzodiidzd zho zha biac zho, ³¹ni zigne brieë zho ga, laa zho bzodiidzlew. Blozh ga, grëse guiedz ne ndxie dib gax ga, gocnan miech scataa nac milagr ne run me.

³²Loxaque wbi grop zha ne biac lo ga, laa bla zho bdziñlaque, bdziñnie zho tib men ne nosaci mendox, psannop ma men co. ³³Dzigo benxoon Jesús mendox co, zeene laa ma bzhoon laa men co psilo bnee. Grë miech guizhiu ne ndxie ga, per nli rzee zdoo zho, rnee zho:

—¡Wlaltaa gard dzian ne tib men ne squitaa gun grë milagr qui!

³⁴Laa grë zha farisé rnee:

—Ma ne rnabey lo mendox nacie men qui, gane rrielo runxoon me mendox.

³⁵Grëse guiedz ne ndxie gax ga, zigtaa guiedz nrooba, zigtagaa guiedz lasa rie Jesús rieseed me miech. Zaatne rdziñtaa me, rie me xyadoo zho rnee me lo zho zha racladz Dios gban zho, ni runguiac me zho tel pe nactaa guielguidz ne rzac zho.

³⁶Zeene ran me grë miech guizhiu ne rcaalsa lo me, rquia zdoo me zho, sac ran me mban rac zho guieñd cho tib zha

ne gacnie zho, rac zho zig grë mëcwxiiil yeen ne guieñd xbaxtor.

³⁷⁻³⁸ Tib vuelt haxta rëb me lo xpëëd-scuel me:

—Golnab lo Dios cxeelraa me zha ne gun xtsiin me. Golwi ganle pe zhidaa grë miech qui, quiambëz zho dien cho gnee Xtiidz Dios lo zho. Masaque nac zho nina, zig tib guielgon ne golle gliiap.

Bzo Jesús zha ne tsienee xtiidz me

(*Mr. 3:13-19; Lc. 6:12-16*)

10 Blozhse sca bnee Jesús, dzigo bredz me gza tsiipchop zha ne nac xpëëdscuel me ga, bzo me zho tsienee zho Xtiidz Dios lo miech, bdeed me poder lo zho guncxoon zho mendox zaatne nosacsi ma miech, ni gunguiac zho grë men rzacnë.

²⁻⁴ Znu lë gza tsiipchop zha co:

Simón (zha ne rneeque zho Pedr),

Ndrés (bets Simón),

Jacob ni Juan (zha co nac xingan Zebedé),

Lip,

Bartol,

Mazh,

Matew (zha ne ptop dimi ne razh lo zha Roma),

Jacob (xingan Alfé),

Lebeo (zha ne rneeque zho Tadó),

Simón (zha ne no lo partid ne racladz griee zha Roma Israel),

ni Judas Iscariot (zha ne güeyto Jesús).

Pxeel Jesús zha ne tsienee xtiidz me

(*Mr. 6:7-13; Lc. 9:1-6*)

⁵ Blozhse ga, pso me diidz lo zho zha tsie zho, rëb me lo zho:

—Nanle to nagon, tsiede to zaatne no grë zha ne nacd zha Israel, niicle sëëbde to grë guiedz ne ndxie xtan zha Samar.

⁶ Zaatne no grë zha Israel, gase goltsie; lëë grë mëcwxiiil ne nonziaab ga.

⁷ Goltsie, goltsienee lo zho gacnan zho ganle laa dze ziaadgaxle zeene laa Dios csilo gnabey.

⁸ Grëse zha ne rzacnë, golgunguiac zho; zha ne rlan guiedz lepr, golshanmbe zho; zaatne nix zha ne gutle, golcueeban zho; grë zha ne nosacsi mendox, golguncxoon ma. Peet gnabde to lo miech, golguien ganle lega nbedz naa poder qui lo to, bzhiide tow.

⁹⁻¹⁰ Peet güeyde to, xab tow, lab tow, mine nacwse to, mine quiase ni to, mincose goltsienie. Güeyde to dimi, per ni tib quiet güeyde to; sac zaatne tsiegun to dziin rii, ib ga none gneedz zho ncuuañe gow to.

¹¹ Guiedz ne gdzintaa to, golguib dien pa lo no tib zha ne ndzinli, dzigo lidz zha co goltsiebëz, haxta gza dze ne laa to gbi guiedz co. ¹² Zeene noguib to pa cuëz to, yu ne tsie to, zaacse golgac, golquiaabdiuzh zha ne no yu co, ¹³ golnab gunlay Dios zho. Telne wen gac zho lo to, zunlay me zho, togo guncasdgaa zho to, dzigo toque gunlay me. ¹⁴ Zha ne sca siguiel ycaania to, golrieegazh lidz zho; guiedz ne siguiel zho yquiaadiag zho mine nonee to, golbigazh guiedz co; gollit grë yudie co ni to, gollu lo zho ganle led xtol-draa to ga tel laa zho nitlo. ¹⁵ Gneli naa lo to ganle zeene gal dze ne laa Dios gun xquielwxtis me, bii lëëtaa gac guielnë ne yгаа grë miech ne bio guiedz Sodom, guiedz Gomorr, lëdle guielnë ro ne yгаа grë miech ne sca siguiel ycaania to.

¹⁶ Nsin golso, golguien ganle rreequia tib mëcwxiiil yeense nac to, ni laa naa rxel to zaatne no grë coyot dox. Ndoooladz golgac, niowse golgac lo miech zig rac grë palom, per scagaa con cuidad goltsie, golgan ganle zha rzë meel. ¹⁷ Nligaa nsin golso, sac gon ib ziezo miech to lo wxtis, ni lëëque len yadoo ga quin zho to, ¹⁸ haxta ziezo zho to lo grëraa zha nroob ne rnabey. Laa zho guna, loxaque ne nac to zha ne no

xnëz naa, ni gagaa nagon̄ gdeeda diidz gnee to xtidz naa lo grë zha co, ni lo grëragaa miech ne nacd zha Israel.

¹⁹'Zeene sca tsiezo zho to lo grë zha rnabey co, tsode to zhgab dien̄ pe gnee to, dien̄ zhagaa gnee tow; sac zeene sca tsiegala, Dios gneedz diidz ne gnee to. ²⁰Led tod gnee, sinque, ¡zhiEspíritu Pxoꝝ to men̄ ne zob gbaa, men̄ co gnee ga!

²¹'Zlëenedox miech zha ne no xnëz naa. Zio zha ne lëëque bets zho, zha ne lëëque pxoz zho, zha ne lëëque xpëed zho ctsidil̄ zho, tsielo zho zho ladznia zha ne gut zho. ²²Tel̄ to, guiets yag gan̄ miech to, per tel̄ne dziits so to tel̄ pe nactaa lo guiel̄në ne ted to, ib zgaa to tib guiel̄mban ndzon ne gdzindraa dze lozh. ²³Guiedz ne no to, zeene laa miech csilo yquiaanāl to, gol̄rieë ga, gol̄tsie stib guiedz. Gneli naa lo to gan̄le, niicle stib guiedz stib guiedz tsie to, gardaque lozh tsieted to grë guiedz ne ndxie Israel zeene gal̄ dze ne laa Mgui ne pxeel̄ Dios guiaad stib.

²⁴'Gol̄wi gan̄le zha ne nac mëedscuel, tsod zha ne ndziibraa non lo maistr, zha ne rquiagaa dziin, tsod zha ne nonraa lo zha ne rree zho. ²⁵Tel̄ zha gun̄ miech maistr, scaque gun̄ zho mëedscuel; tel̄ pe cteed zho bizhuan dziin, min̄coque cteed zho zha ne quia dziin. Gacxe waa peet tsienied guic to, tel̄ pe nactaa ncuane gnee miech to, sac gon̄ niicxe naa name ne nac naa Dad, mendox rnee zho nac naa.

²⁶'Gdziebde to, zdziin̄ dze ne glu gan̄le cho zienāl mine nac diidzli, chogaa zienāl guiel̄ntseeb, gal̄ dze co grësew xooobnen̄.

²⁷'Grëse mine rne naa lo to zeene nese rziodiidza, gol̄neew lo miech, haxta glaa guic yu gol̄so, nguiedz gol̄neew. ²⁸Gdziebde to miech, gol̄guien̄ gan̄le no tib men̄ nroobraa, lëë men̄ co nac Dios. Tel̄ miecha, loxaque cuerpse zrielo zho

csacsi zho, sangue Dios, zrielo me gnitlo me miech dib xcuerp zho, dib xalm zho len̄ gabil̄.

²⁹'Nligaa gdjebde to, csaand Dios lega pe gac to. Gol̄wi gan̄le, zig nac grë mguin̄ niicle ne rzac miech peet nond ma, haxta chop ma rdeed zho por tib gaay centav; per Pxoꝝ to gon̄ men̄ ne zob gbaa rsaanladzd me ma, ni tib ma guete tel̄ne gdeete me diidz. ³⁰Pelel̄ to dzigo csaan me, haxta guits guic tow, grësew ngaba lo me. ³¹Gdziebde to sca, gol̄guien̄ gan̄le nonraa to lo tib dzoob mguin̄.

³²'Gneli naa lo to gan̄le, zha ne glu lo miech nacie zho naa, scaque naa zeen gal̄ dze co zlu naa lo Pxoꝝ naa men̄ ne zob gbaa, nacie naa zho. ³³Sangue zha ne ctoladznie naa lo miech, scaque naa ziep naa lo me run̄beyd naa zho.

³⁴'¡Guiabde to togo laa naa zial̄ loxaque par cuin̄ wense miech! Lëda gon̄, ye zial̄ naa zial̄gun̄ctil̄ naa zho. ³⁵Sac zha ne sëëb xnëz naa, zlëënie xpëed zho zho, tel̄ mëedgaaw, zlëënie pxoz zho zho; scaque men̄ wnaaw, zlëënie xinzhizh zho zho, zha ne nacgaa nguzhizha, zlëënie xnial̄ tsieel zho zho. ³⁶¡Lëëque men̄lidz miech gac zha ne glëë gan̄ zho!

³⁷'Zha ne mazdraa rquia zdoo glëënie pxoz zho zho, glëënie xnial̄ zho zho, glëëniegaa xpëed zho zho, porne gun̄ zho mine rnabey naa, peet xtsiin̄d zha co par ygab zho xnëz naa. ³⁸Scaque zha ne yquia zdoo cueeladz zho zho guiaadnal̄ zho zhits naa, grielod ygab zho lo naa. ³⁹Sac grëse zha ne rquia zdoo guiel̄mban ne rap zho lo guidzliu rii, ygaad zho guiel̄mban ndzon ne gneedz Dios; sangue zha ne cueeladz xquiel̄mban, niicle tel̄ csacsi miech zho loxaque ne no zho xnëz naa, ib zgaa zho guiel̄mban ndzon co.

⁴⁰'Niina gon̄ ne squi tsie to, grëse zha ne zaacse ycaania to, zaacse gnee zho lo to, rrieequia naa ga sca ycaania zho; ni

zha ne sca ycaania naa, rrieequia men ne pxeelle naa ga sca ycaania zho. ⁴¹Zha ne cuézlo tib men ne noteed xtiidz Dios lo miech, guielnzaac ne gdeed Dios lo men co, ye zho yгаа guielnzaac co. Zha ne cuézlo tib miech ndzinli, guielnzaac ne gdeed Dios lo zha co, ye zho yгаа. ⁴²Ni zha ne gneedz maase tib zhigaque nis yag lo cho tib zha win ne nac to ne nac to xpëédscuel naa, ib tedsod zdeed Dios guielnzaac ne tsieguial zho.

Zha ne pxeel Juan Bautist

(Lc. 7:18-35)

11 Zeene blozh pso Jesús diidz lo gza tsiipchop zha co, dzigo laa zho zie. Blozh ga laa me brieque, güey me grë guiedz ne ndxie gax ga, güeyseed me grë miech co.

²⁻³Len dze co no Juan Bautist ladzguiib, ga no Juan bin Juan zha nactaa grë milagr ne run Jesús, dzigo pxeel Juan bla xpëédscuel Juan güeynabdiidz zho lo me, dien pe lëele Men ne zëëble diidz cxeel Dios lo guidzliu ga nac me, te dzigoraa gdziñ men co ye. ⁴Dzigo rëbchaa me lo zho:

—Grë ncuaane bin to rne naa, grëgaa ncuaane gon to run naa, goltsie golzodiidza lo Juan. ⁵Ran to ganle grë zha ne rold lo, grë zha ne gacd së, grë zha ne rlan guiedz lepr, grë zha ne rcuaat, laa zho riac; haxta grë zha ne gutle, laa zho rrieeban. Xtiidz Diosa, laaw quiagaaz lo grëse zha ne rquiina. Grësew, golzodiidza. ⁶Ni golguiab lo me, dichos zha ne racchopd guic, sinque tiblque rac zho rililadz zho cho nac naa.

⁷⁻⁸Zeene laa xpëédscuel Juan zey, dzigo psilo me bzeet me Juan lo miech guizhiu ne ndxie lo me ga, rëb me:

—Zeene güey to dan ngan co, güey to lo Juan, ¿zha dien güeynie guic to nian to me? ¿Pe rëb to rlu me zig tib goobgui ne nëzrii nëzrec rey me, te rëb to ye masaque grë lar niazh ne racw zha

non nacw me? Per nanle to ganle zha ne scataa racwxab riod zho dan. ⁹Nli-gaa cho dien güeynie guic to nac me, ¿te rëb to ye tib men ne noteed xtiidz Diosa? Gacnan to ganle tib men ne noteed xtiidz Dios gon nac me, ni me nac tib zha ne mazdraa nroob lo grë zha ne ziyun dziin co. ¹⁰Me ga raquiet lo Xtiidz Dios zaatne znu rnee:

Sxel naa tib zha ne tednerga lo luu, zha co gzhixcuaa nëz ne ted luu.

¹¹Ne nligaa lo grëse mgui ne zieded lo guidzliu gard grieequia tib zha ne mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

¹²'Desde psilo Juan noseed me miech zhapaa racladz Dios gban zho, ni rchoobnis me zho, hor co psiloque briequia zha ne rlëenie zhiwseed Dios, gacxe waa zha ne nlipaa rdziebd, zha cose rcaaniaw, rzëëb zho xnëz me. ¹³Mazd glo tibaque raquiet ne laa men ne cxeel Dios ga guiaad, zigtaa lo leya, zigtagaa grë zha ne biadteed xtiidz Diosa, bzeet zhow. Ni niina ne laa Juan biaad, laa men co blanso. ¹⁴Juan gon biaad niina zig no diidz guiaad Lí; golgacnan sca ganle cho nac me. ¹⁵Zha ne racladz guien zho zha nac grë mine none naa nu, ¡yquiaadiag zhow!

¹⁶⁻¹⁷'Nac grë miech rii, riend zho pe racladz zho. ¿Cho ganle run zig run zho? Lëë zho run mine run mëédlas ne rio wguit ro nëz, niicle rool xcompañer win di nguieel rreed win, niicle roolгаа zho di ngan, roond win. ¹⁸Sac gon biaad Juan, ran zho rowd me tel pe ncuaane row zho, ried me ncuaane rie zho, dzigo laa zho rnee mendox nacie me. ¹⁹Blozh ga ziaad Mgui ne pxeel Dios, ran zho row me, rie me, laa zho rneeque, lega rowcho me, lega riecho me, ib riend me cho rtsieelsa me, haxta grë zha ngoopdol, haxta grë zha yozh ne rtop dimi ne razh lo zha Roma rzënie me. Sca rnee

zho, sangue zha ne rgaa guielbiini ne rdeed Dios, rien zho cho nac zha ne zi-aadgun xtsiin me.

**Miech ne bzhiguiel
ncaania xtiidz Jesús**

(Lc. 10:13-15, 21-22)

²⁰ Blozhse ga, dzigo psilo Jesús bzeet me mine yгаа grë zha ne pcaaniad xtiidz me; sac nzian guiedz ne güey me niicle gon zho grëtaa milagr ne been me, per ib psaand zho xquielntseeb zho, rëb me:

²¹ —jProbsaxe grë men guiedz Corazín, grë men guiedz Betsaid! Sac gon gonpaa zho grë poder ne rap Dios, per ib psaand zho xquielntseeb zho. Tel niaca mine nian grë men guiedz Tiro, grë men guiedz Sidón, grë milagr ne gon zho ben naa, ib ndedsod mban niac grë zha co nio zho guielnë, zëeb nsaan zho xquielntseeb zho, mbig zho lo Dios. ²² Gacnan zha Corazín, gacnan zha Betsaid sca ganle, gal dze ne gun Dios guielwxtis, lëëtaa caxtigw ne yгаа zha Tiro ni zha Sidón, mazdraa mine yгаа zho. ²³ Scaque zha Capernaum, masaque rzac zho niina zha nziuuraa lo Dios, per gacnan zho ganle haxta quiet lo ncowdoo ne guey mendox ga guey zho; sac gon tel niaca mine nian zha Sodom grë milagr ne ran zho noyun naa, ible nsaan zha co xquielntseeb zho, nitlod zho. ²⁴ jGacnan zha Capernaum ganle gal dze ne gun Dios guielwxtis, lëëtaa caxtigw ne yгаа zha Sodom, mazdraa mine yгаа zho!

²⁵ Dzigo bzodiidznie Jesús Dios, rëb me:

—Dios luu ne nac luu Pxoз naa, luu rnabey gbaa luu rnabey guidzliu, rnedz naa xquizh lo luu sac grë mine noyun luu nu niina bdeete luu diidz niacnan grë zha raca, sinque laaw blu luu lo grë zha ne nac zig grë mëëdlas. ²⁶ Sca quiayun luu, sac ib scale racladz luu gaca.

²⁷ Blozh ga rëb me lo grë miech ne ndxie ga:

—Grëse ncuaane ran to quiayun naa, Dios men ne nac Pxoз naa, me bneedz poder rii lo naa; sac ib laa me bzo naa, naa gūa. Xpëed me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gacladz naa gunbey me, zunbey zho me.

²⁸ Grëse to ne nac to zha ne në noded, rdib rdzag to quiaguib to dien zha guiaanwen zdoо to, goltë lo naa, naa gneedz tib wdziiladz ndzon lo to. ²⁹ Nligaa golbig lo naa, goltënal zhi-wseed naa, golgac tib miech tibliladz, tib miech ndooladz zigne nac naa; zeena gap to descans co. ³⁰ Nacda ncuaane ngan, nacda ncuaane guiab to glëbde to gun tow.

Dze ne rdziiladz zha Israel lo dziin

(Mr. 2:23-28; Lc. 6:1-5)

12 Len dze coquew, tib dze lëëtaque dze ne rdziiladz zha Israel lo dziina, bded Jesús zaatne zëëb zhobxtil grë xpëëdsuel me. Ga zie zho rcaabedz zho, dzigo psilo zho ptop zho mzion co dow zho zhobxtil co. ² Gon bla zha farisew, dzigo rëb zho:

—jLëda i gon noyun to, noguiits to ley i! Golguien ganle dze nda nac dze rii.

³ Pquiabchaa me rëb me lo zho:

—jPe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho? ⁴ Rneew, bzëëb me len yadoo güey nab me quietxtil ne nac gon, downie me grë zha ne ziegza me ga, ni loxaque zha ne nacse pxoз row quietxtil co, jpe led bdiitsd me ley ga? ⁵ Lo xley Moisés name zhobnee ganle zha haxta dze ne rdziiladz to lo dziin run grë pxoз dziin len yadoo, ni rneeda dol ga sca run zho. ⁶ Golwi ganle zha rats ley par gac dziin len yadoo, ni yadoose ga,

gacnan to ganle lo to nu zo men ne maz-draa non lo yadoo.

⁷Rnee Dios lo Xtiidz me, quiambézd me dien peraa gun miech, dien peraa co-gon zho lo me, sinque mine racladz me guien zho yquia zdoo zho samiech zho. Tel niaca mine nli rien to min co, zien to gdziibdoldje to zha ne rapd dol. ⁸Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

Biac tib mgui ne mband tib nia

(Mr. 3:1-6; Lc. 6:6-11)

⁹Bded ga, gol stib dze ne rdziiladz zho lo dziina, güey Jesús len yadoo win ne zob lad guiedz co. ¹⁰Lad grë miech ne ndxie len yadoo co, no tib mgui ne mband tib nia; porque laa zha farisé bn-abdiidzlaque lo me dien pe nonguiela gunguiac me miech dze ne rdziiladz zho lo dziin. Sca bnabdiidz zho, sac quiaguib zho dien pe yquiaaqui zho me tsiezo zho me lo wxtis.

¹¹Dzigo pquiab me rëb me lo zho:

—Togase dien, zha run to zeene lëetse dze rii rietsobe tib xpëcwxiil to tib len blë nroob, led zëeb lëe rie to riebee to ma? ¹²Tel sca rquia zdoo to mëcwxiil, jgolguien ganle mazdraa gon non miech lo tib mëcwxiil! Gacxe waa ible nonguiela gun ne xyudar samiech ne, niicle maase dze nda nac dze co.

¹³Dzigo rëbchaa me lo mgui ne në nia ga:

—jBzigaa nia luu!

Zigne bzigaa mgui nia mgui, bi-acgazha, biaanā zig nac stib mine ndaan-taque ga.

¹⁴Grë zha farisé co, zigne brie zho ga laa zho psilo bnediidz dien zha gdeeda diidz gut zho Jesús. ¹⁵Bien Jesús sca no guic zho, dzigo mazd brie me ga. Miech guizhiu ne zienal zhits me, grëse men rzacne ne zienal ga, beenguiac me

zho; ¹⁶per pso me diidz lo zho, choot lo gzodiidzd zhow.

¹⁷Ga brieequia mine pquiaa Isá, tib men ne biadteed xtiidz Dios padzeela, zeene rëb me:

¹⁸Lëe men rii bzooblo naa gun xtsin naa, rleynie naa me, rzac zdoo naa grë ncuanea run me.

Zded naa zhiEspíritu naa gacnie me, me nac men ne cxobnen xtidz naa lo grëse miech.

¹⁹Tilnied me miech, sedzd yan me lo zho,

sod me ro nëz goptsie me.

²⁰Grë zha ne gzhe gzhele rac, zig tib goobgui ne quiaxweele, zig tib lë guier ne noyiidiele,

csand me zdoo zho;

zha ne mban rac lo xliaadz zho,

csaand me zho.

Min co tsoxco me, haxta gan me grëse miech gacnan mine nac diidzli, ni tsienal zhow.

²¹Haxta zeene gan me ye grë zha ne nac-draa zha Israel,

laa zho gnalo me.

Rëb zho menox nacie Jesús

(Mr. 3:20-30; Lc. 6:43-45;

11:14-23; 12:10)

²²Dzigo güeynie zho tib mgui lo Jesús rold lo mgui ni gacdaque gnee mgui, sac nosacsi menox mgui. Znuse beenguiac me mgui, gagazh psilo gon mgui, psilo bnee mgui. ²³Grë miech ne ndxie lo me ga, per nli bzee zdoo zho, rnee zho:

—jBay pe lëe men qui naye nac Men ne zëëble diidz ga cxeel Dios!

²⁴Zeene gon zha farisé sca rnee grë miech co, rzachaa zdoo zho rnee zho: “Pe Dios nazho cxeel me, ma ne rnabey lo menox ma co nacie me, gane rrieelo runcxoon me menox.”

²⁵Bien Jesús sca rza guic zho, dzigo rëbchaa me lo zho:

—¡Ncuaane gacđ gon rnee to! Teł tib wxtis nadien lëëque zha ne nacie zho csilo tilnie zho, ¿niacxe zac gnabey zho? Tib guiedza, teł lëëque zha guiedz co tilnie menladz zho, led znuse lozh guiedz co; tib diigaa miecha, teł lëëque zha tilnie menlidz zho, ¿niacxe nitlod dii co? ²⁶ Scaque mendox nagon, telne lëëque lëë ma guñcxoon samendox ma, ¡pe nale na bnitlo ma! ²⁷ Nana ne squi rnee to Beelzebú nacie naa gane rrieelo runcxoon naa mendox, ¿zha ne nacgrë to dzigo, cho nacie zho ne ye zho runcxoon ma? Gase naganle rlu dolđox i quiaayun to, squi rnee to. ²⁸ Sangue teł naa zhiEspíritu Dios nacie naa gane runcxoon naa mendox, ni ga rlu ganle laa Dios psilo quianabeyle nu.

²⁹ ¡Masaque nac mendox zig tib zha ne no xfuers, zha ne gacladz cuee grë ncuaane no lidz zha co, none cxidoogazh zho zho! ³⁰ Teł mendoxa rlëënie ma naa, ni nanle to ganle zha ne rlëë lo ne, gacnied zho ne.

³¹⁻³² Gacnan to ganle, grëse dol ne run miech, grë teł zha rguie zho, rdzibdee zho, niicle teł haxta gneenë zho naa, bii zun Dios zho perdon min co; sangue zha ne gneenë zhiEspíritu me, ib gundraa me zho perdon.

³³ Nanle to ganle zig nac yag nex, mine nac yag, min co nac nex ne rdeeda. Teł yag wena nex wen rquia low, togo yag ncuangaaw, nex ncuanaque rquia low. ³⁴ ¡Scaque to nagon zhin mendox! ¿Zha nan to nadien gac to miech wen, teł desde zdoo to ntseeb? Miech ntseeb to gane squi rzë xtiidz to, sac gon, ¡grëse diidz ne rriee ro miech, zdoo zho rzaw! ³⁵ Gacxe waa, zha ne mbe zdoo, niapse diidz wen, diidz ndooladz nac xtiidz zho. Sangue zha ne ntseeb zdoo, niapse diidz ntseeb, niapse diidznë rrieeche ro zho. ³⁶ Ni gal dze ne gon gun Dios guielwxtis, ib tedsod zunquizh me miech tib tib didz ntseeb, tib tib diidznë ne sca rriee ro

zho. ³⁷ Sac gon zigne rzë xtiidz zho niina, min co cueequia zho gal dze co, o mincogaa cteedquie zho.

Racladz zha farisé gan zho milagr

(Mr. 3:31-35; 8:12; Lc. 8:19-21; 11:24-26, 29-32)

³⁸ Tib dze wbig zla zha farisé lo Jesús gza zho zla maistr ley, rëb zho lo me:

—Maestro, racladz no dzian no gun luu tib milagr, milagr ne glu nli Dios pxeel luu.

³⁹ Pquiab me rëb me lo zho:

—Nazdpaa ntseeb to, squitaa gocndip zdoo to nëz lo Dios, ¿zha nacraa milagr ne racladz to gan to? ⁴⁰ Stibaque milagr gon gan to, lëë min co gac zeen gal dze ne laa Mgui ne pxeel Dios, tso len liu tson dze, tson guieel zigne bio Jonás len mel nroob co tson dze ni tson guieel. ⁴¹ Ni gal dze ne gon gun Dios xquielwxtis me, ib steedquie zha Nínive miech ntseeb ne nac to i; sac gon zeene güeynee Jonás lo zho, grëse zho psaan xquielntseeb zho wbig zho nëz lo Dios, laa to nëde to gon to diidz niicle ne lo to nu zo tib men ne mazdraa non lo Jonás. ⁴² Scaque rein ne bzob nëz Sabá, steedquie me to gal dze co, sac teł rein co golwi ganle pa lo guidzliu ne brie me biaadgan me rey Salomón, biadquiaadiag me grë xtiidz Salomón. Ni to lo to nu zo men ne mazdraa non lo Salomón, ni ib ronde to xtiidz me.

⁴³ Tełne csaande to xquielntseeb to i gon, low lozh to. Sac to zig bzhaac tib zha ne psaci mendox. Zeene brie ma zdoo zho, güey ma güeyquianzë ma grë dan zit güeyguib ma dien pa cuëz ma. Gonse ma rdziel zaatne cuëz ma, ⁴⁴ rëb ma: “Mazd laa naa gbireque guia naa zatne brie naa ga.” Zeene biire ma bdzin ma zdoo zha co, gon ma nroob lugar no, pale tib yu dets, ⁴⁵ nacne güeyaque ma güeyxi ma zgadz samendox ma, ma ne mazdraa ntseeb blëznie ma zdoo zha co. ¡Dzigole mazdraa mban biaan zha

co, lédlegaa zigne goc zho glo! Scadaa nagon gndzieelo to.

⁴⁶Laa me bii noneeque, zeene laa xniaa me ni zha bets me bdziñ, racladz zho gzodiidznie zho me. Per brieelod nzëeb zho haxta len yu, sac scataa miech guizhuo ne ndxie lo me ga. ⁴⁷Dzigo rëb tib zho lo me:

—Laa xniaa luu gon ni zha bets luu quiambëz luu nëz ley, racladz zho gzodiidznie zho luu.

⁴⁸Pquiab me rëb me:

—¿Xnia naa ye, bets naa ye?

⁴⁹Blis nia me, blu me grë xpëedscuel me, dzigo rëbchaa me:

—Zha ne gon nac zig zha rii, lëë xnia naa ga, lëë bets naa ga. ⁵⁰¿Sac grëse zha ne run mine rnabey Pxoza naa men ne zob gbaa, grëse zha co nac bets naa, nac bzian naa, nac xnia naa!

Nac Xtiidz Dios zig zhubxtil

(Mr. 4:1-20; Lc. 8:4-15)

13 Blozh ga briece Jesús güey me ro nisdoo. Ga zob me, ²zeene gon me nzian miech ne nocaalsa lo me ga, nacne biepe me güey sob me tib len barcw zo gax ro nis co, psilo me pseed me zho.

³⁻⁴Ndal grë ncuane pseed me zho, per niapse con cuent rnee mew lo zho. Lëë tib cuent ne bzodiidz me ga nu, rëb me:

—Tib zha name güey gon zhubxtil. Zeene laa zho quialaal zhub co, now bli-aal gax ro nëz, now bliaal lad quie, now bliaal len yag guiets. Mine bliaal gax ro nëz ga, güey grë mguin znuse dow maw. ⁵Mine bliaal zaatne nac lad quie, znuse znuse blana, ⁶per zeene laa lo ngbidz briece, znusaque bgoolaa, bidzgaw; sac guien nroob low. ⁷Mine bliaal zaatne nac len yag guiets co, zeene laa yag guiets pxii, bnitlogaw. ⁸Sangue mine bliaal zaatne nac lo liu naal, blana, brooba ni goca; lo tib tib zhub co no zhimziona

briece galptsii zhub, now briece tsongala, nogaaw briece haxta tib gayoow.

⁹Blozh ga, rëbchaa me:

—Zha ne racladz guien mine rne naa nu, yquiaadiag zhow.

¹⁰Zeene laa grë miech co zey, dzigo wbig xpëedscuel me nbnabiidz zho lo me dien pe nac ne sca niapse con cuent rseed me grë miech. ¹¹Pquiab me rëb me:

—Tel to, Dioszhal rlu lo to zha rnabey me, niicle ncuane mazdraa ngueetsa; laa grëraa miech ne gard gbig lo me, grieelod guien zhow. ¹²Sac zha ne noxcole dien zha rnabey me, zdeedraa me guielbiini lo zho guien zhow, laa zha ne noxcoda, mine riense zho, stiche mew. ¹³Sca rseed naa zho parne tsoguic zho zha rnabey Dios, per nac zho niicle nzhial lo zho rwi zho, per peet rand zho; niicle nzhial diag zho per peet rond zho; ib peet riend zho. ¹⁴Lëë mine nac zho i bzeet Isá, zeene znu rëb me:

Nac miech qui, niicle peraa ron zho, per peet riend zho;

niicle rwiraa zho, per peet rand zho.

¹⁵Ne nlipaa miech nad, miech ndip zdoonac zho,

rriequia ntse zho diag zho, ntse zho lo zho;

parne peet gond zho, peet gand zho.

Ib riend zho zha gbig zho lo naa, ygab zho xnëz naa, parne csilaa naa zho.

¹⁶Sangue to —rëb Jesús lo zho—. ¿Dichos to porne rien to pe ran to, ni riengaa to mine ron to! ¹⁷Blactaa zha ne biadteed xtiidz Dios padzeela, blactaa zha ne güeynal mine nac diidzli, bzoobladz zho nian zho grë ncuane ran to niina, per bgaad zho nian zhow; bzoobladz zho nquiaadiag zho grë ncuane noquiaadiag to, per bgaad zho nion zhow.

¹⁸Goiquiaadiag sca ganle zha nac xcuent zha ne güey gon ga. ¹⁹Ro nëz ne sca bliaal zhub co, sca nac palal miech ne riepaa zha ne rienee Xtiidz Dios lo zho, per rioguicd zhow, rlozh

ga rdzinaque mendox, rietiche ma tel palalse mine rien zho. ²⁰ Lad quie ne bli-aal spalal zhob co, sca nac grë zha ne rley rcaania Xtiidz Dios; ²¹ per led dib zdood zho rcaania zhow, gane zeene laa miech rsilo rlëë lo zho, laa miech rtsidil zho porne riladz zhow, rsaanga zhow. ²² Nogaa zho nac zig nac len yag guiets co. Rquiaadiag zho Xtiidz Dios, per rsilo zho lel grë ncuane no lo guidzliu rii mazdraa rionie guic zho, rquidie grë dimi zho. Grë ncuane co rioxcoraa zho, laa ne tsonie Xtiidz Dios guic zho, min co rquiaqui ib rund zho mine rnabey me. ²³ Laa liu naal ne bliaal mine scataa goc ga, sca nac grë zha ne dib zdoo rquiaadiag Xtiidz Dios, rien zho zha naca, ni rban zhow zigne rnabeya. Rriequia grë ncuane run zho, no zho nac zig mzion ne brieegalptsii zhob ga, no zho nac zig mine brieetsongala, nogaa zho nac zig mine brieetib gayoow ga.

Zha nac xquielrnabey Dios

(Mr. 4:30-34; Lc. 13:18-21)

²⁴ Biire pcaalsa miech lo me stib, dzigo psiloque me pseed me zho con stib cuent, rëb me:

—Ziaad gac xquielrnabey Dios lo guidzliu rii zig bzhaac tib men ne gon zhobxtil. Niapse zhob wen, zhob nal gon me, ²⁵ per no tib zha ne rlëë lo me, gol tib pcow liu, horne grëse miech nixguies, güey zho güeylaal zho xmidz guizh ncuane zaatne gon me.

²⁶ Zeene laa zhobxtil co psilo blan mzion, hor coraa blu laa guizh ncuane co no lada. ²⁷ Grë zha ne quia xtsiin me, zeene gon zhow güey zho rëb zho lo me: “Tebaa gan luu ganle, dipse lad xoob luu zëëb guizh ncuane, ¿dieen pa brieew gocbniw ga?” ²⁸ Dzigo rëb me: “Rien naa no cho tib zha ne rlëë lo naa, zha co been dziin co.”

’Gocladz zho, hor cogazh nielaadz zhow per bzhiguield me, ²⁹ rëb me lo

zho: “Tsielaadzde tow, sac tel glaadz tow niina ye zhobxtil gliaadzniew. ³⁰ Golsaan sca zëëba ga, na zeene laa wlaap gac, hor co gnabey naa zha ne quiits zhob, ctopgazh zhow gdziin zhow tib lad tseca; lozhraa ga quiits zho zhob, tsasa ga, glansow ro yu.”

³¹ Blozh ga bzeet me midz moxtaz, rëb me:

—Nac xquielrnabey Dios zig nac tib midz moxtaz ne ran miech dan rii. Nan to ganle midz moxtaz nac midz ne mazdraa win, ³² ni tel gacbniw, rooba ni lëëw roobraa lo grë guizh ne ran zho ro yu, raca lal tib yag nex, haxta rdzin grë mguin rhixcuua ma zhiptsieez ma lo grë zhicwa.

³³ Rëbaque me:

—Nac xquielrnabey Dios zig nac ncobi ne rquiaa men wnaa lad ncob ne riaa quietxtil. Niipaque ncobi riots tson lmud rin, ni dib nacse ncob co rzibe.

³⁴ Grëse mine pseed Jesús grë miech co, niapse con cuent bnee mew lo zho. ³⁵ Ga briequia mine bzeet zha ne biadteed xtiidz Dios padzeela, zeene rëb zho: “Niapse con cuent cseed naa miech, sca gnee naa lo zho grëtaa ncuane gard gacnan miech wlal ne bre guidzliu.”

Zha nac xcuent guizh ncuane co

³⁶ Blozhse bnee Jesús lo grë miech co guey zho, yeque me laa me zey gza xpëëdscuel me. Bdzin zho ro yu, ga bnab zho lo me siguiel me gnee me lo zho dien zha nac xcuent guizh ncuane ne bzeet me ga. ³⁷ Dzigo rëbchaa me lo zho:

—Golgonaa sca, znu gon nac cuent co. Rriequia gon naa ga nac men ne gon zhob co. ³⁸ Liu ne bniaaw ga, nac lo guidzliu, zhobxtil co nac grë miech ne nole xnëz Dios, laa guizh ncuane co nac grë zha ne no ladznia mendox. ³⁹ Zha ne güeygan guizh ncuane co, lëë men-dox ga. Dze lo wlaap co, gac dze ne gun Dios xquielwxtis me, zha ne tsie

wlaap ga, lëe anjl ga. ⁴⁰Ni zigne sca cuee zho guizh ncuuan co lad zhobxtil, gzëg zhow, scapaa nagon gal dze ne gac xquielwxtis Dios, ⁴¹sxel naa grë xanj naa tsie zho tsiebee zho grë zha ntseeb, zha ne sca runctal xtol grëraa miech, lad zha ne no xnëz naa. ⁴²Grëse zha ntseeb co, hor co laa zho guey lo guidox ne rieguial zho! Ga tso zho goonnë zho, haxta gow lay zho lo guielnëdox co. ⁴³Laa grë zha ne güeynal minë nac didzli, zha co gdzin zaatne rnabey Pxoza naa, masaque zig xbiini ngbidz glu zho ga. ¿Zha ne racladz guienä yquiaadiag zhow!

⁴⁴Ziaad gac xquielrnabey Dios zig tib ncuuan non ne noliu tib lo xcuaa miech. Zha ne gdziel tib ncuuañe sca non, ib tedsod zie zho sto zho grëse ncuuañe rap zho grieve dimi si zho liu co, parne gunchen zho ncuuan non co.

⁴⁵Zha ne rzëeb lo xquielrnabey Dios ziaad gac zho zig tib zha ne rzi quie perl minë mazdraa niaz. ⁴⁶Zeeñe ron zho pa no tib perl co, rto zho grëse ncuuañe rap zho, rie zho rzi zhow.

⁴⁷Nacaque xquielrnabey Dios, zig tib guix nroob ne rga meñ niina, zeene rsëeb ngooz mela lo nis grë lose mel rtopa. ⁴⁸Rlozhse riodzëw, dzigo rbeequia zhow ro nis, garaa rzob zho rbe zho grë mel co; ma ne rquiu laa tib chicuid zole rio ma, laa ma ne rquiind rsëeb zho. ⁴⁹Scapaa nagon gac miech gal dze ne gun Dios xquielwxtis me, ziaad grë xanj me cuee zho grë zha ntseeb lo zha ne no xnëz me, ⁵⁰tsieron zho zho lo guidox ne rieguial zho. Ga tso zho goonnë zho, haxta gow lay zho lo guielnëdox co.

⁵¹Blozhse ga, rëb me lo zho:

—¿Pe bien to na zha nac grë minë blozh bne naa lo to nu?

Grëse zho pquiab rëb zho:

—Bien now.

⁵²Dzigo rëbchaa me:

—Tib zha ne rienle zha nac grë ley ne psan Moisés, ni squi guien zho zha nac zhiwseed Dios minë zialnie naa niina, masaque nac zho zig tib zha gol ne quianie chop lo ncuuan non lidz zho, quianie zho grë min gol-le ni quianiequeaa zho min cub.

Güey Jesús ladz me

(Mr. 6:1-6; Lc. 4:16-30)

⁵³Blozhse sca bzodiidz me grë cuent co lo zho, laa me briece ga zie me nëz ladz me.

⁵⁴Bdzin me ga güey me yadoo, psilo me pseed me grë miech co. Per nli rzee zdoo zho ron zho grë min rnee me, rnabdiidzlsa zho rnee zho:

—¿Pazhe waa squitaa pseed men qui? ¿Zha nac guielbiini ne squitaa rap me i, ne rnee miech ndal grë milagr ne run me? ⁵⁵Tib zhinse ngurëyag name nac me. Led lëe xingan Marí i, bets me name nac Jacob, nac José, nac Simón ni Judas; ⁵⁶grë bzian mew, nu no zho grë zho. ¿Pa dzigo güey me wseed qui?

⁵⁷Ib beençasd zho me, haxta rlëe zho lo me. Zeene gon me sca rac zho, rëbchaa me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho ni menlidz zho ni menladz zho nëd gunbey zho.

⁵⁸Beend me nzian milagr ga, sac sca ndip zdoo grë miech co ib nëd zho nliladz zho cho nac me.

Gut Juan Bautist

(Mr. 6:14-29; Lc. 9:7-9)

14 Len dze co bin rey Herod (men rnabey Galilé) grë ncuuañe run Jesús, sac tel pa lotaaw zëeb xtiidz me; ²dzigo rëb Herod lo grë zha ne run dziin lo me:

—Rien naa lëe Juan Bautist ga quiaayun grë min co, segur brieceban me.

³Sca rnee Herod sac nanwen me zha been me Juan. Me bnabey bga Juan bzoob zho Juan caden bio Juan ladzguuib, ⁴loxaque ne rnee Juan lo me nonguiēda ga lēēque Herodí ptsieel-nia me, sac tsieelpaa bets me Lip nac Herodí. ⁵Gocladz Herod niut me Juan, per bdzieb me menguiēdz, sac rleynie zho Juan, rien zho xtiidz Dios ziadteed Juan lo miech.

⁶Laa tibtaa dzew, lēētaque noyac zhilni Herod dze ne bloozh me stib iz, bded tib xindzoo Herodí squi ndxie grē zha ne zobnie me psilo ndzoo biee ndzoo. Bdziladz me goṅ me zha biee ndzoo, ⁷haxta brieer ro me rēb me: “Ncuaane gacladztaa luu gnab luu, znedz naaw.” ⁸Per glole pquiil Herodí ndzoo, nacne rēb ndzoo lo me: “Mīne racladz naa, xoob guic Juan tib leṅ ban-dej gneedz luuw lo naa niinagazh.”

⁹⁻¹⁰Zeene bin Herod sca rēb ndzoo, mbanse rac me; per rdeetraaw diidz niab me grieloda, sac grēse zha ne zobnie me ga, bin zho rēb me zdeed me ncuaane gnabtaa ndzoo. Dzigo race me pxeel me zha ne güeychug guic Juan leṅ ladzguuib. ¹¹Zeene wbiere zho, zhoobse guic Juan tib leṅ ban-dej bdeed zhow lo ndzoo, dzigo güey ndzoo güeydeed ndzooa lo xniaa ndzoo.

¹²Zeene gocnan xpēēdsuel Juana, güey zho güeylis zho me ga güeyqueets zho me. Blozh ga güeyzodiidz zho lo Jesús zha bzhaac me.

Bguiaan Jesús gaay mil miech

(Mr. 6:30-44; Lc. 9:10-17; Jn. 6:1-14)

¹³Zeene bin Jesús sca bzhaac Juan, dzigo brieer me ga bzēēb me barcw zie me tib zaatne guieṅd miech. Per znuse bien diidza, nzian grē guiedz co zha ne gocnana, tib ro nis güey zho, glole zho bdziṅ zaatne no gdziṅ me ga.

¹⁴Laa me noyet leṅ barcw, zeene blis lo me goṅ me laa grē miech guizhiu

co ndxie ga; pquia zdoo me zho, beenguiac me grē mguidz ne zienie zho.

¹⁵Laa dze ziedzelew, wbig xpēēdsuel me rēb zho lo me:

—Mazd gudz lo grē miech qui guey zho na, zeena guiob tsie zho grē guiedz win ne ndxie gax i tsiesi zho ncuaane gow zho; sac goṅ laa dze bdzele.

¹⁶Pquiab me rēb me lo zho:

—¿Pe nacne guey zho squise? To none gdeed ncuaane gow zho.

¹⁷Rēbchaa zho:

—¿Per pe dien yguiaan no zho? Pe rnase gaay quietxtil ni chop meṅ ne ziaadnie no nu, lo grētaa miech qui.

¹⁸Dzigo bnabey me zho güeynie zho quietxtil co, güeynie zho meṅ co lo me, ¹⁹ni bnabey me grē miech co bzob zho lo grē guizh nguia ne zēēb ga. Horco bzheṅ me gza quietxtil co ni grop meṅ co, blis lo me nēz gbaa, bdeed me xquizh lo Dios. Blozhse bdeed me xquizh, beengroṅ me gza quietxtil co, meṅ co ne, zigse rdeed mew lo xpēēdsuel me scase scase bdiiz zhow lo grē miech co. ²⁰⁻²¹Grēse zho dow zho haxta zaatne bieltaa zdoo zho. Miech tafa, zha bguise rgaa zig gaay mil, nantragaa grē meṅ wnaa, grē mēēdla; ni zeene blozh dow zho, scase ncuaane nroob biaan, biodzē tsiipchop chicuid bio grē quietxtil co, bio grē meṅ co.

Rzē Jesús lo nisdo

(Mr. 6:45-56; Jn. 6:16-21)

²²Zeene blozh ga, bnabey Jesús xpēēdsuel me bzēēb zho leṅ barcw, zeena zienerga zho tedquia zho stib nēz ro nis co; laa me bii blēz ga, nozonēz me grē miech co. ²³Blozhse bzonēz me zho, dzigo güey me tib guic gui zob gax ga, güeyzodiidznie me Dios, tipse me zho ga laa liu pcow.

²⁴Horco laa barcw ne zie xpēēdsuel me ga no lo nis co, ib gacđ csēēniob zhow, sac rriee me rtsire mew, nēzrii nēzrec raca lo nis. ²⁵Merle guini liuw,

tibaque zeene laa me bdziñ zaatne zie zho ga, tib lo nis co ziezë me.

²⁶ Zeene gon zho laa men co sca ziaadzë lo nis co, bdzieb zho, broptsie zho rnee zho:

—i Tib ndziin i gon ziaad i!

²⁷ Dzigo bnee me lo zho rëb me:

—i Gdziebde to, naa zial nu!

^{28–29} Pquiab Pedr rëb Pedr:

—Telne luu i ziaad i, bneedz diidz së naa lo nis glanso naa lo luu i.

—i Dë sca! —rëb me.

Lëälëd biet Pedr len barcw, laa Pedr ziezële lo nis co ³⁰ zeene gon Pedr scataa rlis me low, bdzieb Pedr. Tibaque zeene bien Pedr laa Pedr nodedquiele low, hor co broptsiedan Pedr, rbedz Pedr me, tsiebee me Pedr ga.

³¹ Dzigo wbig me bzhen me nia Pedr, bzoli me Pedr lo nis co.

—i Aque luu gon Pedr! —rëb me—.

¿Pe nacne gocchop guic luu? ¿Gard gon gliladz wen luu cho nac naa?

³² Zeene laa me biepnie Pedr len barcw, laa me co blëz. ³³ Grëraa zha ne no len barcw ga, rleynie zho me, rzee zdoos zho rnee zho:

—i Nasi nagon ndion no nli Xpëed Dios nac luu!

³⁴ Zeene bdziñ zho stib nëz ro nis co, zaatne rnee zho Genesaret, ga biet zho barcw. ³⁵ Grë miech co zeene gocnan zho laa me bdziñ ga, znuse znuse pxoon zho diidz grëraa guiedz ne ndxie gax ga. Dzigo brieë grë miech co, güeynie zho grë men rzacnë lo me, ³⁶ rnab zho lo me siguiel me maase ni xabse me xen grë men rzacnë co. Grëse zha ne bzhen ni xab me, biac zho.

Ncuane runctal xtol miech

(Mr. 7:1-23)

15 Tib dze, bdziñ bla zha farisé ni zla maistr ley ne ziaad nëz Jerusalén, lo Jesús; rëb zho lo me:

² —¿Pe nacne dien zianałd xpëedscuel luu mine blu xmengol ne, pe nacne zeene laa zho row, ib rguiibd zho nia zho zigne nopaa tsara?

³ Pquiab me rëb me lo zho:

—¿To waa, pe nacne quiaguiits to xley Dios? Golguien ganle laa ne gun to mine rnabey Dios zigne naca, lel ncuane blu xmengol to, min co zianał to. ⁴ Led znu gon rnee lo xley Dios: “Gon pxoz luu, gon xniala luu”, ni mree: “Zha ne quie pxoz, quiegaa zho xniala zho, ib none guet zho.” ⁵ Laa to gon rnee to: “Peet nacda gund zho xyudar xmengol zho niicle no me liaadz, totsaque gdeed zho gon.”

⁶ Tib lad rsan to xley Dios, mine blu xmengol to min co noxcora to. ⁷ i Loxaque guielwquidie qui no to! Rquiaalo to miech wen nac to, per lëepaa mine run to i ga bzeet Isá zeene rëb me:

⁸ Grë miech rii, rquiaalose zho runnon zho naa,

rond zho diidz gun zho mine rnabey naa.

⁹ Zhlëse nac grë ncuane run zho, rnee zho laa zho riaadgan naa;

sac niapse guicle zho riab grë wseed ne quialu zho lo miech.

¹⁰ Dzigo bnee me lo grë miech ne ndxie lo me ga, rëb me:

—Golquiaadiag mine gni naa lo to nu, ni goltsoxco guien to zha naca. ¹¹ Golgacnan ganle, grë ncuane rdziñ zdoos miech, led mincod runctal xtol zho; sinque grë ncuane ntseeb ne rza guic zho, diidz ntseeb ne rrieë ro zho, min co runctal xtol zho.

¹² Horco wbig xpëedscuel me, rëb zho:

—¿Pe bien luu ganle blëë zha farisé gon zho sca rëb luu lo zho?

¹³ Pquiab me rëb me:

—Grëse yag ne squi beenbnid Pxoos naa men ne zob gbaa, ib none laaw gli-aadz zolo zolow. ¹⁴ Golsaan zho, nli zha noseed miech per nac zho zig nac zha ne rold lo. Ni nanle to ganle, tel tib zha ne sca roldle lo ni xenaque zho nia stib zha

ne ranđ, zaatne nac tib len blē, ib tedsod grop xcuaa zho tsietsobe ga.

¹⁵ Bdedse ga, wbig Pedr lo me rēb Pedr:

—Bzhiguiel bnē lo no dien zha nac didz ne nē luu ga, ne rnee luu led ncuaañe rowd miech runctal xtoļ zho.

¹⁶ Pquiab me rēb me:

—¿Pe niicle to rienđaquew dzigo lēē?

¹⁷ ¿Pe rienđe to grē ncuaañe row miech, led mincod runctal xtoļ zho? Sac grē ncuaañe row zho rdziñda len zdoomban zho, zhaa zaatne rdziña; tib rietedsew xcuerp zho, rlozh ga rrieegaw. ¹⁸ Sangue grē diidznē ne rreee ro zho, zdoomban zho ga rzaw, ni lēē min co nac mine runctal xtoļ zho. ¹⁹ Zdoomban zho nac zaatne rza grē ncuaañ ntseeb ne run zho, zig nac:

zeñe rio zho grē zhgab yozh,
zeñe rut zho samiech zho,
zeñe rionie zho zha ne nole tsieel,
zeñe rionie zho zha ne nacd tsieel zho,
zeñe run zho guielgbaan,
zeñe lega rnexuu zho samiech zho,
zeñe rneenē zho samiech zho.

²⁰ Grē ncuaañ ntseeb co nagon nac mine runctal xtoļ miech, gunctald zho xtoļ zho niicle tsard nia zho zigne nacpaa grē zhiwseed mengol.

Biac xpēēd tib wnaa zit

(Mr. 7:24-30)

²¹ Ga brieē Jesús, güey me haxta nēz Tiro ni nēz Sidón.

²² Nēz co no me güey tib wnaa ne ziaad lo xtiī zha Canaán lo me, nguiedz zēēb tsi wnaa co rnaab me lo Jesús siguiel Jesús tsiegunguiac tib xpēdwnaa me nosacsi menđox. ²³ Per ib pquiabd Jesús lo xtiidz wnaa co, dzigo wbig xpēēdsuel me, rēb zho:

—Mazd bzhiguiel pquiaadiag mine rnee wnaa qui, bui ganle zha ncuētaa zēēb tsi me naļ me zhits ne.

²⁴ Pquiab Jesús rēb me:

—Ziaļd naa par gun naa xyudar zha zit, sinque laa Pxož naa pxeel naa par gun naa xyudar grē zha Israel ne rzac zig grē mēcwxiil ne zonziaab lo xbaxtor.

²⁵ Scaque nonee me laa wnaa co wbig pquitsgzhib lo me.

—Bzhiguiel —rēb me—, been tib guielñzac been xyudar naa.

²⁶ Rēbchaa Jesús lo me:

—Nonguielđa gon, cob ne guiet ne no nia mēēd gdeed new lo mēcw.

²⁷ —Nliw, scaw —pquiab wnaa co—, per niicle mēcwa name rsaanaque bizhuan ma rbig ma row ma mine rrieengaa nia mēēd.

²⁸ Horco pquiab Jesús rēb me:

—¿Squiw nagon! ¿Rlu nli dib zdoo luu rnalo luu naa! Gacxe waa mine rnaab luu i gun naa, niinagazh laaw gac.

Horcogazh biac xpēēd wnaa co.

Nzian miech ne beenguiac Jesús

(Mr. 8:1-10)

²⁹ Nēz co wbi Jesús bdziñ me ro Nisdoō Galilē.

Ro nis co no me, miech guizhiu ne pcaalsa lo me. Tib dze gon me scataa nzian miech co, dzigo güey me güeysob me tib guic gui win zob gax ga. ³⁰ Ga zob me rdziñ grē miech co rdziñnie zho grē zhimguidz zho lo me, no zho zienie grē zha ne nē ni, no zho zienie grē zha ne roļd lo, grē zha ne guiend tib nia, grē zha ne guiend tib ni, grē zha ngop, ni grēragaa zha ne rlan pe stib guielguidz; grēse zho beenguiac me.

³¹ ¿Ncuaañe gzee zdoo ne goc ga! Grē zha ne ni tib diidz gard gnee, per nli rley zho laa zho psilo rnee; grē zha ne guiend tib ni, guiend tib nia, laa ni zho laa nia zho biaan zigne no gaca; grē zha ne rgob ni, haxta rias zho laa ni zho goc-wen; grē zha ne roļd lo, rlozhd gzee zdoo zho grē ncuaañe ran zho. Grēse miech ne ndxie ga, rzee zdoo zho, rley zho roolnie zho Dios.

³² Dzigo bredz me xpëedscuel me rëb me lo zho:

—Rquia zdoo naa grë miech rii. Nadzele rac tson ngbidz blanso zho lo ne nu, ni na quianiedraa zho pe gow zho. Telne squise gzonëz naa zho, nend pa lo zie zho nëz ycow zho.

³³ Pquiab zho rëb zho:

—¿Per pe yguiaan ne zho? ¿Pa guioxi ne guielwagw ne yquiin grëtaa miech qui dan rii, naca zaatne guieñd miech?

³⁴ Dzigo bnabdiidz me lo zho, rëb me:

—¿Bla guietxtil ziaadnie to i?

—Gadzaquew no —rëb zho—, ni chop tson meł win.

³⁵⁻³⁶ Dzigo bnabey me grëse miech co bzob zho lo liu. Blozh bzhen me gza gadz guietxtil co, ni gza meł co, bdeed me xquizh lo Dios; blozhse bdeed me xquizh, zigse rungroł me guietxtil co scase scase rdeed mew lo xpëedscuel me rguiiz zhow lo grë miech co; scaque been me gza meł co.

³⁷⁻³⁸ Grëse miech co dow zho haxta za-atne bieltaa zdoo zho. Miech guizhiuw, zha bguise rgaa zho maase tap mil, nan-dragaa grë men wnaa, grë mëëdlas; ni zeene blozh ga bii biodzë gadz chicuid bio grë miñe biaan.

³⁹ Blozhse bnee me lo grë miech co, blozhse bzonëz me zho, dzigo laa me bzëëb leñ barcw zie ne nëz xtan zha Magdal.

Gocladz zha farisé niungüet zho Jesús

(Mr. 8:11-21; Lc. 12:54-56)

16 Magdal no Jesús, bdzin bla zha farisé ni zla zha saducé lo me, gocladz zho niungüet zho me dien pe nxind me tib diidz, pe tib ncuaañe nonguieldgaa niun me. Rquiaalo zho rnab zho lo me gun me pe tib milagr, zeena gliladz zho nli Dios pxeel me.

²⁻³ Dzigo pquiab me rëb me lo zho:

—¿Pe nlipaa mee to riende to zha nac grë ncuaañe noyac leñ dze rii! Zha zëëb

dzigo runbey to pe rlu lo xcow. Zeene ran to rquia xcow nizhnie bdze dze, rienle to guiet stib dze co zriee lo ngbidz. Sil ne rangaa to quia xcow nizhnie, quia xcow nlaan zhan gbaa, rienle to guixoo guiab dze co. ⁴ Nazdpaa ntseeb to, squitaa gocndip zdoo to nëz lo Dios, ¿zha rnaraa milagr ne racladz to gan to? Stibaque milagr gon gan to, tib miñe gac zigne bzhaac Jonás.

Blozhse sca rëb me lo zho, zoque zho ga, ziega me.

⁵ Zeene briece zho ga, zoladzd xpëedscuel me ney zho guietxtil ne niow zho.

⁶ Lega nacle psilo me nonee me lo zho, rëb me:

—Golguien gon, napaa noyab to lo zhincobi zha farisé, lo zhincobigaa zha saducé.

⁷ Zeene gon zho sca rëb me, rneechaa zho:

—Porne nagon ziaadnie ne guietxtil, gane squi mee me lo ne.

⁸ Bien me sca nonee zho, dzigo rëb me lo zho:

—¿Gardaque lëë guien to cho nac naa! ¿Pe nacne tso to zhizhgab guietxtil? ⁹ Ni lalnu lëë peet riende to! ¿Pe rsoladzde to zeene gaayaque guietxtil bguiaan ne gaay mil miech, bla chicuida biaan?

¹⁰ Scaque zeene gadzaque guietxtil ni bgaaw dow tap mil miech, ¿pe niicle min co rsoladzdraa to? ¹¹ ¿Zha nac dzigo rzac to guietxtil nozet naa? Golguien ganle zhincobi zha farisé, zhincobi zha saducé ni naa.

¹² Dzigoraa bien zho led ncobidpaa rzeet me, sinque rëb me lo zho gap zho cuidad lo zhiwseed zha farisé, lo zhiwseedgaa zha saducé.

Bnee Pedr cho nac Jesús

(Mr. 8:27-30; Lc. 9:18-21)

¹³ Bdzin Jesús nëz xtan zha Cesarea de Filipino grë xpëedscuel me, nëz co no me bnabdiidz me lo zho rëb me:

—¿Cho dien ron to rnee miech nac naa?

¹⁴Pquiab zho rëb zho:

—No zho rnee Juan Bautista, no zho rnee LÍw, no zho rnee Jeremíw, men ne biadteed xtiidz Dios padzeela; nogaa zho rnee no cho stib men ne ziadteed xtiidz Diosa zig biaad zha ne biaad padzeela.

¹⁵Dzigo rëb me lo zho:

—¿To waa? ¿Cho rzac to nac naa?

¹⁶Pquiab Pedr, rëb Pedr:

—¡Luu nac Men ne zëëble diidz ga cxeel Dios! ¡Xpëed Dios nac luu!

¹⁷Dzigo rëbcha me:

—Dichos luu Simón (xingan Jonás) briece diidz qui ro luu, sac gon Pxoze naa men ne no gbaa, men co bneedz guielbini qui lo luu, nacda ncuane cho miech nëw lo luu. ¹⁸Ye naa gon niina laa naa gni ganle cho nac luu, luu nac zig tib quie, ni quie ne gon squi nac gzhixcuaa naa xyadoo naa; tsod zha ne grieelo gnitlo yadoo co, per ni guielgut gnitloda.

¹⁹Laa naa rzo luu, luu gnee Xtidz naa lo miech zeena gacnan zho zha grieelo ygaa zho zaatne rnabey Dios; luu gac zig tib zha ne rey liow, tel zha cow, zha zac cخال ro yu, ni zha zac csiooga.

²⁰Dzigo pso me diidz lo zho choot lo gneed zho, me nac Men ne zëëble diidz ga cxeel Dios.

Bzeet Jesús zha gon miech me

(Mr. 8:31-9:1; Lc. 9:22-27)

²¹Len dze co psilo Jesús bzeet me lo xpëedscuel me zha csacsi miech me. Rëb me nroob ncuane cteed zho me, zeene laa me tsie Jerusalén; grë zha non lo menguedz, grë pxoze ne rnabey, grë maistr ley, ible stsidil zho me ni haxta zut zho me; per zeene gac tson ngbidz gut me, laa me grieeban.

²²Gon Pedr zha rnee me, dzigo bredzaque Pedr me blisqui Pedr lo me dien pe nacre rnee me laa me guet.

²³Zeene bin mew, zoque Pedr ga, biecw me rëb me:

—¡Biche lo naa nu mendox! ¡Loxaque no luu par gungüet luu naa! Zienied guic luu mine rnabey Dios, sinque mine rleyne miech, min co zienie guic luu.

²⁴Dzigo bnee me lo zho, rëb me:

—Zha ne racladz sëëb xnëz naa, none cueeladz zho zho, none lëb zho guiaadnal zho mine rnabey naa, niicle tel min co yquiaaqui csacsi miech zho. Nodne yquia zdoo zho xquielmban zho, ²⁵sac zha ne yquia zdoo xquielmban, lel znu nitlo zho; sangue zha ne sca cueeladz xquielmban porne no zho xnëz naa, ib zгаа zho tib guielmban ndzon ne gdzind dze lozh. ²⁶Zha ne zienie guic loxaque gapchen, ¿pa dien yquiina lo zho, tel lëëw yquiaaqui guey zho gabil? ¿Ni-acxe zrieelo gdziib zho dimi, laa zho len gabil? ²⁷Naa ne nac naa Mgui ne pxeel Dios, dzin dze ne gbiire guial naa stib, guialnie naa grë xanj naa, glu naa ganle pa lotaa men nroob nac Pxoze naa; dze co gded naa mine tsieguial tib tib miech, tel zha wban zho. ²⁸Ib tedsod lo grë zha ne ndxie nu niina, bii no zha ne gan ganle, zeene laa naa csilo gnabey lo guidzliu rii.

Bdzëëlo Jesús

(Mr. 9:2-13; Lc. 9:28-36)

17 Goca xoop ngbidz, bredz Jesús Pedr, Jacob ni Juan bets Jacob güeynie me zho tib guic gui glaa.

²Guic gui co no zho, zeene gon zho laa me bdzëëlo. Masaque biinidoo rriece lo me, pale lo ngbidz; xab mew, per nli rquiabniw, masaque biini ne rrona.

³Tibaque zeene gon zho laa Moisés ni Lí men ne biadteed xtiidz Dios padzeela, nozodiidznie me. ⁴Rdzieb zho, lo dzeb co briece ro Pedr rëb Pedr:

—Maestro, ¡tebaa zha grieelo guiaan ne nu! Telne racladz luu, na maase gzaa no tson yu yag xiid nu, tiba cuëz luu, tiba cuëz Moisés, stiba cuëz Lí.

⁵Scaque nonee Pedr, zeene znuse pquia tib xcow ngali zaatne zo zho ga, masaque biini ne rron xcow co, lo xcow co bin zho zëeb tsi tib men co, rnee me:

—Lëë xpëed naa i gon, rleynie naa me, rzac zdoo naa mine quiayun me. Mine rnee me, golgona.

⁶Mazdraa bdzieb zho bin zho sca rnee men co, lëëlëd pquitsgzhib zho haxta bdzin lo zho lo liu. ⁷Dzigo wbig Jesús, pcaannia me zho, rëb me:

—Golsoli, gdziebde to.

⁸Zeene blis lo zho bui zho, mese zo ga, gondraa zho schop men co.

⁹Blozhse ga, laa zho wbi ga. Cho gui co ziad-zëebnie me zho, pso me diidz lo zho mine gon zho ga, choot lo gzodiidzd zhow, nieeda gal dze ne laa me brieaban.

¹⁰Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigoraa guiaad Men ne zëeble diidz ga cxeel Dios?

¹¹Rëbchaa me:

—Nliw, ible nacle diidz ne glo Lí guiadseed miech gon zho xtiidz Dios.

¹²Ni gacnan to ganle laa me biaadle, per beenbeyd miech me, lel psacsi zho me been zho me mine gocladztaa zho; ni ib tedsod gon, scaque csacsi zho Mgui ne pxeel Dios.

¹³Zeene blozh sca rëb me, dzigo bien zho Juan Bautist ga rzeet me.

Biac tib mëed ne nosacsi mendox

(Mr. 9:14-29; Lc. 9:37-43)

¹⁴Zeene blozh biet zho cho gui co, gon zho miech guizhiu ndxie ga quiambëz Jesús. Lad co brieet tib mgui, wbig me lo Jesús, pquitsgzhib me lo Jesús, rëb me:

¹⁵—Laa naa rnab lo luu, bzhiguiel beenguiac xpëed naa, nrooble nosacsi guidz gutye win. Blactaa ziyobe win lo gui, ziyobe win lo nis ne. ¹⁶Blansonie naa win lo xpëedscuel luu nu, per rrielod zho gunguiac zho win.

¹⁷Dzigo rëbchaa Jesús lo xpëedscuel me:

—¿Pe na squitaa miech ntseeb nac to, ib nede to gnalo to Dios! ¿Palal tiemp ne so naa gne naa lo to? ¿Ncuaane cxcwdraa naa lo to squi nac to! ¿Goltënie mëed qui nu!

¹⁸Dzigo goctox Jesús lo mendox ne nosacsi mëed co, bencxoon me ma, hor cogazh laa mëed co biac.

¹⁹Haxta wbiraa zho ga, wbig zho lo me bnabdiidz zho dien pe nacne brieelod zho niuncxoon zho mendox ne nosacsi mëed co. ²⁰⁻²¹Dzigo rëbchaa me:

—Brieelode to niuncxoon to ma, sacne rnalode to Dios. Tel niaca mine rnalode to Dios siquier palal yeen, gzoob ne siquier lal tib midz moxtaz, niicxe ncuaane mazdraa ngan gnab to lo me, zun mew; tsod ncuaane grieelod gun to.

Bzeet Jesús laa miech csacsi me

(Mr. 9:30-32; Lc. 9:43-45)

²²Xtan zha Galilé no zho, tib dzew rëb me lo zho:

—Naa ne nac Mgui ne pxeel Dios, ib znaaz miech naa, ²³haxta zut zho naa; per zeene gac tson ngbidz gut naa, zriebaan naa.

Zeene bin zho sca rnee me, bio zho guielnë, mbanse rac zho.

²⁴Bdzin me guiedz Capernaum, lox-aque bzëeb me lad guiedz, laa zha ne rtop dimi ne razh yadoo wbigle lo Pedr, bnabdiidz zho dien pe rguizh me dimi co. Pquiab Pedr rëb Pedr lo zho:

²⁵—Rguizh mew, ¿pe nacne quizhd mew?

Zeene bdzin zho len yu ne rbëz me, gardle guiab Pedra lo me, glole me bnabdiidz rëb me lo Pedr:

—Zig nac dimi ne razh lo men ne nac rey dien, ¿pe ye xpëed me rguizha, te loxaque zha zit rguizha ye?

²⁶Pquiab Pedr rëb Pedr:

—Zha zitse rguizha.

—Nligaa sca naca —rëb Jesús—. Zha ne nac mëed nodne quizh zho, ²⁷ per par guiabd zho rdziond ne diidz, güey güeyron xanzuel luu lo nis. Meļ ne gloopaa yгаа low, bzheņ ma pxal ro ma, ga gdzziel luu dimi; dimi co güeynie bdiizh miņe no dizh ne grop ne.

¿Cho nonraa?

(Mr. 9:33-37, 42-48;

Lc. 9:46-48; 15:3-7; 17:1-3)

18 Len dze co bnabdiidz xpëedsuel Jesús lo me, dien cho tib zho gac zha ne mazdraa gacnon lo grë zha ne no xnëz Dios.

²Dzigo bredz me tib mëëdbgui win, bzo me win glowtaa lo zho, ³rëb me:

—Gneli naa lo to ganle, telne csaande to xquieļntseeb to, telne gacnguudzladzde to, gac to zig mëëdwin rii, per ni xnëz Dios grielod sëëb to. ⁴Zha ne racladz gac zho zha non, none gac zho tib miech ndooladz, none gac zho zig tib mëëdlas. ⁵Miech ne gacnie zha ne sca nac, zha ne rleynie naa, rrieequia naale ga racnie zho.

⁶Per miech ne yquuil zho guņctal zho xtoļ zho, įprobsaxe zha co! Mazd zhi guieļnëw lo zho ygadoo tib quie molin zhobxtil yan zho tsieron zho zho nisdoo. ⁷įNac lo guidzliu rii, runfalte guieļntseeb low! Runfalte ncuaane guņctal xtoļ miech, įper probsaxe zha ne yquuil zha ne nole xnëz naa, guņctal zho xtoļ zho!

⁸Golguien telne tib nia to, tib nigaa to rquiaqui runctal to xtoļ to, goltichegazha. Peet nacda maase tibaque ni to, tibaque nia to zob totsaque yгаа to guieļmban ndzon ne gdziņd dze lozh, lëdle zob gropa ni laa to guey gabil, lo beldox ne gdziņd dze guuu. ⁹Scaque bziaalo to, miņe rquiaqui runctal to xtoļ to, goltichegazha, peet nacd maase tibaque lo to zob totsaque yгаа to guieļmban

ndzon ne gdziņd dze lozh, lëdle zob gropa ni laa to guey lo beldox ne nac gabil.

¹⁰Ib gunde to csanwin to grëraa zha ne no xnëz naa, zha ne nac zha mban, sac gon non zho lo Dios, anjļ ne quianap zho, tibaque zo me lo Pxoз naa meņ ne zob gbaa.

¹¹Nziuu miech lo Dios, tel naa ne nac naa Mgui ne pxeel me, ib laa naa zial zialsilaa naa grë zha ne zonziaab lo me.

¹²Rzac Dios miech zig tib meņ ne rquianë zdoо xpëcwxiil. Telne quianie zho tib gayoo ma, ni gziaab tib ma, led zëëb lëë rsan zho stapgaļ tsiimtap ma ne zo lo zho, rbire zho rieguib zho ma ne bziaab ga. ¹³Zeene rdziel ma lo zho, rlozhd gleynie zho ma, lëë ma rac guieļbley que grëraa xcompañer ma. ¹⁴Scadaa nagon rzac Pxoз naa miech, grë zha ne nole xnëz me, ib racladz me gziaab zho.

¹⁵Golguien sca, tib tib to zeene cho tib zha ne nacgrë to gun pe tib falt lo to, goļtsie goļtsienee lo zho; gropse to goļzodiidz pe nac miņe pxin zho. Telne siguiel zho guiaan to mpas, laa to beenle gan ga gneewen to stib. ¹⁶Laa telne nëd zho, dzigo golguiib tib zha ne së, chopgaa zha ne së gan ganle zha rac zho.

¹⁷Tel niicle scaw nëdaque zho guiaan to mpas, dzigo mazd golguiab lo grëse zha ne nacgrë to gnee zho lo zho. Telne niicle xtiidz zha co nëd zho gon zho, dzigotaa mazd goļsaan zho, sacdraa to bets to ga, goļcuae zho lad to, goļsac zho zig rzac miech grë zha ne zienal guieļntseeb.

¹⁸Gneli naa lo to ganle, grëse zha ne gon xtiidz to zeene rnee to lo zho gacwen zho, scagaa Dios scaania me zho; per zha ne gonda, ycaaniad me zho.

¹⁹Ni racladz naa gacan to ganle, grë zha ne no xnëz naa, niicle tib nëzaque zho, per telne tipse rac zho, ncuaane gnabtaa zho lo Pxoз naa meņ ne zob gbaa, zdeed mew. ²⁰Sac zeene rcaalsa

zho roolnie zho naa, ga zo naa lo zho; niicle maase chopaque, tsonaque zho.

²¹ Dzigo wbig Pedr rëb Pedr lo me:

—Zha ne sca dzigo guṅ falt lo naa, ¿blataa vult lo guṅ naa zho perdon? ¿Daztaaw lëë?

²² Pquiab me rëb me:

—Lëda guṅ Pedr, led loxaque gadzdse vuelta. Tel blataa vult guṅ zho falt lo luu, none guṅ luu zho perdon.

Zha ne beend perdon

²³ 'Grë zha ne no xnëz Dios, ib none guṅ zho perdon samiech zho.

Tib rey name, tib dzew bredz me grë zha ne rquia dziin lo me, par dien zha quiyun zho dziin. ²⁴ Loxaque psilo me, zeene laa xcuent tib zha co blozh briece, nroob briequia zho lo me; ²⁵ par quizh zhow, peet nzhend zho. Dzigo bnabey me to zho grop tsiel zho, xpëed zho ne, ni grëse ncuane rap zho, parne grieelo gazh xquielqui zho. ²⁶ Zeene guṅ zho sca rëb me, pquitsgzhib zho lo me, rëb zho: “¡Been guielnzaac, gop tib paciens, na dien zha guṅ naa quizh naa xquielqui naa lo luu!” ²⁷ Guṅ me zha rac zho, pquia zdoo me zho, psilaa me zho, beenquizh-daque me zho xquielqui zho.

²⁸ Loxaque briece zho ga, bdzieel zho tib zha ne nzëeb palal yeen dimi lo zho, tib zha ne rquiaque xtsiin rey cow. Zigne guṅ zho zha co, zolinëz wbig zho bdie zho yan zho, rnab zho gagazh quizh zho xtimi zho. ²⁹ Dzigo pquitsgzhib zha co lo zho, rnab zho siguiel zho gap zho paciens, dien zha gaclo dimi co quizh zhow. ³⁰ Pe nquiaadiag zho ga, bnab zho bio zha co ladzguiib, haxta bdiizh zho dimi ne zëeb zho ga. ³¹ Grëraa zha ne rquia dziin lo rey co, zeen gocnan zhow, bdeednë zho, güey zho güeyzodi-idz zhow lo me. ³² Zeene bin mew, bnabey me gocredz zho, goctox me lo zho rëb me: “¡Pe clas miech nac luu! Pe rso-ladzd luu zha rac luu bnab luu pquia

zdoo naa luu, haxta beenquizhd naa luu guielquidox ne zëeb luu ga. ³³ ¿Pe nacne pquiad zdoo luu zha co, zigne pquia zdoo naa luu?” ³⁴ Blëë me guṅ me sca been zho, bnabey me bio zho ladzguiib, haxta blozh bdiizh zho grëse xquielqui zho.

³⁵ 'Scadaa nagon guṅ Pxoze naa to, telne guṅde to samiech to perdon, tel pe nac falt ne guṅ zho lo to.

Zha ne rsëbtsieel

(Mr. 10:1-12; Lc. 16:18)

19 Blozhse sca bnee Jesús lo zho, brieenie me zho ga güeyted zho grë guiedz ne ndxie xtan zha Judé, grë mine riaan nëz dan ro guiubee Jordán, nëz ne rlan ngbidz. ² Miech guizhiu ne rriece grë guiedz co, rdziṅ lo me; grë men rzacnë ne rdziṅnie zho, beenguiac me zho.

³ Ga no me, bdziṅ bla zha farisé go-cladz zho niungüet zho me, par dien pe nxind me tib diidz; bnabdiidz zho lo me rëb zho:

—Pe gnë luu dien, ¿pe wena csëbtsieel zha bgui ne gacladztaa csëbtsieel?

⁴ Pquiab me rëb me:

—¿Mod rande to zha zhubnee lo Xti-idz Dios? Lo co zhubnee ganle zeene psan me miech, tib nëz zho psan me, tib mgui ni tib wnaa. ⁵ Ni rneew, ib none greezhaa mgui lo pxoze zho, lo xniala zho par gbannie zho wnaa ne nac tsiel zho, gac zho tibaque miech grop zho. ⁶ Nli-gaa nacdreaa zho chop miech, sinque laa zho rac tibaque. Dios nac men ne psan ycatsieel miech, cho dzigo nac miech par quits zho mine rnabey me.

⁷ Dzigo rëb zho lo me:

—¿Pex nac dzigo waa bdeed Moisés diidz csëbtsieel mgui ne racladz csëbtsieel? Rëb Moisés, zac csëbtsieel zho, tot-saque yquia tib guits gdeed zho lo wnaa zaatne raquiet laa zho psaan wnaa.

⁸ Pquiabchaa me rëb me:

—Ne squitaaxe waa miech nad, miech ndip zdoo goc xmengol to, gane bdeed Moisés diidz csëbtsieel zho; sangue Dios psand me diidz csëbtsieel miech. ⁹ Gacnan to ganle, zha ne csëeb wnaa ne nac tsieel zho, ni tel peet guielyozh beend wnaa co, dol ga gun zho csëeb zho tsieel zho ycaa zho stib wnaa. Scaquegaa mgui ne ycaa wnaa ne psëeb zho ga, dol ga gun zho sac gon no tsieel wnaa co.

¹⁰ Dzigo rëbchaa xpëedscuel me:

—Tel scataa nac xcuent guieltsieel, mazd lëequew dzigo ctsieelniad ne.

¹¹ Pquiab me rëb me:

—Nligaa no mgui ne rtsieelniad, per zhis zho, ni no pe nacne sca riaan zho. ¹² No zho desde rac zho mëed, nacd zho zha ne grieelo tsonie wnaa; no zho ib miech sca rsan zho. Nogaa zha ne ib zha rbeeladz zho ctsieelniad zho, parne grieelo tsoxcoraa zho gun zho xtsiin Dios. Zha ne sca rquiabladz ctsieelniad, maase ctsieelniad zho.

Beenlay Jesús mëedlas

(Mr. 10:13-16; Lc. 18:15-17)

¹³ Ga no Jesús, ndal zha ne bdziñ bdzinnie zho xpëedlas zho lo me, parne cxobnia me guic win gunlay me win. Grë zha ne nac xpëedscuel me, lel psilo zho rtsidil zho pe nacne nodzinnie zho grë mëedlas co lo me.

¹⁴ Zeene gon me sca quiayun zho, rëbchaa me lo zho:

—Ctsirede to grë mëedlas yeen qui, golsaan guiaad win lo naa. Sac gon grë mëedlas yeen, ni zha ne nac zig nac win, zha co nac zha ne sëeb ygab lo Dios.

¹⁵ Dzigo psilo me pxobnia me guic grë mëedlas yeen co, beenlay me win. Blozhse ga, laa me briece ga.

Bzodiidznie tib zha ricw Jesús

(Mr. 10:17-31; Lc. 18:18-30)

¹⁶ Laa me zieriee ga, zeene bdziñ tib mgui nguieg, tib zha ricwa, rëb zho lo me:

—Nan naa luu nac tib men ne noseed miech, ni tib men wen nac luu. Bnë dien, ipe nac mine gun naa parne grieelo yгаа naa guielman ndzon ne gdziñ dze lozh?

¹⁷ Pquiab Jesús rëb me:

—Nree luu lëe tib men wen nac naa. jNligaaaw, Diosse nac men wen! Telne nli racladz luu yгаа luu guielman co, none tsoxco luu gban luu mine rnabey Dios.

¹⁸ Pquiab zho rëb zho lo me:

—iPa min waa?

Rëbchaa me:

—Mine rnee:

Gute luu samiech luu,
telne nole tsieel luu, tsonied luu zha ne led tsieeld luu,
cuand luu samiech luu,
yquiadiidzguizhd luu samiech luu,
¹⁹ gon pxoz luu, gon xniaa luu, cued luu xquielto me.

Bleynie samiech luu, zigne rleynie luu luu.

²⁰ Dzigo rëbchaa zho:

—Ni tib mine rnee luu i gard quits naa, grësew zanal naaw zigne naca. Racladz naa gacnan naa, dien peraa no gun naa.

²¹ Horco rëb me lo zho:

—Tel racladz luu gac luu tib zha ne gban grëse mine rnabey Dios, güey sca güeyto grëse ncuane rap luu, dzigo güeytiiz dimi co lo grë zha ne guiend pe yquiin. Lozh ga, dë dënal zhits naa. Min co nagon gun luu, dzigo zgaa luu guielman ndzon co; ni scagaa nroob guielnzaac ne yгаа luu nëz lo Dios.

²² Zeene bin zho sca rëb me, mbanse rac zho laa zho zey, sac nroob ncuane quianie zho.

²³ Dzigo rëbchaa Jesús lo xpëëdsuel me:

—Gneli naa lo to ganle, grë zha ne squi rapchen rzacxuu zho par sëëb zho xnëz Dios gnabey me zho. ²⁴ Ne nligaa ngan rzac zhow! Mazd ngandse rded tib camell guieer guzh lëdle sëëb tib zha ne squi rapchen xnëz Dios.

²⁵ Zeene bin zho sca rëb me, rzee zdoos zho, nee zho:

—Bay, çhosezhe dzigo waa nac zha ne zrieelo sëëb xnëz Dios?

²⁶ Dze bui me lo zho, dzigo rëbchaa me:

—Nligaa par miech zootle tsod zha ne grieelo sëëb xnëz me; sangue me nan me no zho. Sac tel me, tsod ncuaane grielod gun me.

²⁷ Horco pquiab Pedr rëb Pedr lo me:

—No dzigo waa, çpe nac mine ygaa no? Nanle luu ganle, tel no grëse ncuaane rdziaap no, laa no psana, ziaadnal no zhits luu.

²⁸ Pquiab me rëb me:

—Golgona ganle, dze ne gacnub grëse ncuaane no, zeene laa Mgui ne pxeel Dios zob lo xcan ne zo zaatne nac lo guielndzon ne no me, dze co lo gza to ne nac to zha ne biaadnal zhits naa, sob to lo gza tsiipchop xcan ne rieguial to. To gac zha ne gun guielwxtis lo gza tsiipchop dii ne nac zha Israel. ²⁹ Grëragaa zha ne psan lidz, psan zho bets zho, bzian zho, xnial zho, pxoz zho, tsieel zho, xpëed zho, liun zho porne noyun zho xtsin naa, na lo guielmban riique laa zho gana stib tib gayoogaw tib tiba; ni ib tedsod zgaa zho tib guielmban ndzon ne gdzindraa dze lozh.

³⁰ Nli zig nac niina, nzian zha ne rzac zha non nac zho, nogaa zha ne rzac zho peet nond, per zeene gal dze co lalga gac zho grë zho.

Lalga nac grë zha ne no xnëz Dios

20 ¹Grë zha ne no xnëz Dios, zac zho lo me zig bzhaac grë zha ne güey xtsiin tib men co.

²Tib men co name nroob dziin quanie me, tib dzew zigne biini liu briece me güeyguib me zha ne tsielaap xuv me.

³Bdziel me palal zho, biaan zho diidz palal quizh me zho dze, laa zho bzëëb lo dziin. ⁴Glaale ngbidza briece me güeyted me len guiedz, lëetse güeytsib me lo bla zha ne zob ga racladz dziin. ⁵Dzigo bree me zho, rëb me: “Goltsie xtsin naa, na quizh naa to mine non xtse to.”

⁶Rwe ngbidza, biire me güey me güeyguib me spalal zho. Maase las treza güeyaque me stib.

⁷Zhile sëëb ngbidza, biire me güey me len guiedz. Ga bdzieel me zla zho, gon me scase zob zho ga. Dzigo rëbchaa me lo zho: “Çpe nacne squise noded dze to?”

⁸Pquiab zho rëb zho: “Choot mreedzaxe dziin waa yquiaa no.” Rëbchaa me: “Nasca zeena tsie to lo xtsin naa, maase quizh naa xtse to.” Dzigo laa zho zie.

⁹Zeene laa dze blozh bdze, bnee me lo zha ne zo lo xtsiin me, rëb me: “Bredz grë zha qui na, bdiizh xtse zho grëse zho. Zha ne bza bzëëb lo dziin, zha co glo bdiizh, lozhraa ga quizh luu zha ne glo bzëëb.” ¹⁰Dzigo bded zha ne bdzele dze bzëëb lo dziin ga, tib tib zho pcaase zho mine non zho tib dze. ¹¹Grë zha ne glo bzëëb lo dziin, zeene gon zhow, tibaque güeynie guic zho nroobraa nguizh me zho. Per zeene laa zho gozh, lalgaque pcaa zho.

¹²Zeene gon zho lalga pcaa zho grë zho, blëë zho, güey zho güeylisqui zhow lo men ne nacchen dziin ga, rëb zho: ¹³“Psacsi luu no i gon squi been luu. Bui ganle gdipse dze ptsuu ngbidz no pquiaa no xtsiin luu, çzha nac dzigo lalga quizh luu no grë no zha qui, ni niipyenaque been zho dziin?” ¹⁴Pquiab me rëb me:

“Bets, nosacsid naa to, biaanle ne diidz name palal quizh naa xtse to. ¹⁴Nana sca golgüey xtimi to i, zeena golsë. Ib zdoo naa rala lalga quizh naa to grëse to. ¹⁵¡Stiba, xtimi naaw, zrielo gundziin naaw zigne racladz naa! ¿Te nê rac zdoo to ye, ran to rquia zdoo naa miech?”

¹⁶“Scapaa nagon gac zha ne no xnêz Dios. Lal gacnon zho, zigtaa zha ne glo bzëeb xnêz mew, zigtagaa zha ne sëëb bzaw.

Bzeet Jesús stib laa miech csacsi me

(*Mr. 10:32-45; Lc. 18:31-34*)

¹⁷Nêz no Jesús zie me nêz Jerusalén, tibaque bredz me gza tsiipchop xpëed-scucl me, ¹⁸bzeet me lo zho zha gun miech me zeene laa zho gdzin Jerusalén, rëb me:

—Ib ziaab naa ladznia grë pxoz ne rnabey grë zho maistr ley, zha gnab guet naa. ¹⁹Zha co naa ladznia zha zit, parne gunguzee zha co naa, parne quin zho naa, ni haxta squiaa zho naa lo cruz. Per zeene gac tson ngbidza, zriebaan naa.

²⁰Tibaque zeene wbig tsiel Zebedé wbignie me grop xingan me Jacob ni Juan, pquiitzgzhib me lo Jesús rnab me gun Jesús tib favor ne racladz me. ²¹Dzigo bnabdiidz Jesús lo me, pe nac favor ne racladz me. Pquiab me rëb me:

—Racladz naa gnedz luu diidz sob tibga xpëed rii naa cue luu zeene gdzin dze ne laa luu zob zobnabey luu; tib zho nêz derech, stib zho nêz revés.

²²Pquiab Jesús rëb me lo wnaa co:

—¡Ni luu gon riend pe rnab luu! ¿Ni-acxe zlëb zho gan zho grë guielnë ne gan naa, tedgaa zho grë mine teed naa?

Pquiab zho rëb zho:

—Zlëeb no.

²³Rëbchaa me lo zho:

—Nli nenda zan to grë guielnë ne gan naa, ni zdedgaa to mine teed naa; per ne gnedz naa diidz sob to cue naa nêz derech, nêz revësgaa, led naad raguial

min co; sac laa lugar co biaanle par zha ne tsieguiala, ni Pxoz naa men ne zob gbaa men cose nan dien chow.

²⁴Grëraa xpëedscucl me, zeene bin zho pe nac mine rnab Jacob grop Juan, blëe zho lo zho. ²⁵Dzigo bredz Jesús zho grë zho, rëb me lo zho:

—Ran to ganle zha ran grë zha ne rnabey grë guiedz ne ndxie lo guidzliu, ni grë zha ne nac zha non, masaque rnabey zho samiech zho zigne racladztaa zho. ²⁶Sangué to gon guncade to. Zha ne racladz gac zho zha non lo to, laa ne glu zho zha non zho, none glo zho guiaanwin, gac zho zig tib ngundziin lo to. ²⁷Scaquegaa zha ne racladz gnabey zho lo to, none glo cseed zho gun zho mine gnabey to zho. ²⁸Golgan ganle, nicie naa ne nac naa Mgui ne pxeel Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmban naa zeena laa zho lo grëtaa ncuane ngadoo zho. Ni nappaa naa miech guizhiu ne laa.

Biac chop zha ne rold lo

(*Mr. 10:46-52; Lc. 18:35-43*)

²⁹Miech guizhiu nal zhits Jesús, laa me zieriee guiedz Jericó. ³⁰Ro nêz co zob chop zha ne rold lo, zeene bin zho laa me ziaad ga, psilo zho nguiedz rbedz zho mee zho:

—¡Jesús, men xtií rey David, pquia zdoo no!

³¹Blalaa zha ne zie ga, psilo zho ndox zho lo grop zha co parne guioog ro zho, per lel hor cole nguiedzraa rbedz zho me. ³²Nacne zeene bdzin me zaatne zob zho, blëz me, bnabdiidz me lo zho rëb me:

—¿Pe nadien gun to naa?

³³Pquiab zho rëb zho:

—¡Racladz no guiac lo no!

³⁴Pquia zdoo me zho gon me sca rac zho, dzigo pquiaania me zhits guidlo

zho. Horcogazh laa lo zho biac, laa zho zienaḷ zhits me.

Bdziḅ Jesús Jerusalén

(Mr. 11:1-11; Lc. 19:28-40;
Jn. 12:12-19)

21 Sca no Jesús nēz grē xpēēdsuel me, laa me bdziḅ guiedz Betfagé. Gaxle ga riaanḅ Jerusalén, nēz danse squi riaanḅ Gui Oliv. Dzigo pxeel me chop xpēēdsuel me, rēb me lo zho:

²—Golḷsie guiedz win ne ndxie danse lo ne i. Ga gdziḅ to zaatne quiadoo tib burr gus grop xpēēd, dzigo goḷxadz ma goḷtēnie ma nu. ³Teḷ cho gnabdiidz pe nacne noxadz to ma, goḷguiab lo zho: Menḅ ne rnabey ne, menḅ co rquiin ma, na zigne lozh xtsiinḅ ma guiaadsanḅ no ma.

⁴Ga briequia miḅne bnee tib menḅ ne biadteed xtiidz Dios lo miech padzeela, zeene rēb me:

⁵Goḷguiab lo menḅ Jerusalén:

“Goḷwi ganle, laa menḅ ne nac zhirey to ziaad i.

Tib menḅ ligase rlu me, zob me lad tib burr win,

tib ladse ma ne rey yo zob me.”

⁶Laa zho zie, zigne bnabeyse me zho ga, scase beenḅ zho. ⁷Zeeḅne wbire zho, laa zho bdziḅnie burr co grop xpēēd ma. Pxob zho lar ne rbix zho lad xpēēd ma, laa me bzob ma. ⁸Zigse zie me, no grē miech guizhiu co, rta zho lar ne rbix zho ro nēz rded burr ne zob me ga; nogaa zha ne rchoo nia grē yag nguia, rdziin zhow ro nēz rded me. ⁹Grēse zho, zigtaa zha ne nera, zigtaa zha ne naḷa, nguiedz roptsie zho rnee zho:

—ḷGolḷotsaa co ne xviv xingan David! ḷGolḷotsaa gleynie ne me! ḷZha ndzontaa Dios, pxeel me menḅ nroob qui lo ne!

¹⁰Zeeḅne bdziḅ me Jerusalén, rlozhd gzee zdoo grē miech ne ndxie ga, rnabdiidzlsa zho rnee zho:

—ḷBay cho nac menḅ qui?

¹¹Rquiab grē zha ne naḷ zhits me ga, rnee zho:

—ḷLēē Jesús i! ḷLēē menḅ Galilé qui, no-teed xtiidz Dios lo miech!

Blee Jesús miech lenḅ yadoo

(Mr. 11:15-19;
Lc. 19:45-48; Jn. 2:13-22)

¹²Biini liu co, zeene bdziḅ Jesús Jerusalén stib, güey me yadoo nroob ne zob lad guiedz co. Bdziḅ me gonḅ me nzian miech ne ndxie ga, masaque tib lgui quiayunḅ zho, zha ne no wto, zha ne no wzi. Nacne güey me ptiixche me xmezḅ zha ne notsēē dimi, ptiixche me xmezḅ zha ne no wto palom; blee me zho ga grēse zho, ¹³rēb me lo zho:

—Led znu gonḅ zhubnee lo Xtiidz Dios: “Zaatne nac lidz naa nu, nu none guiaad grēse miech sodiidznie zho naa.” Laa to gonḅ, quiayunḅ to lugar rii zig tib zhibliee ngbaan.

¹⁴Ga no me bdziḅ bla zha ne roḷd lo, zla zha ne nē ni, wbig zho lo me. Gzase zho beḅnguiac me. ¹⁵Nzian mēēd-las yeenḅ ne ndxie lenḅ yadoo ga, psilo win nguiedz rnee win: “ḷZha ndzontaa xingan rey David!”

Grē zha ne nac pxoz ne rnabey, ni grē maistr ley, zeene gonḅ zho milagr ne been me ga, ni gonḅ zho zha rnee grē mēēd-las co, rlēē zho, ¹⁶rēb zho lo me:

—ḷPe ib rond luu ganle pe nonee grē mēēd-las qui?

Pquiab me rēb me:

—Ron naaw. ḷTo waa, pe ranḅde to ganle zha zhubnee lo Xtiidz Dios, zaatne raquiet miḅne noyac nu? Led rneew lēē: Haxta grē mēēd-las ne bii radz, ye win rley win roolḅnie win me.

¹⁷Blozhse sca rēb me, zoque zho ga, laa me bio nēz zie me nēz Betain. Ga blēz me wdze co.

Wbidz tib yag guigw

(Mr. 11:12-14, 20-33; Lc. 20:1-8)

¹⁸ Sil co zeene no me nēz gdziñ me Jerusalén, pcaabedz me. ¹⁹ Gon me zob tib yag guigw gax ro nēz, dzigo güey me güeyso me low dien pe ndzielid tib nex low niow me. Bdziñ me gon me loxaque zhiblagsew zēēb, nacne rēb me low:

—¡Lēē blozh xtse luu nu gon! ¡Gdziñ-draa dze ne yquia nex lo luu!

²⁰ Biini liu, zeene laa zho zie Jerusalén stib, gon xpēēdsuel me, laa yag guigw co bidzle. Bzee zdoo zho, bnabdiidz zho lo me rēb zho:

—¿Bui ganle, bay zha nacne squi znuse wbidz yag guigw qui?

²¹ Pquiab me rēb me:

—Gneli naa lo to ganle, telne dib zdoo to rnalo to Dios, niicle ncuaañe mazdraa ngan gnab to lo me, zun mew. Lēēraasi none dib zdoo to gliladz to zaca, ni palal gacchopd guic to. ²² Grēse ncuaañe gnab to zeene rzodiidznie to me, zneedz mew, totsaque dib zdoo gliladz to laa to ycaaniaw.

²³ Bdziñ me Jerusalén, wbiire güey me len yadoo. Ga noseed me miech, zeene bdziñ bla zha ne nac pxoz ne rnabey ni zla zha ne nac men non lo mengüiedz, bnabdiidz zho lo me rēb zho:

—¿Cho dzigo nac luu ne squitaa zi-aadnabey luu len yadoo? ¿Cho rnabey luu?

²⁴ Pquiab me rēb me lo zho:

—Ye naa laa naa gun tib wnbadiidz lo to. Telne stsire to low, dzigo gni naa lo to ganle cho rnabey naa ne laa naa noyun grē ncuaañe noyun naa. ²⁵ Golnē dien, ¿cho pxeel Juan Bautist biaad me pchoobnis me miech? ¿Pe Dios pxeel me, te miechsew ye?

Psilo zho rnabdiidzlsa zho dien zha ct-sire zho lo xtiidz me, rnee zho:

—Telne dzieets ne Dios pxeel Juan, dzigo laa me gnē: “¿Pex nac dzigo

waa bliladzde to mine bnee me?” ²⁶ Tel na dzieetsgaa ne, miechse pxeel Juan, grieequiadaque ne.

Rdzieb zho niab zho miechse pxeel Juan, sac nan mengüiedz nli Dios pxeel Juan biadteed Juan xtiidz me lo miech.

²⁷ Dzigo mazd mine been zho rēb zho lo me:

—Ndiond no dien cho pxeel Juan.

Dzigo rēbchaa me lo zho:

—Niicle naagaa nagon, grielod gni naa lo to cho rnabey naa quiayun naa grē min rii.

Zha nac zha ne rond diidz

²⁸ 'Golquiaadiaga ganle. Tib mgui, quianie me chop mēēdbgui. Tib dzew, bredz me tib zho rēb me lo zho: “Xin, none gon tsie luu nadze, tsietop luu uv xcuaa ne.” ²⁹ Pquiab zho rēb zho: “¡Gad naa!” Wdzeelaaw, bien zho nongüelda ga sca gun zho, dzigo bio zho nēz güey zho. ³⁰ Laa stib zho, zeene bredz me zho bnabey me zho tsie zho lo dziin, rēb zho: “Peet nacda, na maase ga naa.” Blozh ga pasē zho nie.

³¹ 'Golnē dien, lo grop mēēd co, ¿cho nac zha ne bin xtiidz pxoz?

Pquiab zho rēb zho:

—Zha glo cow.

Dzigo rēbchaa me:

—Gneli naa lo to ganle, mincodaa quiayac nu niina: Grē zha ne rzac to mazdraa ngoopdol, zig nac grē zha ne rtop dimi ne razh lo zha Roma, zig nac grē wnaa ro nēz, mazd glole zha co nozēēb xnēz Dios, lēdle to. ³² Biaadpaa Juan Bautist name biadseed me miech csaan zho xquielntseeb zho, gban zho zigne racladz Dios, ni pe liaadz to nion to mine rnee me. Mazd grē wnaa ro nēz, grē zha ne rtop dimi ne razh lo zha Roma, znuse psaan zho xquielntseeb zho. Laa to, niicle ran to nosaan grē zha co xquielntseeb zho, per ib rsaande to mine nac to.

Xcuent zha ne pquianap liu

(Mr. 12:1-12; Lc. 20:9-19)

³³ Dzigo bzodiidz me stib cuent lo zho rëb me:

—Tib meñ name, nroob lbë uv beenbni me lo liun me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me briece, laa me zey zit.

³⁴ Zeene gol mëë ne laa nex co gol, pxeel me bla zha ne quia xtsiin me zie lo zha ne quianap liun me ga, parne gdeed zha co uv ne rieguiäl me ycaa me. ³⁵ Per lel bnaaz zho zho, zha ne blooque zho, zha ne bdeedgolp zho, haxta beet zho tib zho. ³⁶ Wbiire pxeel me zla zho, hor cole nzianraa zho pxeel me, per niapse sca psacsi zha co zho.

³⁷ Tibaque zeene pxeelaque me xpëed me, bza guic me rëb me: “Ganse zho xpëed naaw, zon zho mine gnee me.”

³⁸ Pex nion zho diidz, zeene gon zho xpëed me, rëbchaa zho: “;Lëë zha qui nagon guiaannie liu ri! ;Golgotsaa dzuiut ne zho, zeena guiaana lo ne!”

³⁹ Dzigo bnaaz zho xpëed me, güeynie zho me zaatne nac tib lad lo liu co, ga güeygut zho me.

⁴⁰ ;Zha sca dien rzac to gun bizhuan liu co gza zha co, zeene laa me gbire?

⁴¹ Pquiab grë zha ne nac pxoz ne rnabey, ni zha ne nac zha non lo menguedz ga, rëb zho:

—Ni lalnu yquiad zdoo me zho, znitlogazh me zho. Lozhse ga, cuediinga me liun me lo zla zha ne gundziina, zha ne guien gdeed nex ne rieguiäl me ycaa me.

⁴² Dzigo rëbchaa me lo zho:

—Haxta lo Xtiidz Dios no tib zaatne znu rnee, ;pe gard ganle glab tow? Rneew:

Quie ne psëeb zha ne nozaa yu,

ni nand zho lëepaa quie co nac mine rnazdziits yu.

;Ncuaane gzee zdoo new! Sac Dios bnabey sca goca.

⁴³ Gacnan to ganle, scadaa nagon griee to lad grë zha ne ngab lo Dios, parne gbig zha ne tsoxcopaa gun xtsiin me, zha cole guiaan xlugar to. ⁴⁴ Zha ne tsietsobe lo quie ne raquiet ga, zac zho zig tib ncuane rac tson tap lë; laa tel lëegaaw tsobe lad zho, zac zho zig tib ncuane die die rac.

⁴⁵ Grë zha ne nac pxoz rnabey ga, ni grë zha farisé, zeene blozh pquiaadiag zho cuent ne bzodiidz me lo zho ga, bien zho zha ga rzeet me. ⁴⁶ Nacne gocladz zho naaz zho me, per bdziebaque zho; sac ndal miech rleynie me, niicle ne rzac zho tib zha ne noteedse xtiidz Dios nac me.

Zha ne nëd sëeb xnëz Dios

22 Bzodiidz Jesús stib cuent lo zho, rëb me:

²—Grë zha ne rbedz Dios ygab zho xnëz me, none tsoxco zho gon zho mine rnee me; sac nenda gdzieelo zho zig bdzieelo zha ne bredz tib rey co nie zho lo zhilni xpëed me.

³ Tib rey name, ziaadyob ctsieelnie xpëed me, nzian zha ne bredz me tsie lo lni. Zeene laa dze co bdzin, pxeel me zha ne quia dziin lo me zietsedz grë zha ne bredz me lo lni ga, per nëd zho nienäl zho. ⁴ Wbiire me pxeel me zla zho rëb me: “Goltsietsedz zho, golguiab, laa guielwagw ne yquiin goclole, siguiel zho na guiaad zho.” ⁵ Per ib beencasd zho zha ne pxeel me ga, no zho briece zie lo xcuaa, no zho briece zie zhiwto, ⁶ nogaa zho lel bnaaz zho zha co, psacsi zho zho, beet zho zho. ⁷ Zeene gon me sca been zho, blëë me, bnabey me grë xmenguiib me güey zho güeygut zho grë zha ntseeb ne psacsi xmandad me ga, ni bnabey me bzëeg zho guiedz co. ⁸⁻⁹ Blozh ga

biire pxeel me zla zho, rëb me: “Laa guielwagw rii goclole, mine naca goltsie tib nëz yu, zha ne gdzieeltaa to, golcuedz zho guiaad zho lo lni; sac grë zha ne bredz naa ga niaad, laa zho blule ganle rieguiald zho guiaad zho nu.”

¹⁰ Dzigo briece zho güey zho, miech ne bdzieeltaa zho, zigtaa zha ndzinliw, zigtaa zha ntseeba, grëse zho bredz zho bdzinne zho zho lo lni. Gol hor wagw, biodzëse len yu ndxie miech. ¹¹ Zeene laa rey bzëëb zienee me lo zho, gon me lad co no tib zha co nacwxabd zho zigne rieguial gacwxab zha ne sca rie tib lo guieltsieel. ¹² Dzigo rëbchaa me lo zho: “Bets, çpe nacne squise luu bzëëb luu nu, bui ganle nacwd luu lar ne bneedz zho niacw luu?”

’Dzese zob zho, rdziel zho pe guiab zho lo me. Gonse me sca rac zho, ¹³ bnabey me zha ne nodziib lo mezh rëb me: “Golzobdoo zha rii, golxidoo grop nia zho, grop ni zho, golcueue zho nu golt-sieron zho lo ncow nëz ley. çGa nac zatne rieguial zho, ga gan zho guielnëdox ne no ted zho, goonnë zho, haxta gow lay zho!”

¹⁴ Mincodaa nagon rac len dze rii —rëb Jesús—, ndal zha ne raredz sëëb xnëz Dios, per zhis nac zha ne rioxco rzëëb.

Pe nonguiel quizh miech contribucion

(Mr. 12:13-17; Lc. 20:20-26)

¹⁵ Blalaa zha farisé ne ndxie ga güey zho bnediidz zho dien zha gungüet zho Jesús cxin me tib diidz, zeena min co yquiaaqui tsiezo zho me lo wxtis. ¹⁶ Dzigo pxeel zho bla zha ne nacgrë zho, ni güey zla zha ne racnie Herod gocgza zho. Bdzin zho rëb zho lo me:

—Maestro, ndion no niapse diidzli ziena luu, ni scagaa zeene rseed luu miech, rdziebd luu mine nac diidzli min co rnee luu lo zho. ¹⁷ Gane niina, racladz

no gnë luu dien pe nonguiela ga rdeed no dimi ne razh lo rey ne zob Roma, te nonguielda ye.

¹⁸⁻¹⁹ Bienga me racladz zho gungüet zho me, dzigo rëbchaa me lo zho:

—çPe nan to na riend naa pe no guic to? Masaque rëb to na lëë, znuse gungüet to naa. Golneedz tib pes ne rguizh to nu ganle.

Dzigo bdeed zho tib pes plat lo me. ²⁰ Blozh ga, rëbchaa me lo zho:

—çCho nu, cho lë nu quia lo pes rii?

²¹ Pquiab zho rëb zho:

—Lëë rey i, lëë lë me i quia lo qui.

Dzigo rëb me lo zho:

—Mine rieguial sca ycaa rey, goldeeda lo rey; scaquegaa mine rieguial ycaa Dios, lo Dios goldeeda.

²² Zeene gon zho sca ptsire me lo xtiidz zho, bzee zdoo zho, mazd mine been zho laa zho wbichese ga, laa zho zey.

çPe nli zrieeban miech?

(Mr. 12:18-27; Lc. 20:27-40)

²³ Dze coquew, güey bla zha saducé lo Jesús. Nac zha saducé rilladz zho zdzin dze grieaban miech. Dzigo bdzin zho, ²⁴ rëb zho lo me:

—Maestro, znu psan Moisés diidz: Telne glo mgui guet lo wnaa ne nac tsieel mgui, ni gopd wnaa mëëd, dzigo none betsaque zho ctsieelnia wnaa co stib, zeena gap wnaa mëëd ne guiaan xlugar xpëëd zha ne gut ga.

²⁵ Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut biaand xpëëd zho. Dzigo ptsieelnia stib bets zho wnaa co. ²⁶ Blozh ga gutaque zha co, pa së zho nsan mëëd. Ptsieelniaque me stib zho, goc zho tson, niicle zha co psandaque mëëd. Sca sca haxta bza gza gadzse zho ptsieelnia me, ²⁷ tibaque zeene yeque me laa me gut. ²⁸ Mine racladz no gacndion no, çchopaa dzigo gac tsieel wnaa co

zeene laa zho grieewan? Sac gza gadzse zho ptsieelnia me.

²⁹ Pquiab Jesús rëb me lo zho:

—I nagon laa to rxin, mine naca riende to zha nac Xtiidz Dios, niicle riladzde to zrieelo me gun me nuaan ro ne gard gan miech. ³⁰ Sac gon zeene gal dze ne laa grë miech grieewan, niicle mguiw nicle wnaaw led yedraa hor co dien cho ctsieelnia zho; sac hor co laa zho gac zig nac grë anj l ne no gbaa. ³¹ Stiba, ib nli zrieewan mengut. Mod rande to zha zhubnee zaatne raquiet zeene rëb Dios: ³² “Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob.” Niicle ne gutle gza zha co hor co, per zeene sca bnee Dios gase rlu mban zho no zho lo me; sac tel Dios, jnacd me xDios mengut, sinque xDios zha mban nac me!

³³ Grë miech ne ndxie ga, zeene gon zho sca ptsire me lo xtiidz zha saducé co, rzee zdoo zho.

Xley Dios mine mazdraa non

(Mr. 12:28-34)

³⁴ Grë zha farisé ne ndxie ga, gon zho sca psioog Jesús ro grë zha saducé co.

Horco biire grë zha farisé co bzodiidz zho stib. ³⁵⁻³⁶ Lad zho no tib maistr ley, dzigo wbig maistr ley co lo Jesús, rëb zho:

—Maestro, lo grë xley Dios, bzhiguiel bnë lo naa dien, çpa min nac mine mazdraa non?

Sca rëb zho, sac gocladz zho niungüet zho me. ³⁷⁻³⁸ Pquiab me rëb me lo zho:

—Lëë mine mazdraa non nu znu rnee: “Dib zdoo luu, dib xalm luu, dib guielbini ne no guic luu, bleynie Dios, men nroob ne rnabey luu.” Lëëw nac mine mazdraa non, ni lëëw glopaa raquiet lo grëse ley. ³⁹ No stib mine rnee: “Bleynie samiech luu zigne rleynie luu luu.” Ye min rii nona, meraque lala con min glo. ⁴⁰ Zha ne gban zigne rnabey grop ley rii,

lëële grë ley ne psan Moisés ga, lëële grë zhiwseed zha ne biadteed xtiidz Dios ga, ziena l zho.

çCho xpëed nac Crist?

(Mr. 12:35-37; Lc. 20:41-44)

⁴¹⁻⁴² Gon Jesús nzian farisé ndxie lo me ga, nacne bnabdiidz me lo zho rëb me:

—çZha dien rzac to guiaad Men ne zëëble diidz ga cxeel Dios? çCho lo xtii grieequia me?

Pquiab zho rëb zho:

—Lo xtii David grieequia me.

⁴³ Dzigo rëbchaa me lo zho:

—çPe scaw sca? Zha nac waa zeene bdeed Espíritu Sant guielbiini lo David bzeet David men co, rëb David me nac men ne rnabey David. Golgan ganle znu bnee David:

⁴⁴ Rëb Dios lo men ne rnabey naa:

“Cue naa nëz derech, nu bzob, nieeda lozh gnaz naa grëse zha ne rlëë lo luu, csan naa zho ladznia luu.”

⁴⁵ Gase nagon telne nli zha xtii David gac Men ne cxeel Dios ga, çzha nac dzigo rnee David men co rnabey David?

⁴⁶ Ni tib zho ib bdziidz zho zha ntsire zho lo xtiidz me; desde dze co ni stib zho biazhdraa pe nabdiidz zho lo me.

Mine nac maistr ley grë zho zha farisé

(Mr. 12:38-40; Lc. 11:37-54;

13:34-35; 20:45-47)

23 Dzigo psilo Jesús bnee me lo grë miech co, ni lo xpëedscuel me, ² rëb me lo zho:

—Grë maistr ley ni grë zha farisé ib lëë xtsiin zho ga, nac cseed zho miech zha nac ley ne psan Moisés. ³ Golguien golgon xtiidz zho, çper nsin golso, ib gunde to mine run zho! Nac zho, ni lalnu rund zho mine rseed zho miech. ⁴ Rio zho rnee zho lo miech, min rii, min rii rnabey ley gun to, ni per ni zha rioxcod zho siquier csilo zho gun zhow.

⁵’iGrë ncuuane run zho, laaw runse zho par ganpaa miecha! Par guiab miech nguzobdiidz zho lo Dios, rio zho led zhid nzhen grë lo cint rquiaa zho Xtiidz Dios, rlozh ga rzhidoow yan nia zho, rzhidoow quia zho ne. Lar ne rbix zhow, rlozhd dieen peraa rquiaa lada, xab zhow, haxta zhits ni zho rbiba. ⁶’iZeene rbedz miech zho tib wagw nroob, rdziladz zho zhapaa rzob groļ mezh, niicle len yadoogaaw, zaatne glupaa zha non nac zho, ga rzob zho! ⁷Ro nëza, rdziladz zho ndooladz gnee miech bdiuzh lo zho, zeene rnee miech “zha rac”, “zha non”, nac zho, rlozhd gley zho.

⁸’Sangue to gon yguibde to dien zha gnee miech “zha rac” nac to, sac tibaque men rac no, lëe me ga zëëble diidz cx-eel Dios; golguien ganle tel to lalga nac to, rrieequia bets to grë to. ⁹Ib gunde to zig run grëraa miech, runnon zho tib samiech zho rnee zho lëe pxoz zho ga, sac tibaque men ne nac Pxoz to, lëe men co no gbaa. ¹⁰Yguibde to sac miech topaa gunctsin zho lo Dios, sac loxaque Men ne nole diidz ga cxeel me, men cose zrieelo gunctsin zho lo me. ¹¹⁻¹²Nodne gacglaa to lo samiech to, mazd ndooladz golgac lo zho, sac zha ne racglaa, ziaanwin zho. Gacxe waa, telne racladz to gacnon to, none ndooladz gac to lo samiech to.

¹³’iProbsaxe to maistr ley, probsaxe to zha farisé! Lëda i gon noyun to, rzac to noxco to sëëb miech xnëz Dios, per lel noca to sëëb zha ne racladz sëëb. Ni stiba, per ni to nod xnëz me. ¹⁴[i]Probsaxe to! Guielntseeb i gon run to, rio to rlozhd goļ to xlay to rzo to ro nëz, ni noque to rla to ncuuane rapse grë wnaa viud; ib tedsod gon guielnëdox ne ygaa to.] ¹⁵iProbsaxe to, rzac to na lëëw ga run to! Rio to gui dan rbix to, haxta rded to nisdoo, rquiaguib to dien cho sëëb xnëz to ni rlozh ga laa ne ygab zho nëz lo Dios, lel nëz len gabil zienie

to zho. ¹⁶iProbsaxe to, nac diidz name to noseed miech, ni per ni to riend pe rnee to! Rnee to lo miech: “Zha ne rzeet yadoo ni tel gund zho mine rnee zho, peet nacd ga, per tel gzeet zho grë or ne no len yadoo ni gund zhow, dol ga gun zho.” ¹⁷iNadzpaa nxen to, nadzpaa ncow nac guic to! iNiacxe mazdraa non or lo yadoo? Golguien ganle por yadoo, naclay grë or co. ¹⁸Rneeque to: “Zha ne gzeet lo pcoog, led dolda telne gund zho mine rnee zho; per tel gzeet zho gon ne ndziib lo pcoog ni gund zhow, dol ga gun zho.” ¹⁹iPe nlipaa rnee to peet riende to! iNiacxe mazdraa dzigo non gon que lo pcoog? iPe rande to por lo pcoog co raclay gon? ²⁰Golguien ganle, zha ne rzeet lo pcoog, yeke grë ncuuane ndziib low ga quiazeet zho; ²¹zha ne gzeetgaa yadoo, haxta Diosle ga gon rzeet zho, sac ga rbëz me. ²²Scasaque zha ne gzeet gbaa, zaatne rzoble Dios ga nozeet zho, masaque rrieequia me ga rzeet zho.

²³’iProbsaxe to maistr ley, probsaxe to farisé! Rzac to na demas nguzobdiidz to lo Dios, rio to haxta grë guizh bitxtil, guizh nizh, guizh comin run to tsii lal, rdeed to tib lala mine rieguial tsiesan to yadoo, laa ley ne mazdraa non zienied guic to gun to mine rnabeya. Nli rieguiala gdeed to grë gon co, per none scaque tsoxco to gun to mine nac diidzli, none yquia zdoos to samiech to, none dib zdoos to gnalo to Dios. Min rii nac mine mazdraa non.

²⁴’iNe nlipaa ib riende to pe quiayun to! Rzac to na noxco to guntalde to xtol to, masaque ni tib ngurudz rsaande to tso lo ncuuane row to, ni riende to rrieequia haxta tib camell rab to. ²⁵iProbsaxe to, masaque nac to zig tib plat, zig tib tas ne nëz zhitssew mbe rna, laa nëz lena rmadraa! Laglaase rquiaalo to miech wen nac to, per tibaque noban to, tibaque nosacsi to samiech to. ²⁶Golguien none glo csaan to xquielntseeb to, none gac to

zig tib plat zig tib tas ne zigtaa mbe nēz zhitsa, scagaa mbe nēz lena. ²⁷ ;Probsaxe to, nac to gon zig grē baa ne dieen paraa nquitsbie rna! Niow rlu nēz zhitsa, laa nēz lena loxaque grē ncuuan biodz, loxaque grē dzit ngutoo nodzē. ²⁸ Sca gon nac to, ne rac to zootxe luu waa nli miech ndzinli nac to, per nēz len zdoo to loxaque zhgab ne dien zha yquidie to miech, zha csacsi to miech no to.

²⁹ ;Probsaxe to maistr ley, probsaxe to farisé! Ni lalnu guielto guien lo to, rio to rzhixcuua to ro xpa grē zha ne biadteed xtiidz Dios, ni lēēpaa grē pxozgol to beet zho. Dieen peraa run to rquiaalo to rsoladz to zho. ³⁰ Rnee to: “Telne niaca mine nole ne len dze co, ndeete ne diidz nsacsi xmengol ne grē men rii.” ³¹ ;Lēēque to gon nobeero ga, zha nactaa lo dii ntseeb ne ziaad to! ³² ;Scaque nasca golgun! ;Goltsienal grē mine been pxozgol to ga! ³³ ;Miech ngoopdo! ;Zhin mendox! Telne csaande to xquielntseeb to i, ib tedsod gon gabil guey to.

³⁴ Grē zha ne cxel naa, zig nac zha ne guiadteed xtidz naa, zha ne nacie Espiritu Sant, zha ne ygaa guielbiini yquiaa zho mine gnabey Espiritu Sant zho, ib tedsod sacsi to zho. No zho gutgazh to, no zho yquiaa to lo cruz, no zho lēēque len xyadoo to gdeed yag to zho, ib gandzede to zho, stib guiedz, stib guiedz tso to ctsidil to zho. ³⁵ Blactaa grē miech ne sca peet xtold ziyut to grē xmengol to, psilow desde Abel haxta Zacarí xingan Berequí, men ne beet xmengol to zatne nac gax lo pcoog len yadoo. Ni ye to gon zēēb xchen grēse zha co. ³⁶ ;Gneli naa lo to ganle, grē miech ne gon mban len dze rii, grē to zho ygaa guielnēdox ne tsieguial to por grētaa guielntseeb co!

³⁷ ;Aque tow men Jerusalén! ;Pe nacne squitaa nac to, rut to zha ne ziadteed xtiidz Dios lo to, rgoquie to grē zha ne rxeel me lo to? Blactaa gocladz naa, niacnie naa to, nquianaap naa to,

zig run nguid rgueedz ma xpēed ma, per bzhiguielde to. ³⁸ Gacnan to sca ganle, nadzetaa gon laa lidz to nu guiaan ngan, ³⁹ sac gandraa to naa, haxta gal dze ne guiab to: “;Zha ndzontaa men qui pxeel Dios lo ne!”

;Nsin golso!

(Mr. 13:1-23; Lc. 17:22-24; 21:5-24)

24 Laa Jesús zieriee len yadoo grē xpēedscuel me, zeene pcuēēdzdze zho me, rēb zho:

—Gotsaa gwi ne ganle zha niaataa yadoo rii.

² Blozhse bui zho low, rēbchaa me lo zho:

—Niicle squitaa nagon niaaw, per zdzin dze ne nitlow dib nacsew. Ni stib quie qui guiaandraa zigne squi zhobxcuaaw i.

³ Brie me len yadoo ga grē me zho, laa zho zie nēz Gui Oliv. Bdzin zho cho gui co, ga bzob me grē me zho. Dzigo wbig gax bla zho lo me, bnabdiidz zho rēb zho:

—Bzhiguiel bnē lo no dien, ;pa hor dzigo gac mine bzeet luu ga? ;Zha glu zeene laa luu ziaadyoble guiaad? Zeene nitlogaa guidzliu, ;zha gacndion no laa dze co ziaadyoble?

⁴ Pquiab me rēb me lo zho:

—Nsin golso, zeena choot yquidiede to. ⁵ Sac nzian zha ne grieequia guiab zho zha nac Men ne zēēble diidz cxeel Dios; ni nzian miech ne yquidie zho.

⁶ Zeene gon to nēzrii nēzrec noxtseeb csilo dil, guiabde to togo lēēle dze ne guial naa ga bdzin; sac niicle noyacle dilā, noxtseebragaa pa csilo gaca, led lēdle ne nitlo guidzliu ga. ⁷ Garaa csilo grē dilox, grē guiedz nroob laaw tilnie saguiedz nrooba; grē zha ne rnabey grē guiedz nroob, laa zho tilnie sazha rnabey zho. Nēzrii nēzrec csilo gni grē zhodox, nzian zaatne gan miech gbin. ⁸ Ni lega

loxaque mine rsilosew ga, sac nroobraa guielnë ne gan miech lozh ga.

⁹Zeene laa grë ncuuan rii noyac, jnsin golso! Sac hor co laa miech tsielo to lадznia zha ne csacsi to, haxta zut zho palal to, grëse miech stsidil zho to loxaque ne nac to zha ne no xnëz naa. ¹⁰Nzian zha ne nole xnëz naa, len dze co laa zho gbiche, laa zho csilo lëëque zha glëënie zha ne nacgrë zho, haxta zielo zho zho lадznia zha ne gut zho. ¹¹Len dze co zrieequia nzian zha ne yquidie miech guiab zho xtiidz Dios no-teed zho, ni nzian zha ne gliladza. ¹²Grë zha ne nole xnëz naa, zeene gan zho grë-taa guielntseeb, grëtaa dol ne quiayun miech len dze co, ndal zho gleyniedraa zho Dios dib zdoz zho. ¹³Per zha ne tiblque gac, gbiched zho lo Dios, niicle tel petaa gan zho noyac, zha co gac zha ne gdziñ lo me. ¹⁴Niicle scataa noyac grë ncuuan co, ib none ygaaz Xtiidz Ndzon Dios lo grëse miech, grëtaa zaatne ndxie miech laa zho gacnana; lozhraa ga dzigo laa guidzliu rii nitlo.

¹⁵Zeene gan to zaatne nac Lugar Nda len yadoo, zo tib ncuane rieguiald so ga, tib ncuane ziaad gnitlo, zigne bzeet Daniel men ne biadteed xtiidz Dios (zha ne glaba, none guien zho zha naca), hor co golguib dien zha xoon to. ¹⁶Zha ne no grëraa guiedz ne ngab Judé, none xoon zho tsie zho dan, ga tsietsolan zho. ¹⁷Zha ne lëëtaque hor co no glaa guic lidz, none lëëled xoon zho, ib guiabd zho sëeb zho len yu tsiebee zho ncuane rap zho. ¹⁸Zha ne quiagaa lo dziin dan, ib gund zho tsie zho lad guiedz tsixi zho xab zho. ¹⁹iProb grë men wnaa ne lëëtse len dze co zoney xpëed, men ne quian-iegaa mëdyeen ne bii radz! ²⁰Golnab lo Dios gande to guielnë co len mëe ne rac nal, dze ne rdziiladzga to lo dziin. ²¹Ne nligaa guielndoxa. Wlal ne biaan guidzliu haxta lo nadze, gard gan miech tib guielndox sca, ni gandraa zhow ted

ga. ²²Telne csaan Dios nroob dze gac guielnë co, ni stib miech rii guiaandraa; per na por grë zha ne bzooblo me sëeb xnëz me, gdeete me diidz gaca nroob dze.

²³Zigne rne naa ga, len dze ne scataa gan miech grë dil co, zha ne gnë lo to: “Goltë nu ganle, lëë Men ne nole cxeel Dios ga blanso nu”, gnëgaa zho: “Goltie nec ganle, laa me bdziñ ga”, gliladzde tow. ²⁴Sac zrieequia zha ne yquidie guiab zho zha nac men co, zrieequia zha ne guiab xtiidz Dios ziadteed zho lo miech, zun zho grë milagr nroob, parne yquidie zho miech, haxta zha ne nole xnëz Dios, zguib zho dien zha gdeeda diidz yquidie zho zho. ²⁵jNsin sca golso! Benque laa naa nilew lo to. ²⁶Nligaa zha ne gnë lo to laa men ne pxeel Dios ga blansole, gliladzde tow. Nenda cxeel zho to tib dan zit, gnë zho: “Goltie ganle laa me no ga”, gnëgaa zho pa tib len yu ne no me, ni tib xtiidz zho gliladzde to. ²⁷Sac zeen gal dze ne guiaad me stib, gacda ncuuan ngeets zhlian, grëse miech gan me. Zig tel guiab tib belye nroob ne glu zhan gbaa, desde nëz ne rlan ngbidz haxta nëz ne rzëeb ngbidz, iñiacxe gand grëse miecha? ²⁸Zlupaa zeene laa me guiaad; nanle to ganle zaatne nix ma gut, ga rcaalsa pech.

Ziaad Jesús stib

(Mr. 13:24-37; Lc. 12:41-48;
17:26-30, 34-36; 21:25-33)

²⁹Zeene lozhse gan miech grë guielndox co, laa lo ngbidz ycow, gziinidraa mëe. Grë mel ne ndziib gbaa, laa ma gliaal; grëraa ncuane no gbaa, masaque nëzrii nëzrec gaca. ³⁰Horco zlu ganle zeene laa Mgui ne pxeel Dios ga, ziad-zëeb lo xcow con grë guielndzon, con grë poder ne rap me, grëse miech mban gac zho, zoon zho gan zho me. ³¹Grë xanjl Dios, hor co laa

Dios cxeel zho tsiecuedz zho zhitrompet zho parne ycaalsa grëse zha ne ngab znëz me, tel pa lotaa lo guidzliu no zho.

³² 'Golzoob cuidad zha nac yag guigw. Led nanle to ganle, zeene laa grë zhicwa racnieen, ni rsilo rdzib zhiblaga, gase rlu ne laa mëë nëëg ziaadgaxle. ³³ Scaque nagon zeene gan to laa grë mine rne naa lo to nu rsilo noyac, dzigo nanle to laa dze ne guiaad men co ziaadgaxle. ³⁴ Gnelli naa lo to ganle, nzian miech ne mban niina bii zan zho zeene laa grë ncuuan co csilo gac; sac ible ncuane gaca. ³⁵ Zdzin dze ne nitlo gbaa, nitlo guidzliu, sangue mine rne naa lo to nu, nitloda; ible laaw none gac.

³⁶ 'Lëeraasi choot nand dien pa dzew, dien pa horgaaw, per ni grë anjl ne no gbaa, per ni naa nanda, loxaque Pxoze naa nana.

³⁷⁻³⁹ 'Nanle to ganle zha bzhaac miech len dze ne wban Noé, ib bliladzd zho xti-idz me. Guxt no zho lo zhilni zho, zha ne notsieelnia, zha ne nobediingaa xpëed, laa dze bdzin laa Noé bzëeb len barcw; tibaque zeene baa zho biini laa guiedox co nonitole zho. Scadaa nagon sac grë miech nad rii, tibaque zeene tsaa zho biini laa Mgui ne pxeel Dios ga ziaadle. ⁴⁰ Horco zaatne quia chop mgui lo dziin dan; tib zho tsienal zhits me, stib zho guiaan. ⁴¹ Zaatne quiayot chop wnaa, tib zho tsienal zhits me, stib zho guiaan.

⁴² 'iNsin sca golso, sac gon nande to dien pa horpaa guiaad me, benque laa vis racle lo to! ⁴³ Golgan ganle, tel niaca mine gacnan miech laa ngbaan tsieban lidz zho guieel, per nand zho dien pa horpaaw; ¿niacxe zaaguis zho? Led sobna zho lëë, nsin nsin so zho. ⁴⁴ Scaque to nagon, none nsin so to, sac gon lega naclew zeen gan to laa me ziaadle.

⁴⁵ 'Golgan ganle, masaque laa to gac nagon zig tib ngundziin ne riaannie ro lidz men ne rquia zho xtsiin.

'Ngundziin ne ndzinli, zeene laa men ne quia zho xtsiin ga grieë, ine niowse guiaan zho guiaannie zho grëraa zha ne no lidz me. ⁴⁶ Zha ne sca gun, iwen tsie zho, sac zeene gbire me gan me scataa noxco zho dziin ne pso me zho, zianziuu zho lo me ⁴⁷ haxta so me zho, zha yquiaanap grëse ncuane rap me!

⁴⁸ 'Tel ngundziin yozhgaaw, mine tsienie guic zho guiab zho gbireniobd men ne quia zho xtsiin ga, ⁴⁹ csilo zho csaci zho grëraa zha ne nac ngundziin, csilo zho tsielsa zho grë ngonziu tso zho loxaque gzudz zho, loxaque gowcho zho, ⁵⁰ tibaque zeene gan zho laa me bdzinle. ⁵¹ Zha ne sca gun, per peraa dien gun me, ib tedsod nroob caxtigw ne cteed me zho, sonëz me zho guey zho zaatne no grëraa zha ne rond diidz, ga tso zho grë zho zha co goonnë zho, haxta gow lay zho lo guieinëdoh ne ted zho.

Zha bzhaac tsii wnaa nguieg

25 Blozh ga rëbchaa Jesús lo zho: —Par sëeb miech zaatne rabey Dios, masaque naca zig rzëeb miech tib lo lni zaatne noyac tib guiełtsieel.

'Tsii wnaa nguieg name, brieë zho ziexinëz zho mgui ne ctsieelnia, tib tib zho bise zho psin win ne rec nceit ne rziini. ²⁻⁴ Gaay zho goc ligier pcodzëë zho zhipsin zho nceit, ni zhaaque bi zho zniipa; laa zgaay zho gocnroladz, zigne bzhense zho psin co scase bi zhow, bid zho nceit ne niodzëraaw.

⁵ 'Goc pa hora rio zhimcaalo zho, ni rdzindaque mgui ne ziexinëz zho ga, tibaque zeen laa zho pquia mcaal. ⁶ Gol groł guieela, zeen laa vis rac, laa mgui co ziaadle, zha ne ziexinëz me ga, zac grieë zho tsiedzieel zho me. ⁷ Lëëlëd brieë mcaallo gza wnaa nguieg co, psilo zho nozhixcuaa zho zhipsin zho. ⁸ Zeene gon gza zha nroladz co ygaadraa zhin-ceit zho, dzigo bnaab zho lo zgaay zha

co, gdeed zho niip nceit yquiiin zho, sac laa zhipsin zho noyuule. ⁹Pquiab zho rëb zho: “Grieeloda, sac mine yquiiinse zhipsin no ziaadnie no. Mazd goltsie zatne rto zhow, ga goltsiexiw.” ¹⁰Per lo lal ne ziexi zho nceit, laa mgui co bdziñ. Zeene wbiire zho, laa ro yu nioogle, lox- aque gza zha ne nsinle zo ga, zha cose bzëëb leñ yu. ¹¹Dzigo psilo zho, rcaañ nia zho ro yu, rbedz zho mgui co cxal me ro yu sëëb zho. ¹²Per bdeete me didz nzëëb zho, rëb me: “Runbeyd naa to gon, nañd naa dieñ cho nac to.”

¹³‘jNsin sca golso! —rëb Jesús—. Sac gon nande to pa dzepaa, pa horpagaa gbiire guiaad Mgui ne pxeel Dios.

Zha ne biaannie dimi

¹⁴‘Mgui ne pxeel Dios ga, ziaad gac me zig tib men ne no griee tsie tib viaj zit.

‘Tib men name no griee me tsie me tib guiedz zit, dzigo bredz me zha ne run dziin lo me, bdeed me palalga xtimi me lo zho gundziin zhow leñ dze ne guiend me ga. ¹⁵Tib zho pcaania gaay mil pes plat, tib zho chop mila, stib zho pcaania tib mila. Tib tib zho, bdeedse me mine rgobey me griee lo zho gundziin zho, dzigo laa me brie laa me zie.

¹⁶‘Zha ne biaannie gaay mil pes plat co, güey zho bloonon zhow, beena gan zgaay mila. ¹⁷Zha ne biaannie chop mila, ye zho güey zho bloonon zho dimi co, scaque beena gan schop mila. ¹⁸Laa zha ne pcaania tib mila ga, leñ güey zho güeyteen zho tib guieer güeyloliu zhow.

¹⁹‘Goc bla iza laa men co bdziñ, dzigo bredz me zho tib tib zho, tsie zho gzodidz zho dieñ yo dimi ne biaannie zho ga.

²⁰‘Bdziñ zha ne pcaania gaay mil pes plat co, bdziñnie zho xtimi me, rëb zho: “Laa xtimi luu nu gon, lëë gaay mil pes ne psan luu lo naa nu, laa zgaay mil min rii nac mine bdziniaaw.” ²¹Rley me rëb me lo zho: “jZha squi nagon racladz naa! Rley naa ran naa squitaa ndzinli

luu, squitaa nguzobdiidz luu; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa mine gnedz naa gundziin luu. jNa bded, zeena yгаа luu grë guieibley ne quaiyac nu!”

²²‘Blozh ga, bdzinaque zha ne biaannie chop mila ga, ye zho laa zho bdziñnie xtimi me, rëb zho: “Laa xtimi luu nu gon, lëë chop mil pes ne psan luu lo naa nu, laa schop mil min rii nac mine bdziniaaw.” ²³Pquiab me rëb me: “jSquiw nagon! Rley naa ran naa squitaa ndzinli luu, squitaa nguzobdiidz luu lo naa; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa mine gnedz naa gundziin luu. jNa bded, zeena yгаа luu grë guieibley ne quaiyac nu!”

²⁴‘Zeene bdziintaa zha ne biaannie tib mila ga, rëb zho lo me: “Nli bendziind naa xtimi luu, sac nanle naa zha nac luu, niicle paraa niundziin naaw, grëse mine niuna gan lo luu niaana; ²⁵gane mazd bialoliu naaw. Tib mil naca bneedz luuw, ledaaw nu.” ²⁶Blëë guic me, rëb me lo zho: “jBiche nu, paat rquiind naa miech yozh, miech nroladz ne squi nac! Conque nanle luu sca nac naa, ²⁷j pex nac dzigo waa bioxcod luu maase mbediñ luu dimi qui, ndziniaaw palal ncaania naaw niina?” ²⁸Dzigo rëbchaa me lo zha ne ndxie ga: “Niinagazh golcob tib mil pes qui lo zha qui, goldeeda lo zha ne ziaadnie tsiw i. ²⁹Sac zha ne rioxco rundziin ncuane rcaania zho, zacroobraa ncuane yquianie zho. Laa zha ne squi nac, haxta mine pcaaniale zho, zdiooba lo zho. ³⁰Golxen zha yozh qui, goltsiesan zho lo ncow nëz ley. Ga gan zho guieñdëd ne tsieguial zho, ga goon zho haxta gow lay zho.”

Zha gun Jesús guieiwxtis

³¹Blozhse bzodiidz Jesús cuent co lo zho, rëbchaa me:

—Naa ne nac naa Mgui ne pxeel Dios, zeen gal dze ne laa naa guial stib, zialnie naa gre xanjl naa, zlu gretaa guielndzon ne rap naa, laa naa sob lo xcan ne raguial naa soob naa. ³²Grese miech ne ndxie dibdoose lo guidzliu, hor co laa zho gacredz lo naa, laa naa cueextso zho zig rbeextso baxtor chiv lad xpëcwxiil zho. ³³Zha ne no xnëz naa, zha co gdziñ naa cue naa nëz derech, laa zha ne nod xnëz naa, cue nëz revés.

³⁴Lozhse ga, naa ne nac naa men ne rnabey, hor co laa naa cuedz zha ne no xnëz naa, guiep naa lo zho: “Golte grese to, to ne nac to zha ne nziuu lo Pxo z naa. Golted zeena ycaania to zaatne cuëz to, ible par to bzaa mew desde zeene bzaa me guidzliu. ³⁵Sac zeene pcaabedz naa, bneedz to ncuaañe dow naa; zeene bñab zhis naa, bneedz to ncuaañe go naa; zeene bial naa ladz to, bneedz to lidz to blëz naa; ³⁶zeene gon to guieñd xab naa, bgacwxab to naa; zeene bzhaenë naa, zeene bio naa ladzguuib, biaad to biaadgan to naa.” ³⁷⁻³⁹See zdoo zho gnë zho: “¿Per pa hor bneedz no ncuaañe doow luu, ncuaañe go luu, pa hor bneedz no zaatne blëz luu, pa horgaa bneedz no lar ne gotxab luu, ib bdziñd no nzhaacnë luu, bdziñd no niogaa luu ladzguuib?”

⁴⁰Dzigo guiep naa lo zho: “Gzobtaa hor ne gon been to xyudar zha ne nacgre to, güeygan to zho, pcaaniagaa to zho, niicle zha ne bzoob miech peet nonda, rriequia xyudar naa ga been to, rriequia naa ga biaadgan to.”

⁴¹Laa zha ne ndxie nëz revés, hor co laa naa gzonëz zho, guiep naa lo zho: “¿Golbiche lo naa nu, miech ndziibdee! ¿Golsë lo guidox ne rieguial to, zaatne no guey mendox gre xanjl ma! ⁴²Sac gon, bio dze pcaabedz naa ni bneedzde to ncuaañe niow naa; bñab zhis naa,

ni bneedzde to pe nie naa. ⁴³Bial naa ladz to, ni bneedzde to zaatne mbëz naa; gon to guieñd xab naa, ni ni tib lë lar bneedzde to niacw naa. Bio naa ladzguuib, bzhaenë naa, ni pe liaadz to niaadgan to naa.”

⁴⁴Squiab zho gnë zho lo naa: “Per pa hor bdziñd no luu rcaabedz luu, rnab-gaa zhis luu; pa hor bdziñd no guieñd pa cuëz luu, guieñd lar ne gacw luu; pa horgaa bdziñd no no luu ladzguuib, nix-gaa luu rzacnë luu.”

⁴⁵Dzigo guiep naa lo zho: “Grese vuelt ne bzoliaadz to niun to xyudar zha ne no xnëz naa, bzoliaadz to niegan to zho niicle zha ne mazdraa wina, rriequia naa ga sca been to.”

⁴⁶Horco grese zha co laa zho guey lo guidox ne gdziñdraa dze grieë zho; laa zha ne bioxco wban zigne rnabey naa, grese zho laa zho yгаа tib guielmban ndzon ne gdziñdraa dze lozh.

Bnediidz zho dieñ zha gnaaz zho Jesús

(Mr. 14:1-2; Lc. 22:1-2; Jn. 11:45-53)

26 Zeene blozh sca bnee Jesús lo grë miech co, dzigo rëbchaa me lo xpëëdsuel me:

²—Nanle to ganle schopaque ngbidz, laa lni Pascw csilo. Naa ne nac naa Mgui ne pxeel Dios, lo lni co gon gnaaz miech riï naa, tsielo zho naa ladznia zha ne yquiaa naa lo cruz.

³Grë zha ne nac pxoz ne rnabey, grë maistr ley ni grë zha ne nac men non lo men guiedz Israel, lëëtaque hor co laa zho ndxie lidz Caifás, men ne nac pxoz nroob. ⁴Laa zho ndxie ga, nonediidz zho dieñ zha grieelo gnaaz zho Jesús, gut zho me, per tib mod ne grielod glisqui men guiedza. ⁵Rnee zho: “Lëëraasi choot gnabeyd yгаа me merpaa dze lni, zeena gacntseebd menguedz.”

Pchoob tib wnaa nceit nex guic Jesús*(Mr. 14:3-9; Jn. 12:1-8)*

⁶Betain ga no tib meñ ne biac lo guiedz lepr, lë Simón. Lëëtaaque no Jesús lidz meñ co, ⁷zeene bdziñ tib wnaa bdziñnie tiblo nceit nex, no sew tib leñ ncuuañ win niaa niapse quie rbebni, tiblo nceit niazha. Squi zob Jesús lo mezh, güey wnaa co güeychoob me nceit co guic Jesús. ⁸Zeene gon xpëedscuel Jesús sca been wnaa co, blëë zho, rnee zho:

—¡Pa rieguiala squi pxin zhlë wnaa qui nceit qui! ⁹Teñ niaca mine ndow, pe zhidaa dimi ne nguizh zhow, nquiinpaa dimi co ngaaza lo grë zha ne guiend pe yquiin.

¹⁰Gon Jesús sca rac zho, dzigo rëbchaa me lo zho:

—¿Pe nacne rlëë to lo wnaa qui? Golsaan me. Par naa nroob non mine been me i. ¹¹Teñ nli lëë racladz to gun to xyudar zha ne guiend pe yquiin, zac ygad to lo zho stib dze, sac tibaque ran to zho; sangue naa zhile laa naa gbiche lo to. ¹²Led pxin zhlëd wnaa rii zhinceit me, sac gon rreequia laa me bhixcuaale xcuerp naa nu gal dze ne ygueetsa. ¹³Gneli naa lo to ganle, dipse lo guidzliu zaatne cseedtaa miech Xtiidz Dios, ible soladz zho wnaa rii, seet zho mine been me nu.

Güeyto Judas Jesús*(Mr. 14:10-11; Lc. 22:3-6)*

¹⁴Lo gza tsiipchop zha ne nac xpëedscuel Jesús ga, brie zha ne lë Judas Iscariot güeyzodiidznie Judas grë zha ne nac pxoz ne rnabey, ¹⁵rëb Judas lo zho:

—¿Palal quizh to naa telne gun naa Jesús ntregar lo to?

Dzigo biaan zho diidz quizh zho Judas galptsii pes plat. ¹⁶Nacne psilo Judas noguib Judas dien zha gdeeda diidz can Judas me ladznia zho.

Dowxtseenie Jesús xpëedscuel me*(Mr. 14:12-25; Lc. 22:7-23; Jn. 13:21-30; 1Co. 11:23-26)*

¹⁷Mer dze ne rsilo lni Pascwa, len dze ne sca row zho quietxtil ne riotsd ncobi ga, bnabdiidz xpëedscuel Jesús lo me dien pa lo racladz me tsiegunlo zho ncuuañe gowxtseenie me zho wdze co. ¹⁸Dzigo rëbchaa me lo zho:

—Nanle to ganle cho lidz zrieelo gdzin ne. Goltsie Jerusalén golguiab lo zho: “Znu në xmaistr no: Gneedz luu lidz luu me dioow no xtsee Pascw rii. Niinataa laa xtsee me bdzin, gane racladz me lidz luu nu diowxtsee no nawdze grë no me.”

¹⁹Dzigo laa zho zie. Güey zho zaatne pxeel me zho ga, ga beenlo zho xtsee co. ²⁰⁻²¹Wdze co, laa me no xtsee grë me zho, zeene bnee me lo zho rëb me:

—Gacnan to ganle, lëëque tib to gon tsielo naa ladznia zha ne gnaaz naa nawdze rii.

²²Zeene bin zho sca rëb me, mbanse rac zho, dzigo psilo zho tibga tibga zho rnabdiidz lo me, rnee zho:

—Bnë dien, ¿cho gun min co? ¿Pe naaw?

²³Pquiab me rëb me lo zho:

—Zha ne gan to csëëb xcuun len xquien naa, lëë zho ga. ²⁴Naa ne nac naa Mgui ne pxeel Dios, niina laa miech gut naa zigne raquietsew lo Xtiidz Dios; per, ¡probsaxe zha ne tsielo naa ladznia zho! ¡Mazd wen nie zho, ib niacd zho miech lo guidzliu!

²⁵Yeze Judas rnabdiidz lo me rnee Judas:

—Maestro, ¿pe goon naaw ye?

Rëbchaa me lo Judas:

—Luuw gon Judas, luu güeyto naa.

²⁶Laa zho noyow, zeene bzhen Jesús tib quietxtil, bdeed me xquizh lo Dios, blozh ga beengrol mew, dzigo bdiiz mew lo zho, ni rëb me:

—Golquina, lëë xcuerp naa i gon.

²⁷Ni bzhęn me tib cop nroob vin, bdeed me xquizh lo Dios, blozhse bdeed me xquizh, dzigo pteed me cop co lo zho gręse zho, ręb me:

—Golguie vin qui, ²⁸sac lęe xchen naa i, mięe no gzhiee par guiaanmbe grę miech lo xtol zho sęeb zho xnęz Pxoż naa, sac lęe stib mod cub nu psan me parne sęeb miech xnęz me. ²⁹Lęe lultm vult nu guie naa vin rii, sac zhaale stib vin cub ne guie naa gał dze ne guienie naa tow zaatne rnabey Pxoż naa.

Dzigo psilo me biilńie me Dios gza me zho.

Bzeet Jesús zha guń Pedr

(Mr. 14:26-31;

Lc. 22:31-34; Jn. 13:36-38)

³⁰Blozhse biilńie zho Dios, laa me brieę ga gza me zho, laa me zienie zho nęz Gui Oliv.

³¹—Ible saan to naa nawdze rii —ręb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nęzrii nęzrec gli-aal męcwxiil.” ³²Minęopaa nagon guń guń miech naa, per zeęe laa naa grieęban glole naa ga Galilę, ga cuęz naa to.

³³Dzigo rębchaa Pedr lo me:

—Niicle telńe saan grę zha qui luu, sangue naa gonę csaand naa luu.

³⁴Pquiab me ręb me lo Pedr:

—Gneli naa lo luu ganęle, guieel ri-gazh, gardle yuedz gall, laa luu csale tson vult guiab luu runbeyd luu naa.

³⁵Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunęcad naa. ĩPe nacle guieę naa runbeyd naa luu?

Scaque rnee gręraa xpęedscuel me.

Bzodiidznie Jesús Pxoż me Getsemanı

(Mr. 14:32-42; Lc. 22:39-46)

³⁶Zeęe bdzinnie Jesús zho zaatne lę Getsemanı, dzigo rębchaa me lo zho:

—Nuse nagonę gołsob, laa naa ga gazodiidznie naa Pxoż naa.

³⁷Horco psilo mban rac zdoo me, ri-abguielńe me, dzigo bredz me Pedr, ni grop xingan Zebedę, bzęnie me zho palal ³⁸dzigo rębchaa me lo zho:

—Mban rac zdoo naa, zootle zig zet naa lo guiełńe rii. Nuse nagonę gołguiaanę, per gołsobna.

³⁹Bzę me spalal, dzigo pquitsgzhib me haxta bdziń lo me lo liu; psilo me bnaab me lo Dios, ręb me:

—Papá, laa naa rnab lo luu, telńe zala zdoo luu, bzhiguielę psilaa naa lo grę guiełńe rii. Minę rii rnab naa lo luu, per telńe grieloda, mięe gnętaa luu, miń co gac.

⁴⁰Zeęe guso me, güey me zaatne bi-aanę gza tsonę zha co, gonę me laa zho nixguesle; dzigo rębchaa me lo Pedr:

—ĩPe ni palal blębde to nzobna to?

⁴¹Gołsobna, gołnab lo Dios zeęna yquild menęox to. Niicle ne squi lęb-draa xcuerp to sobna to, per gołnab lo Dios, sac gonę miń co nac mięe racladz zhiespıritu to.

⁴²Dzigo güey me stib, güeyzodiidznie me Dios; scaque mięe bnaab me glo mińcoque bnaab me. ⁴³Zeęe wbiire me bdziń me lo zho, gonę me laa zho nixgueslaque, sac lębdraa zho mcaalę.

⁴⁴Wbiire güey me güeynab me lo Dios, scaque mińcoque bnaab me. ⁴⁵Zeęe laa me wbiretaa bionę vult co, rębchaa me lo zho:

—Lęew nagonę, zacle na gagues to, zacle gdziiladz to. Naa ne nac naa Mgui ne pxeelę Dios, laa hor nagonę bdziń zeęe laa grę miech ntseeb rii guiadnaaz naa. ⁴⁶Gołtsieso, zeęna zio ne; sac gonę laa zha ne glu naa lo zho ziaadle nu.

Bnaaz zho Jesús*(Mr. 14:43-50;**Lc. 22:47-53; Jn. 18:2-11)*

⁴⁷ Laa Jesús bii quianeeque, zeene laa Judas (tib zha ne nac xpëedsuel me) bdziñ, bdziñnie Judas tib dzoon zha ne pxeel grë pxoz ne rnabey, ni grë zha ne nac zha non lo men guiedz Israel. No zho nzhen spad, nogaa zho nzhen yag. ⁴⁸ Biaañniele Judas zho diidz zha glu Judas cho nac Jesús, rëb Judas lo zho zha ne gan zho gow Judas bzhid cuas, lëë me ga, ligier so zho gnaaz zho me. ⁴⁹ Zigne bdziñ Judas pquiaabdiuzh Judas me, blozhse ga wbig Judas dow Judas bzhid cuas me. ⁵⁰ Dzigo rëbchaa me lo Judas:

—Judas, ¿pe ziaadgun luu nu?

Lëëlëd wbig be grë zha co, bzhen zho me. ⁵¹ Horco biet tib zha ne rzënie me ga, bdoob zho zhispad zho psilaa zho tib niaw, bliengaa zho diag tib zha ne rquia xtsiñ men ne nac pxoz nroob. ⁵² Dzigo rëb Jesús lo zha ne pquiaaw ga:

—Blootsow zhispad luu, ib gundraa luu squi cob luuw. Sac gon zha ne rdil con spad, noxtseeb ne low guet zho. ⁵³ ¿Niacxe nan to na grieelod gnab naa lo Pxoz naa niina cxeel me tsiipchop partid xanj l me guiaadla ne nu? ⁵⁴ Per telne sca gun naa, ¿zha dzigo gac mine zhobnee lo Xtiidz Dios, zaatne raquiet mine noyac nu?

⁵⁵ Dzigo rëbchaa me lo grë zha ne bdziñ ga:

—¿Pe nacre squitaa rac to? ¿Niacxe naa cho zha ntseeb, ne squitaa nzhen to spad, nzhen to yag ziadnaaz to naa? Blactaa name gon to noseed naa miech len yadoo, ¿pe nacre bnaazde to naa ga? ⁵⁶ Per ible laa grë ncuuan rii gon noyac, zeena grieequia grë mine bzeet grë zha ne biadteed xtiidz Dios lo miech padzeela.

Horco grëse zha ne nac xpëedsuel me laa zho bzhoon, tipse me psan zho ga.

Güeynie zho Jesús lo zhiwxtis zha Israel*(Mr. 14:53-65; Lc. 22:54-55, 63-71; Jn. 18:12-14, 19-24)*

⁵⁷ Ga brienie zho Jesús bdziñnie zho me lidz Caifás, men ne nac pxoz nroob. Grë zha ne rnabey lo menguietz Israel, laa zho ndxiele ga. ⁵⁸ Ye Pedr maase zit zit nal Pedr laa Pedr bdziñ xley men co. Bdziñ Pedr güeysoyba Pedr lo grë zha ne ndxienap, quiambéz Pedr dien zha gun zho Jesús.

⁵⁹ Grë pxoz ne rnabey, grë zha ne nac zha non lo menguietz, grëse zha ne nac wxtis, laa zho ndxie nëz len yu co, quiaguib zho zha ne gzhixcuua maase didzguizh ycaadz zho Jesús, parne gdeeda diidz gnab zho guet me. ⁶⁰ Ndal zha ne sca been, per brieequiad xtiidz zho, sac zhaase zhaase rnee zho. Tibaque zeene guso chop zho, ⁶¹ rëb zho:

—Bdzion no gon rnee me laa me ctixche yadoo ne zob lad guiedz nu, zaatne riodzian ne Dios, lozh ga tsonaque ngbidz gzaalo me stiba.

⁶² Dzigo hor co bzoli men ne nac pxoz nroob, rëb me lo Jesús:

—¿Pe nacre rquiabd luu? ¿Pe nli sca rnee luu, te nlida ye?

⁶³ Gon pxoz nroob co rquiabduaque Jesús, rëbchaa me:

—Zig zob Dios mban ne no gbaa, laa naa rnab lo luu bneeli lo no dien cho nac luu. Bnë tel nli Xpëed Dios nac luu, Men ne zëëble diidz ga cxeel me.

⁶⁴ Dzigo pquiab Jesús rëb me:

—Scaw gon, naa nac men co. Naa ne nac naa Mgui ne pxeel Dios, bii zan to ganle zeene laa naa zoob cue Dios nëz derech, ni zeene laa naa guieet gbaa zi-alzëeb naa lo xcow.

⁶⁵ Horco ptsiez pxoz nroob co xab me, sac blëë me bin me sca rëb Jesús.

—¿Pe mazdraa textigw ne racladz ne? —rëb me—. Laa to binle ganle zha rzë-taa xtiidz me noguitnie me Dios. ⁶⁶Nana waa, ¿pe gnë to zha dziuun ne me?

Pquiab be zho rëb zho:

—¡Ib rieguial guet me!

⁶⁷Dzigo hor co psilo zho nosacsi zho me. Zha ne rtsuc lo me, zha ne rdeed puñet me, nogaa zho rgap lo me, ⁶⁸rlozh ga rzhidznie zho me rnee zho:

—Luu ne nac luu men ne pxeel Dios, ¿bnë dien cho ga bdiñ luu?

Rëb Pedr runbeyd Pedr Jesús

(Mr. 14:66-72; Lc. 22:56-62;
Jn. 18:15-18, 25-27)

⁶⁹Horco laa Pedr bii zob nëz ley. Ga zob Pedr, güey tib ndzooop ne quia dziin lidz men rñabey co; rëb ndzooop lo Pedr:

—¿Ye luu lëë rzënie Jesús, men Galilé ne bdziñnie zho i?

⁷⁰Per bneelid Pedr. Squi zob grë zha co, rëb Pedr:

—Riend naa dien cho men rnee luu.

⁷¹Laa Pedr ziele nëz ro puert ne quia ro nëz, zeene gon stib ndzooop ne rquia dziin ga Pedr, rëb ndzooop lo zha ne ndxie ga:

—Ye mgui qui gon nacgrë men Nazaret ne bdziñnie zho i.

⁷²Scaque bneelid Pedr, haxta rzeet Pedr Dios rëb Pedr runbeyd Pedr me.

⁷³Wdzeepaaw, rëb zha ne ndxie ga lo Pedr:

—Ne nligaa ye luu rzënie men ne bdziñ i. ¡Rlupaa name zig rnee zha nëz Galilé rnee luu!

⁷⁴Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—Dios zobwi ganle, telne led diidzlid nu rne naa, maase cuibdee naa.

Loxaque blozh sca briece ro Pedr zeene laa tib gall pcedz. ⁷⁵Horco psoladz Pedr xtiidz Jesús zeene rëb me lo Pedr: “Gardle ycedz gall, tsonle vuelt rëb

luu runbeyd luu naa.” Dzigo mbanse rac Pedr. Briece Pedr ga, psilo Pedr biin Pedr guielñe co.

27 Ziadyiinile liuw, wbiire pcaalsa grë pxoz rñabey, grë zha non lo menguedz, bnediidz zho dien zha gnabey zho guet Jesús. ²Blozhse bzodidz zho, dzigo laa zho bzobdoo me bleec zho me ga ziesañ zho me lo Pilat, men ne nac gobernador.

Gut Judas

(Mr. 15:1; Lc. 23:1-2; Jn. 18:28-32)

³Laa Judas Iscariot zha ne pto Jesús ga, zeene bin Judas laa zho rñab guet me, lëëlëd güey Judas lo grë pxoz rñabey co, lo grë zha non lo menguedz ga, ziet-sire Judas dimi ne bdiizh zho Judas ga. Mban rac Judas, ⁴bdziñ Judas rëb Judas lo zho:

—Naraa rien naa lëda nu ben naa. ¡Tib dol nrooble nu, znu bialto naa tib men ne peet xtold!

Pquiab zho rëb zho:

—¡Mincotaa gon ndiond no!
¡Xcuentzhe luu ga!

⁵Horco pcheñ Judas dimi co len yadoo. Lo guielñe co briece Judas ga güey Judas lëëque Judas pxiiyan Judas.

⁶Grë zha ne nac pxoz rñabey ga, güey zho ptop zho dimi co. Per blozh ga, riend zho dien zha gun zhow.

—¿Zha dziuun ne dimi rii? —rëb zho—. Telne guiaana yadoo, per rdzieelda, sac gon xchen tib miech bdzëew.

⁷Dzigo bzodidz zho dien zha gaca, nacne mazd pquinn zhow bzhii zho tib lë liu, zaatne rdieen yu ne ríaa grë ncuuan psin ne rquinn; parne lo liu co ygueets grë zha zit ne guet Jerusalén. ⁸Nacne brieelë liu co “Liu ren”, ni sca runbey zhow len dze rii. ⁹⁻¹⁰Ga briequia mine bzeet zha ne biadteed xtiidz Dios padzeela, zeene rëb zho: “Galptsii pes plat ne bzhii zha Israel men nziuu co, dimi co bzhii zho

tib lë liu, zaatne rdieen yu ne ríaa grë ncuaan psin ne rquiin. Sca në Dios lo naa.”

Bnab zho guet Jesús

(Mr. 15:2-20; Lc. 23:3-5, 13-25; Jn. 18:33-19:16)

¹¹ Bdzinnie zho Jesús lo Pilat, ga bnabdiidz Pilat lo Jesús rëb Pilat:

—Bnë dien, ¿pe nli luu nac zhirey zha Israel?

Pquiab me rëb me:

—Nliw.

¹² Grë zha ne nac pxoz rnabey ga, ni grë zha ne nac zha non lo menɡuiedz, rzadraa ncuane rquiaqui zho me; per ni tib diidz rtsired me lo zho. ¹³ Dzigo rëbchaa Pilat lo me:

—¿Pe nacne rquiabd luu? ¿Pe ib rond luu grëtaa ncuane rquiaqui zho luu i?

¹⁴ Bzee zdoo Pilat gon Pilat, ible rquiabd me.

¹⁵ Gzobse iz, zeene ral lni Pascw rnabey Pilat ríaa tib zha ne no ladzguiib, zha ne gnabtaa menɡuiedz laa. ¹⁶ Len dze co no tib zha ntseeb ladzguiib lë Barrabás, zëeb xtiidz zho. ¹⁷ Nacne rëb Pilat lo grë zha ne ndxie ga:

—¿Cho racladz to csilaa naa? ¿Pe silaa naa Barrabás, te silaa naa Jesús ye, men ne nac diidz pxeel Dios lo to?

¹⁸ Sca rëb Pilat sac bien Pilat loxaque porne ndal miech nobig lo Jesús min co ne rlëenie zho me, bnabey zho bгаа me.

¹⁹ Laa Pilat zob lo xcan ne run me guielwxtis, zeene bdzin tib mandad rëb lo me:

—Znu në tsiel luu: bzhiguiel me peet gund luu men qui, rlu peet xtold me; sac nieewdze me nroob ptseb mcaal tsiel luu.

²⁰ Grë zha rnabey co, bio zho pquiil zho menɡuiedz gnab zho csilaa Pi-

lat Barrabás, ni gnab zho guet Jesús. ²¹ Zeene wbiire Pilat bnabdiidz Pilat stib, dien chopaa racladz zho laa, grëse zho nguiedz pquiab be zho, rëb zho:

—¿Barrabás psilaa!

²² Dzigo rëbchaa Pilat:

—Men ne waa nac diidz pxeel Dios lo to nu, ¿zha gun naa me?

Pquiab zho rëb zho:

—¿Bnabey yquia me lo cruz!

²³ —¿Per pe nacne yquia men rii lo cruz? —rëb Pilat—. ¿Ni tib dol rapd me!

Biireque zho nguiedz roptsie zho rnab zho yquia me lo cruz. ²⁴ Gonse Pilat rquiaadiagd zho xtiidz me, lel mazdraa rac zho, dzigo bnab me nis, squi ndxie zho bdiib me nia me, rëb me lo zho:

—¿Nanle to nasca, led xtoldraa naa nu ne laa xchen men rii gzhiee, sac nanpaa naa peet falt rapd me!

²⁵ Pquiab be zho rëb zho:

—¿Peet nacd ga! ¿Zhits no grë xpëed no cuib dol co, na no guiotizha!

²⁶ Dzigo bnabey Pilat blaa Barrabás, laa Jesús racse me bnabey me zha ne bdiñ Jesús, blozhse ga laa me psan Jesús ladznia menɡuiib ne tsiequiaa me lo cruz.

²⁷ Biire grë menɡuiib co bzëebnie zho me nëz len yulow, ga pcaalsa grëraa menɡuiib ne nacgrë zho, brin zho igose me. ²⁸ Blee zho xab me, bgacw zho me tib lar nizhnie nlaan, zig rna lar ne racw grë rey, ²⁹ bzieecw zho bla lë yag guiets, bzoob zhow guic me zig rzob coron guic zha ne nac rey, ni bloo zho tib lë goobgui nia me. Runnguzee zho me, rquitsgzhib zho lo me, rnee zho:

—¿Golwi ganle zha ractaa zhirey zha Israel!

³⁰ No zho rtsuc zho lo me, rgob zho goobgui ne no nia me ga, rdeed zhow guic me.

Güeyquiaa zho Jesús lo cruz

(Mr. 15:21-32;

Lc. 23:26-43; Jn. 19:17-27)

³¹ Blozhse sca bdziitnie zho me, blee zho lar nizhnie co lad me, bgacw zho me xab me stib, dzigo laa zho brieenie me ga zienie zho me zaatne yquia me lo cruz. ³² Nêz zienie zho me bdzieel zho tib meñ Ciren lë Simón, bnabey zho meñ co bi me zhicruz me.

³³ Zeene bdziñ zho zaatne nac “Gui Beerguic Ngutoo” (Gólgota), ³⁴ ga bdeed zho nziu lo me notsa tiblo guizh nlayag, per zeene pquiaaro mew bien me nziu cow, bnëd me nie mew.

³⁵⁻³⁶ Blozhse pquiaa zho me lo cruz, bzhen zho tib xab me pchug zhow bi-aannie zho tib lëgaw, laa stiba bio zho rif; dzigo laa zho bzob ga, bzobnap zho. ³⁷ Guic zhicruz me, ga pquiaa zho bla lan diidz zaatne rnee: “LËË JESUS NU, MEN NE NAC ZHIREY ZHA ISRAEL.” Sca pquiaa zho, sac minco pquiaqui sca pquiaa zho me lo cruz. ³⁸ Ye chop ngbaan pquiaagza zho me lo cruz, tibga zhicruz zho bzo tib nêz cho zhicruz me. ³⁹ Grëse miech ne rdedtaa ran zho laa me quia ga, rzhidznie zho me, haxta rdzi zho guic zho ⁴⁰ rnee zho lo me:

—Led rëb luu lëë laa luu ntsil yadoo, ni tsonaque ngbidz nzaalo luu stiba, ¿pe nac dzigo rrieelod luu guieet luu i? Telne nli Xpëed Dios nac luu, biet lo qui.

⁴¹ Scaque grë pxoz rnabey, grë maistr ley, grë zha farisé ni grë zha ne nac zha non lo menguedz, rzhidznie zho me, rnee zho:

⁴² —Stib miech scataa beenguiac me, stib miech scataa bla me, ¿pe nac dzigo rrieelod me gla me me? ¿Goon me name nac zhirey ne, quiet me i sca zho; zeena dziuunbey ne men rnabey nac me! ⁴³ ¿Conque tant rnalo me Dios, haxta rnee me Xpëed Dios nac me, guiaadsilaa Dios me i nazho!

⁴⁴ Ye ngbaan ne quiagza me lo cruz ga, mincoque rbidzgo zho lo me.

Gut Jesús

(Mr. 15:33-41;

Lc. 23:44-49; Jn. 19:28-30)

⁴⁵ Zig groļ dzew, tibaque zeen goc tib ncow dipse lo guidzliu, haxta las tres biao biini stib. ⁴⁶ Horco nguiedz zëëb tsi Jesús, rnee me:

—Elí, Elí. ¿Lama sabactani?

Diidz co nac zig nac ne rnee ne: Luu nac xDios naa, luu nac xDios naa. ¿Pe nacne psaan luu naa?

⁴⁷ Zha ne ndxie ga, zeene bin zho sca rbedz me, no zho rëb Lí, meñ ne biadteed xtiidz Dios padzeela, meñ co rbedz me. ⁴⁸ Dzigo rias tib zho güeygadz tib lë zhiil lo nziu bla, bzoob zhow tib guic goobgui pquiaa zhow ro me. ⁴⁹ Laa zla zho rnee: —Psaan, nu dzian ne dien pe ziaad Lí guiaadlit Lí me i.

⁵⁰ Tibaque zeene pquiaa me stib redz nroob, znuse blozh me.

⁵¹ Horne nolozh me ga, hor co briez nzoli lar nroob ne quia len yadoo, groļ-taa goca; psilo bni tib zhodox, grë quie masaque wbiļa, ⁵² nzian ro baan grë zha ne bnalo Dios mazd padzeela bzhiial. ⁵³ Zeen goļ dze ne brieeban me, ye zho laa zho brieeban, brie zho len baa, bzëëb zho lad guiedz; nzian miech ne gon zho.

⁵⁴ Grë menguiib ne quianap me ga, ni zha ne rnabey lo zho, zeene gon zho bni zho co, ni gon zho grë ncuane goc ga, per nli bdzieb zho.

—¿Ne nlipagaa —rnee zho—, Xpëed Dios nac men qui!

⁵⁵ Nzianlaa men wnaa, zit zo zho rwi zho. Lëë grë men wnaa co güeynal zhits Jesús, been zho xyudar me dipse len dze ne pseed me miech, desde dze ne psilo me nêz Galilé. ⁵⁶ Lad co no Marí Magdal, Marí tsiel Zebedé, ni Marí ne nac xniaa Jacob grop José.

Bgueets Jesús

(Mr. 15:42-47;

Lc. 23:50-56; Jn. 19:38-42)

⁵⁷⁻⁵⁸ Zhile sëëb ngbidza, zeene bdzin tib mgui læ José lo Pilat, bnaab me diidzbey tselit me xcuerp Jesús lo cruz; tib zha ricwa, men guiedz Arimaté nac me, ye me zianał zhiwseed Jesús. Nacne pxeel Pilat diidz lo zha ne quianap Jesús ga, parne siguiel zho glit José me lo cruz.

⁵⁹ Dzigo güey José. Blozhse blit José me lo cruz, laa José neyle tib læ lar cub, pchel José me lar co, ⁶⁰ güeyxob José me tib len baa ne nacchen José ndieen tib cho quie gax ga; tib baa cuba. Blozhse bdzig José tib quie nroob bioog ro baa co, laa José zey. ⁶¹ Laa Marí Magdal bii biaan ga, grop me stib Marí ne nacgrop me ga; zobse zho gax ro baa co.

⁶² Biini liu co, pcaalsa grë pxoz rnabey, grë zho zha farisé, güey zho lo Pilat, ⁶³ rëb zho:

—Gun luu dispensar, laa no ziaadaque lo luu stib. Naraa rsoladz no, len dze ne bii mban men ntseeb ne sca baaadquidie miech ga, rëb me, zeene gac tson ngbidz guet me laa me grieaban. ⁶⁴ Gane ziaad no lo luu, bzhiguiel pxeel zha ne yquiaanap ro baan me haxta gac tson ngbidz co; sac nend tsie zha ne nac xpëedscuel me tsiebee zho me, lozh ga guiab zho laa me brieaban. Nanle luu ganle, tel gac min co, cho gnë peraa gzhixcuaa zho.

⁶⁵ Dzigo rëbchaa Pilat lo zho:

—Telne sca racladz to, laa tib partid menguiib ndxie i. Goltsienie zho, golguiab lo zho yquiaanap zhow tel zha racladz to.

⁶⁶ Dzigo laa zho zie zienie zho grë menguiib co. Bdzin zho bloo zho tib bey cho quie ne nioog ro baan Jesús ga, par glu tel cho zha ne tsiegaala, ni biaan grë menguiib co yquiaanapa.

BRIEBAN JESUS

(Mr. 16:1-8; Lc. 24:1-12; Jn. 20:1-10)

28 Zna dze goc dze ne rdziiladz zho lo dziin ga, biini liu, dze ne rsilo zhal, silgaw zie Marí Magdal grop me stib Marí co zieso zho ro baan Jesús.

² Lëëtaaque hor co bni tib zhodox, lo zho co biet tib xanjł Dios gbaa bdox me quie nroob ne nioog ro baa co, bdiix mew tib lad, bzobga me lada. ³ Masaque rlu me zigne rlu belye, xab mew, nquitsbie rnaaw, zig rlu zaatne ndxie guieg. ⁴ Grë menguiib ne quianap ro baa ga, zeene gon zho anjł co, per nli bdzieb zho, rzhidz zho. Lo dzeb co, pcowgagh zho, grëse zho biab liu. ⁵ Zeene laa grop wnaa co bdzin, rëbchaa anjł co lo zho:

—Gdziebde to. Nanle naa Jesús men ne pquiaa zho lo cruz ga, men co ziaadguib to. ⁶ Per guieñde me nu, jlaa me brieabanle zigne bneele me ga! Golwi ganle nu nac zaatne pxob zho me. ⁷ Ninagagh goltsie goltsienie diidz lo xpëedscuel me, golguiab lo zho laa me brieabanle. Galilé me cuëz me zho, ga gan zho me. Laa to nanlew nasca.

⁸ Lëëläd brieë grop wnaa co ga, rias zho laa zho zienie diidz lo xpëedscuel me; lala rdzieb zho, ni lala rley zho. ⁹ Laa zho zie, tibaque zeene gon zho laa Jesús zole lo zho, ine pquiaabdiuzh me zho. Horco wbig zho pquitsgzhib zho lo me, bdeedz zho ni me. ¹⁰ Dzigo rëbchaa me lo zho:

—Gdziebde to. Goltsie goltsienie diidz lo grë zha bets naa, golguiab lo zho tsie zho Galilé, ga gan zho naa.

¹¹ Horcoraa laa bla zhaguiib ne pquiaanap ro baan Jesús ga bdzin lad guiedz. Güey zho lo grë pxoz rnabey, bzodiidz zho zha gon zho bzhal ro baa co. ¹²⁻¹³ Dzigo pcaalsa grë pxoz co grë zho zha ne nac zha non lo menguiiedz, dien zha gun zho. Nacne biaan zho diidz, mazd gdeed zho dimi lo grë

menguiib co, parne gneelid zho, sinque guiab zho, segur xpëëdsuelaque me güeybee me len baa, per biend zhow sac nixguies zho. Nroob dimi bdeed zho lo grë menguiib co, ¹⁴ rëb zho:

—Peet tsienied guic to, niicle telne gon gobernadora na no guionee lo me, zeena peet gund me to.

¹⁵ Dimi co pcaania zho, dzigo laa zho psilo pxoon diidz co zigne rëbse grë zha co lo zho. Grë zha Israel ne bina len dze co, masaque bliladz zho nli sca goca, jni haxta lo nadze sca zienie guic zho!

¹⁶ Zeene bdziñ dze ne gdzieelo Jesús xpëëdsuel me nëz Galilé, brie gza tsi-iptib zha ne bzo gaxpaa lo me ga, güey zho nëz co; bdziñ zho guic gui ne rëble me ga gdzieelo me zho. ¹⁷ Zeene gon zho me pquitsgzhib zho liu.

Lo grë zha ne ndxie ga, no zho rienpaa lëë me ga, nogaa zha ne bii racchop guic.

¹⁸ Dzigo wbig me lo zho, rëb me:

—Laa to gonle nasca naa rnabey. Grëse ncuaane no gbaaw, nogaa guidzliuw, ladznia naa psan Pxoza naaw.

¹⁹ Niina nagon, laa naa rсан diidz lo to: gołtsie dipse lo guidzliu, gołtsieseed miech gac zho zha ne sëëb xnëz naa, gołchoobnis zho, gołguiab lo zho lëë min co rnabey Pxoza naa, rnabey naa ne nac Xpëëd me, ni rnabeygaa Espiritu Sant. ²⁰ Golseed zho gban zho, grëse mine bnabey naa to gun to. Min co rсан naa diidz lo to gun to; ni gacnan to ganle, ib csaand naa to, gzataa dzew niicle haxta dze ne nitlo guidzliuw, naa gacnie to.

XTIIDZ NDZON DIOS MINE PQUIAA

MARCW

1 Nu ganle laa naa csilo gzodiidz naa, mine been Jesús, Men ne bneele Dios cxeel me lo guidzliu.

²Lo guits ne pquiaa Isá, tib men ne biadtee xtiidz Dios padzeela, lo co zhobnee ganle ible laa Dios no cxeel me. Rneew, glo cxeel me tib zha ne tedner, guiaadnie diidz. Znu zhobnee lo guits co: Sxel naa tib zha ne tedner lo luu, zeena zha co gzhixcuaa nöz ne ted luu.

³Dan tso zho, zon miech zeene laa tsi zho zëeb gnee zho:

“Golzhixcuaa nöz ne ted men ne rnabey, golsaan grë guieintseeb ne run to.”

⁴Ni nligaa scase goca, zeene laa Juan Bautist biaad, dan bio me rchoobnis me miech; rnee me lo zho csaan zho xquieintseeb zho gbig zho lo Dios, ni chobnis zho, zeena csilaa Dios zho lo grëtaa xtol zho. ⁵Dzigo rree miech grë guiedz ne ngab Judé, dib lad guiedz Jerusalén, riequiaadiag zho zhiwseed me; ni rxobdol zho grë xtol zho, dzigo rchoobnis me zho len guiubee Jordán.

⁶Guits lad camell niaa xab me, ncuane rzhidoo len me guid niaaw ni niapse nguzhanch ni dzin dan row me. ⁷Zeene rseed me grë miech co, rnee me lo zho:

—Iraa ziaad men ne mazdraa non lo naa. Tel naa peet nond naa, tib guieinzaac nroob ga yгаа naa telne niaca mine grielo maase lab me glit naa; per na ni min co rdzind naa. ⁸Laa naa rchoobnis to niina con nis; sangue me con Espíritu Sant cchoobnis me to.

Brobnis Jesús

(Mt. 3:13-17; 4:1-17;
Lc. 3:21-22; 4:1-15)

⁹Len ngbidz coquew, laa Jesús brie guiedz Nazaret xtan zha Galilé, güey me pchoobnis Juan me len guiubee Jordán.

¹⁰Laa me norieedze lo nis, zeene gon me laa zhan gbaa bzhiäl, laa men ne nac Espíritu Sant biet gbaa zig tib palom laa me ziad-zëeb guic me. ¹¹Ni lëetaque zëeb tib tsi men co gbaa, rnee me:

—Xin, rleynie naa luu gon, nziuu luu lo naa.

¹²Zeene blozh brobnis me, dzigo güeynie Espíritu Sant me tib dan ngan, zaatne no grë ma ntseeb; ¹³bio me ga choo ngbidz. Ga no me güey Satanás (ma ne rnabey lo grëse mendox), gocladz ma niungüet ma me.

Bdedse ga, güey grë xanj Dios güeygan zho me.

¹⁴Len ngbidz co bnabey Herod bio Juan ladzguiib. Ladzguiible no Juan zeene brie Jesús güeyted me grë guiedz ne ngab Galilé güeyseed me miech Xtiidz Ndzon Dios, ¹⁵rnee me lo zho:

—Laa dze ne gnabey Dios ziaadgaxle, laaw bdzin dzele. ¡Golsaan grë xquieintseeb to, golinab perdon lo Dios; dib zdoos to golliladz Xtiidz me!

Tap zha ne quia gooz mel

(Mt. 4:18-22; Lc. 5:1-11)

¹⁶Tib dze zieded Jesús ro Nisdoos le Galilé, gon me laa Simón grop Ndrés quia gooz mel lo nis co; sac ible dziin co nac xtsiin zho. Grop bets zho laa zho noron guieix ne rgaa mel lo nis. ¹⁷Dzigo bredz me zho, rëb me lo zho:

—¡Goltë, goltënal zhits naa! ¡Laa naa cxeel to tsie to stib gooz, tsietop to grë miech ne sëeb xnöz Dios!

¹⁸Horcogazh psan zho guieix ne rnaaz zho mel ga, laa zho zienäl zhits me.

¹⁹ Zhisaque bzë Jesús ro nis co, gon me laa Jacob ni Juan no tib len barcw noquiaabdie zho guiey ne rnaaz zho mel, lëë grop xingan Zebedé ga; ²⁰ dzigo bredz me zho. Zigne bredz me zho, zoque Zebedé lo barcw ga grë xmoz Zebedé, laa zho zianał zhits me.

Tib mgui ne nosacsi mendox.

(Lc. 4:31-37)

²¹ Laa zho bdziñ guiedz ne lë Capernaum. Zeene goł dze ne rdziiladz zho lo dziin nëz Israel, güey Jesús yadoo win ne zob lad guiedz co güeyseed me miech. ²² Grë miech ne ndxie len yadoo ga, rzee zdo zho ran zho zha rnee me, sac rlu men rnabey nac me; led yed me rseed zigne rseed grë zha ne nac maistr ley.

²³ Lad grë miech co no tib mgui ne nosacsi mendox, tibaque zeene nguiedz pcooptsie ma mgui, ²⁴ rnee ma:

—¿Pe gun luu no Jesús Nazaren? ¿Ziaad luu lëë par gnitlo luu no? Runbey naa luu, tib men peet xtold nac luu ni Dios pxeel luu.

²⁵ Dzigo goctox Jesús lo ma, rëb me:

—¿Psoog ro luu! ¡Na zeena psaan men qui!

²⁶ Horco masaque beencxidz ma mgui co, ni rquiaadan ma redz laa ma psaan mgui. ²⁷ Grëse miech ne ndxie ga, bzee zdo zho rnabdiidzlsa zho rnee zho:

—¿Bay cho nac men qui? ¡Wseed cub i gon ziaadnie me! ¡Rlu zha rnabey nac me, zha haxta mendox rdzieb zeene rac-tox me lo ma!

²⁸ Znuse briets bliaal diidz zha beenguiac Jesús mgui co; grëse guiedz ne ngab Galilé gocnan miecha.

Biac xniadzoop Simón Pedr

(Mt. 8:14-17; Lc. 4:38-41)

²⁹ Ga brieë Jesús güey me lidz Simón grop Ndrés gza me Jacob ni Juan. ³⁰ Bdziñ zho, lëëtaque laa xniadzoop Simón nix rlan xlëë, nacne rëb zhow lo

me. ³¹ Dzigo bded me zaatne nix zhuz co, bzhen me nia me, blische me me. Horcogazh laa zhixlëë me blëz, guche me ga psilo me beenlo ncuane dow zho.

³² Ziedzele dzew, laa ngbidz rzëëblew, zeene psilo grë miech co zo zo rdziñnie zho grë men rzacnë, grë zha ne nosacsi mendox ne; bioogse ro yu co ndxie miech. ³³ Zootle zig grëse miech ne no lad guiedz co pcaalsa ga.

³⁴ Ndal grë men rzacnë co zhaase zhaase guielguidz ne rzac zho, per beenguiac Jesús zho; zha ne nosacsi mendox, bencxoon me grë mendox ne nosacsi zho. Goctox me lo ma, ib bdeete me diidz nee ma cho nac me, sac runbey ma me.

Pseed Jesús miech Galilé

(Lc. 4:42-44)

³⁵ Silgaw, scase bii ncow rnaw guche Jesús brieë me lad guiedz co, güey me zaatne guiendraa miech, güeyzodiidznie me Dios. ³⁶ Zeene rnit me choot guiend; dzigo brieë Simón ni zla zha ne nacgza Simón güeyguib zho me. ³⁷ Zeene bdziel me, rëbchaa zho lo me laa grë miech co quiaguible me.

³⁸ Dzigo pquiab me rëb me lo zho:

—¿Sca ye! Per ib laa ne none gon guio grëraa guiedz ne ndxie dib gax nu, zeena ye grë guiedz qui gnee naa Xtiidz Dios lo miech; sac ible min co pxeel me naa zial naa lo guidzliu.

³⁹ Dzigo güey zho grëse guiedz ne ngab Galilé. Zaatne rdziñtaa zho, rie me grëse yadoo win ne zob lad guiedz rseed me grë miech co Xtiidz Dios, ni runcxoon me grë mendox ne nosacsi miech.

Biac tib mgui ne rlan lepr

(Mt. 8:1-4; Lc. 5:12-16)

⁴⁰ Tib vult, wbig tib mgui ne rlan guiedzdox ne lë lepr lo Jesús (masaque riaal dipse guid lad mgui), pquiitgzhib mgui lo me, rëb mgui:

—Tebaa siguieel luu gunguiac luu naa.

⁴¹ Pquia zdoo Jesús mgui, pxobnia me guic mgui rëb me:

—Zunguiac naa luu. ¡Niinagazh laa luu guiaanmbe!

⁴² Zigne sca bnee me laa mgui co biac, mbese biaan xcuerp mgui. ⁴³ Blozh ga bzonëz me mgui, ni pso me diidz lo mgui ⁴⁴ rëb me:

—Bina ganle, choot lo gzodiidzd luu gon zha biac luu. Bzë, güey lo pxoz, güeyсан gon ne rnabey xley Moisés gdeed luu; zeena gan zho ganle laa luu biacle.

⁴⁵ Ni zigne briece mgui ga, psilo mgui grë lo miech bzodiidz mgui zha biac mgui. Grëse miech gocnana, nacne brielodraa nenlo ndziñ Jesús grë lad guiedz co. Mine been me, blëz me zaatne choot miech guiend; per niicle scaw, miech guizhiu ne rriece grë guiedz co rdziñ lo me.

Biac tib men ne gutoo

(Mt. 9:1-8; Lc. 5:17-26)

2 Goc bla dzew, laa Jesús biire bdziñ lad guiedz Capernaum stib. Zeene bin zho laa me bdziñ ro yu, ² miech guizhiu ne pcaalsa zaatne no me ga, haxta ro yu ndxie grë miech co; dzigo psilo me noseed me zho Xtiiidz Dios.

³ Laa grë miech co ndxie ga, zeene bdziñ tap zha bgui ney zho stib men bgui, zhoobse me lo yag, ib gacd së me sac dipse me gutoo. ⁴ Ni ne scataa miech guizhiu ne ndxie, gacd ted zho nëz ro yu gdziñnie zho me lo Jesús, nacne biepaque zho guic yu. Pخال zho ngali zaatne zob Jesús, dzigo ga pteed zho men co dib yag ne zhoob me ga. ⁵ Zeene gon Jesús ne nli dib zdoo zho riladz zho me gunguiac men rzacnë co, dzigo rëbchaa me lo men co:

—Xin, niinagazh laa naa gun perdon grëse xtoł luu.

⁶ Blalaa zha ne nac maistr ley zob ga, zeene bin zho sca rëb me lo men rzacnë co, bzachaa zdoo zho: ⁷ “¡Lëda i gon squi rnee men qui! Quiaguitnie me Dios i squi rzë xtiidz me. ¡Tibaque men ne run perdon xtoł miech, ni lëë men co nac Dios!”

⁸ Bienga Jesús sca rza zdoo zho, dzigo rëbchaa me:

—¿Pe nacne rlëë to ron to mine me naa? ⁹ Parga nli, cholze zha ne zac guiab: “Laa naa gun perdon grëse xtoł luu.” ¹⁰ Per laa naa glu lo to ganle, naa ne nac naa Men ne pxeel Dios zial naa lo guidzliu, ible naa no gun miech perdon.

Dzigo bnee me lo men rzacnë co, rëb me:

¹¹ —¡Guche i, bi yag ne bzhoob luu i, zeen bzë!

¹² Zigne sca bnee me laa mgui co bzoli, blis me yag co, grop lo grë miech co gon zho laa me briece ga, laa me zey. Grëse zho rzee zdoo zho, rleynie zho Dios rnee zho:

—¡Nasi laa ne nodzian ncuane gard dzian ne!

Bredz Jesús Leví

(Mt. 9:9-13; Lc. 5:27-32)

¹³ Blozh ga, laa Jesús briece ga laa me zie nëz ro nisdoo stib; nzian miech ne pcaalsa lo me ga, dzigo pseed me zho.

¹⁴ Ro nis co ziezë me gon me Leví, xingan Alfë, zob Leví zaatne rietizh zho contribucion, dzigo bredz me Leví tsienal Leví zhits me. Guso Leví ga, laa Leví zienal.

¹⁵ Bded ga, bredz Leví me güey me tib wagw lidz Leví. Grë zha ne nac recaudador, grë zha ne zëëb diidz nac zha yozh, tipse lo mezh zbobnie me zho grë xpëëdsuel me; sac ndal grë zha co zienal zhits me.

¹⁶ Blalaa maistr ley ne nacgrë zha farisé, gon zho sca tipse noyownie Jesús grë zha co; bded ga, rëbchaa zho lo xpëëdsuel me:

—¡Mod sca na rownie xmaistr to grë zha ngoopdol, grë zha beed ne nac recaudador!

¹⁷ Dzigo rëbchaa Jesús lo zho:

—Nanle to ganle, men ne run rmed, zaatne no zha ne rzacne, ga rquiin zho, ¿niacxe squiin zho zaatne no zha ne ndip ndaan? Ni min co rac niina, tel naa zialguibd naa miech wen, sinque laa naa zialguib miech ngoopdol.

¿Pe nacne rcuand xpëedscuel Jesús?

(Mt. 9:14-17; Lc. 5:33-39)

¹⁸ Lëëtaaque dze co nocuan xpëedscuel Juan Bautist, grë zho zha farisé. Dzigo bdzin bla zha ne bnabdiidz lo Jesús, rëb zho:

—¿Pe nac waa ib rcuand xpëedscuel luu? Zha grë xpëedscuel Juan Bautist ni grë zha farisé, rcuan zho.

¹⁹ Pquiab Jesús, rëb me:

—Zaatne nadien noyac tib guieltsieel, ¿pe niacxe lega csilo grë zha ne ndxie lo lni tso zho guielnë, ycuan zho ni ran zho laa mgui ne notsieelnia mban? ²⁰ Per zdzin dze zeene laa mgui co gbiche; ni zeene laa dze co gdzin, dzigosi nagon riegual tso zho guielnë, riegual ycuan zho.

²¹ Ranle to ganle, zha ne rquiaabdie tib lë lar, rquiaad zho lar cub lad lar gox, sac zha ne sca gun paat yquiind wquiaabdie co. Zeene laa lar cub gbe, lëëque lëëw gunnat zaatne nriez lar gox. ²² Scaque tsod zha ne cotsow vin cub tib len guid ne padzeelale noquiin, sac stsiez vin cuba; dzigo niicle guid cow, niicle vingaaw laaw nitlo ga. Gacxe, tel vin cuba none len guid cubaque tsotsowa.

Ptop xpëedscuel Jesús mzion zhobxtil

(Mt. 12:1-8; Lc. 6:1-5)

²³ Tib dze ne rdziiladz zho lo dziin nëz Israel, bdednie Jesús xpëedscuel me zaatne zëëb zhobxtil, dzigo zigse zieded

zho pchoo zho palal mzion zhobxtil co. ²⁴ Gon zha farisew, dzigo rëbchaa zho:

—¡Lëda i gon noyun to! ¡Golguien ganle dze nda nac dze rii!

²⁵ Dzigo pquiab Jesús, rëb me:

—¿Pe gard glab to zaatne ziaad ganle zha been rey David tib dze zeene pcaabedz me grë me zha ne ziegza me, ni zienied zho pe gow zho? ²⁶ Rneew, bzëëb me len yadoo güeynab me quietxtil ne nac gon, downie me grë zha ne ziegza me ga, ni loxaque zha ne nacse pxoz row quietxtil co. Len iz co nac men ne lë Abiatar pxoz nroob. ²⁷ Golgacnan sca ganle, biaand dze rii par csacsi miech xcuerp zho, sinque ne rleynie Dios miech gane psan mew. ²⁸ Naa ne nac naa Men ne pxeel Dios zial naa lo guidzliu, naa rnabey dze rii, nanpaa naa pe nac mine nonguiel gac.

Biac tib mgui ne mband tib nia

(Mt. 12:9-14; Lc. 6:6-11)

3 Gol stib dze ne rdziiladz zho lo dziin, güey Jesús len yadoo win ne zob lad guiedz co. Lad grë miech ne no len yadoo co, no tib mgui ne mband tib nia. ² Nzian zha ne ndxie ga, quialeets zho Jesús dien pe zunguiac me nia mgui co dze ne rdziiladz zho lo dziin. Quiambëz zho dien pe gun me, par gdziel pe yquiaaqui zho me. ³ Dzigo bredz me mgui co, bnabey me bzo mgui groltaa lo grë zha ne ndxie ga; ⁴ blozh ga rëbchaa me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuaa ne yquiin, te nonguiela gun ne guielntseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

Ni tib zho pquiabd. ⁵ Dze bui me lo zho grëse zho, wbinladz guic me, ni mban goc zdoo me gon me scataa ntseeb zdoo zho; dzigo rëb me lo mgui co:

—Bzigaa nia luu.

Zigne bzigaa mgui nia mgui, laaw biac.

⁶Grë zha farisé, ni grë zha ne nacie rey Herod, zigne brieë zho ga laa zho psilo bnediidz dien zha gdeeda diidz gut zho Jesús.

⁷Len dze co, tib vuilt bdziñ Jesús ro nizdoo grë xpëedscuel me. Miech guizhiu ne nañ zhits zho, ga zie grë zha ne ziaad nëz Galilé, grë zha ne ziaad nëz Judé, ⁸grë zha Jerusalén, grë zha ne ziaad nëz Idumé, grë zha no dib nëz dan ro guiubee Jordán, grë zha ne no dib gax guiedz Tiro ni guiedz Sidón. Miech guizhiuw, sac ron zho grëtaa milagr ne run me.

⁹Dzigo bnabey Jesús xpëedscuel me, yguib zho tib len barcw zaatne gac so me zeena ctaagwd grë miech co me. ¹⁰Zëëble diidz ndal miech ziyunguiac me, dzigo grëse zha ne rlan pe guielguidz, rbigbe zho dien zha griello maase lad xab me xen zho.

¹¹Grë mendox ne noguitnie miech, zeene ran ma me, runquitsgzhib ma zha ne noguitnie ma lo me ni rquiaadan ma redz rnee ma:

—¡Xpëed Dios nac luu!

¹²Per ractox me lo ma, rsaand me gnee ma parne xoobneñd cho nac me.

Ble Jesús gza tsiipchop xpëedscuel me

(Mt. 10:1-4; Lc. 6:12-16)

¹³Blozh ga biep me tib guic gui win zob ga, ga bredz me zha ne gocladzse me. Zeene pcaalsa zho grë zho, ¹⁴dzigo lad co ble me tsiipchop zha ne sënie me, zha ne cxeel me tsieseed miech Xtiidz Dios. Lëë zha co bleelë me poxtl, ¹⁵ni bdeed me poder lo zho gunxcoon zho mendox.

¹⁶⁻¹⁹Znu lë gza tsiipchop zha ne ble me ga:

Simón (lëë Simón co bleelë me Pedr), Jacob ni Juan (xingan Zebedé, zha ne bleelë me “Zhin Nguzi” “Boanerj”).

Ndrés,

Lip,

Bartol,

Matew,

Mazh,

Jacob (xingan Alfé),

Tadé,

Simón (zha ne nacgrë zha ne racladz cuee zha Roma xtan zho)

ni Judas Iscariot (zha ne güeyto me).

Rëb zho mendox nacie Jesús

(Mt. 12:22-32, 46-50;

Lc. 8:19-21; 11:14-23; 12:10)

²⁰Wbire Jesús ga, laa me bdziñ ro yu grë me zho. Scasaque ndal miech ne pcaalsa ga stib, ni rdeetew diidz gownie me zho. ²¹Zeene bin menlidz mew, dzigo brieë zho ziexi zho me, sac rëb zho bod rzhinle guic me.

²²Haxta grë maistr ley, zha ne brieë nëz Jerusalén bdziñ ga, rnee zho:

—Beelzebú, ma ne rnabey lo mendox, ma co nacie me gane rrieelo runxcoon me mendox.

²³Dzigo bredz me zho bzodiidz me tib cuent lo zho, rëb me:

—¿Pa nan to na griello lëëque mendox gunxcoon samendox ma? ²⁴Teñ tib guiedz nadien gac miech chop dii, csilo zho tillsa zho, ¿niacxe nitlod guiedz co?

²⁵Tib diigaa miecha, teñ csilo zho lëëque zha tilnie menlidz zho, ¿niacxe nitlod zho? ²⁶Scaquegaa mendox nagon, telne lëëque lëë ma tilnie samendox ma, ¿pe nale na bnitlo ma! ²⁷Masaque nac mendox zig tib zha ne no xfuers, zha ne gacladz cuee grë ncuane no lidz zha co, none cxidoogazh zho zho.

²⁸Gneli naa lo to ganle, grëse dol ne run miech, grë teñ zha rguie zho, rdzibdee zho, bii zun Dios zho perdon min co; ²⁹sangue zha ne gneenë Espíritu Sant, dol nroob ga run zho, gdziñd dze ne gun Dios zho perdon.

³⁰Sca rëb me lo zho, sac sca quianee zho rëb zho mendox nacnie me.

³¹Horco laa xniaa me ni zha bets me bdzin, per leyse blëz zho; dzigo pxeel zho zha ne zietsedz me. ³²Blalaa zha ne zob gaxpaa lo me, zha co been vis rëb zho:

—Laa xniaa luu gon, ni zha bets luu ziaadguib luu.

³³Pquiab me rëb me:

—¿Xnia naa ye, bets naa ye?

³⁴Dze bui me lo grë zha ne ndxie ga, dzigo rëbchaa me:

—To gon nac xnia naa, to nac bets naa. ³⁵Sac grëse zha ne run mine racladz Dios, lëë bets naa ga, lëë bzian naa ga, lëë xnia naa ga.

Xcuent zha ne güey gon

(Mt. 13:1-23; Lc. 8:4-15)

4 Dze coquew, laa Jesús psilo quiaseed miech zaatne nac ro Nisdoo Galilé ga. Miech guizhiu ne pcaalsa lo me, nacne güeytsep me tib len barcw ne zo ro nis co, ga bzob me laa grë miech co bre tib ro nis. ²Ndal grë ncuane pseed me zho, per niapse con cuent rnee mew lo zho. Lëë tib cuent ne bzodiidz me ga nu, rëb me:

³—¡Golquiaadiaga ganle! Tib mgui name, brieë me güey me gon zhobxtil. ⁴Zeene laa me quialaal zhob co, mine bliaal gax ro nëz; znuse güey grë mguin güeytow maw. ⁵Laa mine bliaal zaatne nac lo quie, znuse znuse blana; ⁶per zeene laa lo ngbidz brieë, znusaque bgoolä blozh ga bidzgaw; sac guiend nroob low. ⁷Laa mine bliaal zaatne nac len yag guiets, zeene laa grë yag guiets co broob znuse bnitlo yag guietsa, pasëw niac. ⁸Sangue grë mine bliaal zaatne nac lo liu naal, blana, brooba ni goca; lo tib tib zhob co no mzion co brieë galptsii zhob, now brieë tsongala, nogaaw brieë haxta tib gayoow.

⁹Blozh ga, rëbchaa me lo zho:

—Zha ne racladz guien mine rne naa, yquiaadiag zhow.

¹⁰Zeene laa grë miech co zey, laa gza tsiipchop xpëédscuel me, ni zla zha ne rzënie me, laa zho bnabdiidz lo me dien zha nac cuent co. ¹¹Dzigo rëbchaa me lo zho:

—Tel to, Dioszhal rlu lo to zha rnabey me, niicle ncuane mazdraa ngueetsa; laa lo grëraa miech ne gard gbig lo me niapse con cuent rzodiidz naaw lo zho parne guien zhow. ¹²Per niicle scaw, nzhal diag zho ron zho, per peet riend zho; nzhal lo zho rwi zho, per peet rand zho; ib nëd zho gbig zho lo Dios, gnab zho gun me zho perdon.

¹³Nana to, telne biende to zha nac cuent co, ¿zha guien to grëraa mine gne naa dzigo? Golquiaadiaga ganle, znu gon naca: ¹⁴Mgui ne güeylaal zhob ga, rriequia lëë zha ne rienee Xtiidz Dios lo miech ga, laa zhobxtil co nac Xtiidz Dios. ¹⁵No miech nac zig nac ro nëz ne bliaal palal zhob co: rquiaadiag zho Xtiidz Dios, rlozh ga lëëlëd rdzin mendox rquiil ma zho, rsaanga zhow. ¹⁶Nogaa zho nac zigne nac lo quie co: zeene rquiaadiag zho Xtiidz Dios, ine rley zho rcaania zhow, ¹⁷per led dib zdood zho rcaania zhow; gane zeene laa miech rsilo rlëë lo zho, laa miech rtsidil zho porne riladz zhow, rsaanga zhow. ¹⁸Zzhisgaa zho nac zigne nac len yag guiets co: nli rquiaadiag zho Xtiidz Dios, ¹⁹per rsilo zho lel grë ncuane no lo guidzliu rii mazdraa rionie guic zho, rquidie grë dimi zho, rzoobladz zho yquianie zho grëse ncuane racladz zho. Grë ncuane co rioxcoraa zho, laa ne tsonie Xtiidz Dios guic zho, min co rquiaqui ib rund zho mine rnabey me. ²⁰Laa nogaa zho nac zigne nac liu naal co: rquiaadiag zho Xtiidz Dios, dib zdoos zho riladz zhow, ni rban zhow zigne naca. Grë zha co, no zho nac zig mzion ne brieë galptsii zhob ga, no zho nac zig mine brieë tsongala,

nogaa zho nac zig mine brieë tib gayoow ga.

Xcuent biini ni midz moxtaz

(Mt. 13:31-32, 34-35;
Lc. 8:16-18; 13:18-19)

²¹ Blozh ga, biire pcaalsa miech lo me, dzigo rëb me lo zho:

—¿Pa dien rquini biini? ¿Pe rquiaguiv par tsolana tib len guin o soogaaw tib zhan lon? Led zeene rquiaguiv lëë, zaatne grielo gziiniw ga rzoob zhow. ²² Scaque nagon grëse ncuane rac ngeetsa, grëse ncuane rnee miech zhliana, ib none xoobneña.

²³ Telne racladz to guien to mine rne naa, golquiaadiaga; ²⁴ ni zigne ron tow scagaa goltsoxco golguna. Telne tsoxco to gun tow, scagaa zioquicraa tow. ²⁵ Sac zha ne tsoxcow, zdedraa Dios guielbiini lo zho; sangue zha ne tsoxcoda, haxta tel palalse guielbiini ne bdeed me lo zho stiche mew.

²⁶ Ni rëb me lo zho:

—Znu gon nac zha ne ngab lo Dios; nac zho zig bni ne ran miech. ²⁷ Zha ne rielaał bni co, liu rcow, liu riini, laa zho raaguies, laa zho rieche. Sca sca laa dze zie, laa bni co ratslo, laaw rlan, laaw roob, per riend zho zha nacne laaw roob.

²⁸ Zhal guidzliu rdeeda guielnzaac co, guizh nac zhob co zeene rlana, rac palal dzew laaw rlan mzion. ²⁹ Laa zeene laaw ral, dzigo laa zho rietiitsa, sac laa dze bdziñle ne laaw tsas.

³⁰ ¿Zha ganle gni naa lo to zeena guien to zha nac xquielrnabey Dios? —rëb Jesús—. ¿Pa tib cuent ganle gzodidiz naa lo to zeena guien to zha naca?

³¹ Naca gon zigne nac tib midz moxtaz ne ran miech dan rii. Midz moxtaz nac midz ne mazdraa win, ³² ni tel gacbniv, rrooba, ni lëew rroobraa lo grë guizh ne ran zho ro yu, haxta grë mguin riezaa zhiptsieez ma low sacne ncala.

³³ Nzian grë cuent rii pquini me par cseed me grë miech co, ni laa me bnee mine rgobey me guien zho. ³⁴ Niapse sca rseed me zho, laa zha ne nac xpëedscuel me, zeene zhasew rnee mew lo zho zigne naca.

Pcuëez Jesús tib medox

(Mt. 8:23-27; Lc. 8:22-25)

³⁵ Zeene bdze dze co, rguetsle liuw rëbchaa me lo xpëedscuel me:

—Golgotsaa dieedquia ne stib nëz lo nis rii.

³⁶ Blozhse bnee me lo grë miech co, laa zho biepl len barcw ne zob me ga grë me zho, laa zho zie. Ye blalaa barcw ne zob lo nis co zienal.

³⁷ Laa zho zie, tibaque zeene laa tib medox psilo brieë, masaque rlis me lo nis co; zeene riasoli low riechoona len barcw, laa barcw psilo noyodzële nis.

³⁸ Dzigo güey zho güeycuaan zho Jesús, sac lëëtaque laa me nixguies nëz zhan barcw ncoogse me tib lmad.

—¡Maestro! —rëb zho—. Bui ganle, ¿pe znuse csaan luu nitlo ne nu?

³⁹ Dzigo guche Jesús, bnee me lo me co, bnee me lo nis co, rëb me:

—¡Lëew ga na! ¡Golcuedze!

Zigne sca bnee me, laa me co blëz, niicle nis cow laaw bredze. ⁴⁰ Dzigo rëbchaa me lo zho:

—¿Pe nacne squitaa rdzieb to? ¡Gardaque dzigo lëë gliladz to cho nac naa!

⁴¹ Riendraa zho zha gun zho lo dzeb co, ni rnabdiidzlsa zho rnee zho:

—¿Bay cho nac me, zha nacne haxta me, haxta nisdoo ron xtiidz me?

Men Gadar ne nosacsi mendox

(Mt. 8:28-34; Lc. 8:26-39)

5 Bdziñ Jesús nëz dan ro nisdoo co gza xpëedscuel me, ga nac xtan zha Gadar. ² Laa me bietdze len barcw, zeene laa tib mgui ne nosacsi mendox bdziñ lo me. Len baa brieë mgui co bdziñ me ga,

³⁻⁴ sac leñ baa nac zaatne rbëz me. Miech ne lëbd zho low, nzian vuel ziezoob zho caden nia me, ni me ne, per znuse rchug mew, rzhooṅga me. ¡Choot rlëbd lo me!
⁵ Dze, guieel quianzë me grë dan co, ri- etso me grë leñ baa. Roptsiedan me, ni lëëque me rzhëñ quie rchug me guidlad me. ⁶ Laa dze co, zitraa goṅ me Jesús, rias me bdziñ me pquitsgzhib me lo Jesús. ⁷⁻⁸ Dzigo goctox Jesús lo mēdox ne noguitnie me, rëb Jesús:

—¡Mēdox, psaan meṅ qui!

Horco pcooptsiedan mēdox co mgui co, ni ree ma lo Jesús:

—¿Pe guṅ luu naa Jesús? Runbey naa luu, Xpëed Dios ne no gbaa nac luu. ¡Ne nlipagaa been guieṅzaac csacsid luu naa!

⁹ Dzigo bñabdiidz Jesús lo ma dieṅ cho læ ma. Pquiab ma rëb ma:

—Legion læ no, sac nzian nac no.

¹⁰ Rñab grë mēdox co lo Jesús, gzonëzd me ma zit. ¹¹ Gaxaque zhan gui co ndxie tib dzoon nguts noyow, ¹² dzigo bñab ma lo Jesús, rëb ma:

—Bzhiguiel lose grë nguts qui bzonëz no.

¹³ Bdeed Jesús diidz. Dzigo laa grë mēdox co psaan mgui co, laa ma zie bzëëb ma zdoo grë nguts ne ndxie ga; psilo grë nguts co rquiaa ma corr güeypix ma glaa tib ro yee ne quia ro nisdoo co, bliaaṅ ma haxta lo nis. Ga bieṅ ma nis, grëse ma gut. Rga ma zig chop mil.

¹⁴ Zha ne quianap grë nguts co, gzase zho bzhoon güeyzodiidz zhow lad guiedz, ni grëraa yu ne zob gax ga. Brieë grë miech co, zieso zho. ¹⁵ Zeene bdziñ zho, per nli bdzieb zho, sac goṅ zho laa mgui ne sca bdziitnie mēdox ga zobse lo Jesús, laa mgui nacwxable, rlu ndzinlile nac guic mgui. ¹⁶ Psilo grë zha ne goṅ zha biac mgui co, ni zha goc grë nguts co, psilo zho rzodiidz zhow lo grë

zha ne bdziñ ga. ¹⁷ Min co bin grë zha co, mazd bñab zho lo Jesús siguiel me gbi me xtan zho.

¹⁸ Zeene laa Jesús zie sëëb me leñ barcw, dzigo laa mgui co wbigaque lo me, naṅ mgui nziguiel me nienal mgui zhits me. ¹⁹ Per bdeete me diidz, rëb me:

—Wbire, güey güeyzodiidz lo grë meṅlidz luu ganle pa lotaa pquia zdoo Dios luu, zha nactaa milagr nroob ne been me beṅguiac me luu.

²⁰ Dzigo wbire mgui. Güey mgui dib xtan zha Decápolis, güeyzodiidz mgui lo grë miech co zha beṅguiac Jesús mgui. Grëse zha ne rona, rzee zdoo zho.

Brieëban xpëdwnaa tib meṅ læ Jair

(Mt. 9:18-26; Lc. 8:40-56)

²¹ Zeene laa Jesús biire brieëquia stib nëz ro nisdoo co, miech guizhiu ne pcaalsa lo me ga. ²² Ga zo me zeene laa tib meṅ ne nacgrë zha ne rñabey yadoo læ Jair bdziñ. Zigne bdziñ me lo Jesús pquitsgzhib me, ²³ rëb me:

—Been tib guieṅzaac gotsaa guio ne gunguiac luu xpëed naa. Laa win rlozhle; nappaa naa telne cxobnia luu guic win, ziac win.

²⁴ Dzigo laa Jesús zie nëz lidz meṅ co. Ndal miech ne zienal zhits me, haxta rtaagw zho me. ²⁵ Lad grë miech co zienal tib wnaa, gogle tsiipchop iz rlan me tib guielguidz, rzac me zigne rzac meṅ wnaa gzob mëë, tibaque rlan mew ib rbëzda. ²⁶ Nzianle lo meṅ ne ruṅ rmed ziye me, grëse ncuane rap me bloozh me lo rmed; per laa ne cuëz guielguidz co, leṅ znu rzhizhooraaw. ²⁷⁻²⁸ Ziyonle me grë milagr ne ruṅ Jesús. Bza zdoo me rëb me: “Totsaque ygaa maase lad lar ne mbix me xeen naa, ziacle naa.” Dzigo bded me lad grë miech co, wbig gax me nëz zhits Jesús, bzhen me lad lar ne mbix Jesús. ²⁹ Nligaa hor cogazh laa guielguidz co blëz, bien me laa me biac.

³⁰ Zeene bien Jesús ne laa me beenguiac wnaa co, dzigo ptsire lo me rwi me lo grë miech co, rëb me lo zho:

—¿Cho ga bzhen lad xab naa?

³¹ Rëbchaa xpëëdsuel me:

—¿Zha nan luu glu dien cho bzhen lad xab luu, ni squitaa ndaagw ziaad luu lad grë miech qui?

³² Per laa me rwi lo grë miech co dien chow. ³³ Nanpaa wnaa co ne me ga, rdzieb me, rzhidz me laa me wbig pquitsgzhb me lo Jesús bneeli me zha nacre sca been me. ³⁴ Dzigo rëbchaa Jesús lo me:

—Xin, laa luu biac sacne bliladz luu naa. Bzë na, peet tsieniedraa guic luu, laa guielguidz co bichele.

³⁵ Laa Jesús bii quianeeque, zeene laa bla zha ne ziaad nëz lidz Jair bdziñ, rëb zho lo Jair:

—Csodziindraa luu lo men qui, laa xpëëd luu gutle.

³⁶ Zeene gon Jesús sca rëb zha co, dzigo bnee me lo Jair rëb me:

—Peet tsienied guic luu. Dib zdoo luu bliladz naa.

³⁷ Psaandraa me cho grë miech co nienal zhits me, loxaque Pedr, Jacob ni Juan bets Jacob; zha cose zienie me.

³⁸ Zeene bdziñ zho lidz men co, tib ruid ne rac, nguiedz zëëb tsi zho roon zho no zho xquielnë mëëd co. ³⁹ Dzigo bzëëb Jesús len yu, rëb me lo zho:

—¿Pe nacre squitaa roon to? Goonde to, gon led gute ndzooop win rii, nixguies ndzooop.

⁴⁰ Leł rzhidznie grë miech co me, bin zho sca rëb me. Dzigo bnabey me briece zho ley grëse zho, loxaque pxoz mëëd co, xniaa win ni gza tson xpëëdsuel me zha ne nal zhits me ga bzëëbnie me len yu ne nix win. ⁴¹ Wbig me bzhen me nia win, rëb me lo win:

—¿Guche i na, ndzooop yeen! (Talita, cumi.)

⁴² Zigne sca bnee me laa mëëd co guche, laa win bzë. Tib mëëd tsiipchop iza. Grëse miech co per nli rzee zdoo zho.

⁴³ Dzigo pso me diidz lo zho choot lo gneed zhow; blozh ga bnabey me bdeed zho ncuaañe dow mëëd co.

Güey Jesús ladz me

(Mt. 13:53-58; Lc. 4:16-30)

6 Ga briece Jesús grë xpëëdsuel me, laa me bdziñ Nazaret zaatne nac ladz me.

² Laa zeene goł dze ne rdziiladz zho lo dziin, laa me bdziñ len yadoo, psilo me pseed me grë miech co. Per nli rzee zdoo zho ron zho grë mine rnee me, rnabdiidzlsa zho rnee zho:

—¿Pazhe waa squitaa pseed men qui? ¿Zha nac guielbiini ne squitaa rap me i, ne rnee miech ndal grë milagr ne run me? ³ Tib ngurëyagse name nac me. Led lëë xingan Marí i, bets me name nac Jacob, nac José, nac Judas ni Simón, grë bzian mew, nu no zho grë zho.

Ib beencasd zho me. ⁴ Zeene gon me sca rac zho, dzigo rëb me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho, ni menlidz zho ni menladz zho nëd gunbey zho.

⁵ Brieelod niun me nzian milagr ga, blase zha rzacnë pxobnia me guic, beenguiac me. ⁶ Bzee zdoo me gon me scataa ndip zdoo zho, ib bliladzd zho cho nac me.

Blozh ga mazd güey me grë guiedz ne ndxie gax ga, güeyseed me miech.

Pxeel Jesús xpëëdsuel me tsieseed zho miech

(Mt. 10:5-15; Lc. 9:1-6)

⁷ Tib dze, bredz me gza tsiipchop xpëëdsuel me, bnabey me zho tsieseed zho miech. Pxeel me zho chopga chopga zho, ni bdeed me poder lo zho par guncxoon zho menodox. ⁸ Pso me diidz lo zho

güeyd zho pe yquiiin zho nöz, lëë gdib tib lë yag ne gzoxca zho güey zho. Zig nac ncuaa^{ne} gow zho, zig nac dimi, pe tib bziuudgaa, güeyd zhow. ⁹Lab zho, mi^{ne} quiase ni zho; xab zho, mi^{ne} nacwse zho mi^{nc}ose tsienie zho. ¹⁰Ni rëb me lo zho:

—Guiedz ne gdziⁿ to, zha ne gneedz zaatne cuëz to, lidz zha co go^lcuëz haxta gdziⁿ dze ne gbi to guiedz co. ¹¹Laa zaatne ne ib gneedzd zho pa cuëz to, niicle nëd^gaa zho yquiaadiag zho mi^{ne} gnee to, dzigo go^llit grë yudie co ni to, go^lrieegazh ga, zeena guien zho gan^{le} lëda ga been zho.

¹²Dzigo laa zho brieë, laa zho zie. Güey zho, güeynee zho lo grë miech csaan zho xquie^lntseeb zho, gbig zho lo Dios. ¹³Nzian zha ne nosacsi men^dox, ben^cxoon zho men^dox co; grë zha ne rza^ccnë, bdëëb zho nceit guic zho, beⁿguicac zho zho.

Gut Juan Bautist

(Mt. 14:1-12; Lc. 9:7-9)

¹⁴Bin rey Herod rzeet zho Jesús, sac tel pa lotaaw zëëb diidz grëtaa milagr ne run me. Grë miech co, no zho rzac brieëban Juan Bautist lëë me ga nac Jesús, gane run me grëtaa milagr co; ¹⁵nogaa zho rnee Líw, men ne biaad pteed Xtiidz Dios padzeela; zzhisgaa zho rnee, no cho stib men ne ziaad noteed Xtiidz Diosa, zig biaad grë zha ne biaad padzeela.

¹⁶Zeene ron Herod sca rnee miech, dzigo rnee me:

—Nligaa Juan ga. Naa bnabey pchug zho yan me, per lëë me ga brieëban.

¹⁷⁻¹⁸Sca rnee Herod sac rsoladz me zha been me Juan. Me bnabey bgaa Juan bio Juan ladzguiib, loxaque ne rnee Juan lo me nonguiel^{da} ga lëëque Herodí pt^sieelnia me; sac tsieelpaa bets me Lip nac Herodí.

¹⁹Blëënie wnaa ne nac Herodí ga Juan, rzac me tebaa zha gut me Juan; per rdeetew diidz, ²⁰sac rdzieb Herod

lega pe gun me Juan, rien me tib zha ne zienal mi^{ne} nac diidzli, tib zha ne peet xto^ld nac Juan; dzigo ib rdeete me diidz pe gun wnaa co Juan. Niicle ne cadque zeene rnee Juan lo me, rio me zhgab rien^d me dieⁿ zha gun me, per rdziladz me rquiaadiag me grë mi^{ne} rnee Juan.

²¹Laa tibtaa dze laa mi^{ne} no guic Herodí ga goc. Dze ne bloozh Herod stib iz, bnabey Herod goc tib lni roob, bredz me grë zha ne nacie me dziin, grë zha ne zo lo men^guiib, ni grë zha non lo zha Galilé. ²²⁻²³Laa zho no mezh noyow zho, zeene bzëëb xindzoo^p Herodí psilo nd^zoop biee ndzoo^p. Bdziladz Herod gon me zha biee ndzoo^p, grë zha ne zob lo mezh ga ne. Dzigo rëb Herod lo ndzoo^p, tel petaa gnab ndzoo^p zdeed mew; haxta brieë ro me rëb me:

—Ncuaa^{ne} gacladztaa luu gnab luu, niicle zig gro^l grë ncuaa^{ne} rap naaw, znedz naaw.

²⁴Rias ndzoo^p güeynabdiidz ndzoo^p lo xniaa ndzoo^p. Dzigo rëbchaa me lo ndzoo^p:

—Bnab lo me gnabey me tsiechug zho guic Juan gneedz zhow lo luu.

²⁵Bdziⁿ ndzoo^p lo Herod rëb ndzoo^p:

—Racladz naa xoob guic Juan Bautist tib len plat, gneedz luuw lo naa niinagazh.

²⁶Zeene bin Herod sca rëb ndzoo^p, mbanse rac me; per rdeetraaw diidz niab me grieloda, sac grëse zha ne zobnie me ga, bin zho rëb me zdeed me ncuaa^{ne} gnabtaa ndzoo^p. ²⁷Dzigo racse me pxeel me tib men^guiib ne tsiechug guic Juan.

²⁸Güey men^guiib co len ladzguiib pchug zho guic Juan. Bdziⁿ zho, zhoobsew tib len plat bdeed zhow lo ndzoo^p, dzigo güey ndzoo^p güeydeed ndzoo^p lo xniaa ndzoo^p.

²⁹Zeene bin xpëëdscuel Juana, dzigo güey zho güeylis zho me ga güeyqueets zho me.

Bguiaaṅ Jesús gaay mil miech

(Mt. 14:13-21; Lc. 9:10-17; Jn. 6:1-14)

³⁰ Zeene laa gza xpëëdsuel Jesús bdziṅ lo me stib, psilo zho bzodiidz zho lo me grëse tel zha güey zho, grëse tel zha güeyseed zho miech. Per miech guizhiu ne ndxie lo me, zha ne rbi, zha ne rdziṅ; haxta ni riobd gow me grë xpëëdsuel me. Dzigo rëb me lo zho:

³¹ —Mazd golgotsaa guio ne tib zatne zitlaa lo grë miech rii, zeena grielo gdziiladz to niip.

³² Dzigo bzëëb me tib len barcw grë me zho, laa zho zie. ³³ Nzian zha ne gon zie me, beenbey zho ne mew. Dzigo ndal miech ne no grë guiedz gax co brie, rias zho zie zho glole zho bdziṅ zaatne no gdziṅ me. ³⁴ Zeene biet me len barcw, gon me laa grë miech guizhiu co ndxiele ga. Pquia zdoo me zho gon me scataa ndxie zho zootle grë mëcwxiil yeen ne guiend xbaxtor, dzigo psilo me nzian grë ncuane pseed me zho.

³⁵⁻³⁶ Gol bdze dze co, wbig xpëëdsuel me lo me rëb zho:

—Mazd gudz lo grë miech qui guey zho na, zeena guiob tsie zho grë guiedz ne ndxie dib gax i, tsiesi zho ncuane gow zho; sac gon laa dze bdzele, ni choot miech guiend nu.

³⁷ Pquiab me rëb me lo zho:

—To goldeed ncuane gow zho.

Rëbcha zho lo me:

—iPe zhizhe dimi ne yquiin gziuu guietxtil ne gow grëtaa miech qui?

³⁸ Dzigo bnabdiidz me lo zho, rëb me:

—iBla guietxtil ziaadnie to? iGolwi dien!

Zeene biire zho güeyso zho, rëbcha zho lo me:

—Loxaque gaay guietxtil ziaad, ni ziaad chop mel.

³⁹ Dzigo bnabey me bzob grë miech co, wdzeepaaw bioogse lo guizh nguia ne zëëb ga ndxie zho. Tib dzoonga tib

dzoonga zho bre, ⁴⁰ zaatne bre tib gayoo zho, zaatne bregaa gol gayoo zho.

⁴¹ Dzigo bzhen me gza gaay guietxtil co, ni grop mel co, blis lo me bui me nëz gbaa, bdeed me xquizh lo Dios. Blozh ga, beengrol me guietxtil co, zigse rdeed mew lo xpëëdsuel me, scase scase noguiiz zhow lo grë miech co. Scaque been me grop mel co. ⁴² Grëse miech co, dow zho haxta zaatne bieltaa zdoo zho. ⁴³⁻⁴⁴ Miech tafa, zha bguise rgaa zig gaay mil; ni zeene blozh dow zho, scase ncuane nroob biaan, biodzë tsiipchop chicuid bio grë guietxtil co, bio grë mel co.

Rzë Jesús lo nisdo

(Mt. 14:22-27, 34-36; Jn. 6:16-21)

⁴⁵ Zeene blozh ga, bnabey Jesús xpëëdsuel me bzëëb zho len barcw, zeena zienerga zho tedquia zho stib nëz ro nis co, gdziṅ zho guiedz ne lë Betsaid; laa me bii blëz ga, nozonëz me grë miech co. ⁴⁶ Blozhse bzonëz me zho, dzigo güey me tib guic gui zob gax ga, güeyzodiidznie me Dios.

⁴⁷ Zig rguets liuw, laa barcw ne zie xpëëdsuel me ga no lo nis co. Laa me zo ga tipse me, ⁴⁸ ran me rlu ib gacd csëëniob zhow, sac rrie me rtsire mew. Merle guimbe liuw, tibaque zeene gon zho laa me bdziṅ zaatne zie zho ga; tib lo nis co ziezë me, rac me zig nac zeene tibted me lo zho.

⁴⁹ Zeene gon zho laa men co sca ziaadzë lo nis co, bdzieb zho, broptsie zho rnee zho:

—iTib ndziin i gon ziaad i!

⁵⁰ Sac grëse zho ranlo zho laa me sca ziezë lo nis co. Dzigo bnee me lo zho rëb me:

—iGdziebde to, naa zial nu!

⁵¹ Zeene laa me biepl len barcw ne zie zho ga, laa me co blëz; dzigo mazdraa bzee zdoo zho. ⁵² iPer ib riend zho cho nac me, niicle ne gonle zho been me mi-

lagr nroob co bguiaan me miech guizhiu co!

⁵³ Zeene laa zho bdziñ stib nêz ro nis co, zaatne nac xtan zha Genesaret, dzigo laa zho pxidoo xbarcw zho ro nis ga. ⁵⁴ Loxaque biet me len barcw laa grê miech co beenbeyle me. ⁵⁵ Rias zho güey zho grê guiedz co, güeynie zho diidz laa me bdziñ ga. Dzigo psilo grê miech co rxob zho zhimguidz zho lo yag, rdzinnie zho zho lo me zaatne rontaa zho no me. ⁵⁶ Zaatne gdzintaa me, niicle guiedz nrooba, niicle guiedz lasa, rbee grê miech co zhimguidz zho rienie zho zho zaatne nac len guiedz; ga rnab zho lo me siguiel me maase ni lar ne mbixse me xen grê men rzacnê co. Ni grêse zha ne rzhen xab me, riac zho.

Neuaane runctal xtoł miech

(Mt. 15:1-20)

7 Tib dze, bdziñ bla zha farisé, ni zla maistr ley ne ziaad nêz Jerusalén, lo Jesús. ² Dzigo gon zho blalaa zha ne nac xpëedscuel Jesús, zeene laa zho row rguiibd zho nia zho zigne nacpaa grê zhiwseed xmengol zho.

³ (Nac zha farisé, ni grêsegaa zha Israel telne tsard nia zho zigne nac xcostumbr xmengol zho, ible rowd zho; sac zienaldox zho mine nac costumbr. ⁴ Zeene rbire zho lo lgui, ib no mod ne riar nia zho dzigoraaz zob zho row zho. Nzian grê wseed co psan xmengol zho zienald zho, zig nac zha riar grê tas, grê cant, grê xtsin rotie zho mine niaa guuib, ni grê lo bangw ne rzob zho row zho.)

⁵ Dzigo rëb zho lo Jesús:

—¿Pe nacte zienald xpëedscuel luu mine blu xmengol ne? ¿Pe nacte squize nia beed zho i row zho?

⁶ Pquiab Jesús rëb me lo zho:

—Nlipaa mine bnee Isá, men ne biaad pteed Xtiidz Dios, zeene znu pquiaa me: Grê miech rii, rquiaalose zho runnon zho naa,

rond zho diidz gon zho mine rnabey naa.

⁷ Paat rquiind riaad zho riaadgan zho naa;

sac niapse guicle zho riab grê wseed ne quialu zho lo miech.

⁸ Sac tel to gon, nosaan to grê mine rnabey Dios, lel grê xcostumbr miech zienald to.

⁹ Xcostumbr to nac mine mazdraa rioxco to, laa mine rnabey Dios quiasan to tib lad. ¹⁰ Led znu gon rnee ley ne bdeed Dios lo Moisés: “Gon pxoz luu, gon xniaa luu”, ni no stib mine rnee: “Zha ne quie pxoz, quiegaa xniaa, ib none guet zho.”

¹¹ Laa to lel rnee to, zac gund miech xyudar xmengol zho, telne bloogonle zho pe nac ncuaañe rieguial gdeed zho lo me.

¹² Tole rdeete diidz ga gon zho xyudar pxoz zho, xyudar xniaa zho. ¹³ Tib ladle gon rsan to Xley Dios ga sca run to, lëepaaze grê costumbr ne biaanñie to, ni quiasangaa to lo zha ne ziaadquia, min co noxcoraa to. Ni nzianraa grê falt ne squi quiaayun to.

¹⁴ Dzigo bnee me lo grëraa miech ne ndxie ga, rëb me lo zho:

—Golquiaadiag mine gni naa lo to nu, ni goltsoxco guien to zha naca. ¹⁵⁻¹⁶ Golgacnan ganle: Grê ncuaañe rdziñ zdoo miech, led mincod runctal xtoł zho; sinque grê ncuaañe ntseeb ne rza zdoo zho, min co nac mine runctal xtoł zho.

¹⁷ Laa zeene laa me bdziñ ro yu grê xpëedscuel me, dzigo bnabdiidz zho lo me dien zha nac diidz ne sca rëb me lo grê miech co. ¹⁸ Rëbchaa me lo zho:

—¿Pe niicle to riendaquew dzigo lëë? ¿Pe riende to, grê ncuaañe row miech, led mincod runctal xtoł zho? ¹⁹ Sac grê ncuaañe row zho rdziñda len zdoomban zho, zhaa zaatne rdziña. Grê guielwagw, len bziuud zdoose zho, len zhitripse zho rieteda, rlozh ga rrieegaw xcuerp zho.

—Ga blu me lo zho ganle, grêse ncuaañe nac guielwagw lëda runctal xtoł miech.

²⁰ Ni rëb me lo zho:

—Mīne rza zdoomban miech, mīn co nac mīne runctal xtoꞵ zho. ²¹ Sac zdoomban zho rza grē ncuaaṇe ntseeb ne run zho, zig nac:

zeṇe rio zho grē zhgab yozh,
zeṇe run zho grē guielyozh,
zeṇe rban zho,
zeṇe rut zho samiech zho,

²² zeṇe rionie zho zha ne nacd tseeld zho,

zeṇe zroobladz zho ncuaaṇe rap stib miech,

zeṇe run zho grē guieṽntseeb,

zeṇe rquidie zho,

zeṇe rien zho run zho grē ncuaaṇe ndzinlid,

zeṇe nē rac zdo zho ran zho cho zha ne stibnoded,

zeṇe rzhixcuua zho diidzguizh,

zeṇe racniats zho,

zeṇe run zho grēraa ncuaaṇe paat rquiind.

²³ Grēse ncuaaṇe ntseeb rii, zdoomban miech rzaw, ni lēew nac mīne runctal xtoꞵ zho.

Biac xpēēd tib wnaa zit

(Mt. 15:21-28)

²⁴ Ga briece Jesús, laa me zie nēz Tiro. Zeṇe bdziṽ me nēz co ga bdziel tib yu ne blēz me, gocladz me choot niacnaṽd ne laa me no ga; per brieeloda, znuse bien diidza.

²⁵⁻²⁶ Zeṇe bin tib wnaa Sirofenis laa Jesús bdziṽ ga, dzigo güey me, sac no-guitnie mendox tib xpēēd me. Zigne bdziṽ me pquitsgzhīb me lo Jesús, rnab me tsiegunxoon Jesús mendox co. Tib wnaa zit nac wnaa co; ²⁷ dzigo rēbchaa Jesús lo me:

—Blēz niip dien. None glo mēēd gow, nonguiēda cuee ne quiet nia mēēd gdeed new lo mēcw.

²⁸ Pquiab wnaa co, rēb me:

—Nli scaw, zigne rnee luu i; per niicle mēcwa led rio ma zhan mezh rtop ma grē mīne rrieengaa nia mēēd.

²⁹ Dzigo rēbchaa Jesús:

—¡Squiw nagon! Lēēgazha i rnee luu. Peet tsieniedraa guic luu naa sca; bzē, laa mendox ne nosacsi xpēēd luu bichele.

³⁰ Laa wnaa co zey. Zeṇe bdziṽ me lidz me, gon me ine laa xpēēd me nixse lo lon, per laa mendox co psaanle win.

Biac tib meṽ ne rcuaat

³¹ Ga briece Jesús, güeyted me nēz Sidón. Sidón briece me bdziṽ me ro Nis-doo Galilé stib, zaatne nac xtan zha Decápolis. ³² Ga bdziṽ me tib mgui lo me, rcuaat mgui ni nca rnee mgui; bnab zho lo me cxobnia me guic mgui gunguiac me mgui.

³³ Dzigo blee me mgui lad grē miech ne ndxie ga. Zitlaa güeynie me mgui, ga psēēb me mzhugnia me gropse leṽ diag mgui ni bdēēb me zhindzuc me lo ludz mgui. ³⁴ Blozh ga, blis lo me bui me nēz gbaa, bneeladz zdo me, dzigo rēb me:

—¡Bzhial! (¡Efata!)

³⁵ Zigne sca bnee me, laa diag mgui co bzhial, niicle ludz mguiw laaw wban, laa mgui psilo bneenal. ³⁶ Dzigo pso Jesús diidz lo grē miech co, choot lo gzodiidz zho zha biac mgui co.

Per laa ne rso me diidz lo zho, dzigole nēzrii, nēzrec rzodiidz zhow; ³⁷ sac rzedox zdo zho gon zho mīne been me ga.

—¡Ncuaaṇe gzee zdo ne i been men qui! —nee zho—. Zha haxta nguaat, haxta ngop, runguiac me.

Bguiaaṽ Jesús tap mil miech

(Mt. 15:32-39)

8 Leṽ dze co, miech guizhiu ne biire pcaalsa lo Jesús stib. Zeṇe goc tson ngbidza, guiendraa ncuaaṇe gow zho. Dzigo bredz me xpēēdscuel me, rēb me lo zho:

²—Rquia zdo naa grë miech rii, tsonle ngbidz ga rac blanso zho nu, ni na quianiedraa zho ncuaane gow zho. ³Telne squise zho gzonëz naa zho, glëbd zho, scow zho nëz, sac no zho zit briece zho ziaad zho nu.

⁴Pquiab zho rëb zho:

—¿Per pe yguiaan ne zho? ¿Pa guioxi ne quietxtil ne gow grëtaa miech qui dan rii, naca zaatne guiënd miech?

⁵Dzigo bnabdiidz me lo zho, rëb me:

—¿Bla quietxtil ziaadnie to i?

—Gadzaquew —rëb zho.

⁶Dzigo bnabey me grëse miech co bzob zho liu. Blozh ga bzhen me gza quietxtil co, bdeed me xquizh lo Dios; blozhse bdeed me xquizh lo Dios, zigse noyungrol mew, scase scase rdeed mew lo xpëedscuel me rguiz zhow lo grë miech co. ⁷Zienie zho zla meļ las; bzhen me gza meļ co bdeed me xquizh lo Dios, blozh ga bnabeyaque me zho bdiiz zho ma.

⁸⁻⁹Grëse miech co, dow zho haxta zaatne bieltaa zho dzigo laa me bzonëz zho. Rгаа zho maase tap mil, ni zeene blozh dow zho bii bdop gadz chicuid mine biaan.

¹⁰Blozh ga, laa me bzëeb len barcw grë xpëedscuel me, laa zho zie nëz xtan zha Dalmanut.

Racladz zha farisé gan zho milagr

(Mt. 16:1-12; Lc. 12:54-56)

¹¹Blalaa zha farisé ne no nëz co, zeene bin zho laa me bdzin ladz zho, güey zho rzadraa ncuaane rlisqui zho lo me. Rnab zho glu me cho nac me, rëb zho lo me:

—Racladz no dzianlo no gun luu tib milagr, telne nli gbaa ziaad luu.

¹²Zeene gon me sca rac zho, bio me guielnë; dzigo haxta bneeladz zdo me, rëb me lo zho:

—¿Zha rnaraa milagr ne racladz to gan to? Gneli naa lo to ganle, ni stib milagr gon gandraa to.

¹³Blozhse sca rëb me lo zho, ndxieque zho ga laa me bzëeb len barcw laa me zie stib nëz ro nis co.

¹⁴Zeene briece zho ga, zoladzd xpëedscuel me ney zho ncuaane niow zho, lëë gdib tib quietxtil zienie zho len barcw.

¹⁵Laa zho zie, tibaque zeene rëb me lo zho:

—Golguien gon, napaa noyac-wet to lo zhincobi zha farisé, lo zhincobigaa rey Herod.

¹⁶Zeene bin zho sca rëb me, bza zdo zho rnee zho:

—Ne gon me nagon ziaadnied ne quietxtil gane squi rnee me.

¹⁷Biën me sca rnee zho, dzigo rëbchaa me lo zho:

—¿Pe nacre rnee to ziaadniede to quietxtil? ¿Riende to lëë zha rne naa? Ndip nac zdo to gane riende tow. ¹⁸¿Pa rquiin lo to, pa rquiin diag to ne laaw zob? ¹⁹¿Pe rsoladzde to zeene gaayaque quietxtil ni bgaaw bguian naa gaay mil miech? ¿Bla chicuid biodzë mine biaan hor co?

Pquiab zho rëb zho:

—Tsiipchopa.

²⁰Dzigo rëbchaa me:

—Zeene waa gadzaque quietxtil co, ni bguian naa tap mil miech, ¿bla chicuida biaan?

—Gadz chicuida —rëb zho.

²¹Dzigo rëb me lo zho:

—¿Pe niicle nana riendaque to pe rne naa?

Biac tib meñ ne rcow lo

²²Bdzin Jesús guiedz ne lë Betsaid, ga güeynie zho tib mgui ne rcow lo lo me, bnab zho cxobnia me guic mgui gunguiac me mgui. ²³Dzigo bzhen me nia mgui güeynie me mgui zaatne nacle ro guiedz co. Ga bdëeb me zhindzuc me len bziaalo mgui, ni pquiaania me zhits guidlo mgui; blozh ga bnabdiidz me lo mgui dien pe ranle mgui palal.

²⁴ Zeene laa mgui bui, rëbchaa mgui:

—Ranle naa niina nagon laa miech ziezë; per masaque ran naa zho zig rlu grë yag.

²⁵ Dzigo biire pquiaania me zhits lo mgui. Zeene laa mgui bui stib, ndiple rwi mgui laa lo mgui biacle. Grëse ncuane ran mgui, niicle zitraaw niini ran mguiw.

²⁶ Dzigo bzonëz Jesús mgui nëz lidz mgui, pso me diidz lo mgui tib nëz guey mgui, choot lo tsiezodiidz mguiw lad guiedz.

Bnee Pedr cho nac Jesús

(Mt. 16:13-20; Lc. 9:18-21)

²⁷ Blozhse ga, laa Jesús brieë ga grë xpëëdsuel me laa zho zie nëz Cesarea de Filipino, zieted zho grë guiedz las ne ndxie nëz co. Laa zho no nëz, tibaque zeene bnabdiidz me rëb me lo zho:

—¿Cho dien ron to rnee miech nac naa?

²⁸ Pquiab zho, rëb zho:

—No zho rnee Juan Bautista, no zho rnee Lív, men ne biadteed xtiidz Dios padzeela; nogaa zho rnee no cho stib men ne ziadteed xtiidz Diosa.

²⁹ Dzigo rëb me lo zho:

—¿To waa, cho rzac to nac naa?

Pquiab Pedr, rëb Pedr lo me:

—¿Luu nac Men ne zëëble diidz ga cxeel Dios guiaad lo guidzliu!

³⁰ Dzigo pso me diidz lo zho choot lo gneed zhow.

Bzeet Jesús zha gun miech me

(Mt. 16:21-28; Lc. 9:22-27)

³¹ Bded ga, psilo Jesús bzeet me lo grë xpëëdsuel me zha csacsi miech me. Rëb me nroob grë ncuane cteed zho me; grë zha non lo menguedz, grë pxoz nroob, grë zha ne rseed miech ley, ible stsidil zho me, ni haxta zut zho me; per zeene gac tson ngbidz gut me laa me grieëban.

³² Grëse miñe ted me, laaw nozodiidz me lo zho.

Goñ Pedr sca rnee me, dzigo bredz Pedr me, blisqui Pedr lo me dien pe nacne rnee me laa me guet. ³³ Zeene goñ me zha rzë xtiidz Pedr, zoque Pedr ga biecw me bui me lo grëraa xpëëdsuel me, goctox me rëb me:

—¿Biche lo naa nu mendox! Zienied guic luu miñe rnabey Dios, sinque laa guic luu zienie miñe racladz luu.

³⁴ Dzigo blunia me lo grë miech ne ndxie ga, yquiaadiag zho miñe gnee me; rëb me:

—Zha ne racladz sëëb xnëz naa, none cueeladz zho zho, none lëb zho guiaadnal zho miñe rnabey naa, niicle tel min co yquiaaqui csacsi miech zho. Nodne yquia zdoo zho xquielmban zho. ³⁵ Sac zha ne yquia zdoo xquielmban, lel znu nitlo zho; sangue zha ne sca cueeladz xquielmban porne rleynie zho naa, porne rleynie zho grë Diidz Ndzon rii, zha co yгаа tib guielmban ne mazdraa ndzon. ³⁶ Nana, tel zha ne gunlo grë ncuane no lo guidzliu rii. ¿Pa yquii grë ncuane co lo zho, tel lëew yquiaaqui laa zho guey gabil? ³⁷ ¿Niacxe zrieelo gdziib zho dimi co laa zho len gabil? ³⁸ Naa ne nac naa Men ne pxeel Dios zial naa lo guidzliu, zha ne ctoladz guiab zho lo grë miech ngoopdol rii laa zho no xnëz naa, o ctoladzniegaa zho xtiaz naa, scaque naa stoladznie naa zho gal dze ne laa naa guial stib. Dze ne guialnie naa grë anj, ni glu naa grë guielndzon ne rap Dios.

9 Ni rëb me lo grë miech co:

—Gneli naa lo to ganle, nzian grë zha ne ndxie nu niina ib tedsod gardaque guet zho, bii zan zho ganle zeene laa Dios glu ne nli men rnabey nac me.

Bdzëëlo Jesús

(Mt. 17:1-13; Lc. 9:28-36)

² Goca xoop ngbidz, brieë Jesús gza me Pedr, Jacob ni Juan, güey zho bzoquia zho tib guic gui glaa.

Bdziṅ zho glaa guic gui co, tibaque zeene gon zho laa me bdzëelo. ³Masaque rquiabni xab me, nquitsbie rñaw; ni tib miech grieelod scataa mbe quiib lar. ⁴Gonlo zho zeene laa Lí ni Moisés (grop zha ne biadteed xtiidz Dios glo) bdz-inaque, laa zho nozodiidznie me. ⁵Dzigo rëbchaa Pedr lo me:

—Maestro, jne nligaa wena guiaan ne nu! Laa no gzaa tson yu yag xiid win nu tso to: tiba tso luu, tiba tso Moisés, stiba tso Lí.

⁶Rdzieb Pedr gza Pedr schop zha co, lo dzeb co niicle riendaque Pedr pe rnee Pedr. ⁷Tibaque znuse bdop tib xcow pquia ngali zaatne zo zho ga; dzigo bin zho zëëb tib tsi men co lo xcow co, rnee me:

—Lëë xpëed naa i gon, rleynie naa me. Golgon mine rnee me.

⁸Lëëled biecw lo zho rwi zho, choot gon draa zho, Jesússe zo lo zho ga.

⁹Blozhse ga, laa zho wbique ga. Laa zho ziezëëb dan noyet zho cho gui co, zeene rëb me lo zho:

—Mine gon to gon, choot lo gneede tow. Golcuëz haxta gal dze ne grieeban Men ne pxeel Dios.

¹⁰Nacne choot lo bneed zhow, per psilo zho gza tson zho rñabdiidzlsa zho, zha mod grieeban tib zha ne gutle.

¹¹Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigoraa guiaad Men ne zëëble diidz ga cxeel Dios?

¹²⁻¹³Pquiab me rëb me lo zho:

—Nliw, ible nacle diidz ne glo Lí guiadseed miech gon zho xtiidz Dios, per laa me biaadle; ni zigne bzeetse grë zha ne biadteed xtiidz Dios ted me, scase been miech me. Scaque Men ne cxeel Dios ga, rnee lo Xtiidz Dios nroob csacsi miech me, ible gandzed zho me.

Biac tib niib ngop

(Mt. 17:14-21; Lc. 9:37-43)

¹⁴Zeene bdziṅ Jesús zaatne biaan grëraa xpëedscuel me ga, gza me Pedr Jacob ni Juan; gon zho miech guizhiu ne ndxie lo zho; blalaa zha ne nac maistr ley zo lo zho ga, nodiidiidznie zho. ¹⁵Grë miech co, zeene gon zho Jesús, rley zho, rias zho güeydzieelo zho me güeyquiaa bdiuzh zho me. ¹⁶Dzigo bnabdiidz me rëb me:

—¿Pe nadien squitaa nodiidiidz to?

¹⁷Lad grë miech co pquiab tib zho, rëb:

—Maestro, lo luu zialnie naa tib xpëed naa gunguiac luu win; ib gacd gnee win sac noguitnie mendox win. ¹⁸Tel pataa zo win, zeene laa ma rzëëb zdoo win rron ma win liu; ga nix win rdzib mtsiin ro win, ni row lay win; nrooble noyo win lëbdraa win së win. Blansonie naa win nu, dzigo bnab naa lo xpëedscuel luu guncxon zho mendox co, per brielod zho.

¹⁹Dzigo rëbchaa Jesús lo zho:

—¿Pe na squitaa miech nad nac to, ib rnalode to Dios! ¿Palal tiemp ne so naa gne naa lo to? ¿Ncuaane cxecwdraa naa lo to squi nac to! ¿Goltenie mëedwin qui nu!

²⁰Güey zho güeynie zho mëedwin co lo me. Zigne gon mendox co me, psilo beencxidz ma win, znuse biab win liu, rtiibxto win ni rdzib mtsiin ro win. ²¹Dzigo bnabdiidz me lo pxoz win, goc palal dze psilo sca rac win.

Rëbchaa pxoz win:

—Bii mëdyeen win psilo squi rac win. ²²Pe zhidaa vüelt zieron mendox qui win lo gui, zieron ma win lo nis ne, racladz ma gut ma win. Bzhiguiel telne zrielo gunguiac luu xpëed naa, pquia zdoo naa, been tib guielnzaac beenguiac win!

²³Rëbchaa Jesús lo me:

—¿Zha mee luu “teĭne zrieelow”?
 ;Zha ne dib zdoo rnalō Dios, grēse
 ncuaane racladz zho, zaca!

²⁴Lēēlēd pquiab pxoz mēēd co, rēb
 me:

—Rnalō naa Dios, per bzhiguiel been
 xyudar naa, ;dib zdoo naa gnalo naa me!

²⁵Zeene gon Jesús laa grē miech co
 rbigberaa, dzigo goctox me lo mēdox
 ne noguitne mēēd co, rēb me:

—Mēdox, luu gon psan ngop mēēd
 rii, luu psan nguāt win. ;Niinagazh
 psaan win, ib gbiiredraa luu ygaal luu
 win!

²⁶Horco biire beencxidz ma mēēd co
 stib, masaque roptsiedan ma laa psaan
 win, nixtaque win ga, zootle gutle win.
 Nzian grē miech co, tibaque nan zho
 gutle win. ²⁷Laa zeene bzhen Jesús nia
 win, blis me win ga, laa win bzoli.

²⁸Zeene bdziñ Jesús len yu ne rbēz me
 grē xpēēdscuel me, bnabdiidz zho lo me
 rēb zho:

—¿Bay pe nacne brieelod no ndzi-
 uncxoon no mēdox co?

²⁹Dzigo rēbchaa me lo zho:

—Grē mēdox ne sca nac, rquiin dib
 zdoo ne gnab ne lo Dios dzigo zrieelo
 guncxoon ne ma.

Bzeet Jesús laa miech csacsi me

(Mt. 17:22-23; Lc. 9:43-45)

³⁰⁻³¹Brieē Jesús ga grē xpēēdscuel
 me, laa zho wbire nēz xtan Galilé stib.
 Racladzd me cho gacnan pa lo no me;
 sac len dze co nzian grē ncuaane noseed
 me zho. Haxta bzeet me zha csacsi miech
 me, rēb me:

—Naa ne nac naa Men ne pxeel Dios,
 ible ziaab naa ladznia miech, ni zut zho
 naa. Per zeene gac tson ngbidz gut naa,
 laa naa grieēban.

³²Per ib riend zho pe nacne sca rnee
 me, niicle gnabdiidzga zho rdzieb zho
 gnabdiidz zhow lo me.

¿Cho nonraa?

(Mt. 18:1-5; Lc. 9:46-50)

³³Bdziñ zho guiedz ne lē Capernaum;
 grēse zho laa zho ndxie len yu ne blēz
 zho, tibaque bnabdiidz Jesús lo zho, rēb
 me:

—Golnē dien, ;pe scataa nodiidiidz to
 zeene ziaad ne nēz?

³⁴Ni tib zho ib pquiabd, sac zeene zi-
 aad zho nēz quianeelsa zho dien cho nac
 zha ne nonraa.

³⁵Dzigo bzob me, bredz me zho gza
 tsiipchop zho rēb me lo zho:

—Zha ne racladz gac zho zha non,
 none guiaanwin zho gac zho zig tib
 ngundziin lo samiech zho.

³⁶Dzigo bzo me tib mēēdbgui win
 glowtaa lo zho; blozh ga bdeedz me win
 ni rēb me lo zho:

³⁷—Zha ne ngab xnēz naa, ni gleynie
 zho tib mēēdwin zig mēēdwin rii, gun
 naa cuent naa ga rleynie zho; ni zha ne
 sca rleynie naa, yele men ne pxeel naa
 ga rleynie zho.

³⁸Blozh ga, rēbchaa Juan lo me:

—Maestro, bdziñ no gon bzeet tib
 zha co lē luu zeene beuncxoon zho men-
 dox; nacne nli blisqui now lo zho, sac
 gon, led yed zho nacgrē ne.

³⁹Dzigo pquiab me rēb me lo zho:

—;Guncscade to! Sac gon zha ne sca
 rzeet lē naa zeene run zho milagr, niacxe
 lēēque zha glēē lo naa. ⁴⁰Zha ne nacie
 ne, glēēd zho lo ne.

⁴¹Golgacnan sca ganle, grēse zha ne
 gdeed maase tib zhigaque nis guie zha ne
 ngab lo naa, ib tedsod stsire Dios mine
 been zho ga. ⁴²Sangue zha ne yguib
 guncstal zho xtol zho ne nac zho zig
 tib mēēdlas yeen; mazd lēētaa mine ted
 zha co sobdoo tib quie molin zhobxtil
 yquiaaw yan zho tsieron zho zho nisdoo.

Choot gdeete diidz guiab lo dol

(Mt. 18:6-9; Lc. 17:1-2)

⁴³⁻⁴⁴ 'Zha ne rien nia zho nac mine rquiaqui runctal zho xtol zho, mazd cchuggazh zho nia co zho. Peet nacd maase tibaque nia zho zob totsaque ygaa zho guielmban ndzon ne gdzind dze lozh, ledle zob gropa ni laa zho guey gabil, lo beldox ne gdzind dze guiuu. ⁴⁵⁻⁴⁶ Telne riengaa zho ni zho nac mine rquiaqui runctal zho xtol zho, mazd cchuggazh zho ni co zho. Peet nacd maase tibaque ni zho zob totsaque ygaa zho guielmban ndzon ne gdzind dze lozh, ledle zob gropa ni laa zho guey gabil, lo beldox ne gdzind dze guiuu. ⁴⁷ Tel tib logaa zho nac mine rquiaqui runctal zho xtol zho, mazd cueegazh zho bziaalo co zho. Peet nacd maase tibaque bziaalo zho zob totsaque ygaa zho guielmban ndzon co, ledle zob grop bziaalo zho ni laa zho guey gabil. ⁴⁸ Zaatne nac gabil, ib gdzind dze ne guiuu lo bel co; gre mziog ne ndxie ga, gdzind dze ne nitlo ma. ⁴⁹ Grese zha ne gdzin ga, masaque cuib gui lad zho zig rbib zed lad beel.

⁵⁰ 'Zig nac zed, rquiindoxa zeene nzhiw, per zeene nzhida, zpa dien yquina? Scaquegaa to nagon golgac zig zed ne nzhi, zeena yquin to lo guidzliu rii; niowse golbannie samiech to, gleelsade to.

Zha ne rsébtsieel

(Mt. 19:1-12; Lc. 16:18)

10 Brie Jesus Capernaum güeyted me gre guiedz ne ndxie nez xtan zha Judé, gre guiedz ne ndxie nez dan ro guibee Jordán. Miech guizhiu ne rcaalsa lo me, dzigo rsilo me rseed me zho zigne runtaque me.

² Tib vult bdzin bla zha farisé gocladz zho niungüet zho me, par dien pe nxind me tib diidz; bnabdiidz zho reb zho:

—Maestro, mgui ne racladz csébtsieel, zpe gné luu pe zrieelo csébtsieel zho?

³ Pquia me reb me lo zho:

—Zha zho psan Moisés diidz lo to?

⁴ Pquia zho reb zho:

—Tel Moisésa, bdeed me diidz csébtsieel zha ne racladz csébtsieel, lëeraasi none yquia tib guits gdeed zho lo wnaa zaatne raquiet ne laa zho psaan wnaa.

⁵ Dzigo rebchaa me lo zho:

—Ne squicxe waa miech nad nac to ib ronde to diidz, min co nacne biaan ley co. ⁶ Per ib nodne csébtsieel miech; sac gon, zeene psan Dios grëtaa ncuane no, tib nez miech bzaa me: tib mgui ni tib wnaa. ⁷⁻⁸ Gacxe waa, mgui ne rtsieel-nia ib none grieezhaa zho lo pxoz zho, lo xniaa zho, par gbannie zho wnaa ne nac tsieel zho; laa zho gactipse grop zho. Nacdraa zho chop miech, sinque laa zho rac tibaque. ⁹ Dios nac men ne psan ycat-sieel miech, cho dzigo nac miech par qui-its zho mine rnabey me.

¹⁰ Laa zeene bdzin me len yu ne rbéz zho, dzigo bnabdiidzaque xpëedscuel me min co lo me stib. ¹¹ Dzigo rebchaa me lo zho:

—Mgui ne rsébtsieel ni rbannie zho stib wnaa, noguitnie zho wnaa ne goc-paa tsieel zho ga, ni dol ga run zho.

¹² Niicle wnaagaaw, wnaa ne rsébtsieel ni rbannie zho stib mgui, lëëque dolaque ga run zho.

Beenlay Jesus mëedlas

(Mt. 19:13-15; Lc. 18:15-17)

¹³ Tib vult nzian men ne bdzin bdzinie zho xpëedlas zho lo Jesus, par cxobnia me guic win gunlay me win. Gre zha ne nac xpëedscuel me, lel psilo zho ndox zho lo gre zha ne bdzinie gre mëedlas co.

¹⁴⁻¹⁵ Zeene gon me sca quiayun zho, wbinladz guic me, dzigo reb me lo zho:

—Ctsirede to gre mëedlas yeen qui, golsaan guiaad win lo naa. Sac gon gre

mëedlas yeen, ni zha ne nac zigne nac win, zha co nac zha ne sëeb ygab lo Dios.

¹⁶ Blozhse sca bnee me, dzigo psilo me bdeedz grë mëedlas co, ni pxobnia me guic win beenlay me win.

Bzodiidznie tib zha ricw Jesús

(Mt. 19:16-30; Lc. 18:18-30)

¹⁷ Laa Jesús nole nëz tsie me stib guiedz, zeene rias tib niib nguieg bdzin pquitsgzhìb lo me, rëb niib lo me:

—Nan naa luu nac tib men ne noseed miech, ni tib men wen nac luu; çbnë dien pe nac mine gun naa zeena ygaa naa guielmban ndzon ne gdzindraa dze lozh?

¹⁸ Rëbchaa Jesús lo niib:

—Rnee luu lëe tib men wen nac naa. jNligaaw, Diosse nac men wen! ¹⁹ Nanle luu ganle zha nac Xley Dios, rneew:

Gute luu samiech luu, telne nole tsieel luu, tsonied luu zha ne led tsieeld luu,

cuand luu samiech luu, yquiadiidzguizhd luu samiech luu, yquidieed luu samiech luu, gon pxoz luu, gon xniaa luu; bin mine rnabey me luu.

²⁰ Dzigo pquiab niib rëb niib lo me:

—Maestro, grësew zigne bzeetse luuw i, ni tiba gard quits naa wlal ne nac naa zha nguieg.

²¹ Dze rwi Jesús lo niib, rleynie me niib.

—Stibaque mine rquiin gun luu —rëb me—, güey, güeyto grëse ncuane quianie luu, dzigo bdiiz dimi co lo grë zha mban ne guiend pe yquiin; sca nroobraa guielnzaac ne ygaa luu gbaa. Lozh ga, bleeladz xquielmban luu dënal zhits naa.

²² Zeene bin niib co sca rëb Jesús, biab guielnë niib, mbanse rac niib laa niib zey; sac ne nligaa nroob ncuane quianie niib.

²³ Dze rwi me gon me laa zha nguieg co zey, dzigo rëb me lo xpëedscuel me:

—jGrë zha ne squi rapchen, rzacxuu zho par sëeb zho xnëz Dios gnabey me zho!

²⁴ Zeene bin zho sca rëb me, rzee zdoo zho. Dzigo biire me bnee me rëb me lo zho:

—Xin, jne nligaa tib miech ne ndziib rap chen, rzacxuu zho sëeb zho xnëz Dios gnabey Dios zho! ²⁵ Mazd znuse rded tib camell guieer guzh, lëdle sëeb tib zha ricw xnëz Dios.

²⁶ Zeene bin zho sca rëb me, mazdraa bzee zdoo zho, rnabdiidzlsa zho rnee zho:

—Bay, çchose dzigo nac zha ne zrieelo sëeb xnëz Dios?

²⁷ Dze rwi me lo zho, dzigo rëbchaa me:

—Par miech zootle tsod zha ne grieelo sëeb xnëz me. Sangue me, nan me no zho; sac tsod ncuane grielod gun me.

²⁸ Dzigo rëb Pedr lo me:

—Tel no, grëse ncuane rdziaap no laa no psana, laa no ziaadnal zhits luu.

²⁹ Pquiab me rëb me:

—Grëse zha ne psan lidz, psan zho bets zho, bzian zho, xniaa zho, pxoz zho, xpëed zho, liun zho, porne riladz zho naa ni riladz zho Xtiedz Ndzon Dios; ³⁰ nli nroob guielnë gan zho, per gneli naa lo to ganle: grëse ncuane sca psan zho ga, lo guielmban riique laa zho gbi-ire gana stib tib gayoogaw tib tiba; ni ib tedsod zgaa zho tib guielmban ndzon ne gdzindraa dze lozh.

³¹ Nli zig nac niina, no zha ne rzac zha non nac zho, per zeene gal dze co peet gacnond zho; laa zha ne rzac zho peet nond, gal dze co lalga gac zho grë zho.

Biire bzeet Jesús laa miech csacsi me

(Mt. 20:17-28; Lc. 18:31-34)

³² Briece Jesús ga laa me zie Jerusalén. Nzian grë zha ne zienal zhits me, nerse me lo zho laa zho zie. Grë zha ne nac xpëedscuel mew, rzee zdoo zho;

laa grëraa miech co per nli rdzieb zho. Dzigo bredz me gza tsiipchop zha ne nac xpëëdsuel me ga, psilo me bzeet me grëse tel zha ziaadyob ted me, rëb me lo zho:

³³—Bii zan to ganle, naa ne nac naa Men ne pxeel Dios, niina ne laa ne gdziñ Jerusalén ible zielo zho naa ladznia grë zha ne nac pxoz nroob ni grë zha ne rseed miech ley. Grë zha co gnab guet naa, ni san zho naa ladznia grë zha ne nacdrea zha Israel. ³⁴Xidznie zho naa, stsuc zho lo naa, zguin zho naa, ni haxta zut zho naa; per dze ne gac tson ngbidz gut naa laa naa grieeban.

³⁵Dzigo wbig gax Jacob grop Juan (xingan Zebedé) lo me, rëb zho:

—Maestro, laa no gnab tib favor lo luu, per racladz no siguiel luu gun luuw.

³⁶Dzigo rëb me:

—¿Pe favor ne racladz to gun naa lo to?

³⁷Rëbchaa zho:

—Laa no racladz, siguiel luu zioob no cue luu gal dze ne laa luu nac rey rnabey luu, tib no nëz derech stib no nëz revés.

³⁸Pquiab Jesús, rëb me lo zho:

—¿Ni to gon riend pe rnab to! ¿Pe zlëb to gan to grë guielnë ne gan naa, pe zlëb to ted to grë mine teed naa?

³⁹Rëbchaa zho:

—¿Zlëëb no!

Dzigo rëbchaa me lo zho:

—Nli zan to guielnë ne gan naa, ni zded to mine teed naa; ⁴⁰per ne gnedz naa diidz sob to cue naa nëz derech o nëz revésgaa, led naad raguiäl min co; laa lugar co biaanle par zha ne nole diidz ygaaw.

⁴¹Grëraa zha ne nac xpëëdsuel me, zha ne nacgza Jacob ga grop Juan, zeene bin zho zha rzë xtiidz Jacob grop Juan blëë zho lo zho. ⁴²Dzigo bredz Jesús zho grëse zho, rëb me lo zho:

—Ran to ganle zha run grë zha ne rnabey grë guiedz ne ndxie lo guidzliu, ni

grë zha ne nac zha non, masaque rnabey zho samiech zho zigne racladztaa zho.

⁴³Sangue to gon, gunscade to. Lo gza to, zha ne racladz gac zho zha non lo to, laa ne glu zho zha non zho, none glo zho guiaanwin gac zho zig tib ngundziin lo to. ⁴⁴Scaquegaa, zha ne racladz gnabey lo to, none glo cseed zho gun zho mine gnabey to zho. ⁴⁵Golgan ganle, niicle naa ne nac naa Men ne pxeel Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmban naa zeena laa zho lo grëtaa ncuane ngadoo zho. Ni nanpaa naa miech guizhiu ne laa.

Biac tib men lë Bartimé

(Mt. 20:29-34; Lc. 18:35-43)

⁴⁶Sca no grë miech guizhiu co nëz, laa zho bdziñ guiedz Jericó. Laa zeene laa grë miech taf co zieriee ro guiedz co, laa tib mgui ciegw lë Bartimé zob ga rtop gon (xingan tib men lë Timew). ⁴⁷Zeene bin Bartimé ye Jesús (Nazaren) ziaad ga, psilo me nguiedz rbedz me, rnee me:

—¿Jesús, men xti rey David, pquia zdoo naa!

⁴⁸Nzian grë miech co ndox lo me nan zho guioog ro me, per dzigole mazdraa nguiedz roptsie me, rnee me:

—¿Jesús, pquia zdoo naa!

⁴⁹Dzigo pcuëëzni Jesús, bnabey Jesús güeytsedz zho me. Bdziñ zho lo me, rëb zho:

—¿Ligier guso i! Dë ganle laa me rbedz luu.

⁵⁰Zeene bin mew, haxta squi bron me lar ne mbix me, guso me ga laa me bdziñ lo Jesús. ⁵¹Dzigo rëbchaa Jesús lo me:

—Bnë nadien, ¿pe racladz luu gun naa?

Pquiab me rëb me:

—Maestro, racladz naa guiac lo naa.

⁵²Dzigo rëbchaa Jesús:

—¡Niinagazh laa lo luu gan! Laa luu biac, sacne dib zdoo luu bnalo luu naa. Ligier na bzë.

Horcogazha laa lo men co psilo bui, laa me zianał zhits Jesús.

Bdzin Jesús Jerusalén

(Mt. 21:1-11, 18-19;

Lc. 19:28-40; Jn. 12:12-19)

11 Zhile gdzin zho Jerusalén, laa zho zie gax zaatne riaan guiedz Betfagé ni guiedz Betain, nêz dan squi riaan Gui Oliv, zeene bredz Jesús chop xpëédscuel me ²rëb me lo zho:

—Gołtsie guiedz win ne ndxie danse lo ne i. Zigne sëëb to lad guiedz, laa tib burr quiadoo ga, ni tib miech gard sob lad ma; dzigo golxadz ma, gołtënie ma nu. ³Teł cho gnabdiidz pe nacne noxadz to ma, dzigo golguiab: men ne rnabey ne men co rquiin ma, na zigne lozh xtsiin ma guiaadsan no ma.

⁴Laa zho zie, nligaaw laa zho güey-dziel burr co quiadoo ma tib ro nêz, gax tib ro yu. ⁵Blalaa zha ne zo ga, zeene gon zho laa zho noxadz ma, rëbchaa zho:

—¡Pe gun to burr qui dzigo na, ne noxadz to ma?

⁶Dzigo pquiab zho zigne rëbse Jesús lo zho ga, nacne bdeed men co diidz laa zho zienie ma.

⁷Bdzinnie zho ma lo Jesús lëëque lar ne rbix zho pxob zho lad ma, bzbogga me ma. ⁸Nzian grë miech co zigse zie Jesús, scase scase ner zho rta zho lar ne rbix zho rded me, nogaa zho rchoo nia grë pe yag rdziin zho zaatne rded me. ⁹Grëse zho, niicle zha ne ner lo mew, niicle zha ne nał zhits mew, rley zho nguiedz roptsie zho, rnee zho:

—¡Zha ndzontaa men qui pxeel Dios lo ne! ¹⁰¡Zha wentaa ziaad me gac me zhirey ne! ¡Me gnabey zigne bnabey pxozgol ne rey David! ¡Zha ndzontaa Dios ne zob gbaa!

Sca nguiedz roptsie zho rleynie zho me, laa me bdzin Jerusalén.

¹¹Bdzin me Jerusalén, güey me güeyso me len yadoo. Blozhse bui me dipse len yadoo, laa me brieèque ga laa me zie nêz Betain grë xpëédscuel me, sac bdzele dzew.

¹²Biini liu, loxaque zieriee zho Betain laa me psilo rcaabedz. ¹³Zitlaa ziaad me gon me tib zhan yag guigw, nxii nac low zëëb zhiblaga; dzigo zie me zieso me dien pe gdziield tib guigw low gow me. Bdzin me zaatne zoba, ni tib guigw guiend low loxaque zhiblagsew scataa zëëb, sac gardpaa gdzin mëë ne rquia guigw. ¹⁴Dzigo rëb me lo yag guigw co:

—¡Squitaa nagon guiaan luu! ¡Gdzin-draa dze yquia nex lo luu gow miech!

Grëse xpëédscuel me, bin zho sca bnee me lo yag co.

Blee Jesús miech len yadoo

(Mt. 21:12-17, 20-22;

Lc. 19:45-48; Jn. 2:13-22)

¹⁵Bdzin zho Jerusalén, bzëëb me len yadoo. Psilo me blee me grëse miech ne quiayun lgui ga, zigtaa zha ne no wtow, zigtaa zha ne no wziw. Grë zha ne no wto palom, grë zha ne notsëë dimi, ptiixche me xmezho zho. ¹⁶Blozh ga, pso me diidz choot nodraa sëëbnie grë ncuiaan co len yadoo, ¹⁷rëb me lo zho:

—Led znu gon rnee lo Xtiidz Dios: “Zaatne nac lidz naa nu, nu guiaad grëse miech ne ndxie lo guidzliu sodiidznie zho naa.” Laa to gon quiayun to lugar rii zig tib zhibliee ngbaan.

¹⁸Grë zha ne nac pxoz nroob ni grë zha ne rnabey lo maistr ley, bin zho sca rëb me, dzigo psilo zho rguib zho dien zha gdeeda diidz gut zho me. Per rdzieb zho lega gnaaz zho me, sac ndal miech ne rley rquiaadiag zhiwseed me. ¹⁹Zeene laa liu pcow, laa me wbique Jerusalén stib grë xpëédscuel me.

²⁰ Biini liu co, laa zho zieded zaatne zob yag guigw ne sca güeyguib me nex lo ga, gon zho laaw bidzle dib low. ²¹ Dzigo beencsoladz Pedr mew, rëb Pedr:

—Maestro, bui ganle laa yag guigw ne bdzibdee luu ga bidzle.

²² Pquiab me rëb me:

—Zha ne dib zdoo rnalò Dios, ²³ gneli naa lo to ganle: Niicle ncuaane mazdraa ngan gnab zho lo me, zun mew; lëëraasi none dib zdoo zho gliladz zho zac mine rnee zho, ni palal gacchopd guic zho. ²⁴ Golgona sca ganle, grëse ncuaane gnab to lo Dios, dib zdoo to golliladz ne zneedz mew, dzigo sca zac mine rnab to. ²⁵ Ni zeene gnab to lo Dios, golsoladz dien pe no cho rlëënie to, dzigo golgun zho perdon; zeena sca-gaa, PxoZ to men ne zob gbaa zun me to perdon tel pe nactaa xtol to. ²⁶ Sac telne gunde to samiech to perdon, dzigo niicle megaa, gund me to perdon.

Cho rnabey Jesús

(Mt. 21:23-27; Lc. 20:1-8)

²⁷ Blozh ga, laa zho bdzinaque Jerusalén stib. Lëëtaaque laa Jesús quiawi dib len yadoo, zeene bdzin bla zha ne nac pxoz nroob, bla zha ne nac maistr ley ni zha ne nac men non lo menguedz, ²⁸ rëb zho lo me:

—¿Cho dien nac luu ne squitaa ziaadnabey luu len yadoo? ¿Cho rnabey luu?

²⁹ Pquiab me rëb me lo zho:

—Laa naa gun tib wnaabdiidz lo to. Telne stire to low, dzigo gni naa lo to ganle cho rnabey naa ne laa naa noyun grë ncuaane noyun naa. ³⁰ Gollnë dien, ¿cho pxeel Juan biaad me pchoobnis me miech? ¿Pe Dios pxeel me, te miechsew ye?

³¹ Psilo zho rnaabdiidzlsa zho, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa bililadzde to mine bnee Juan?” ³² Tel

na dzieetsgaa ne: “Miechse pxeel Juan, grieequiadaque ne.”

Rdzieb zho niab zho miech pxeel Juan, sac grëse menguedz nan ne nli Dios pxeel Juan biadteed Juan xtiidz Dios lo miech. ³³ Dzigo mazd mine been zho, rëb zho:

—Ndiond no dien cho pxeel Juan.

Dzigo rëbchaa me lo zho:

—Niicle naagaa nagon, grielod gni naa lo to cho rnabey naa quiayun naa grë ncuaan rii.

Xcuent zha ne pquianap liu

(Mt. 21:33-46; Lc. 20:9-19)

12 Dzigo psilo Jesús bzodiidz me tib cuent, rëb me:

—Tib mgui name, nroob lbë uv beenbni me lo liun me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me briece ga, laa me zey zit.

² Zeene gol mëë ne ral uv, pxeel me tib xmoz me lo zha ne quianap liu co, parne gdeed zho uv ne rieguial me ycaa me. ³ Per lel bnaaz zho moz co, bdiin zho zho; blozh ga, scase bzonëz zho zho.

⁴ Dzigo biire men ne nacchen liu co pxeel me stib moz, scasaque been zho: gocontseeb zho lo moz co, pquiaago zho zho, bdiin zho zho, blë zho guic zho.

⁵ Biireque me pxeel me stib zho, zha cole beet zho. Ni bii pxeel me nzianraa zho, no zho psiwee zho, nogaa zho beet zho. ⁶ Tibaque zeene loxaque xinganse me riaan. Rleyniedox me xpëed me, per laa me pxeel me, bza guic me rëb me: “Ganse zho xpëed naaw, zon zho mine gnee me.”

⁷ Zeene gon zho laa xpëed me bdzin, rëbchaa zho: “¿Lëë zha qui nagon guiaannie liu rii! ¿Golgotsaa dziuut ne zho zeene guiaana lo ne!” ⁸ Dzigo bnaaz

zho meṅ co, beet zho me, güeyga zho güeyron zho me tib lad lo liu co.

⁹Sca nagon —rëb Jesús—, been zha ne quianap liu co. Golnëse nadien, ¿pe nac mine gun bizhuan liu co? Ib tedsod zeene laa me guiaad, znitlo me zha co; zhaale lo zha ne csaṅ me liuṅ me.

¹⁰Golsoladz ganle znu rnee lo Xtiidz Dios:

Quie ne psëëb zha ne nozaa yu, ni naṅd zho lëëpaa quie co nac mine rnazdziits yu.

¹¹¡Ncuuaṅe gzee zdoo new! Sac Dios bnabey sca goca.

¹²Zeene gon zho sca bnee me, gocladz zho naazgazh zho me ga; sac bien zho mine run zho ga bzeet me. Per bnaazd zho me, sac rdzieb zho grë miech guizhiu ne ndxie ga, nacne zeyga zho.

Pe nonguiel quizh miech contribucion

(Mt. 22:15-22; Lc. 20:20-26)

¹³Zhisaque goca, laa zho pxeelaque zla zha farisé, ni zla zha ne nacie Herod, zie zho ziegungüet zho Jesús par dien zha cxiṅ me tib diidz; zeena sca gdeeda diidz tsiezo zho me lo wxtis.

¹⁴Bdziṅ zho lo me, rëb zho:

—Maestro, ndion no niapse diidzli rnee luu, led lega gund luu mine rnee tib miech, sac tibeyse nac miech lo luu, ni laa luu zianal cseed zho mine nac diidzli zeena sëëb zho xnëz Dios. Miṅ co nagon, nacne racladz no gnë luu lo no dien, ¿pe nonguiela ga rdeed no dimi ne razh lo rey te nonguielda ye? ¿Pe zdizhraa no dimi co, te mazd dizhdraa now ye?

¹⁵Bienga Jesús racladz zho gungüet zho me, dzigo rëbchaa me lo zho:

—¿Pe nacne racladz to gungüet to naa? Golguiid tib xpes to nu ganle.

¹⁶Dzigo bdeed zho tib pes lo me. Blozh ga, rëbchaa me lo zho:

—Golnë lo naa dien, ¿cho nu quia lo pes rii? ¿Cho lë nu quia low?

Pquiab zho rëb zho:

—Lëë rey Roma i, lëë lë me i quia low.

¹⁷Dzigo rëb me lo zho:

—Mine nonguiel ycaa rey, goldeeda lo rey; scaquegaa mine nonguiel ycaa Dios, lo Dios goldeeda.

Zeene gon zho sca ptsire me lo xtiidz zho, rdzieldraa zho zha gun zho.

¿Pe nli zrieeban miech?

(Mt. 22:23-33; Lc. 20:27-40)

¹⁸Bdziṅaque zla zha saducé, rëb zho lo me:

¹⁹—Maestro, znu pquiaa Moisés lo lib ley ne psan Moisés lo no: tel glo mgui guet lo wnaa ne nac tsieel mgui ni gopd wnaa mëëd, dzigo none betsaque zho ct-sieelnia wnaa co stib, zeena gap wnaa mëëd ne guiaan xlugar xpëed zha ne gut ga.

²⁰Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut, biaan xpëed zho.

²¹Dzigo ptsieelnia stib bets zho wnaa co, blozh ga gutaque zha co, pasë zho nsan mëëd. Ptsieelniaque me stib zho, goc zho tson, niicle zha co psandaque mëëd. ²²Sca sca haxta bza gza gadzse zho ptsieelnia me, per ziese zho ni tib zho psand mëëd; tibaque zeene yeque me, laa me gut. ²³Mine racladz no gacndion no, ¿chopaa dzigo gac tsieel wnaa co gal dze ne laa zho grieeban; sac gza gadzse zho ptsieelnia me?

Sca bnabdiidz zho, sac nac zha saducé rliladz zho ne nli zdziṅ dze grieeban zha ne ret.

²⁴Dzigo pquiab Jesús rëb me lo zho:

—I nagon laa to rxin. Mine naca riende to zha nac Xtiidz Dios, niicle rliladzde to zrielo me gun me ncuuan ro ne gard gan miech. ²⁵Sac gon, zeene gal dze ne laa grë miech grieeban, niicle mguiw niicle wnaaw led yedraa hor co dien cho ctsieelnia zho; sac hor co laa zho gac zig nac grë anjl ne no gbaa. ²⁶Stiba, ible nli

zrieëban mengut. ¿Pe gard ganle glab to lo guits ne pquiaa Moisés, zaatne ziaad zeene bin Moisés tsi Dios tib lo yag zarz nguia ne noyazbel? Rëb Dios lo Moisés: “Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob.”²⁷ Niicle ne gutle gza zha co hor co, per zeene sca bnee Dios, gase rlu ne mban zho no zho lo me. Sac tel Dios, nacd me xDios mengut sinque xDios zha mban nac me. Ise nagon rlu, peet riende to gane squi rnee to.

Xley Dios mine mazdraa non

(Mt. 22:34-40)

²⁸ Zeene sca nozodiidznie Jesús zha saducé co, gon tib maistr ley niapse diidzli ptsire me lo xtiidz zho. Dzigo wbig maistr ley co, bnabdiidz me lo Jesús, rëb me:

—Bzhiguiel bnë lo naa dien, lo grë xley Dios, ¿pa min nac mine mazdraa non?

²⁹ Pquiaab Jesús rëb me:

—Min rii nac mine mazdraa non, znu nreew: “Grëse to men Israel, golquiaadiga ganle: men ne nac Dios ne riladz ne, tibaque me ni me nac men ne rnabey ne.

³⁰ Dib zdoo to, dib xalm to, dib guielbiini ne no guic to, dipse xfuers to golleynie me.” Lëë tiba nu, ³¹ laa stiba znu rnee: “Bleynie samiech luu zigne rleynie luu luu.” Tsodraa stib ley ne mazdraa non lo grop ley rii.

³² Dzigo rëbchaa maistr ley co lo Jesús:

—Diidzli rnee luu maestro, tibaque Dios no. ³³ Ni none dib zdoo ne, dib guielbiini ne no guic ne, dipse xfuers ne gleyne ne me; ni gleyne ne samiech ne zigne rleynieque ne ne. Min co nac mine mazdraa non, lëdle gzëëg ne pe cos cogon ne lo me o dien peragaa gun ne.

³⁴ Zeene gon Jesús sca niini rzë xtiidz me, rëbchaa Jesús lo me:

—Zhile runfalt sëëb luu xnëz Dios, gnabey me luu.

Blozh ga, grëse zha ne ndxie ga, ni stib zho biazhdraa zho pe nabdiidz zho lo me.

¿Cho xpëed nac Crist?

(Mt. 22:41-46; Lc. 20:41-44)

³⁵ Sca noseed Jesús miech len yadoo ga, zeene bnabdiidz me lo zho, rëb me:

—¿Bay zha nacne rnee grë maistr ley, lo xtii rey David ga grieequia Men ne nacle diidz ga cxeel Dios? ³⁶ Sac zeene bdeed Espiritu Sant guielbiini lo rey David, znu bnee David:

Bnee Dios lo men ne rnabey naa, rëb Dios lo me:

“Cue naa nëz derech, nu bzob, nieeda lozh gnaz naa grëse zha ne rlëë lo luu, csan naa zho ladznia luu.”

³⁷ Gase nagon telne nli zha xtii David gag Men ne nole diidz cxeel Dios ga, ¿zha nac dzigo ne lëëque David rnee ne me rnabey David?

Grë miech guizhiu ne ndxie ga noquiaadiag zhiwseed me, per nli rley zho ron zho zha rnee me.

Zha run grë maistr ley

(Mt. 23:1-36; Lc. 11:37-54; 20:45-47)

³⁸ Laa me noseed grë miech co, zeene pso me diidz lo zho rëb me:

—Ible tsienalde to mine run maistr ley gon. Sac grë zha ne nac maistr ley, rdziladz zho racw zho lar nool haxta zhits ni zho rbiba, rdziladz zho ndooladz yquiaabdiuzh miech zho zeene gdzieel zho zho dib ro nëz. ³⁹ Zig nac len yadoow, zha nac zha ne rzob lo xcan zaatne rzob grë zha non, zeene tsiegaa zho tib lni lidz miech, lëëpaaze zha nac zha ne rzob groj mezh zeene laa wagw gag. ⁴⁰ Ni rlozh ga, rio zho rla zho tel pe ncuaane rapse grë wnaa viud; ni parne peet guiabd miech lo zho, xtse rzo zho rzadraa pe lay ne gool zho.

¹Sca gon nac zho, per ib tedsod zeene laa grë miech ngoopdoꞤ quizh xfalt, zha nac zha ne mazdraa nroob caxtigw yгаа.

Gon ne bdeed tib wnaa viud

(Lc. 21:1-4)

⁴¹Blozh ga, güey Jesús güeysob me gax zaatne zhoob grë alcancí. Dzese rwi me ran ne zha riesan miech gon len grë alcancí co; ndal grë zha ricw rdziñ, nroob dimi rсан zho.

⁴²Tíbaque zeene bdziñ tib wnaa viud, tib men prob nac me, ye me laa me psan chop gaay win len alcancí co.

⁴³Dzigo bredz Jesús xpëedscuel me, rëb me lo zho:

—Gneli naa lo to ganle, mazdraa gon nroob non gon ne bdeed wnaa viud qui, lëdle gon ne bdeed grëraa zha qui. ⁴⁴Sac zha, dimi ne riaanle lo zho i rgogon zho; sangue wnaa prob qui gon, centav yeen ne quianiese me mine rnalopaa me gziuu pe gow me, per laa me bloogona.

¡Nsin golso!

(Mt. 24:1-28; Lc. 17:22-24; 21:5-24)

13 Laa Jesús zieriee len yadoo nroob co grë xpëedscuel me, zeene rëb tib zho lo me:

—Maestro, ¡bui ganle zha niaataa yadoo rii! ¡Zha mataa grë quie ngol ne niaaw!

²Pquiab me rëb me lo zho:

—Nligaa lëe zha niaataaw. Per niicle squitaa gon ran tow niina, dzziñ dze ne nitlow dib nacsew. Ni stib quie qui guiaandraa zigne squi zhobxcuaaw i.

³Briee me ga, laa me zie gza me zho. Bdziñ zho cho Gui Oliv, ga bzob zho grë zho. Nieenpaa ro yadoo co zaatne zob zho ga; dzigo wbig Pedr, Jacob, Juan ni Ndrés lo me, gza tap zho bnabdiidz lo me rëb zho:

⁴—Bzhiguiel bnë lo no dien, ¿pa hor dzigo gac mine bzeet luu ga? ¿Zha nac señ ne tso zeene laaw csilo gac?

⁵Dzigo psilo me bnee me lo zho, rëb me:

—Nsin golso zeena choot yquidiede to. ⁶Sac nzian zha ne grieequia gnë zho zha nac Men ne zëëble diidz cxeel Dios; ni nzian miech ne yquidie zho.

⁷Zeene gon to nëzrii nëzrec noyac dil, ib gdziebde to; sac ible none gac grë min co, ni lëdsew ga. ⁸Sac garaa csilo grë dillox, grë guiedz nroob laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. Nëzrii nëzrec csilo gni grë zhodox, nzian zaatne gan miech gbin. Ni lega loxaque mine rsilosew ga, sac nroobraa guielnë ne gan miech lozh ga.

⁹Zeene laa grë ncuuan rii rsilo noyac, ¡nsin golso! Sac hor co laa miech tsiezo to lo zha ne rnabey yadoo, ni lëëque len yadoo ga quin zho to; ziezo zho to lo grë zha non, lo grë zha rnabey, loxaque ne no to xnëz naa. Ga nagon gdeeda diidz gnee to Xtidz naa lo grë zha co, ¹⁰sac ib none briets bliaallew lo grëse miech zeene gal dze ne laa guidzliu nitlo. ¹¹Zeene tsiezo zho to lo wxtis, tsode to zhgab dien pe guiab to lo wxtis; sac Espíritu Sant nac men ne gacniën to, ni mine csiaab me guic to min co gnee to.

¹²Len dze co, zio zha ne lëëque zha tsielo bets zho lадznia zha ne gut zho; zio zha ne lëëque zha tsielo xpëed zho lадznia zha ne gut zho; scaqueгаа mëëda, zio zha ne lëëque zha gut pxoz zho, lëëque zha gut xniaa zho. ¹³Ible gandzed miech to, grëse zho glëe lo to sacne riladz to naa; per scagaa, grëse zha ne dziits so haxta lozh grë guielnë co, ible scaania Dios zho.

¹⁴Zeene gan to laa ncuane ziaad gnitlo zo zaatne rieguiald sow, zigne bzeet profet Daniel (zha ne glaba, none guien zho zha naca), hor co golguib dien zha xoon to. Zha ne no grëraa guiedz ne ngab Judé, none tsie zho dan, ga tsietsolan zho. ¹⁵Zha ne no glaa guic yu,

none lëälëd xoon zho, ib guiabd zho sëëb zho len yu tsiebee zho ncuane nacchen zho. ¹⁶Zha ne zogaa dana, ib gund zho ne laa zho tsie ro lidz zho tsixi zho xab zho. ¹⁷Prob grë men wnaa ne lëëtaque len dze co zoney xpëëd, men ne quianiegaa mëdyeen ne bii radz! ¹⁸Golnab lo Dios gande to guielnë co len mëë ne racnal, sac ne nligaa guielnë nrooba. ¹⁹Wlal ne biaan guidzliu haxta lo nadze, gard gan miech tib guielnëdox sca, ni gdzin-dragaa dze ne gan zhow stib. ²⁰Telne csaan Dios nroob dze gac guielnë co, ni stib miech rii guiaandraa; per na por grë zha ne bzooblo me sëëb xnëz me, gdeete me diidz gaca nroob dze.

²¹Len dze co, tel cho zha gnë lo to: “Golwi ganle, lëë men rii nac Men ne nole diidz ga cxeel Dios”, gnëgaa zho: “Golwi nec ganle, lëë me i”, gliladzde tow. ²²Sac ndal grë zha ne griequia guiaadquidie miech, no zho gnë zha nac men co, nogaa zho gnë zha ziadteed Xtidz Dios lo miech; ni zun zho grë milagr parne yquidie zho miech, parne yquidie zho haxta grë zha ne ngable lo Dios. ²³Nsin sca golso! Ib cxende to, benque laa naa nilew lo to.

Ziaad Jesús stib

(Mt. 24:29-35, 42, 44; Lc. 21:25-36)

²⁴Zeene lozhse gan miech grë guielnëdox co, laa lo ngbidz ycow, gziinidraa mëë. ²⁵Grë mel ne ndziib gbaa, laa ma gliaal; grëraa ncuane no gbaa, masaque nëzrii nëzrec gaca. ²⁶Horco bii zan zho ganle, zeene laa Men ne pxeel Dios ziad-zëëb glaa lo xcow con grë guielndzon con grë poder ne rap me. ²⁷Lozh ga laa me gnabey grë xanj me, tsie zho tsietop zho grëse zha ne ngab lo me, niicle zaatne mazdraa zit lo guidzliuw, mazdragaa zit gbaaw.

²⁸Golzoob cuidad zha nac yag guigw. Led nanle to ganle, zeene laa grë zhicwa

racnieen, ni rsilo rdzib zhiblaga, gase rlu ne laa mëë nëëg ziaadgaxle. ²⁹Scaquegaa nagon, zeene gan to laa grë mine rne naa lo to nu rsilo noyac, dzigo nanle to lëë dze co ziaadyoble. ³⁰Gneli naa lo to ganle, nzian miech ne mban nicina bii zan zho zeene laa grë ncuane co csilo gac; sac ible ncuane gaca. ³¹Zdzin dze nitlo gbaa, nitlo guidzliu, sangue mine rne naa lo to nu, nitloda, ible laaw none gac. ³²Lëëraasi choot nand dien pa dzew, dien pa horgaaw, per ni grë anjl ne no gbaa, per ni naa nanda; loxaque Pxozse naa naa. ³³Gacxe waa, nsin golso, golnab lo Dios; sac gon nande to dien pa hora.

³⁴Nac cuent rii zig nac tib zha ne rrie zie tib guiedz zit. Zeene laa zho rrie, rranse zho diidz dien pe gun tib tib moz ne guiaan ro lidz zho, ni rso zho diidz lo zha ne rquianap ro puert nsin so zho, ib gaguiesd zho. ³⁵Scadaa to nagon nsin golso, sac zig bizhuan yu co scaquegaa naa nande to pa hor guial naa, yase glanso naa tib bdze dze, tib grol guieel, wxingaa horne rcuedz gall, o ziaadyunmbegaa liu. ³⁶Nsin golso, zeena ine zobna to zeene laa naa glanso. ³⁷Mine rne naa lo to nu, laaw rne naa par grëse miech.

Bnediizd zho dien zha gnaaz zho Jesús

(Mt. 26:1-5; Lc. 22:1-2; Jn. 11:45-53)

14 Schop ngbidz runfalt csilo lni Pascw, lni ne row zho guietxtil ne riotsd ncobi; grë pxoz nroob ni grë maistr ley, laa zho noguib dien zha ngueetsse gnaaz zho Jesús gut zho me, ²ree zho:

—Laa me no ygaa, per lëëraasi gnaazd ne me mer dze lni, sac miech guizhiu ne ndxie lo lni dze co; zriequia nzian zha ne glisquiw.

Pchoob tib wnaa nceit nex guic Jesús

(Mt. 26:6-16; Lc. 22:3-6; Jn. 12:1-8)

³Len̄ dze co, laa Jesús no guiedz Be-tain. Lëëtaaque laa me no mezh lidz Simón ne blan guiedz lepr, zeene bdziñ tib wnaa bdziñnie tiblo nceit nex, nosew tib len̄ ncuaan̄ win niaa niapse quie rbebni, tiblo nceit niazha. Dzigo blë wnaa co ncuaan̄ win co, blozh ga pchoob me nceit co guic Jesús.

⁴Blalaa zha ne zobgrë Jesús ga, zeene gon̄ zho sca been̄ wnaa co, blëë zho, rëb zho:

—¿Pa rieguiala squi pxin̄ zhlë wnaa qui nceit qui? ⁵Telne niaca mine ndow, nguizhpaazhow tson̄ gayoo pes plat, nquiinpaaz dimi co ngaaza lo grë zha mban ne guiend̄ pe yquiin.

Laa zho nolisquiw lo wnaa co, ⁶dzigo rëbchaa Jesús lo zho:

—Golsaan me. ¿Pe nacne rlisqui tow lo me? Led lega pxin̄d mew, tib guieInzaac nroob i been̄ me lo naa. ⁷Telne nli rquia zdoo to zha ne guiend̄ pe yquiin, zac ygad to lo zho stib dze, sac tibaque ran̄ to zho; sangue naa zdziñ dze ne gbiche naa lo to, gandraa to naa. ⁸Laa wnaa qui been̄ mine brieelo lo me, laa me pchoob nceit nex rii guic naa zeena nzhixcuaale xcuerp naa gal̄ dze ne laa naa ygueets. ⁹Gneli naa lo to gan̄le, dipse lo guidzliu zaatne cseedtaa miech Xtiidz Dios, ible soladz zho wnaa rii, seet zho mine been̄ me nu.

¹⁰Lo gza tsiipchop zha ne nac xpëed-sciel Jesús ga, brieë zha ne lë Judas Is-cariot güeyzodiidznie Judas grë zha ne nac pxoz nroob, rëb Judas laa Judas gun̄ me ntregar. ¹¹Zeene bin zhow, per nli rley zho ni rëb zho zdeed zho dimi lo Judas. Dzigo psilo Judas noguib Judas dien̄ pa hor gdeeda diidz gun̄ Judas me ntregar.

Dowxtseenie Jesús xpëedscuel me

(Mt. 26:17-29; Lc. 22:7-23;

Jn. 13:21-30; 1 Co. 11:23-26)

¹²Mer dze ne rsilo lni Pascw, dze ne rowxtsee zho tib carner, ni rsilo zho row zho quietxtil ne rquiad ncobi lad, dze co bnabdiidz xpëedscuel Jesús dien̄ pa lo racladz me tsiegun̄lo zho ncuaane gowxtseenie me zho wdze co. ¹³Dzigo pxeel̄ me chop zho Jerusalén, rëb me lo zho:

—Goltsie Jerusalén. Ga gan̄ to tib mgui nzobyan̄ tib re nis, dzigo golt-sienal̄ zhits me. ¹⁴Yu ne gan̄ to sëëb me, golguiab lo bizhuan yu co: “Znu në maestro: ¿Pa len̄ yu me gneedz luu gac zaatne gowxtseenie me xpëedscuel me wdze rii?” ¹⁵Dzigo ga glu me tib len̄ yu nroob ne riaan̄ glaa, nzhixcuaale lena, grële ncuaane yquiin no ga; dzigo ga golgun̄lo zhixtsee ne.

¹⁶Laa grop zha co brieë, laa zho zie. Bdziñ zho lad guiedz Jerusalén, nligaa laa zho bdziel yu co zigne rëbse me lo zho ga, dzigo psilo zho been̄lo zho xtsee co.

¹⁷Bdze dzew, laa me bdziñ len̄ yu co grë xpëedscuel me.

¹⁸Laa me no mezh noyownie me zho, zeene rëb me lo zho:

—Laa naa gni lo to gan̄le, lëëque tib zha ne gon̄ noyownie naa nu tsielo naa ladznia zha ne gut naa.

¹⁹Zeene bin zho sca rëb me, mban rac zho, dzigo psilo zho tibga tibga zho rn-abdiidz lo me, rnee zho:

—¿Pe naaw?

²⁰Pquiab me rëb me lo zho:

—Ladaque to no zho, zha ne nosëëb xcuun̄ len̄ xquien naa, lëë zho ga. ²¹Naa ne nac naa Men̄ ne pxeel̄ Dios, niina laa miech gut naa zigne raquietsew lo Xti-idz Dios; per, jprobsaxe zha ne tsielo naa ladznia zho! ¡Mazd wen nie zho, ib niacz zho miech lo guidzliu!

²²Laa zho noyow zeene bzhen Jesús tib guietxtil, bdeed me xquizh lo Dios, blozh ga baengroł mew dzigo bdiiz mew lo zho, ni rëb me:

—Golquiina, lëë xcuerp naa i gon.

²³Ni bzhen me tib cop nroob vin, bdeed me xquizh lo Dios, blozhse bdeed me xquizh, dzigo bdeed me cop co lo zho, grëse zho go vin co. ²⁴Ni rëb me lo zho:

—Lëë xchen naa i, miñe gzhiee par grëse miech ne sëëb xnëz Dios, sac lëë stib mod cub nu psan Dios parne sëëb miech xnëz me. ²⁵Lëë lultm vuelt nu guie naa vin rii, sac zhaale stib vin cub ne guie naa zeene laa naa gdziñ zaatne rnabey Pxož naa.

Dzigo psilo me biil me bla salm gza me zho.

Bzeet Jesús zha gon Pedr

(Mt. 26:30-35;

Lc. 22:31-34; Jn. 13:36-38)

²⁶Blozhse biilnie me Dios grë me zho, dzigo laa me brienie zho ga zienie me zho nëz Gui Oliv.

²⁷—Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nëzrii nëzrec gliaał mëcwxiił.” ²⁸Sca gon zho naa, per zeene laa naa grieeban glose naa ga Galilé, ga cuëz naa to.

²⁹Dzigo rëbchaa Pedr lo me:

—Niicle telne saan grë zha qui luu, sangue naa gon csaand naa luu.

³⁰Pquiab me rëb me lo Pedr:

—Gneli naa lo luu ganle, guieel rigazh, gardle grop gall tsonle vuelt rëb luu runbeyd luu naa.

³¹Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nagne guiep naa runbeyd naa luu?

Scaque rnee grëraa zho.

Bzodiidznie Jesús Pxož me Getsemaní

(Mt. 26:36-46; Lc. 22:39-46)

³²Bdziñ Jesús zaatne lë Getsemaní gza me zho, dzigo rëbchaa me lo zho:

—Nuse nagon golšob, laa naa ga gazodiidznie naa Pxož naa.

³³Horco psilo mban rac zdoe me, riabguiełnë me, dzigo bredz me Pedr, Jacob ni Juan, bzënie me zho palal ³⁴dzigo rëbchaa me lo zho:

—Mban rac zdoe naa, zootle zig zet naa lo guiełnë rii. Nuse nagon golguiaan, per golšobna.

³⁵Bzë me spalal, dzigo pquitsgzhib me haxta bdziñ lo me lo liu; psilo me bnaab me lo Dios ne telne zrieelow mazd tete me grë guiełnë ne no gan me, ³⁶rëbchaa me:

—¡Papá, par luu grëse cos zrieelo gon luuw! ¡Bzhiguieł psilaa naa lo guiełnë rii! Per telne grieeloda, miñe gnëtaa luu, sca gaca.

³⁷Zeene biire me bdziñ me zaatne bii naa gza tson zha co, gon me gzase zho nixguies; dzigo rëbchaa me lo Pedr:

—Simón, ¿nixguies luu lëë? ¿Pe ni palal blëëbd luu nzobna luu? ³⁸Golšobna, golnab lo Dios zeena yquiił mendox to. Niicle ne squi lëbdraa xcuerp to sobna to, per golnab lo Dios, sac gon min co nac miñe racladz zhiespíritu to.

³⁹Dzigo biire güey me stib, güeyzodiidznie me Dios; scaque miñe bnaab me glo mincoque bnaab me stib. ⁴⁰Zeene bdziñ me lo zho, gon me laa zho bii nixguies. Ni rdzielz zho pe guiab zho lo me.

⁴¹Laa zeene goc tson vuelt biire me güeynab me lo Dios, rëbchaa me lo zho:

—Lëëw nagon, zacle na gaguies to, zacle gdziiladz to. Naa ne nac naa Men ne pxeel Dios, naataa laa hor bdziñ zeene laa grë miech ntseeb rii guiadnaaz naa. ⁴²Goltsieso, zeena zio ne; sac gon laa zha ne glu naa lo zho ziaadle nu.

Bnaaz zho Jesús

(Mt. 26:47-56; Lc. 22:47-53; Jn. 18:2-11)

⁴³ Laa Jesús bii quianeeque, zeene laa Judas (tib zha ne nac xpëédscuel me) bdziñ, bdziñnie Judas tib dzoon zha ne pxeel grë pxoz ne rnabey, grë maistr ley ni grë zha non lo menquiedz Israel. No zho nzhen spad, nogaa zho nzhen yag. ⁴⁴ Biaanniele Judas zho diidz zha glu Judas cho nac Jesús, rëb Judas lo zho:

—Nanle to gon, zha ne gow naa bzhid cuas, lëe me ga; ligier golso golxen me, ib csaande to xoon me.

⁴⁵ Nligaaw, zigne bdziñ Judas bredz Judas Jesús; blozh ga dow Judas bzhid cuas me. ⁴⁶ Horco wbig grë zha ne zienal zhits Judas ga bzhen zho me. ⁴⁷ Lo grë zha ne nacgza Jesús ga, hor co biasaque tib zho bdoz zho zhispad zho pchug zho tib diag xmoz men ne nac pxoz nroob.

⁴⁸ Dzigo rëbchaa Jesús lo grë miech co: —¿Niacxe naa cho ngbaan, zha nac ne squitaa nzhen to spad, nzhen to yag ziadnaaz to naa? ⁴⁹ Blactaa dze name gon to noseed naa miech len yadoo, ¿pe nacne bnaazde to naa ga? Per ible laa grë ncuaañ rii gon noyac zeena gac grë mine raquiet lo Xtiidz Dios.

⁵⁰ Grë zha ne nac xpëédscuel me ga, grëse zho bzhoon, tipse me psan zho ga. ⁵¹ Tibaque mgui nguieg bii güeynal zhits me, tib lëse lar nquits mbix mgui; dzigo bnaaz zho mgui gocladz zho ye mgui nie-nie zho; ⁵² per znuse briece mgui len lar co, bzhoon mgui coletse mgui.

Güeynie zho Jesús lo zhiwx-tis zha Israel

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Ga brieenie zho Jesús bdziñnie zho me lidz men ne nac pxoz nroob. Grë pxoz rnabey, grë zha ne rnabey lo maistr ley ni grë zha non lo menquiedz, laa zho pcaalsa ga.

⁵⁴ Ye Pedr, maase zit zit nal Pedr laa Pedr bdziñ xley men co. Bdziñ Pedr, güeysobga Pedr lo grë zha ne ndxienap, lëétaque laa zho quiadzëe lo gui.

⁵⁵ Grë pxoz co, grë zha ne nac zhiwx-tis zha Israel, laa zho ndxie nëz len yu co, quiaguib zho dien pe yquiaaqui zho gnab zho guet Jesús, quiaguib zho dien pe dol ne ycaadz zho me; per rdziel zho dien pew. ⁵⁶ Nzian zha ne pquidie rëb zho znu nac ncuaañe noyün me, per rrieequiad xtiidz zho; sac zhaase zhaase rnee zho. ⁵⁷ Tibaque zeene guso blalaa zho, bnexuu zho rëb zho:

⁵⁸ —Bdzion no gon rëb me laa me ctix-che yadoo, lozh ga tsonaque ngbidz gzaalo me stiba; per led miechdraa nzaaw.

⁵⁹ Niicle scaw, rzëdaque xtiidz zho tipse.

⁶⁰ Dzigo hor co bzoli men ne nac pxoz nroob, bzo me glowtaa lo grë miech co, bnabdiidz me lo Jesús rëb me:

—¿Pe nacne rquiabd luu? ¿Diidzli dzigo lëe nac grë mine rnee zho!

⁶¹ Dzese zo Jesús ib rquiabd me. Bi-ireque men co bnabdiidz me stib rëb me: —¿Nligaa cho nac luu? Bnë tel nli Xpëéd Dios nac luu, Men ne nacle diidz ga cxeel me lo guidzliu.

⁶² Dzigo pquiab Jesús rëb me:

—Nliw, naa nac men co. Naa ne nac naa Men ne pxeel Dios, bii zan to ganle zeene laa naa zoob cue Dios nëz derech, ni zeene laa naa guieet gbaa zialzëeb naa lo xcow.

⁶³ Horco ptsiez pxoz nroob co xab me, sac blëe me bin me sca rëb Jesús.

—¿Pe mazdraa textigw ne racladz ne? —rëb me—, ⁶⁴ laa to binle ganle zha rzë-taa xtiidz me noguitnie me Dios. ¿Pe gnë to na zha gac me?

Grëse zho pquiab rëb zho, ib rieguiala guet me.

⁶⁵ Dzigo hor co blalaa zho laa zho psilo notsuc lo me. Pxidoo zho lo me ni rdeed puñet zho me, lozh ga rnee zho:

—Bnë dien, ¿cho ga bdiñ luu?

Ye grë zha ne quianap ga, rgap zho lo me.

Rëb Pedr runbeyd Pedr Jesús

(Mt. 26:69-75; Lc. 22:56-62;
Jn. 18:15-18, 25-29)

⁶⁶Laa Pedr bii zoque ley. Ga zo Pedr, zeene laa tib wnaa ne nac zhicriad men nabey co bdiñ; ⁶⁷gon me laa Pedr zob gax lo gui nodzëë Pedr. Dze rwi me lo Pedr, tibaque zeene rëb me:

—¿Ye luu lëë rzënie Jesús, men Nazaret ne bdiñnie zho i?

⁶⁸Per bneelid Pedr.

—Dieen pe rool luu —rëb Pedr—. Runbeyd naa men co.

Brieega Pedr zie Pedr nëz ro zawan, lëëtaque hor co pcuedz tib gall. ⁶⁹Dzeque rwi wnaa co lo Pedr, dzigo rëbchaa me lo grë zha ne ndxie ga:

—¿Lëëw, zha ne rzënie me nac mgui qui!

⁷⁰Biire Pedr rëb Pedr runbeyd Pedr me. Wdzeepaa goca, biire zha ne ndxie ga rëb zho lo Pedr:

—Ne nligaa, ye luu rzënie men co. ¿Zha Galilé name nac luu!

⁷¹Dzigo psilo Pedr rzeet Pedr Dios nee Pedr runbeyd Pedr Jesús, haxta nee Pedr:

—¿Dios zobwi ganle, telne rned naa di-dizli, maase cuibdee naa!

⁷²Lëëtaque hor co laa gall pcuedz stib. Dzigoraa psoladz Pedr xtiidz Jesús zeen rëb me lo Pedr: “Gardle grop gall, tsonle vult rëb luu runbeyd luu naa.” Dzigo mbanse rac Pedr, psilo Pedr biin Pedr guielnë co.

Güeynie zho Jesús lo Pilat

(Mt. 27:1-2, 11-14;
Lc. 23:1-5; Jn. 18:28-38)

15 Ziadyiinile liuw, scase bii nchool rnav, wbiire pcaalsa grë pxoz non grë zho zha ne rnabey lo maistr ley,

grë zha non lo menguietz ni grë zha ne nac zhiwxtis zho. Blozhse bnediidz zho, laa zho pxidoo Jesús güeyсан zho me lo Pilat men ne nac gobernador.

²Bdiñ me lo Pilat, bnabdiidz Pilat rëb Pilat lo me:

—¿Pe nli na luu nac zhirey zha Israel? Pquiab me rëb me:

—Nliw.

³Tibaque quia grë zha ne nac pxoz non, rzadraa grë ncuaane rcaadz zho me. ⁴Nacne wbiire Pilat bnabdiidz Pilat lo me, rëb Pilat:

—¿Pe nacne rquiabd luu? Bui ganle zha nactaa grë ncuaane rcaadzdoł zho luu.

⁵Bzee zdoo Pilat gon Pilat ible pquiabd me.

Bnab zho guet Jesús

(Mt. 27:15-31; Lc. 23:13-25;
Jn. 18:38-19:16)

⁶Gzobse lni Pascw rsilaa Pilat tib zha ne no ladzguiib, tel cho zha ne gnabtaa menguietz laa. ⁷Len dze co no tib mgui lë Barrabás ladzguiib, ni zla zha ntseeb ne nacgza me, laa zho no ga sac nzian zha ne beet zho zeene gocntseeb zho lo gobiern. ⁸Nacne psilo grë miech co, rnab zho lo Pilat csilaa Pilat tib zha ne no ladzguiib zigne runtaque Pilat grëraa iz.

⁹Dzigo bnabdiidz Pilat lo zho, rëb Pilat:

—¿Cho racladz to csilaa naa? ¿Pe silaa naa men ne rnee zho zhirey to nu?

¹⁰Sca rëb Pilat lo zho, sac nanle me niapse por rlëë grë pxoz non co ran zho Jesús gane bnabey zho bgaa me güeyсан zho me ga. ¹¹Per lel psilo grë miech co rnab zho csilaa Pilat Barrabás; ni lëëque grë pxoz co pquiil zho. ¹²Dzigo rëb Pilat lo zho:

—¿Zha dzigo racladz to gac men rnee zho zhirey to nu?

¹³Pquiab be grë miech co, roptsie zho rnee zho:

—¡Bnabey yquia me lo cruz!

¹⁴—¿Pe nac falt ne been me? —rëb Pilat—. ¿Pe nacne racladz to yquia me lo cruz?

Biire zho roptsie zho rnee zho:

—¡Bnabey yquia me lo cruz!

¹⁵Goñ Pilat zha rac zho ni racladzaque me guianzniiu me lo zho, nacne mazd bzoob me xtiidz zho, bnabey me blaa Barrabás; laa Jesús, blozhse bnabey me bdiñ zho Jesús laa me been Jesús nregar lo grë menguiib ne tsiequiaa me lo cruz.

¹⁶Biire grë menguiib co bzëëbnie zho Jesús nëz len yulow, ga pcaalsa grëraa menguiib ne nacgrë zho. ¹⁷Psilo zho rguitnie zho me, bgacw zho me tib lar morad zig rna lar ne racw grë rey, ni bzieecw zho bla lë yag guiets bzoob zhow guic me, zig rzob coron guic grë rey. ¹⁸Dzigo psilo zho nguiedz roptsie zho rnee zho:

—¡Golwi ganle zha ractaa zhirey zha Israel!

¹⁹Bzhen zho tib goobgui, rdeed zhow guic me, rtsuc zho lo me, rquiaalo zho rquiitgzhìb zho lo me zig rquiitgzhìb zho lo zha non.

Güeyquiaa zho Jesús lo cruz

(Mt. 27:32-44;

Lc. 23:26-43; Jn. 19:17-27)

²⁰Blozhse sca bdziitnie zho me, laa zho blee lar morad ne nacw me ga, biire zho bgacw zho me miñe nac xab me; dzigo laa zho brienie me ga zienie zho me zaatne yquia me lo cruz.

²¹Nëz zienie zho me, bdziel zho tib mgui Ciren lë Simón (lëë pxoz Lejandr ga grop Ruf), znu ziaad me wbire me dan. Dzigo bnabey zho me bi me zhiczuz Jesús.

²²Zeene bdziñnie zho Jesús zaatne lë Gólgota (nac diidz co zig nac ne rnee ne “Gui Beerguic Ngutoo”); ²³ga bdeed zho nziu notsa guizh rmed ne lë mirr, nan

zho nie mew, per god mew. ²⁴Dzigo laa zho pquiaa me lo cruz.

Blozhse pquiaa zho me lo cruz, bzhen zho tib xab me pchug zhow, biaannie zho tib lëgaw tib tib zho, laa stiba bio zho rif. ²⁵Zig hor wxeeren ga pquiaa zho me lo cruz.

²⁶Glaa guic cruz ne pquiaa zho me ga, ga pquiaa zho bla lan diidz zaatne rnee pe nacne sca psacsi zho me, rneew: “LËË MEN RII QUIA NU, PORNE NAC ME ZHIREY ZHA ISRAEL.” ²⁷Ye chop ngbaan pquiaagza zho me lo cruz, tibga zhiczuz zho bzo tib nëz cho zhiczuz me. ²⁸[Ga brieequia miñe raquiet lo Xtiidz Dios, zaatne rnee: “Bloo zho me lad zha ntseeb.”]

²⁹Grë miech ne rded zaatne quia me lo cruz ga, runnguzee zho me, rzhidznie zho me, haxta rdzi guic zho rnee zho lo me:

—¡Pe led rëb luu lëë, laa luu ntsil yadoo ni tsonaque ngbidz nzaalo luuw stib! ³⁰Nana zho, ¡pe gacd lëëque luu bla luu lo caxtigw qui, biet lo cruz qui!

³¹Scasaque grë pxoz non ni grë maistr ley, rzhidznie zho me; rnee zho:

—Stib miech scataa beñguiac me, stib miech scataa bla me, pe nac dzigo rriielod me gla me me. ³²¡Telne nli me nac Men ne zëëble diidz ga cxeel Dios, telne nli me nac zhirey ne, niinagazh quiet me lo cruz; zeena gliladz ne me!

Ye zha ne quiagza me lo cruz ga, rbidzgo zho lo me.

Gut Jesús

(Mt. 27:45-56;

Lc. 23:44-49; Jn. 19:28-30)

³³Goļ groļ dzew, tibaque zeene goc tib ncow dipse lo guidzliu, haxta las tres biala biini stib. ³⁴Horco nguiedz zëëb tsi Jesús, rnee me:

—¡Eloi, Eloi! ¿Lama sabactani?

(Diidz co nac zig nacne rnee ne: ¡Luuse name nac xDios naa! ¿Pe nacne psaan luu naa?)

³⁵ Grè zha ne ndxie ga, zeene bin zho sca rbedz me, no zho nan Lí, men ne biadteed xtiidz Dios padzeela, men co rbedz me. ³⁶ Dzigo rias tib zho güeygadz tib lè zhiil lo nziu bla, bzoob zhow tib guic goobgui pquiaa zhow ro me.

—¡Gotsaa csaan —rnee zho—, nu dzian ne dien pe ziaad Lí guiaadlit Lí me lo cruz!

³⁷ Tibaque zeene pquiaa me stib redz nroob, znuse blozh me.

³⁸ Lëëtaaque laa me nolozh, zeene briez nzoli lar nroob ne quia len yadoo, groltaa goca. ³⁹ Gax lo me ga zo men ne rnabey lo grè menguiib co, zeene gon men co zha gut me, rëbchaa me:

—¡Ne nligaa, Xpëed Dios nac men qui!

⁴⁰ Ye blalaa men wnaa güeyso ga, zit zo zho rwi zho; lad co no Marí Magdal, Salomé ni Marí ne nac xniaa Jacob niab grop José. ⁴¹ Nzianlaa nac zho, lëë grè wnaa co been xyudar me len dze ne güeyted me dib xtan zha Galilé; ni zla-gaa zha ne güeynal zhits me zeene bdzin me Jerusalén.

Bgueets Jesús

(Mt. 27:57-61;

Lc. 23:50-56; Jn. 19:38-42)

⁴²⁻⁴³ Lëëtaaque dze co nac vispr dze ne rdziiladz zho lo dziin. Zeene laa dze bdzepaa, dzigo güey José (men Arimaté) lo Pilat bnaab me diidzbeey tsiequeets me Jesús. Glo zoot me tsied me, per tibaque bloo me tib valor güey me; niicle ne tib zha non nac me lad zhiwxtis zha Israel, ye me quiambëz gdzin dze ne gnabey Dios.

⁴⁴ Bzee zdoo Pilat zeene bin me laa Jesús gutle. Bnabey me gocredz zha ne rnabey lo menguiib ne quianap Jesús; ⁴⁵ haxta bdzinraa men co rëb nliw, dzig-

oraab deed me diidz tselit José Jesús lo cruz.

⁴⁶ Nacne güey José, güeyysi me tib lë lar nroob. Zeene blozh blit me Jesús lo cruz pcheļ me Jesús lar co, dzigo güeyxob me me tib len baa ne ndieen tib cho quie. Blozh ga, psodan me tib quie nroob psioog me ro baa co.

⁴⁷ Ga zo Marí Magdal ni Marí xniaa José, gon zho pa lo bgueets me.

BRIEEBAN JESUS

(Mt. 28:1-10, 16-20;

Lc. 24:1-53; Jn. 20:1-23)

16 Bdze dze dze ne rdziiladz zho lo dziin, güey Marí Magdal, Salomé, ni Marí xniaa Jacob güeyysi zho grè nceit nex ne tsietëëb zho lad xcuerp Jesús. ² Laa zeene biini liu, dze ne rzobni zhm-al, silgaw loxaque ziaadlan ngbidza laa gza wnaa co brieel laa zho zie ro baan Jesús.

³ Nëz no zho, rnabdiidzlsa zho dien zha gdioob quie nroob ne nioog ro baa, cho siguiel coba. ⁴ Ni zeene bdzin zho, gon zho laa quie co bdiooble.

⁵ Laa zho bzëeb len baa, zeene gon zho nëz derech laa tib mguu nguiieg zob ga, nacw me tib lar nool, dib nquitsbiese rna lar co. Bdzieb zho gon zho me; ⁶ dzigo rëbchaa me lo zho:

—Gdziebde to. ¿Jesús lëë, men Nazaret ne pquiaa zho lo cruz, men co ziaadguib to? Guiendle me nu, ¡laa me brieebanle! Golwi ganle nu nac zaatne pxob zho me. ⁷ Goltsie, golguiab lo Pedr ni lo grëraa xpëedsuel me tsie zho Galilé, ga tsiedzieel zho me zigne rëble me lo zho glo.

⁸ Rias gza wnaa co laa zho brieel ga, masaque rzhidz zho rdzieb zho. Lo dzeb co ni par gnee zho gacd.

⁹ [Dze ne rzobni zhm-al ga, sil co brieeban Jesús, ni Marí Magdal nac zha ne gloopaa gon me; lëë Marí co ga beenguiac me zeene benxoon me gadz mendox

ne nosacsi Marí. ¹⁰Dzigo güey Marí güeynie Marí diidz lo grë zha ne bzënie me ga. Lëëtaaque laa zho ndxie mban rac zho, roon zho no zho xquiełnë me. ¹¹Niicle bin zho rëb Marí laa me brieëbanle, gonlo Marí me; per biladzd zhow.

¹²Bded ga, brieëquia me lo schop xpëëdscuel me lëëtaaque no zho nëz zie zho dan. ¹³Dzigo güey zho güeynie zho diidz lo grëraa zha ne nacgza zho; per niicle xtiidz grop zha co biladzd zho.

¹⁴Laa stibtaa vuelt, lëëtaaque ndziib zho lo mezh no zho wagw gza tsiiptib zho, tibaque zeene laa me brieëquia; dzigo goctox me lo zho sac gon me ib biladzd zho xtiidz me; ni gon me scataa nad zdoo zho, sac niicle güey zha ne gon me güeynie zho diidz ne nli brieëban me, ni biladzd zhow. ¹⁵Ni rëb me lo zho:

—Goltsie dipse lo guidzliu, goltsieseed miech Xtiidz Ndzon Dios. ¹⁶Grëse zha ne

dib zdoo gliladza ni chobnis zho, scaania Dios zho; sangue zha ne gliladzda, laa zho bnitole ga. ¹⁷⁻¹⁸Grë zha ne sca dib zdoo gliladz naa: znee zho stib diidz ne nreed zho. Niicle xen zho grë meel ntseeb, concuaangaa miech zho, ib peet gacd zho. Ni zeene cxobnia zho guic grë men rzacnë, zunguiac zho zho; grë men-dox ne noguitnie miech, zeene gzeet zho lë naa zuncxoon zho ma.

¹⁹Blozhse sca bnee me lo zho, laa me zey gbaa bzob me cue Dios nëz derech.

²⁰Dzigo grëse xpëëdscuel me laa zho brieë, brieets bliaal zho zieseed zho miech Xtiidz Dios. Ni me nac men ne noyacniën zho run zho grë milagr nroob, zeena glu ne nli Xtiidz me nac mine noseed zho miech.]

XTIIDZ NDZON DIOS MINE PQUIAA

LUC

1 ¡Diuzh Tiofl!

¹ Nanle luu ganle, nole bla zha ne bioxco pquiaa zho grè ncuaañe goc zeene biaad Jesús meñ ne pxeel Dios ga. ²Ncuaañe nlipaa goca, grè ncuaañe pquiaa zho ga, laaw pquiaa zho zigne rzodiidzse miecha len dze rii, zigne rzodiidzsegaa zha ne bzèniepaa mew, zha ne pso me noneew lo miech.

³Yeque naa pquiaa naa wen wen bn-abdiidz naa, bleeni naa diidz grèse dien zha psilo grè ncuaañ co; ni niina laa naa rquiaw zigne gocsew laaw rxel naa lo luu. Sac rien naa ib nonguiela gacnan luuw; ⁴zeena lozh gacnan luu zha nac diidzli rii, wseed ne blu zho lo luu i.

⁵Len dze ne nac Herod rey rnabey me dib xtan zha Judé, len dze co no tib pxoz lè Zacarí, me nac tib zha ne nacgrè “Zha Abí”. Niicle tsiel mew, zha xtií pxoz Aarón ziaad wnaa co, lè me Lisabet.

⁶Zigtaa Zacaríw, zigtaa Lisabeta, noxco me mine rnabey Dios, mban mew zigne naca, ni tib xley Dios rguuitsd me. ⁷Meñ gol-le nac me grop me, per ni tib mëéd quianied me, sac niaad Lisabet gapd me mëéd.

⁸Laa tib dzew bgaa grè zha ne nacgrè Zacarí gun zho dziin len yadoo. ⁹Nac xcostumbr grè zha ne nac pxoz, rio zho tib rif dien chopaa yгаа tsielaadz goxyaal len yadoo, dzigo bgaa Zacarí. ¹⁰Goxyaal co nolaadz me len yadoo, laa grè miech ne ndxie nëz ley nonabgaa lo Dios, ¹¹tibaque zeene brieequia tib xanjl Dios bzo cue pcoog nëz derech, zaatne nozëg me yaal ga. ¹²Zeene gon me anjl co bdzieb me, rdzieldraa me zha gun me lo dzeb co. ¹³Dzigo rëb anjl co lo me:

—¡Gdzieebd luu! Diidzse zialnie naa lo luu, gacnan luu ganle mine bñab luu lo Dios ga, pquiaadiag mew; gane niina laa tsiel luu gap tib mëédbgui. Zeene gal win, Juan cueelè to win. ¹⁴Tib guieibley nroob gac win lo to, niicle lo grèra-gaa miecha, ¹⁵sac tib meñ nziuu gac win lo Dios. Zeene gac win zha broob, ni tib ro nziuu guied win, per ni vin yquiaarod win; ansraa gal win, laa Espíritu Sant nacniele win. ¹⁶Win gac meñ ne co guic nzian grè zha Israel, gbiire gbig zho lo Dios, meñ ne rnabey zho. ¹⁷Zigne goc Lí, meñ ne biaad pteed xtiidz me padzeela, sca gac win tedner win lo me, nroob poder ne gap win. Win gnee lo grè miech rii, gbiire gleynie zho me zigne goc xmengol zho zha ne bleynie me; csaan zho grè xquieintseeb zho, gban zho zigne racladz me; zeena niowse gac zho ycaania zho me.

¹⁸Pquiab Zacarí rëb Zacarí lo anjl co:

—¡Ncuaañe gacd i gon mee luu! Zigtaa naaw, zigtaa tsiel naaw, mengol-le nac no.

¹⁹Rëbchaa anjl co:

—Bien ganle anjl Gabriel nu quianee lo luu, anjl ne tibaque zo lo Dios. Me pxeel naa zialnie naa diidz rii. ²⁰Per ne squi rliladz luuw, na laa luu guiaan ngop, haxta gal dze ne gac mine me naa lo luu nu, dze co glan xtiidz luu stib.

²¹Grè miech ne ndxie quianab lo Dios ga, quiambëz zho Zacarí, rnabdiidzlsa zho pe goc me, sac ran zho rried me zatne ziezëg me yaal ga. ²²Zeene briece me, gon zho gacdraa gnee me, dzigo bien zho no pe blu Dios lo me ga. Tel pe racladz me gnee me, niapse señ rlu me.

²³Bzase dze ne been me dziin len yadoo, dzigo laa me zey lidz me. ²⁴Goca bla ngbidz, laa mëéd co pquialo zdoos tsiel me.

Dipse len gaay mëé bio zhuz co ro yu, ib bried me, rley me mee me:

²⁵—¡Zha wentaa Dios, bneedz me didz bdziñ dze yquianie naa mëéd rii, zeena gzhidzniedraa miech naa!

Güeynie tib anjl diidz laa Jesús gac mëéd

²⁶Goc xoop mëé zoney Lisabet mëéd, pxeel Dios anjl co stib güey me Nazaret, guiedz ne ndxie xtan zha Galilé. ²⁷Ga no tib ndzoop nguieg lè Marí, len dze co no xtiidz ndzoop co ctsieelna ndzoop tib zha xtií rey David, lè José. ²⁸Bdziñ anjl co zaatne no ndzoop, pquiaabdiuzh me ndzoop, rëb me:

—¡Dichos luu gon, sac tib zha nziuu nac luu lo Dios! Me quianap luu.

²⁹Zeene gon Marí anjl co, ni gon Marí zha rnee me, bzee zdoo Marí, riend Marí dien pe nac scataa rzë xtiidz me. ³⁰Dzigo rëbchaa me lo Marí:

—¡Gdzieebd luu! Laa Dios gon bzooblo luu ygaa luu tib guielnzaac nroob. ³¹Zdoo luu yquiaalo tib mëédbgui, zeene laa win gal, JESUS cueelë luu win. ³²Tib men nroob gac win, zien miech ganle Xpëéd Dios ro ne no gbaa nac win; ni so me win gnabey win zig bnabey xmengol win David. ³³Win gnabey lo grëse zha Israel, ni gdziñd dze ne lozh xquielnabey win.

³⁴Pquiab Marí rëb Marí lo anjl co:

—¡Mëéd ye? ¿Per zha grieelo gap naa mëéd, ni tib naa zo nu?

³⁵Rëbchaa anjl co:

—Niapse por poder ne rap Dios gac min co. Zeene laa Espíritu Sant guiaad gacnie luu, hor co laa poder co gacnie luu, laa mëéd co yquiaalo zdoo luu; gacxe waa Xpëéd Dios gunbey miech win, mine rnabey Dios min co gun win. ³⁶Ye belyeen luu Lisabet, niina lo guielgol-le laa tib mëéd pquialo zdoo me; zëéb diidz ib grielod gap me mëéd, per na racle xoop mëé zoney me mëéd, ³⁷sac par Dios tsod ncuane grielod gac.

³⁸Dzigo rëb Marí:

—Tel scaw, mine rnee luu i, maase gaca. Laa naa zo nu par gon naa mine gnabeytaa Dios naa.

Blozhse ga, laa anjl co zey.

Güeygan Marí Lisabet

^{39–40}Goc bla dzew, briece Marí ga zie me ziegán me Lisabet tib guiedz win ne ndxie gui glaa ne nac xtan zha Judé. ⁴¹Bdziñ me, wbig me pquiaabdiuzh me Lisabet. Bdiuzh co bnee me, zeene bi-asoli xpëéd Lisabet zdoo Lisabet; dzigo hor co bdeed Espíritu Sant guielbiini lo Lisabet, ⁴²nguietz bnee Lisabet rëb me lo Marí:

—¡Dichos luu Marí bgaa luu guielnzaac qui! Sac gon, lo grëraa no nac no men wnaa, luu bzooblo Dios. Mëéd ne zoney luu i, zha nziuu nac win lo me. ⁴³¡Ib guiaanladzd naa dze rii, znu biaad luu nac luu xniaa men ne rnabey naa, bi-aadgan luu naa! ⁴⁴Haxta mëéd ne zoney naa nu, rley win biasoli win zdoo naa, zeene pquiaabdiuzh luu naa. ⁴⁵¡Dichos luu, bin luu mine në Dios, ni biladz luu zun mew!

⁴⁶Dzigo hor co bnee Marí rëb me:

¡Men nroob nac Dios! ¡Gdib zdoo naa roolnie naa me!

^{47–48}Rleynie naa me nac me men ne psilaa naa,

sac gon niicle peet nond naa, tib ngundziin winse nac naa lo me, per laa me bzooblo naa.

Grë miech, zigtaa len dze riiw, zigtaa len dze ne ziaadragaaw, ziaab zho naa nac tib wnaa ne mazdraa dichos.

⁴⁹Ne nligaa zha nactaa guielnzaac rii bneedz me lo naa.

Men ro, men nroob nac me, ¡guiendraa cho zig me!

⁵⁰Grëse miecha, zha ne rioxco rquiaadiag mine rnabey me, tibaque racnie me zho, ib rsaand me zho.

⁵¹ ¡Golwi ganle zha nactaa grë ncuaañe run me!

Grë ncuaañe no guic zha niats gun zho, bñitlo mew,

⁵² ptiche me grë zha ne zob rnabey.

Laa grë zha ndooladz, zha ne rzac miech peet nond,

beñnon me zho.

⁵³ Grë zha mban ne guiend pe yquiuñ, nroob guieñzaac ne bdeed me lo zho,

laa grë zha ne rapchen, scase bzonëz me zho.

⁵⁴ ¡Pe zhidaa ziyacnie me grë zha ne nac xtií Israel, mengol ne goc zig tib ngundziin lo me ga! ¡Tibaque rlu me rleynie me zho!

⁵⁵ Ib biaanladzd me xtiidz me mine bnee me lo pxozgol ne Abraham, zeene rëb me gdziñd dze ne csaan me Abraham, ni grëraa zha ne grieequia lo xtií Abraham.

⁵⁶ Maase tson mëë biaan Marí ga blëz me lo Lisabet, dzigoraa wbi me ga bdziñ me lidz me stib.

Gol xpëed Lisabet

⁵⁷ Bdziñ dzew, laa xpëed Lisabet bza mëë, laa me gop win. ⁵⁸ Grë zha ne no gax lidz me, grë zha ne nac menlidz me, zeene bin zho scataa pquia zdoo Dios me bdeed Dios mëëd co lo me, rley zho güeygan zho me.

⁵⁹ Dze ne goc mëëdbgui yeen co xon ngbidz, blalaa zha ne güeynal zhits pxoz win, zhits xniaa win güeynie zho win bio win bey ne rio xpëëdbgui zha Israel, parne glu lo Dios ngab win. Tibaque nan zho Zacarí nrieele win, zigne lëque pxoz win, haxta scale nonee zho lo win, ⁶⁰ per hor co rëb Lisabet, led scad gac lë win, Juan grieele win.

⁶¹ Dzigo pquiab zho rëb zho:

—¡Pe nacne sca grieele win? Ni tib menlidz to lëd Juan.

⁶² Bnabdiidzaque zho lo pxoz win, blu zho señ lo me dien zha racladz me gac lë win. ⁶³ Dzigo bnab me bdeed zho tib lë lo zaatne yquiaa me; bzee zdoo zho zeene blozh pquiaa me gon zho rnee lo co: “Juan grieele win.” ⁶⁴ Loxaque blozh dze sca pquiaa me, zeene laa me wbiire bnee stib, psilo me rdeed me xquizh lo Dios. ⁶⁵ Grë zha ne zo ga, zha ne runbey me, zeene gon zhow, per nli rzee zdoo zho.

(Nëzrii nëzrec bzhoon diidz laa mëëd co gol, grëse guiedz ne ndxie gui glaa co gocnan miecha. ⁶⁶ Zha ne rona, rza zdoo zho rnee zho: “¡Bay cho gac mëdeyen co?” Sac nligaa rlu nacie Dios win.)

⁶⁷ Horco bdeed Espiritu Sant guieñbiini lo Zacarí, psilo me bnee me rëb me:

⁶⁸ ¡Xquizh xquieñzaac men nroob ne rnabey, men ne nac xDios ne nac ne zha Israel!

Sac gon laa me ziaad, ziaadgan me ne, ziadbee me ne lo xquieñe ne.

⁶⁹ Nasi laa me pxeel men nroob ne ziaad-silaa ne,

lëë men co ga no grieequia lo zha xtií David, men ne been xtsiin me ga.

⁷⁰ Padzeelale bzeet me cxeel me men co, grë zha ne bиаad pteed xtiidz me, bzeet zhow.

⁷¹ Rëb zho, ib sxeel me men ne guiaadsi-laa ne ladznia zha ne nosacsi ne, zha ne rlëë lo ne.

⁷² Sac ib gdziñd dze csaan me grë zha xtií pxozgol ne, rquianëpaa zdoo me zho.

Ib guiaanladzd me mine rëb me lo Abraham,

⁷³ zeene rëb me laa me cxeel men ne csilaa ne,

⁷⁴ zeena dziodzebdras ne lo zha ne rlëë lo ne, lo zha ne rsacsi ne; sinque ine tibli gac ne dziuun ne mine rnabey me.

⁷⁵ Gzataa dze ne gneedz me guieñmban lo ne,

ine mbe zdoo ne, dziuun ne mine rleynie me.

⁷⁶Luu gon xin, bzooblo Dios ro ne zob gbaa, cteed xtiidz me lo miech,

luu tedner tsienee luu lo zho, laa men co no guiaad.

⁷⁷Luu gnee lo grë zha Israel, guien zho ganle zha gun Dios zho perdon, parne ycaania me zho.

⁷⁸Ne nligaa rleynie me ne, rquia zdoo me ne,

gane laa me cxeel Xpëed me, men co gac zig tib biini,

⁷⁹Biini co gziini lo grë zha ne mban lo guielcow,

zeena biini co glu nëz lo ne, guio ne nëz ne peet zhgab, peet dzeb guien.

⁸⁰Zigse zie dzew, scase scase zieroob mëdyeen co, ni scaquegaa dib zdoo win rleynie win Dios. Zeene laa win broobpaa, dzigo güey win bio win tib dan zit, haxta bdziñ dze ne laa win psilo pseed miech laa win blulo lo zho.

Gol Jesús

(Mt. 1:18-25)

2Lëetaaque len dze co, laa August, rey nroob ne zob Roma, bnabey top lë grëse miech ne no dib dan ne rnabey me, par gacnan me dien palal zho. ²Lëe primer vuelt ga ptop zho lë miech, lëe iz co zob men ne lë Cirein zobnabey me guiedz Siria.

³Bnabey August grëse miech zha ne no stib ladz ben, laa zho no tsie zaatne nappaa ladz zho tsiedeed zho lë zho, parne ga ygab zho. ⁴Min co nagon nacne briece José guiedz Nazaret (xtan Galilé) grop me Marí zie me Belén (xtan Judé). Laa me zie ga, sac ga goc ladz xmengol me rey David. ⁵Gard ctsieelniapaa me Marí, per nole xtiidz me grop me. Len dze co ziaadyobpaa gal xpëed Marí.

⁶⁻⁷Bdziñ me Belén, bgaadraa me zaatne nrieelo mbëz me len yu, lega nac ti len lidz ma bdeed zho blëz me. Lëe-

taaque bdziñ me ga, laa mëed co gol. Racse Marí pchel me win lar, bdiix me win tib len yag ne row ma guizh; lëe mëedglo ga lo me.

⁸Guieel co, blalaa zha ne nac baxtor, laa zho ndxie quianap zho xpëcwxiil zho dan, ⁹tibaque zeene briequia tib xanjl Dios lo zho, dipse zaatne ndxie zho ga biab tib biini nroob. Zeene gon zho anjl co, gon zho biini nroob co, per nli bdzieb zho. ¹⁰Dzigo bnee anjl co, rëb me lo zho:

—¡Gdziebde to! ¡Golgon diidz cub ne ganle zialnie naa lo to nu! ¡Tib guielb-ley nroob gac diidz rii lo grëse miech!

¹¹Men ne gon quiambëz to ga guiaad csilaa to, laa me blansole lo guidzliu. Me nac Men ne zëëble diidz ga cxeel Dios, me nac men ndzon ne rnabey. Belén, zaatne goc ladz rey David, ga gol me naguieel. ¹²Goltsie, zaatne tsiedziel to tib mëëdbgui yeen, nriele win lar zhoob win len yag ne row ma guizh, lëe me ga.

¹³Tibaque zeene gon zho laa stib dzoon anjl briequia gocgrë anjl ne quinee lo zho ga, psilo grë anjl co roolnie zho Dios, rnee zho:

¹⁴¡Haxta zaatne glaaraa gbaa, nozhoobnen ganle pa lotaa men nroob nac Dios!

¡Nasi, grëse miech zrieelo guiaanwen zho lo me; zdoo me rala laa me nobedz zho!

¹⁵Zeene laa grë anjl co zey gbaa stib, psilo grë baxtor co rnee zho:

—¡Niinaga golgotsaa guio Belén! ¡Gotsaa guiowi ne dien, zeena dzian ne mine biaadnie anjl co diidz lo ne nu!

¹⁶Lëëled bio zho nëz laa zho zie. Bdziñ zho zaatne blëz José ga grop Marí, nligaa laa mëdyeen co nix ga, nixse win tib len yag ne row ma guizh. ¹⁷Dzigo bzodiidz zho grëse zha rëb anjl co lo zho, zeene güeynie me diidz laa win gol.

¹⁸⁻¹⁹Grë zha ne bina, per nli rzee zdoo zho; laa Marí nosew zdoo me, tibaque rsoladz mew.

²⁰ Blozh ga, laa zho bio nēz ziequianap zho xma zho stib. Ine roolnie zho Dios, rdeed zho xquizh lo me sca pxeel me xanj me güeynie diidz lo zho, rley zho sac brieelo gon zho mëdyeen co.

²¹ Dze ne goc xon ngbidz gol win, dze co bio win bey ne rio xpëëdbgui zha Israel, par glu xnēz Dios ngab zho; dze co-qew bleelē zho win JESUS, zigne rēb xanj Dios zeene güeynie me diidz ne laa win gac mëed lo Marí.

Güeynie zho Jesús yadoo

²²⁻²⁴ Nac ley ne psan Moisés lo zha Israel, wnaa ne sca rap mëëdbgui, zeene rac zho tap zhal, none tsienie zho chop ma cogon zho len yadoo; yase tsienie zho tib nēz coc, tib nēzga palom. Ni rnabeya: “Grēse mëëdbgui ne rac mëëdglo, ib none gdeed zho win gac win tib zha ne gun xtsiin Dios.” Nacne zeene bza dze co, dzigo brie Marí zie me Jerusalén grop me José, zienie me mëdyeen co yadoo csan me win ladznia Dios; lēē nēzle ga zienieque me gon ne no gdeed me ga.

²⁵ Lēētaaque dze ne bdzinne zho win len yadoo, laa tib men lē Simeón no ga. Men Jerusalén nac men co, rleynie me Dios, rioxco me mban me zigne rnabey Dios, ni nacie Espíritu Sant me. Quiambēz me gan me Men ne nole diidz ga cxeel Dios csilaa zha Israel, ²⁶ sac rēble Espíritu Sant lo me ible laa me no gan men co. ²⁷ Laa dze co, Espíritu Santaque psiaab guic me zie me yadoo. Nacne lēētaaque no me len yadoo, laa zho bdzinne mëdyeen co ga, ziesan zho win ladznia Dios zigne rnabey ley. ²⁸ Dzigo me wbig bdeedz win, rdeed me xquizh lo Dios, rēb me:

²⁹ Xquizh xquielnaac luu Dios, mine nē luu lo zhingundziin win luu nu, laaw goc.

¡Nasi zacle nagon guiaad-xi luu naa, haxta gley naa gbi naa lo guidzliu ri!

³⁰⁻³¹ ¡Men ne nacle diidz cxeel luu guiaadsilaa miech lo xtol zho, grop lo naa laa naa ran me niina!

³² ¡Grēse miech ne ndxie lo guidzliu, me nac biini ne gziini lo zho!

¡Me csannziuu zha Israel, ne nac zho zha ne ngab lo luu!

³³ Zeene gon Marí grop José scataa rzē grē diidz ne rnee Simeón rzeet Simeón mëdyeen co, bzee zdoo me. ³⁴ Dzigo bna Simeón lo Dios gacnie Dios me gza me mëdyeen co. Blozh ga, rēbcha Simeón lo xnai win:

—Tib guielbley nroob ne gac mëed ri lo zha Israel, por win ndal zho griee lo guielcow ne no zho, laa zho gbig lo Dios. Ni scagaa zrieequia zha ne glēenie win, per lēēque zha csacsi zho ga. Mban gac zdoo luu, nroob guielnē ne tso luu gan luu zha sac miech win. ³⁵ Ga glu ganle zha nac zdoo tib tib miech.

³⁶⁻³⁷ Ye tib zhuz gol lē An zo ga hor co. Tibaque no me yadoo, dze guieel roolnie me Dios, rcuan me ni rzodiidznie me Dios. Tib zhuz gola, len dze co rac tapgal tap iz biaan me viud. Nguieg me pt-sieelnia me, per loxaque gadz iz wbanie me tsiel me. Lēē pxoz me ga brieelē Fanuel, lēē zhey co ga nac zha xti Aser. Tib men ne rteed xtiidz Dios lo miech nac me, ³⁸ dzigo wbigaque me, psilo me rdeed me xquizh lo Dios; ni bzodiidz me lo grē zha ne ndxie ga, rēb me lēē mëdyeen co ga nac men ne quiambēz zho ga guiaadsilaa zho.

³⁹ Blozhse been José mine rnabey xley Dios grop me Marí, dzigo laa me wbi ga. Bdedraa ga, beynie me mëed co Nazaret, zaatne nac ladz me. ⁴⁰ Ga broob win, zigse zieroo win scase scase rac macis win, scase riabiiniraa win. Tibaque nacie Dios win.

Biaan Jesús len yadoo

⁴¹⁻⁴² Zeene bloozh Jesús tsiipchop iz, dzigo güey José grop me Marí güeynie

me win lni Pascw, lni nroob ne run zho Jerusalén. Gzobse iz rie me grop me, per iz cotaa laa me güeynie win, sac nac zhiwseed zha Israel, mëëdbgui ne rap lagga iz, zrieelele tsie zho lo lni co.

⁴³ Zeene laa lni co bded, laa me bio nëz grop me laa me wbi ga. Ib biënd me biaan win Jerusalén, ⁴⁴ tibaque güeynie guic me lad grëraa miech ne wbire lni, lad co zienal win. Laa me no nëz, zeene bdzetaa dzew, laa me psilo rguib win, bnabdiidz me lo grë zha lidz me, lo grë zha ne runbey me, ⁴⁵ per ni tib zho choot rdeete win diidz. Nacne wbireque me nëz Jerusalén stib, zieguib me win.

⁴⁶ Dze ne racle tson ngbidz blozh lniw, dzigora güeydziel me win len yadoo, laa win zob lo grë zha ne nac maistr ley, noquiaadiag win grë zhiwseed zho ni nzian grë ncuane rnabdiidz win lo zho. ⁴⁷ Rzee zdoo zho ran zho scataa nixbiini win, niicle zeene rnee wina, zeene rtsiregaa win lo xtiidz zho. ⁴⁸ Zeene gon me laa win zob lad grë men co, bzee zdoo me; dzigo rëbchaa xniaa win lo win:

—Xin, ¿pe nacne squi been luu? Ptseeb luu no gon, quia no grop no pxoz luu noguib no luu.

⁴⁹ Pquiab win rëb win:

—Nguibde to naa. ¿Pe rande to ib none gon naa xtsiin Pxoz naa?

⁵⁰ Ib biënd me pe nacne sca rëb win.

⁵¹ Dzigo laa win zienal zhits me, laa me zeynie win Nazaret; nose grë min co zdoo xniaa win.

Tib mëëd nguzobdiidz nac win, ron win xtiidz me. ⁵² Zigse zie dzew, laa win riabiiniraa, laa win noroobraa; rleynie Dios win, niiclegaa miecha rleynie zho win.

Psilo Juan Bautist noseed me miech

(Mt. 3:1-12; Mr. 1:1-8; Jn. 1:19-28)

3¹⁻² Bdzin dzew, laa Juan psilo pseed miech. Lëë len iz co rac tsiin iz zob men ne lë Tiber nac me rey, rnabey me

grë guiedz ne ngab lo zha Roma. Len dze co zob Pilat rnabey me grë guiedz ne ndxie nëz Judé, laa Herod zob rnabey grë guiedz ne ndxie nëz Galilé. Len dze coque zob bets Herod, men ne lë Lip rnabey me grë guiedz ne ndxie nëz Ituré ni nëz Traconit; laa Lisian rnabey grë guiedz ne ndxie nëz Abilin. Zha ne nac zhipxoz nroob zha Israel len dze co, nac Anás ni Caifás. Len dze copaa nagon güeynee Dios lo Juan (xpëëd Zacarí) dan ngan ne no Juan ga.

³ Nacne hor co psilo Juan güeyted me grë guiedz ne ndxie ro guiubee Jordán, rnee me lo grë miech co, csaan zho xquieintseeb zho gbig zho lo Dios ni chobnis zho, zeena csilaa Dios zho lo grë xtol zho. ⁴ Ga briequia mine bnee Isá, men ne biaad pteed xtiidz Dios, zeene znu pquiaa me:

Bii zon miech ganle zeene laa tib tsi men zëëb tib dan ngan, rnee me:

“Golzhixcuaa nëz ne ted men ne rnabey, golsaan grë guieintseeb ne run to.

⁵ Zaatne nac len blë, golcodzëëw, grë gui glaa, grë gui las, golsiaablow.

Nëz ne niecw, nëz ne quiaya quiaguiet nac, golzhixcuaaw.

⁶ Grëse miech, laa zho gan men ne pxeel Dios ga ziaadsilaa zho.”

⁷ Zeene ran Juan laa miech rdzin lo me cchoobnis me zho, rnee me lo zho:

—¡Miech ngoopdol, masaque nac to zig nac meel! Nan to na lëë, loxaque chobnis to laa to laale lo grë guieinëdox ne ziaadyob guiaad. ⁸ Led scada gon, none ndzinli gban to zeena glu nlipaa psaan to xquieintseeb to. Ni gacniatsde to guiab to, loxaque por nase to zha xtii Abraham, laa Dios csilaale to; sac gneli naa lo to ganle, telne gacladz Dios, haxta grë quie zac gnabey me tsaalow miech ne gac zha xtii Abraham. ⁹ Nanle to ganle, grë yag nex ne rquiad nex lo, zeene ran zho sca naca, rchug zhow, rzëëg zhow; scadaa nagon sac grë zha ne

gband zigne racladz Dios, ib tedlaad zho lo gui; sac rrieequia laa me nzhenle xqui-ibiyag me, cchug me grë yag ne sca nac.

¹⁰ Dzigo rnabdiidz zho lo Juan, pe no gun zho parne ygaad zho grë guieñe co.

¹¹ Dzigo rquiab me rnee me lo zho:

—Telne quianie to chop lar ne racw to, none gdeed to tiba lo zha ne guieñd xab; telne quianiegaa to ncuaañe gow to, none gdeed to palala yquiin zha ne quianieda.

¹² Wbigaque bla recaudador ne zie chobnis, rnabdiidz zho dieñ pe gun zho.

¹³ Pquiab Juan, rëb Juan lo zho:

—Cuandraa to samiech to, mine rieguañse zho quizh zho, min co golnab lo zho.

¹⁴ Ye zla menguiib wbig, rnabdiidz zho rëb zho:

—¿Telzhe no waa, pe nac mine dziuun no?

Rquiab Juan rnee Juan lo zho:

—Ndzinli golgac, ib ctsebde to samiech to par dieñ pe gla to lo zho; zha ne peet xtold, ib yquiaaquide to zho ncuaañe beend zho. None sac zdoo to dimi ne quiaayazh to.

¹⁵ Nzian grë miech co quiambëznë zho gacnañ zho dieñ pe lëele Men ne bzooblo Dios ga cxeel me nac Juan. ¹⁶ Dzigo rëb Juan lo zho:

—Tib wrobnisse nu rnedz naa lo to, sangue men ne no guiaad ga Espiritu Sant gdeed me lo zha ne gliladz me; ni scagaa zha ne gliladzd me, sonëz me zho zaatne nitlo zho. Ne nligaa men non nac me, tel naa peet nond naa, per ni par tib ngundziin ne glit lab me ni me, raguañd naa gac naa. ¹⁷ Laa me guiaad zig tib zha ne rbeeguizh zhobxtil, sac zha co, rlozhse rbeeguizh zho zhob rgotsow zhow, laa paj rlaal zho lo gui, ga reca. Per gui ne gzëeg grë paj ne guiadbee me ga, gdzind dze guiuuw.

¹⁸ Sca rnee me lo zho, par guieñ zho zha nac Xtiidz Dios. ¹⁹ Tib vult

haxta lo rey Herod goctox me, sac lëëque Herodí, wnaa ne nac tseeel bets Herod nonie Herod; grë guieñtseeb ne quiaayun Herod, blisqui mew. ²⁰ Per laa ne nion Herod diidz, lel been me stib guieñtseeb, bnabey me bgaa Juan bio Juan ladzguiib.

Brobnis Jesús

(Mt. 3:13-17; Mr. 1:9-11)

²¹ Len dze ne nochoobnis Juan miech ga, tib dzew laa Jesús bdziñ lo Juan ga, ye me bnab cchoobnis Juan me. Blozhse brobnis me, laa me quiazodiidznie Dios, tibaque zeene bzhial zhan gbaa, ²² laa men ne nac Espiritu Sant biet, rlu me zig rlu tib palom, laa me bdziñ guic Jesús, hor co blu zëeb tib tsi men co nëz gbaa, rnee me:

—Xin, rleynie naa luu gon, nziuu luu lo naa.

Xmengol Jesús

(Mt. 1:1-17)

²³ Galptsii iz rap Jesús, laa me psilo xtsiin me pseed me miech. Zha ne runbey me, rzoob zho xpëed José nac me,

²⁴ José co goc xpëed Elí,

Elí goc xpëed Matat,

Matat goc xpëed Leví,

Leví goc xpëed Melqui,

Melqui goc xpëed Jan,

Jan goc xpëed José,

²⁵ José goc xpëed Matatí,

Matatí goc xpëed Amós,

Amós goc xpëed Nahúm,

Nahúm goc xpëed Esli,

Esli goc xpëed Nagai,

²⁶ Nagai goc xpëed Maat,

Maat goc xpëed Matatí,

Matatí goc xpëed Semei,

Semei goc xpëed José,

José goc xpëed Judá,

²⁷ Judá goc xpëed Joan,

Joan goc xpëed Resa,

Resa goc xpëed Zorobabel
 Zorobabel goc xpëed Salatiel,
 Salatiel goc xpëed Neri,
²⁸ Neri goc xpëed Melqui,
 Melqui goc xpëed Adi,
 Adi goc xpëed Cosam,
 Cosam goc xpëed Lmodam,
 Lmodam goc xpëed Er,
²⁹ Er goc xpëed Josué,
 Josué goc xpëed Liezer,
 Liezer goc xpëed Jorim,
 Jorim goc xpëed Matat,
³⁰ Matat goc xpëed Leví,
 Leví goc xpëed Simeón,
 Simeón goc xpëed Judá,
 Judá goc xpëed José,
 José goc xpëed Jonán,
 Jonán goc xpëed Liaquim,
³¹ Liaquim goc xpëed Melé,
 Melé goc xpëed Mainán,
 Mainán goc xpëed Matata,
 Matata goc xpëed Natán,
³² Natán goc xpëed David,
 David goc xpëed Isaí,
 Isaí goc xpëed Obed,
 Obed goc xpëed Booz,
 Booz goc xpëed Salmon,
 Salmóngoc xpëed Naasón,
³³ Naasón goc xpëed Minadab,
 Minadab goc xpëed Aram,
 Aram goc xpëed Srom,
 Srom goc xpëed Far,
 Far goc xpëed Judá
³⁴ Judá goc xpëed Jacob,
 Jacob goc xpëed Isaac,
 Isaac goc xpëed Abraham,
 Abraham goc xpëed Taré,
 Taré goc xpëed Nacor,
³⁵ Nacor goc xpëed Serug,
 Serug goc xpëed Ragau,
 Ragau goc xpëed Peleg,
 Peleg goc xpëed Heber,
 Heber goc xpëed Sala,
³⁶ Sala goc xpëed Cainán,
 Cainán goc xpëed Rfaxad,
 Rfaxad goc xpëed Sem,

Sem goc xpëed Noé,
 Noé goc xpëed Lamec,
³⁷ Lamec goc xpëed Matusalén,
 Matusalén goc xpëed Enoc,
 Enoc goc xpëed Jared
 Jared goc xpëed Mahalaleel,
 Mahalaleel goc xpëed Cainán,
³⁸ Cainán goc xpëed Enós,
 Enós goc xpëed Set,
 Set goc xpëed Adán.
 Adán goc zig tib xpëed Dios.

Gocladz men̄dox niunḡuet ma Jesús

(Mt. 4:1-17; Mr. 1:12-15)

4 Zeene blozh brobnis Jesús guiubee Jordán ga, nacie Espíritu Sant me, dzigo güeynie me Jesús tib dan ngan, zaatne choot miech guiend. ²Ga bio Jesús, ni tib lë peet dowd me; gzase dze pquianaḷ men̄dox niunḡuet ma me niun̄ me min̄e racladz ma. Zeene goc choo dze no me ga, gon̄ ma lëbdraa me rcaabedz me, ³dzigo rëbchaa ma lo me:

—Telne nli Xpëed Dios nac luu, bnabey tsaalo grë quie rii ncuane gow luu.

⁴Dzigo pquiab me rëb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

⁵Blozh ga güeynie ma me glaa tib guic gui, ga znuse blu ma grëse guiedz ne ndxie dib lo guidzliu lo me, ⁶rëb ma:

—Bui gan̄le, grëse guiedz ne gon̄ ran̄ luu i, chen̄ naaw, zrielo gded naaw lo zha ne racladztaa naa. Grësew, dib guielndaan ne no low, znedz naaw lo luu ⁷telne squiitsgzhib luu lo naa, gun̄non luu naa.

⁸—jBiche lo naa nu men̄dox! —rëb me lo ma—. Znu gon̄ zhobnee lo Xtiidz Dios: “Diosse nac men̄ ne rnabey, mese none gun̄non luu, lo me rieguaḷ yquiitsgzhib luu; ni min̄e rnabey me min̄ co none gun̄ luu.”

⁹Blozh ga güeynieque ma me lad guiedz Jerusalén, ga blep ma me zaatne

mazdraa glaa guic yadoo nroob ne zob lad guiedz co, rëb ma lo me:

—Telne nli Xpëed Dios nac luu, brin-gaa nu, ¹⁰benque led znu rnee lo Xti-idz me: “Znabey Dios grë xanj me yquiaanap luu, ¹¹zgueedz zho luu, zeena ni tib quie ycaand ni luu.”

¹²Dzigo rëb me lo ma:

—Psoladz ganle noque stib zaatne znu rnee lo Xtiidz Dios: “Bien, Dios nac men ne rnabey luu, nodne quitnie luu me gnab luu lo me gun me ncuane nod gun me.”

¹³Gonse ma rdzielz zha gun-guet ma Jesús, dzigo biche ma lo me palal dze.

¹⁴Blozhse ga, dzigo laa Jesús wbi ga bdzin me nëz Galilé, scaque nacie Espíritu Sant me. Znuse beenbey miech me por grëtaa ncuane ro ne run me, grëse guiedz ne ndxie nëz co, rzeet zho me.

¹⁵Zaatne rdziintaa me, rie me xyadoo zho, rseed me zho Xtiidz Dios, rleynie zho me, rley zho ron zho grë mine rnee me.

Güey Jesús Nazaret

(Mt. 13:53-58; Mr. 6:1-6)

¹⁶Tib dzew, laa me bdzin Nazaret, zaatne broob me. Goł dze ne rdziiladz zha Israel lo dziin, güey me xyadoo zho zig runaque me grëraa zaatne ziy me. Zeene goł horne rlab zho Xtiidz Dios, dzigo bded me, ¹⁷bdeed zho mine pquiaa Isá glab me. Pخال me low, lëetse zaatne znu rnee blab me:

¹⁸ZhiEspíritu Dios nacie naa, ible Dios bzooblo naa, gnee naa Diidz Ndzon ne nac xtiidz me lo grëse zha ne rquiinnëw.

Laa me pxeel naa gne naa lo grë zha ne ngadoo lo ncuane nosacsi zho, zeena guien zho zha gree zho lo grë ncuane co.

Laa me pxeel naa gziini naa lo grë zha ne no lo guielcow,

grë zha ne rzac guiendraa zha gree zho lo zhizhgab zho, laa me pxeel naa, naa cuee zho lo zhgab co.

¹⁹Laa naa zialnie diidz lo miech, gacnan zho pa lotaa noxco Dios gunlay me grëse zha ne gbig lo me.

²⁰Blozhse blab me lo co, ptibëd mew bdeed mew lo zha ne quianapa, dzigo laa me bzob. Grëse zha ne no len yadoo ga, dze rwi zho lo me, ²¹dzigo bnee me lo zho, rëb me:

—Grë diidz ne blozh blab naa lo to nu, len dze rii gon laaw noyac cumplir.

²²Grëse zho rleynie zho me, rlozhd gzee zdoo zho ron zho grëtaa diidz ndzon ne rnee me. Rnabdiidzlsa zho rnee zho:

—¿Bay zha squitaa pseed men qui? ¡Led lëe xingan José i!

²³Dzigo rëb me lo zho:

—No tib diidz ne rnee: “Zha ne racnie stib miech, none guien zho glo menladz zho gacnie zho.” Rienpaa naa gon, min co racladz to gnë to lo naa; quiambëz to gan to grë milagr ne ziyon to ben naa guiedz Capernaum.

²⁴Gneli naa lo to ganle: Zha ne ri-aad rteed xtiidz Dios, ible znu randzed menladz zho zho; gane rrieelod pe gun zho. ²⁵⁻²⁶Gołsoladz ganle zeene biaad Lí, bio tib tiemp ne biabd guie tson iz grol, tib gbindow ne gon miech Israel nu. Ndal wnaa viud ne nac menladz me mban bded zho, guien pe nquiin zho, per brieelod niun me xyudar zho; leł xyudar tib wnaa Sarept pxeel Dios me güeygun me, guiedz ne ndxie gax Sidón. ²⁷Scaque zeene biaad Liséw, ndal zha Israel rlan guiedzdox ne nac lepr, per ni tib zho beenguiacd me; leł tib zha Siria lë Naamán, men co beenguiac me.

²⁸Zeene gon zho sca rnee me, blëe zho. ²⁹Gusobe zho, blee zho me lad guiedz, güeynie zho me tib ro yee ne quia glaa guic gui ne ndxie guiedz co.

Laa zho nole par ctiix zho me ga,³⁰ zeene nuzuse bded me lad zho, ziega me.

Biac tib mgui ne nosacsi mendox

(Mr. 1:21-28)

³¹ Ga wbi Jesús, bdziñ me guiedz Capernaum stib, guiedz ne ndxie nëz Galilé. Gzobse dze ne rdziiladz grë miech co lo dziin, rie me xyadoo zho rieseed me zho. ³² Rzee zdoo zho ron zho grë zhiwseed me, grëse miñe rnee me, rlu zha rnabey nac me.

³³ Tib vult, lad grë zha ne noseed me ga no tib mgui ne nosacsi mendox; roptsie mendox co rnee ma lo me:

³⁴ —iPsaan no! ¿Pe guñ luu no Jesús Nazaren? ¿Ziaad luu lëë par gnitlo luu no? iRunbey naa luu, luu nac men ndzon ne pxeel Dios!

³⁵ Dzigo goctox me lo ma, rëb me:

—iPsoog ro luu! iNa zeena psaan men qui!

Horco, squi ndxie grë miech co bron ma mgui co liu, mincose been ma, laa ma brie laa ma zie. ³⁶ Rlozhd gzee zdoo grë miech co, rnabdiidzlsa zho rnee zho:

—iZha nac xtiidz men qui, zha nacne haxta mendox rdzieb ma me, rzhooñ ma zeene laa me ractox lo ma?

³⁷ Grëse guiedz ne ndxie gax ga, zigse zie dze rzhooñ diidz scataa milagr ne run me.

Biac xniadzoop Pedr

(Mt. 8:14-17; Mr. 1:29-39)

³⁸ Brie Jesús len yadoo, zie me nëz lidz Simón. Bdziñ me lëëtaque laa xniadzoop Simón nix rlan xlëë, nzho rac me; dzigo wbig zha ne been vis laa zhuz co rzacnë, bna zho lo me gunguiac me me. ³⁹ Nacne bded me zaatne nix zhuz co, goctox me lo xlëë co. Horcogazha laaw blëz, guche zhuz co ga, beenlo me ncuaane dow zho.

⁴⁰ Laa ngbidz rzëëblew, zeene bdziñ grë miech co lo Jesús, bdziñnie zho

grë zhimguidz zho. Zhaase zhaase guielguidz ne rzac tib tib mguidz co, per grëse zho zigne rxobnia me guic zho laa zho riac. ⁴¹ Nzian zho benxoon me mendox ne nosacsi zho, zeene laa ma rree, nguiedz roptsie ma rnee ma lo me:

—iRdziuunbey no luu, Xpëed Dios nac luu!

Dzigo ractox me lo ma, rsaand me gnee ma cho nac me, sac wen wen nan ma me nac Men ne nacle diidz ga cxeel Dios.

⁴² Biini liu co, silgaw brie Jesús lad guiedz co güey me tib zaatne choot miech guiend. Zeene bnit me lo grë miech co, brie zho güeyguib zho me haxta bdziel me lo zho; rnab zho lo me Capernaumse ga cuëz me, paat tsiedraa me. ⁴³ Dzigo rëbchaa me lo zho:

—Grieloda, ib none ga naa grëraa guiedz, gaseed naa miech gacnan zho zha racladz Dios gban zho; sac ible min co pxeel me naa zial naa.

⁴⁴ Nligaaw, grëse guiedz ne ndxie nëz Galilé ga güeyted me, güey me yadoo ne zob tib tib guiedz co, güeynee me Xtiidz Dios lo grë miech co.

Nroobdox mel bgaa

(Mt. 4:18-22; Mr. 1:16-20)

5 Tib vult miech guizhiu ne pcaalsa lo Jesús ro Nisdoo Genesaret, haxta rtaagw zho me; grëse zho racladz yquiaadiag zho Xtiidz Dios. ² Gax ga zo chop barcw, blalaa ngooz mel biet lena, laa zho no lo nis ga noguiib zho guix ne rnaaz zho mel. ³ Nacne güey me biep me tib len barcw co, bnabey me Simón psëë Simóna bzëëba lo nis palal; sac lëë xbarcw Simón ga. Dzigo leen co bzob me pseed me grë miech co.

⁴ Zeene blozh bnee me lo zho, rëbchaa me lo Simón:

—Nana ganle zeeynie barcw rii guonie new zaatne guietlaa nis, zeena

gron to guix ne rga meḷ i gnaaz to palal ma.

⁵Pquiab Simón rëb Simón:

—Dib guieel-le bdzio no lo nis rii, per ni tib meḷ bnaazd no; per lega ne luu nmeew, na dien laa no grona stib.

⁶Bron zho guix co lo nis, zeene laa zho cueew, ya zig zrieza, biodzëse lena no meḷ. ⁷Horco blunia zho lo grëraa zha ne nacgrë zho no stib len barcw co, parne tsie zho gun zho xyudar zho. Bdzin zha co gocgza zho, gropse len barcw co pcodzë zho grë meḷ co; ya zig zd-edquiew lo nis.

⁸Zeene gon Simón scataa meḷ taf ne bgaa, pquitsgzhil me lo Jesús, rëb me:

—Bzhiguiel mazd psaan naa, tib miech ngoopdol nac naa, rdzieeld so luu lo naa nu.

⁹Zigtaa Simóna, zigtaa zha ne ziegza mew, rzee zdoo zho ni rdzieb zho scataa nac milagr ne gon zho ga. ¹⁰Scasaque rac Jacob ni Juan (xingan tib men lë Zebedé), zha ne nacgza Simón.

—Gdzieebd luu —rëb Jesús lo Simón—. Zigne squi gon rioxco luu riaad luu gooz meḷ niina, desde nadze laa luu tsoxco gun luu stib gooz; laa naa cxel luu tsietop luu grë miech ne sëëb xnëz Dios.

¹¹Zigne bdzinne zho barcw co ro nis, bzo zhow ga, laa zho zienal zhits me.

Biac tib zha ne rlan guiedz lepr

(Mt. 8:1-4; Mr. 1:40-45)

¹²Laa Jesús no tib guiedz co, tib dzew, bdzin tib mgui ne rlan guiedzdox ne lë lepr lo me, pquitsgzhil mgui haxta bdzin lo mgui liu, rëb mgui lo me:

—Tebaa siguiel luu gunguiac luu naa.

¹³Dzigo pxobnia me guic mgui, rëb me:

—Zunguiac naa luu. ¡Niinagazh laa luu guiaanmbe!

Horcogazha laa mgui biaanmbe lo guiedz co. ¹⁴Dzigo pso Jesús diidz lo

mgui, choot lo gzodiidz mgui zha biac mgui; ni rëb me lo mgui:

—Bzë, güey lo pxoz, güeyсан gon ne rnabey xley Moisés gdeed luu; zeena gan zho ganle laa luu biacle.

¹⁵Niicle sca nëd me gacnan miecha, per znuse znuse rliaal diidz grëtaa milagr ne run me; miech guizhiu ne rdzin lo me, zha ne zie yquiaadiag zhiwseed me, zha ne zieegaa gunguiac me zho tel pe guielguidz ne rzac zho. ¹⁶Zhiga, zhiga rbiche me lo miech, rie me zaatne choot guieḷ riezodiidznie me Pxoze me.

Biac tib zha ne gutoo xcuerp

(Mt. 9:1-8; Mr. 2:1-12)

¹⁷Stib dzew, miech guizhiu ne ndxie lo Jesús noquiaadiag zho zhiwseed me. Nzian grë zha farisé, grë maistr ley, zha ne brieedib nëz Galilé, dib nëz Judé, zha ne brieegaa Jerusalén, ye zho laa zho no lad co noquiaadiag zho grë mine rnee me.

¹⁸Laa grë miech co ndxie ga, zeene bdzin bla zha bgui, ney zho stib men bgui, zhoobse me lo yag, ib gacd së me sac dipse me gutoo. Gocladz zho nzëëbnie zho me len yu ne no Jesús ga, ndzinne zho me lo me. ¹⁹Per ib gocd nded zho lad grë miech co. Nacne biepaque zho guic yu, pxal zho tiblë guic co, ga pteed zho men rzacne co dib yag ne zhoob me ga, bdzin me lo Jesús.

²⁰Zeene gon Jesús ne nli dib zdoo zho rnalo zho me, me gunguiac men rzacne co, rëbchaa me lo men co:

—Peet tsienied guic luu, niinagazh laa naa gun perdon grëse xtol luu.

²¹Zeene bin grë zha farisé co, grë maistr ley co sca rëb me, rneechaa zho gza zho: “¿Cho dzigo rzac mgui qui nac me? ¡Falt i gon noyun me lo Dios! ¡Tibaque men ne run perdon xtol miech, ni lëe men co nac Dios!”

²²Bienga Jesús sca quianee zho, dzigo rëbchaa me:

—¿Pe nacne rzac to laa naa quiayun falt? ²³⁻²⁴Nli cholze zac guiab laa zho gun perdon xtol miech, per grielod gunguiac zho zho. Golwi ganle laa naa gunguiac mgui rii, zeena gacnan to naa ne nac naa Mgui ne pxeel Dios, ible rap naa poder par gun naa miech perdon.

Dzigo bnee me lo men rzacne co, reb me:

—¿Niinagazh guche i, bi yag ne bzhoob luu i, zeen bzè!

²⁵Zigne sca bnee me, laa mgui co bzoli, squi ndxie grè miech co laa me blis yag co, ine roolne me Dios laa me zey.

²⁶Psilo zho grèse zho, roolnie zho Dios; lala rzee zdoo zho, lala rdzieb zho, rnee zho:

—¿Nadzesi, laa ne bdzian ncuaane gard dzian ne!

Bredz Jesús Leví

(Mt. 9:9-13; Mr. 2:13-17)

²⁷Bloh ga, laa Jesús brie ga. Ro nēz zieded me gon me tib men lè Leví, zobse men co lo mezh ne rietizh zho dimi ne razh lo zha Roma, sac me rtop dimi co. Dzigo bredz Jesús me tsienal me zhits Jesús. ²⁸Biaaque xmez h me ga, guso me ga, laa me zienal.

²⁹Bded ga, güeynie me Jesús tib wagw lidz me. Grè zha ne run dziin co, ni grèra-gaa zha ne bdziin ga, tipse brenie Jesús zho grè xpèedscuel me.

³⁰Blalaa zha farisé, ni zla maistr ley, rlèè zho gon zho sca zobnie Jesús grè zha co, bded ga rēbcha zho lo xpèedscuel me:

—¿Lèda i gon run to! ¿Pe nacne sca tipse rownie to grè zha ngoopdol co, grè zha beed ne nac recaudador ga?

³¹Dzigo rēbcha zho Jesús lo zho:

—Nanle to ganle, zha ne run rmed, zaatne no zha rzacne ga rquiin zho, ¿niacxe squiin zho zaatne no zha ne ndip ndaan? ³²Scaque naa nagon, zialguibd

naa zha wen, sinque laa naa zialguib grè zha ngoopdol, zeena gbig zho lo Dios.

¿Pe nacne rcuand xpèedscuel Jesús?

(Mt. 9:14-17; Mr. 2:18-22)

³³Bdzaaque bla zha ne bnabdiidz, reb zho lo Jesús:

—¿Pe nac waa ib rcuand xpèedscuel luu, tibaque quiayow zho, tibaque quiaye zho? Zha xpèedscuel Juan, zha xpèedscuel farisé, rdzian no tibaque nocuan zho, tibaque nonab zho lo Dios.

³⁴Pquiab Jesús reb me lo zho:

—Zaatne nadien noyac tib guieltsieel, ¿niacxe znabey to ycuan grè zha ne ndxie lo lni, ni ran to laa mgui ne not-sieelnia zo lo zho? ³⁵Per zdziin dze zeene laa mgui co gbiche, ni zeene laa dze co gdziin, dzigosi nagon rieguial ycuan zho.

³⁶Blohse sca bnee me, rēbaque me lo zho:

—Zha ne rquiaabdie lar, tsod zha ne ctsiez xab cub cuee zho tib lè lar ne yquiaabdie zho tib xab gox zho. Sac tiba, znitlo zho xab cub zho ga, ni stiba rdzieeld yquia tib lè lar cub lad lar gox.

³⁷Scaque zha ne rgotsow vin, tsod zha ne cotsow vin cub tib len guid ne padzeelale noquiin, sac stiesz vin cuba; lozh ga zigtaa vina, zigtaa guid cow, laaw nitlo ga. ³⁸Gacxe waa, tel vin cuba none len tib guid cubaque tsotsowa.

³⁹Nac cuent rii zig rzac miech vin, zha ne bienle rie vin ne padzeelale not-sow, rdziladzd zho guie zho vin cub; sac bianele guic zho rnee miech: “Vin ne padzeela notsow, min co nizhrra rdiioow.”

Dze ne rdziiladz zha Israel lo dziin

(Mt. 12:1-8; Mr. 2:23-38)

6 Tib vult, lèetse dze ne rdziiladz zho lo dziina, bded Jesús zaatne zèèb zhobxtil grè xpèedscuel me; psilo zho pchoo zho mzion zhobxtil co, zigse runmbe zho zhob co, scase row zhow.

²Goñ blalaa zha farisé sca no zho, dzigo rëbchaa zho:

—¿Lëda i goñ noyun to! Golguien ganle dze nda nac dze rii.

³Pquiab Jesús rëb me lo zho:

—¿Pe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho? ⁴Rneew, bzëëb me leñ yadoo güeynab me grë quietxtil ne nac gon, downie me grë zha ne ziegza me ga; ni loxaque zha ne nacse pxoz, zha cose row quietxtil co.

⁵Ni rëb me lo zho:

—Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

Biac tib mgui ne mband tib nia

(Mt. 12:9-14; Mr. 3:1-6)

⁶Goñ stib dze ne rdziiladz zho lo dziin, güey Jesús leñ yadoo win ne zob lad guiedz co, psilo me noseed me miech. Lad grë miech ne no leñ yadoo ga, no tib mgui, mband nia derech me. ⁷Blalaa zha farisé, blalaa maistr ley no lad co, quialeets zho Jesús dien pe zunguiac me mgui co, dze co; sac quiambëz zho tel laa me gunguiac mgui, dzigo min co yquiaaqui zho tsiezo zho me lo zhiwxtis zho.

⁸Bien Jesús sca no guic zho, dzigo bredz me mgui co, bnabey me bzo mgui groltaa lo grë zha ne ndxie ga; ⁹blozh ga rëbchaa me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuanea yquuin, te nonguiela gun ne guielntseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

¹⁰Dze rwi me lo zho tib tib zho, dzigo rëbchaa me lo mgui co:

—¿Bzigaa nia luu!

Zigne bzigaa mgui co nia mgui, laaw biac.

¹¹Zeene gon zho sca beenguiac me nia mgui, per nli rlëë zho, psilo zho quianediidz zho dien zha gun zho me.

Bzo Jesús zha ne tsienee xtiidz me

(Mt. 4:23-25; 10:1-4; Mr. 3:13-19)

¹²Tib vuelt, güey Jesús tib guic gui, dipse guieel blëz me ga bzodiidznie me Dios. ¹³Biini liu co, bredz me grëse zha ne nac xpëëdscuel me, dzigo lad co ble me tsiipchop zho, zha ne tsiepaa tsienee xtiidz me lo miech. ¹⁴⁻¹⁶Znu lë gza tsiipchop zha co:

Simón (zha ne bleelë me Pedr),

Ndrés (bets Pedr),

Juan,

Jacob,

Lip,

Bartol,

Matew,

Mazh,

Jacob (xingan Alfé),

Simón (zha ne no lad grë zha ne racladz cuee wxtis Roma Israel),

Judas (bets Jacob),

ni Judas Iscariot (zha ne güeyto me).

¹⁷Cho gui co biet me grë xpëëdscuel me, bdziñ zho tib ro lets. Loxaque bdziñ zho ga, laa stib dzoon xpëëdscuel me bdziñaque lo me ga; zhiits co nal stib dzoon miech, no zho racladz yquiaadiag zhiwseed me, nogaa zho zie ga par gunguiac me zho. Miech guizhiuw, zha ne ziaad nëz Judé, zha ne ziaad nëz Tiro, zha ne ziaad nëz Sidón, zha ne brieegaa Jerusalén.

¹⁸Nzian grë zha co nosacsi mendox, grëse zho beenguiac me zho. ¹⁹Rbig be grë miech co racladz zho xen zho lad xab me, sac ran zho, zha ne rzhën lad xab me, tel pe guielguidztaa rzac zho, runguiac me zho por grëtaa poder ne rap me.

Cho nac zha ne wen zie

(Mt. 5:1-12, 38-48; 7:1-5, 12)

²⁰ Dzigo dze bui Jesús lo grëse zha ne nac xpëëdsuel me, rëb me lo zho:

—¡Wen zie zha ne rien none gbig zho lo Dios, sac ib zdziñ zho zaatne rnabey me!

²¹ ¡Wen zie zho! Sac niicle telne noyan zho gbin, per me gdeed ncuane yquiiñ zho; niicle tel no hor mban rac zho roon zho; per zdziñ dze ne gdeed me tib guieñbley nroob lo zho.

²² 'Zig nac to, zeene csilo miech glëënie zho to, guncxoon zho to, yquiaago zho to, gneenë zho to, sac zho haxta ni lë to gondraa zho, loxaque ne nac to zha ne no xnëz Mgui ne pxeel Dios nu, ¡wen zie to ga! ²³ ¡Nley golco zdoo to dze co, nguieel golgac, sac gonñ tib guieñzaac nroob ne gneedz Dios lo to! Golsoladz ganle, scaque been pxozgol zho grë zha ne pxeel me padzeela biadnee xtiidz me.

²⁴ 'Sangué grë zha ne rzac grëse ncuane rquiiñ zho quianie zho, ib rquiind zho gbig zho lo Dios, ¡probsaxe zho, sac lo guidzliu riise gac ncuane co guieñbley lo zho!

²⁵ ¡Probsaxe zho, sac niicle ne grëw quianie zho niina, per zdziñ dze ganñ zho ganle zha nac gbin; rlozhd gzhidz zho, rlozhd gley zho niina, per zdziñ dze laa zho ganñ ganle zha nac guieñnë!

²⁶ 'Padzeela, biaad bla zha ne pquidie rëb zho Dios pxeel zho, bio pxozgol to bleynie zho zho, ¡probsaxe to telne yguib to sca gleynie miech to!

²⁷ 'Golquiaadiaga ganle: Zha ne rlëë lo to, golleynie zho, tel pe nac xliaadz zho golgacnie zho. ²⁸ Zeene rdzibdee zho to, golnab lo Dios gunñlay me zho; zeene rsacsigaa zho to, golnab lo Dios yquia zdoo me zho. ²⁹ Tel gneedz zho tib puñet lo to, gzoobd nia to, golsaan zho maase yquiaa zho stiba.

'Zha ne gla xabnal to, golsaan maase ye biaagw güey zho. ³⁰ Zha ne gnabtaa pe cos lo to, goldeeda; tel scasegaa xen zhow, ib gnabde tow lo zho. ³¹ None zaacse gac to lo miech, zeena scagaa zha, zaacse gac zho lo to.

³² 'Sac gonñ, tel loxaque zha ne ndzieeldiidz to, zha cose rleynie to, ¡led ncuane nroobd ga runñ to! Haxta grë zha ntseeb runñ minñ co. ³³⁻³⁴ Tel loxaque zha ne runsegaa favor lo to, lo zha cosegue runñ to favor; zeene runгаа to tib pextad, lo zha ne rgobeyse to zguzh lo to, lo zha cose runxtad to, ¡ni lalnu peet nond ncuane runñ to ga! Sac gonñ haxta grë zha ntseeb runñ minñ co.

³⁵ 'Golguien sca, none gleynie to zha ne rlëë lo to, none gacnie to zho lo xli-aadz zho. Zha ne guiaad tib pextad lo to, goldeed ncuane rnab zho, ib guiabde to nend lega scase gunñ to favor co lo zho. Zha ne gunñ grë minñ rii, nroob guieñzaac ne gdeed Dios lo zho, ni ga glu zho ganle nli xpëëd me nac zho; sac gonñ tel me wen me lo grëse miech, niicle zha ne runñ falt lo mew, niicle zha ne riendgaa gdeed xquizh lo me, rsaand me zho. ³⁶ Ndzinli sca golgac, zigne sca wen Pxoze to lo grëse miech, scaque none wen gac to lo zho.

³⁷ 'Ib gunde to në gac zdoo to, zeene ranñ to ncuane nonguielñ ne runñ stib miech, sac to tozhal gunñquizh zhow; zeena scagaa Dios gunñscad me to. Golguien none gunñ to samiech to perdon, zeena scagaa Dios zunñ me to perdon; ³⁸ sac grëse ncuane runñ miech, mincoque rcaania zho. Grëse ncuane gunñ to, scaania tow, ni haxta ndziibraa mine ycaania to. Sac ncuane gunñ to lo samiech to, mincoque gunñ Dios to.

³⁹ Blozh sca bnee me, dzigo rëbchaa me:

—Golwi ganle, zig nac zha ne roñd lo, ¿niacxe zrielo glu zho nëz lo stib zha ne roñd lo? Zha ne sca gunñ, tel griel ni

tib zho zaatne nac tib ro blë, ib tedsod grop xcuaa zho tsietsobe ga.

⁴⁰Grë zha ne nac mëëdsuel, tsod zha ne racraa lo zha ne noseed zho; haxta csi-aalraa zho zhiwseed zho, ni telne tsoxco zhow, zdziñ zho medid co.

⁴¹ÿLëda ga gon tso to lozhd gzee zdoo to dien cho pe run, ni nenda mazdraa mine run to! ⁴²ÿPe ro to glisqui to mine run stib zho, ni tel mazdraa nac mine run to? ÿGolguien sca glude to ncuaane nacde to! ÿGlo goltsoxco ndzinli gac to, dzigo lozh ga zac tsienee to zha gac-ndzinli stib zho!

Nex rlu zha nac tib tib yag

(Mt. 7:17-20, 24-27; 12:34-35)

⁴³Tib tib yag rdeedsew xnexa. Griielod yquia nex ncuaan tib lo yag ne rdeed nex wen; griielodgaa yquia nex wen tib lo yag me rquia nex ncuaan.

⁴⁴Tel zha nac nex ne rquia lo yag, gase rlu zha nac yag. Tsod yag guiets ne yquia guigw lo; ni tsodgaa lbë zarz ne gdeed uv. ⁴⁵Scadaa nagon nac miech, zha ne wena, ncuaan wen run zho, diidz wen rnee zho, sac desde zdoo zho no guielwen co; laa zha ne ntseeb, niapse ncuaane ntseeb run zho, niapse diidz dox rnee zho, sac desde zdoo zho no guielntseeb co. Gacxe waa, tel zha rzë xtiidz tib miech, gase rlu zha nac zdoo zho.

⁴⁶Griielod lega gnee to, naa rnabey to, sac zha ne rneew ib none gun zho mine rnabey naa. Nzian zha ne rnee, naa rnabey zho, ni rund zho mine rne naa.

⁴⁷Zha ne rquiaadiag mine rne naa, ni rioxco zho rban zhow zigne naca, ⁴⁸rrieequia nac zho ga zig tib zha ndziel-guic ne quiet blee xcimient lidz, psilo zhow haxta zaatne bgaa lo quie. Nicle riab guiedox, peet racd lidz zho, nis naal ne raclo rded zaatne zoba ga, per rbixcheda. ⁴⁹Laa zha ne rquiaadiag xtidz naa, ni rioxcod zho gban zhow, ziaad gac

zho zig tib zha nxen ne güeyzoob lidz laglaase lo liu. Znuse bnitlo lidz zho, sac zeene biab guiedox, lo nis naal ne goclo bded zaatne zoba, znuse bixchew, ni stib lëw biaand.

Biac tib zha ne rquia dziin tib lo menguiib

(Mt. 8:5-13)

7 Zeene blozh bnee Jesús lo grë miech co, dzigo laa me wbi ga, bdziñ me Capernaum. ²Lëëtaaque len dze co rzacnë tib zha ne run dziin lo tib men ne rnabey lo xmenguiib zha Roma, no guiedz co; nzhoorac zho zootle laa zho guetle. Rleyniedox men co zho, ³zigne bin me laa Jesús bdziñ, lëëled pxeel me bla zha ne nac zha non lo menguedz Israel, güey zho güeynee zho lo Jesús siguiel Jesús tsiegunguiac Jesús zhingundziin me. ⁴Bdziñ zho bnaab zho lo Jesús siguiel me tsie me.

—Bzhiguiel been xyudar me —rëb zho—. Tib zha wen nac me, ⁵rleynie me menladz ne, haxta bzaa me tib xyadoo no lad guiedz nu.

⁶Dzigo ziana Jesús zhits zho. Zhile gdziñ zho lidz men rnabey co, zeene bdzieelo zho bla zha ne ndzieeldiidz me, zienie tib xtiidz me lo Jesús. Rzë xtiidz me, rëb me:

—Bzhiguiel mazd guiaate luu. Naraa rien naa choot nacd naa, par csodziin naa lo luu guiaad luu haxta ro lidz naa. ⁷Nligaa rien naa tib zha winse nac naa par gbig naa lo luu, gane niicle biald naa nialdziel naa luu. Nanpaa naa, zaatne ziaad luu i, con tib lan xtiidz luu zac gnabey luu guiac zhingundziin naa. ⁸Sca rnee naa, sac tel naa no zha ne rnabey lo naa, zeene rnabey zho naa none gon naa mine rnee zho; scaque zhaguiib ne rnabey naa, zeene rne naa tib lo zho: “Güey nu”, rie zho; zeene rnegaa naa: “Dë nu”, riaad zho; zha ne nacgaa zhin-

gundziin naaw, miñe rnabeytaa naa zho, run zhow.

⁹ Zeene bin Jesús sca rzë xtiidz men co, bzee zdoo me, ptsire lo me, rëb me lo grë zha ne zianal zhits me:

—Golwi ganle pa lotaa rnalo men qui Dios. Lo grë zha Israel gon, ni tib zho gard gan naa squitaa dib zdoo gnalo Dios.

¹⁰ Grë zha ne güey mandad ga, zeene bdzin zho gon zho laa ngundziin co biacle.

Rrieeban xpëed tib wnaa viud

¹¹ Bded ga, güey Jesús tib guiedz lë Nain grë xpëedscuel me, miech guizhiu ne zianal zhits zho.

¹² Zeene bdzin zho gax ro guiedz co, lëëtaque bdzieelo zho tib dzoon miech ziequeets xpëed tib wnaa viud; lëëse mëed ga lo wnaa co. ¹³ Gon Jesús zha rac me, pquia zdoo Jesús me, wbig Jesús rëb Jesús lo me:

—iGoondraa luu!

¹⁴ Dzigo bzhen Jesús yag ne zhoob ngutoo co. Zeene gon gza zha ne nxobyau yag cow, hor co bzodze zho; dzigo bnee me lo mëed co rëb me:

—Xin, ijuche i!

¹⁵ Horcogazha brieaban niib co, bzobli niib, laa niib psilo bnee.

Rley xniaa niib, pcaania me niib.

¹⁶ Zeene gon grë miech co sca brieaban mëed co, lala rdzieb zho, lala rdeed zho xquizh lo Dios, rnee zho:

—i Tib men nroob ne gon ziadteed xtiidz Dios i, ziaad lo ne! iLaa ne bdzian nina ganle, laa Dios ziaadgan ne, ziadbee me ne lo xquielnë ne!

¹⁷ Gdipse nëz Judé, ni grëraa guiedz ne ndxie dib gax ga, gocnan miech milagr nroob ne been Jesús ga.

Zha ne pxeel Juan Bautist

(Mt. 11:2-19)

¹⁸ Bin Juan Bautist grëtaa milagr ne run Jesús ga, sac rie xpëedscuel Juan riezodiidz zhow lo Juan. Dzigo pxeel Juan chop zho, ¹⁹ zienabdiidz lo Jesús, dien pe me nac Men ne nole diidz ga cxeel Dios, te dzigora gdzin men co ye.

²⁰ Bdzin zho lo Jesús, wbig zho lo me, rëb zho:

—Laa Juan pxeel no ziaadnabdiidz no lo luu, dien pe lëële Men ne nacle diidz ga cxeel Dios i nac luu, te naraa guiaad me ye.

²¹ Lëëtaaque ndal miech ndxie lo me ga, quiayunguiac me grë men rzacnë. Nzian zho, tel pe guielguidztaa rzac zho, no zho nosacsi mendox, no zho rold lo, grëse zho runguiac me zho. ²² Dzigo rëbchaa me lo zha ne pxeel Juan ga:

—Grëse miñe bin to rne naa, grëгаа ncuaane gon to quiayun naa, goltsie golzodiidza lo Juan. Ran to ganle, grë zha ne rold lo, zha ne në ni, zha ne rlan guiedz lepr, zha ne rcuaat, grëse zho laa zho riac, haxta grë mengut, rrieaban. Grësew golzodiidza lo me, golguiab lo me ganle blactaa zha ne rquiin gbig lo Dios, laa zho noquiaadiag xtiidz Dios; ²³ ni golguiab lo me: dichos zha ne tiblrique rliladz cho nac naa.

²⁴ Zeene laa xpëedscuel Juan zey, dzigo psilo me bzeet me Juan lo grë miech guizhiu ne ndxie ga, rëb me lo zho:

—Zeene dien güey to dan ngan ne bio Juan ga, i zha güeynie guic to nian to me? i Pe rëb to rlu me zig tib goobgui ne nëzrii nëzrec rey me, ²⁵ te rëb to ye masaque grë lar niazh ne racw zha non nacw me? Per nanle to ganle, zha ne scataa racwxab, len grë yu ne rzob zha rnabey, ga rio zho. ²⁶ Nligaa cho güeynie guic to nac me, i te rëb to ye tib men ne noteed xtiidz Diosa?

'Gacnan to ganle, tib men ne noteed xtiidz Dios gon nac me, ni me nac tib zha ne mazdraa nroob lo grë zha ne ziyun dziin co. ²⁷ Me ga raquiet lo Xtiidz Dios, zaatne znu rnee: "Sxel naa tib zha ne tednerga lo luu, zha co gzhixcuuaa nëz ne ted luu." ²⁸ Ne nligaa lo grëse mgui ne zieded lo guidzliu, gard greequia tib zha ne mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

²⁹ Len dze ne nochoobnis Juan miech ga, ndal zha ne bin zhiwseed me, haxta grë zha ne rtop dimi ne razh lo zha Roma, bien zho nonguiela gun zho mine rnabey Dios, güey zho pchoobnis Juan zho. ³⁰ Sangue grë maistr ley ni grë zha farisé, pe liaadz zho nion zho mine rnabey Dios, ib güeyd zho nchoobnis Juan zho.

³¹ Blozhse sca bnee me, rëbchaa me:

—Nac grë miech rii, ib riend zho pepaa racladz zho. ¿Cho ganle run zigne run zho? ³² Lëë zho run mine run grë mëëd-las ne rio wguit dib ro nëz. Niicle rool xcompañer win di nguieel, rieed win; niicle roolga zho di ngan, roond win. ³³ Sac gon, ziaad Juan, ran zho rowd me grë ncuane nac xquielwagw zho, niicle vina ried mew; dzigo rnee zho mendox nacie me. ³⁴ Blozh ga, ziaad Mgui ne pxeel Dios, ran zho row me, rie me, laa zho rneeque lega rowcho me, lega riecho me vin; ib riend me cho rtsieelsa me, haxta grë zha yozh ne rtop dimi ne razh lo zha Roma, haxta grë zha ngoopdol rzënie me. ³⁵ Sca rnee zho, sangue zha ne rgaa guielbiini ne rdeed Dios, riend zho cho nac zha ne ziaadgun xtsiin me.

Güey Jesús lidz tib zha farisé

³⁶ Tib dze bredz tib zha farisé Jesús güey me tib wagw lidz zho. Bdzin me, bded me bzob me lo mezh.

³⁷ Lad guiedz co no tib wnaa ro nëz, bin me laa Jesús bdzin lidz zha farisé

co, dzigo bi me tib bot nceit nex, tiblo nceit niazha, brie me zie me nëz lidz zha co. ³⁸ Bdzin me ga, wbig me zaatne zob Jesús, psilo me roon me. Zigse roon me, lëëque nis ne riet lo me ga, bdiib me ni Jesús, ni pcuiidz mew con guits guic me. Dzigo ptsieelro mew, blozhse ga bleec me nceit co bdëëb mew.

³⁹ Zeene gon zha farisé co sca been wnaa co, bza zdoo zho rëb zho: "Telne niaca mine nli men ne ziadteed xtiidz Dios nac men qui, niend me ganle tib wnaa ngoopdol i, ndeete me diidz squitaa nguëëbnia zho zhits ni me."

⁴⁰⁻⁴¹ Dzigo bnee Jesús lo zha farisé co yquiaadiag zho chop lan xtiidz me, rëb me:

—Pquiaadiaga ganle Simón: Chop mgui name, quia zho guielqui lo men ne blediin dimi lo zho. Tib zho zëëb gaay mil pes plat, stib zho zëëb gaay gayoow. ⁴² Gonse men co ni tib zho rdzield zha quizh zho dimi co, dzigo mazd pquia zdoo me zho, beenquizhd me zho xquielqui zho. Bnë nasca dien, lo grop zha co, ¿cho mazdraa sac zdoo mine been men co?

⁴³ Dzigo pquiab Simón, rëb Simón:

—Par naa, zha ne nroobraa xquielqui ga, zha co sacraa zdoo mine been me.

—Scaw gon —rëb Jesús—. ⁴⁴ ¡Minco-paa nagon squi rac wnaa prob qui! Gon ganle zeene bzëëb naa lidz luu, bneedzd luu nis niar ni naa; mazd me gon bdiib me ni naa, maase niicle con nis ne biin me bdiib mew, ni haxta pcuiidz mew con guits guic me. ⁴⁵ Zeene blanso naa per ni tib bzhid bneedzd luu nquiaabdiuzh luu naa, laa me gon wlal ne blanso me nu tibaque quiatsieelro me ni naa. ⁴⁶ Nac costumbr none nchoob luu nceit guic naa, per beend luuw; mazd mele gon biaad biadtëëb me nceit nex rii zhits ni naa. ⁴⁷ Laa me noyun min rii, sacne nlipaa rzac zdoo me ben naa me perdon grëtaa dolldox ne nzëëb me. Zigne

meeque ne ga, tel̄ zha ne zhis xtoġa, zhi rzac zdoo zho zeene laa zho rac perdon.

⁴⁸ Dzigo bnee Jesús lo wnaa co, rēb Jesús peet tsienied guic me, laa Jesús beenle perdon grēse xtoġ me. ⁴⁹ Zha ne zobgza Jesús lo mezh ga, zeene gon̄ zho sca rēb Jesús psilo zho rnabdiidzlsa zho, rnee zho:

—¿Cho dzigo rzac mguī qui nac me? ¿Zha nacne guiab me laa me been perdon xtoġ wnaa qui?

⁵⁰ Horco biire Jesús bnee me lo wnaa co, rēb me:

—Laa naa psilaa luu lo xtoġ luu, sac dib zdoo luu bnalo luu naa. Bzē naa, peet tsieniedraa guic luu.

Güeyseed Jesús miech dipse Galilé

8 Bded ga, briece Jesús grē xpēēdsucel me güey me grēraa guiedz ne ndxie nēz Galilé ga, zigtaa guiedz nrooba, zigtaa guiedz wina, güey me güeynee me lo miech zha racladz Dios gban zho.

²⁻³ Ye blalaa men̄ wnaa güeynaġ zhits zho, tel̄ pe ncuane quianie grē men̄ wnaa co, rdeed zhow run̄ zho xyudar me; sac rzac zdoo zho beenguiac me zho. No zho beenguiac me lo guielguidz, noga zho beñcxoon̄ me men̄dox ne nosacsi zho. Ga güeynaġ tib wnaa lē Marí Magdal (lēē wnaa co beñcxoon̄ Jesús gadz men̄dox ne nosacsi me), ga güeynaġ stib men̄ lē Zhuan (lēē tsieel Chuz ga, men̄ ne quianap grē lo xtsiin̄ rey Herod) ni stib men̄ lē Susan.

Nac Xtiidz Dios zig zhoxtil

(Mt. 13:1-23; Mr. 4:1-20)

⁴ Tib dzew, miech guizhiu ne pcaalsa lo Jesús; nzian guiedz ne briece zho bdzin̄ zho lo me. Laa me noseed zho, zeene bzodiidz me tib cuent rii lo zho, rēb me:

⁵ —Tib mguī name, briece zho güey zho gon zhoxtil. Zeene laa zho quialaaġ zho co liu, now bliaaġ gax ro nēz, now bliaaġ lad quie, nogaaw bliaaġ len̄ yag

guiets. Miñe bliaaġ ro nēz ga, zha ne bded bzēni zhow, blozh ga güeyaque grē mguīn̄ dow maw. ⁶ Miñe bliaaġ zaatne nac lad quie, blana per znuse bidza sac guieñd̄ gop ga. ⁷ Miñe bliaaġ len̄ yag guiets co, zigne blana blanaque stib dzoon yag guiets, znuse bnitlo yag guietsa. ⁸ Sangue miñe bliaaġ zaatne nac niapse lo liu, blana, brooba, ndzon goca, tib tib zhoz ne biab liu ga now goc haxta tib gayoo zhoz.

Blozhse bzodiidz me cuent co, nguiedz bnee me lo zho rēb me:

—¿Zha ne racladz guieñ miñe rne naa, yquiaadiag zhow!

⁹ Dzigo wbig grē zha ne nac xpēēdsucel me, bnabdiidz zho lo me dieñ zha nac cuent co. ¹⁰ Rēbchaa me lo zho:

—Tel̄ to, Dioszhal rlu lo to ganle zha rnabey me, niicle ncuane mazdraa ngueetsa; sangue grēraa zha ne squi gard gbig lo me, niapse con cuent rzodiidz naaw lo zho, parne guieñ zhow; per niicle scaw, ib rzoobdiagd zhow, ib rioguidz zho zha naca.

¹¹ 'Znu gon̄ nac cuent co: Zhoxtil co nac Xtiidz Dios. ¹² Ro nēz ne sca bliaaġ zhoz co, ga rlu ganle zha rzac zha ne rquiaadiag Xtiidz Dios, per znusaque rdziñ men̄dox rquill ma zho gliladzd zhow, zeena laad zho lo dol. ¹³ Lad quie ne bliaaġ spalala ga, ga rlu zha rzac zha ne rley rquiaadiag Xtiidz Dios, rley zho rcaania zhow, per rcaaniad zhow dib zdoo zho. Nli riladz zhow palal dze, per zeene ran̄ zho zha run̄ miech zho, zha rnee miech lo zho, rsaanga zhow.

¹⁴ Nogaa zho nac zig len̄ yag guiets co. Rquiaadiag zho Xtiidz Dios, per laa ne tsoniew guic zho, leġ rsilo zho grē zhgab ne dieñ zha gapchen̄ cho, dieñ zha gdeedguxt xcuerp zho lo guidzliu rii, miñ co rionie guic zho; pa sē zho gban zigne rnabey Dios. ¹⁵ Laa lo liu naaġ co, ga rlu ganle zha rzac zha ne nguudz zdoo. Zeene rquiaadiag zho Xtiidz Dios,

dib zdoos zho rcaania zhow, dib zdoos zho rliiladz zhow. Grëse ncuuaane run zho, ndzinli rrieequiaw; sac tiblique rac zho.

Xcuent biini

(Mt. 12:46-50; Mr. 3:31-35; 4:21-25)

¹⁶ Blozh ga, bnee me lo grë miech ne ndxie ga, rëb me lo zho:

—Tsood zha ne yquiaagui tib biini, lozh ga ctoos zho pe cos low, gzolanga zhow tib zhan lon. Sac biini ne rquia, glaa rzoba par gziiniw len yu, zeena guiab biini lo grëse zha ne sëëb len yu. ¹⁷ Scaque nagon, grë ncuuaane rac nguets, grë ncuuaane ree miech zhli-aan, none xoobneña.

¹⁸ Wen wen golquiaadiag mine rne naa, ni goltsoxcow. Sac zha ne tsoxcow, zdedraa Dios guielbiini lo zho; sangue zha ne tsoxcoda, haxta tel palalse guielbiini ne rzac zho quanie zho, stiche mew.

¹⁹ Dze co, scaque noseed me miech, zeene bdziñ xniaa me ni zha bets me ziegan zho me. Per brielod ndziñ zho haxta lo me, sac miech guizhiu ne ndxie lo me ga. ²⁰ Dzigo rëb tib zho lo me:

—Laa xniaa luu gon, ni zha bets luu bdziñ ley ziaadguib zho luu.

²¹ Pquiab me rëb me:

—¿Xnia naa ye, bets naa ye? Grëse zha ne gon rquiaadiag Xtiidz Dios ni rioxco zho mban zhow, lëe zha co nac xniaa naa, zha co nac bets naa, zha co nac bzian naa.

Pcuëëz Jesús tib medox

(Mt. 8:23-27; Mr. 4:35-41)

²² Tib bdze dze, bzëëbnie Jesús xpëed-suel me tib len barcw, rëb me lo zho, tedquia zho stib nëz ro nis co.

²³ Laa zho zie lo nis co zeene laa me gootguies. Tibaque zeene psilo brie tib medox, masaque riasoli lo nis co, zootle laa barcw ne no zho ga yguiitsle len nis.

²⁴ Zeene gon zho scataa ntseeb rac lo nis co, lëëlëd güey zho güeycuuan zho me.

—¡Maestro! —rëb zho—. ¡Blee mcaallo luu ganle, laa ne nonitlo lo nis rii niina!

Dzigo guche me bnee me lo me co, ni bnee me lo nis co. Zigne bnee me, dzese biac me, dzese bre nis co. ²⁵ Dzigo rëbchaa me lo zho:

—¿Pe nacne rdzieb to? ¿Niacxe rliiladzde to Dios dib zdoos to?

Ne nligaa rdzieb zho, ni lala rzee zdoos zho, rnabdiidzlsa zho ree zho:

—¿Bay cho nac me? ¿Zha nacne haxta me, haxta nis ron xtiidz me?

Men Gadar ne nosacsi mendox

(Mt. 8:28-34; Mr. 5:1-20)

²⁶ Bdziñ zho stib nëz ro nis co, ga nac xtan zha Gadar. Zo zho ga, nëz dan squiriaan xtan zha Galilé. ²⁷ Laa Jesús biet-dze len barcw, zeene laa tib mgui ne no nëz co bdziñ lo me. Mban rlu mgui co nosacsi mendox me, niicle xab me nacw-draa me; ib rbëzd me lidz me, niapse grë len xpaan gutoo rio me. ²⁸ Zeene gon me Jesús, masaque roptsie me bdziñ me pquiitsgzhib me lo Jesús, zëëb tsi me ree me:

—¡Psaan naa Jesús! Nanpaa naa gon Xpëed Dios nroob ne zob gbaa nac luu. ¡Bzhiguiel csacsid luu naa!

²⁹ Per mendox co sca ree, sac hor co laa Jesús bnabeyle ma csaan ma me. Ziele dze sca nosacsi ma me, ntseeb rac me, niicle rzoob zho caden ni me, rzoob zho caden nia me, parne paat tsied me, znuse rchug mew; dzigo rienie mendox co me rquianzë me grë dan ngan, zaatne choot miech guien.

³⁰ Dzigo bnabdiidz Jesús lo ma dien cho lë ma. Pquiab ma rëb ma:

—Legion lë no.

Sca rëb ma sac nzian nac ma no ma zdoos mgui co. ³¹ Ni bnab ma lo Jesús gzonëzd me ma lo ncowdoo ne noraa ma

ne nacgrë ma. ³²Gaxaque ga ndxie tib dzoon nguts notop lag, bñab ma gdeed me diidzbey lose grë nguts co gdziñ ma. Dzigo bdeed me diidz.

³³Horco laa grë mēdox co psaan mgui co, güeysēēb ma zdoo grë nguts co. Psilo grë nguts co rquiaa ma corr, güeypix ma tib ro yeedox ne quia ro nis co, bliiaal ma haxta lo nis; grëse ma gut.

³⁴Grë zha ne quianap nguts co, bzhoon zho, rias zho güeyzodiidz zhow lad guiedz, ni grëraa yu ne zob gax ga.

³⁵Nacne briece grë miech co ziewi zho. Zeene bdziñ zho, per nli bdzieb zho gon zha laa men co zob gax lo Jesús, laa me nacwxable, rlu niinile nac guic me.

³⁶Psilo grë zha ne gon zha biac me rzodiidz zhow lo grë zha ne bdziñ ga. ³⁷Mazdraa bdzieb grë miech co bin zhow, dzigo mazd bñab zho lo Jesús siguiel me gbi me xtan zho.

³⁸Zeene laa Jesús zie sēēb me len barcw par gbi me ga, dzigo wbig mgui co rnab me lo Jesús siguiel Jesús tsienal me zhits Jesús; per bzhiguiel Jesús nienal me, rēb Jesús lo me:

³⁹—jBiaan! Güey, güeyzodiidz lo grë menlidz luu ganle zha nactaa milagr ne been Dios beenguiac me luu.

Dzigo wbire men co. Güey me lad guiedz, grëse lo miech güeyzodiidz me zha nactaa guielnzaac ne been Jesús ga, beenguiac Jesús me.

Brieaban tib xpēdwanaa tib men lē Jair

(Mt. 9:18-26; Mr. 5:21-43)

⁴⁰Zeene laa Jesús biire bdziñ stib nēz ro nis co, miech guizhiu ne quiambēz me ga, rley zho gon zho laa me bdziñ. ⁴¹Loxaque bdziñ me, laa tib men ne rnabey yadoo lē Jair wbigle pquiitsgzhib lo me. Rñab Jair siguiel me tsienal me lidz Jair tsiegunguiac me tib xpēdwanaa win Jair.

⁴²Nzho rac mēēd co, tib mēēd tsiipchop iza, ni lēese mēēd ga lo me.

Dzigo laa Jesús zie nēz lidz men co. Miech guizhiu ne zienal zhits me, haxta rtaagw zho me. ⁴³Lad grë miech co zienal tib wnaa rzacnē, gocle tsiipchop iz rlan me tib guielguidz, rzac me zigne rzac grë men wnaa gzob mēē; tibaque rlan mew ib rbēzda. Grële ncuane rap me bloozh me lo grë men ne ruñ rmed, per ni tib zho ruñguiacd me. ⁴⁴Laa me no lad co, tibaque wbig gax me nēz zhits Jesús, bzhen me ni lar ne mbix Jesús; hor cogazha laa me biac. ⁴⁵Bien Jesús sca bzhen wnaa co lad xab me, dzigo rēbchaa me:

—¿Cho ga bzhen lad xab naa?

Grëse zho rnee led zhada. Dzigo rēbchaa Pedr lo me:

—Maestro, wi ganle zha ndaagwtaa ziaad luu lad grë miech rii, haxta rcheep zho luu, ¿zha nan luu choot xend lad xab luu?

⁴⁶—Per no cho bzhen lad xab naa —rnee me—, sac bienpaa naa beenguiac naa zho.

⁴⁷Zeene gon wnaa co bien Jesús sca bzhen me lad xab me, rdzieb me laa me wbig pquiitsgzhib me lo Jesús. Squi ndxie grë miech co, bzodiidz me zha nacne sca been me, ni zha zigne bzhen me lad xab Jesús laa me biac. ⁴⁸Dzigo rēbchaa Jesús lo me:

—Xin, laa luu biac sacne dib zdoo luu bnalo luu naa. Bzē na, peet tsieniedraa guic luu.

⁴⁹Laa Jesús bii quianeeque lo wnaa co, zeene laa tib zha ne nac mandad ziaad nēz lidz Jair bdziñ, rēb zho lo Jair:

—Csodziindraa luu lo men qui, laa xpēēd luu gutle.

⁵⁰Zeene gon Jesús sca rēb zha co, rēbchaa me lo Jair:

—Peet tsienied guic luu. Dib zdoo luu bnalo Dios, zeena peet gacd xpēēd luu.

⁵¹Bdziñ zho lidz Jair, psandraa Jesús nal grë miech co zhits me ndziñ zho zatne nix mēēd co. Loxaque Pedr, Jacob,

ni Juan, pxoz win ni xniaa win bzëebnie me leṅ yu ne nix win. ⁵²Grë miech ne ndxie ga, roon zho no zho xquielnë win; dzigo rëbchaa Jesús lo zho:

—Goonde to; sac gon nixguiesse mëédwin rii, gute win.

⁵³Psilo zho leṅ rzhidznie zho me, sac nanpaa zho gutle win. ⁵⁴Dzigo wbig me, bzheṅ me nia win, nguiedz bnee me lo win, rëb me:

—¡Guche i na, ndzoop yeṅ!

⁵⁵Zigne sca bnee me, laa mëéd co brieaban, laa win guche ga; dzigo bnabey me bguiaan zho win.

⁵⁶Zigtaa pxoz wina, zigtaa xniaa wina, per nli rley me. Dzigo pso Jesús diidz lo me, choot lo gzodiidzd me zha brieaban win.

Pxeel Jesús xpëédscuel me güeyseed zho miech

(Mt. 10:5-15; 14:1-12; Mr. 6:7-29)

9¹⁻²Tib dze bredz Jesús gza tsiipchop xpëédscuel me, pxeel me zho tsiennee zho lo miech gacnan zho zha racladz Dios gban zho; bdeed me poder lo zho gunxoon zho grë menḁox ne nosacsi miech, ni gunguiac zho grë menḁoznacnë.

³—Goltsie —rëb me lo zho—. Per ib güeyde to ncuaane yquiin to nëz. Zig nac dimi, zig nac ncuaane gow to, pe bziuud, pe baxtongaa, güeyde tow; xab tow, miṅe nacwse to mincose goltsienie.

⁴Guiedz ne gdziṅ to, zha ne gneedz zatne cuëz to, lidz zha co golcuëz, haxta gdziṅ dze ne gbi to guiedz co. ⁵Per telne gdziṅ to tib guiedz, nëd miech yquiaadiag zho miṅe zienee to, dzigo gollit grë yudie co ni to, golrieegazh ga, zeena guien zho ganle dol ga beṅ zho lo Dios, nëd zho ycaania zho xtiidz me.

⁶Dzigo laa zho briea, laa zho zie. Grëse guiedz ne ndxie dib gax ga, güey zho güeynee zho Xtiidz Dios lo miech, ni beṅguiac zho grë menḁoznacnë.

⁷Bin rey Herod rzeet zho Jesús, sac tel pa lotaaw zëeb diidz grëtaa milagr ne run me. Grë miech co, no zho rzac Juan Bautist ga brieaban, lëe me ga nac Jesús; ⁸nogaa zho rnee bod Lív, menḁe ne biadteed xtiidz Dios padzeela, me ziaad stib; zzhisgaa zho rnee no cho stib menḁe biadteed xtiidz Dios padzeelaw, sinque brieaban me gane ziaad me stib.

⁹Zeene ron Herod rnee grë miech co lëe Juan ga, rio me zhgab, rnee me:

—¿Bay cho nac menḁe co? Per gacda Juan; naazhal name bnabey pchug zho yan Juan.

Racladz Herod tebaa zha gan me Jesús.

Bguiaan Jesús gaay mil miech

(Mt. 14:13-21; Mr. 6:30-44; Jn. 6:1-14)

¹⁰Goc bla dzew, laa grë zha ne pxeel Jesús ga wbire bdziṅ lo me. Blozhse bzodiidz zho lo me grëse tel zha güey zho, dzigo güeynie me zho tib lugar riaan gax guiedz Betsaid.

¹¹Zeene bin grë miech co laa me briea, dzigo brieenal zho me, bdziṅ zho lo me ga. Zeene gon me zho, rley me pcaania me zho, bnee me lo zho zha racladz Dios gban zho, ni beṅguiac me grë zha ne rzacnë. ¹²Laa dze rdzelew, wbig gza tsiipchop xpëédscuel me rëb zho lo me, mazd gnee me lo grë miech co gbi zho ga; zeena guiob tsie zho grë guiedz las, grë yu ne riaan gax ga, yguib zho dien pa cuëz zho, yguib zho dien pe gow zho; sac choot miech nod ga.

¹³Dzigo rëbchaa me lo zho:

—To goldeed ncuaane gow zho.

Pquiab zho rëb zho:

—Gaayaque quietxtil ni chop mel ziaadnie no nu, ipe rnase ncuaan co lo grëtaa miech qui! Niicle niaca miṅe gziuu ncuaane gow zho, pe zhidaa dimi yquiin, ¿pa guioxi now?

¹⁴⁻¹⁵Nligaa miech tafa, zig gaay mil rgaa loxaque zha bguise. Dzigo bnabey

me zho güey zho, güeynee zho lo grë miech co sob zho, cue zho groļ gayooga, groļ gayooga zho tib lugar. ¹⁶Laa grë miech co bzob, dzigo bzheñ Jesús gza gaay guietxtil co ni grop meļ co, blis lo me nêz gbaa, bdeed me xquizh lo Dios. Blozhse ga, beengroļ me gza guietxtil co, meļ co ne, dzigo zigse rdeed mew lo xpëëdsuel me, scase scase rguizh zhow lo grë miech co. ¹⁷Grëse zho dow haxta zaatne bieltaa zdoo zho; ni zeene blozh dow zho, biodzë tsiipchop chicuid bio grë mine biaan.

Bnee Pedr cho nac Jesús

(Mt. 16:13-19; Mr. 8:27-30)

¹⁸Tib dze biche Jesús lo miech palal, güey me tib zaatne güeyzodiidnie me Dios; loxaque xpëëdsuelse me güeynal zhits me. Ga bnaabdiidz me lo zho rëb me:

—¿Cho dieñ ron to rnee miech nac naa?

¹⁹Pquiab zho rëb zho:

—No zho rnee Juan Bautista, nogaa zho rnee Lív (meñ ne biadteed Xtiidz Dios padzeela); nogaa groļ zho rnee no cho stib meñ ne biadteed Xtiidz Dios padzeelaw, sinque brieeban me gane ziaad me stib.

²⁰—¿To waa? —rëb me lo zho—. ¿Cho rzac to nac naa?

Horco pquiab Pedr, rëb Pedr lo me:

—¡Luu nac Meñ ne zëëble diidz ga cxeel Dios!

²¹Dzigo pso me diidz lo zho choot lo gneed zhow.

Bzeet Jesús zha guñ miech me

(Mt. 16:21-28; Mr. 8:31-9:1)

²²Tib vuelte bzeet Jesús lo grë xpëëdsuel me zha csacsi miech me. Rëb me, nroob grë ncuane cteed zho me; grë zha non lo menguedz, grë pxoz rnabey, grë zha ne rseed miech ley, ible stsiidil zho me, ni haxta zut zho me; per zeene gac tson ngbidz gut me laa me grieeban.

²³Ni rëb me lo grë miech ne ndxie lo me ga:

—Zha ne racladz sëëb xnëz naa, none cueeladz zho zho, none lëb zho gzataa dze guiaadnal zho mine rnabey naa, nicle teļ miñ co yquiaaqui csacsi miech zho. Nodne yquia zdoo zho xquieļmban zho, ²⁴sac zha ne yquia zdoo xquieļmban, leļ znu nitlo zho; sañgue zha ne sca cueeladz xquieļmban porne no zho xnëz naa, ib zгаа zho tib guieļmban ne gdzind dze lozh. ²⁵Zha ne zienie guic loxaque gapchen, ¿pa dieñ yquiina lo zho, teļ por lëew rsacsi zho zho, teļ lëew yquiaaqui guey zho gabil? ²⁶Naa ne nac naa Mgui ne pxeel Dios, zha ne ctoladz guiab zho laa zho no xnëz naa, ctoladzniegaa zho xtidz naa; scaque naa stoladznie naa zho gal dze ne laa naa guial stib. Dze ne guialnie naa grë xanj Pxoza naa, guiallu naa guieļndzon ne rap me.

²⁷Blozhse sca bnee me, rëbchaa me lo grë miech co:

—Ni gni naa lo to ganle, nzian grë zha ne ndxie nu niina, ib tedsod bii zan zho zeene laa Dios glu zha rnabey me.

Bdzëëlo Jesús

(Mt. 17:1-8; Mr. 9:2-8)

²⁸Goca maase xon ngbidz, güey Jesús tib guic gui gza me Pedr, Jacob ni Juan; laa me zie ga ziezodiidnie me Dios.

²⁹Laa me nozodiidnie Dios, zeene laa me bdzëëlo. Masaque biinidoo ne rrie lo me, xab mew, nquitsbie rnaw, haxta rquiabniw. ³⁰⁻³¹Tibaque brieequia Lí grop Moisés bdzin lo me ga, psilo zho nozodiidnie zho me grë guieñe ne cteed miech me Jerusalén, zeene laa me gbi lo guidzliu. Masaque biinidoo ne riab, ncuane gzee zdoo new.

³²Laa zha ne zianal zhits me, rcow zho mcaal zob zho ga; per zeene biab biini nroob co, hor co bzhal lo zho gon zho zha rlu me gza me Lí ni Moisés. ³³Laa

grop meṅ co ziebiche lo Jesús, zeene rëb Pedr lo me:

—Maestro, ¡wena gonṅ tebaa gbiaaz ne nu! Na maase gzaa no tsonṅ yu yag xiid win, tiba cuëz luu, tiba cuëz Moisés, stiba cuëz Lí.

Per niicle Pedr riendaque dienṅ pe nacne sca rnee Pedr.

³⁴ Laa Pedr bii quaneeque, zeene bre tib xcow zaatne zo zho ga; per nli bðzieb zho gonṅ zho laa zho biaanṅ lenṅ xcow co. ³⁵ Dzigo bin zho zëëb tib tsi meṅ co lo xcow co, rnee me:

—Lëë Xpëëd naa i gonṅ, rleynie naa me. Golgon miṅe rnee me.

³⁶ Zeene blozh bin zho tsi meṅ co, gonṅ zho loxaque Jesússe zo ga.

Grëse miṅe gonṅ zho ga, ib choot lo bneed zhow lenṅ dze co.

Biac tib mëëd ne nosacsi meṅdox

(Mt. 17:14-21; Mr. 9:14-29)

³⁷ Biini liu co, laa Jesús wbi guic gui co gza me zha ne güeynie me ga. Miech guizhiu ne güeydzieelo me. ³⁸ Lad grë miech co brieë tib mgui, wbig me lo Jesús rëb me:

—Maestro, bzhiguielṅ bui ganṅe zha rac xpëëd naa. Tibaque mëëdbgui rii nac mëëd lo naa, ³⁹ ni na laa meṅdox nosacsi win. Zeene rdziṅ ma rcoptsiedan ma win, rronṅ ma win liu, ga nix win runcx-idz ma win, ni masaque rdzib mtsiinṅ ro win; nen rsaan ma win. ⁴⁰ Blansonie naa win nu, bnab naa lo xpëëdsuel luu guncxoonṅ zho meṅdox co, per brieelod zho.

⁴¹ Dzigo rëbchaa Jesús:

—¡Pe nac squitaa miech ntseeb nac to, ib nëde to gnalo to Dios! ¿Pa lal dze ne so naa gne naa lo to? ¡Ncuaane xxecwdraa naa lo to squitaa nac to! Dënie xpëëd luu nu —rëb me lo meṅ co.

⁴² Zeene laa mëëd co ziegax lo Jesús, hor co bronṅ meṅdox co win liu, nix win ga masaque rzhidz win. Dzigo goc-

tox Jesús lo ma, beṅcxoonṅ me ma. Horcogazh biac mëëd co, laa me bdeed win lo pxoz win. ⁴³ Grë miech ne ndxie ga, per nli rzee zdoo zho gonṅ zho scataa nroob poder ne rap Dios.

Grëse miech ne ranṅ grëtaa milagr ne runṅ Jesús, rzee zdoo zho.

Bzeet Jesús stib laa miech csacsi me

(Mt. 17:22-23; Mr. 9:30-32)

⁴⁴ Biire Jesús bzeet me lo xpëëdsuel me zha gunṅ miech me, rëb me:

—Wen wen golquiaadiag miṅe gni naa lo to nu ganṅe. Naa gonṅ ne nac naa Mgui ne pxeelṅ Dios, ible zielo zho naa ladznia miech.

⁴⁵ Per ib riendṅ zho zha nacne sca rnee me, sac gard gdeed Dios diidzbey hor co guienṅ zho zha naca; niicle par gnabdi-idzga zho, rdzieb zho gnabdiidz zhow lo me.

¿Cho nonraa?

(Mt. 18:1-5; Mr. 9:33-40)

⁴⁶ Horco psilo zho noneelsa zho dienṅ cho tib zho gac zha non.

⁴⁷ Bienṅ Jesús sca no zho, dzigo bnee me lo zho, bredz me tib mëëdbgui win, ⁴⁸ rëb me:

—Grë zha ne no xnëz naa, zha ne gun-cas tib mëëdwin zig mëëd rii, gleynie zho win, rrieequia naa ga rleynie zho. Ni zha ne gleynie naa, rrieequia meṅ ne pxeelle naa ga rleynie zho. Telne racladz to gacnanṅ to dienṅ cho nac zha non, gacnanṅ to ganṅe, zha ne tsoxco gac zig tib ngunðziinṅ lo samiech, zha co nac zha non.

⁴⁹ Blozh ga, rëbchaa Juan lo me:

—Maestro, bðzionṅ no tib zha co gonṅ bzeet zho lë luu zeene beṅcxoonṅ zho meṅdox, nacne nli blisqui now lo zho, sac led yed zho nacgrë ne.

⁵⁰ Dzigo pquiab me, rëb me:

—¡Gunscade to! Sac gonṅ zha ne racnie ne, grieelod lëëque zha glëënie ne.

Ndox Jesús lo Juan grop Jacob

(Mt. 8:19-22)

⁵¹ Leñ dze ne ziaadyob gbi Jesús lo guidzliu rii, leñ dze co bio me nêz laa me zie nêz Jerusalén. Tiblique bio guic me, ib pquiad zdo me, laa me zie. ⁵² Zeene bdziñ me xtan Samar, pxeel me bla zho bdedner zie zho tib guiedz win ne ndxie nêz co, par dieñ pa lo gdeed miech co cuêz me. ⁵³ Bdziñ zho guiedz co, choot bzhiguiel ndeed zaatne mbêz me; sac bien zho nêz Jerusalén tsie me. Nac zha Samar, rlëenie zho zha Israel.

⁵⁴ Zeene bin Jacoba grop Jacob Juan, blëe guic zho, rëbchaa zho lo me:

—Maestro, ñmazd tibaque gotsaa gnab ne gliaal gui lad grë miech rii, zeena nitlogazh zho!

⁵⁵ Bicwaque me, goctox me lo zho rëb me:

—Riende to lëe zhapaa nac men ne nacie to. ⁵⁶ Golguien ganle, naa ne nac naa Mgui ne pxeel Dios, ziald naa par gnitlo naa miech, sinque laa naa zial csilaa naa zho lo dol.

Ga brie zho güey zho stib guiedz.

⁵⁷ Nêz zie zho, zeene wbig tib mgui co rëb me lo Jesús, laa me racladz tsienal me zhits Jesús, tel pa lotaa nac zaatne tsie Jesús. ⁵⁸ Dzigo pquiab Jesús rëb Jesús lo me:

—Gocnana ganle, naa ne nac naa Mgui ne pxeel Dios, peet rapd naa nu, mazd zig nac grë mêz, grë mguin, rap ma zhiblee ma, rap ma zhiptsieez ma; per naa per ni zaatne gagues naa quianied naa.

⁵⁹ Laa zha ne bredz me tsienal zhits me, pquiab zho rëb zho:

—Sënal naa zhits luu, per bzhiguiel bneedz diidzbey cuêz naa, gangazh naa tsoliu pxoz naa.

⁶⁰ Rëbchaa me lo zho:

—Nzian grë zha gut no, psaan tsow tsie samengut zho tsiequeets zho. Sangue luu zhits naa dënal, zeena tsie

luu tsienee luu lo miech, gacnan zho zha racladz Dios gban zho.

⁶¹ Pquiab stib zho rëb lo me:

—Maase sënal naa zhits luu, per bneedz diidz ganiegazh naa diidz lo grë menlidz naa.

⁶² Dzigo rëbchaa me:

—Zha ne xen nia rad ni csilo zho gwi zho nêz zhits zho, niacxe zrieelo ygan zho ngon. Scaque zha ne sëeb xnêz Dios, grielod sëeb zho telne mazdraa rleynie zho grë ncuuan lo guidzliu rii.

Güey tsongaltsii zha ne güeynee Xtiidz Dios

(Mt. 11:20-24)

10 Tib dze, ble Jesús stsongaltsii zha ne rquiaadiagle zhiwseed me, bnabey me tedner zho lo me tsie zho grë guiedz ne no ted me, pxeel me zho chopga chopga zho.

²—Golnab lo Dios —rëb me—, cxeelraa me zha ne gun xtsiin me. Sac ne nligaa ndaldoo miech ne quiambêz yquiaadiag Xtiidz me, zha ne gneelew lo zho rgaad. ³ Goltsie sca, per nsin nsin golso. Golguien ganle rrieequia nac to zig cho mëcwxiil yeen, ni laa naa rxel to zaatne no grë coyot dox. ⁴ Peet güeyde to, güeyde to dimi, güeyde to ncuane gow to, lab tow, miñe quiase ni to mincose goltsienie.

’Miech ne yquiaabdiuzh to nêz, sode to dieen zharaa yquiaabdiuzh to zho. ⁵ Zeene yguib to zaatne cuêz to, yu ne gdziñtaa to, golnab gunlay Dios grë zha ne no yu co. ⁶ Telne squiaadiag zho miñe rnee to, zunlay me zho; telne nêdga zho yquiaadiag zhow, dzigo toque gunlay me. ⁷ Zha ne gneedz zaatne cuêz to, lidzse zha co golcuêz, tsiede to stib yu stib yu; guielwagw ne gneedz zho lo to, ctoladzde to golgowa; sac gon zha ne run dziin, ib none ycaa zho miñe non xtsiin zho.

⁸Guiedz ne yquiaadiag miech miñe zienee to, zaacse golgac lo zho, tel pe guielwagw ne gneedz zho, golquiina; ⁹golgunguiac grë men rzacne ne no ga. Golguiab lo zho, laa dze ne nolu Dios zha sëeb miech xnëz me, laa dze co bdz-inle. ¹⁰Sangue guiedz ne siguield miech yquiaadiag zho miñe zienee to, golriee grë ro xnëz zho, ¹¹ganlo zho glit to grë yudie co ni to, zeena guien zho ganle nëz ne nitlo zho ga zie zho. Golguiab lo zho, zha bguiba, sac binpaa zho zha grielo sëeb zho xnëz Dios ni nëd zho gon zho diidz. ¹²Gacnan zho ganle, gal dze ne gun Dios xquielwxtis me, lëetaa gag guielne ne tsieguial zha Sodom, mazdraa nac guielne ne tsieguial zho.

¹³Scadaa nac zha Corazín ni zha Bet-said. ¡Probsaxe zho, sac gon gonpaa zho grë milagr ne run Dios, per ib psaand zho xquielntseeb zho! Tel niaca miñe ngaa grë men Tiro, grë men Sidón, nian grë milagr ne gon zho, ib ndedsod mban niac grë zha co nio zho guielne, zëeb nsaan zho xquielntseeb zho mbig zho lo Dios. ¹⁴Gacnan zho ganle, gal dze ne gun Dios guielwxtis, lëetaa caxtigw ne ygaa zha Tiro ni zha Sidón, mazdraa miñe ygaa zho. ¹⁵Scaque zha Capernaum, masaque rzac zho niina zha nziuuraa lo Dios, per gacnan zho ganle haxta guiet len gabil ga guey zho.

¹⁶Blozhse sca bnee me, rëbchaa me lo zho:

—Grëse zha ne yquiaadiag miñe gnee to, rrieequia naa ga rcaania zho. Zha ne nëdgaa ycaania to, rrieequia naa ga nëd zho ycaania zho; ni zha ne nëd ycaania naa, rrieequia men ne pxeel naa ga nëd zho ycaania zho.

Wbire tsongaltsii zha ne pxeel Jesús ga

(Mt. 11:25-27; 13:16-17)

¹⁷Zeene laa gza tsongaltsii zha co wbire, rley zho bdzin zho lo Jesús. Rëb

zho haxta grë mendox bdzieb ma zho, zeene bzeet zho lë me.

¹⁸Dzigo pquiab me rëb me lo zho:

—Haxta ma ne rnabey lo ma, gon-paa naa gon bringaa ma, biab ma zig ri-abse tib belye. ¹⁹Laa naa bneedz poder qui lo to, parne gdeete to diidz gun ma miñe racladz ma; grë meeldox, grë meegu ntseeb, niicle gzoobni to ma, peet gacde to. ²⁰Nli laa to runxoon mendox niina, per gleyde to por min co, sinque mazd golley porne laa lë to zhooble lo Dios, laa to ngable lo me.

²¹Horco biaad tib guielbley nroob zdoo Jesús, bnee me lo Dios, rëb me:

—Papá, luu nac men ne rnabey gbaa, luu nac men ne rnabey guidzliu, rmedz naa xquizh lo luu, sac grë miñe noyun luu nu niina, bdeete luu diidz niacnan grë zha raca, sinque laaw blu luu lo grë zha ne nac zig grë mëedlas. Sca quiaayun luu, sac ib scale racladz luu gaca.

²²Blozh ga rëb me lo grë miech ne ndxie lo me ga:

—Grëse ncuane ran to quiaayun naa, Dios men ne nac Pxoza naa, me bneedz poder rii lo naa; sac ib laa me bzo naa, naa gūna. Xpëed me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gded naa didz gunbey me, zunbey zho me.

²³Dzigo rëbchaa me lo xpëedscuel me:

—Dichos to bgaa to noyan to grë min rii. ²⁴Sac gon blactaa zha ne biadteed xtiidz Dios padzeela, haxta grë zha ne bnabey len dze co, bzoobladz zho nian zho grë ncuane noyan to, bzoobladz zho nquiaadiag zho grë ncuane noquiaadiag to.

Xcuent tib zha Samar

²⁵Tib dze wbig tib zha ne nac maistr ley lo Jesús, bnabdiidz zho lo me, rëb zho:

—Maestro, bnë lo naa dien, ¿pe nac mine gun naa parne grieelo ygaa naa guielmban ndzon ne gdziñd dze lozh?

²⁶ Pquiab Jesús rëb me:

—¿Zha dien zhobnee lo ley? ¿Pe rnabeya?

²⁷ Rëbchaa maistr ley co:

—Znu nreew: “Dib zdoo luu, dib nace luu, dib guielbiini ne no guic luu, dipse xfuers luu, bleyne Dios; ni bleyne samiech luu, zigne rleyne luu luu.”

²⁸ —iMin qui nagon bioxco gun luu —rëb Jesús—, zeene ygaa luu guielmban ndzon ne gdziñd dze lozh ga!

²⁹ Per par glud ne noxcd me gun me mine rnabey ley, dzigo pquiaalo me rëb me lo Jesús:

—¿Chopaa dzigo nac samiech naa, zha ne no gleyne naa?

³⁰ Dzigo bzodiidz Jesús tib cuent lo me, rëb Jesús:

—Tib men wladz name brie me Jerusalén zie me guiedz Jericó. Nëz zie me briequia ngbaan, bdiñ ngbaan me, mer niut ngbaan me; grëse ncuane ney me, haxta xab me blan ngbaan. ³¹ Laa me nix ga, zeene laa tib pxoz bded. Zigne gon pxoz me, biewga pxoz bded pxoz tib lad. ³² Wdzeepaaw, zeene laa tib zha ne runaque dziin len yadoo ziaad ga; scaque zigne gon zho me, tib tib bded zho. ³³ Sca nix me ga, zeene laa tib zha Samar bdziñ. Zeene gon zho me, wbig gax zho lo me; pquia zdoo zho me gon zho zha rna me. ³⁴ Gagazh been zho me rmed, blee zho vin bdiib zho lo grë rid ne ney me, bdëeb zho nceita, pxidoo zhow. Blozhse ga, blis zho me bzoob zho me lad xcuay zho laa zho zienie me, haxta bdziñnie zho me tib yu ne rbëz miech ne zo nëz; ga blëznie zho me, pquianap zho me.

³⁵ Biini liu, zeene laa zho brie ga, blee zho palal dimi, lal ne non chop xtse zha ne rie dziin, bdeed zhow lo bizhuan yu co, parne yquiaanap me men co, rëb

zho: “Peet tsienied guic luu, telne nroobraa gun luu gaxt, na zeene gbire naa dzigo quizh naaw.”

³⁶ Blozhse bzodiidz me cuent co, rëbchaa me lo maistr ley co:

—Lo gza tson zha ne nadien bded zaatne nix men co, ¿cho tib zho bien samiech zho ga nac me?

³⁷ Pquiab maistr ley co rëb me:

—Zha ne bion bded gaw, sac zha co pquia zdoo me.

Dzigo rëbchaa Jesús lo me:

—Sca nagon none gun luu.

Blëz Jesús lidz Mart ni Marí

³⁸ Laa Jesús no nëz gza xpëedscuel me. Bdziñ me tib guiedz win, ga no tib wnaa lë Mart, dzigo men co bdeed zaatne blëz zho.

³⁹⁻⁴⁰ Bdziñ zho lidz Mart, lëelëd bzëeb Mart ro tie. Zhixco ro tie no Mart, laa tib bel Mart lë Marí zob noquiaadiag grë zhiwseed Jesús. Gon Mart rgaadraa nia Mart, dzigo wbig Mart rëb Mart lo Jesús: —Bzhiguiel bnee lo bel naa guiaad me gun me xyudar naa. Bui ganle tipse naa psan me ro tie.

⁴¹ Pquiab Jesús rëb Jesús lo me:

—Aque luuw nli Mart, squitaa noxcd luu dien zha gac xtsiin ro tie luu. ⁴² No tib ncuane mazdraa none tsoxco luu, ni lë min co nu gon noyun Marí; gane grieelod ycaa naa mine quiaayun me.

Zha none gzodiidznie ne Dios

(Mt. 6:9-15; 7:7-11)

11 Tib vuel, loxaque blozh bzodiidznie Jesús Dios, wbig tib xpëedscuel me rëb lo me:

—Maestro, bzhiguiel blu lo no dien zha gzodiidznie no Dios, zigne been Juan Bautist pseed me xpëedscuel me zha gzodiidznie zho Dios.

² Dzigo rëbchaa Jesús:

—Zeene gzodiidznie to Dios, golguiab: Dios, luu nac Pxo no, zob luu gbaa;

luuse nac men ne mazdraa ndzon.

Luu nac men ne gnabey no,
mine gnabeytaa luu, zigne raca gbaa,
scaque none gaca lo guidzliu nu.

³ Been guielnzaac bneedz ncuaaane
dooow no nadze.

⁴ Bzhiguiel been no perdon grëse doĵ ne
ziodziuuñ no lo luu,
zigne rdziuuñ no samiech no perdon grë
falt ne ruñ zho lo no.

Gdeete luu diidz yquuil mendox no,
been guielnzaac bla no lo ma.

⁵ Sca nagon gnee to —rëb Jesús—.

Ncuaaane gnab to lo me zneedz mew.
Samiechse to name, gzoob ne wxina,
lega nacle glanso tib zha ne ndzieeldi-
idz to ni guienĵ pe gdeed to gow zho.
Dzigo tsie to lidz stib zha ne ndzieeldi-
idz to guiab to lo zho: “Bzhiguiel beenx-
tad tsonaque xcuuñ luu lo naa. ⁶ Lega
nacle blanso tib zha ne runbey naa, na
guienĵ pe gded naa yquiin zho.” ⁷ Se-
gur znë zho: “Gunneete luu naa nu, dzi-
itsle niog ro lidz naa, nataa nixguies grë
xpëed naa; grielod gache naa gnedz naa
ncuuaane racladz luu.” ⁸ Per telne son-
aad to ga, ganse zho tibaque quianee to,
gnid naa zho tsieched zho gneedz zho
ncuuaane racladz to. Per gneedzd zhow
porne ndzieeldiidz to zho, sinque laa zho
gneedza porne gon zho tibaque quianab
tow. ⁹ Scaque nagon none gun to, zeene
pe gnab to lo Dios. Ncuuaane rquiin to,
golnaba lo me, scagaa me zneedz mew.
Golguib tel pe racladz to, me nac men ne
gacnie to gdziel tow. Golcuedzlë me, sca-
gaa me scaania me to. ¹⁰ Sac grëse zha
ne rbig lo me rnab zho ncuuaane rquiin
zho, rdeed mew. Zha ne rguib ncuuaane
racladz zho, racnie me zho rdziel zhow.
Zha ne rbedzlë me, rcaania me zho.

¹¹ Golguien ganle, zig nac to, zeene
rnab xpëed to tib meĵ gow win, ĵniacxe
ziash to co to tib meeĵ nia win? ¹² Zeene
rnabgaa win tib dzit, ĵniacxe zgo to
tib meegu nia win? ¹³ Led rioxco to lëe

niapse ncuuaane wen rdeed to lo xpëed to,
niicle ne miech ntseeb nac to. Telne sca
rioxco to xpëed to, peleĵ Pxo to dzigo,
men ne zob gbaa, tsoxcod me to. Ib ted-
sod grëse zha ne gnab lo me gdeed me
ncuuaane rquiin zho, zdeed mew; haxta
zha ne gnab cxeel me Espiritu Sant gac-
nie zho, zuñ me mine gnab zho.

Rëb zho mendox nacnie Jesús

(Mt. 12:22-30, 43-45; Mr. 3:20-27)

¹⁴ Tib vuelĵ benxoon Jesús mendox
ne nosacsi tib mgui co. Ib gacd gnee
mgui, sac psan ngop ma mgui. Dzigo
zigne benxoon Jesús ma, laa mgui psilo
bnee. Grë miech ne ndxie ga, bzee
zdo zho gon zhow. ¹⁵ Nogaa zho rnee,
Beelzebú ma ne rnabey lo mendox, ma
co nacnie me gane rrieelo runxoon me
mendox. ¹⁶ Briequia spalal zho, rnab
zho lo me gun me pe stib milagr, parne
giladz zho nli Dios pxeel me.

¹⁷ Bien Jesús zha rza guic zha ne
noneenë me ga, dzigo rëbchaa me lo zho:
—ĵNcuuaane gacd gon rnee to! Tel
tib guiedz nadien, csilo miech, lëëque
zha tilnie menladz zho, ĵniacxe nitlod
guiedz co? Tib diigaa miecha, tel lëëque
zha tilnie menlidz zho, led znuse lëe
nitlo dii co. ¹⁸ Scaque mendox nagon,
telne lëëque lëe ma gunxoon samendox
ma, ĵpe nale na bnitlo ma! Laa naa me
min rii lo to, porne rnee to ma ne rn-
abey lo mendox nacnie naa, gane rrieelo
runxoon naa ma. ¹⁹ Nana telne sca rzac
to, ĵzha ne nacgrë to dzigo, cho nacnie
zho ne ye zho runxoon ma? Gase na-
ganle rlu doldox i quiayun to squi rnee
to. ²⁰ Sangue tel naa, Dios nacnie naa
runxoon naa mendox, ni ga rlu ganle
laa Dios pxeelle men ne gnabey lo to.

²¹ ĵMasaque nac mendox zig tib zha
ne no xfuers! Tib zha ne no xfuers, tel
tibaque ney zho xquiib zho, ĵcho dien
lega sëeb lidz zho gla ncuuaane quianie
zho? ²² Per zeene rriequia stib zha ne

mazdraa no xfuers, zha cole rtiche zha co, runcxoon zho zho, riaannie zho grë ncuuaane gopchen zho. ²³ Golgacnan sca ganle, zha ne rlëë lo naa, ga rlu nacnied zho naa; ni zha ne racnied naa lo xtsin naa, paat yquiind zho.

²⁴ Mendox ne rsacsi miech, zeene laa ma rsaan zho, rie ma rieuqianzë ma dan zaatne choot miech guiend, rguib ma dien pa cuëz ma; ranse ma rdzield zat- atne cuëz ma, rnee ma: "Mazd gbire naa guia naa lidz naa stib." ²⁵ Dzigo rbire ma, zeene rdziñ ma lo zha ne psacsi ma ga, masaque rzac ma zho zig rzac miech tib yu ne griin blioob, tib yu ne ine nzhix- cuaa len. ²⁶ Dzigo rie ma riexi ma zgadz samendox ma, ma ne mazdraa ntseeb, rdziñ ma gza ma rzëëb ma zdoo zha co, rsilo ma rsacsi ma zho. ¡Horcole maz- draa mban run ma zho!

²⁷ Sca quianee Jesús, zeene nguiedz bnee tib wnaa ne no lad grë miech ne ndxie lo me ga, rëb wnaa co:

—¡Dichos wnaa ne gop luu, wnaa ne bgadz luu!

²⁸ Pquiab Jesús rëb me:

—¡Mazdraa dichos zha ne gon, yquiaa- diag Xtiidz Dios ni tsoxco zho gban zhow zigne naca!

Zha ne riladzd cho nac Jesús

(Mt. 5:15; 6:22-23; 12:38-42; Mr. 8-12)

²⁹ Miech guizhiu ne quiazinraa lo me ga, dzigo bnee me rëb me:

—Nadzpaan tseeb zdoo to nac to miech ne mban len dze rii. Tibaque quia to racladz to gan to pe stib milagr, parne gliladz to Dios pxeel naa, ¿zha rnaraa milagr ne racladz to gan to? Gacnan to ganle, stibaque milagr gon gan to, tib mine csoladz to zha goc Jonás. ³⁰ Haxta dzigoraanagon guien to nli Dios pxeel naa. Sac tel Jonás, zeene gocnan zha Nínive zha bzhaac me, dzigo bliladz zho nli Dios pxeel me. ³¹ Ni gacnan to ganle, zeene gal dze ne laa Dios gun xquielwx-

tis me, zieso wnaa ne goc rein nëz Sabá, steedquie me to. Sac gon pa lo ga brie me, biaad me biadquiaadiag me grë xti- idz Salomón; ni to, lo to nu zo men ne mazdraa non lo Salomón, ni nëd to gon to xtiidz me. ³² Scaque grë zha Nínive, steedquie zho to; sac gon zeene güeynee Jonás lo zha Nínive, znuse bin zho diidz psaan zho xquielntseeb zho wbig zho lo Dios; ni to, lo to nu zo men ne mazdraa non lo Jonás, ni ib runcasde to me.

³³ Tsod zha ne yquiaagui tib biini, lozh ga ctoos zho pe cos low, gzolanga zhow zaatne nguets. Sac biini ne rquia, glaa rzoba par gziiniw len yu, zeena guiab biini lo grëse zha ne sëëb len yu. ³⁴ Rriequia nac bziaalo miech zig nac tib biini. Telne niapse lo grë ncuuaane ndzinli rwi zho, dzigo gdipse xcuerp zho no lo guielbiini. Laa telne loxaque lo grë ncuuaane nonguielldgaa rwi zho, dzigo gdipse xcuerp zho no lo guielcow ga. ³⁵ Golguien sca pa lo rwi to, napaa laa ne tso to lo biini, lel lo guielcow no to. ³⁶ Sac gon, tel dipse xcuerp to no lo guielbiini, ni tib lëw nod lo ncow, zlupaa to; sac masaque nac to ga zig tib zha ne zo gax tib lo biini nroob.

Güey Jesús lidz tib zha farisé

(Mt. 23:1-36; Mr. 12:38-40;

Lc. 20:45-47)

³⁷ Zeene blozhse bnee Jesús lo grë miech co, dzigo bredz tib zha farisé me güeynie zho me tib wagw lidz zho.

Bdziñ me lidz zho, bded me bzob me lo mezh, ³⁸ psilo me dow me, per bdiibd me nia me zigne nacpaa xcostumbr grë zha Israel. Zeene gon zha farisé cow, rlozhd gzee zdoo zho; ³⁹ dzigo rëbchaa me:

—Grë to ne nac to zha farisé, laglaase rlu to miech wen nac to, per zdoo to ntseeb to, sac niapse guielntseeb, niapse guielgnaan run to; masaque nac to gon zig tas, zig plat ne nëz zhtisse mbe rna, laa nëz lena madraa di beed. ⁴⁰ ¡Nadz-

paa ncow nac guic to! ¿Pe riende to racladz Dios ne laglaase glu miech wen nac to, sinque racladz me desde zdoo to gac to miech wen? Sac dib nacse to psan me to. ⁴¹Laa ne squi no to noban to, mazd goldeed ncuaañe nacchenpaa to lo grë zha ne guiend pe yquiin, zeena gac to miech ne nlipaa wen.

⁴²¡Probsaxe to! Rzac to demas nguzobdiidz to lo Dios, rio to haxta grë guizh bitxtil, grë guizh rud, ni grëragaa guizh ne ran to, rdeed to xdiezm to yadoo; per rioxcode to gban to zigne rnabey Dios, ib rioxcode to gleynie to samiech to. Ible none tsoxco to min rii, ni bii scaquegaa tsoxco to gdeed to xdiezm to. ⁴³¡Probsaxe to! Rdziladz to gacnon to lo miech, zeene rie to yadoo, zaatne glupaa non to, ga rzob to; scaque ndooladz racladz to gnee miech bdiuzh lo to, zeene rdzieel zho to dib ro nëz. ⁴⁴¡Probsaxe to, lëëtaa rdzieel to grë to maistr ley! Masaque nac to zig nac grë baa ne rludraa pa nac. Teļ baa cow, zeene rded zho zaatne niaaw, ib riend zho lad grë ncuaañ noyodz ga, noded zho.

⁴⁵Horco pquiab tib maistr ley, rëb zho lo me:

—Maestro, ¿ye no dzigo lëë rzoob luu squi nac?

⁴⁶Pquiab Jesús rëb me:

—Ye to gon. ¡Probsaxe to! Rio to rzadraa ley ne rnabey to gun miech, ni per ni to rioxcode to siquier csilo to gun tow. ⁴⁷¡Probsaxe to! Paat rquiinda gon squi rio to, rlozhd dieen paraa rhixcuua to ro xpa a grë zha ne biadteed xtiidz Dios padzeela. ⁴⁸¡Igun ntseeb to grë pxozgol to! Sac gon, zha beet grë zha co, laa to no rhixcuua to ro baa. ⁴⁹Nanle Dios squitaa ntseeb zdoo to, mine run to ga bnee me, zeene rëb me: “Sxel naa grë zha ne tsieteed xtidz naa lo zho, sxel naa zha ne tsieneew lo zho, per nanle naa gandzed zho zho, haxta zut zho groļ zho.” ⁵⁰Gacnan to sca ganle,

grë to miech ne mban len dze rii, grë to gunquizh Dios xchen grë zha ne pxeel me biadteed xtiidz me wlal ne ndxie guidzliu, ⁵¹desde Abel haxta Zacarí men ne beet pxozgol to len yadoo zaatne nac gax lo pcoog. ¡Ne nligaa grëse dol co gon, to quizha! ⁵²¡Probsaxe to maistr ley squi nac to, ib rneede to diidzli lo miech! Nac diidz to cseed miech guien zho zha nac Xtiidz Dios, per nëde to gliladz tow, ni niicle nëëdgaa to gliladz zha ne racladz ycaaniaw.

^{53–54}Blozhse ga, laa me briece ga. Grë zha farisé, grë maistr ley, per nli rlëë zho bin zho sca rëb me. Psilo zho nzian grë ncuaañe rnabdiidz zho lo me, rguib zho dien zha gunglëë zho me, par dien pe cxind me pe tib diidz, zeena min co yquiaaqui zho tsiezoob zho xdemand me.

Grë ncuaañe rac nguets zhlian

(Mt. 10:19-20, 28-33; 12:32)

12 Miech guizhiu ne pcaals lo Jesús, haxta rcheeplsa zho. Dzigo bnee me lo xpëëdsuel me, rëb me:

—Golguien gon, gunde to mine run zha farisé, teļ zha rquiaalose zho miech wen nac zho. ²Sac grëse ncuaañe sca nguets rac, grëse ncuaañe rlud miech, zdziñ dze ne xoobnena.

³Zig nac grë ncuaañe zhlianse rnee to lo ncow niina, zdziñ dze ne gon miecha zobna ngbidz; grë ncuaañe rnee to len yuse, zdziñ dze ne dib lad guedz gacnan miecha.

⁴Golgon ganle bets: Ib gdziebde to zha ne gacladz gut to. Nli zrieelo gut zho xcuerp to, per peet grielodraa zho gun zho. ⁵Golguien, Dios nac men ne mazdraa nroob, mine rnabey me min co none gon to. Sac teļ me, zrieelo me gnitlo me miech dib xcuerp zho, ni lozh ga zrieelo me gzonëz me zho nëz len gabil.

⁶Nligaa gdziebde to miech, csaand Dios lega pe gac to. Golwi ganle, zig

nac grē mguin, niicle ne rzac miech peet nond ma, haxta chop ma rto zho por tib gaay centav; per tel Dios, ib rsaanladzd me ma. ⁷Pelel to dzigo csaan me, haxta guits guic tow, grēsew ngaba lo me. Gdziebde to sca, golguien ganle non-raa to lo tib dzoon mguin.

⁸Ni gni naa lo to ganle, zha ne glu lo miech nacie zho naa, scaque naa ne nac naa Mgui ne pxeel Dios, zeen gal dze co zlu naa lo grē xanjl Dios, nacie naa zho. ⁹Sangue zha ne ctoladznie naa lo miech, scaque naa ziep naa lo grē anjl co runbeyd naa zho. ¹⁰No zha ne rneenē naa, per zun Dios zho perdon dol co; sangue zha ntseeb ne gneenē Espiritu Sant, ib gundraa me zho perdon.

¹¹'Zeene tsiezo miech rii to lo grē zha ne rnabey xyadoo zho, tsiezogaa zho to lo grē zha ne nac wxtis, tsoode to zhgab dien pe gnee to; ¹²sac zeene sca tsiegala, Espiritu Sant csiaab guic to pe nac mine gnee to lo zho.

Zha ne loxaque rapchen

¹³Horco wbig tib zha ne no lad grē miech co, rēb zho lo Jesús:

—Maestro, bzhiguiel bnee lo bets naa glē zho ncuane psan pxoz no, gneedz zho mine raguial naa yca naa.

¹⁴—Aque luuw nli —rēb Jesús—, ¿cho nē lo luu laa naa noyun guielwxtis co? Ziald naa gon par quiiz naa ncuane rap miech.

¹⁵Dzigo bnee me lo grē miech co, rēb me:

—¡Golguien gon, gzoobladzde to de-mas gapchen to! Sac niicle ndziibraa gapchen miech, grieelod por grē ncuane co ndzon gac lo xquielmban zho. ¹⁶Znu gon bzhaac tib men ne nroob gopchen. Nat liu quianie me, zeene rlaap me grē ncuane ran me, nroob ncuane rliis me low. ¹⁷Bdzin tib dze rgaadraa pa tsotsow grē ncuane co, dzigo bzob me dien zha gun me. ¹⁸Tibaque zeene rēb me: "Mine

naca laa naa gun nroob grē yu qui, zeena zigtaa grē guielnzaac quiw, grēragaa ncuane rap naa, ga tsotsowa grēsew. ¹⁹¡Pe zhidaa iz ne lēb grē ncuane co! Peet tsieniedraa guic naa, ine guxt sob naa, gow naa, guie naa ncuane gacladz-taa naa." ²⁰Min co rza guic me, tibaque zeene rēb Dios lo me: "Nadzpaa nxen luu. Guieel riigazh gon laa luu guet. ¡Zhaale zha ne guiaannie grētaa ncuane beenlo luu!"

²¹Zeene blozh bzodiidz Jesús cuent co, rēbchaa me:

—Sca nagon rzac grē zha ne loxaque dien zha gapchen zho zienie guic zho. Ncuane cose rionie guic zho, ib rioxcod zho gun zho ncuane non nēz lo Dios.

Rsaand Dios zha ne no xnēz me

(Mt. 6:19-21, 25-34)

²²Blozh ga, rēbchaa me lo xpēdscuel me:

—Gacxe waa, gni naa lo to ganle: Tsoode to zhgab dien zha gban to lo guid-zliu rii, pa griee pe gow to par gban to, pa gdzielgaa ncuane gdze xcuerp to. ²³Mazd golconie guic to dien zha gac xquielmban to, dien pa tsiebannie to xcuerp to.

²⁴Golwi lo grē nga ganle, led yed ma ran, led yed ma rlaap, led yed ma rgot-sow pe guielgon, per row ma; sac Dios rdeed ncuane row ma. ¡Tel to gon, mazdraa non to lo grē mguin co! ²⁵Ni lalnu paat rquiinda tant tso to zhgab. Telne guiab to tso to zhgab dien zha gacnool xtse to spalal yeense, ¿niacxe zrieelo to gunnool tow? ²⁶Nanle to ganle led ncuane grieelod ga. ¿Pe nac dzigo tant tso to zhgab ncuane mazdraa nroob? ²⁷Zig nac lar, ¿pe nacne tant tso to zhgab dien pe gacwxab to? Pe rwide to lo grē guiee dzil ne ganle zēeb dan, zha rrooba, niow rluw, ni led yeda rio zhgab dien zha gacwxaba; ni gni naa lo to ganle, per ni rey Salomón con grē xab ni-

azh me, blud me scataa niow. ²⁸ Gase na ganle golwi, niicxe grē guiee dan co na, zna dze zob nguiaw, gzhe widz laaw bidzle, laaw tsecle, ni scataa niow rgacwxab Diosa; ¿pe leļ to dzigo ygacwxabd me, niicle ne squi gard guieñ to dib zdoo to gnalo to me?

²⁹ 'Tsodraa to zhgab sca, guiab to: "¿Pa griee pe dīoow ne, pa griee pe dio ne?"

³⁰ Grē miech ne runbeyd Dios, tibaque zhgab co rio zho. Sangue to, gołsoladz ganle Pxoż to men ne zob gbaa, nanle me pe nac grē xliaadz to. ³¹ Me nac men ne gneedz ncuaane yquii to, per ib none glo tsoxco to gban to zigne rnabey me.

³² 'Nli zhis to, pale tib dzoow win mēcwxiił yeen, per gdziebde to. Sac niicle zhis to, per rley Pxoż to men ne zob gbaa, laa me rneedz grēse ncuaane rap me lo to. ³³ Gacxe waa, laa ne tsonie guic to dien zha gacnroob ncuaane rap to, miñe quianie to gołtow, dzigo gołdeed dimi co yquii zha ne rappaa liaadz; zeena sca nroobraa guiełnzaac ne ygaa to gbaa. Guiełnzaac cosi, led yeda nitlo, led yeda grē, led yeda tsoxtseeb lo ngbaan, tsoxtseebгаа lo mxil.

³⁴ 'Sca golgun, sac gon guiełnzaac ne gunlo to, zaatne gunlo tow, ga gdziñ to.

¡Nsin golso!

(Mt. 5:25-26; 10:34-36; 16:1-4;
24:45-51; Mr. 8:11-13)

³⁵ 'Nsin sca golso —rēb me lo zho—. ³⁶ Golgac zig tib ngundziin ne rquiambēz gbire men ne rnabey zho zeene pa rie me tib lo guiełtsieel. Nsin rzo zho, zigne rdziñ me, rxal zho ro yu rzēeb me.

³⁷ 'Dichos zha ne nsin zo zeene laa men ne rnabey zho glanso. Ib tedsod, steed me zho nēz len yu, soob me zho lo mezh, csilo me mezhāl gdziib ncuaane gow zho. ³⁸ Nligaa dichos zha ne sca nsin so, horne glansotaa me; niicle tel wxina, ziadyiinigaa liuw. ³⁹ Golgan ganle, tel niaca miñe gacnan miech laa ng-

baan tsieban lidz zho guieel, per nanđ zho dien pa horpaaw, ¿niacxe zaaguies zho? Led sobna zho lēē, nsin nsin so zho parne csaand zho sēēb ngbaan lidz zho. ⁴⁰ Scaque to nagon, none sca nsin so to, sac gon lega naclew zeene gan to laa Mgui ne pxeel Dios ziaadle.

⁴¹ Zeene blozh sca bnee me, rēbchaa Pedr lo me:

—Maestro, miñe blozh bnee luu i, ¿pe par nose naca, te ye par grēraa miecha ye?

⁴² Pquiab me rēb me:

—Laaw rne naa, par grēse zha ne zienie guic zaacse gun zho miñe rnee men ne rnabey zho. Nligaa nsin none so zho, sac laa zho guiaannie zha ne nacgrē zho, zig riaannie tib ngundziin sangundziin zho parne gdeed zho ncuaane gow zho.

⁴³ 'Dichos zho, telne ine niowse noyun zho dziin co zeene laa men ne rnabey zho glanso. ⁴⁴ Zeene gan mew, ib tedsod so me zho, zha gnabey grēse ncuaane quianie me. ⁴⁵ Per tel tsienie wguic guic zho guiab zho gbireniobd me, csilo zho leļ csacsi zho grē zha ne biaannie zho, tso zho loxaque gowcho zho, loxaque gzudz zho, ⁴⁶ tibaque zeene gan zho laa me zole lo zho; ib tedsod hor cogazh ctiche me dziin co lo zho, gzonēz me zho guey zho zaatne no grēraa zha ne rond diidz. Nroob caxtigw ne cteed me zho.

⁴⁷ 'Sac gon zha ne sca nanle pe nac miñe racladz men ne rnabey zho, ni tsoxcod zho gun zhow; ible nroob nac caxtigw ne ted zho. ⁴⁸ Mazd lēētaa caxtigw ted zha ne peet nanđ, niicle gund zho miñe rnabey me. Grēse zha ne nanle pe nac miñe no gun zho, ib none gun zhow; nac cuent rii zig tib zha ne rcaania pe cos, tel palal miñe pcaania zho, none haxta nroobraaw ctsire zho.

⁴⁹ 'Niina ne laa naa zial, rrieequia zialzobgui naa lo guidzliu. ¡Ni zoot naa gon, tebaa ranle naa laaw quiaayzbel! ¡Tebaa psiaalle naa lo dziin ne zialgun naa!

⁵⁰ Per na naraa none teed naa tib guielñe noob, ni mbanse gon rac zdoonaa quiamböz naa gdziñ dze co. ⁵¹ ¿Masaque nan to na lëë, laa naa zial loxaque par cuiñ wense miech? Lëda gon, ye zial naa zialgunctil naa zho. ⁵² Sac desde len dze rii, yu ne no gaay miech, laa zho ct-solsa. Tel sëëb chop zho xnëz naa, laa stson zha ne guiaan ga, ctsidil zho; tel sëëbga tson zho, scaque grop zha ne guiaan ga, gandzed zho zho. ⁵³ Mëëd ne gan laa pxoz zho, laa xniaagaa zho bzëëb xnëz naa, gandzed zho pxoz zho, gandzed zho xniaa zho; scaquegaa zha ne quianie mëëda, zeene gan zho laa xingan zho, laa xindzoopgaa zho bzëëb xnëz naa, gandzed zho zho. Zha ne nac nguzhizha, zlëënie xniaa tsieel zho zho; tel xniaagaa tsieel zhow, zlëënie zho me.

⁵⁴ Blozhse sca bnee me, rëbchaa me lo grë miech ne ndxie ga:

—¡Pe nlipaa rnee to riende to pe nac grë ncuaañe noyac len dze rii! Zha zeene ran to rquia xcow nëz ne rzëëb ngbidz, znuse rien to laa guie guiab. ⁵⁵ Zeene rangaa to ziaad me nëz ne rzë ngbidz len mëë nal, nanle to laa nëëg gac. ⁵⁶ ¡Guie!wquiaalo i lo gon! Zha zëëb dzigo runbey to grë señ ne rlu zhan gbaa, rlugaa lo guidzliu, laa grë mine quiayan to len dze rii riende to.

⁵⁷ ¡None guien to tozhal cobey dien pe nac mine nonguiel gun to! ⁵⁸ Gzoob ne bdilnie to tib samiech to, laa to nole nëz zie to lo wxtis grop to. None guien to, laga no to nëz mazd golguiaan mpas, lëdle tsiezo zho to lo wxtis; sac tel laa to gdziñ lo wxtis, ib znabey wxtis zha ne co to ladzguiib. ⁵⁹ Ni nanle to ganle, grieede to ga, haxtaque lozh quizh to tel palal gac mult ne gnab zho lo to.

Grëse miech, ngoopdol nac zho

13 Len dze co, bdziñ bla zho lo Jesús bzodiidz zho lo me zha bnabey Pilat gut bla zha Galilé, lëëtse zeene no

zho len yadoo noyut zho ma ne nogogon zho lo Dios. ² Dzigo rëbchaa Jesús lo zho:

—Segur na lëë, rëb to mazdraa ngoopdol grë zha co lo grëraa zha ne no nëz Galilé, gane sca bdzieelo zho. ³ ¡Lëda gon! Zigtaa ngoopdol zha co, scaque to ngoopdol nac to; telne csaande to xquie!ntseeb to gbig to lo Dios, ye to znitlo to. ⁴ Scaque tsiimtson zha ne bgaadz yuglaa ne bixche Siloé, masaque rëb to nagon mazdraa ngoopdol zho lo grëraa zha Jerusalén, gane sca gut zho. ⁵ Per gacnan to ganle, jlëda! ¡Zig me naa ga, ye to miech ngoopdol nac to, ni telne csaande to xquie!ntseeb to gbig to lo Dios, ye to zdziñ dze ne nitlo to!

⁶ Dzigo bzodiidz me tib cuent lo zho, rëb me:

—Tib men name, zob tib zhan yag guigw lo xcuaa me zaatne quianie me lbë uv. Cad rdziñ mëë ne rquia guigw, rie me rieguib me nex low, per ib peet rquiad. Zeene goctaa tson iz, gon me sca rdeetew nex, ⁷ dzigo bnabey me zha ne quianap liu co cchuggazh zhow, rëb me: “¡Pchuggazh yag yozh qui, zhlëse zoba i! Nale rac tson iz ziyal naa rguib naa nex low, ni peet nex rneedzda.” ⁸ Dzigo pquiab zha ne quia dziin lo me ga, rëb zho: “Psaan dien guiaan stibtaa iz rii, na laa naa glë zhana, na laa naa gdziñ beeba. ⁹ Telne yquidaque nex low iz ne ziaad, maase cchug new dzigo.”

Biac tib zhuz ne nosacsi mendox

(Mt 13:31-33; Mr 4:30-32)

¹⁰ Tib dze ne rdziilladz zha Israel lo dziina, bdziñ Jesús len yadoo, psilo me noseed me miech.

¹¹ Lad grë zha ne noseed me ga, lad co no tib men wnaa nlengw nac zhits, gocle tsiimtson iz sca nosacsi mendox me, ib gacd gacnli me. ¹² Zeene gon Jesús me, dzigo bredz me me, pxobnia me guic me, rëb me lo me:

—¡Niinagazh gon, laa luu guiac!

¹³ ¡Horcogazh laa zhits me ga gocnli, rley me, psilo me rdeed me xquizh lo Dios! ¹⁴ Laa zha ne rnabey yadoo, zeene gon zho sca beenguiaç Jesús me dze co, blëe zho, rëb zho lo zha ne ndxie ga:

—Zha ne racladz guiaç pe lo guiełguidz, pe gacđ guiaad zho len dze ne rac dziin, ¡led tsođ zho guiaad zho guiaç zho dze nda rii!

¹⁵ Dzigo pquiab Jesús rëb me:

—¡Nazdpaa ntseeb to! Rquiaalo to ib peet dziin runde to dze rii. ¿Pezhe ga waa rui to zeene rsilaa to xcon to, rsilaa to xpurr to dze rii rieguie to ma nis?

¹⁶ Zha nac dzigo rzac to, nonguiełda nu ben naa beenguiaç naa wnaa rii, dze rii. Golwi ganle zha xtií Abraham nac me, len tsiimtson iz goc sca nosacsi mendox me.

¹⁷ Zha ne rlëe ga, zeene bin zho sca rëb me, ptoladz zho; laa grëraa zha ne ndxie ga, rley zho ran zho grëtaa milagr ne run me.

¹⁸ Blozh ga, bnee me rëb me:

—¿Zha ganle racnroob lo xtsiin Dios lo guidzliu rii? ¹⁹ Racnrooba gon zig rroob tib midz moxtaz ne ran zho dan rii. Tel midz moxtaza niicle tib midz winsew, zaatne racnwiw, rrooba, raca tib yag nroob; haxta rie grë mguin riezhiçcuaa ma zhiptsieez ma low.

²⁰ Ziaadaque gon gaca, zig ncobi.

²¹ Sac tel ncobiw, niipaquew rcots men wnaa tson lmud rin, ni dib nace ncob co rzibe.

Zha ne ycaania Dios

(Mt. 7:13-14, 21-23)

²² Laa Jesús no nëz zie me nëz Jerusalén. Guiedz ne rdedtaa me rseed me miech; zigtaa guiedz nrooba, zigtaa guiedz wina. ²³ Tib vuelt bnabdiidz tib zho lo me, dien pe zhis nac miech ne ycaania Dios. Dzigo pquiab me rëb me:

²⁴ —Nligaa zhis zho, sac masaque naca zig tib puert niase. Goltsoxco sca niinas-

raa golsëeb xnëz me ycaania me to, sac zdzin dze ne nzian zho gacladz sëeb, per grieelodraaw. ²⁵ Deque laa men ne rnabey csioog ro yu, telne biaan to nëz ley, niicle cuedzraa to me gnab to siguieł me cخال me ro yu sëeb to, per cخالdraa mew. “Runbeyd naa to”, gnë me, “nand naa dien cho zha to.” ²⁶ Niicle guiab to runbey me to, biaadpaa me ladz to pseed me miech, haxta downie to. ²⁷ “Laa naa nile”, gnë me, “runbeyd naa to. ¡Gunnetraa to naa, ib rdziguiend naa grë miech yozh, miech ngoopdoł ne nac to!”

²⁸ Mban gac to zeene gan to laa Abraham, laa Isaac, laa Jacob ni grëraa zha ne biadteed xtiidz Dios, laa me pcaania zho, laa to biaanse nëz ley. Nligaa mbandox gac to, zoon to, haxta zow lay to lo guiełnë co. ²⁹ Ni mazdraaw gon, zeene gan to pa lo guidzliu brieç grë miech ne bdzin ga, ine zobnie me zho lo xmez h me noyownie me zho. ³⁰ Grë zha ne rzac to niina peet nond, lëetse zha co ygaa guiełnzaac co; laa grë zha ne rzac non zho niina, peet ygad zho.

Bzeet Jesús zha nac zha Jerusalén

(Mt. 23:37-39)

³¹ Dze coquew, bdzin bla zha farisé rëb zho lo Jesús grieniob me ga, sac laa Herod racladz gut me. ³² Dzigo rëbçhaa me lo zho:

—Goltsie golguiaç lo mëz win co cخال me spalal, nadzese ni gzhe gunguiaç naa miech nu, zigtaa zha ne rzacnëw, zigtagaa zha ne nosacsi mendoxa; gal widz guiełdle naa nu. ³³ Nligaa nadzesew ni gzhe, widz laa naa gdziñle Jerusalén zaatne za naa! Sac ible Jerusalén, ga rut zho grëse zha ne riadteed xtiidz Dios lo miech.

³⁴ ¡Aque tow men Jerusalén! ¿Pe nacne squitaa nac to, rut to zha ne ziadteed xtiidz Dios lo to, rgoquie to grë zha ne rxeel me lo to? Blactaa gocladz naa

niacnie naa to, nquianaap naa to zig run nguid rgueedz ma xpëed ma, per bzhiguielde to. ³⁵Gacnan̄ to ganle, nadzetaa gon̄ laa lidz to guiaan̄ ngan, sac gandraa to naa, haxta gal̄ dze ne guiab to: “;Zha ndzontaa men̄ qui pxeel̄ Dios lo ne!”

Biac tib men̄ ne rriee gui

14 ¹⁻²Tib dze ne rdziiladz zha Israel lo dziina, güey Jesús lidz tib zha farisé ne nac zha non, sac bredz zho me tib wagw lidz zho. Bdzinaque tib men̄ bgui, rzacnë me, gdipse me no gui. Grëraa zha farisé ne ndxie ga, quialeets zho Jesús quiambëz zho dien̄ pe zunguiac me mgui co. ³Dzigo rëbchaa Jesús lo zho, ni lo grë maistr ley ne ndxie ga:

—Golnë dien̄, ¿pe nonguiela gunguiac naa miech dze rii, te nonguielda ye?

⁴Ni tib zho pquiabd. Horco pxobnia me guic mgui co, beenguiac me mgui. Blozhse bzonëz me mgui, ⁵rëbchaa me lo zho:

—¿Pe nli na peet dziin runde to dze rii? Tel̄ zha tsietsobe tib xpëed to, tib xmagaa to tib len̄ guiuu dze rii, ¿niacxe tsiebeegazhde to xpëed to, tsiebeegazhdga to xma to ga?

⁶Loxaque lo zho rac, ib bdzielz zho pe nquiab zho.

⁷Grëraa miech ne nodziñ ga, no zho rguib zho dien̄ zha yгаа zho zaatne nzhixcuaaraa sob zho. Gon̄ Jesús zha rac zho, dzigo bnee me lo zho, rëb me:

⁸—Golguien̄ gon̄, zeene znu cuedz miech to, zig nac tsie to tib wagw zaatne noyac tib guiel̄tsieel, ib gunde tsiesob to zaatne nzhixcuaaraa. Sac gon̄, nenda glanso tib zha ne nonraa lo to, ⁹lozh ga, laa zha ne bredz to lo lni guiaadliso to ga, gnë zho: “Guso i dien̄ sob men̄ rii.” Led tib guiel̄to ga par to, racse to laa to tsieso ga, tsiesob to zaatne rialle ro beel̄. ¹⁰Mazd ganle, zeene sca pa lo tsie to tib lo lni, ndooladz gol̄gac, tib lad gol̄sob.

Zha ne bredzle to lo lni, zeene gan̄ zho laa to zob ga, ziaad zho ziaad-xi zho to tsiesobnie zho to zaatne nzhixcuaa. Zha ne zoble lo mezh ga, zeene gan̄ zhow, ziannziuu to lo zho. ¹¹Golsoladz ganle: grë zha ne lëëque zha runnon zho, lel̄ riaan̄win zho; laa zha ne riaan̄win, runnon miech zho.

¹²Blozh ga, rëbchaa me lo men̄ ne nac lidz ga:

—Scaque luu gon̄, zeene cuedz luu miech guiaad zho tib wagw lidz luu, tsod luu loxaque zha ne ndzieeldiidz luu, loxaque zha bets luu, zha lidzse luu, lo grëгаа zha ne no gax lidz luu zha ne rapchense, zha cose cuedz luu; sac gon̄ ib tedsod zbedzaque zho luu lo zhilni zho, stsire zho mine been̄ luu ga. ¹³Mazd bredz grëse miech, zig nac zha ne guiend̄ pe yquiin, zig nac zha ne guiend̄ tib nia, zha ne guiend̄ tib ni, zha ne roldgaa lo; ¹⁴zeena gal̄ dze ne grieeban grë zha ne bioxco wban zigne racladz Dios, ine gley luu yгаа luu guiel̄nzaac ne tsieguial̄ luu gneedz me lo luu.

¹⁵Lad zha ne zobgrë me lo mezh ga, pquiab tib zho rëb:

—;Dichos grë zha ne sca yгаа tsiesob lo mezh, tsietownie zho Dios zaatne rñ-abey me!

¹⁶Pquiab Jesús rëb me:

—Tib men̄ name, nzian zha ne bredz me tsie tib wagw lidz me. ¹⁷Zeene gol̄ dze ne laa guiel̄wagw co gac, pxeel̄ me tib zhingundziin me ziexi grë zha co. ¹⁸Per pasë zho nie, zhaase zhaase ncuaane pquiaqui zho. Tib zho rëb: “Grieelod së naa, sac laa naa pca tib lë liu, ni lëëtse nadze no gaso naa low; bzhiguiel̄ gudz lo me gun̄ me naa dispenser.” ¹⁹Stib zho rëb: “Niina wriin̄ pca naa gaay nëz ngon, laa naa no ganie ma dien̄ zha run̄ ma dziin, gudz lo me yquiambëzd me naa.” ²⁰Laa stib zho rëb: “Grieelod së naa, sac niina wriin̄ ptsieel-

nia naa, bzhiguiel gudz lo me gacd guial naa.”

²¹ 'Bdziņ ngundziin co bzodiidz zho lo me zha rzë xtiidz grë zha co. Zeene bin mew, wbiñladz guic me, bnabey me zho güey zho dib lad guiedz güeyxi zho grë zha ne guiend pe yquiu, grë zha ne guiend nia, zha ne guiend ni, zha ne roïd lo, grëse zho bdziñnie zho ga. ²² Blozh ga, rëbchaa zho lo me: “Laa naa wbirele xmandad luu gon, per scaase nora zaa- atne cue miech.” ²³ Dzigo pxeel me zho stib, rëb me: “Güey dib ro guiedz, zha ne gdzieeltaa luu, dënie zho nëz rii, bloo guic zho guiaad zho; ib none tsodzëse miech lidz naa. ²⁴ Sac grë zha ne bredz naa glo ga, ni lalnu racladzdraa naa ygaa zho guielwagw rii.”

Zha ne racladz sëeb xnëz Jesús

(Mt. 10:37-38)

²⁵ Laa Jesús no nëz zie me nëz Jerusalén, miech guizhiu ne nañ zhits me. Tibaque ptsire lo me bui me lo grë miech co, rëb me lo zho:

²⁶ —Lo grë to ne ziaadnañ to zhits naa, gacnañ to ganle zha ne racladz ygab xnëz naa, ib none gleynie zho miñe rnabey naa. Sac zha ne mazdraa rleynie pxoz, mazdraa rleynie xnгаа, mazdragaa rleynie zho tseel zho, xpëed zho, bets zho, bziangaa zho, xquielmban zhow, rquia zdoo zhow, peet xtsiind grë zha co par sëeb zho xnëz naa. ²⁷ Sac ni tib zha ne sca yquia zdoo cueeladz zho zho guiaadnañ zho zhits naa, grielod ygab zho lo naa. ²⁸ Antes ne yquiabladz to sëeb to xnëz naa, none wen wen sob to dien pe zlëb to ted to miñe rieguañ to. Zig nacse tib zha ne gzaa tib yu glaa ne gac chop tson xcuua, led rzobgagh zho rbee zho cuent dien pe zгаа xtimi zho tsaalow. ²⁹ Sac gon nenda loxaque cueeze zhow, ni lozh ga grielod gzaalo zhow. Miech ne gaa laa zho gzhidznie zho, ³⁰ guiab zho: “Golwi

lo zha qui ganle, loxaque bleeze zho lidz zho, na blëbd zho nzaalo zhow.”

³¹ Scaque rey ne no tilnie stib rey, led none sobgagh zho gan zho dien pe zlëeb tsii mil xmenguiib zho tsietilnie gal mil xmenguiib stib rey co. ³² Telne rgobey me lëbd me, laga bii zit ziaad stib rey co, rxeel me bla zha ne tsie tsienee dien zha gataa cuëz lo xtil zho.

³³ 'Scaque to nagon none glo gwi to pe nac grë ncuuaane no csaan to, parne grielo ygab to xnëz naa. ³⁴ Sac gon zed ne nzhid, ¿pa dien yquiina? ³⁵ Per ni par gaca beeb peet xtsiinda; miñe ractaaw, laaw rziaab. Zha ne no liaadz guien zho pe rnee naa, yquiaadiag zhow.

Zha rzac Dios zha ne zozit lo me

(Mt. 18:10-14)

15 Zeene rseed Jesús miech, nzian grë zha ne rtop dimi ne razh lo zha Roma, ni grë zha ne rzoob miech nac zha yozh, ye zho rbig zho rquiaadiag zho zhiwseed me. ² Nacne grë zha farisé ni grë maistr ley, rneenë zho me, rnee zho lëda ga run me sca rtsieelsa me grë zha co, rownie me zho. ³ Dzigo bnee me lo zho, rëb me:

⁴ —Togase nadien, gzoob ne quianie to tib gayoo mëcwxiil, ni lega naclew rziaab tib ma, ¿zha dien run to? Led rsañ to ma ne ndxie lo to ga lëë, laa to rie rieguib to ma ne bziaab ga, haxta rdziel to ma. ⁵ Zeene rdziel ma lo to, lo guielbley co haxta rxobyan to ma rdziñnie to ma ro yu. ⁶ Lëëlëd rzodiidz tow lo zha ne ndzieeldiidz to, lo zha ne no gax lidz to, sac rley to laa xpëcwxiil to briequia. ⁷ Gni naa lo to ganle, scadaa nagon rzac Dios, tib guielbley nrooba lo me, zeene ran me laa tib zha ngoopdol rsaan xquielntseeb, laa zho rbig lo me. Ne nligaa tib guielbley rac zha co lo me, lëdle zha ne rzac miech wenle nac zho lo me.

⁸ 'Zig rzacгаа tib men wnaa, gzoob ne nzhen me tsii gayoo pes, ni lega naclew

rsëeb me tib gayoow, ¿zha dien ruñ me? Led hor cogazh lëë rquiaa me biini, rsilo me dzega dzega rloob me leñ lidz me haxta rdziel me dimi co. ⁹Zeene rdziel mew, rley me rzodiidz mew lo grë zha ne ndzieeldiidz me, lo grë zha ne no gax lidz me. ¹⁰Zig rne naa ga, scadaa nagon rzac grë xanjł Dios, tib guiełbley nrooba lo zhe zeene ran zho laa tib zha ngoop- dol rsaan xquiełntseeb, laa zho rbig lo Dios.

¹¹Dzigo psilo Jesús bzodiidz me tib cuent lo zho, rëb me:

—Tib meñ name quianie me chop meëdbgui. ¹²Tib dze, rëb zha ne nac zha niab lo me: “Papá, tel pe nac ncuaañe no gneedz luu lo no, bzhiguiel niinaga been- grola, zeena gneedz luu miñe raguiäl naa.” Dzigo beengrol me ncuaañe rap me, bdeed mew lo zho.

¹³Zhisaque goca, pto zha niab co grëse ncuaañe bial zho, brie zho laa zho zie. Bdziñ zho stib dan, ga been zho grë guieylozh ne gocladztaa zho, grëse xtimi zho pxin zho ga. ¹⁴Tibaque zeene laa xtimi zho blozh, mbanse rac zho guien- draa pe gow zho, ni lëëtaque leñ dze co laa tib gbin psiloque nëz co. ¹⁵Dzigo racse zho güeyguib zho dziin lad guiedz co, ga briequia tib meñ co bree zho, px- eeł me zho yquiaanap zho nguts. ¹⁶Lo gbin ne noded zho ga, rzac zho tebaa cho gdeed maase grë duuzhye dan ne row grë nguts co gow zho, per ni miñ co choot rdeete lo zho.

¹⁷Sca no zho ga, tibaque zeene biao zho biini psoladz zho nzian zha ne quia dziin lo pxoz zho, grë ncuaañe racló row grë zha co, haxta riaana, ni laa zho sca noded ga; rëbchaa zho: ¹⁸“Mazd miñe naca laa naa guia gdziin naa lo pxoz naa stib, guiep naa lo me gun me naa per- don grëtaa falt ne beñ naa lo me, falt ne bengaa naa lo Dios. ¹⁹Maase sacdraa me naa zig xpëed me, siguiel me ycaania me naa gac naa zig tib zha ne quiaze dziin

lo me.” ²⁰Horco bio zho nëz laa zho zey nëz lidz pxoz zho. Zitraa ziaad zho laa me gonle zho, pquia zdoo me zho gon me zha rac zho; rias me güeydzieelo me zho bnaaz me nia zho, bdeedz me zho.

²¹“Papá”, rëb zho lo me, “rien naa nroob falt ne beñ naa lo Dios, bengaa naa lo luu. Rieguiäl draa sac luu naa zig tib xpëed luu.”

²²‘Ni blëzd me nlozh nee zho, lëëlëd bredz me zha ne quia xtsiin me, rëb me: “iNa goltënie tib nëz lar wen nu gacw xpëed naa! iGoltënie tib nil wen tso nia me, tib nëz guiełguid cub yquia ni me!” ²³Bnabey me zho güeyxi zho tib ngon ne mazdraa ndaan, beet zho, rëb me: “iIb none gac tib lni, none dioow ne, none dio ne! ²⁴iSac gon gun naa cuent, briebeban xpëed rii naa! iBnitle me ga, na laa me bdziel!” iLaa lni psilo!

²⁵‘Lni co noyac, zeene laa stib xpëed me zha ne nac zha gol ga, wbiere lo dziin dan. Bdziñ zho gax ro yu, rlu rquia di, haxta wiee rlu noyac; ²⁶dzigo bredz zho tib zha ne quia dziin lo pxoz zho ga, bnabdiidz zho dien pe lni ne noyac. ²⁷Dzigo rëbchaa zha co: “Bets luu blanso, gane squitaa bnabey pxoz luu noyac lni; rley me gon me mban zho laa zho blanso. Bnabey me gut tib ngon ne mazdraa ndaan.” ²⁸Blëë zha gol co bin zhow, lo guiełblëë co bzëëbd zho ro yu. Nacne brie pxoz zho, bnee me lo zho sëeb zho ro yu. ²⁹Dzigo rëbchaa zho lo me: “iLëdraaw i gon papá noyün luu! Bui ganle blactaa iz ne quia yün naa dziin lo luu, waltaa gard quits naa tib xtiidz luu. Ni zha rna tib dze, siquier tib chiv yeen ygad luu lo naa, gownie naa grë zha ne ndzieeldiidz naa. ³⁰Cho dzigo nac zha qui, blozhse güeyloozh zho xtimi luu lo grëtaa guieylozh ne been zho, na no luu beet luu ngon ne mazdraa ndaan, noyün luu zhilni zho.” ³¹Dzigo rëbchaa me lo zho: “Nliw xin, ni lalnu gard csaan luu naa, gacxe waa grëtaa ncuaañe quianie

naa, luu guiaanniew. ³² Per niina ne laa bets luu blanso, ib nonguiela znu dziuun ne tib lni gleynie ne me; sac gon bnit me, ni na laa me bdziel. ¡Dziuun ne cuent brieaban me nu!”

Ligier miech par lo guielntseeb

16 Tib vult bzodiidz Jesús tib cuent lo xpëedscuel me, rëb me:

—Tib men name nroob rapchen me, quianie me tib zha ne zo lo grëtaa ncuaañe rap me; tib dzew, lega nacle bded diag me zhliian noxin zha co xtimi me. ² Dzigo bredz me zho, rëb me lo zho: “Lëda i gon squi run luu, lega noxin luu xtimi naa. Niinaga racladz naa guiaadnie luu cuent nu dien zha quiayun luu dziin; sac grielodraa so luu lo grë ncuaañe rap naa.”

³ Wbire zho ga, rëb zho: “Zha na ganle gun naa, telne guiab ne ga naa dziin dan, lëbdraa naa gun naa dziin co; tel guiaab-gaa ne na ga naa gatop naa gon, rtoladz naa gnab naa gon lo miech.” ⁴ Tibaque zeene biab guic zho rëb zho: “¡Laa naa bienle zha gun naa, zeena tso zha ne gun xyudar naa zeene laa naa grie lo xtsiin men rii!”

⁵ Dzigo psilo zho bredz zho zha ne quia guielqui lo men ne quia zho xtsiin ga. Bdziñ tib zha co bnabdiidz zho lo zho dien palal nzëeb zho lo me. ⁶ Rëb zha co: “Tib gayoo tamb nceit nac mine nzëeb naa lo me.” Dzigo rëbcha zho: “Nliw, lalga quia lo tib val ne psan luu nu. Ledaa val co nu, zac ctsieez luuw; bzhixcuaa stiba, pquiaa lo co, grol tamba zëeb luu.” ⁷ Bdzinaque stib zha co, bnabdiidz zho lo zho dien palal nac xquielqui zho lo men co. Zha co rëb zëeb zho tib gayoo sac zhobxtil. Dzigo rëbcha zho: “Nliw, lalga raquiet lo val ne psan luu; per na zac ctsieez luu min rii, bzhixcuaa stiba, pquiaa lo co tapgalaque saca zëeb luu.”

⁸ Zeene bien men co zha noyun zho, bzee zdoo me gon me scataa ndzielguic zho. Ncuaañe ntoladza, per grëse miech ne zienal ncuaañ lo guidzliu rii, ndzielguic zho par gon zho grë guielntseeb. Par min co ndziibraa ndzielguic zho lo zha ne no xnëz Dios. ⁹ Sangue to gzoobladzde to gon to min co, ncuaañe rap to lo guidzliu rii, golquiina per par gon to xyudar samiech to. Zeene laa ncuaañ co grë, nenda zacnie zho to, per mine mazdraa non Diossi ible zacnie me to, zneedz me tib lugar ndzon cuëz to, led yedraa ga pe nitlo.

¹⁰ Zha ne ndzinli rundziin tel palal yeense ncuaañe riaannie zho, scaque ndzinli gundziin zhow zeene guiaannie zho nrooba. Laa zha ne ndzinlid, mine gun zho zeene guiaannie zho ncuaañ zhis, mincoque gun zho zeene guiaannie zho ncuaañe nroob. ¹¹ Nana zha ne sca gacd ne ndzinlise gundziin zho ncuaañe no lo guidzliu rii, zha dzigo grielo gundziin zho ncuaañ ndzon ne gdeed Dios lo zho zaatne no me? ¹² Stiba, tel sca ndzinlide to lo chen ben, zpe naczhe ncuaañe gun to tib ncuaañe chenpaa to? ¹³ Golgona ganle, grielod gon gleynie to dimi ni gleynieque Dios. Ib none telne Dios rleynie to, me none gleynie to, togo dimigaaw, dimi golleynie.

¹⁴ Grë zha ne nac farisé zeene gon zho sca rnee me, lel rzhidznie zho me, sac tel zhaw rleyniedox zho dimi. ¹⁵ Dzigo rëbcha me lo zho:

—Masaque rzac to nalë nli miech wen nac to nëz lo Dios, sangue me gon, wen wen nan me zha nac zdoo to. Nli miech ne ran to, zha wen rzoob zho to; sangue Dios ni lalnu rzacd zdoo me mine run to.

¹⁶ Len dze ne gard guiaad Juan Bautist, niapse xley Moisés ni grë mine bnee zha ne biadteed xtiidz Dios, min co nac mine güeynal to. Per zeene psilo Juan pseed me miech, desde hor co laa

miech quiayacnan stib mod ne grieelo yгаа zho zaatne rnabey Dios; gane na nzian zha ne noxco yгаа lugar co. ¹⁷ Per guiabde to togo nondraa ley, sac grëse mine zhobnee lo ley, jib laaw none gac! jZig nac guidzliu, zig nac gbaa zrieelo nitlow, sangue ley nitloda, tibaque naca! ¹⁸ Gacxe waa, grë zha bgui ne rsëbt-sieel niina ni rtsieelnia zho stib wnaa, zha ne rtsieelniaгаа tib wnaa ne psëëbt-sieel, dol ga quiayun zho; zigtaa dolja padzeela, scaque niina dolja.

Xcuent tib zha prob lë Lazh

¹⁹ Tib ricw name —rëb Jesús—, niapse grë lar niazh racw me, gzobse dze run me lni lidz me. ²⁰ Zaatne noque me ga, guiedz co no tib zha prob lë Lazh, lala prob me ni rlanaque me guiedz, gdipse lad me noyacnë guiedz co. Riese me riesob me ro lidz zha ricw co, ²¹ rquiambëz me dien pe grieelod gow me maase ncuane rrieengaale lo xmez h men co; ga zob me haxta rdzin grë mëcw rzëëludz ma lo guiedz ne rlan me ga.

²² Bdzin dzew laa Lazh gut, dzigo biet xanj Dios beynie zho me lo Abraham, zaatne rdzin grë zha wen. Goc palal dzew, laa men ricw co gutaque, blozhse pquianap zho me, laa zho güeyqueets me; ²³ zeene biao me biini laa me nole gabil. Lëbdraa me no me lo guieinë co, lega naclew blis lo me, zit squi gon me Abraham, laa Lazh zobnie Abraham ga. ²⁴ Horco bnab me lo Abraham siguiel Abraham cxeel me Lazh, maase guic mzhugniase Lazh yquiaa Lazh nis tsiegadz Lazh lo ludz me; sac lëbdraa me lo guidox ne no me ga. ²⁵ Dzigo rëbchaa Abraham lo me: “Xin, psoladz ganle zeene wban luu lo guidzliu, ncuane gocladztaa luu pquianie luuw; laa Lazh mbanse bded me. Nagaa na, me nac men ne nogaa noyan guieibley, laa luu bgaa squi no luu lo guieinë qui. ²⁶ Stiba, zha ne no nëz rii gacd guiaad zho i, niicle

zha ne nogaa iw, gacd guiaad zho nëz rii; sac no tib yeedox ne rtse.” ²⁷ “Bzhiguiel sca”, rëb men ricw co, “pxeel Lazh tsie me lidz pxoz naa, ²⁸ tsienie me diidz lo zgaay bets naa zha ne biaan, guiab me lo zho ib gund zho mine ben naa, zeena guiaate zho nu yгаа zho lo guieinëdodox rii.” ²⁹ Pquiabchaa Abraham, rëb Abraham: “Tel mincow, tsow glab zho lo grë ley ne psan Moisés, lo grë mine bnee grë zha ne güeyteed xtiidz Dios, benque lo co zhobnee zha no gban zho.” ³⁰ “Nliw”, rëb me, “per tel squi tib men ne gutle tsie tsieene lo zho, rien naa znuse csaan zho xquieintseeb zho gbig zho lo Dios.” ³¹ Dzigo rëbchaa Abraham: “Telne rond zho mine rnabey grë ley ne psan Moisés, grë mine bnee zha ne güeyteed xtiidz Dios, scaque gond zho diidz niicle tsie tib zha ne brieebanle tsieene lo zho.”

Zha ne guntal xtol stib zho

(Mt. 18:6-7, 21-22; Mr. 9:42)

17 Tib vult rëb Jesús lo xpëedsuel me:

—Nac lo guidzliu rii, ib gulfalte ncuane rgogui miech guntal zho xtol zho, jper probsaxe zha ne rquiil samiech runctal zho xtol zho! ² Mazd zhi guieinëw lo zho ygadoo tib quie molin zhobxtil yan zho tsieron zho zho nis-doo, lëdle guieinëdodox ne gan zho; sac gon dol nroob ga gun zho yquiil zho zha ndooladz ne no xnëz naa. ³ jGolguien sca ndzinli golgac! Tib bets tow, zeene pe tib falt gun zho lo to, golnee lo zho gundraa zhow; telne gnab zho perdon, golgun zho perdon. ⁴ Niicle telne nzian vult sca gun zho falt lo luu tib dze, been zho perdon zeene laa zho rbig rnab zho perdon lo luu.

⁵ Stib dzew, rëb zha ne rzënie me lo me:

—Bneedz guieibiini lo no dib zdooraa no gnalo no Dios.

⁶ Pquiab me rëb me:

—Tel̄ niaca miñe gzoob ne rnalole to Dios siquier lal tib midz moxtaz, niicle ncuaañe mazdraa ngan̄ gnab to lo me, zun̄ mew.

⁷¿Pe ran̄ to gan̄le, zha nac zha ne run̄ xtsiin̄ beñ? Zeene rbire zho dan, yase güey zho gon, güeygaa zho güeyquianap zho ma, pe liaadz meñ ne quia zho xtsiin̄ ga, guiab me lo zho: “Na bded, bzob, zeena gowtsee luu.” ⁸Miñe run̄ me, gloque rnabey me zho gun̄lo zho ncuaañe gowtsee me, gdziib zhow lo me; rlozhraa row me, dzigora rowxtsee zho. ⁹Niicle scataa ron zho miñe rnabey me, ni rlozh ga, per ni xquizh rdeete me lo zho. ¹⁰Scaque to nagon, zeene lozh gun̄ to grè dziin̄ ne pso Dios to gun̄ to, peet yquiambëzde to, golguien̄ tib ngundziinse nac to, miñe rieguañ to ga, miñ co been̄ to.

Biac tsii zha ne rlan guiedz lepr

¹¹Laa Jesús no nëz zie me nëz Jerusalén. Laa me zieded tib guiedz win ne riaan̄ zaatne ndzieel xtan Samar xtan zha Galilé, ¹²zeene brieequia tsii zha ne rlan guiedz lepr. Zit zo zho, ¹³nguedz rbedz zho me, rnab zho lo me yquia zdoo me zho. ¹⁴Zeene gon̄ me zho, rëbchaa me lo zho:

—¡Gol̄tsie, gol̄tsielulo lo pxoz, zeena gan̄ zho gan̄le laa to biacle!

Dzigo laa zho zie. Nëz no zho laa zho biaan̄mbe lo guiedz co. ¹⁵⁻¹⁶Lo gza zho, hor co rias tib zho wbire, nguiedz rnee zho:

—¡Zha ndzontaa Dios! ¡Gol̄wi gan̄le laa me beenguiacle naa!

Zigne bdziñ zho lo Jesús, pquitsgzhib zho lo me, haxta bdziñ lo zho lo liu, rdeed zho xquizh lo me. Tib zha Samara, zha zit nac zho. ¹⁷Dzigo rëbchaa Jesús:

—¿Yoraazhe grè zha co waa? Conque tsii zho name beenguiac naa. ¹⁸¿Tibaque zha zit rii dzigo lëë rzac zdoo miñe been̄ Dios lo zho?

¹⁹Dzigo bliso me zha co ga, rëb me lo zho:

—Porne dib zdoo luu gon̄ bnalo luu Dios, gane biac luu. Bzë, peet tsieniedraa guic luu.

Zeene gbiire guiaad Mgui ne pxeel Dios

(Mt. 24:23-28, 36-41)

²⁰Tib dze bñabdiidz zha farisé lo Jesús, rëb zho:

—¿Poc dzigo csilo gnabey Dios lo ne? Dzigo pquiab me rëb me lo zho:

—Gacnan̄ to gan̄le, nacd miñ co ncuaañe gan̄lopaá miech. ²¹Grieelod guiab zho laaw psilo nec, laaw psilolegaa nëz rii; sac gon̄ tel̄ niina laa me quianabeyle nu.

²²Bded ga, rëbchaa me lo xpëedsuel me:

—Zdziñ dze, gacladz to tebaa zha znu so naa lo to maase tibaque dze, per gacdraaw. ²³Len̄ dze co, zio zha ne gnë lo to: “Golt̄ gan̄le laa Mgui ne pxeel Dios bdziñ nu”; gnëgaa zho pa stib lugar none tsie to par gan̄ to naa; tsienalde to, gliladzde to xtiidz zho. ²⁴Sac zeene gbiire guiañ naa, grëse miech gan̄a. Zig nac tel̄ guiab tib belye nroob ne glu zhan gbaa desde nëz ne rlan ngbidz haxta nëz ne rzëëb ngbidz, ¿niacxe gand̄ grëse miecha? ²⁵Per ansraa ne gac miñ co, ible nroob guieñe ne cteed miech rii naa, ni lalnu gand̄zed zho naa. ²⁶⁻²⁷Len̄ dze ne guiañ naa ga, grë miech ne ndxie lo guidzliu gal̄ hor co, zhaa grë ncuaañe tsonie guic zho. Rsoladz to gan̄le zha rac miech len̄ dze ne biaan̄ Noé, leñ lo grë zhilni zho no zho, zha ne notsieelnia, zha ne nobediin̄ xpëed, tibaque zeene biaan̄ zho biini laa guiedox co psilole. Laa Noé nole len̄ barcw, laa zho biaan̄ grëse zho bñitlo lo nis co. Scadaa nagon̄ no miech len̄ dze ne guiañ naa. ²⁸Zig racgaa miech Sodom len̄ dze ne brie Lot ga. Scaque, lox- aque ncuaañ lo guidzliu rii noxco zho,

zha ne no lo zhilni, zha ne no zhiwto, zha ne nozigaa, zha ne quia gon, zha ne quiazhixcuaagaa lidz. ²⁹ Lega naclew, zeene laa Lot bricee, hor co laa tib guidox biet gbaa, notsa zufr bliaala lad guiedz co, grëse miech co bnitlo lo guidox co. ³⁰ Scapaa nagon rac miech ne ndxie lo guidzliu len dze ne laa naa guial.

³¹ 'Zha ne lëetaque hor co no glaa guic yu, ib guiabd zho sëeb zho len yu tsiebee zho ncuaaane no len lidz zho, zha ne quiagaa lo dziin dana, ib guiabd zho gbi zho guey zho ro yu. ³² ;Gol|soladz ganle zha bzhaac wnaa ne goc tsieel Lot! ³³ Grëse miech, zha ne sca rquianë zdoos grë ncuaaane rap zho, ible znitlo zho xquielmban zho; sangue zha ne rquiad zdoos grë ncuaaan co, haxta xquielmban zho rbeeladz zhow, nitlod zho. ³⁴ Gal hor co, zaatne tipse nixguies chop zho, tib zho sënal zhits naa, laa stib zho guiaan. ³⁵⁻³⁶ Zaatne tipse quiayot chop wnaa, zaatne tipsegaa quia chop mgui lo dziin dana, tib zho sënal zhits naa, laa stib zho guiaan.

³⁷ Dzigo rëbchaa xpëedscuel me lo me:

—;Pa lo dzigo gdziñ grë zha co?

Pquiab me rëb me:

—Horco bii zlu ganle paw. Zig nac grë pech, zaatne nix magut ga rdziñ ma.

Zha ne rnab lo Dios

18 ¹⁻² Stib dzew, bzodiidz Jesús tib cuent lo xpëedscuel me, par guien zho ib guiaan zdoos zho zeene racniobd miñe quianab zho lo Dios, rëb me:

—Tib guiedz name, no tib men co nac me wxtis, ni palal rquiad zdoos me samiech me, per ni Dios rdziebd me. ³ Guiedz coque no tib zhuz viud, gzobse dze rie zhuz co rienab zhuz gun me guielwxtis, cuedz me tib zha co rlëe lo zhuz. ⁴⁻⁵ Glo ib rquiaadiagd me miñe rnab zhuz co, per zeene goc palal dze gon me tibaque quia men co quianab me gac guielwxtis, dzigotaa rëb

me: “Ncuaaane lëbdraa guic naa lo men rii, tibaque squi quia me. Nli rdziebd naa Dios, niicle nodgaa naa liaadz pe rzac miech, per parne guiadgunneetraa me naa, miñe naca mazd laa naa gun guielwxtis ne rnab me.”

⁶ Blozhse bzodiidz Jesús cuent co, rëbchaa me lo zho:

—Telne sca bdziñ dze ne pquiaadiag zha ntseeb co miñe bnab wnaa viud co, ⁷ ;pe lel Dios dzigo yquiaadiagd xtiidz zha ne ngab lo me, tel tibaque gnab zho miñe racladz zho? ⁸ ;Nligaa, ib tedsod zun me miñe rnab zho! Per segur zhis zho quiambëz gac xquielwxtis me, zeene laa naa guial stib.

⁹ Laa grë zha ne riats, zha ne rzac masaque zha wen nac zho nëz lo Dios, haxta rbix zdoos zho ran zho grëraa miech, bnee Jesús lo zho, rëb me:

¹⁰ —Chop zha name, bdziñ zho len yadoo ziezodiidznie zho Dios. Tib zho nac zha farisé, stib zho nac zha ne rtop dimi ne razh lo rey Roma. ¹¹ Zha ne nac farisé ga, psilo zho rnee zho: “Dios, rnedz naa xquizh lo luu, sac nacd naa zigne nac grë miech ngoopdol, zig nacle zha ne zo i. Wlaltaa rund naa guielggaan, rund naa guielntseeb, niicle rquiangoobd naa stib wnaa. ¹² Haxta chop vuelt rcuan naa tib len zhmal, grëse ncuaaane run naa gan, run naaw tsii lal, rnedz naa tib lal miñe rieguial luu.”

¹³ Laa zha ne rtop dimi ne razh Roma ga, gaxaque ga zo zho, per nquitsrunse zho liu. Mban rac zho, quiase nia zho zdoos zho, rnee zho lo Dios: “;Dios, rnab naa lo luu pquia zdoos naa znutaa miech ngoopdol nac naa!”

¹⁴ 'Gneli naa lo to ganle —rëb Jesús—, mazdraa gon wen biaan recaudador co lo Dios, lëdle zha farisé co. Sac zha ne lëëque zha runnon zho, racnond zho lo Dios, laa zha ne riaanwin, runnon me zho.

Beenlay Jesús mēēdlas

(Mt. 19:13-15; Mr. 10:13-16)

¹⁵ Tib dze, nzian men ne bdziñ lo Jesús, bdziñnie zho xpēēdlas zho lo me, parne cxobnia me guic win gunlay me win. Grē zha ne nac xpēēdscuel me, leļ psilo zho ndox zho lo grē zha ne bdziñnie grē mēēdlas co. ¹⁶ Zeene gon me sca quiayun zho, dzigo bredz me zho, rēb me lo zho:

—Ķtsirede to grē mēēdlas yeen qui! ĶGolsaan guiaad win lo naa! Sac gon grē mēēdlas yeen qui, ni zha ne nac zig nac win, zha co nac zha ne sēēb ygab lo Dios. ¹⁷ Nligaa zha ne gacndooladz, zha ne gliladz dib zdoo, zigne run grē mēēdlas, grieelod gdziñ zho zaatne rnabey Dios.

Ncuaane run dimi

(Mt. 19:16-30; Mr. 10:17-31)

¹⁸ Tib vuelt, wbig tib men ne nac zha non lo menguedz Israel, rēb me lo Jesús:

—Nan naa luu nac tib men ne noseed miech, ni tib men wen nac luu, Ķbnē lo naa dien, pe nac miñe gun naa parne grielo ygaa naa guielmban ndzon ne gdziñd dze lozh?

¹⁹ Pquiab Jesús rēb me:

—Rnee luu lēē tib miech wen nac naa. ĶNligaaw, Diosse gon nac men wen! ²⁰ Telne nli racladz luu ygaa luu guielmban co, none tsoxco luu gban luu zigne nac Xley Dios. Nanle luu ganle zha naca, rneew:

Tsonied luu zha ne led tsiield luu,
gute luu samiech luu,
cuand luu samiech luu,
yquiadiidzguizhd luu samiech luu.

Gon pxoz luu, gon xniaa luu, cued luu xquielto me.

²¹ Dzigo rēbchaa men co:

—Maestro, grēse miñe bzeet luu i, ni tiba gard quits naa wlal ne nac naa zha nguieg.

²² Horco rēb Jesús lo me:

—Stibaque miñe rquiin gun luu. Güey, güeyto grēse ncuaane quianie luu, dzigo bdiiz dimi co lo grē zha mban ne guiend pe yquiin; sca nroobraa guielnzaac ne ygaa luu gbaa. Lozh ga, dē, dēnal zhits naa.

²³ Zeene bin men co sca rēb Jesús, mbanse rac me laa me zey; sac nroob ncuaane quianie me. ²⁴ Dzigo rēbchaa Jesús lo xpēēdscuel me:

—Ķzha ngantaa lēē, rzac zha ne squi rapchen sēēb zho xnēz Dios gnabey me zho! ²⁵ Mazd ngandse rded tib camell guieer guzh.

²⁶ Grē zha ne ndxie ga, zeene bin zho sca rēb me, rneechaa zho:

—Telne scataa ngan sēēb miech xnēz Dios, Ķchosezhe dzigo waa nac zha ne zrieelo sēēb xnēz me?

²⁷ Dzigo rēbchaa Jesús:

—Nligaa par miech, zootle tsod zha ne grielo sēēb xnēz me; sangue me nan me no zho. Sac tel me, tsod ncuaane grielod gun me.

²⁸ Horco pquiab Pedr, rēb Pedr lo me:

—Tel no, grē ncuaane rdziaapse no psan now, laa no ziaadnal zhits luu.

²⁹ Pquiab me rēb me:

—Golgacnana ganle, grēse zha ne psan lidz, psan zho tsiel zho, psan zho xpēēd zho, psan zho pxoz zho, psan zho xniaa zho, psan zho bets zho, bziangaa zho, porne bzēēb zho xnēz Dios, ³⁰ na lo guielmban riique, mazdraa nroob miñe gan zho, ni lozh ga ib tedsod zgaa zho guielmban ndzon ne gdziñdraa dze lozh.

Bzeet Jesús stib zha csacsi miech me

(Mt. 20:17-19; Mr. 10:32-34)

³¹ Ne sca no Jesús nēz zie me nēz Jerusalén, tibaque bredz me gza tsiipchop zha ne rzēniepaa me ga, bzeet me lo zho zha gun miech me, rēb me:

—Grēse miñe bzeetle zha ne biadteed xtiidz Dios padzeela teed naa, niina ne laa ne gdziñ Jerusalén, laaw gac

cumplir. ³²Ga gnaaz zho naa, tsielo zho naa ladznia grë zha ne nacdraa zha Israel, xidznie zho naa, squiaago zho naa, stsuc zho lo naa, ³³zguin zho naa, ni haxta zut zho naa. Per zeene gac tson ng-bidza, zriebaanaa.

³⁴Per ib bien d zho dien zha nacne sca rnee me.

Biac tib zha ne rold lo

(Mt. 20:29-34; Mr. 10:46-52)

³⁵Laa Jesús bzëeb ro guiedz Jericó, miech guizhiu ne nal zhits me. Ro nëz co zob tib men ne rold lo, rnab me gon.

³⁶Zeene bien me rlu nzian miech noded ga, dzigo bnabdiidz me dien pe nacne scataa ziaad grë miech co ga. ³⁷Dzigo rëb zho lo me, Jesús, men Nazaret ziaad ga, zhits me ziaadnal grë miech co. ³⁸Horco psilo me nguiedz rbedz me, rnee me:

—¡Jesús, men xtii rey David, pquia zdoo naa!

³⁹Grë zha ne ner, psilo zho ndox zho lo me parne guioog ro me, per lel hor cole nguiedzraa rbedz me Jesús, rnab me yquia zdoo Jesús me. ⁴⁰Nacne zeene bdzin Jesús gax zaatne zob me, blëz Jesús, bnabey Jesús güeyxi zho me. Bdzin me lo Jesús, rëbchaa Jesús lo me:

⁴¹—¿Pe nadien gun luu naa?

Pquiab me rëb me:

—¡Racladz naa guiac lo naa!

⁴²Dzigo rëbchaa Jesús:

—¡Niinagazh gon laa luu gan tib! Laa luu biac, sacne dib zdoo luu bnalo luu naa.

⁴³Horcogazh laa men co psilo bui, ine rley me roolnie me Dios, laa me zienal zhits Jesús. Haxta grë miech ne zienal ga, zeene gon zhow, ye zho roolnie zho Dios.

Güey Jesús lidz tib men lë Zaquew

19¹⁻²Guiedz Jericó, ga no tib men ne rnabey lo grë zha ne rtop dimi

ne razh lo rey Roma, lë me Zaquew. Zeene laa Jesús zieded lad guiedz co, ³briee me, ziewi me, sac racladz me gunbey me Jesús. Bdzin me, pasëse me gan me Jesús, sac lala miech guizhiu ne nal zhits Jesús, ni lala ndopse me. ⁴Minë been me, rias me bdedner me güeytsep me tib lo yag guigw zob ro nëz co, par gdeeda diidza gan me Jesús, zeene laa Jesús ted ga. ⁵Zeene laa Jesús bded ga, blis lo Jesús gon Jesús laa me zob ga, dzigo bredz Jesús me, rëb Jesús lo me:

—Zaquew, na zeena biet i. Sac racladz naa, lidz luu cuëz naa nadze.

⁶Rley Zaquew gon Zaquew sca rëb Jesús, lëälëd biet me lo yag co, laa me zienie Jesús nëz lidz me.

⁷Zeene gon grë miech cow, rlëë zho, rnee zho:

—¡Pe lëëtaa lidz zha ngoopdol qui ziebëz me!

⁸Laa Zaquew, ine rley zobnie Jesús. Tibaque bzoli Zaquew, rëb Zaquew:

—Gacnan luu gon, lo grë ncuane rap naa, laa naa gded grola ygaaz lo grë zha ne guiend pe yquiin, ni tel nogaa zha ne ndziibraa minë beenquizh naa zho, naa maase ctsiree naa tap lal minë blan naa zho ga.

⁹Horco pquiab Jesús, rëb me lo zha ne ndxie ga:

—I nagon rlu laa men qui wbigle lo Dios, parne ycaania Dios me. Nli zha xtii Abraham nac me, per bzonziaab me ¹⁰ni naa ne nac naa Mgui ne pxeel Dios, ible laa naa zial zialsilaa naa grë zha ne zonziaab.

Zha ne biaannie dimi

¹¹Grë miech ne zienal zhits Jesús ga, rzac zho zigne laa me gdzin Jerusalén, laa me sob gac me zhirey zho; nacne bzodiidz me tib cuent rii, rëb me lo zho:

¹²—Tib xpëed zha non name, no me tib guiedz win, nacle diidza laa me no tsie zaatne zob men nroob ne rnabey,

parne gzo zho me gac me rey guiedz ne no me ga. ¹³Zeene laa dze co bdziñ, dzigo bredz me tsii zha ne quia xtsiñ me, nroob dimi ne psañ me lo zho tib tib zho, parne gundziin zhow, mientras gbire me.

¹⁴Nzianlaa zha ladz me, rlëë zho ran zho me, dzigo pxeel zho bla zha ne güey lo meñ ne rnabey ne zie me ga, güey nab zho gdeete meñ co dziin co lo me. ¹⁵Per niicle sca güey grë zha co, peet brieelod niñ zho. Blozhse bzo rey co me, laa me bdziñ ladz me. Zeene bdziñ me, bredz me gza zha ne biaannie xtimi me ga, par dien palal ziyaca. ¹⁶Bdziñ tib zho, rëb zho: “Laa xtimi luu nu gon, tsii lal mine psañ luu ga naca niina.” ¹⁷Rley me rëb me lo zho: “¡Zha squi nagon racladz naa! ¡Wen brieequia xtsiñ luu! Niicle zhis ncuaañe psañ naa lo luu, per bien luu niowse bendziin luuw. Na nagon, laa naa gzo luu, gnabey luu tsii guiedz.”

¹⁸Bdziñ stib zho, rëb zho: “Laa xtimi luu nu gon, gaay lal mine psañ luu lo naa ga naca niina.” ¹⁹Scaque rley me. Bzo me zho gnabey zho gaay guiedz. ²⁰⁻²¹Zeene bdziñtaa tib zho, rëb zho: “Nli bendziind naa xtimi luu, sac nanle naa zha nac luu, niicle paraa niundziin naaw, grëse mine niuna gan lo luu niaana; gane mazd pquia naaw tib lë lo lar, blootsow naaw, ledaaw nu.” ²²Blëë guic me, rëb me lo zho: “¡Biche nu, paat rquiind naa miech yozh ne squi nac! Conque nanle luu zha nac naa, ²³¿pex nac dzigo waa bioxcod luu maase mbediñ luu dimi qui, ndzini-aaw palal ncaania naaw niina?” ²⁴Dzigo rëbchaa me lo grë zha ne ndxie ga: “Ni-inagazh golcob dimi qui nia zha qui, goldeeda lo zha ne ziaadnie tsii lala i.”

²⁵Pquiab zho rëb zho: “Per pe nacne zha coque ycaaniaw, ni nrooblew beenlo zho.” ²⁶“Ib sca no gaca”, rëb me, “sac zha ne rien zha gundziin zho ncuaañe rcaania zho, nroobraa ncuaañe ycaania zho. Laa zha ne squi nac, haxta mine

pcaaniale zho, zdiooba lo zho. ²⁷Sangue zha ne sca ptsidiñ niac naa rey, goltsiexi zho, niinaga racladz naa ganlo naa gut to zho.”

Bdziñ Jesús Jerusalén

(Mt. 21:1-17; Mr. 11:1-11, 15-19;
Jn. 2:13-22; 12:12-19)

²⁸Blozhse bzodiidz Jesús cuent co lo zho, laa zho bio nëz stib, nerse me lo zho. ²⁹Zeene bdziñ zho gax Gui Oliv, zaatne ndxie guiedz Betfagé ni guiedz Betain, pxeel me chop xpëedsuel me, ³⁰rëb me lo zho:

—Goltsie guiedz win ne ndxie danse lo ne i. Ga gdziñ to zaatne quiadoo tib burr yeen ne choot gard sob lad, dzigo golxadz ma, goltenie ma nu. ³¹Teñ cho gnabdiidz lo to pe nacne noxadz to ma, golguiab lo zho: meñ ne rnabey ne, meñ co rquiin ma.

³²Laa zho zie. Bdziñ zho, zaatne quiadoo burr co, ³³nligaa, lëëtaque noxadz zho ma, zeene laa bizhuan ma bdziñ.

—¿Pe gun to xpurr naa? —rëb me lo zho—. ¿Pe nacne noxadz to ma?

³⁴Dzigo rëbchaa zho:

—Meñ ne rnabey ne, meñ co rquiin ma.

³⁵Bdzinnie zho ma lo Jesús, pxob zho lar ne rbix zho lad ma, bzob me ma.

³⁶Zigse zie me, no grë miech guizhiu co rta zho xab zho ro nëz rded burr ne zob me ga. ³⁷Grëse miech co, rley nie zho me. Laa zho xiuxto dze cho gui Oliv, zeene psilo zho nguiedz zëëb tsi zho, rley zho roolnie zho Dios, por grëtaa milagrne ziyañ zho run Jesús; ³⁸rnee zho:

—¡Nasi laa Dios pxeel zhirey ne! ¡Zha ndzontaa Dios! ¡Haxta gbaa noyac guieñbley dze rii!

³⁹Blalaa zha farisé ne zianañ ga, zeene gon zho zha roolnie grë miech co me, wbig zho lo me, rnab zho gnee me lo zho guioog ro zho. ⁴⁰Dzigo rëbchaa me:

—¡Zac guioog ro zho, per hor co dzigo laa grë quie rii csilo goolniew naa!

⁴¹ Zeene bdziñ me zaatne nieenpaa Jerusalén, psilo biab guieñë me, biin me gon me guiedz co, ⁴² rëb me:

—¡Prob to men Jerusalén! ¡Tebaa ye to niñ niunbey to men ne needz guiebley rii lo to! Per na ib biende tow, masaque rzac to zig zha ne nioog lo. ⁴³ Na nagon laa dze co bdedle. Grë zha ne rlëë lo to, ible ziaad zho ziadsioog corral zho to, ni tib nëz tedlaade to lo zho, ⁴⁴ haxta guiab to lадznia zho, grë xpëed to. Znitlo zho ladz to, nëzrii nëzrec glaal zho grë quie ne niaa grë lidz to i; sac squi been to ib pcaaniade to Dios, zeene biaadpaa me nsilaa me to lo xtol to.

⁴⁵ Bdziñ me Jerusalén, güey me yadoo, psilo me blee me grëse zha ne noyun lgui ga, rëb me lo zho:

⁴⁶ —Znu zhobnee lo Xtiidz Dios: “Zaatne nac lidz naa, ga none guiaad miech gzodiidznie zho naa.” Laa to gon, quiaayun to lugar rii zig tib zhibliee ngbaan.

⁴⁷ Bded ga, gzobse dze rie me rieseed me miech len yadoo ga. Nacne psilo grë pxoz ne rnabey, grë maistr ley, ni grë zha ne nac zha non lo mengüiedz, quiaguib zho dien zha gdeeda diidz gut zho me.

⁴⁸ Per rdziidz zho dien zha gun zho, sac tibaque ndxie miech lo me, grëse zho rquiaadiag zho zhiwseed me.

Nbabiidz zho cho nac Jesús

(Mt. 21:23-27; Mr. 11:27-33)

20 Len dze ne sca noseed me miech len yadoo, nonee me lo zho zha nac Xtiidz Dios, tib vüelt bdziñ bla zha ne nac pxoz ne rnabey, grë zho bla maistr ley ni zla men ne nac men non lo mengüiedz, ² rnabiidz zho lo me dien cho nac me, cho rnabey me, zha nacne sca quiaayun me. ³ Dzigo rëbchaa me lo zho:

—Ye naa laa naa gun tib wnabiidz lo to. ⁴ Golnë dien cho pxeel Juan zeene biadchoobnis Juan miech, ¿pe Dios pxeel Juan, te miechsew ye?

⁵ Psilo zho rnabiidzlsa zho dien zha ctsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa bliladzde to mine bnee Juan?” ⁶ Tel na dzieetsgaa ne, miechse pxeel Juan, grieequiadaque ne; zgoquie mengüiedz ne, sac grëse zho riladz Dios pxeel Juan.

⁷ Dzigo mazd lëë gdib mine been zho, rëb zho nanđ zho dien cho pxeel Juan.

⁸ Nacne rëbchaa Jesús lo zho:

—Niicle naagaa nagon, grieelod gni naa lo to cho rnabey naa quiaayun naa grë min rii.

Xcuent zha ne pquianap liu

(Mt. 21:33-46; 22:15-22; Mr. 12:1-17)

⁹ Blozhse ga, biire psilo me noseed me grë miech co. Bzodiidz me tib cuent rii lo zho, rëb me:

—Tib men name, nroob lbë uv beenbni me lo liun me. Blozh ga blediin me liu co lo bla zha ne ran liu, dzigo laa me briece ga, zey me stib dan.

¹⁰ Zeene gol mëë ne laa nex co gol, pxeel me tib zha ne quia xtsiin me zie lo zha ne quianap liun me ga, parne gdeed zha co nex ne rieguial me ycaa me. Per lel bnaaz zho zha ne pxeel me ga, bdiñ zho zho, blozh ga scase bzonëz zho zho.

¹¹ Wbiire pxeel me stib zho, scaque peet bdeete zho lo zho, lel ndox zho lo zho, bdiñ zho zho. ¹² Pxeelaque me stib zho, goc zho tson, scasaque been zho, haxta psiwee zho zho. ¹³ Quianie me tib mëëd, rleynie me mëëd co. Zeene gon me sca been zha co, rëbchaa me: “Mine naca laa naa cxel xpëed naa, zeene gan zho xpëed naaw, peet gund zho me, nend zon zho xtiidz me.”

¹⁴ Pex guien zho cho nac xpëed me, zeene gon zho men co, rëb zho: “¡Lëë

zha qui nagon̄ guiaannie liu rii! ;Golgot-saa dziuut ne zho, zeenā guiaanā lo ne!”
¹⁵ Bnaaz zho xpëed me, güeynie zho me zaatne nac tib lad lo liu co, ga güeygut zho me.

’;Zha sca dien̄ rzac to gon̄ bizhuan liu co gza zha ntseeb co? ¹⁶ Ib tedsod lëe, zeene gbire me, znitlogazh me zho. Lozhse ga, cuediinga me liun̄ me lo zla zha ne gundziina.

Zeene bin zho sca rëb me, rneechaa zho:

—;Ib lic Dios qui, dziuunscad no!

¹⁷ Dze bui me lo zho, dzigo rëbchaa me:

—Per led znu lëe, zhobnee lo Xtiidz Dios: “Quie ne psëeb zha ne nozaa yu, ni nan̄d zho lëepaa quie co nac mine rnazdziits yu.”

¹⁸ Ni quie co gon̄, zha ne tsietsobe low, zac zho zig tib ncuane rac tson̄ tap lë; laa tel̄ lëegaaw tsobe lad zho, zac zho zig tib ncuane die die rac.

¹⁹ Grë zha ne nac pxoz ne rnabey, ni grë maistr ley, hor co bien̄ zho mine nac zho ga, bzeet me lo cuent co. ;Gocladz zho gagazh naaz zho me! Per bdzieb zho, niactseeb grë miech ne ndxie ga.

²⁰ Dzigo mine been̄ zho, pxeel̄ zho bla zha ne zie ziegungüet me par cxin̄ me tib diidz, dzigo min̄ co yquiaaqui zho tsiezo zho me lo zhiwxtis zha Roma. Rquiaalo zha co, no zho liaadz dien̄ zha gzoobdiag zho xtiidz Dios, ²¹ bdziñ zho lo me, bn-abdiidz zho rëb zho:

—Maestro, ndion̄ no niapse diidzli zienāl̄ luu, ni scagaa zeene rseed luu miech, rguibd luu guianziuu luu lo zho, sinque niapse mine nac diidzli, mine rlu zha sëeb zho xnëz Dios, min̄ co rnee luu lo zho. ²² Gane niina, racladz no gnë luu dien̄ pe nonguielā ga rdeed no dimi ne razh lo rey Roma, te nonguielda ye.

²³ Bienga me racladz zho gungüet zho me, dzigo rëbchaa me lo zho:

²⁴ —;Golneedz tib xpes to nu ganle!

Dzigo bdeed zho tib pes lo me. Blozh ga, rëbchaa me lo zho:

—;Cho nu? ;Cho lë nu quia lo pes rii? Pquiab zho rëb zho:

—Lëe rey Roma i, lëe lë me i quia lo qui.

²⁵ Dzigo rëb me lo zho:

—Mine rieguial̄ sca ycaa rey Roma, goldeeda lo rey Roma; scaquegaa mine rieguial̄ ycaa Dios, lo Dios goldeeda.

²⁶ Bzee zdoo zho gon̄ zho sca ptsire me lo xtiidz zho. Mazd dzese bre zho, sac bdzielz zho zha niungüet zho me; gocladz zho squi ndxie miech nxin̄ me pe tib diidz, per brielod niungüet zho me.

;Pe nli zrieeban miech?

(Mt. 22:23-33; Mr. 12:18-27)

²⁷ Blozh ga, güeyaque zla zha saducé lo Jesús. Nac zha saducé riladzd zho zdziñ dze grieeban miech; bdziñ zho, rëb zho lo me:

²⁸ —Maestro, znu psan̄ Moisés diidz: telne glo mgui guet lo wnaa ne nac tsieel mgui, ni gopd wnaa mëed, dzigo none betsaque zho ctsieelnia wnaa co stib, zeena gap wnaa mëed ne guiaan̄ xlugar xpëed zha ne gut ga.

²⁹ Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut, biaand xpëed zho. ³⁰ Dzigo ptsieelnia wnaa co stib bets ngutoo co. Blozh ga, gutaque zha co, pa së zho nsan̄ mëed. ³¹ Ptsieelniaque me stib zho, goc zho tson̄, niicle zha co psandaque mëed. Sca sca haxta bza gza gadzse zho ptsieelnia me, ³² tibaque zeene yeque me laa me gut. ³³ Mine racladz no gacndion̄ no, ;chopaa dzigo gac tsieel wnaa co, zeene laa zho grieeban, ne sca gza gadzse zho ptsieelnia me?

³⁴ Pquiab Jesús rëb me:

—Tiba, gacnan̄ to ganle, lo guielm-ban riise rtsieelnia miech. ³⁵ Zeene grieeban zho, zig nac zha ne ygaa guielnzaac

gdziñ zho zaatne no Dios, led yedraa ga ctsieelnia zho. ³⁶ Sac laa zho mbanle ga, gdziñdraa dze guet zho. Masaque laa zho gac zig nac grë xanjl me, mëed gac zho lo me. ³⁷ Laa stiba, gacnañ to ganle ible zrieeban grë mengut. Golwi ganle, zeene bzeet Moisés zha rëb Dios lo me zeene gon me tib yag zarz ne noyazbel ga; ga rlu rrieeban mengut. Rëb Dios lo me: “Naa nac Dios ne rililadz Abraham, naa nac Dios ne rililadz Isaac, naa nac Dios ne rililadz Jacob.” Zeene sca rëb me, ga rlu ganle mban zha co. ³⁸ Sac tel me, nacd me xDios mengut, sinque xDios zha mban nac me. ¡Par me, grëse zha ne ngab lo me, zha mban nac zho!

³⁹ Blalaa maistr ley zo ga, gon zho sca rëb me lo zha co, dzigo rëbchaa zho lo me:

—Maestro, nli squi naca zigne rnee luu i.

⁴⁰ Dzigotaa ni stib zho beendraa pe nabdiidz zho lo me.

¿Cho xpëed nac Crist?

(Mt. 22:41-46; 23:1-36;
Mr. 12:35-40; Lc. 11:37-54)

⁴¹ Horco bnabdiidz Jesús lo zho, rëb me:

—¿Zha nac dieñ ne rnee zho tib xpëe-daque rey David gac Men ne nacle didz cxeel Dios ga? ⁴² Led Davitaque name znu bnee tib lo salm ne pquiaa me:

⁴³ Bnee Dios lo men ne rnabey naa, rëb Dios lo me:

“Cue naa nëz derech, nu bzob, nieeda lozh gnaz naa grëse zha ne rlëe lo luu, csan naa zho lадznia luu.”

⁴⁴ Gase ganle rlu, led scada; telne nli zha xtii David gac men co, ¿zha nac dzigo ne lëëque David rnee ne me rnabey David?

⁴⁵ Squi ndxie grë miech co noquiaa-diag zho, zeene bnee me lo xpëedscuel me, rëb me:

⁴⁶—Golguien gon, ib tsienalde to mine run maistr ley. Sac grë zha ne nac maistr ley, rdziladz zho racw zho lar nool, haxta zhits ni zho rbiba, rdziladz zho ndooladz rquiaabdiuzh miech zho zaatne rdzieel zho zho ro nëz. Zig nac len yadoo, zha nac zha ne rzob lo xcan zaatne rzob grë zha non; zeene riegaa zho tib lo lni lidz miech, lëëpaaze zha nac zha ne rzob grol mezh zeene laa wagw rac. ⁴⁷ Ni rlozh ga, rio zho rla zho tel pe ncuane rapse grë wnaa viud; ni parne peet guiabd miech lo zho, xtse rzo zho rzadraa pe lay ne rool zho. Sca run zho, ¡per ib tedsod nroob caxtigw ne ygaa zho!

Gon ne bdeed tib wnaa viud

(Mt. 24:1-2; Mr. 12:41-44; 13:1-2)

21 Laa Jesús no len yadoo ga noseed me miech. Ga no me, gon me zha rdziñ grë zha ricw, nroob dimi rsan zho len alcançí ne zob ga. ² Tibaque zeene bdziñ tib wnaa viud, tib men proba, ye me laa me psan chop gaay win len alcançí co. ³ Zeene gon Jesús, rëbchaa me:

—Gneli naa lo to ganle, mazdraa gon non gon ne bdeed wnaa viud qui, lëdle grë gon ne psan grë zha qui. ⁴ Sac tel zha, dimi ne riaanle lo zho i rgogon zho; sangue wnaa prob qui gon, centav yeen ne quianiese me, mine rnalopaa me gz-iuu pe yquii me, per laa me bloogona.

⁵ Laa Jesús zieriee ga, zeene psilo bla zha ne nac xpëedscuel me, rlozhd gwi zho zha niaa yadoo co, zree zdoo zho ran zho grë quie ne niaaw, grë ncuane ngalguiee lena. Zeene gon mew, rëbchaa me lo zho:

⁶—Niicle squitaa gon ran to niaaw ni-ina, per dzziñ dze ne nitlow, dib nacsew. Ni stib quie qui guiaandraa zigne squi zhobxcuaaw i.

¡Nsin golso!

(Mt. 24:3-28; Mr. 13:3-23)

⁷Bded ga, bnabdiidz zho lo me, rëb zho:

—Maestro, ¿poc dzigo gac mine bzeet luu ga? ¿Zha glu zeene laaw ziaadyob gac?

⁸Dzigo rëbchaa me lo zho:

—Nsin golso, zeena choot yquidiede to. Sac nzian zha ne grieequia, guiab zho laa dze co bdzinle, guiab zho zha nac Men ne zëëble diidz ga cxeel Dios. ¡Ib gliladzde tow! ⁹Zeene gon to pa lo ndxiedil tib guiedz, pa lo noyacgaa grë dilodox, ib gdziebde to. Ib none gac grë ncuuan co, per lega loxaque mine csilosew ga.

¹⁰Grë guiedz nroob, laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. ¹¹Nëzrii nëzrec csilo gni grë zhodox, nzian zaatne gan miech gbin, zaatne glaangaa zho grë guielguidzdox. Nzian grë ncuaaane glu zhan gbaa, nzian grë ncuuan co, ncuaaane ctseb miecha. ¹²Per ansraa gac grë ncuuan co, stsidil miech to, squianal zho to; znaaz zho to, tsiezo zho to lo wxtis ne rnabey yadoo, zha co co to ladzguiib, ni haxta ziezo zho to lo wxtis ne rnabey guiedz, loxaque porne nac to zha ne no xnëz naa. ¹³Ga nagon gdeeda diidz gnee to lo grë zha co, gacnan zho ganle cho nac naa. ¹⁴Ib gunde to tso to zhgab dien pe guiab to lo zho, zeene laa to ctsire lo mine rquiaqui zho to; ¹⁵sac naa gnedz guielbiini lo to, zeene laa to gnee guien to pe guiab to. Zha ne gona, squiaadiag zhow, per ni gdziel zho pe ctsire zho lo to.

¹⁶Haxta pxoz to, xniaa to, bets to, grë menlidz to, grë zha ne ndzieeldiidz to, stsidil zho to, lëëque zha tsielo to ladznia zha ne csacsi to. Lo grë to, zio zha ne haxta zet ladznia grë zha co. ¹⁷Grëse

miech glëë gan to porne nac to zha ne no xnëz naa. ¹⁸Nli stiche zho xquielmban to lo guidzliu rii, per, ¡ni tib guits guic to, grielod zho gnitlo zho! ¹⁹Tiblique sca golgac, sozite to lo naa, zeena yгаа to guielmban ndzon ne gneedz Dios.

²⁰Zeene gan to igose guiedz Jerusalén ndxienap menguiib, nanle to len dze co laaw nitlo. ²¹Grë zha ne no guiedz ne ngab Judé, none xoon zho tsie zho nëz yagui, ga tsietsolan zho. Zha ne no Jerusalén na, none grieeniob zho. Grë-gaa zha ne quia dziin dana, ib guiabd zho gbire zho lad guiedz. ²²Tib guielndox ne csiaab Dios gan grë miech rii len dze co, ga gac grë mine raquiet lo Xtiidz me ted zho. ²³¡Prob grë men wnaa ne lëëtse len dze co zoney xpëed, men ne quianiegaa mëed ne bii radz! ¡Mbandox ted miech, guielndox ne csiaab Dios gan zho guiedz rii! ²⁴Zutxuu miech zho, zha ne tedlaagaa lo guielgut zeyzhoo miech zho, zhaase zhaase dan ne gueynie zho zho. Horco laa grë zha zit co, sëëb gunchen Jerusalén; haxta gdzin dze ne gnabey Dios griee zho.

Ziaad Jesús stib

(Mt. 24:29-35, 42-44; Mr. 13:24-37)

²⁵Nzian grë ncuaaane glu lo ngbidz, glu lo mëë, glu lo mel. Mbanse gac miech, zdziebdox zho zeene gon zho bidox ne tso tsasoli nisdoo. ²⁶Nzian zha ne haxta scow zho lo dzeb, zeene laa zho gan grëtaa ncuaaane noyac lo guidzliu len dze co. Grë ncuaaane no zhan gbaa, nëzrii nëzrec gaca. ²⁷Horco bii zan zho ganle zeene laa naa zialzëëb tib lo xcow con grë guielndzon, con grë poder ne rap naa. ²⁸Zeene gan to laa grë ncuuan co rsilo noyac, nley golco zdoo to; ¡sac hor co laa Dios ycaania to!

²⁹Golzoob cuidad ganle zha nac yag guigw, beelzegaa pe stib yag. ³⁰Led ran to ganle, zeene laa grë zhicwa racnieen, laa zhiblaga rsilo rdzib, gase runbey

to laa mēē nēēg ziaadgaxle. ³¹Scaque nagon zeene gan to laa grē minē rne naa lo to nu rsilo noyac, dzigo nanle to laa dze ne csilo gnabey Dios ziaadgaxle. ³²Gneli naa lo to ganle, nzian grē miech ne mban niina, bii zan zho zeene laa grē ncuaan co gac; sac ible ncuaane gaca. ³³Zdziñ dze ne nitlo gbaa, nitlo guidzliu, sange minē rne naa lo to nu nitloda; ible laaw none gac. ³⁴⁻³⁵;Nsin sca golso, zaacse gogac! ;Adel gal dze ne laa naa guial, lel lo grē ncuaane ndzinlid, lel lo guielgonziu, lel lo grē zhgab ne rac lo guidzliu rii no to, zigne gun grēraa miech! Sac gon, lega naclew glanso naa. ³⁶Nligaa nsin golso. Tibaque gognab lo Dios, gacniē me to peet gacde to lo grē guielnē co, ine peet xtolde to zeene laa to gacredz lo naa.

³⁷⁻³⁸Gzase len dze co pseed me miech. Silgaw, miech guizhiu ne rdziñ len yadoo, parne yquiaadiag zho zhiwseed me. Guidze sca rseed me zho, laa pcow liu riebēz me cho Gui Oliv.

Bnediiz zho dien zha gnaaz zho Jesús

(Mt. 26:1-5, 14-16; Mr. 14:1-2,
10-11; Jn. 11:45-53)

22 Ziaadyoble lni Pascwa, zhilni nroob men Israel, lni ne row zho quietxtil ne rquiad ncobi lad. ²Grē zha ne nac pxoz rnabey ni grē maistr ley, len dze co laa zho no quiaguib zho dien zha gut zho Jesús. Noguib zho tib mod ne glisquid menguedza; sac rdzieb zho gacntseeb menguedz.

³Tib dzew, laa mendox bzēēb zdoos Judas Iscariot, tib zha ne rzēniepaa me ga, ⁴rias Judas güey Judas lo grē pxoz rnabey co, lo grē men ne zo lo zha ne rquiapan yadoo, rēb Judas zha csan Judas Jesús ladznia zho. ⁵Zeene bin zhow per nli rley zho, nacne biaan zho didz quizh zho Judas. ⁶Dzigo desde hor co psilo Judas noguib Judas dien zha

gdeeda diidz guiend miech csan Judas me ladznia zho.

Dowxtseenie Jesús xpēēdsuel me

(Mt. 26:17-29, 31-35;

Mr. 14:12-25, 27-31;

Jn. 13:21-30,36-38; 1Co. 11:23-26)

⁷Mer dze ne rsilo lni Pascwa, len dze ne sca row zho quietxtil ne rquiad ncobi lad, ni rut zho carner yeen ne rowxtsee zho. ⁸Dze co bnabey Jesús Pedr grop Juan tsiegunlo zho xtsee ne gownie me zho wdze co. ⁹Dzigo bnabdiidz zho lo me, rēb zho:

—¿Pa lo racladz luu guio no guiodziunlo now?

¹⁰Rēbchaa me lo zho:

—Goltsie Jerusalén. Zeene sēēb to lad guiedz, ga gan to tib mgui nzobyan tib re nis, goltsenal zhits me. Yu ne gan to sēēb me, ¹¹golguiab lo bizhuan yu co: “Znu nē Maestro, ¿pa len yu me gneedz luu gac zaatne gowxtseenie me xpēēdsuel me wdze rii?” ¹²Ga glu me tib len yu nroob ne riaan glaa, nzhixcuaale lena, dzigo ga gogunlo zhixtsee ne.

¹³Dzigo laa zho zie. Güey zho zaatne pxeel me zho ga, ga beenlo zho xtsee co.

¹⁴Wdze co, zeene gol hor xtsee laa Jesús bded lo mezh gza me gza tsiipchop xpēēdsuel me. Xtsee co no zho, ¹⁵zeene rēb me lo zho:

—¡Blactaa gon pquiambēz naa gdziñ dze rii, znu gowxtseenie naa to nawdze rii, ansraa csacsi miech naa, gut zho naa! ¹⁶Lēē lultm vuelt nu gon teed naa lni Pascw rii, haxta gdziñ dze ne laa Dios csilo gnabey, dze ne glupaa ganle zha nac xtsee rii.

¹⁷Dzigo bzhen me tib cop nroob no vin, bdeed me xquizh lo Dios, blozh ga bdeed me cop co lo zho, rēb me:

—Golquiin vin rii gza to. ¹⁸Gneli naa lo to ganle, lēē lultm vuelt nu guie naa vin rii, haxta gdziñ dze ne laa Dios csilo gnabey.

¹⁹Ni bzhēn me guietxtil, bdeed me xquizh lo Dios, blozh ga beengrol mew bdiiz mew lo zho, rēb me:

—Golquiina, rrieequia gon lēē xcuerp naa i, sac gon znu gun zho xcuerp naa parne csilaa naa to grē to. Zeēne gdeed-taaw diidz, golgun min rii parne glu to ganle tibaque rsoladz to naa.

²⁰Blozhse dowxtseenie me zho, scaque bzhēn me stib cop no vin, blozhse bdeed me xquizh, rēb me lo zho:

—Lēē stib trat cub nu gon riaan Dios grē me miech, rrieequia xchen naa nu nac vin rii, ren ne gzhiee xcuent to, ren ne tso firm trat co par glu nona. ²¹Ni gacnan to ganle, lo mezhaque nu gon zob zha ne tsielo naa lадznia zha ne gut naa. ²²Naa ne nac naa Mgui ne pxeel Dios, nli, ible none guet naa, parne gac mine pxeel Dios naa zialgun naa, jper probsaxe zha ne tsielo naa lадznia zha co!

²³Horco psilo gza zha ne zobnie me ga, rnabdiidzlsa zho dien cho nac zha ne rzeet me ga; ²⁴haxta psilo zho nodildiidz zho dien cho gac zha ne gacnon lo zho.

²⁵Dzigo bnee me lo zho, rēb me:

—Nli grē zha ne rnabey guiedz ne ndxie lo guidzliu, masaque rnabey zho miech zig nac zeēne bzhii zho zho, per zha gunraa miech, lēē gdib rxecw zho, haxta rnee zho nroob quiayun zha co xyudar guiedz. ²⁶Sangue to gon, zha ne gnabey lo to, none guien zho gac zho zig tib ngundziin lo to; zha ne racladzгаа gacnon, none guien zho guiaanwin zho. ²⁷Lo guidzliu rii, zha ne rnabey, rzobse zho, zha ne nac ngundziin, zha co rdziib ncuaane row zho. jSangue lo ne, led scad naca! jGolwi ganle, tib ngundziin nac naa lo to!

²⁸Tose goc zha ne tibaque gocnie naa lo grētaa mine bdeed naa len dze rii.

²⁹Gane niina, laa naa gneedz tib guieln-zaac nroob lo to yгаа to gdzin to zaatne

bneedz Pxoз naa gnabey naa; ³⁰zeēna ine znu tipse zioob ne lo xmezha naa ga, dioow ne, dio ne. Haxta so naa to, to gac zha ne cobey, pe nac mine been gza tsi-iphop dii ne nac menladz to nu.

³¹Horcoque bnee me lo Pedr rēb me:

—Bina ganle Pedr, racladz Satanās gon ycuuib ma to, zigne run zho zhoxtil. ³²Per laa naa bnable lo Dios, gacnien me luu, csaand me sozitpaa luu lo naa. Gacxe waa, zeēne guien luu lēda ga been luu, luu gnee lo grēraa zha qui, parne tibaque dib zdoo zho gnalo zho naa.

³³Pquiab Pedr rēb Pedr:

—Niicxe peraa waa gac, csaand naa luu. Telne co zho luu ladzguiib, ye naa tso ga, jtelne gutгаа zho luu, zaatne guet luu, ga guet naa!

³⁴—Bina ganle Pedr —rēb Jesús—. jGuieel riigazh gon, gardle ycuedz gall, tsonle vuilt rēb luu runbeyd luu naa!

³⁵Dzigo bnee me lo zho gza zho, rēb me:

—Led rsoladz to ganle zeēne pxel naa to güeyseed to miech, scase güey to, peet dimi bide to, per ni ncuaane gow to, per ni lab to bide to. jPe beenfalt ncuaane nquiin to hor co?

Pquiab zho rēb zho:

—Beenfaldedew.

³⁶Dzigo rēbchaa me:

—Horco nagon peet bide to, sangue niina zha ne quianie dimi, zha ne quianiegaa ncuaane gow zho, none güey zhow. Niina nagon none laa to yquiin spad. Zha ne quianieda, none maase tib xab zho cto zho, si zho tiba. ³⁷Sac nataa nagon, laa miech cteed naa mine zhoobnee lo Xti-idz Dios, zaatne rnee: “Bnabey zho gut me, zigne rut zho grē zha ntseeb.” Grēse mine zhoobnee teed naa, ib laaw none gac niina.

³⁸Pquiab zho rēb zho lo me:

—jBui ganle laa chop spad nule!

Dzigo rēbchaa me:

—jMazd peet gnedraa naa lo to!

Bzodiidznie Jesús Pxoꝝ me Getsemaní*(Mt. 26:36-46; Mr. 14:32-42)*

³⁹ Blozhse ga, laa me brieꝛe zie me nêꝛ Gui Oliv, zaatne rietaque me; zienaꝻaque gza xpëẽdscuel me zhits me. ⁴⁰ Bdzin̄ zho ga, rëbchaa me lo zho:

—Golnab lo Dios gacnieꝛ me to, zeena yquuild mendox to.

⁴¹ Bzë me spalal, bdzin̄ me zig zaatne riab tib quie ne rcheꝻ ne nia ne, dzigo ga pquuitsgzhib me, psilo me bñab me lo Dios, ⁴² rëb me:

—Papá, laa naa rnab lo luu, teꝻne zala zdoo luu, psilaa naa lo grë guieꝻnë rii. Per teꝻne grieeloda, miꝻne gnëtaa luu sca gaca.

⁴³ Horco biet tib anjl gbaa bdzin̄ pchoobladz zdoo me. ⁴⁴ Mban rac me laa me nozodiidznie Pxoꝝ me, per hor cole mazdraa rnab me lo Pxoꝝ me; lo guieꝻnë ro co haxta rzonis me, masaque zëbdzuuꝛ grë nis co lo me zootle ren.

⁴⁵ Zeene laa me guso ga, bdzin̄ me zaatne biaan xpëẽdscuel me, gon̄ me gzase zho laa zho nixguies. Ye zho mban rac zho, lo guieꝻnë co bguudz zho mcaal̄.

⁴⁶ Dzigo pcuaan me zho, rëb me lo zho:

—¿Nixguies to ye? Lëda i gon̄, ¡gol-sobna! Golnab lo Dios, gacnieꝛ me to, zeena yquuild mendox to.

Bnaaz zho Jesús*(Mt. 26:47-58, 67-75;**Mr. 14:43-50, 53-54, 65-72;**Jn. 18:2-18, 25-27)*

⁴⁷ Laa Jesús quianeeque, zeene laa Judas bdzin̄ bdzinnie Judas tib dzoon miech. Zigne bdzin̄ Judas, wbig Judas lo me, dow Judas bzhid cuas me.

⁴⁸ —¡Judas! —rëb me—. ¿Con tib bzhid dzigo lëẽ glu luu naa lo grë zha qui?

⁴⁹ Zeene bien xpëẽdscuel me, me zien-aaꝛ grë miech co, rëbchaa zho lo me:

—Maestro, ¿zha dziuuꝛ ne? ¿Pe zdeed spad no zho?

⁵⁰ Znuse biet tib zho pcheꝻ zho tib nia spad, pchug zho diag tib xmoz meꝛ ne nac pxoꝝ nroob. ⁵¹ Dzigo bnee Jesús lo zho rëb me:

—Golsaan zho, ndzinli golgac.

Horco wbig me bzheꝛ me diag zha co, beenguiac mew, lëẽtse miꝻn derecha.

⁵² Lad grë miech co no ndal grë pxoꝝ ne rnabey, grë zha ne zo lo zha ne rquianap yadoo, ni spalal meꝛ ne nac zha non lo menꝻguedz; dzigo bnee Jesús lo zho, rëb me:

—¿Pe nacne squitaa ziaad to, nzheꝛ to yag, nzheꝛ to spad ziadnaaz to naa? ¿Niacxe naa cho ngbaan? ⁵³ Blactaa dze name gon̄ to no naa len̄ yadoo, ni bnaazde to naa ga. Per nole guic to nagon̄ nawdze rii gnaaz to naa; grë miꝻne racladz to grë to mendox, niina laaw gac.

⁵⁴ Horco wbig be zho bnaaz zho me, laa zho zienie me nêꝛ lidz meꝛ nac pxoꝝ nroob. ⁵⁵ Bdzin̄ zho lidz meꝛ co, bre zho xley me, bzëẽg zho gui, laa zho no nodzëẽ zho. Ye Pedr maase zit zit nal̄ Pedr, laa Pedr bdzin̄ ga; laa Pedr wbig bzob lo zho ga. ⁵⁶ Zeene gon̄ tib wnaa ne quia xtsiin̄ meꝛ co laa Pedr zob ga, dze rwi me, tibaque rëb me:

—¡Ye mgui qui gon̄ rzënie meꝛ ne blansonie to i!

⁵⁷ —¿Naa ye? —rëb Pedr—, ¡per ni runbeyd naa meꝛ qui!

⁵⁸ Wdzeepaaw, laa tib zha ne zo ga, gonaque Pedr, rëb zho lo Pedr:

—¿Segur lëẽ ye luu nacnie meꝛ ne bgaa i?

Scasaque bneelid Pedr. ⁵⁹ Wdzeelaaque goca, zeene laa stib zho brieꝛequia, rëb zho:

—Lëẽ tib zha ne nacnie meꝛ qui nu gon̄. ¡Rlu zha galilé nac zho!

⁶⁰ Pquiab Pedr, rëb Pedr:

—¡Riend̄ naa gon̄, pe nacne squi rnee luu!

Gardle lozh griee diidz co ro Pedr, zeene laa tib gall pcedz. ⁶¹Gall co nocuedz, zeene ptsire lo Jesús, dze bui me lo Pedr; dzigora psoladz Pedr zeene rëb me lo Pedr: “¡Guieel riigazh gon, gardle ycuudz gall, tsonle vuelt rëb luu runbeyd luu naa!” ⁶²Mbanse rac Pedr. Brie Pedr ga, psilo Pedr biin Pedr guielnë co.

⁶³Grë zha ne zopaa quianap Jesús, nzian grë ncuane run zho me, psilo zho noyunguzee zho me. ⁶⁴Pxidoo zho lo me, ni rguin zho me, rlozh ga, rnee zho:

—Luu ne nac luu men ne ziadteed xti-idz Dios, ¿bnë sca dien cho ga bdiñ luu?

⁶⁵Nzian grë ncuane rgoredz zho lo me.

Güeynie zho Jesús lo zhiwxtis zho

(Mt. 26:59-66;

Mr. 14:55-64; Jn. 18:19-24)

⁶⁶Zeene biini liu, pcaalsa grë men ne nac zha non lo menguedz, grë zho pxoz rnabey, ni grë zha ne nac maistr ley, güey zho güeynie zho Jesús lo zhiwxtis zho. Bdziñ me ga, bnabdiidz zho lo me rëb zho:

⁶⁷—Bnë lo no dien, ¿pe lëë Men ne nacle diidz cxeel Dios lo guidzliu ga i nac luu?

Pquiab me rëb me:

—Niicle telne gni naa lo to nli lëë men co nu nac naa, gliladzde tow, ⁶⁸teñ pe gnabdiidzga naa lo to, ctsirede to low; sac gliladzde to mine nac diidzli. ⁶⁹Naa ne nac naa Mgui ne pxeel Dios, zhile laa dze gdziñ zeene laa naa sob cue Dios nëz derech, men nroob ne rrielo run grëse ncuane racladz me.

⁷⁰Horco grëse zho pquiab, rëb zho lo me:

—¿Xpëed Dios dzigo lëë nac luu?

Dzigo rëbchaa me:

—Tozhal name rnee, nli Xpëed me nac naa.

⁷¹Horco rëb zho:

—¿Pe mazdraa textigw ne racladz ne! ¡Laa ne bdzionle ganle mezhal rnee Xpëed Dios nac me!

Güeynie zho Jesús lo Pilat

(Mt. 27:1-2; 11-14;

Mr. 15:1-5; Jn. 18:28-38)

23 Horcogazh pcaanie zho Jesús nëz, bdziñnie zho me lo Pilat, men ne nac gobernador ne nzoob zha Roma ga. ²Ga psilo zho nzian grë ncuane rquiaqui zho me, rëb zho:

—Laa no bnaaz men rii gon ziaadnie no me lo luu, sac bgaa me noquiil me menladz no gacntseeb zho. Rnee me lo zho nonguielä gdeed zho dimi ne razh lo zhirey ne, men ne zob Roma; haxta rnee me mele nac rey ne gunbey zho, sac Dios pxeel me ziaad me.

³Dzigo bnabdiidz Pilat lo me, rëb Pilat:

—¿Pe nli na luu nac Rey ne rnabey lo zha Israel?

Pquiab me rëb me:

—Nliw, rey nac naa zigne rnee luu i.

⁴Dzigo rëbchaa Pilat lo grë zha ne ne nac pxoz rnabey co, ni grë miech ne ziegrë zho ga:

—¿Ni tib dol rapd men rii!

⁵—¿Zha gapd me dol? —rëb zho—. Ni zaatne zieetaa me noquiil me miech gacntseeb zho lo zhirey ne. ¡Dible nëz Judé nu güeyted me; desde nëz Galilé brie nu ziaad me haxta nu!

⁶Gon Pilat sca rëb zho, dzigo bnabdiidz me dien pe zha Galilé nac Jesús. ⁷Zeene gocnan me zha nëz co nac Jesús, dzigo pxeel me Jesús lo Herod, sac Herod rnabey nëz Galilé; lëëtaque len dze co laa Herod no Jerusalén ga.

⁸Rley Herod zeene gon Herod me, sac ziyon Herod grëtaa mine run me; quiambëz Herod gdziñ dze ganlo Herod me, ganlo Herod gun me pe tib milagr.

⁹Psilo Herod nzian grë ncuane rnabdiidz Herod lo me, per ni tib lo wn-

abdiidz co ib ptsired me. ¹⁰Zeene gon Herod rquiabd me, ni gon Herod noque grë pxoz rnabey co, grë maistr ley co, ib rioogd ro zho rzadraa pe yquiaaqui zho me, rnab zho cteed Herod me caxtigw, ¹¹nacne leļ psilo Herod grë xmenguiib Herod rzhidznie zho me, runnguzee zho me. Bgacw zho me tib lar ne racw rey, sca nacw me lar co biire pxeel Herod me lo Pilat. ¹²Glo ib rdzieeld xtiidz Herod grop Pilat, laa dze co laa zho psilo bneewen stib.

Bnab zho guet Jesús

(Mt. 27:15-26; Mr. 15:6-15;
Jn. 18:39-19:16)

¹³Dzigo bnabey Pilat pcaalsa grëse pxoz rnabey, grë zha ne nac zhiwxtis zha Israel, ni grëraa menguedz, ¹⁴rëb Pilat lo zho:

—Laa zho biad-zoob xdemand men rii lo naa nu, nac diidz noquuil me miech gacntseeb zho lo zhirey ne. Nacne pquiep naa me, ni blalagaa to gona; par naa peet doļ rapd me. ¹⁵Niiclegaa Herod, ye Herod gon ni tib doļ rapd me; gane pxeelaque Herod me lo naa. Quiayund me ncuanea guiab ne rieguial guet me. ¹⁶Mine gaca, laa naa gnabey ted me tib caxtigw, lozh ga dzigo laa naa csilaa me.

¹⁷Nac costumbr, gzobse lni Pascw rsilaa zho tib zha ne no xcuent lo wxtis. ¹⁸Per zeene bin grë miech co laa Pilat csilaa Jesús, grëse zho nguiedz roptsie zho, rnee zho:

—jCsilaad luu men qui, bnabey guetgazh me! jBarrabás psilaa!

¹⁹Barrabás lë tib men co no ladzguiib len dze co, sac bgaa me zo me lo tib dii zha ne noyactseeb lo rey len guiedz Jerusalén ga, ni zëëbaque me tib ngutoo. ²⁰Bguiib Pilat dien zha nrielo nsilaa me Jesús, ²¹per psilo grë miech co nguiedz roptsie zho, rnee zho:

—jNone guetgazh men qui! jLo cruz bnabey yquia me!

²²—Per, ¿pe nacne gnabey naa yquia me lo cruz? —rëb Pilat stib—. ¿Pe nac falt ne rap me? Laa naa pquieple me, ni tib doļ rapd me, parne gnabey naa guet me. Laa naa nile lo to, laa naa gnabey ted me tib caxtigw, lozh ga laa naa csilaa me.

²³Psiloque grë miech co stib, nguiedzraa roptsie zho, rnab zho yquia Jesús lo cruz; haxta goc mine racladz zho. ²⁴Racse Pilat, laa Pilat bdeed diidz. ²⁵Blozhse bnabey Pilat psilaa zho Barrabás, zha ntseeb ne no ladzguiib ga, dzigo laa Pilat psan Jesús ladznia zho.

Güeyquiaa zho Jesús lo cruz

(Mt. 27:32-44;
Mr. 15:21-32; Jn. 19:17-27)

²⁶Horco laa zho brieenie Jesús laa zho zienie me zaatne yquia me lo cruz. Nëz zienie zho me, bdzieel zho tib men Ciren lë Simón wbire lo dziin dan, pcuëëz zho men co, bnabey zho me bi me zhicruz Jesús; nalše me zhits Jesús, laa zho zienie Jesús. ²⁷Miech guizhiu ne zie ga, ndal grë men wnaa psilo zho roon zho no zho xquielnë me, ²⁸dzigo dze bui me lo zho, rëb me:

—Xin, nac to men Jerusalén rii, goonde to xquielnë naa. Mazd golgoon por grëtaa guielnë ne no gan to, por grëtaa guielnë ne no gan xpëëd to; ²⁹sac zeene gal dze co grë men wnaa ne quianie mëëd, ziab zho: “Mazd wenaque zie zha ne quianied mëëd, zha ne nand zha radz mëëd, zha ne niaadgaa gap mëëd.” ³⁰Horco grë miech, laa zho gnab tebaa zha pixche grë gui guiaan zho zhana. ³¹jGolwi ganle, telne znutaa mine nodeed naa nac naa zig tib yag nguia, peleļ to dzigo ne nac to zig tib yag bidz!

³²Ye schop zha ne nac ngbaan, zienie zho ga yquiaagza zho me lo cruz.

³³ Zeene bdziñ zho zaatne nac “Gui Beer-guic Ngutoo”, ga pquiaa zho me lo cruz gza me ngbaan co. Tibga zhiczuz zho bzo tib nêz cue zhiczuz me. ³⁴ Lo cruz co quia me, zeene nguiedz bnee me rëb me:

—¡Papá! Ncuaañe quiayun grë miech rii nu, bzhiguiel gunquizhd luu zhow; sac riend zho pe run zho.

Gza menguiib ne bdziñ ga yquiaanap me, hor co tib tib zho bzhense zho tib lë xab me, laa stiba bio zho rif. ³⁵ Ndal miech ne ndxie quiawi. Haxta grë zha ne nac wxtis zo ga, no zho rzhidznie zho me, rnee zho:

—Stib miech scataa beenguiac me, stib miech scataa bla me. ¿Pe rac me na ne riete me i? ¡Guiet me i zho, telne nli me nac Men ne zëëble diidz cxeel Dios, telne nli Dios bzooblo me ziaad me!

³⁶ Wbig menguiib co rdeed zho nziu bla guie me, rzhidznie zho me, rnee zho:

³⁷ —¡Zhirey zha Israel name nac luu! Psilaa luu lo guielnë qui nazho.

³⁸ Glaa guic zhiczuz me quia choplan diidz ne pquiaa zho, rneew: “LËË ZHIREY ZHA ISRAEL NU.”

³⁹ Grop ngbaan ne quianie me lo cruz ga, psilo tib zho ye zho rzhidznie me, rnee zho lo me:

—¡Led rëb luu lëë, luu nac Men ne zëëble diidz ga cxeel Dios! ¡Blu nazho nli men co nac luu, psilaa ne lo guielnë rii!

⁴⁰ Horco pquiab stib zha co, rëb zho lo zho:

—¡Psoog ro luu! ¿Pe niicle niina ne laa luu guetle ib rdzieebd luu Dios?

⁴¹ Bien ganle, ¡tel ne ible min rii rioguiäl ne grop ne, nu nodizh ne grë guielntseeb ne bdziun ne; sangue men qui, peet dol rapd me!

⁴² Dzigo rëb zho lo me:

—¡Bzhiguiel zeene guiaad luu gnabey luu, ib csand luu naa tib lad!

⁴³ Pquiab me rëb me lo zho:

—Peet tsienied guic luu, nadzegazh laa luu së guioo ne zaatne nac lo xquielb-ley Pxoza naa.

Gut Jesús

(Mt. 27:45-56;

Mr. 15:33-41; Jn. 19:28-30)

⁴⁴⁻⁴⁶ Goļ groļ dzew, tibaque zeene goc tib ncow dipse lo guidzliu. Ni palal rlud xbiini ngbidz, haxta las tres baa biini stib. Horco pquiaa Jesús tib redz nroob, rëb me:

—Papá, laa naa rsan zhiespíritu naa ladznia luu, luu pcaaniaw.

Diidz co brieer ro me, znuse blozh me. Laa me quialozh, zeene laa lar nroob ne quia len yadoo Jerusalén ga briez nzoli, grołtaa goca.

⁴⁷ Zha ne rnabey lo zhaguiib ne pquiaa me lo cruz ga, zeene gon zho zha blozh me, bien zho Dios been min co, rëb zho:

—¡Ne nlipagaa tib men peet xtold goc men qui!

⁴⁸ Scaque grë miech ne goclo ga, zeene gon zho zha blozh me, biabguielnë zho, mbanse rac zho laa zho wbi ga. ⁴⁹ Laa grë zha ne runbey me, zha ne gocnie me, zig nac grë men wnaa ne gocgrë zha ne brienaļ zhits me zeene brieer me nêz Galilé, grë zho laa zho ndxiese tib lad rwi zho.

Bgueets Jesús

(Mt. 27:57-61;

Mr. 15:42-47; Jn. 19:38-42)

⁵⁰ Lad grë zha ne nac zhiwxtis men Israel ga, no tib men guiedz Arimaté lë me José; lëë guiedz co ndxie xtan Judé. Tib miech wen nac me, noxco me mine rnabey Dios, ⁵¹ ye me quiambëz gdziñ dze ne csilo gnabey Dios. Zeene bnabey zha ne nacgrë me dziin ga zha gac Jesús, ni lalnu biod me conform mine bnabey zho. ⁵² Nacne hor co güey me lo Pilat, bnab me diidzbey tselit me xcuerp Jesús lo cruz. ⁵³ Dzigo güey me, blozhse blit me

cuerp co lo cruz, pcheĭ me me tib lo lar nroob, güey me güeyqueets me me tib len̄ baa cub ndieen̄ tib cho quie gax ga.

⁵⁴Lëë bdze dze co no zho xco ne laa dze ne gdziiladz zho lo dziin sëëb. ⁵⁵Grë men̄ wnaa ne sca nacgza grë zha ne brieenaĭ zhits me zeene briece me nëz Galilé ga, ye zho güeynaĭ bgueets me, gon̄ zho pa lo bio me. ⁵⁶Blozhse bgueets me, laa zho zey. Bdziñ zho bzhixcuua zho, tiblo zënex ne tsietëëb zho lad xcuerp me; dzigo laa zho bdziiladz zigne nabey ley no gon̄ zho.

BRIEBAN JESUS

(Mt. 28:1-10; Mr. 16:1-8; Jn. 20:1-10)

24 Laa zeene goĭ dze ne rzobni zhmal, silgaw laa gza men̄ wnaa co briece, bi zho grë zënex ne bzhixcuua zho ga, laa zho zie ro baan̄ Jesús.

²Bdziñ zho, gon̄ zho laa quie ne bioog ro baan̄ me ga bdiooble; ³bzëëb zho len̄ baa gon̄ zho, niicle xcuerp me guiendle ga. ⁴Laa zho zo ga, riend̄ zho dien̄ pe nacne sca nialse ro baa co, pe nacne niicle xcuerp me guiend̄ leen̄ co. Tibaque zeene gon̄ zho laa chop men̄ bgui zole lo zho ga, masaque riaazbel lad xab grop men̄ co. ⁵Horco per nli bdzieb zho, lo dzeb co mine been̄ zho laa zho pquiitsgzhib haxta bdziñ lo zho lo liu. Dzigo rëb grop men̄ bgui co lo zho:

—¿Pe nacne ziaadguib to men̄ mban zaatne rio men̄gut? ⁶¿Laa me briecebanle! ¿Guiendle me nu! Goĭsoladz ganle zha në me lo to len̄ dze ne no me nëz Galilé, ⁷në me: “Mgui ne pxeĭ Dios, ible none guiab me ladnia grë miech ngoopdol, squiaa zho me lo cruz, per zeene gac tson̄ ngbidza, laa me grieceban.”

⁸Dzigoraa psoladz zho, nligaa sca bnee me, ⁹hor co lëëläd güeynie zho dididz lo gza tsiiptib zha ne nac xpëëdsuel me, ni lo grëraa zha ne nacgza zho ga.

¹⁰Nzianlaa nac men̄ wnaa co, lad co no

Marí Magdal, no Zhuan, ni Marí ne nac xniaa Jacob.

¹¹Niicle bzodiidz zhow lo xpëëdsuel me, per con rnee zho led ncuuan̄ gacd ga, ni lalnu bliladz zhow. ¹²Tibaque zeene briece Pedr, rias Pedr laa Pedr zie nëz ro baa. Bdziñ Pedr bdiixlo Pedr len̄ baa co, gon̄ Pedr nligaa, jloxaque lar ne brieĭ me zhoob leen̄ co! Blozh ga, laa Pedr zeyaque, rzee zdoo Pedr gon̄ Pedr nli guiendle xcuerp me ga.

Gon̄ zho Jesús nëz Maús

(Mr. 16:12-13)

¹³Dze co briece chop xpëëdsuel me zie zho tib guiedz win lë Maús. Gax Jerusalén riaan̄ guiedz win co, maase chop hor rzë zho rdziñ zho ga. ¹⁴Nëz no zho nozodiidz zho grë mine pteed miech Jesús ga, ¹⁵tibaque zeene bien̄ zho laa zho bgaa tib lo men̄ co, gocgza me zho laa zho no nëz, per, jib bien̄d zho lëë Jesús ga! ¹⁶Ranlo zho laa me ziegza zho ga, per ni lalnu been̄beyd zho ne mew, sac zig nac zeen̄ pe tib ncuuaane ptse lo zho. ¹⁷Dzigo rëb me:

—¿Pe squitaa nozodiidz to? ¿Pe nac squi rac to, zig nac zeene pe guielnë no to?

Dzigo bzodze zho. Mban rac zho, haxta lo zho rlu nroob guielnë no zho. ¹⁸Pquiab tib zha ne lë Cleof, rëb zho:

—¿Niacxe bind luu ganle zha nactaa ncuuaane goc Jerusalén len̄ dze rii? Grëse zha ne name güey Jerusalén, gocnana.

¹⁹—Nligaa —rëb me—, ¿pe dien̄ goc ga?

Rëbchaa zho:

—Len̄ dze rii psacsi zho men̄ Nazaret ne lë Jesús. Tib men̄ ne biadteed xtiidz Dios lo miech nac me, nzian grë milagr nroob ne been̄ me; miech guizhiu ne bley pquiaadiag zhiwseed me. Rlu tib men̄ nziiuu nac me lo Dios. ²⁰Per leĭ briece grë pxoz rnabey, grë zho zha ne nac wxtis, bnaaz zho me, bnaab zho gut me, pquiaa

zho me lo cruz. ²¹ Tibaque rdzieets no, me niac tib men ne nsilaa zha ladz ne lадznia zha Roma. Pasēse min co niac, nadzele rac tson ngbidz beet zho me. ²² Per riend no dien zha nac cuent co, sac nasil güey bla men wnaa ne nacgrē no ro baan me, ²³ zeene wbire zho bzodiidz zho lo no nē zho guiendle xcuerp me len baa, loxaque chop anjл briequia lo zho ga, rēb anjл co mban me. ²⁴ Blozh ga, güeyaque bla zha bgui ne nacgrē no, gon zho nligaa guiendle xcuerp me ga.

²⁵ Dzigo rēbchaa me lo zho:

—¡Nadzpaа ncow nac guic to, nadzpaа ndip nac zdoo to! ¿Rliladzde to grē mine dzigo lēē bzeet zho padzeela ted Men ne nole diidz ga cxeel Dios? ²⁶ Bzeetle zha co name ible no csacsi miech me, antes ne gbire me lo guieindzon ne no me.

²⁷ Dzigo psilo me bnee me lo zho pa lo zhubnee grē mine bded me ga, psilo me desde grē mine pquiaа Moisés, haxta grē mine pquiaа grēraа zha ne biadteed xtiidz Dios. ²⁸ Sca no zho nēz laа zho bdziñ Maús. Bdziñ zho ga, rac me zig nac zeene tib ted me, ²⁹ dzigo quiaа zho rnab zho lo me cuēz me ga, sac laа dze bdzele, zhile laа liu ycow. Nacne blēz me.

³⁰ Laа zho zob lo mezh gowxtsee zho, bzhen me guietxtil bdeed me xquizh lo Dios, blozh beengrol mew bdeed mew lo zho. ³¹ Dzigoraa zig nac zeene bzhial lo zho, laа zho beenbey me. Per par nianraа zho me, znuse bnit me lo zho, gonдраа zho me. ³² Horco per nli rley zho rnee zho:

—Con razon zeene sca ziaadgza ne me nēz nonee me lo ne zha raquiet lo Xtiidz Dios, masaque tib guiebley nroob ne bi-aadnie xcodiidz me zdoo ne.

Sca rnee zho, sac bien zho bdziñ tib guiebley nroob zdoo zho, zeene sca nonee me lo zho. ³³ Lēēlēdaque briece zho ga, bio zho nēz wbire zho Jerusalén stib. Bdziñ zho lo gza tsiiptib zha ne

bzēniepaa me ga, ni grēraа zha ne nacgrē zho, ³⁴ rēbchaa zha co lo zho:

—¡Tebaa gan to ganle nli brieceban xmaistr ne! ¡Laа Pedr gonle me!

³⁵ Psiloque zho grop zho bzodiidz zho zha gon zho me no zho nēz, per haxta horne no zho xtsee, zeene laа me beengrol guietxtil dzigoraa beenbey zho me.

Briequia Jesús lo grē xpēdscuel me

(Mt. 28:16-20;

Mr. 16:14-20; Jn. 20:19-23)

³⁶ Lēētaaque sca nozodiidz zho, tibaque zeen gon zho laа Jesús zole lo zho ga, pquiaabdiuzh me zho, rēb me lo zho, peet tsieniedraа guic zho. ³⁷ Leļ rdzieb zho, haxta rzhidz zho lo dzeb co, sac rēb zho bod ndziin ga ran zho.

³⁸ Dzigo bnee me lo zho rēb me:

—¿Pe nacne rdzieb to? ¿Pe nacne rliladzde to naа nu? ³⁹ Golwi len nia naа, golwi zhits ni naа ganle. Golxeen naа, zeena gliladz to ganle nli naaw; sac tel ndziina, mese naca, gacd xen tow.

⁴⁰ Sca quianee me, blu me nia me, blu me ni me lo zho, zaatne biaaz me clav.

⁴¹ Per nli rley zho, rzee zdoo zho, per rliladzdaque zho dien pe nlipaa lēē me ga. Gon me sca rac zho, nacne bnab me ncuaane gow me lo zho. ⁴² Dzigo bdeed zho tib lē meļ bguiee lo me, ⁴³ bnaaz me meļ co, squi ndxie zho gon zho dow me ma. ⁴⁴ Dzigo rēb me lo zho:

—¿Pe ib rsoladzde to nile naа laа grē min rii no gac? Led ni naа lo to, grēse mine bzeet Moisés, grēse mine bzeet grē zha ne biadteed xtiidz Dios, mine raquietgaa lo Salm teed naа, ible laaw none gac.

⁴⁵ Psilo me clar nonee me lo zho, parne guienpaa zho zha zhubnee lo grē guits co, ⁴⁶ rēb me:

—Ible lo co zhubnee sca teed naа ne nac naа Mgui ne pxeel Dios, rneew ib no gut miech naа, per zeene gac tson ngbidza, laа naа grieceban. ⁴⁷ Rneew,

Jerusalén nu, nu csilo gacnañ miech ible none csaan zho xquiełntseeb zho, gnalo zho naa, parne gun Dios zho perdon. ⁴⁸Ni to gon ganle grëse min co, goca. ⁴⁹Na len dze ne ziaadaque nu, laa naa cxeł Espíritu Sant gacnieñ to, sac ib scale nac xtiidz Pxož naa. Per guiabde to niinaga griece to tsienee to lo miech, Jerusalénse nu gołcuëž, haxta nieeda ygaa to poder ne gneedz Espíritu Sant lo to.

⁵⁰Zeene goł dze ne laa me guey gbaa, dzigo güey me güeynie me zho nëž Be-

tain. Bdziñ zho ga, blis me nia me, psilo me noyunlay me zho. ⁵¹Laa me quiayunlay zho, tibaque zeene laa me bias lo guidzliu, įgonlo zho laa me bzoquia gbaa!

⁵²Horco pquiitsgzhib zho liu, beennon zho me, rnee zho grë diidz ndzon lo me; bložh ga ine rley zho laa zho wbi ga, bdziñ zho Jerusalén stib. ⁵³Psilo zho gzataa dze rie zho yadoo roolnie zho Dios, rdeed zho xquizh lo me.

XTIIDZ NDZON DIOS MINE PQUIAA

JUAN

1¹⁻² Jesús, men ne nac Diidz Ndzon, nole me zeene baa grëtaa ncuaaane no; lo Dios no me ni Diosaque nac me. Notaque me, tibaque nac me: me ni Dios. ³Me bzaa grëtaa ncuaaane no, tsod ncuaaane lega scase niaan; sac me bzaaw grësew. ⁴Ladznia me no guielmban ne gdziñd dze lozh, nac guielmban co zig tib biini ne rziini lo miech. ⁵Me nac biini ne quiazini zaatne nac lo guielcow, ni rrielod guielcow ctsew lo biini co.

⁶⁻⁷Bio tib mgui brieelë Juan, Dios pxeel Juan biadnee Juan lo miech cho nac Jesús, zeena grëse zho gliladz Jesús. ⁸Led Juand nac biini, sinque loxaque biad Juan biadlu Juan Jesús, men ne nac biini co. ⁹Bdziñ dzew laa Jesús biad, ni niina me nac men ne noziini lo grëse miech, sac mepaa nac biini co.

¹⁰Jesús nac biini, me nac Diidz Ndzon co. Me bzaa guidzliu, per zeene biad me lo guidzliu ib biend miech cho nac me. ¹¹Per ni menladz me, niicle ne lopaa zho bdziñ me ib gonzed zho me; tib chop zha ne blëzlo me. ¹²Ni grë zha ne sca bleynie me, grë zha ne dib zdoo gliladz cho nac me, grëse zha co laa me bzo zho gac zho xpëed Dios. ¹³Grëse zho, rreequia gol zho stib! Per guiabd ne togo gol zho zigne ral grë miech guidzliu rii, sinque laa zho gol zigne racladz Dios; gane niina xpëed me nac zho.

¹⁴Zeene bdziñ dze ne laa men ne nac Diidz Ndzon ga goc miech biad me lo guidzliu, grop lo no bdziñ no me, ni bzianie no me. Blu me pa lotaa nquialadz me miech, ni niapse diidzli bnee me. Bdziñ no xquielndzon me ne nac me tibpaa mëed lo Dios, men ne nac Pxoze.

¹⁵Zeene bzeet Juan Bautist me lo miech, tib vuel haxta blu Juan me lo zho, rëb Juan: “Lëe men rii ga gon rzet naa lo to zeene rne naa: Iraa ziaad tib men ne mazdraa non lo naa, sac notaque me; nole me zeene blanso naa lo guidzliu.”

¹⁶Nquialadzdox Jesús ne, grëse ne gzataa dze laa ne nogaa grëtaa guielnzaac ne rsiaab me. ¹⁷Zeene psan Moisés ley, loxaque bnabeya ne; sangue niina ne laa Jesús biad, laa me biadnie mine nacpaa diidzli ni biadlu me ganle pa lotaa nquialadz Dios miech.

¹⁸Waltaa ib choot gard gan Dios; sangue niina ne laa Xpëed me Jesús biad, men co biadlu ganle zha nac Dios; sac zaatne no Dios gaque no me.

Rnee Juan Bautist cho nac Jesús

(Mt. 3:11-12; Mr. 1:7-8; Lc. 3:15-17)

¹⁹Tib dze pxeel grë zha ne nac zha non Jerusalén, bla zha ne nac pxoz ni zla zha ne rquianap yadoo, zienabdiidz zho lo Juan dien cho nac Juan.

Bdziñ zho bnabdiidz zho lo Juan. ²⁰Dzigo bneeli Juan lo zho, rëb Juan:

—Golgacnan ganle, led naad nac Men ne quiambëz to ga cxeel Dios.

²¹—¿Chox nac luu waa? —rëb zho—. ¿Te luu ye nac Lí, men ne biadteed xtiidz Dios padzeela?

Pquiab Juan rëb Juan:

—Lëda, led Lí naa.

Biire zho bnabdiidz zho, rëb zho:

—¿Te luu ye nac men ne bzeet Dios padzeela cxeel me guiadteed xtiidz me?

Pquiab Juan rëb Juan:

—Zhaa men co, led naad nac men co.

²²—¿Cho dzigo nac luu? —rëb zho—. Bnë dien cho nac luu; sac gon ib none gdziñnie no tib xtiidz luu lo zha ne pxeel no.

²³Dzigo pquiab Juan, rëb Juan lo zho: —Naa nac mgui ne bzeet Isá, men ne biadteed xtiidz Dios padzeela, zeene znu

bnee me: “Zon to zëeb tsi tib mgui dan rnee me lo miech: ¡Golgun̄ nguudz zdoo to, sac gon̄ ile ziaad men̄ ne rnabey ne!”

²⁴ Horco laa zha ne pxeel̄ zha farisé pquiab, rëb zho lo Juan:

²⁵ —Tel̄ne led luud nac Men̄ ne zëeble diidz ga cxeel̄ Dios, niicle led luud nac Lí, niicle nacdgaaluu cho stib zha ne pxeel̄ Dios ziadteed xtiidz me, ¿zha nac dzigo ne nochoobnis luu miech?

²⁶ Pquiab Juan rëb Juan:

—Tel̄ naa niab nis rchoobnis naa miech, per no tib men̄ ne gard gun̄bey to. ²⁷ Tib men̄ non nac me, per ni par gac naa tib ngundziin win ne glit lab me ni me raguiald naa; ni merle csilo gun̄ me dziin ne pxeel̄ Dios me gun̄ me.

²⁸ Betain lë tib guiedz ne riaan̄ gax ro guiubee Jordán, nëz ne rlan ngbidz; ga no Juan nochoobnis me miech zeene scataa pquiep zho me.

¿Cho nac Jesús?

²⁹ Biet stib dzew, laa Jesús bdziñ za-atne no Juan ga. Zeene gon̄ Juan me, rëbchaa Juan lo grë miech ne ndxie ga:

—¡Golwi gan̄le, lëe men̄ qui gon̄ csilaa miech lo grëtaa xtol̄ zho! ¡Me gac zig tib carner yeen̄ ne guet tsoyon lo Dios par guiaan̄mbe miech lo dol̄! ³⁰ Lëe men̄ rii ga nagon̄ rzet naa lo to zeene rne naa: “Iraa ziaad tib men̄ ne mazdraa non lo naa, sac notaque me; nole me zeene blanso naa lo guidzliu.” ³¹ Len̄ dze co niicle naa run̄beyd naa me; per laa naa nochoobnis miech sac ible laa naa zial̄ par glu naa me lo grë zha Israel.

³² Dzigo bzodiidz Juan lo zho, zha gon̄lo Juan biet Espíritu Sant gbaa, rlu me zigne rlu tib palom blëz me guic Jesús.

³³ —Ne nligaa run̄beyd naa me —rëb Juan—. Per zeene pxeel̄ Dios naa zial̄chobnis naa miech, hor co në me lo naa: “Zeene gan̄ luu guiet Espíritu Sant gbaa cuëz me guic tib mgui ne nochoob-

nis luu, dzigo gocnan̄ lëe men̄ co nac men̄ ne rxeel̄ Espíritu Sant zdoo miech.” ³⁴ Gon̄lo naa blëz Espíritu Sant guic me; gane nan̄ween naa ne nli Xpëed Dios nac me.

Zha ne gloopaa goc xpëedscuel Jesús

³⁵ Biini liu co, laa Juan zoque ga zonie me chop xpëedscuel me. ³⁶ Ga zo me, gon̄ me laa Jesús zieded ga; dzigo rëbchaa me lo zho:

—¡Golwi gan̄le! ¡Lëe men̄ qui gon̄ nac Xcarner yeen̄ Dios!

³⁷ Zigne bin zhow, laa zho zianal̄ zhits Jesús. ³⁸ Zeene ptsire lo me, gon̄ me laa zho nalle zhits me; dzigo rëbchaa me lo zho:

—¿Pe nac ziaadnal̄ to zhits naa?

—Maestro —rëb zho—, laa no racladz gacndion̄ no dien̄ pa rbëz luu.

³⁹ Dzigo rëbchaa me lo zho:

—Na gan̄le guio ne, zeena gan̄ to paw.

Nacne güeynal̄ zho zhits me, gon̄ zho pa lo no me; dzigo blëz zho lo me ga. Ga blozh ptse zho dze, sac ziedzele dze zie zho.

⁴⁰ Ndrés lë tib zha ne güeynal̄ zhits me ga; lëe Ndrés co nac bets Simón Pedr.

⁴¹ Dzigo zigne briece Ndrés ga güey Ndrés güeyguib Ndrés Simón. Bdziñ Ndrés rëb Ndrés lo Simón:

—¡Nasi gon̄ laa no bdzion̄ Men̄ ne nacle diidz ga cxeel̄ Dios!

⁴² Dzigo güeynie Ndrés Simón zaatne no Jesús ga. Zeene gon̄ Jesús Simón, rëbchaa me lo Simón:

—Bina gan̄le, nli Simón nac lë luu ni xingan Jonás nac luu, sangue niina laa luu grieel̄ Cef.

(Cef rnee zha Israel quie, laa xtiidz zha Gres rnee zhow Pedr.)

⁴³ Biet stib dze co, laa Jesús no nëz tsie me nëz Galilé. Laa me zieriee dze ga, zeene bdzieel̄ me tib mgui lë Lip; dzigo rëbchaa me lo Lip:

—Dënal̄ zhits naa.

⁴⁴Zha Betsaid nac Lip, ni zha coque nac Ndrés grop Simón.

⁴⁵Dzigo güey Lip güeyguib Lip Natanael; rëb Lip lo Natanael:

—¡Laa no bdziõn Meñ ne nacle diidz ga cxeel Dios! Meñ ne rzeet Moisés lo libr ley ne psañ me, meñ ne scataa bzeet grë zha ne biadteed xtiidz Dios padzeela. ¡Laa no bdziõn me, tib meñ Nazareta, lëe me ga nac Jesús, xingan José!

⁴⁶Pquiab Natanael, rëb Natanael:

—¿Nazaret ye? ¡Gard griequia tib zha non Nazaret!

—Gotsaa guio ne ganle —rëb Lip—, zeene ganzhal luu me.

Dzigo laa zho zie. ⁴⁷Squi ziaad Natanael, zeene gon Jesús Natanael rëbchaa me:

—¡Golwi ganle, lëe zha qui gon nac merpaa zha Israel, sac mesi ib rquidied me!

⁴⁸—¿Zha nacne runbey luu naa? —rëb Natanael.

Pquiab me rëb me:

—Glole naa beenbey luu, dzigoraabredz Lip luu. Zeene zob luu tib zhan yag guigw, hor co gon naa luu.

⁴⁹Rzee zdoo Natanael, rëb me lo Jesús:

—¡Nlique nagon luu nac Xpëed Dios! ¡Luu nac zhirey zha Israel!

⁵⁰Dzigo rëbchaa Jesús lo Natanael:

—¿Pe ne binse luu ni naa gon naa zeene zob luu tib zhan yag guigw, pe mincose laa luu bliladz cho nac naa? ¡Naraa ganle gan luu ncuaañ mazdraa nroob!

⁵¹Ni rëb me lo grë zha ne ndxie ga:

—Gneli naa lo to: zanaque to ganle zeene laa zhan gbaa gzhial, zlupaa grë xanj Dios, zha ne ziad-zëeb zha ne ziequia, quiayun zho dziin lo naa, nac naa Mgui ne pxeel me.

Güey Jesús tib lo guieltsieel

2 Goc tson ngbidza, bio tib guieltsieel guiedz Caná, xtan zha Galilé ga. Dzigo bredz zho xniaa Jesús lo lni co, ²ni bredz zho me; nacne bional no zhits me grëse no ne nac no xpëedscuel me.

³Laa lni noyac, tibaque zeene laa vin blozh. Dzigo güey xniaa Jesús rëb me lo Jesús:

—Laa xvín meñ rii blozh. ¡Guiendraa pe quiz zho!

⁴Pquiab Jesús rëb me:

—¿Pe nacne rnee luuw lo naa? Gon ganle naraa gdziñ dze ne gacnan miech cho nac naa.

⁵Niicle sca rëb Jesús lo me, güey me lo zha ne quiaguiz vin ga rëb me lo zho: —Mine gnabeytaa me to, golguna.

⁶Lidz meñ co ga ndxie xoop guies ne niaa quie; zaatne rio nis ne rquiin zha Israel riar nia zho, zigne nac grë xcostumbr zho. Tib tib guies co, rio maase xoopga re nis lena. ⁷Dzigo bnabey Jesús zha ne rguiz vin ga pcodzëe zho nis len gza guies co. ⁸Blozhse guiel guiel pcodzëe zhow, rëbchaa me lo zho:

—Golcúee niip nis qui, goltsieniew lo meñ ne zo lo lni.

Zeene laa zho blee niip nis co tsienie zho, laaw nacle vin. ⁹Ni lalnu ib güeynied guic meñ co pa brieë vin co (loxaque zha ne nacse ngundziin ga, zha ne blee nis ga, zha cose gon pa brieew), zeene pquiaaro mew, bredz me mgui ne notsieelnia ga, rëb me:

¹⁰—¿Zha nan luu naraa cüee luu vin rii! Grëtaa zaatne znu rac lni, glo rgaaz vin niazh, zeene nrooblew noye zho, dzigo rgaaz vin ligase. Laa luu gon lej naraa bnabey luu brieë vin niazh.

¹¹Milagr ne been Jesús guiedz Caná ga, ga glopaa blu me lo miech ganle nli tib meñ nroob nac me. Grëse no ne nac no xpëedscuel me, zeene bdziõn now,

hor co bliladz no nli me nac Meñ ne zëëble diidz ga cxeel Dios.

¹² Zeene blozh guieltsieel co, laa no wbire guiedz Capernaum stib grë no me, xniaa me, ni zha bets me ne. Bdziñ no Capernaum, ga bliaaz no blalaa ngbidz.

**Blee Jesús grë zha ne
noyñ lgui len yadoo**

(Mt. 21:12-13;

Mr. 11:15-18; Lc. 19:45-46)

¹³ Len dze ne ziaadyob lni Pascw, lni nroob ne ruñ zha Israel rsoladz zho zha psilaa Dios zho Egipt, len dze co briece Jesús zie me nöz Jerusalén.

¹⁴ Bdziñ me Jerusalén, güey me len yadoo nroob ne zob lad guiedz co. Zeene bzëëb me, gon me nzian miech ne ndxie ro yadoo co, zha ne no wto ngon, zha ne no wto mëcwxiil, zha ne no wto palom ne, haxta zha ne rtsëë dimi ndxie ga.

¹⁵ Dzigo bzhixcuaa me tib lë doo zig ríaa dooguid ne rcaa ma, bzhen me doo co benxoon me zho ga grë xma zho; blozh ga, ptiixche me xmezha zha ne notsëë dimi ga, nözrii nözrec blaal me xtimi zho.

¹⁶ —iNiinagazh gołcuee grë ncuañ qui nu! —rëb me lo zha ne rto palom—. iGołguien ganle lidz Pxoza naa nu! iNacda yu lgui parne tso to wto nu!

¹⁷ Dzigo psoladz no zha ziaad lo Xtiidz Dios, zaatne rnee: “Rbiñladz guic naa, sac ne nligaa racladz naa yquiaanap naa lidz luu.”

¹⁸ Blalaa zha non lo menguietz Israel, zeene gon zho sca benxoon me grë miech co, wbig zho lo me rëb zho:

—iCho nac luu ne squitaa noyñ luu grë ncuañ qui? iBeen tib milagr, dzigo zliiladz no men rñabey nac luu!

¹⁹ —Telne racladz to milagr —rëb me—; gołsil yadoo rii, ni gni naa lo to ganle ngbidz tsona laa naa bzaalolew stib.

²⁰ Pquiab zho rëb zho:

—iNcuane gliladzdraa no rnee luu! iLen choopxoopra iz name bíaa yadoo rii! iZhazhe gun luu, tsonaque ngbidz gzaa luuw stib?

²¹ Per zeene sca bnee Jesús lo zho, xcuerp me ga nac yadoo ne bzeet me. ²² Gane zeene brieceban me, hor co psoladz no zeene znu bnee me, dzigo bien no ne me ga bzeet me ni bien no ne me ga raquiet lo Xtiidz Dios zaatne scaque rnee.

²³ Len dze lni Pascw co, nzian miech zeene gon zho grëtaa milagr ne ruñ me, bliladz zho ne nli me nac Meñ ne zëëble diidz ga cxeel Dios. ²⁴ Per ib pxend me lo zho, sacne nanwen me zha nac zho tib tib zho. ²⁵ Pquiind me chopaa niab lo me zha nac zho; sac nanwen me zha nac tib tib miech ni nan me pe rza zdoo zho.

Jesús ni Nicodem

3 Ziecowle liuw, bdziñ tib zha farisé lë Nicodem zaatne rbëz Jesús; tib zha non nac me lo menguietz Israel. Bdziñ me rëb me lo Jesús:

² —Maestro, ndion no ible Dios pxeel luu ziadseed luu no. Grë milagr nroob ne ruñ luu, ga rlu ne Dios nacie luu.

³ —Gneli naa lo luu ganle Nicodem —rëb Jesús—, grëse miech, telne gald zho stib grieelod gdziñ zho zaatne rñabey Dios.

⁴ Pquiab Nicodem, rëb Nicodem:

—iGal zho stib ye? iZha grieelo gal miech stib? Tib zha ne nacle mengol, iñiacxe zrieelo sëëb zho zdoo xniaa zho gbiire gal zho?

⁵ Rëbchaa Jesús:

—Ible none gal miech, none gal zho zigne racladz Dios. Sac telne chobnisd zho ni ygaad zho Espiritu Sant, grieelod sëëb zho zaatne rñabey Dios. ⁶ Grëse miech zeene ral zho glo, miechse nac zho; sangue zeene ral zho stib, Espiritu Santle nac men ne rñabey zho. ⁷ Gacxe waa, gzeed zdoo luu znu rne naa: “Grëse

miech, ib none gal zho stib.”⁸ Nac cuent rii zig nac me ne rtop xcow, zeene rriee me, nēzrii nēz rec zie me, ron luu razh zhoob me; per rand luu dien pa nēz zie me dien pa nēz ziaadгаа me. Scaque nagon nac zha ne ral stib, grielod guien miech zha rnabey Espíritu Sant lo xquielmban zho.

⁹—Riend naa zha rnee luu —rēb Nicodem—. ¡Riend naa dien zha grielo gac grē mine rnee luu i!

¹⁰ Rēbchaа Jesús:

—¿Riend luu ye zha rne naa? ¡Men rseed miech name nac luu lo menguedz Israel! ¹¹ Mine rne naa nu ncuaañe rien naaw, ncuaañe gon naaw, ni riende to zha naca. ¹² Telne riend luu zha nac grē mine rne naa nu zeene rzet naa ncuaañe rac lo guidzliu, ¿zha dzigo guien luu mine gne naa telne gzet naa grē ncuaañe rac gbaа?

¹³ Wlaltaa gard tso tib zha ne soquia gbaа, per no tib men ne biet gbaа, men cosi soquia me gbaа, sac ga nac zaatne no me; ni lēē men co nu nac naa. ¹⁴ Ni zigne pquiangaa Moisés tib meel brons tib guic yag zeene nonie me zha Israel dan zit co; scaque none yquiangaa naa tib lo yag, ¹⁵ zeena grēse miech, zha ne gbig dib zdoo zho gnalo zho naa, zgaa zho tib guielmban ne gdziñd dze lozh.

¹⁶ Sac gon rleyniedox Dios grēse miech ne ndxie lo guidzliu; gane niicle tib naa nac mēēd lo me per laa me pxeel naa lo guidzliu; zeena grēse zha ne gnalo naa, zgaa zho tib guielmban ne gdziñd dze lozh; led yed zho nitlo. ¹⁷ Laa Dios pxeel naa lo guidzliu par csilaa naa miech lo dol, ziald naa par gdziibdol naa miech. ¹⁸ Sac grēse zha ne dib zdoo gnalo naa ne naa csilaa zho lo dol, nitlod zho. Sanguie zha ne gnalod naa, laa zho bnitlole ga, sac gon Xpēēd Dios nac naa ni bliladzd zho naa. ¹⁹ Laa zho bnitlole, sac gon bi-aadpaa biini lo guidzliu ni laa ne nleynie zho biini, lel guielcow bleynie zho, sac

guielntseeb nac mine zianał zho. ²⁰ Grēse zha ne run guielntseeb, rlēē zho ran zho biini. Ib rbigd zho lo biini, sac racladzd zho xoobnen grē guielntseeb ne quiayun zho. ²¹ Sanguie zha ne run mine rnabey Dios, haxta rley zho rbig zho lo biini, zeena glu ganle zianał zho mine rnabey me.

Rzeet Juan Bautist Jesús stib

²² Ga brieet Jesús güeynie me no nēz xtan zha Judé. Xtselaa bliaaz no ga grē no me, rchoobnis me grē miech co.

^{23–24} Len dze co gard guiab Juan Bautist ladzguiib; dzigo ye me nochoobnis miech zaatne lē Enón gax Salim; sac ga no naal nis. Nzian miech ne rdziñ lo me ga, rchoobnis me zho.

²⁵ Tib dzew, wbig tib zha Israel lo zla xpēēdscuel Juan, psilo zho nodildi-idz zho dien cho zhiwrobnis nonraа; pe zhiwrobnis Jesúsа, te zhiwrobnis Juana ye. ²⁶ Blozhse bdildi-idz zho, wbig xpēēdscuel Juan lo Juan, rēb zho:

—Maestro, men ne gon bzodiidznie luu ro guiubee Jordán ga, men ne scataa bzeet luu lo miech, ¡ye me laa me quia-choobnis miech niina, ni ndal miech niapse lo me zie zho, ziaatraade zho nēz rii!

²⁷ Pquiab Juan rēb Juan:

—Ib Dios rdeed diidz zha gun miech tib tib xtsiin me, gacd ne lega zhal zho gun zho pe cos. ²⁸ Mine pso Dios naa, laaw ben naa: laa naa biallu ganle cho nac Men ne zēēble diidz ga cxeel Dios. Ni bneeli naa lo to ganle led naad nac men co; laa naa zial loxaque par gzet naa me lo miech zeena gunbey zho me. ²⁹ Ible lo me none gdziñ miech. Nac me niina zig tib mgui ne notsieelnia: Mgui ne notsieelnia, ¡led zha lēē rzobnie nd-zoop ne notsieelnia zho! Ni grē zha ne ndzieeldiidz zho, rley zho ran zho laa xamigw zho notsieelnia, rley zho ron zho pe rnee xamigw zho. Scadaa nagon rzaac

naa niina: rley naa ron naa grë ncuaañe run me. ³⁰ Zigse zie dze, laa me gacnon-raa; scagaa naa, zigse zie dze laa naa guiaañwinraa.

³¹ Něz gbaa ziaad me, miñ co ne mazdraa non me lo grë miech. Teļ naa tib miech guidzliuse nac naa, ni ncuaañe riense tib miech lo guidzliu miñ co rne naa; ³² sangue me, niapse grë miñe bin me, grë miñe goñ me miñ co rnee me lo miech; iñi choot riladzda! ³³ Zha ne riladzse xtiidz me, riñ zho ganle niapse diidzli rnee Dios. ³⁴ Xtiidz Dios rnee me lo miech; sac Espiritu Sant rdeed guielbini lo me, ni Dios nac men ne pxeel me. ³⁵ Rleyndox Dios me, nac me Xpëed Dios; gane grëtaa ncuaañe no gbaa, no lo guidzliu, ladznia me psañ Diosa. ³⁶ Grëse zha ne gnalo me, laa zho bgaale tib guielmban ne ib gdziñd dze lozh; sangue zha ne gond xtiidz me, gdziñd zho gbaa, zaatne ygaa zho guielmban co. iGrëse zha co, ible zgaa zho guielñëdnox ne csi-aab Dios!

Tib wnaa Samar

4 Zeene bien Jesús laa zha farisé gocnanle ndalraa miech zianal zhiwseed me, ni ndalraa miech ne quiachobnis me lo Juan ² (niicle ne led medpaa rchoobnis, sinque zha ne nac xpëedscuel me zha co rchoobnis), ³ nacne brie me xtan zha Judé ga, wbire me něz xtan men Galilé stib.

⁴ Par gdziñ me Galilé, none ted me xtan men Samar. ⁵ Xtan men Samar zieded me, zig groļ dzew, laa me zie gax guiedz ne lë Sicar, ⁶ dzigo güeyted me zatne quia guiuu ne rnee zho “Zhibzie Jacob”; lo liu ne psañ Jacob lo xpëed me José padzeela. Rdzag me ziaad-zë me lo nëeg co, bdziñ me bzob me ro guiuu co; ⁷⁻⁸ ga blëz me, laa no zio lad guiedz Sicar zioxi no ncuaañe diowonie no me.

Ro guiuu co zob me bdziñ tib wnaa Samar xiexi nis ga; dzigo rëbchaa me lo wnaa co:

—Bzhiguiel bzoladz niip zhis luu guie naa.

⁹ Bzee zdoo wnaa co goñ me bnab Jesús nis lo me, sac rlëëdox zha Judé ran zho zha Samar, per ni rneed zho lo zho.

—iNcuaañe gliladzd naa! —rëb me—. iTi zha Judé gnab nis lo ti zha Samar!

Dzigo rëbchaa Jesús:

¹⁰ —Teļ niaca miñe guien luu ganle cho rnab nis lo luu, ni guien luu zha nactaa ncuaañe rzoladz Dios lo miech, haxta znab luu nis lo naa. Ni naasi goñ, znedz naa nis ne rdeed guielmban.

¹¹ Pquiab wnaa co, rëb me:

—Per ni nzhend luu name pe cuee luu nis, i pa dzigo tsiebee luu nis ne rdeed guielmban ga? iGoñ ganle, quietdox bzie rii! ¹² Stiba, iñiacxe mazdraa dzigo nac luu que pxozgol ne Jacob, men ne psañ bzie rii? Nu name go me nis grë xma me; niicle grë xpëed mew, nuque go zho nis.

¹³ —Grëse zha ne rie nis rii —rëb Jesús—, rbiire rnab zhis zho; ¹⁴ sangue nis ne rded naa, zha ne guiew gdziñdraa dze gnab zhis zho. Sac nis ne gded naa, masaque gdziba zdoo zho zig rdzib nis tib ro zhlian, ni nis co gdeed tib guielmban ne gdziñ dze lozh lo zho.

¹⁵ Dzigo rëbchaa wnaa co lo Jesús:

—Bzhiguiel bneedz nis co guie naa, zeena gnabdraa zhis naa, zeena guialxidraa naa nis nu.

¹⁶ —Güeygazh —rëb Jesús—, güeyxi tsieel luu, dzigo goļtë grop to.

¹⁷ —Guiend tsieel naa —rëb wnaa co—. Gard ctsieelnia naa.

—Nli rnee luu —rëb Jesús—; ¹⁸ sac gaay mgui ne zibannie luu, ni tib zho ptsieelniad luu, niicle mgui ne nonie luu niinaw, ptsieelniadaque luu zho. iNli miñe rnee luu i!

¹⁹ Zeene bin wnaa co sca rëb Jesús, rëbchaa me:

—Zootne tib zha ne ziadnee xtiidz Dios lo miech nac luu. ²⁰Teḷ scaw, bzhiguieḷ bnè dien, ¿zha nacne rnee grè meḅ Israel ne leḅ yadoo nroob ne zob-paa Jerusalén, gapaa none tsiegan miech Dios? Sac no ne nac no meḅ Samar, rnee no ne ib guic gui ne zob nu, ga none tsiegan miech Dios; sac grè xmengol no ga güeygan zho Dios.

^{21–24}Pquiab Jesús rëb me:

—Bina ganḷe, dzziḅ dze zeene yquindraa ne goon guic gui riipaa, o Jerusalénpagaa tsie to tsiegan to Dios meḅ ne nac Pxoꝝ ne. ¡Ni laa dze co ziaadgaxle! Gacdraaw ne dien pa lo tsie ne tsiegan ne Dios, sinque zha ne nlipaa racladz gleynie me, none dib zdoo zho gleynie zho me; zigne gdeedse Espíritu Sant guieḷbiini lo zho.

‘Choot grieelod ganḷe Dios; gacxe waa zha ne gleynie me, none gleynie zho me zigne rdeed Espíritu Sant guieḷbiini lo zho; ni none dib zdoo zho gleynie zho me. Ni zha ne sca gleynie me, zha co rguib me. Teḷ to laa to rieganse Dios ni runbeyde to me; sangue no rdziunbey no meḅ ne riogan no, sac gonḷe lo xti meḅ Israel ziaad meḅ ne guiaadsilaa miech lo dol.

²⁵—Nenda —rëb wnaa co—, per nan naa ib ziaad Meḅ ne zëëble diidz ga cxeel Dios, meḅ ne lè Crist; ni zeene laa me guiaad, me gnè diidzli lo no.

²⁶Pquiab Jesús, rëb me:

—¡Naa gonḷe nac meḅ co! Lëe me nu nonee lo luu.

²⁷Lëetaaque hor co grëse no ne nac no xpëedscuel me laa no bdziḅ. Bzee zdoo no bdziḅ no laa me nozodiidznie wnaa co, per ni tib no bnabdiidz lo me dien pe quianabdiidz me, dien pegaa quia-zodiidznie me wnaa co.

²⁸Laa wnaa co, zoque xche me ga, rias me laa me zie nëz lad guiedz. Bdziḅ me, rëb me lo grè miech co:

²⁹—¡Golḷtë ganḷe gunbey to ti meḅ co! ¡Bzeet me grëse zha nac lo xquieḷmban naa! ¿Bay pe lëdle Meḅ ne nole diidz cxeel Dios ga?

³⁰Horco briece grè miech co lad guiedz, ziaad zho zaatne gonḷe wnaa co Jesús.

³¹Laa no, quia no rdeed no ncuaane gow me, per nëd me.

³²—Gowd naa —rnee me—. No stib xquieḷwagw naa miḅe runbeyde to.

³³Dzigo rnabdiidzlsa no, rnee no:

—Bod no cho biaadnie pe dow me, lal ne bio ne lad guiedz.

³⁴Nëchaa me lo no:

—Lëe xquieḷwagw naa nac ne gonḷe naa miḅe rnabey Dios naa, ni csiaaḷ naa dziin ne pxeel me naa zialgonḷe naa. ³⁵To lëe rnee to: “Leḅ stapraa mëe csilo gac wlaap.” ¡Per golwi lo grëtaa miech qui ganḷe, nac zho niina zig grè guieḷgon ne golle gliap! ³⁶Gacxe waa, ib none tsie to tsielaap to, tsietop to zho, zeena ygaa zho tib guieḷmban ne gdziḅ dze lozh. Ni zigne razh zha ne rie wlaap, scaque zguizh Dios to tsietop to zho. ¡Ti guieḷbley nrooba, zigtaa par zha ne rana, zigtagaa par zha ne rlaapa! ³⁷Ible nli diidz ne znu rnee: “Zhaa zha ne rie gon, stible zha ne rie wlaap.” ³⁸Zig nac niina, laa naa rxeḷ to tsielaap to zaatne ni tib xtsiin to psëëbde to; zhaa zha ne güey gon, na tole tsie wlaap.

³⁹Laga laa me sca quianee lo no, laa grè menladz wnaa co no nëz ziaad zho nëz lo no ga. Nzian grè miech co, zeene bin zho rëb wnaa co bzeet Jesús grè ncuaane ziyunḷe me, bliladz zho Jesús. ⁴⁰Laa zeene blanso zho ga, bnab zho lo me cuëz me ladz zho zhis. Dzigo nacne blëz me lo zho chop ngbidz. ⁴¹Nzianraa grè miech co bliladz me, zeene bin zho grè zhiwseed me.

⁴²—Nasi nagonḷe laa no rliladz me —rnee zho lo wnaa co—, sac nozhal bdziḅ me, ni bdzion no grè miḅe rnee

me. Nliw, ible me nac men ne ziaadsilaa grëse miech lo xtoꞓ zho.

Biac xpëed tib zha ne quia dziin lo rey

⁴³ Zeene goc chop ngbidz co, laa no brieë ga gza no me, laa no bdzio nëz stib zio no nëz Galilé. ⁴⁴ Niicle ne bzeetle me: grëse zha ne ziadteed xtiidz Dios, ib randz miech zho zaatne nac ladz zho; per ⁴⁵ zeene bzëëb me grë guiedz ne ngab Galilé, wen pcaania grë miech co me. Nzian zho güey lni Pascw co Jerusalén, gon zho grëtaa milagr ne been me ga.

⁴⁶ Nëz no no bdziñ no Caná, zaatne sca bzaalo me nis vin. Ga bdzieelo me tib zha Capernaum, tib zha ne rquia dziin lo rey; lëëtaque len dze co rzacnë xpëed me.

⁴⁷ Bin me laa Jesús brieë xtan men Judé, laa me no gdziñ Galilé. Dzigo bi-aad me biaddzieelo me Jesús ga, bnab me lo Jesús tsienal Jesús zhits me Capernaum, tsiegunguiac Jesús xpëed me; sac nzhoo rac win. ⁴⁸ Dzigo rëbchaa Jesús lo me:

—¿Pe haxta gan to dzigo gun naa milagr, dzigora a gliladz to naa?

⁴⁹ —Been tib guielnzaac gotsaa guion-iob ne —rëb men co—, nend znuse lozh xpëed naa.

⁵⁰ Rëbchaa Jesús:

—Bzë, tsod luu guielnë. ¡Laa xpëed luu biacle!

Dib zdoo men co bliladz me xtiidz Jesús, laa me bio nëz laa me zey. ⁵¹ Zhilew gdziñ me lidz me, zeene bdzieelo me bla zha ne quia xtsiin me, rëb zho laa xpëed me biacle. ⁵² Dzigo bnabdiidz me lo zho, maase pa hor biac win. Rëbchaa zho:

—Nieeg, zig rwe ngbidza, tibaque znuse brieë zhixlëë win.

⁵³ Dzigo psoladz me zig hor cotaque rëb Jesús lo me, laa xpëed me biacle. Dzigo dib zdoo me bliladz me Jesús,

tsieel me, xpëed me, menlidz me ne, grëse zho dib zdoo zho bliladz zho Jesús.

⁵⁴ Ga goc brop milagr ne been Jesús lo zha Galilé. Min co been me zeene wbiere me nëz Judé.

Biac tib men ne gacd grial

5 Goc palal dzew, laa stib lni nroob rac Jerusalén, dzigo nacne güey Jesús Jerusalén stib.

² Ro guiedz Jerusalén, gax zaatne quia puert ne rded mëcwxil, ga niaa tib pil nis rnee zho Betesd. Igo ro pil co niaa tib nsaap, rap nsaap co gaay arcw.

³ Lo nsaap co, ga ndxie nzian men rzacnë, no zho rold lo, no zho në ni, no zho ib gacd grial [grëse zho laa zho ndxie ga quiambëz zho gni lo nis ne no len pil co, ⁴ sac nac diidz poc poc riet tib xanj] Dios riesini lo nis co, dzigo zha ne znuse sëëb lo nis co, tel pe guielguidztaa rzac zho, riac zho].

⁵ Ga nix tib mgui, gocle galptsipxon iz rzacnë me. ⁶ Laa zeene gon Jesús me, ni bin Jesús scataale nroob dze rzacnë me, rëbchaa Jesús lo me:

—¿Pe racladz luu guiaac luu?

⁷ —Racladz naa —rëb me—, per guien cho csëëb naa len pil qui zeene laa lo nis rni. Zeene racladz naa sëëb naa, zhaale stib zha ne glo rzëëb.

⁸ Dzigo rëbchaa Jesús lo me:

—¡Nasca zeena guche i! ¡Bzoli, bi yag ne bzhoob luu i, zeena bzë!

⁹ Zigne sca rëb Jesús, laa men co biac. Horcogazh blis me yag co, nzëni me laa me brieë ga.

Ni ne dze co nac tib dze nda lo zha Israel, ¹⁰ zeene gon zho ney me yag ne bzhoob me, rëbchaa zho lo me:

—¿Pe rien luu nda nadze! ¡Lëda i gon squi yquianlan luu ncuuan qui dze rii!

¹¹ Pquiab me rëb me:

—Men ne beenguiac naa, mezhal në lo naa, güey naaw.

¹²—¿Cho men sca në lo luu? —rëb zho.

¹³Niicle me riendaque dien chow, sac ndaldox miech ne ndxie ga; hor co laa Jesús bzëëble lad grë miech co. ¹⁴Haxta len yadooraa bdzieel Jesús me, dzigo rëbchaa Jesús lo me:

—Nana gon ne squi laa luu biacle, bien gunctaldraa luu xtol luu. Sac telne gond luu diidz, nend dzigole glaan luu tib guielguidz ne mazdraa ntseeb.

¹⁵Zeene laa me briece ga, güey me lo zha ne rnabey lo zha Israel ga, rëb me lo zho Jesús nac men ne beenguiac me.

¹⁶Nacne psilo zho quianał zho dien zha gnaaz zho Jesús pe nacne runguiac me miech dze nda. ¹⁷Blisqui zhow lo me, dzigo rëbchaa me:

—Tel Pxoz naa gzataa dze quiayun me dziin; ni mincoque nac mine quiayun naa.

¹⁸Zeene gon zho sca rëb me, mazdraa blëë zho lo me rzac zho tebaa zha gutgazh zho me. Rlëë zho, sac zienald me dien pa dze nda; mazdraa zeene rëb me Dios nac Pxoz me, sac ga rlu me ne laga nac me con Dios.

Men nroob nac Xpëed Dios

¹⁹Ni rëb me:

—Gneli naa lo to ganle: peet griee lod gun Xpëed Dios lega guicse me, sinque ncuane ran me run Pxoz me, min co run me. ²⁰Nquialadzdox Dios me, grëtaa dziin ne run Dios rlu Diosa lo me; gane zun me milagr nroob ne mazdraa gzee zdoo to; ncuane palalse i gon to nina ne biac men qui. ²¹Sac telne gacladz me cueeban me tib mengut, zbeeban me zho, zigne rbeebanaque Pxoz me mengut. ²²Ni bzo Dios me, me gun guielwxtis, ²³zeena grëse miech guien ganle zigne nonaque Pxoz me, scaque men non nac me, ni sca none gunnon zho me. Sac tel zha ne gunnond me, yele

Pxoz me ga (men ne pxeel me) runnond zho.

Ni rëb me:

²⁴—Gneli naa lo to ganle: Zha ne gliladz xtidz naa, ni gliladz zho men ne pxeel naa, laa zho bgaale tib guielmban ne gdzind dze lozh. Led yedraa zho yгаа guielndox ne yгаа grëraa miech ntseeb; sac laa zho briece ladz-nia guielgut ga, bdzin zho lo guielmban co. ²⁵Zdzin dze zeene ye grë mengut, zon zho xtiidz Xpëed Dios; ni grëse zha ne gzoobdiaga, zban zho. ¡Ni lëë dze co bdzin niina! ²⁶Sac gon, zigne rdeed Dios guielmban lo miech, scaque zrieelo gded naa guielmban lo miech. ²⁷Ni bzo me naa, naa gun guielwxtis, gded naa mine tsieguial tib tib miech.

²⁸¡Gzeed zdoo to! Sac ne nligaa, dzin dze, grëse mengut ne no len baa, laa zho grieeban ²⁹zeene gon zho tsi naa. Grëse zha ne ndzinli wban, hor co laa zho yгаа tib guielmban ndzon; sangue zha ne been guielntseeb, hor co laa zho guey lo guielndox ne rieguial zho.

³⁰Per griee lod gun naa guielwxtis naase, ib none gacnan Pxoz naaw. Grëse guielwxtis ne gun naa, laaw gun naa zigne gnabey Pxoz naa, laaw gun naa zigne nonguiela, sac gon gund naa mine guiaabtaa guic naa, sinque laa naa gun mine racladz Pxoz naa.

³¹Telne niaca mine naase rne cho nac naa, zrieequia zha ne guiab nlida. ³²Per na, no stib men ne rzeet naa lo miech; ni nan naa diidzli rnee me. ³³Haxta Juan Bautist, zeene pxeel to bla zha ne güeyn-abdiidz lo me, grëse mine rëb me lo zho ga, diidzliw. ³⁴Laa naa rzet min rii lo to, zeena gliladz to cho nac naa, zeena sca laa to lo xtol to; sac rquiindpaa dien cho miech guidzliu rii gnee cho nac naa. ³⁵Zeene biaad Juan, goc me zig tib biini bziini me lo to palal dze zeena gunbey to naa; ni bley to pquiaadiag to mine bnee me. ³⁶Nli bnee me cho nac naa; per grë

milagr ne run naa min co quiaxobneeraa ganle cho nac naa. Pxoza naa rneedz didz run naaw; ni ga rlu ganle ne me pxeel naa. ³⁷Haxta ye me mezhal quialu ganle cho nac naa, parga nli gard gan to me, niicle gard gon to tsi me. ³⁸Ronde to pe rnee me, sac rliadzde to naa; sac gon me pxeel naa zialne naa xtiidz me.

³⁹Nli rioxco to rseed to grë guits ne ziaad Xtiidz me, sac rien to ga ziaad dien zha yгаа to guielmban ne gdziind dze lozh. Ni niicle ne lo co zhubnee ganle cho nac naa, ⁴⁰per nëde to gbig to lo naa, zeena yгаа to guielmban co. ⁴¹Nëde to gunbey to naa, nëde to guien to cho nac naa, per peet nacd min co; ⁴²runbey naa to, ni lalnu rleyniede to Dios. ⁴³Sac gon, me pxeel naa zial naa lo to, ni rlëe to ran to naa; mazd zha ne lega ziaadse, zha cosi lëelëd rcaania to zho. ⁴⁴Min co gon, ib rliadzde to cho nac naa! Sac laa guic to zienie loxaque dien zha gunnon samiech to to, ib rguibde to zha gacnon to lo Dios. ⁴⁵Ni guiabde to togo naapaa gazo to lo Pxoza naa, glisqui naa grë ncuane run to. Moisés gon nac men ne glisquiw; sac ley ne psan me, mine rnalo to csilaa to lo xtol to, lëew glu ganle pe nac grëtaa ncuane quiayun to. ⁴⁶Sac gon, telne niaca mine nlipaa rliadz to grë mine pquiaa Moisés, zliadz to dzigo cho nac naa; golgan ganle, lo grë guits ne pquiaa me, ga rzeet me naa. ⁴⁷Rlu rliadzde to grë mine pquiaa Moisés ga, gane rliadzde to mine rne naa lo to.

Row gaay mil miech

(Mt. 14:13-21; Mr. 6:30-44; Lc. 9:10-17)

6Bded ga, tib dzew brie Jesúsbdedquia me nëz dan ro Nisdoo Galilé (lëeque nisdoo co ga rnee zho Nisdoo Tiberias).

²Miech guizhiu ne brieenal zhits me, sac ziyan zho grëtaa milagr ne run me, runguiac me grë men rzacne. ³⁻⁴Nzian

zho nac zha ne zie lni Paschw, lni nroob ne rac Jerusalén gzobse iz.

Grëse no ne nac no xpëedscuel me, laa no nal zhits me. Zeene bdieedquia no ro nis co, dzigo bdzieep no tib cho gui win zob gax ga. Loxaque laa no bzioob ga grë no me, ⁵zeene bdzion no miech guizhiu ne ziaadquia cho gui co, laa zho glansole lo no ga. Dzigo rëbchaa me lo Lip:

—Lip, zpa guioziu ne ncuane gow grëtaa miech qui?

⁶Per lega scase rëb me lo Lip, par dien pe guiab Lip; sac nanle me pe nac ncuane gun me.

⁷—iNe nligaa pe zhidaa zho! —rëb Lip—. Niicle telne niaca mine gziunzian gayoo quietxtil, ni ygaad ncuaan co yгаа zho tiblë wingaw tib tib zho.

⁸Dzigo pquiab Ndrés, bets Pedr, stib zha ne nacgza no; rëb Ndrés:

⁹—Nu zo tib mëëdbgui win ney gaay quietxtil cebad ni schop mel win. zPer pa yгаа ncuaan co lo grëtaa miech qui?

¹⁰—Golnee lo zho dien —në me lo no—. Golguiab lo zho sob zho.

Ndzon zëeb guizh nguia ga, dzigo laa grë miech guizhiu co bzob lo guizh nguia co (zig gaay mil rgaa loxaque zha bguise). ¹¹Dzigo bnaaz me gza quietxtil co, bdeed me xquizh lo Dios. Blozhse ga, zigse rneedz mew lo no scase scase rguiz now lo grë miech co; scaque been me grop mel co. zGrëse miech co, dow zho zaatne bieltaa zho! ¹²Blozhse dow zho, nëchaa me lo no:

—zGoltsietop grëse mine biaan i, zeena nitloda!

¹³Psilo no ptop no grë quietxtil ne biaan ga, zeene blozh bdopa, jlo gaay quietxtil cebad co, biodzë tsiipchop chicuid biow!

¹⁴Zeene gon grë miech co milagr ro ne been Jesúsb ga, rneechaa zho:

—iNe nlipagaa, lëe men qui ga quiambiaaz ne! zMe nac Men ne zëëble

diidz ga cxeļ Dios lo guidzliu guiadteed xtiidz me!

¹⁵ Bienga Jesús racladz zho, zhoo tsienie zho me gac me zhirey zho, nacne bzoquia me guic gui win co, tipse me.

Rzē Jesús lo nis

(Mt. 14:22-27; Mr. 6:45-52)

¹⁶ Rguetsle liuw, bzhiuxto no dan bdziñ no ro nisdoos co; ga bliaaz no me. ¹⁷ Bdzionse no choot rlansod ni laa liu rcowraa, dzigo mazd laa no bziaab leñ canó, laa no zio nēz Capernaum.

¹⁸ Laa no zionie canó co lo nis, tibaque zeene psilo rriee me, ntseeb riasoli lo nis co. ¹⁹ Maase gaay kilómetro o xoopgaaw goc zio no, tibaque zeene bdziñ no laa me ziaad-zē lo nis co, gaxle lo no ga. Zeene bdziñ no sca ziaad-zē me lo nis, bdzieeb no. ²⁰ Dzigo bnee me, nē me lo no:

—¡Gdziebde to! ¡Naa ziaļ nu!

²¹ Dzigoraa rley no bdziñ no laa me bzēēb leñ barcw; tibaque zeene bien no laa no brieequiale zaatne no gdziñ no ga.

²² Biini liu co, grē miech ne biaan stib nēz ro nis co, laa zho bdziñ zaatne nac ro nis ga, quiambēz zho gan zho me. Sac gon zho tibaque barcw zo ga, ni zeene wbii no ga, loxaque nose wbii. ²³ Gax zaatne bguiaa me zho ga, ga bdziñ bla barcw ne ziaad nēz Tiberias; ²⁴ dzigo gonse zho niicle me niicle no ne nac no xpēēdsuel me, choot guiend ga, nacne bzēēbaque zho leñ barcw ne bdziñ ga ziaad zho nēz Capernaum.

Jesús nac men ne rdeed guielmban

²⁵ Zeene blanso zho Capernaum, laa Jesús zole lo no ga; dzigo rēbcha zho lo me:

—Maestro, ¿pa horzhe waa blanso luu nu?

²⁶ Dzigo rēbcha me:

—¿Naa lēē ziaadguib to? Per ziaate to porne rien to cho nac naa, sinque laa to

ziaad porne gon to bnedz naa ncuaañe pquiin to. ²⁷ ¡Golguien, tsienied guic to loxaque ncuaañe gowse to, sac znuse rnitlo grē ncuaañ co! Sinque, goltsoxco golgun miñe racladz Dios, zeena yгаа to tib guielmban ne ib gdziñd dze lozh. Ni naa ne nac naa Mgui ne pxeļ me, naa gneedz guielmban co lo to; sac ible min co pxeļ me naa.

²⁸ Dzigo bnabdiidz zho lo me, rēb zho:

—¿Zha dzigo dziuun no miñe racladz Dios? ¿Pe nac ncuaañe dziuun no?

²⁹ Pquiab me rēb me:

—Miñe racladz Dios gon to: gliladz to cho nac men ne pxeļ me.

³⁰ —Telne scaw —rēb zho—, none dzi-anlo no gon luu nzian milagr, zeena gliladz no luu. ¡Nligaa peet milagr nroob gard dzian no gon luu! ³¹ Tel grē pxozgol ne, zeene wban zho grē dan bidz co padzeela, gzobse dze biet tiblo quietxtil zhan gbaa, dow zho; rnee lo Xtiidz Dios: “Moisés rdeed quietxtil co lo zho.”

³² Pquiab me rēb me:

—Golgacnan ganle led Moisésd bdeed quietxtil co, sinque Pxoz naaw. Ni inina gon laa me quianeedz merpaa quietxtil gbaa lo to. ³³ Sac gon, me pxeļ men ne biet gbaa ziaddeed guielmban lo grē miech rii; men co nac quietxtil gbaa co.

³⁴ —Been tib guielnzaac sca —rēb zho—, ¡gzataa dze bneedz quietxtil co dioow no!

³⁵ Pquiab me rēb me:

—Naa gon nac quietxtil ne rdeed guielmban ga. Grēse zha ne gbig lo naa sēēb zho xnēz naa, gdziñdraa dze ne ycaabedz zho; grēse zha ne gliladz cho nac naa, gdziñdraa dze ne gnab zhis zho.

³⁶ Laa to gon, zigne bnelegaa naa lo to ga, iniicle ran to naa, per rililadzde to cho nac naa! ³⁷ Grēse zha ne rxeļ Pxoz naa, rlanso lo naa; ni tib zho ctsireed naa. ³⁸ Sac gon, laa naa bieet gbaa zialgun naa miñe racladz Pxoz naa (men ne pxeļ naa); bieete naa par gon naa

mine gacladztaa naa. ³⁹ Ni mine racladz me, grëse zha ne bneedz me lo naa, ni tib zho nitlod, sinque cueeban naa zho gaļ dze ne laa guidzliu nitlo. ⁴⁰ Sac racladz me: grëse zha ne gbig lo naa ni gililadz zho naa dib zdoo zho, grëse zho yгаа tib guielmban ne ib gdziņd dze lozh, ni cueeban naa zho gaļ dze ne nitlo guidzliu.

⁴¹ Dzigo psilo grë zha Israel mneņë zho me, loxaque ne rëb me, me nac quietxtil ne biet gbaa; ⁴² rnee zho:

—Meņ rii ga name rnee zho Jesús, me nac xingan José. Rdziuņbey ne xniaa me, rdziuņbey ne pxoz me. ¿Zha nac dzigo ne rnee me gbaa biet me?

⁴³ Dzigo rëbchaa me lo zho:

—Lëewga na, golsioog ro to. Nodne squitaa gzee zdoo to miņ co. ⁴⁴ Laa Pxoz naa pxeel naa ziaļ naa lo guidzliu, per ni tib miech goņ grielod gbig lo naa telne niaca mine cuedzd me zho; ni zig rnele naa ga, zha ne gbig, naa cueeban zho gaļ dze ne laa guidzliu nitlo. ⁴⁵ Znu rnee lo Xtiidz Dios, zaatne pquiaa grë zha ne biadteed xtiidz me padzeela, rneew: “Laa Dios cseed grëse miech.” Ni lëe miņ co rac niina; gacxe nagon waa, grëse zha ne rquiaadiag mine rnee Pxoz naa ni rseed zhow, grëse zha co lo naa rlanso zho. ⁴⁶ Zha ne rlanso lo naa, guiabde to togo goņlo zho me; ni tib choot gard gaņ me, naase nac meņ ne ziyaņ me, sac zaatne no me ga brie naa ziaļ naa lo to. ⁴⁷ Golliladz mine gni naa lo to nu sca: ¿Grëse zha ne dib zdoo zho gililadz zho cho nac naa, zгаа zho tib guielmban ne gdziņdraa dze lozh! ⁴⁸ Ne nligaa naa nac quietxtil ne rdeed guielmban ga. ⁴⁹ Grë pxozgol to, zeene sca bio zho grë dan bidz co, nli dow zho quietxtil ne biet gbaa ga, per bdeetew guielmban lo zho, sac grëse zho gut. ⁵⁰ Sangue quietxtil ne rne naa lo to, gbaa bieta ni grëse zha ne yquiina zгаа zho tib guielmban ne gdziņd dze lozh. ⁵¹ Xcuerp naa nac quietxtil

ne biet gbaa, mine rdeed guielmban ga; grëse zha ne gow quietxtil co, zгаа zho tib guielmban ne gdziņd dze lozh. Lëew gded naa zeena grielo yгаа grëse miech lo guidzliu rii stib guielmban.

⁵² Psilo grë zha Israel co stib, quianeelsa zho, rnee zho:

—¿Zha nacne squi rnee meņ qui? ¿Zootne rnee me none dioow ne xcuerp me!

⁵³ —Gneli naa lo to ganle —rëb me—, telne gowde to xcuerp Mgui ne pxeel Dios, ni guiede to xchen me, ygaade to stib guielmban co. ⁵⁴ Sangue zha ne gow xcuerp naa, ni guie zho xchen naa, ib zгаа zho guielmban ndzon ne gdziņd dze lozh ga, ni naa cueeban zho gaļ dze ne laa guidzliu nitlo; ⁵⁵ sac xcuerp naa nac mine mazdraa rquiin gow miech, ni xchen naa nac mine mazdraa rquiin guie zho. ⁵⁶ Grëse zha ne row xcuerp naa, ni rie zho xchen naa, mbannie zho naa, niclegaa naaw mbannie naa zho. ⁵⁷ Meņ mban nac Pxoz naa, meņ ne pxeel naa, me nac meņ rneedz guielmban lo naa; ni scaquegaa zha ne gow xcuerp naa, naa gded guielmban lo zho. ⁵⁸ Naa nac quietxtil ne nlipaa biet gbaa. Grëse zha ne gow quietxtil rii, zгаа zho guielmban; led yed zho guet zig gut grë pxozgol to, zha ne sca dow quietxtil co.

⁵⁹ Lëe grë miņ rii bnee Jesús zeene pseed me miech leņ yadoo win ne zob Capernaum.

Diidz ne rdeed guielmban

⁶⁰ Nzian grë zha ne rzënie Jesús, zeene bin zho grë mine bnee me ga, rneechaa zho:

—Zha ngandoxtaa nac grë diidz ne rnee me i. ¿Cho gnë dieņ pe bnee me!

⁶¹ Bien Jesús sca nonee zho, dzigo rëbchaa me lo zho:

—¿Pe rlëe guic to bin to mine rne naa ga? ⁶² ¿Pe guiabzhe to dzigo zeene gaņ to laa Mgui ne pxeel Dios soquia gbaa,

gbiire guey me zaatne no me glo? ⁶³ Espiritu Sant rneedz guielmban lo to, telne guieñd espíritu peet nond xcuerp to, sac bëëlse naca. Ni grë diidz ne bne naa lo to, lëëw nac Espiritu, ni lëëw gneedz tib guielmban ne gdziñd dze lozh lo to; ⁶⁴ sinque to, bii no zla to riladzd cho nac naa.

Sca rëb me sac desde psilo bzënie zho me, rienle me cho nac zha ne ib riladzd me, ni cho nac zha ne tsieto me.

⁶⁵ —Runbey naa to —rëb me—, gane ni naa lo to ni tib miech grieelod gbig lo naa sëëb zho xnëz naa, telne niaca mine cuedzd PxoZ naa zho.

⁶⁶ Nzian zha ne rzënie me, hor co laa zho bzoZit lo me, bzënedraa zho me.

⁶⁷ Dzigo bnee me lo no gza tsiipchop no ne nac no xpëëdscuel me, në me:

—To waa, ¿pe led yede to racladz gbiche lo naa?

⁶⁸ Pquiab Simón Pedr, rëb Simón:

—¿Per cho lora nadien guio no? Luuse nac men ne rseed miech diidz ndzon ne rdeed guielmban ne gdziñd dze lozh.

⁶⁹ Laa no bliladzle cho nac luu, laa no gocndionle ne luu nac Men Ndzon ne pxeel Dios.

⁷⁰ —Nliw —rëb me—, ni naa bzooblo to gza tsiipchop to, per na gon laa tib to bzëëble xnëz mendox.

⁷¹ Zeene sca rëb me, lëële Judas ga bzeet me (zhin Simón Iscariot); sac ye Judas nacgza no lo tsiipchop no ne bzooblo me ga, ni Judas nac zha ne gúeyto me.

Riladzd menlidz Jesús cho nac me

7 Bded ga, loxaque grë guiedz ne ndxie xtan zha Galilé, gase rieted Jesús. Sac grë zha Israel ne no xtan zha Judé, zha ne rlëë lo me, racladz zho gut zho me. ² Laa zeene bdziñ dze ne run zha Israel lni ne rzhixcuaa zho grë yu guizh, ni rbëz zho lena; ³ rëbchaa zha bets me lo me:

—¿Pe nacne ib rrieed luu nu? Brie zho, güey dib xtan zha Judé, zeena ye grë zha ne racnie luu ga gan grë-taa ncuaañe run luu. ⁴ Sac gon, zha ne racladz gunbeyraa miech zho, grë ncuaañe rac zho, run d zhow ngueets zh-liaan zigne run luu. Rac luu name run luu grë milagr nroob, beena zaatne gan nzian miecha.

⁵⁻⁶ Sca rnee zho lo me, sac niicle zha riladzd cho nac me; dzigo rëbchaa me:

—Griee lod ga naa niina, sac gard gdziñ dze co; zhaa nac to, zac tsie to zeene gacladzttaa to. ⁷ Tel to, rlëënie miech to; sanque naa rlëënie zho naa, sac rne naa lo zho pe nac grë guieñtseeb ne run zho. ⁸ Goltzie, tedse lni rii dzigo ga naa; sac gard gdziñ dze ne glu cho nac naa.

⁹ Dzigo laa me biaan ga. ¹⁰ Per loxaque brie zho zie zho, yeque me brie zie me; lëëraasi ngueetsse bdziñ me.

¹¹ Grë zha Israel ne rlëë lo me, quiaguib zho me lo lni co.

—¿Bay yo men co? —rnee zho—. ¿Pe nacne ib choot gard dzian me?

¹² Grë zha ne ndxie lo lni, loxaque me rzeet zho. No zho rnee: “Tib miech wen nac me”; nogaa zho rnee: “Pe miech wen na zho gac me, loxaque noquidie me miech.” ¹³ Per zhlianse rzodiidz zho rzeet zho me, sac rdzieb zho grë zha Israel ne rlëë lo me.

¹⁴ Goc chop tson ngbidz ne noyac lni, tibaque zeene laa me bzëëb len yadoo nroob ne zob lad guiedz ga, psilo me pseed me grë zha Israel ne no len yadoo ga. ¹⁵ Zeene gon zho zha rseed me, rzee zdo zho rnee zho:

—¿Zha nac squitaa rac men qui, ni laa me pseete me grë zhiwseed yadoo?

¹⁶ Pquiab me rëb me:

—Led naad nobeebey grë mine quiaseed naa miech, sinque laa naa quiaseed zho mine rnabey men ne pxeel naa. ¹⁷ Telne yquiabladz to gun

to minē rñabey me, ga guien to dien pe nli xtiidz Dios rseed naa miech, te minē riab guic naaw ye. ¹⁸Sac grē zha ne rnee grē minē riab guicse zho, laa zho ruña zeena gacnziiu zho lo miech; sangue zha ne rioxco glu ne non men ne pxeel zho, zha cosi niapse diidzli rnee zho, rund zho ne yquidie zho miech. ¹⁹Laa Moisés psan ley lo to, per, jni tib to gon zienald minē rñabeya! ¿Pe nac dzigo racladz to gut to naa?

²⁰Pquiab be grē miech co, rēb zho:

—jMendzable i gon noguitnie guic luu! ¿Chozhe racladz gut luu?

²¹Rēbchaa me:

—Tib vuelte, loxaque gon to beenguiac naa tib men rzacnē dze ne rdziiladz to lo dziin, na grēga to squitaa rac lo naa.

²²Ni to gon, no hor par gun to minē rñabey ley run to dziin dze co; zig nac zeene rio tib mēed bey (niicle ne rirole pxozgol to bey co, zeene laa ley biaan).

²³jGase na ganle golwi! Rquia to rgo to tib mēed bey haxta dze ne rdziiladz to lo dziin, loxaque par quiitsde to xley Moisés. ¿Pe nac dzigo ne rlēē to lo naa loxaque ne beenguiac naa tib miech dze co? ²⁴Golguien ganle, nonguield ne lega gdziibdol to tib miech. Goltoxico golt-sienal minē nac diidzli.

¿Cho nac Jesús?

²⁵Blalaa men Jerusalén ndxie ga, dzigo psilo zho rñabdiidzlsa zho rnee zho:

—¿Pe led men riid ga zho scataa quiaguib zho gut zho? ²⁶Pa zotaa me gon quianee me lo grē miech qui, ni choot peet rund me. ¿Pe goon bliladzle zhiwxtis ne naye ne me nac Men ne zēēble diidz ga guiaad lo guidzliu? ²⁷Per gacda men qui. Tel men quiw, rdziu-ubey ne me, ndion ne cho zha nac me; sangue Men ne zēēble diidz guiaad ga, zeene gal dze ne laa me guiaad, choot gacnand dien cho zha me.

²⁸Bin Jesús sca nonee zho. Squi ndxie grē zha ne noquiaadiag zhiwseed me len yadoo ga, nguiedz bnee me rēbchaa me:

—Ah, conque runbey to naa dzigo, jnan to pa nēz zial naa! Per led zhaald naa gon zial naa, no tib men ne pxeel naa per runbeyde to me; men co nac men ne rnee niapse diidzli. ²⁹Sangue naa runbey naa me, sac lo me brie naa, me pxeel naa zial naa lo to.

³⁰Dzigo gocladz zho naaz zho me ga, per ni tib zho wbigd nzhen zho me; sac gard gal dze co.

³¹Grē zha ne ndxie ga, ndal zho bliladz me.

—Telne led med nac Crist —rnee zho—, niacxe zun me grētaa milagr nroob ne run me. jTsodraa zha ne gun grētaa milagr ne run me!

³²Bin zha farisé nozeet grē miech co Jesús, dzigo bnediidaque zho grē zho pxoz ne rñabey, pxeel zho bla zhaguiib zie zienaaz me. ³³Bdzin grē zhaguiib co, rēbchaa me lo zho:

—jGolxecw zniip! Zhile dze ne cuēz naa lo to; ib laa naa none gbiire guia naa lo men ne pxeel naa. ³⁴Zguib to naa, per gdzieldraa to naa, ni grielod gdzin to zaatne guia naa.

³⁵Grē zha ne ndxie ga, zeene bin zho sca rēb me, rzee zdoo zho.

—¿Pa naczhe zaatne tsie me? —rnee zho—. ¿Zha nacne ib gdziel ne me? Nend grē zha ladz ne tsieseed me, grē zha ne no stib ladz ben. ³⁶¿Zha nacne rnee me, zguib ne me per gdziel me lo ne, niicle grielodgaa guio ne zaatne guey me?

Nis ne rdeed guielmban

³⁷Zeene gol dze ne laa lni co lozh (dze co nac dze ne mazdraa nroob), miech guizhiu ne ndxie; dzigo nguiedz bnee Jesús lo grē miech co, rēb me:

—Grēse zha ne racladz guiaanwen zdoo, rzac zho zig nac zeene rñab zhis

zho, guiaad zho lo naa, naa gded nis ne guie zho. ³⁸Sac grëse zha ne dib zdoogliladz cho nac naa, mee lo Xtiidz Dios, masaque rreequia tib nis ndzon ne gdzib zdoozho, pale tib guiubee nroob; nis co gdeed tib guielmban cub lo zho.

³⁹Sca bzeet Jesús Espíritu Sant. Ga bzeet me, grëse zha ne gliladz cho nac me zacnie Espíritu Sant zho. Gard guiaad Espíritu Sant leñ dze co, sac gard gbire Jesús lo guielndzon ne no me gbaa hor co.

⁴⁰Blalaa zha ne ndxie ga, zeene bin zho sca bnee me, rneechaa zho:

—Ne nlipagaa, lëe men qui ga no guiaad antes ne glanso Men ne nacledidz cxeel Dios ga.

⁴¹Rreequia zla zha ne rnee:

—¡Lëda! ¡Lëëgazh me i! Men qui nac Men ne zëëble diidz ga cxeel Dios guiaad lo guidzliu.

Rquiab zla zha ne rnee:

—Men Galilé nac men qui. ¿Niacxe lo xti grë zha co grieequia Men ne cxeel Dios ga? ⁴²Pe led rnee lo Xtiidz Dios lo xti rey David, ga grieequia me ni Belén ga gal me, zaatne gocaque ladz rey David.

⁴³Zhaase zhaase rnee zho; leñ psilo zho nodiiddidz zho dien cho nac me. ⁴⁴Brieequia bla zho gocladz naaz me, per ni tib zho wbigd nzhen zho me.

⁴⁵Grë zhaguiib ne zienaaz me ga, scase zho laa zho bdziñ. Zeene gon grë pxoz rnabey co, grë zha farisé co choot bdziñnied zho, rëbchaa zho:

—¿Pe nac dzigo ne ziaadniede to me?

⁴⁶Pquiab zho rëb zho:

—¡Wlaltaa gard dzian no tib men ne scataa ndzon rnee!

⁴⁷Rëbchaa zha farisé:

—¡Pe nlipaa rnee to! ¿Yelaque to dzigo beengüet me? ⁴⁸¿Pe rwide to, niicle zhiwxtis new, niicle now, ni tib choot rililadz ne me nac Men ne zëëble diidz

cxeel Dios ga? ⁴⁹Grë zha nxen ne rililadz ne nli Dios pxeel me, ¡miech ndziibdeele nac zho, sac gon riend zho zha rnee lo ley!

⁵⁰Ga zob Nicodem, men ne güeyzodidznie Jesús ga glo, ye me nacgza grë zha rnabey co, dzigo guso me bnee me lo zho, rëb me:

⁵¹—Golguien ganle nonguielda ne lega pe gnee ne. Sac gon, zig nac xley ne, rnabeya none gacndiongazh ne zha nac xtiidz tib miech, dien pe nac mine quiayuñ zho, dzigoraac gac guielwxtis.

⁵²Pquiab zho rëb zho:

—¿Zootne ye luu lëe nacgza grë zha Galilé ne rleyne me? ¿Grë zha ne cxeel Dios, ni tib zho grieequiad Galilé! ¡Luuzhal bguiba lo grë guits ne ziaad Xtiidz Dios ganle, zeena gliladz luu!

⁵³Blozh ga, grëse zho laa zho wbi, tib tib zho zeyse zho lidz zho.

Tib wnaa ro nëz

8 Ga briece Jesús güey me zaatne rnee zho Gui Oliv.

²Zeene biini liu co, silgaw laa me bdziñ leñ yadoo co stib. Nzian miech ne goclo lo me ga, nacne bzob me psilo me pseed me zho. ³Laa me noseed grë miech co, zeene bdziñ bla maistr ley, ni zla zha farisé, bdziñnie zho tib wnaa ne nole tseele ni bgaanie me stib mgui; dzigo bzo zho wnaa co glowtaa lo grë miech ne ndxie ga.

⁴—Maestro —rëb zho lo Jesús—, laa wnaa rii bgaa nonie me stib mgui. ⁵¿Pe gnë luu dien zha gac me? Sac zig nac ley ne psan Moisés, rnabeya gdeedquie no grë wnaa ne squi nac, haxta guet zho.

⁶Sca rëb zho, sac laa zho quiaguib dien zha cxin me tib diidz, zeena sca grielo tsiezo zho me lo wxtis. Per zeene bin me sca rëb zho pquiitsrunga me liu, psilo me con mzhugnia me noquiaa me lo liu.

⁷Ran zho rquiabd me, wbiire zho bn-abdiidz zho lo me stib; haxta blis lo me, rëb me lo zho:

—Peet nacda, goldeedquie me. ¡Lëëraasi, zha ne rien ni tib dol rapd, zha co csilo gdeedquie me!

⁸Blozh ga biire pquiitsrun me, psilo me stib noquiaa me lo liu. ⁹Zeene bin zho sca rëb me, mazd mine been zho laa zho brieeg me, sac bien zho miech ngoop-dol nac zho. Zha ne nacpaa zha gol lo zho bner, blozh ga zo zo brieeg zho grë zho; loxaque wnaa cose biaan ga.

¹⁰Dzigo bzoli me, rëb me lo wnaa co:

—¿Yo grë zha ne scataa bиаad-zo luu nu? ¿Ni tib zho lëë beenquizhd luu xtol luu?

¹¹—Ni tib zho —rëb wnaa co.

—Niicle naa —rëb Jesús—, gunquizhd naa luu xtol luu. Bzë, per bien gbiiredraa luu gun luu grë ncuaañe gunctal xtol luu.

Jesús nac zig tib biini

¹²Bded ga, tib dze nonee Jesús lo grë zha ne noquiaadiag zhiwseed me, rëb me lo zho:

—Nac naa zig nac tib biini ne rziini lo miech. Grëse zha ne gbig lo naa, led yed zho sorieł ni lo ncow, sac naa gziini lo zho zeena ygaa zho tib guiełmban ndzon.

¹³Zeene bin zha farisé sca rëb me, psilo zho nguiedz roptsie zho rnee zho:

—¡Cho gliladz xtiidz luu! ¡Lëëque luu rnee cho nac luu!

¹⁴Pquiab me rëb me:

—Niicle ne naaque rne dien cho nac naa, per diidzli nac mine rne naa. Rien naa pa nëz zial naa, pa nëzga za naa; sangue to gon peet riende to, ¹⁵gacxe waa, rcaadz dol to naa ncuaañe ni nacd naa; ncuaañe rcaadz dol to naa, niapse guic to riaba. Teł naa, zig nac niina noyund naa guiełwxtis ¹⁶per zeene gdziñ dze co, tib tib miech mine been zho min co glu dien pe nac mine tsieguial

zho; sac Pxoze naa men ne nacie naa, me gnë zha gun naa guiełwxtis. ¹⁷¿Pe nacie riladzde to mine rne naa? Led rnee lo xley to zeene tipse rzë xtiidz chop miech, ga rlu ne diidzli rnee zho. ¹⁸Zig nac niina, naa nac tib zha ne rne cho nac naa, laa stib zho nac Pxoze naa men ne pxeel naa; sac gon ye me rnee ganle cho nac naa.

¹⁹Pquiab zho rëb zho:

—¿Yo Pxoze luu na? ¿Pa no me?

—Runbeyde to me —rëb Jesús—, sac niicle naa runbeyde to naa. Tełne niaca mine runbey to naa, runbeyle to me na.

²⁰Gax zaatne riesañ miech gon len yadoo nroob ne zob lad guiedz Jerusalén, ga zob Jesús zeene sca rëb me; per choot bnaazd me, sac gard gal dze co.

Grielod gdziñ to zaatne guia naa

²¹Bded ga, biire Jesús rëb me:

—Laa naa guia nagon. Squiaguib to naa, per lëëque lo xtol to i nitlo to, sac zaatne guia naa grielod gdziñ to ga.

²²Grë zha Israel ne ndxie lo me ga, rneechaa zho:

—¿Pe goon lëëque me naye gut me? Zha nacie squi rnee me goon grielod gdziñ ne zaatne guey me.

²³—Teł to —rëb me—, zha nëz lo guidzliu nac to; laa naa gon zha nëz gbaa nac naa. Men guidzliu rii nac to, sangue naa nacd naa zha guidzliu rii. ²⁴Gane ni naa lo to lëëque lo xtol to i nitlo to. Ne nligaa, tełne gliladzde to ne naa nac men ne nac naa, ible lëëque lo xtol to nitlo to.

²⁵—¿Cho dzigo nac luu? —rëb zho.

Rëbchaa me:

—Blactaale rne naaw lo to. Haxta zeene psilo naa xtsin naa, laa naa rne lo to ganle cho nac naa. ²⁶Ndal grë ncuaañe zac glisqui naa lo to nu niina, ni ndal ncuaañe racladz naa gne naa lo to, per laa naa noyun mine rnabeyse men

ne pxeel naa; ni men co nac men ne rnee diidzli.

²⁷ Per ib riend zho ne Dios ga rzeet me lo zho. ²⁸ Dzigo bnee me lo zho stib, rëb me:

—Nieeda gal dze ne yquiaa to naa tib lo yag, dze co gunbey to ganle ne naa nac Mgui ne pxeel Dios ga, dze co guien to ganle led guicd naa riab grë mine quiayun naa; sinque mine pseed me naa, min co rne naa lo to. ²⁹ Dios pxeel naa ni tibaque nacie me naa, ib rsaand me naa, sac tibaque noxco naa run naa mine rdziladz me.

Zha ne nac xpëed Dios

³⁰ Grë zha Israel ne ndxie ga, zeene bin zho sca rëb me, bililadz zho ne me nac men ne no cxeel Dios ga. ³¹ Dzigo bnee me lo zho, rëb me:

—Telne racladz to gac to xpëedscuel naa, zha ne nlipaa ygab xnëz naa, none guiaadnal to grëse zhiwseed naa. ³² Sac sca gunbey to mine nacpaa diidzli, ni lëew glu lo to zha laa to ne squi nac to zig tib ngundziin.

³³ Pquiab zho rëb zho:

—iNgundziin ye! iTel no, zha xtiipaa Abraham nac no, waltaa gard gac no ngundziin lo miech! iPe lo dzigo laa no, ne rnee luu laa xtiidz luu csilaa no?

³⁴ Dzigo rëbchaa me:

—Golquiaadiaga ganle: zha ne tibaque noyuncal xtol, rrieequiacxe waa tib ngundziin nac zho lo dol ga, sac lëëlew rnabey zho. ³⁵ Ni zha ne nac ngundziin lëë, zig run miech nëz rii, grieelod xoon zho lo men ne rree zho; sangue zha ne nac mëed, choot lo ngadood zho. ³⁶ Gacxe waa, tel csilaa Xpëed Dios to, dzigosi choot lo ngadoodraa to. ³⁷ Nli lo xtii Abraham ziaad to; per laa to quia gon quiaguib to dien zha gut to naa, sac racladzde to yquiaadiag to zhiwseed naa. ³⁸ Laa naa rne grë mine blu Pxoza naa lo naa, zeene no naa lo me; sangue

to gon, laa to zienal mine rnabey men ne nac pxoz to.

³⁹ Pquiab zho rëb zho:

—iNi Abraham gon nac pxoz no!

—iNlid ga nagon! —rëb me lo zho—.

Telne niaca mine nli zhinpaa Abraham nac to, zun to grë mine been me. ⁴⁰ Per na gon lel racladz to gut to naa, loxaque ne rseed naa to mine nac diidzli, mine blu Dios lo naa. iTel Abraham led squid been Abraham! ⁴¹ Ni lalnu zienalde to mine been Abraham, sinque laa to noyun mine run zha ne nlipaa nac pxoz to.

Pquiab zho rëb zho:

—iLed-xe mëed ro nëzd no waa! Tibaque men ne nac pxoz no, ni lëë men co nac Dios.

⁴² Dzigo rëbchaa me lo zho:

—Telne niaca mine nli zhin Dios nac to, nleynie to naa, sac gon lo me brie naa zial naa lo to nu. Led zhaald naa zial naa, me nac men ne pxeel naa. ⁴³ Ib riogucde to zha nac grë mine rne naa, ib riende tow, sacne ib nëde to yquiaadiag tow. ⁴⁴ Golgacnan sca ganle, lëë pxoz to ga gon nac mendox, lo ma ngab to, gacxe waa rdziladz to run to grë ncuaae run ma. Tel mendox, haxta zeene biaan guidzliu tibaque nonitlo ma miech, ni ib rneed ma mine nac diidzli, sac ib nand ma zha nac diidzli. Ible lëë xtsiin ma ga nac guielwquidie, gacxe waa ma nac pxoz zha ne rquidie. ⁴⁵ iMin co nagon, niicle diidzli nac grë mine rne naa lo to, per ib rililadzde tow! ⁴⁶ Ni tib to choot grieelod gnë laa naa noquidie, sac niapse diidzli rne naa. iPe nac dzigo rililadzde to mine rne naa? ⁴⁷ Grëse zha ne nlipaa ngab xnëz Dios, rley zho rquiaadiag zho xtiidz Dios; per to gon led xnëzd me ngab to, gacxe waa nëde to yquiaadiag tow.

⁴⁸ Horco pquiab zho rëb zho lo me:

—iPsoog ro luu men Samar ngoopdol! iNlique mine rnee no ga nagon, ne mendox noguitnie luu!

⁴⁹—Choot mendzab noguitnied naa —rëb Jesús—, sinque laa naa noxco xoobnen ganle pa lotaa men nroob nac Pxoaz naa; laa to gon lel rsanwin to naa. ⁵⁰Noguihd naa dien zha guiaannon naa, per Dios gon racladz me ne sca gaca; ni mesi nan me pe run me. ⁵¹Gneli naa lo to ganle: ¡Grëse zha ne gzoob xtidz naa, gdziind dze ne guet zho!

⁵²Pquiab zho rëb zho:

—¡Per nlique nagon mendox noguitnie luu! Zig nac Abraham name gut me, grë zha ne biadteed xtiidz Dios ne, grëse zho gut zho. ¿Zha nac dzigo rnee luu, zha ne gzoob xtiidz luu, gdziind dze guet zho? ⁵³¿Pe mazdraa dzigo nac luu lo pxozgol ne Abraham, lo grëgaa zha ne biadteed xtiidz Dios ga? ¿Cho rzac luu nac luu?

⁵⁴Rëbchaa me:

—Telne lëëque naa noyannon naa, nlid mine rne naa dzigo. Per na gon, Pxoaz naa, men ne nac Dios ne rnee to riladz to, me rlu ganle ne nli men non nac naa. ⁵⁵Tel naa runbey naa me, ni run naa mine rnabey me; sangue to gon, nlid runbey to me. Tel gni naa runbeyd naa me, yele naa ga dzigo noquidie zigne rquidie to. ⁵⁶Pxoazgol to Abraham, bley me zeene gocnan me laa naa znu guial lo guidzliu rii. Ni zeene bdeed Dios didz gon me naa, mazdraa bley me.

⁵⁷Zeene bin zho sca rëb me, rëbchaa zho:

—¿Gon luu Abraham ye? ¡Ni choopt-sii iz name rapd luu! ¡Zha dzigo gon luu Abraham!

⁵⁸—Gneli naa lo to ganle —rëb me—, notaque naa; nole naa zeene gol Abraham.

⁵⁹Horco ptop zho quie laa zho gdeedquie me, per znuse bded me lad zho brie me len yadoo, gondraa zho me.

Biac tib mgui ne rold lo

9 Zieded Jesús tib lugar co, gon me tib mgui ne rcow lo, scale nac lo men co zeene gol me. ²Dzigo bnabdiidz xpëed-scucl Jesús rëb zho:

—Maestro, ¿bay zha nacne squi golnie men qui guielnë qui? ¿Pe no pe xtol mew, te xtol xmengol mew ye?

³—Lëda —rëb Jesús—, led por xtolz zhow; sinque squi gol me, zeena zeene laa me guiac, ga gan miech ganle zha nactaa grë ncuane run Dios. ⁴Zhile laa liu ycow. None dzioxco ne dziuun ne xtsiin men ne pxeel naa laga nasraa bii zob ngbidz, sac deque ycow liu choot grielodraa gun dziin. ⁵Laga bii no naa lo guidzliu rii, naa nac zig tib biini ne rziini lo grë miech rii.

⁶Blozhse sca bnee me, ptsuc me lo liu, bzhixcuaa me niip ben, dzigo bdëëb mew zhits guidlo mgui ne rcow lo ga; ⁷blozh ga, rëbchaa me:

—Güey na, güeytiib lo luu ro pil Siloé.

(Siloé nac zig nacne rnee ne Pxeel zho zho.)

Dzigo güey mgui co güeytiib me lo me, zeene laa me wbire laa me ranle.

⁸Grë zha ne no gax zaatne no me, ni grë zha ne runbey me; zeene gon zho me, rneechaa zho:

—¿Mgui rii ga lëë rzob gdib i rnab gon?

⁹No zho rnee mew, nogaa zho rnee led meda.

—Squidaa rlu me —rnee zho—, per led med i.

Nacne pquiab me mezhäl rëb lo zho:

—Naaw, naa nac mgui co.

¹⁰Dzigo bnabdiidz zho zha biac lo me. Rëbchaa me:

¹¹—Men ne rnee zho lë Jesús, men co bzhixcuaa niip ben dzigo bdëëb mew zhits guidlo naa, blozh ga pxeel me naa biatiib naa lo naa ro pil Siloé; zeene laa naa wbire laa lo naa biacle.

¹²—¿Yo meṇ co niina na? —rëb zho.

—Dieṇda —rëb me—, naṇd naa dieṇ yo me.

¹³Dzigo güey zho güeynie zho me lo grë zha ne nac zha farisé; ¹⁴sac lëëtse dze ne rdziiladz zho lo dziin, lëëtse dze co sca beṅguiac Jesús lo me.

¹⁵Grë zha farisé co, biire zho bnabdiidz zho lo me dieṇ zha biac me; dzigo bzodiidz me lo zho zha bdëëb Jesús niip beṇ lo me, blozh ga güeytiib me lo me, zeṇe laa me wbire laaw biacle.

¹⁶Blalaa zha farisé ne ndxie ga, psilo zho rnee zho:

—Nlid ne Dios pxeel meṇ co, gacxe waa niicle runbeydraa me pa dze nac dze nda.

Pquiab zla zho rnee:

—Tel̄ cholze miech ngoopdoḷ nac me, ¿niacxe zrieelo guṇ me grë milagr qui?

Zhaase zhaase rnee zho.

¹⁷Dzigo wbiire zho bnabdiidz zho lo me, rëb zho:

—Luu waa, ¿cho rzac luu nac meṇ ne beṅguiac lo luu ga?

Pquiab me rëb me:

—Ible Dios pxeel me. Tib meṇ ne ziadteed xtiidz Dios lo miech nac me.

¹⁸Per ib rliladz grë zha wxtis co ne biac lo me, sac rliladz zho ne roḷd lo me glo; dzigo bnabey zho gocredz pxoz me, gocredz xnгаа me. ¹⁹Bdziṇ grop meṅgol co, rëbchaa zho:

—¿Pe nli xpëëd to nac meṇ rii? ¿Pe nli na roḷd lo me zeṇe gol me? Tel̄ nli roḷd lo me, ¿zha biac lo me ne laa me ran niina?

²⁰—Nli xpëëd no nac me —rëb grop meṅgol co—. Ni nli roḷd lo me zeṇe gol me; ²¹per ndionḍ no dieṇ zha biaca ne laa me ran niina, niicle ndionḍгаа no dieṇ pe no cho beṅguiaa. Benque zha gol-le nac me, mazd lo me goḷnabdiidz, mezhäl gnë dieṇ zha biac lo me.

²²⁻²³Sca rëb grop meṅgol co, sac rdzieb zho gree zho xyadoo zho. Biaanle

grë zha rnabey co diidz: zha ne guiab Jesús nac Meṇ ne zëëble diidz ga cxeel Dios lo guidzliu; csaandraa zho sëëb zho yadoo.

²⁴Wbiire zho bredz zho meṇ ne biac lo ga, rëb zho:

—Bien ganle Dios zobwi, bnë diidzli lo no; sac tel̄ no ndion̄ no cholze miech ngoopdoḷ nac meṇ co.

²⁵—Dieṇda —rëb me—. Naṇd naa dieṇ pe miech ngoopdoḷ nac me, te meṇ wena ye. Per me goṇ beṅguiac lo naa, sac roḷd lo naa glo.

²⁶Dzigo biire zho bnabdiidz zho stib dieṇ zha beṅguiac Jesús lo me.

²⁷Pquiab me rëb me:

—Ledaaw nile naa lo to, per ib rliladzde tow. ¿Zha nac dzigo ne racladz to gonaque tow stib? ¿Te racladz to ye, ye to sëëb xnëz me?

²⁸Dzigo psilo zho ndox zho lo me, rëb zho:

—Luuzhe tel̄ xnëz me no luu, sangue tel̄ no zhiwseed Moisés, miṇ co zional no. ²⁹Sac tel̄ Moisés, ndion̄ no nli Dios pxeel Moisés, per mgui co ni ndionḍ no dieṇ pa brie me.

³⁰Pquiab me rëb me:

—iNcuaaṇe gzeegaa zdoe ne i runbeydaque to cho nac me, ni ron to me beṅguiac lo naa! ³¹Ndion̄ ne ganle rquiaadiagd Dios xtiidz cholze miech ngoopdoḷ, sinque laa me rquiaadiag xtiidz zha ne rien̄ ne nli meṇ nroob nac me, ni ruṇ zho miṇe rnabey me. ³²Stiba, waltaa gard dzion ne cho zha beṅguiac lo tib miech ne znu gol roḷd lo. ³³Tel̄ne niaca mine nacdied Dios meṇ co, nrieelod me niunguiac me lo naa.

³⁴—iPsiog ro luu! —rëb zho lo me—. iIb racladz no guiaad tib ngoopdoḷ nu guidaeed no!

Horco wbig zho, blee zho me ga.

Zha ne rold lo

³⁵ Bin Jesús sca blee zho me ga, dzigo zeene bdiieel Jesús me, rëbchaa Jesús lo me:

—¿Pe rlliladz luu men ne nac Xpëed Dios?

³⁶ Pquiab me rëb me:

—Bzhiguiel bnë lo naa dien cho nac men co, zeena gliladz naa me.

³⁷ —Gonle luu me —rëb Jesús—. Naa gon nac men co, lëe me nu nozodiidnie luu niina.

³⁸ Dzigo pquitsgzhil me lo Jesús, ni rëb me:

—Dib zdoo naa rlliladz naa ne nli Xpëed Dios nac luu.

³⁹ Blozh ga rëbchaa Jesús:

—Laa naa zial lo guidzliu rii, zeena glu dien cho rap dol, dien chogaa rapd dol; sac zha ne rzac miech peet riend, laa zho tsaa biini; laa zha ne rzoob zho niini, laa xquielrien zho ycow, guiaan zho zig tib zha ne rold lo.

⁴⁰ Blalaa zha farisé zo ga, zeene bin zho sca rëb me, rëbchaa zho lo me:

—¿Rzë diidz qui na lëe ye lo no rold?

⁴¹ Dzigo pquiab me rëb me lo zho:

—Tel niaca mine nlipaa zha ne rold lo nac to, grieelod gni naa rap to dol. Per na, ne masaque rzac to rolraa lo to, gane grëse ncuane quiayun to xtol to noyaca, to zëeba.

Mëcwxiiil ni zha ne rquianap ma

10 Ni rëb Jesús:
—Golquiaadiaga ganle: grëse zha rded stib nëz zeene rzëeb zho len lidz mëcwxiiil, laa ne ted zho nëz ro puert, gase rlu ngbaan ga nac zho; ² sac tel men ne noyan maw, nëz ro puert nëz co rzëeb me. ³ Zha ne rquianap ro lidz ma, ga rxal zho rded me; niicle magaaw, zeene ron ma tsi me, grëse ma rdziñ lo me; dzigo rbedz me ma, rneelë me ma tib tib ma, laa me rbee ma ga. ⁴ Rlozhse rbee me

grë ma ne nac xma me, laa me rner lo ma; grëse ma laa ma rnal zhits me sacne runbey ma tsi me. ⁵ Rienald ma zhits stib miech, zeene ran ma zho znuse rzhoon ma; sac runbeyd ma tsi zho.

⁶ Grë zha ne ndxie lo me ga, ib biend zho zha nac godiidz co; ⁷ dzigo wbiire me bnee me lo zho, rëb me:

—Golquiaadiaga ganle: Naa gon nac zig ro Puert, zaatne rded mëcwxiiil ga.

⁸ Grëse zha ne biaad glo rnee zho zha nac Men ne nacle diidz cxeel Dios ga, grëse zha co ngbaan ga nac zho, loxaque psacsi zho par grielo cuan zho; ni grëse mëcwxiiil ne nacpaa xpëcwxiiil naa, güey-nald ma zhits zho. ⁹ Sangue naa, laa naa nile lo to ganle: Naa nac zig ro Puert, zaatne rded mëcwxiiil ga. Grëse zha ne gbig lo naa, zlaa zho, peet lo tsoxtseeb-draa zho; pale grë mëcwxiiil ne zozëeb zoriee ro lidz, ni rdziel ma guizh nguia, guizh ndzon row ma. ¹⁰ Zha ne nac ngbaan, zeene riaad zho loxaque rban zho ni rut zho; sangue naa, laa naa zial zeena ygaa to tib guielmban ne mazdraa ndzon, tib guielmban ne gdziñd dze lozh.

¹¹ Naa nac Baxtor ne nquialadzpaa xpëcwxiiil. Sac zha ne nquialadzpaa xpëcwxiiil, rquiad zdoo zho xquielmban zho, rsilaa zho ma lo guielxtseeb ne no-taa ma. ¹² Per tel noyac-wree zha ne noyan ma, rquiad zdoo zho ma, zigne ran zho palo ziaad tib coyot ntseeb, ndxieque mëcwxiiil ga laa zho rzhoon; sac led chend zho ma, led zhad nac xbaxtor ma. Zeene rdziñ coyot, nëzrii nëzrec rtsieets coyot ma, nogaa ma rgaa lo coyot. ¹³ Rzhoon zho, sac dimise nonie guic zho, peet liaadz nod zho ma. ¹⁴⁻¹⁵ Naa nac Baxtor ne nquialadz xpëcwxiiil. Zigne runbey Pxoza naa naa ni runbey naa me, sca runbey naa grëse xpëcwxiiil naa, niicle magaaw runbey ma naa. Grëse ma, rleynie naa ma, laa naa rbeeladz xquielmban naa totsaque cuee naa ma lo guielxtseeb ne no ma.

¹⁶No spalal xpëcwxiił naa, ma ne ngabd leñ corral rii; grëse ma co, ible zon ma tsi naa sac laa naa no gaxi ma, zeena tipse gac ma grë ma yquianaap naa ma.

¹⁷Men ne nac Pxoꝝ naa, rleynie me naa sac laa naa rbeeladz xquielmban naa; per ible zriebaan naa. ¹⁸Naazhal rbeeladz xquielmban naa, choot grielod lega ctiche xquielmban naa. Rap naa poder gded naa xquielmban naa, ni rap naa poder gbire gban naa stib. Dios bneedz diidz bey co lo naa.

¹⁹Grë zha Israel ne ndxie ga, zeene bin zho sca rnee me, laa zho goc chop dii stib. ²⁰No zho rnee:

—Yase mendox noguitnie guic men qui, o rzhinlegaa guic me. ¿Pe nacne rquiaadiag to xtiidz me?

²¹Rquiab stib zho rnee:

—Niini rzë xtiidz men qui, led squid rac zha ne noguitnie mendox. Stiba, ¿ni-acxe zrieelo mendox gunguiac ma tib lo zha ne rołd lo?

Rnee Jesús Xpëed Dios nac me

²²Leñ mëe ne rac nała, leñ dze co noyac tib lni Jerusalén, lni ne run zho rsoladz zho dze ne glopaa psilo quiaquiiñ yadoo. Ye Jesús bdziñ Jerusalén leñ dze co. ²³Laa me zieded tib leñ nsaap ne quia cho yadoo co, nsaap ne rnee zho zhiNsaap rey Salomón; ²⁴zeene wbig bla zha ne rnabey Israel, bnabdiidz zho lo me rëb zho:

—¿Poc dzigo gdziñ dze ne gnë luu diidzli lo no? Telne nli luu nac Men ne zëëble diidz ga cxeel Dios guiaad lo guidzliu, niinağazh bnëw lo no.

²⁵Pquiab Jesús rëb me:

—Blactaale zine naaw lo to, per rliladzde tow. Stiba, pe zhidaa milagr ne ziyañ to run naa, gase rlu ganle cho nac naa; sac Dios men ne nac Pxoꝝ naa, men co racnieñ naa run naaw. ²⁶Ib rliladzde tow, sacne led yede to ngab lo naa. ²⁷Tel zha ne ngab lo naaw, runbey zho

naa; niicle naagaaw runbey naa zho, ni zhits naa rzënal zho. ²⁸Grëse zho, rded naa tib guielmban ne gdziñ dze lozh lo zho, ni gdziñ dze nitlo zho. Choot grielod ctiche zho lo naa, ²⁹sac men nroob nac Pxoꝝ naa men ne pxeel zho lo naa; choot grielod cuee zho ladzna me. ³⁰Ni tibaque nac no grop no me.

³¹Zeene bin grë zha rnabey co sca rëb me, psilo zho ptop zho quie nañ zho ngoquie zho me. ³²Dzigo rëbchaa me lo zho:

—Lo grëtaa milagr ne quiayacnieñ Pxoꝝ naa naa quiayun naa lo to. Golnë dien, ¿pa min rlisqui to ne laa to racladz gneedzquie to naa?

³³Pquiab zho rëb zho:

—¿Coquiedaxe no luu waa por grë milagr ne run luu, sinque laa no coquie luu por grë diidz ne rnee luu i, quiaguitnie luu Dios! ¿Tib miech benise name nac luu, ni rnee luu laa luu nac Dios!

³⁴Dzigo rëbchaa me lo zho:

—¿Lo xlibr ley to name zhobnee zha rzac Dios zha ne pcaania xtiidz me, rëb me dios nac zho! ³⁵Ni ndion ne ganle, grëse mine rnee lo Xtiidz Dios, diidzliw; gacxe waa tel sca rëb me lo zha ne pcaania xtiidz me ga, ³⁶¿niacxe rguitnie naa me ga, zeene rne naa Xpëed me nac naa, ni mezhal bzooblo naa pxeel me naa lo guidzliu rii? ³⁷Telne run naa milagr ne rlu Dios pxeel naa, ib gliladzde to naa. ³⁸Per telne ran to rlu ne me nacie naa, maase gliladzde to naa totsaque golliladz ne me nacie naa; tsow guien to ganle ne tibaque nac no grop no me, zigtaa nacie me naa, scaque nacie naa me.

³⁹Horco gocladz zho stib naaz zho me, per znuse brie me nia zho. ⁴⁰Dzigo brie me ga güey me ro guiubee Jordán, zaatne bio Juan pchoobnis Juan miech; ga blëz me palal dze. ⁴¹Nzian miech ne güey lo me ga, rnee zho:

—Nli beend Juan ni tib milagr nroob, per grëse mine bnee me zeene bzeet me

men rii, zigne bneese me laaw norieequia niina.

⁴²Nzian grë miech ne güeyquiaadiag zhiwseed me ga, dib zdoo zho bliladz zho ne me nac Men ne zëëble diidz ga cxeel Dios.

Gut Lazh

11 Len dze co blanguidz tib mgui ne no guiedz Betain, lë Lazh; no chop bzian Lazh tib zho lë Mart stib zho lë Marí. ²(Lëë Marí rii pchoob tiblo nceit nex ni Jesús, ni pcuiidz mew con guitsguic me.) ³Dzigo pxeel grop wnaa co didz lo Jesús, gacnan me laa Lazh rzacnë, sac nan zho rleyniedox me Lazh.

⁴Zeene blanso diidz, nëchaa me:

—Peet tsienied guic to, niicle tel blanguidz me per nacda par guet me, sinque par glu ganle pa lotaa men nroob nac Dios. Ga glu ganle pa lotaa men nroob nac Xpëed me.

⁵Zigtaa Maríw, zigtaa Marta, zigtagaa Lazha, nquialadz Jesús zho gza zho, ⁶per ib biobladz me; lel blëz me schop ngbidz zaatne no me ga. ⁷Dzigoraa në me lo no:

—Laa ne guio nëz xtan men Judé stib.

⁸Dzigo rdzieets no:

—Maestro, ¿racladz luu tsie luu nëz co stib ye? Pense name goc bla ngbidz ga gocladz zho ngoquie zho luu ga.

⁹Nëchaa me:

—Tsiipchopraa hor name rziini ngbidz, ni laga niini rna zac tibliladz zia ne, noxtseebd ne lega pa griel ni ne; ¹⁰lox- aque pcow liu, noxtseeb pa griel ni ne; sac ncow rna.

¹¹Blozh ga në me:

—Laa xamigw ne Lazh nixguiesle, per na laa ne guio zeena gabee naa zhimcaalo me.

¹²⁻¹³Tibaque ndion no nli nixguies Lazh, dzigo rdzieets no lo me:

—Telne raaguiesle me, zac-wen me sca.

Ib biend no ne gutle Lazh, gane sca rnee me. ¹⁴Dzigoraa clar bnee me lo no, në me:

—Laa Lazh gutle. ¹⁵Ni rley naa gon ne guiend naa ga dze co, zeena sca grieelo lozh gliladz to ganle cho nac naa. Golgotsaa guio ne nëz lo me ga niina sca.

¹⁶Laa Mazh, zha ne rnee zho “Mëedgrop”, zeene bin Mazh sca në me, rneechaa Mazh lo no:

—Guiend rson, golgotsaa cchoob zdoo ne guional ne zhits me dien. Tel gut zho me, maase gut zho ne.

Jesús rbeeban ni me rdeed guielmban

¹⁷⁻¹⁹Gax Jerusalén riaan Betain. Zha ne rree Jerusalén, maase groh hor run zho nëz rdzin zho Betain. Nzian grë zha Jerusalén rdzin riequiaabdiuzh zho Marí grop Mart, riechoobladz zho zdoo me lo xquielnë me ga.

Dze ne rac tap ngbidz bioliu Lazh, dzigoraa laa Jesús bdzin.

²⁰Gon Mart pa lo ziaad Jesús, dzigo brie me biaad-xinëz me Jesús; laa Marí biaan ro yu.

²¹—Jesús —rëb Mart—, telne niaca mine nu no luu segur niete bzian naa; ²²sac nan naa, grëtaa ncuane r nab luu lo Dios, run me mine r nab luu.

²³—Peet tsienied guic luu —rëb Jesús—, ible zrieeban bzian luu.

²⁴Pquiab Mart, rëb Mart:

—Nliw, nanpaa naa ible zrieeban me gal dze ne laa guidzliu rii nitlo, zeene grëse mengut, laa zho grieeban.

²⁵Dzigo rëb Jesús:

—Naa nac men ne rbeeban grë mengut, ni naa nac men ne rdeed guielmban lo grë miech. Grëse zha ne dib zdoo gliladz naa, niicle guet zho zig ret grëraa miech rii, zdzin dze ne gban zho stib. ²⁶Sac grëse zha ne dib zdoo rliladz naa, laa zho bgaale tib guielmban ndzon ga, guiaand zho ladznia guielgut. ¿Led rliladz luu lëë Mart, ne sca gaca?

²⁷—Rliladz naaw —rëb Mart—. Rliladz naa ne luu nac meñ ne bzooblo Dios ga, luu nac Xpëed Dios, Meñ ne zëëble diidz ga cxeel me guiaad lo guidzliu.

²⁸Blozhse ga, wbire Mart zie Mart zietsedz Mart Marí. Bdzin Mart zhlianse bredz Mart Marí (sac nzian zha ne ndxie ga ziequiaabdiuzh Marí) rëb Mart:

—Niinapaale blanso Maestro, na laa me rbeedz luu.

²⁹Zigne bin Marí sca rëb Mart, briece nguzhoon Marí laa Marí zie nëz co.

³⁰(Bdzin Marí, laa Jesús bii zo zaatne güeydzieel Mart me ga; gase blëz me, bzëëbd me lad guiedz.) ³¹Grë meñ Israel, zha ne ndxie lidz Marí ga ziechoobladz zdoo me, zeene gon zho sca lëëlëd briece me, nalaque zho zhits me; sac nan zho bod ro xpaabzian me ziegoon me.

³²Zigne bdzin me zaatne zo Jesús ga, pquitsgzhiz me lo Jesús.

—Jesús, luu ne nac luu meñ ne rnabey —rëb me—, telne niaca mine nu no luu zeene blanguidz bzian naa, niete me.

³³Psilo Marí roon Marí. Zeene gon Jesús, niicle Maríw, niicle grë zha Israel ne bdzin ga, mban rac zho, grëse zho roon, dzigo ye me biab guieñe me.

³⁴Bnabdiidz me rëb me:

—¿Pa lo pqueets to me?

—Dë ganle —rëb zho—, zeena gan luu pa lo bqueets me.

³⁵Horco psilo Jesús biin me. ³⁶Grë zha Israel co, zeene gon zho roon me, nreechaa zho:

—¿Golwi ganle, blactaa nquialadz me Lazh!

³⁷Laa zla zho rnee:

—Led me name beenguiaac lo mgui ne rold lo ga, ¿pe nrieelod zha niun me, zeena niete Lazh?

Brieceban Lazh

³⁸Zeene laa Jesús bdzin ro baan Lazh, biire biab guieñe me.

Zig nac tib bleece niaa baa co; rna tib quie nroob ntse zaatne rsëeb zho ngutoo; ³⁹dzigo bnabey Jesús cob zho quie co.

Pquiab Mart, bzian ngutoo co rëb me: —¿Mazd gdiobda! ¿Nadze rac tap ng-bidz gut me, mbanle na rlaa me!

⁴⁰Dzigo rëbchaa Jesús:

—Led laa naa nile lo luu, telne dib zdoo luu rliladz luu naa, bii zan luu ganle zha nactaa grë ncuane ndzon ne run Dios.

⁴¹Zeene blozh bdoob zho quie co, dzigo blis Jesús lo me nëz gbaa, ni rëb me:

—Dios, luu ne nac luu Pxoz naa, xquizh xquieñzaac luu sac rquiaadiag luu mine rne naa. ⁴²Nan naa tibaque rquiaadiag luu mine rnee naa, per laa naa rzeta niina, zeena grëse miech ne ndxie nu gliladz zho ganle ne nli luu px-eel naa.

⁴³Dzigo nguiedz bredz me, rëb me:

—¿Lazh, briece i!

⁴⁴Zigne sca bnee me, laa ngutoo co briece ga, scase nrieel lar dib nia me, dib ni me ne, ni nioog stib lë lar lo me. Dzigo rëb Jesús:

—¿Golxadz grë lar ne nrieel me i, zeena guey me!

Rguib zho dien zha yгаа Jesús

(Mt. 26:1-5; Mr. 14:1-2; Lc. 22:1-2)

⁴⁵Grë meñ Israel ne güeynal zhits Marí ga, zeene gon zho sca bleeban Jesús Lazh, nzian zho bliladz ne nli Dios pxeel me. ⁴⁶Nogaa zho lel güey zho güeyzodidz zho lo grë zha farisé zha bleeban me Lazh. ⁴⁷Horco lëëlëd pcaalsa grë pxoz ne rnabey, ni grë zha farisé, rëb zho:

—¿Pe gnë to dien zha gaca? ¿Zha dzi-uun ne mgui ne rnee zho Jesús ga, sac gon pe zhidaa milagr ne quiaayun me? ⁴⁸Telne squise csaan ne me, mbe grëse

miech sēēb xnēz me; lozh ga, zeene gacnañ men rñabey ne zob Romaw, laa me cxeel grē xmenguiib me guiaadnitlo zho xyadoo ne, guiaadnitlo zho ladz ne.

⁴⁹ Dzigo pquiab Caifás, men ne nac pxoz nroob len iz co, rēb me lo zho:

—iNi lal nu lēē peet riende to! ⁵⁰ ¿Pe riende to mazd wena ygaa tib zha guet zho, zha quizh par gdib guiedz, lēdle grēse zha ladz ne nitlo?

⁵¹ Zeene sca rēb Caifás men ne nac pxoz nroob ga, ga bzeet me ible no guet Jesús par csilaa me grēse miech lo dol; per led guicd me biaba, sinque Dios psiaaba guic me. Ga goquiet ne laa Jesús guet, par csilaa me grēse zha Israel, ⁵² ni grēragaa zha ne no dipse lo guidzliu, zeena tipse gac grēse zha ne nac xpēēd Dios.

⁵³ Dzigo grēse zha ne nac wxtis ga, laa zho biaan diidz ne ible no ygaa Jesús gut zho me. ⁵⁴ Nacne briedraa Jesús ne nenlo nian zho me; dzigo mazd laa me brieenie no xtan zha Judé, güeynie me no zaatne wzhi no miech, bdziñ no tib guiedz win lē Efraín, ga bliaaz no grē no me.

⁵⁵ Len ngbidz co, ziaadyob lni Pascw. Nzian grē miech ne no grē guiedzlas ne ndxie dib ga, laa zho rsilo quiariee zie zho nēz Jerusalén; sac ansraa csilo Pascw nzian zho rie yadoo run zho grēse mine rñabey ley par guiaanmbe zho lo xtol zho. ⁵⁶ Grēse zha ne rdziñ, len yadoo no zho rñabdiidzlsa zho dien pe zdziñ Jesús lo lni; sac grēse zho racladz gan me.

⁵⁷ Laa grē pxoz ne rñabey, ni grē zha farisé, laa zho bnabeyle, zha ne gantaa Jesús, tsienie zho diidz parne tsie zha ne tsienaaz me.

Pchoob tib wnaa nceit nex guic Jesús

(Mt. 26:6-13; Mr. 14:3-9)

12 Sxoop ngbidz gdziñ dze lni Pascwa, güey Jesús guiedz

Betain, zaatne no Lazh, men ne bleeban me ga. ² Sac grēse menlidz Lazh, beenlo zho tib xtsee, gownie zho me.

Mezh no zho, laga laa Lazh zobnie me, laa Mart nodziib ncuaañe gowxtsee zho lo mezh, ³ tibaque zeene bzēēb Marí bzēēbnie Marí tib lo nceit nex ne rriee guiee ne lē nard, tib lo nceit niazha, rgaaw maase groļ boté. Zigne bdziñ Marí bdēēb Marí nceit co ni Jesús, blozh ga con guitsguic Marí pcuiidz Marí ni me. Dipse len yu zēbxcxaa nceit co.

⁴ Laa Judas Iscariot, tib zha ne nacgza no (zha ne bded ga pto me) zeene gon Judas sca bdēēb Marí nceit co ni Jesús, rneechaa Judas:

⁵ —Mazd tebaa zha ndo nceit qui. Nguizhpaaz zhow maase tson gayoo pes plat, dzigo needz zho dimi co ngaaza lo grē zha mban ne guiend pe yquiiñ.

⁶ Sca rnee Judas, per nliid ne rquia zdoo Judas zha ne guiend pe yquiiñ, sinque laa Judas rguib dien zha cuan Judas dimi co, sac Judas ngotsow bziuud ne no dimi; zigse racló dimi len bziuud co, zhlianse rbee Judas dimi co.

⁷ Dzigo rēbchaa Jesús:

—Psaan me. Ib laa me bdēēb nceit qui ni naa, zeena nzhixcuuaale xcuerp naa gal dze ne laa naa ygueets. ⁸ Telne racladz to gun to xyudar zha ne guiend pe yquiiñ, tibaque ranlsa to grē to zho, zac tsoaw ygad to lo zho; sangue naa zdziñ dze gandraa to naa.

⁹ Ndal grē zha Israel, zeene bin zho laa Jesús no guiedz Betain, bio zho nēz güey zho lo me ga, ni güeyso zho lo Lazh, men ne bleeban me ga.

¹⁰ Zeene gon grē pxoz rñabey cow, nacne bnediidzaque zho ye Lazh none gut zho; ¹¹ sac por Lazh, nzian grē zha non, laa zho rbig nēz lo Jesús, laa zho rliladz ne nli me nac Men ne zēēble diidz ga cxeel Dios.

Bzëëb Jesús Jerusalén

(Mt. 21:1-11; Mr. 11:1-11; Lc. 19:28-40)

¹²Biini liu co, dipse lad guiedz Jerusalén zhoob diidz laa Jesús gdziñ ga dze co. Grë miech guizhiu ne bdziñ ga zie lni Pascw, ¹³psilo zho brieë zho ziaad-xinëz zho me; tib tib zho nzheñse zho tib lë zin. Lo guieļbley co, zeene gon zho me, psilo zho nguiedz roptsie zho, rnee zho:

—jZha men nroobtaa nac Dios! jZha ndzontaa men rii pxeel Dios ziaad lo ne! jLëë men rii gnabey Israel!

¹⁴Laa Jesús, zobse me lad tib burr yeen, zigne raquiet lo Xtiidz Dios zaatne rnee:

¹⁵Grëse to men Israel, gdziebde to. jGolwi ganle, laa men ne rnabey ladz to ziaad i, zobse me lad tib burr yeen!

¹⁶Grëse no ne nac no xpëedscuel me, ni tib no bienđ hor co ne grëse ncuaañe noyac ga, raquietlew lo Xtiidz Dios; sinque haxta zeyle me gbaa, dzigoraa psoladz no nzian grë ncuaañe raquiet lo Xtiidz Dios ga, gonlo no goca; ni bienđ no Jesús raquiet ga.

¹⁷Lad grë miech guizhiu co no nzian zha ne gon zha bleeban me Lazh, dzigo nguiedz rzodiidz zhow lo grë miech co.

¹⁸Ni nzian grë miech co, laa zho blanso ga ziaad-xinëz zho me, sac bin zho zha been me milagr nroob co. ¹⁹Grë zha farisé, zeene gon zho grë miech guizhiu co, meeçaa zho:

—jPe zhidaa grë miech qui racnie men qui! jPeraa nadien dziuun ne!

Rguib bla zha Gres Jesús

²⁰Lad grë miech ne bdziñ Jerusalén ga, ziegan Dios len ngbidz Pascw co, lad co no blalaa zha zit ne nacd zha Israel, ²¹dzigo bnee zho lo Lip (zha Betsaid nac Lip) rëb zho:

—Bzhiguiel bnë dien pa lo no Jesús, laa no racladz dzian no me.

²²Dzigo güey Lip rëb Lipa lo Ndrés, blozh ga güey zho grop zho güeynie zho diidz lo Jesús.

²³Dzigo rëbçaa me lo zho:

—Naa ne nac naa Mgui ne pxeel Dios, niinataa nagon laa dze bdziñ zeene laa naa gbire guia gbaa stib. ²⁴Golquiaadi-aga ganle: Tib zhoobxtil, telne tsoda liu tibaque zhoob naca; per zeene laa zhoob co rio liu, nzian raca. Scaque naa nagon, none guet naa, none tsoliu naa, zeena gacnzian zha ne ygab xnëz naa. ²⁵Sac zha ne rquia zdoo xquieļmban, znitlonie zhow; sangue zha ne cueeladz xquieļmban, zha cosi zgaa zho tib guieļmban ndzon ne ib gdziñd dze lozh. ²⁶Zha ne racladz sëëb xnëz naa, none gun zho mine rnabey naa; ni zaatne gdziñ naa yeque zho no gdziñ ga. Ni grëse zha ne sëëb xnëz naa ni gon zho xtidz naa, zunnon Pxoz naa zho. ²⁷Mban rac zdoo naa niina. Per lëda ga gun naa, telne guiep naa lo Pxoz naa csilaa me naa lo grëtaa guieļnë ne no teed naa. jSac par mincopaa zial naa lo guidzliu rii!

²⁸'Dios, luu ne nac luu Pxoz naa —rëb me—. Blu lo grë miech rii ganle ne men nroob nac luu.

Dzigo bin zho zëëb tib tsi men co gbaa, rëb me:

—Laaw blule naa, ni niina laa naa gbire gluw stib.

²⁹Nzian grë miech ne ndxie ga, zeene bin zho tsi men co, bzhaac zho nguziw; zha ne bien led nguzida, rnee zho:

—Xanjł Dios ga gon bnee lo me.

³⁰Dzigo rëbçaa me lo zho:

—Laa to bin ganle laa Pxoz naa bnee, ni por to gon bnee me, zeena gon to tsi me ni gliladz to ne me pxeel naa. ³¹Laa dze nagon bdziñ zeene laa Dios gunquizh naa xtol grëse miech guidzliu rii; lëë dze bdziñ zeene laa mendox piche gnabey-draa ma lo guidzliu rii zigne rnabey ma

niina. ³²Sac zeene laa naa quia glaa lo cruz, ga cuetz naa grëse miech zeena sëëb zho xnëz naa.

³³Ga bzeet me zha gut miech me. ³⁴Grë miech ne ndxie ga, zeene bin zho sca rëb me, rëbchaa zho:

—¿Guet luu ye? Lo Xtiidz Dios name rnee, ib guete Men ne cxeel Dios ga. ¿Zha nac dzigo ne rnee luu laa luu guet? ¿Chopaa dzigo nac luu?

³⁵Dzigo pquiab me rëb me lo zho:

—Naa nac zig tib biini ne noziini lo miech; ni ngabse dze ne cuëz naa lo to. Laga noziini naa lo to, golsëni zaatne riab biini zeena ygaade to guielcow; sac zha ne rzë lo ncow riend zho palo zie zho. ³⁶Niina ne rdeeda diidz golliladz cho nac naa, zeena gac to zha ne nlipaa no lo biini.

Blohse sca rëb me laa me biche ga, blulodraa me lo zho. ³⁷Niicle gonlo zho nzian milagr ne been me, per ib riladzd zho ne nli Dios pxeel me. ³⁸Ni ib scalegaa no gaca, sac ga brieequia mine bzeet Isá (tib men ne biadteed xtiidz Dios) zeene znu rëb me:

Dios, bui ganle ni tib choot nëd gliladz xtiidz luu,

niicle ran zho grëtaa milagr ne run luu.

³⁹Ni nligaa ib brieelod nliadz zho me; sac zeene pquiaa Isá, znu rëb me:

⁴⁰Ncow psan Dios lo zho, ni beenndip me zdoo zho;

zeena gand zho me, niicle guiendgaa zho zha gbig zho lo me csilaa me zho lo xtol zho.

⁴¹Zeene znu bnee Isá, ible Jesús ga bzeet me; sac gon me grëtaa guielndzon ne rap Jesús. ⁴²Ndal zho sca ib bliladzd me, per noquegaa zha ne bliladz me; zig nac grë zha ne rnabey lo zha Israel, ndal zho bliladz ne nli Dios pxeel me, per ib pxobnend zhow; sac rdzieb zho cuee zha farisé zho yadoo. ⁴³Ni stiba rdziladzraa zho guiaannon zho lo miech, laa ne guiaannon zho lo Dios!

⁴⁴Len dze co, tib vuelz nguiedz bnee Jesús, rëb me:

—¿Grëse zha ne riladz naa, yele Pxoze naa ga riladz zho! ⁴⁵Ni zeene rwi zho lo naa, yele men ne pxeel naa ga ran zho! ⁴⁶Naa nac zig tib biini ne rziini lo miech, ni grëse zha ne dib zdoo gliladz cho nac naa, zrieë zho lo guielcow ne no zho. ⁴⁷Grëse zha ne gon Xtidz naa, ni gband zho zigne rnabeya, led naad gunquizh zho dol co; sac ziald naa par gdziibdol naa miech, sinque laa naa zial par csilaa naa zho lo dol. ⁴⁸Xtidz naa gac ley ne gunquizh zhow; zigtaa zhaw zigtagaa grë zha ne nëd gunbey naa, grë zha ne nëd yquiaadiag xtidz naa. ⁴⁹Sac grëse ncuaane pseed naa miech, led guicd naa biaba, sinque Pxoze naa men ne pxeel naa, men co rnabey naa pe nac mine cseed naa zho. ⁵⁰Ni nappaa naa, grëse diidz ne rnabey Pxoze naa naa rne naa, lëëw rlu zha yгаа miech tib guielmban ndzon ne gdziind dze lozh; gacxe waa, grëse mine rnabey me gne naa, zigne racladz me scase rne naaw lo to.

Rguiib Jesús ni xpëëdsuel me

13 Guieel ne rsilo lni Pascw; wdze co pcaalsanie Jesús no grëse no ne nac no xpëëdsuel me, laa no nodi-owxtsee. Rienle me ne gataa laa dze co bdziin, zeene laa me gbi lo guidzliu rii gbire me lo Pxoze me stib. Grëse zha ne ngab lo me, rleynie me zho; ne nligaa rleynie me zho haxta bdeed me xquielmban me psilaa me zho. ²⁻⁴Rien me grëtaa ncuaane no, ladznia me psan Pxoze mew; lo Pxoze me brieë me ziaad me lo guidzliu, ni lo Pxoze me gdziin me niina ne laa me gbi lo guidzliu.

Laa no zioob no no mezh, tibaque zeene guso me blee me lar ne mbix me, bdziinlen me tib lë lar nool. Par hor co, laa mendox pquuil-le Judas, zhin Simón Iscariot, parne tsieto Judas me. ⁵Dzigo blaas me nis tib len bandej laa me psilo

noguiib me ni grë zha ne nacgza no, zigse rlozh rguiib me ni tib zho scase scase rcuiidz mew con lar ne ndxie len me ga. ⁶ Zeene laa me zie quiiib me ni Simón Pedr, rëbchaa Simón lo me:

—¡Lëda i gon! ¿Pe nacne lel luu quiiib ni naa?

⁷ Pquiab me rëb me:

—Griee lod guien luu niina, pe nacne quiiib naa ni luu; haxta tedraa nu dzigo ganle guien luuw.

⁸—¡Nend scaw! —rëb Pedr—. ¡Per naasi gon gnedzd naa diidz quiiib luu ni naa!

Dzigo rëbchaa me:

—Griee lod sca ygab luu xnëz naa, telne siguield luu quiiib naa ni luu.

⁹ Horco pquiab Simón, rëb Simón:

—Bzhiguiel sca, niinagazh bdiib ni naa, per led loxaque nidse naa, sinque dib nia naa, dib guic naa bdiib.

¹⁰ Dzigo rëbchaa me:

—Zha ne gozle, nise zho riar; sac mbele zho. Scaque to nagon, mbele to grë to. Grë to rne naa, niicle ne led gzadpaa to mbe.

¹¹ Sca rëb me, sac rienle me cho tsieto me.

¹² Blozhse bdiib me ni no, wbiire wbix me xab co me, bzob me lo mezh; dzigo në me lo no:

—¿Pe bien to na pe nacne znu bdiib naa ni to? ¹³ Golwi ganle: To lëë, Maestro rnee to lo naa, ni rnee to naa nac men r nabey; ni nonguiela gon, sac ne nligaa scaw. ¹⁴ Golgan sca, niicle ne maistr naa, niicle ne naa nac men ne r nabey, per laa naa bdeed zig tib ngundziin win bdiib naa ni to. Nana sca, scaque golgac lo samiech to. ¹⁵ Laa naa blule lo to zha gun to, nana sca goltsienal min co. ¹⁶ Gneli naa lo to ganle, lo grë zha ne nac ngundziin, tsod zha ne nonraa lo zha ne r nabey zho; scaque grë zha ne rie mandad, tsod zha ne nonraa lo zha ne rxeel zho. ¹⁷ Laa to nanlew nasca. Gacxe waa,

telne tsienal to wseed rii, zaacse gac lo xquielmban to.

¹⁸ Golquiaadiag ganle, grëse mine none naa nu, led par grëde tow. Naa bzooblo to, nanween naa zha nac to tib tib to, ni nanween naa zha rnee lo Xtiiidz Dios, rneew: “Lëëque tib zha ne rownie naa, grieequia tsielo naa ladznia zha ne gut naa.” ¹⁹ Laaw rnegazh naa lo to niina, zeena zeene gaca, gliladz to ganle ne nli naa nac men ne rne naa nac naa. ²⁰ Ni golgona ganle, grëse zha ne ycaania Espiritu Sant, men ne cxel naa, naale ga nocaania zho; ni zha ne rcaania naa, ye le men ne pxeel naa ga rcaania zho.

Rëb Jesús ne Judas nac zha ne tsieto me

(Mt. 26:20-25;

Mr. 14:17-21; Lc. 22:21-23)

²¹ Horco psilo rlupaa mban goc zdoe Jesús, dzigo bneeli me lo no në me:

—Gneli naa lo to ganle, lëëque tib to gon tsielo naa ladznia zha ne gut naa.

²² Zeene bdzion no sca rnee me, psilo no rwilolsa no, rien d no dien cho nac zha ne rzeet me ga.

²³ Cuepaa me, ga zoob naa (rleynie me naa niicle ne raguiald naaw); ²⁴ dzigo blunia Pedr lo naa, gnabdiidz naa lo me dien cho nac zha ne rzeet me ga. ²⁵ Nacne wbig gax naa, bnabdiidz naa lo me.

²⁶ Dzigo nëchaa me:

—Laa naa cobie tib lë quietxtil, ni lo zha ne gan luu gded naa quietxtil co, lëë zho ga.

Dzigo bzhen me tib lë quietxtil, blozhse bloobie me quietxtil co, laa me bdeeda lo Judas. ²⁷ Zigne bnaaz Judas quietxtil co, laa mendox bzëëb zdoe Judas. Dzigo rëbchaa Jesús lo Judas:

—Mine no guic luu gun luu, na zeen nawdzegazh beëna.

²⁸⁻³⁰ Zigne blozh dow Judas quietxtil co, lëëled brieë Judas ley; pcowle liuw.

Lo grë no ne zioobnie no me lo mezh ga, ni tib no biend pe nacne sca rëb me lo Judas. No zho nan bod no pe ncuane rquiin lo lni co, rxeel me Judas tsiesi Judas, o nogaa pa tsiesan Judas palal dimi lo grë zha ne guiend pe yquiin; sac Judas nac zha ne ngotsow bziuud win ne no dimi.

³¹ Gonse Jesús laa Judas brieey ley, dzigo nëchaa me lo no:

—Niina nagon bdziñ dze zeene glu ganle zha nroobtaa guieñdzon ne rap Mgui ne pxeel Dios, ni ga glu ganle pa lotaa nac guieñdzon ne rap Dios. ³²Ni scaque Dios, zlu me ganle pa lotaa nac guieñdzon ne rap Mgui ne pxeel me ga. ³³Xin yeena, ¡zhile cuëz naa lo to nu! Squiaguib to naa, per zigne rep naa lo grë zha Israel co, laaw rneque naa lo to niina: Grieelod sēnal to zaatne ga naa. ³⁴Gane laa naa rsan tib diidz cub rii, ni laa naa rnabey to gun tow: Tib tib to, golleynie zha ne nacgrë to, golangtsi zho. Zigne rleyne naa to, sca golleynie zho. ³⁵Zeene gan miech, ne nligaa dib zdoos to rleyne to samiech to, dzigo zien zho xpëëdsuel naa nac to.

Ible ziaB Pedr runbeyd Pedr Jesús

(Mt. 26:31-35;

Mr. 14:27-31; Lc. 22:31-34)

³⁶ Dzigo bnabdiidz Pedr lo Jesús, rëb Pedr:

—Maestro, ¿pa dzigo nac zaatne tsie lloo?

Dzigo rëbchaa me:

—Zaatne ga naa, grieelod sēnal lloo niinagazh; per ib laa lloo no guiaadnal.

³⁷ Pquiab Pedr, rëb Pedr:

—¿Per pe nacne grieelod sēnal naa zhits lloo niina? ¡Sēnal naa zhits lloo gon, niicxe maase gut zho naa waa!

³⁸ Dzigo rëbchaa me:

—¿Goon csaand lloo naa ye Pedr, niicle gut zho lloo? Nlid ga gon. Gneli naa lo

luu ganle, zeene laa gall ycuedz tsonle vuelt rëb lloo runbeyd lloo naa.

Niapse por Jesús gdziñ miech lo Dios

14 ¹Tsode to zhgab, tsode to guieñe. Tiblique golgun guic to, zigne dib zdoos to riladz to Dios, scaque dib zdoos to golliladz cho nac naa. ²Golgona ganle: Zaatne nac lidz Pxoos naa, ndaldoo zaatne cuëz miech no ga, tel niaca mine guiend zaatne cuëz to, nile naaw lo to na. Gacxe waa, niina laa naa ga, gaxhixcuaa naa zaatne cuëz to ga. ³Ni zeene lozh gzhixcuaa naa zaatne cuëz to, hor co laa naa gbire guial stib, dzigosi laa to sēnal zhits naa; zeena tibaque zaatne gbiaaz ne. ⁴Laa to nanle nasca pa lo ga naa, ni nanlegaa to nëz ne.

⁵ Pquiab Mazh rëb Mazh lo me:

—Maestro, pelee nëz na gacndion no, ni per ni zaatne tsie lloo ndiond no.

⁶ Dzigo rëbchaa Jesús:

—Naa nac nëz co, naa rseed miech mine nac diidzli, ni naa rded tib guieñmban ndzon ne ib gdziñd dze lozh. Lo grëse miech, zha ne gliladz cho nac naa, zha co gdziñ lo Pxoos naa; guieñdraa stib mod ne gdziñ zho lo me. ⁷Telne runbey to naa, dzigo runbeya que to Pxoos naa. Ni runbeylegaa to me, sac tibaque ran to me.

⁸ Dzigo rëbchaa Lip lo me:

—Bzhiguieñ mazd blu Pxoos lloo lo no. Totsaque dzian no me, lëëlew ga dzigo.

⁹ Pquiab Jesús, rëb me:

—Blactaale dze ga name Lip no naa lo to, ni gardaque ye gunbey lloo naa. ¡Grëse zha ne ran naa, lëëque Pxoos naa ga ran zho! ¿Zha nac dzigo ne racladz lloo glu naa me lo to? ¹⁰ ¿Niacxe riladzd lloo dzigo ne tibaque nac no grop no Pxoos naa? Grëse mine rseed naa to, led guicd naa riaba; grëse ncuane run naa, me rnabeya, me runa sac tibaque nac no grop no me. ¹¹ Golliladz sca ne tibaque nac no grop no Pxoos naa. Telne goon

rliladzdgaa tow zigne rnee naa lo to nu, siquier lo grë dziin ne nodziuun no, ga golgan ganle ne nli tibaque nac no grop no me.

¹²Ne nligaa, gneli naa lo to ganle: Grëse zha ne rliladz cho nac naa, ye zho zun zho grë milagr ne run naa, ni haxta nroobraa ncuuaane gun zho; sac tel naa, laa naa no guia zaatne no Pxoza naa. ¹³Ncuuaane gnabtaa to lo Pxoza naa, totsaque glu to ne nli rliladz to naa, zun naaw; zeena ga gan miech ganle me nac men ne mazdraa nroob, me nac men ne mazdraa non. ¹⁴Ne nligaa, telne rnalo to naa, ncuuaane gnabtaa to zun naaw.

Sxeel Jesús Espiritu Sant

¹⁵Telne nli rleynie to naa, golgun grë mine rnabey naa to sca. ¹⁶Scagaa naa, laa naa gnab lo Pxoza naa cxeel me tib men ne tibaque gacniën to, tibaque cchoobladz zdoo to; ib gdziind dze ne csaan me to. ¡Lëë men co ga nac Espiritu Sant, men ne rlu pa min nac didzli; ni ible sxeel Pxoza naa me! ¹⁷Zha ne ngabd xnëz naa, grielod ycaania zho me, sac rand zho me niicle runbeyd zho me; sangue to, runbey to me sac me quianap to niina, ni zbëzga me zdoo to.

¹⁸Ib csaanladzd naa to, zbire naa guial naa lo to stib. ¹⁹Nli zhilew, zeene gandraa grë miech naa, sangue to gon bii zan to naa; sac zriebaana naa, ni scaquegaa to zgaa to tib guielmban ndzon ne gdziind dze lozh. ²⁰Gal dze co, zeene gan to laa naa grieban, ga gliladz to ganle ne nli tibaque nac no grop no Pxoza naa, zigne tibaque nacie naa to ni naciegaa to naa. ²¹Zha ne runbey zha nac grë mine rnabey naa, ni rban zhow zigne naca, ga rlu ne nli rleynie zho naa; ni zigne rleynie zho naa, scaque Pxoza naa zleynie me zho; niicle naagaaw zleynie naa zho, ni zlu naa lo zho ganle cho nac naa.

²²Dzigo pquiab Judas (zhaa Judas Iscariot), rëb Judas lo me:

—¿Pe nac waa lose no glu luu cho nac luu? ¿Telzhe grëraa miech waa?

²³Pquiab me rëb me:

—Zha ne run mine rnabey naa, lo zha co glu naa cho nac naa; sac rlu zho ne nli rleynie zho naa. Ni haxta ziaad no grop no Pxoza naa gbannie no zho; sac zigne rleynie zho naa, scaque zleynie me zho. ²⁴Sangue zha ne run mine rnabey naa, ¿zha dien glu naa lo zho cho nac naa? Sac rlu rleynie zho naa. Golsoladz ganle: grëse diidz ne ron to rne naa, led guicd naa riaba, xtiidz Pxoza naaw. ²⁵Laa naa rne grë min rii, laga bii zo naa lo to nu, ²⁶per zeene laa Pxoza naa cxeel Espiritu Sant men ne guiaad cchoobladz zdoo to (men co guiaad xcuent naa), men co lozh cseed to, ni guncsoladz me to grëse mine bne naa lo to.

²⁷Laa naa guia, per laa naa rsan tib guielbley zdoo to, zeena zigne tibiladz rac zdoo naa, scaque tibiladz gac zdoo to. Sac guielbley ne rnedz naa lo to nu, nacda zig nac guielbley ne runbey grëraa miech guidzliu rii. Tsode to zhgab sca, niicle gdziebde to. ²⁸Laa to binle ganle, laa naa no guia lo Pxoza naa per zbire naa guial naa lo to stib. Telne nli rleynie to naa ine nley golgac, niina ne ron to laa naa guia lo me, sac gon men nroobraa nac me lo naa. ²⁹Laa naa rne grë min rii lo to niina, zeena zeene gaca, ga lozh guien to ganle cho nac naa.

³⁰Led nroobdraa sodiidznie naa to, sac ile ziaad mendox, men ne rnabey lo guidzliu rii. Peet grielod gun mendox naa, ³¹per ible none gon naa xtiidz Pxoza naa men ne pxeel naa, zeena gan miech ganle ne nli rleynie naa me. ¡Golsieso nasca, zeena zio ne!

Jesús nac zig tib lbë uv

15 Naa nac zig tib zhan lbë uv, laa to nac zhicwa, laa Pxoza naa nac

zig tib zha ne quianapa. ²Grëse zhiw lbë co mine rquiad nex lo, rchug mew; laa grë mine rquia nex lo, ine rsanmbe me low, rbelaan me low zeena yquiaraa nex low.

³Zig nac to gon, laa Dios psanmbele to sacne zienal to grë xtidz naa mine pseed naa to. ⁴Gbichede to lo naa sca, sinque tibaque golgacnie naa zigne nacie naa to. Golgan ganle, zig nac tib zhiw lbë uv, peet nex grielod yquia low telne tibnëzle nixa; scaquegaa to nagon, grielod gun to grë ncuaane rdziladz naa, telne nacie to naa. ⁵Golsoladz ganle: Naa nac zig nac lbë co, laa to nac zhiw. Zha ne tibaque gacnie naa, grëse ncuaane gun zho zdziladz Dios; ⁶sac tel piche zho lo naa, laa zho nacle zig tib zhiw lbë co mine nixle tib nëz, laaw nixle ga, ga gbidza; lozh ga laaw tsec. ⁷Telne tibaque gacnie to naa, ni tibaque tsoxco to grë mine pseed naa to, dzigosi ncuaane gacladztaa to golnaba, ni scagaa scaania tow.

⁸Gollu sca ne nli xpëedscuel naa nac to, golsannon Pxoza naa, niapse ncuaane rdziladz me min co golgun.

⁹Ne nligaa rleyniedox naa to. Golwi ganle, zigne rleynie Pxoza naa naa, scaque rleynie naa to. Golguien sca tibaque golgun mine rnabey naa. ¹⁰Sac gon, zha ne gun mine rnabey naa, gzataa dze zleynie naa zho; sac sca rleynie Pxoza naa naa ne run naa mine rnabey me. ¹¹Laa naa rzet min rii lo to, zeena guiaad tib guielbley zdo to. Ne nligaa, zeena guiaad tib guielbley nroob zdo to; ni naa gnedz guielbley co lo to.

¹²Laa naa rnabey to, laa naa rnab lo to: ¡Golleynie samiech to, zigne rleynie naa to! Tel naa, golguien ganle pa lotaa rleynie naa to, ¹³sac led lega gdeedse tib zha xquielmban zho par csilaa zho samiech zho, sinque ga rlu zho ganle pa lotaa rleynie zho zho.

¹⁴Ni to gon, telne gon to grë mine rne naa lo to, dzigosi nli rleynie to naa. ¹⁵Led yedraa niina nac to zig tib ngundziin, sac zha ne nac ngundziin nand zho pe run men ne rnabey zho. Ne nligaa rleynie naa to, sac grëse mine rnabey Pxoza naa, grëse zigne rnee me, laaw bzodiidzle naa lo to. ¹⁶Golguien ganle, led tod gon bzooblo naa, sinque, jnaa bzooblo to! Ni laa naa bzooblo to zeena gun to niapse ncuaane rdziladz Dios; dzigosi ncuaane gnabtaa to lo Pxoza naa, ne nac to zha ne no xnëz naa, zneedz mew. ¹⁷Laa naa rso diidz lo to: Golleynie samiech to. ¹⁸Niicle rlëe zho ran zho to, golsoladz ganle, desde naa squi rlëe zho ran zho. ¹⁹Rlëe zho ran zho to, sac laa naa bleele to lad zho, zienal draa to ncuaane rleynie zho; laa telne nagon bii nac to zigne nac zho, dzigosi zëeb gleynie zho to. ²⁰Golsoladz ganle, zeene znu ni naa lo to: ¡Tsod ngundziin ne ndziibsráa non lo zha ne rnabey zho! Tel naa, pquiana miech naa, ¿pe lel to dzigo gandze zho? Nana, zigne brieequiagaa palal zha ne bliladz xtidz naa, scaque zrieequia zha ne yquiaadiag mine gnee to.

²¹Ible squiana miech to ne nac to zha ne ngab xnëz naa, sac runbeyd zho Dios men ne pxeel naa. ²²Tel niaca mine niald naa, niicle ned naa lo zho, zac guiab ne peet xtold zho, sac riend zho pe run zho. Per na gon, guiend pe yquiaaqui zho; sac bial naa bne naa lo zho. ²³Zha ne rlëe ran zho naa, yele Pxoza naa ga rlëenie zho. ²⁴Ne nligaa telne niaca mine niand zho grëtaa milagr nroob ne run naa, zac guiap naa peet xtold zho; per na gon, blactaa milagr ne gon zho ben naa, ni laa zho bii rlëe ran zho no grop no Pxoza naa. ²⁵I nagon norieequia mine raquiet lo Xtiidz Dios, zaatne znu rnee: “Peet guielntseeb quiaayund naa lo zho, per rlëenie zho naa.”

²⁶Laa naa nile lo to ganle, ible sxel naa Espiritu Sant gacnie to, niapse diidzli rnee me. Lo Pxoꝝ naa griece me guiaad me, me cchoobladz zdoo to, ni me gneedz guielbiini lo to lozh guien to cho nac naa. ²⁷Ni scagaa to, ye to laa to none sodiidz lo grëraa miech gacnañ zho cho nac naa; sac gon tibaque bzënie to naa desce ne psilo naa xtsin naa.

16 ¹Laa naa rne grë min rii lo to zeena peet tsienied guic to, tibaque dib zdoo to gnalo to naa. ²Sac gon zunxoon zho to, zbee zho to yadoo; ni zdzin dze haxta zut zho to, sac masaque sac zho lëë mine racladz Dios ga noyun zho. ³Laa zho gun grë min co, sac niicle Pxoꝝ naaw, niiclegaa naaw, runbeyd zho no.

⁴Laa naa rzodiidz grë min rii niina, zeena zeene gal dze ne laaw noyac, csoladz to ganle grësew bzodiidzle naaw lo to. Bzodiidzd naaw lo to glo, sacne hor co laa naa bii zo lo to. ⁵Laa niina nagon laa naa gbiche lo to, laa naa gbire guia lo men ne pxeel naa, per ran naa ni tib to zienied guic gnabdiidz dien pa nac zatne ga naa, dien pe nacgaa ne laa naa ga. ⁶Lëë gdib mine run to, riab guielnë to ron to grë mine rne naa nu.

⁷Gneli naa lo to ganle: Mazd wen gon tsie to zeene laa naa guia lo men ne pxeel naa, sac telne cuëz naa nu, grieelod guiaad men ne guiadchoobladz zdoo to ga. Sanguie telne guia naa, dzigo naazhal cxel me. ⁸Ni zeene laa me guiaad, me gunquien miech ganle grëse zho zha ngoopdol nac zho, me gunquien zho zha laa zho lo dol co guiaanwen zho lo Dios, ni guien zho ne nli zdzin tib dze zeene laa Dios gun xquielwxtis me. ⁹¿Pe nacne nac zho miech ngoopdol? Miech ngoopdol nac zho, sacne rililadz zho cho nac naa. ¹⁰¿Zha grielo laa zho lo dol co guiaanwen zho lo Dios? Zrieelow, mincocxe waa nacne bial naa, ni na laa naa guia zaatne zob Pxoꝝ naa, gandraa to

naa. ¹¹¿Zha rlu ne nli zun Dios guielwxtis? Nli zun mew, sac gon laa me bnabeyle zha nac grë guielnëdox ne ygaa mendox, men ne quianabey lo guidzliu rii.

¹²¿Nzianraa ncuaane racladz naa sodiidz naa lo to! Per rien naa grieelod tsoguic to zha naca niina. ¹³Zeene guiaad Espiritu Sant, me gneedz guielbiini lo to guien to grëraa ncuaane no gacnañ to, ni grëgaa ncuaane naraa gac. Niapse diidzli gnee me, sac led guicd me guiab grë mine gnee me, sinque mine nac xtiidz Pxoꝝ naa, min co gnee me. ¹⁴Ga glu me lo miech ganle ne nli men nroob, men non nac naa. ¹⁵Rne naa ga glu me, sac grëtaa ncuaane rnabey Pxoꝝ naa, yeque naa rnabeya. ¹⁶Zhilew zeene laa naa gbiche lo to gandraa to naa; per gacdaquew xtse zeene laa to gbiirelaque gan naa stib.

¹⁷⁻¹⁸Zeene bdzion no sca rnee me, blalaa no psilo no rnabdiidzlsa no rnee no:

—¿Bay zha nacne squi rnee me? ¿Zha nacne rnee me, zhilew dziandraa ne me, per gacdaquew xtse laa ne dzianlaque lo me stib? Ni rneeque me laa me guey lo Pxoꝝ me.

¹⁹Bien me racladz no gnabdiidz no lo me, dzigo në me lo no:

—¿Racladz to lëë gacnañ to zha nacne znu rne naa? ²⁰Golquiaadiaga sca ganle: Zeene gdzin dze co, laga noyoon to no to guielnë ne laa naa biche lo to, laa grëraa miech haxta zley zho ne laa naa wbiche lo zho. Nli nroob guielnë ne tso to, per zeene laa to gan naa stib, guielbley nroob ne tso to. ²¹Nac cuent rii zig rzac tib men wnaa ne ral xpëed. Glo yoob ro, yoobdox ne rquia me, per deque laa mëed co ralse, ni rsoladzdraa me yoob co; sac mazdraa nroob nac guielbley ne rio me ran me laa xpëed me blanso lo guidzliu. ²²Scadaa nagon rzac to, nli mban rac to niina, per zeene laa to gan

naa stib, dzigosi tib guie|bley nroob ne tso to, ni choot grieelod ctiche guie|bley co lo to.

²³Zeene gal dze co, yquiindraa to pe gnabdiidz to lo naa. Ncuuaane gnabtaa to, lo Pxo^z naa gnab tow, ni zneedz mew, sac xnëz naa ngab to. ²⁴Haxta lo nadze peet gard gnab to, niicle ne xnëz naa ngab to; laa niina laa naa rne lo to ncuuaane rquiin to golnaba lo me, ni ible zneedz mew gon. Nroob guie|bley ne tso to hor co. ²⁵Nzian grë ncuuaane zine naa lo to, rned naaw clar; per laa dze bdziñ zeene grëse ncuuaane gne naa, clar gne naaw lo to, zig nac zeene gzet naa Pxo^z naa. ²⁶Ni zig nile naa ga, hor cosi ncuuaane gnabtaa to lo me, zneedz mew, sac xnëz naa ngab to. Yquiindpaa gne naa lo me gneedz me ncuuaane gnab to lo me, ²⁷sac ye me rleyne me to. Rleyne me to, sac gon rleyne to naa ni riladz to ne nli lo me brie naa bial naa lo guidzliu. ²⁸Ni nligaa, lo me brie naa bial naa lo guidzliu; ni niina ne laa naa gbi, loque me gdziñ naa.

²⁹Dzigo rdzieets no lo me:

—iNasi nagon rien no zha rnee luu! Sac clar rnee luu, rneedraa luu zigne rnee luu glo. ³⁰Nasi rien no grëse ncuuaane nan luu, sac zig nac niina pquiindpaa nabdiidz no lo luu. Gacxe waa, nasi nagon riladz no ne nli lo Dios brie luu.

³¹Pquiab me, në me:

—iWen ga telne riladz to niina cho nac naa! ³²Per lëe hor co nagon bdziñ; ni niina, grëse to laa to csaan naa, tib tib to zhaase zhaase nëz ne xen to. Per guiaand naa loxaque naase, sac tibaque nacie Pxo^z naa naa. ³³Grëse ncuuaane bne naa lo to nu, laaw bne naa zeena peet tsienied guic to, benque nanle to ganle tibaque nacie naa to. Parga nli, laga no to lo guidzliu rii, nzian grë guie|në ne ted to, per gdziebde to; sac

gon naa rnabey, ladznia naa no grëtaa ncuuaane no lo guidzliu.

Rnab Jesús gacniē Dios xpëedscuel me

17 Blozhse sca në me lo no, blis lo me bui me nëz gbaa.

—Dios, luu ne nac luu Pxo^z naa —rëb me—, niina nagon laa dze co bdziñ. Blu ganle men nroob nac naa ne nac naa Xpëed luu, zeena ga glu naa lo miech ganle pa lotaa men nroob nac luu. ²Zigne psan luu grëse miech ladznia naa, ni gdeed naa tib guie|mban ndzon ne gdziñd dze lozh lo grëse zha ne bneedz luu ngab xnëz naa; scaque niina blu ganle men nroob nac naa. ³Lëe guie|mban co yгаа grëse zha ne gunbey luu, ne nli luuse nac Dios nguia mban, ni guien zho cho nac naa, ne pxeel luu naa bial naa lo guidzliu rii. ⁴Grëse ncuuaane bnabey luu naa, laaw noyun naa; ni garlu naa lo grë miech rii ganle pa lotaa men nroob nac luu. ⁵Scagaa luu ne nac luu Pxo^z naa, niina ne laa naa glanso lo luu, blu ganle men nroob nac naa; sac desde mazd glo zeene gard tsaа grëtaa ncuuaane no, tibaque nac lo guie|ndzon ne bdzio ne haxta dze ne blanso naa lo guidzliu rii.

⁶Grëse zha ne ble luu lad grë miech rii bneedz luu lo naa, laa naa pseed zho gunbey zho luu; ni scagaa zha, bliladz zho xtiidz luu. Chen luu zho per laa luu bneedz zho lo naa. ⁷Zig nac niina, grëse ncuuaane bneedz luu lo naa, nanle zho ne luu bneedza, ⁸sac pseed naa zho grëse wseed ne bneedz luu lo naa, ni bliladz zhow. Wen wen gocnan zho ne lo luu i brie naa zial naa lo guidzliu rii, ni riladz zho ne luu pxeel naa. ⁹Laa naa rnab lo luu gacniē luu zho. Rnabd naa par grëse miech guidzliu rii, sinque laa naa rnab por grë zha ne bneedz luu lo naa; sac gon chen luu zho, ¹⁰ni zha glu ganle pa lotaa men nroob nac naa. Grëse zho chen

luu zho; sac grëse ncuuaane nacchen naa, chen luuw; ni grësegaa ncuuaane nacchen luu, chen naaw. ¹¹Rien naa, led nroob-draa cuëz naa lo guidzliu rii, laa naa gbile guial naa lo luu i; per zha, laa zho guiaanaque nu. Gane niina, luu ne nac luu Pxoaz naa, luu ne nac luu tib men ne guiend xtol, laa naa rnab lo luu: pquianap zho ne nac zho zha ne bneedz luu lo naa, zeena ni tib zho nitlod, sinque tibaque gac zho gza zho zigne tibaque nacne grop ne. ¹²Len dze ne blëz naa lo zho nu, zigne racladz luu sca pquianaap naa zho. Ni scagaa ni tib zho bnitlod; zha ne bnitlo ga, nole ne sca nitlo zho, zeena sca grieequia mine raquiet lo Xtiidz luu.

¹³Zhilew laa naa glanso zaatne no luu i; per len dze ne blëz naa lo zho nu, nzian grë ncuuaane bne naa lo zho, zeena ye zho tso guielbley nroob ne no naa. ¹⁴Pseed naa zho mine nac xtiidz luu; per na rlëë grëraa miech ran zho zho, sacne zienal-draa zho grë ncuuaane ndzinlid ne rac lo guidzliu rii. Nac zho zigne nac naa, rleynie naa grë ncuuaan co. ¹⁵Per rnabd naa cuee luu zho lo guidzliu rii, sinque laa naa rnab csaand luu gun zho ncuuaane racladz mendox. ¹⁶Sac niicle zhaw, niicle naaw, choot zionald grë ncuuaane ndzinlid ne rac lo guidzliu rii. ¹⁷Bzhiguiel sca bdeed guielbiini lo zho guien zho zha nac Xtiidz luu, sac Xtiidz luu nac diidzli; zeena dib zdoo zho tsoxco zho gban zho zigne rnabey luu. ¹⁸Sac gon, niina laa naa rxel zho lo grëraa miech guidzliu rii, zigne ne pxeelaque luu naa. ¹⁹Ni niina, dib zdoo naa laa naa gun mine rnabey luu, zeena ye zho guien zho none dib zdoo zho gun zho mine rnabey luu.

Rnab Jesús por grë zha ne yabraa xnëz me

²⁰Laa naa rnab gacniën luu zho, ni gacniën luu zha ne naraa gliladz naa, zeene laa zho tsieseed zho; ²¹zeena

tibaque gac zho, zigne tibaque nac ne grop ne. Ni scaquegaa gacnie zho ne, zeena gliladz grëraa miech ganle ne nli luu pxeel naa. ²²Laa naa psannon zho zigne psannonaque luu naa, ni tipse gac zho zigne tibaque nac ne grop ne. ²³Zigne nacnie luu naa, scaque nacnie naa zho. Bzhiguiel gocniën zho, tibaque gac zho grëse zho, zeena gan grëraa miech ganle ne nli luu pxeel naa, ni guien zho ganle zigne rleynie luu naa, scaque tibaque rleynie luu grëse zha ne ngab lo naa. ²⁴Papá, grëse zha ne bneedz luu lo naa nu, racladz naa ye zho guiaad zaatne glanso naa i, zeena gan zho lo grëtaa guielndzon ne no naa. Lo guielndzon ne bneedz luu lo naa, sac rleynietaque luu naa haxta zeene gard tsaan guidzliu.

²⁵Papá, luuse nac men ne rapd ni tib dol, niicle ne runbeyd grë miech rii luu, sangue naa runbey naa luu; ni scaquegaa grë zha ne bneedz luu lo naa nu, nanle zho ne luu pxeel naa. ²⁶Laa naa pseedle zho gocnan zho cho nac luu ni bii se-dragaa naa zho, guien zho ganle pa lotaa rleynie luu naa; zeena scaque guien zho gleynie zho samiech zho, ni gacnie zho naa.

Bnaaz zho Jesús

(Mt. 26:47-58; Mr. 14:43-50,
53-54; Lc. 22:47-54)

18 Zeene blozh bnab Jesús lo Dios, laa me brieenie no ga bdieedquia no nëz dan ro psë ne rnee zho Psë Cedrón. Ga no tib zaatne zëëb niapse yag nex, dzigo ga bliiaz no gza no me.

²Judas zha ne pto me ga, wen wen runbey Judas lugar co, sac nzian vuelz ziyenie me no ga. ³Dzigo zeene laa Judas blanso ga, laa Judas blansoniele tib dzoön menguiib, ni zla zha ne rquianap yadoo; no guierbel nia zho blanso zho ga, zha ne nzhen yag, zha ne nzhengaa spad. (Lëë grë zha co pxeel grë pxoaz rn-

abey, ni grë zha farisé.)⁴ Loxaque blanso zho, laa Jesús brieequiale, rëb me lo zho:

—¿Cho rguib to?

Sca rëb me sac rienle me pe nacne zie zho ga, nanle me pe nac grëtaa ncuaaane ted me.

⁵ Pquiab zho, rëb zho:

—Men Nazaret ne lë Jesús, men co ziaadguib no.

Dzigo rëb me:

—Naa nac men co, tel me ziaadguib to.

⁶ Zeene bin zho rëb me: “Naa nac men co”, wbiire rzhitsaque zho, grëse zho biab liu. Ye Judas no lad co. ⁷ Wbiire Jesús bnabdiidz me lo zho, rëb me:

—¿Cho zho rguib to?

Pquiab zho rëb zho:

—Men Nazaret ne lë Jesús, men co rguib no.

⁸ —Laa naa nile lo to —rëb me—. Naa nac men co. Telne naa ziaadguib to, golsaan sca guey grë zha ne zo lo naa nu.

⁹ Ga brieequia xtiidz me zeene rëb me: “Lo grë zha ne bneedz luu lo naa, ni tib zho bnitlod.”

¹⁰ Laa Simón ney tib spad, hor co bdobaque Simón spad co psilaa me tib niaw, bliengaa me diag derech tib mgui lë Malcw. (Lëe mgui co quia xtsiin men ne nac pxoz nroob.) ¹¹ Zeene gon Jesús, rëbcha me:

—¡Blootsow spad qui Pedr! ¡Bien ganle Pxoza naa rnabey znu teed naa! ¿Niacxe gond naa mine rnabey me naa dzigo?

¹² Horco laa grë menguiib co, grë zho zha ne rnabey lo zho, ni grë zha ne rquianap yadoo ga, laa zho wbigbe bnaaz zho me. Blozhse bzobdoo zho me, laa zho zienie me.

¹³ Sca nzobdoo me, laa zho bdzinnie me lidz men ne lë Anás, pxozdzoop Caifás. Caifás nac pxoz nroob len iz co, ¹⁴ ni me ga rëb lo grë men non lo zha Is-

rael, ne mazd wena tibaque zha ne ygaaguet, quizh zho par dib guiedz.

Rëb Pedr runbeyd Pedr Jesús

(Mt. 26:69-70;

Mr. 14:66-68; Lc. 22:55-57)

¹⁵ Zhiits co, ga naļ no grop no Pedr. Ni ne runbey naa Caifás men ne nac pxoz nroob ga, zeene bdzin no ro lidz Anás, loxaque naa brieelo bzëeb nëz ley. ¹⁶ Laa Pedr, zaatne nactaa ro yu par dzin zatne nac ley, gataa biaan Pedr. Nacne brique naa bnee naa lo wnaa ne zonap ro yu, dzigora bdeed wnaa co diidz bzëeb Pedr. ¹⁷ Dzigo rëbcha me lo Pedr:

—¿Bod ye luu dzigo lëe nac xpëedscuel men ne bdzinnie zho i?

—Coo, led yed naa —rëb Pedr.

¹⁸ Grë zha ne quia xtsiin men co ni grë menguiib ne ndxie ga, laa zho bzëegle gui. Grëse zho, laa zho ndxiedzë lo gui ga, sac rac naļ. Ye Pedr bdzin lo zho ga nodzë Pedr.

Rquiep Anás Jesús

(Mt. 26:59-66;

Mr. 14:55-64; Lc. 22:66-71)

¹⁹ Laa nëz len yu, laa Anás psilo noquiep Jesús dien yo grë xpëedscuel me, ni dien pe nac grë wseed ne nolu me lo miech. ²⁰ Dzigo pquiab Jesús, rëb me:

—Grëse miech, nanwen zho ganle pe nac zhiwseed naa. Sac zeene pseed naa zho, bend naa ne ngeets zhliaan nseed naa zho; sinque zaatne rcaalsa nzian miech, ga bne naa lo zho. No hor pseed naa zho len grë yadoo win, nogaa hor pseed naa zho len yadoo nroob ne zob lad guiedz nu. ²¹ Nana bod rieguialda ne lo naa rnabdiidz luu. Mazd lo grë zha co ganle bnabdiidz, zha bin grëtaa ncuaaane bne naa.

²² Loxaque blozh sca pquiab Jesús, zeene bias tib menguiib ne rquianap yadoo zo gax ga, bdap me lo Jesús.

—¡Bien ganle! —rëb me—. ¡Led squid gon none yquiab luu lo men ne nac pxoz nroob!

²³ Dzigo rëbchaa Jesús:

—Telne rzac luu ben naa falt, bnë dien pe nac diidz ne pxin naa. ¿Te wal rdziladz luu ye, rguin luu zha ne rnee diidzli?

²⁴ Blozh ga scaque nzobdoo Jesús px-eel Anás me lo Caifás, men ne nac pxoz nroob.

Rnee Pedr stib runbeyd Pedr Jesús

(Mt. 26:71-75;

Mr. 14:69-72; Lc. 22:58-62)

²⁵ Horco laa Pedr bii zodzëeque lo gui nëz ley. Dzigo wbiire zho bnabdiidz zho lo Pedr, rëb zho:

—¿Bod xpëedscuel men ne blansonie zho i lëe nac luu?

Laane neeli Pedr, leḷ pquiab Pedr rëb Pedr:

—¡Lëda! ¡Zha gaczhe naa xpëedscuel men qui!

²⁶ Ye tib zhalidz Malcw, zha ne pchug Pedr diag ga, laa zho zodzëe lo gui ga, sac ye zho quia xtsiin pxoz nroob co; dzigo rëbchaa zho:

—Ni gon naa name, ye luu no lad zha ne zonie me len yag oliv ga.

²⁷ Wbiire Pedr rëb Pedr runbeyd Pedr me, ni lëëtaque hor co laa tib gall pucedz.

Güeynie zho Jesús lo Pilat

(Mt. 27:1-2, 11-14;

Mr. 15:1-5; Lc. 23:1-5)

²⁸ Ziadyiinile liuw, zeene laa zho brienie Jesús lidz Caifás, zienie zho me zaatne nac xyulow Pilat, men ne nac gobernador. Zeene bdzin zho, ni tib zho bzëëbd len yulow, sac racladzd zho qui-its zho mine rnabey xley lay zho; parne grieelo yquiin zho guielwagw ne row zho lni Pascw co. ²⁹ Nacne briece Pilat bnabdiidz Pilat lo zho, rëb Pilat:

—¿Pe nacne ziaadnie to men qui nu? ¿Pe rquiaqui to me?

³⁰ Pquiab zho, rëb zho:

—¡Por grëtaa guielntseeb ne noyun me, gane ziaadnie no me! ¡Telne niac me men ndzinli, niacxe lega guiaad-zo no me lo luu!

³¹ Dzigo rëbchaa Pilat:

—Golšënie me, tose golgunquizh me mine been me; zigne nac xley to.

—Racladz no guetgazh me —rëb zho—. Ni nanle luu ganle, no ne nac no men Israel, grieelod ne nose gnabey guet tib miech.

³² Ga brieequia mine bnee Jesús, zeene bzeet me ible zut miech me. ³³ Dzigo bzëëb Pilat len yulow, bnabey me go-credz Jesús. Dzigo bnabdiidz me lo Jesús, rëb me:

—¿Pe nli luu nac zhirey men Israel?

³⁴ —Ne squi rnee luu —rëb Jesús—. ¿Pe guic luu biaba, te no cho nëw lo luu ye?

³⁵ Pquiab Pilat, rëb Pilat:

—Nanle luu ganle led zha Israeld naa. ¿Pe nac sca ne ziaadnie zho luu nu? ¿Pe been luu? Sac gon zha ladzaque luu grë zho zha ne rnabey lo zhipxoz zho, zha biaadsan luu nu.

³⁶ Dzigo rëbchaa Jesús:

—Nli rey nac naa, per led lo guidzliu riida, telne niaca mine lo guidzliu riw, dzigosi grëse zha ne nacnie naa niacntseeb zho, nsaand zho naaz zha Israel naa. Per na, zhaa zaatne nac naa rey.

³⁷ Pquiab Pilat, rëb Pilat:

—¿Rey luu dzigo lëe?

—Scaw gon —rëb Jesús—, nli rey naa; zigne rnee luu i. Ible min co nacne bial naa gol naa lo guidzliu rii, ni bial naa bialseed naa miech gunbey zho mine nac diidzli. Ni zha ne zienal mine nac diidzli, zha co ngab lo naa.

³⁸ —¿Diidzli ye? —rëb Pilat.

Bnabey Pilat tsiegut zho Jesús

(Mt. 27:15-31;

Mr. 15:6-20; Lc. 23:13-25)

Zigne blozh sca rëb Pilat, briece Pilat ga güeynee Pilat lo grë zha ne bdzinnie me ga, rëb Pilat lo zho:

—Ni tib doļ gon rapd meņ rii. ³⁹Per gzobse lni Pascw rii, rnab to rlaa cholze tib zha ne no ladzguiib. ¿Pe gnë to sca, mazd csilaa naa meņ ne nac zhirey to nu?

⁴⁰Pquiabbe zho, rëb zho:

—¿Csilaad luu me! ¡Mazd psilaa Barrabás!

Ni laa Barrabás tib ngbaan nac Barrabás.

19 Zeene gon Pilat sca rac zho, dzigo bnabey Pilat bla menguiib, bdeed dooguid zho Jesús. ²Bzieecw zho bla lë yag guiets bzoob zho guic me, ni bgacw zho me tib lë lar nizhnie nlaan. ³Dzigo psilo zho runnguzee zho me, nguiedz roptsie zho rnee zho:

—¡Bley na ganle, laa luu nacle zhirey zha Israel!

Ni rgap zho lo me.

⁴Wbiire Pilat briecequia Pilat zaatne ndxie grë miech co, rëb Pilat lo zho:

—Golwi ganle laa naa cuee me, glu naa me lo to, per gacnaņ to ganle rieguald guet me; laa naa pquieple me rlu ni tib guiełntseeb beend me.

⁵Zeene laa Jesús briecequia, nzobguicse me coron yag guiets co, ni nacw me lar nizhnie co.

—Golwi na ganle —rëb Pilat—, lëe me nu.

⁶Grë pxoz ne rnabey, ni grë menguiib ne rquianap yadoo, zeene gon zho me, psilo zho nguiedz roptsie zho rnee zho:

—¡None guet me! ¡Bnabey yquia me lo cruz!

Dzigo rëbchaa Pilat:

—¡Goltsienie me sca! ¡To golquiaa me lo cruz! Sangue naa, grielod yquia

naa me lo cruz; sac laa naa gonle peet guiełntseeb beend me.

⁷Pquiab zho rëb zho:

—¡Rdziaap no xley no! Ni ley co rnabey ib none guet me, sac rquidie me rnee me laa me nac Xpëed Dios.

⁸Zeene bin Pilat sca rëb zho, mazdraa bdzieb me. ⁹Dzigo bzëebnie me Jesús leņ yulow stib, bnabdiidz me lo Jesús, rëb me:

—¿Bnë dieņ cho menpaa nac luu? ¿Pa nac ladz luu?

Per ib pquiabd Jesús lo xtiidz Pilat.

¹⁰Dzigo rëb Pilat:

—¿Pe nace rquiabd luu? ¿Gon ganle naa rnabey, zrieelo csilaa naa luu, o gnabeyгаа naa yquiaa luu lo cruz?

¹¹Pquiab Jesús, rëb me:

—Nli luu nac zha rnabey niina, per telne niaca mine needzd Dios guiełrnabey qui lo luu, grielod ne luu gnabey zha gac naa. Mincoxe waa, zhi nac xtoļ luu, mazdraa nac xtoļ zha ne biaadlo naa nia luu.

¹²Dzigo gocladz Pilat nsilaa me Jesús, per bzhiguield grë zha ne güeysaņ me ga.

—Telne laa luu csilaa mgui qui gon —rëb zho—, rriecequia dzigo ye luu rlëenie César. Sac gon, grëse zha ne racladz gac rey, lo César ga racndaan zho.

¹³Zeene bin Pilat sca rëb grë miech co, bnabey Pilat briece Jesús nëz ley stib. Dzigo güeysob Pilat lo xcan ne zo ley co, zaatne rzob me ruņ me guiełwxtis. (Dipse ley co, niapse quie lag now; gane rnee zha Israela Gabata.) ¹⁴Lëe dze vispr lni Pascw co ga nagon, zig grolle dzew noyac grë min co. Dzigo rëb Pilat lo zho:

—Laa zhirey to nu gon. ¡Golsënie me!

¹⁵Psilo zho stib, nguiedz roptsie zho, rnee zho:

—¡Beetgazh meņ qui! ¡Bnabey yquia me lo cruz!

Rëbchaa Pilat:

—Zhirey to nac me, ¿ni racladz to ye gnabey naa yquia me lo cruz?

Pquiabbe grë pxoz ne rnabey rëb zho:

—¡Tibaque men ne nac zhirey no, ni lëë men co nac César!

¹⁶ Dzigotaa mazd laa Pilat bloo Jesús nia zha ne tsiequiaa me lo cruz.

Pquia Jesús lo cruz

(Mt. 27:32-44;

Mr. 15:21-32; Lc. 23:26-43)

¹⁷ Zeene laa Jesús briece ga, rna tib cruz noob ney me; laa zho zienie me. Bdz-
innie zho me ro guiedz, zaatne rnee zho
“Gui Beerguic Ngutoo”; ¹⁸ ga pquiaa zho
me lo cruz. Ni pquiaa zho schop zha
ntseeb, tibga zhiczuz zho bzo cue zhiczuz
me.

¹⁹⁻²⁰ Bnabey Pilat pquia bla lan di-
idz guic zhiczuz me, rneew: “LËË JE-
SUS MEN NAZARET NU, MEN NE NAC
ZHIREY ZHA ISRAEL.” Pquiaw xtiidz
zha Israel, xtiidz zha Roma ni xtiidz zha
Gres. Nzian zha Israel gon sca quia guic
zhiczuz me, sac gaxpaa ro guiedz nac za-
atne pquiaa zho me lo cruz ga. ²¹ Nacne
güey grë pxoz rnabey, güeylisqui zhow
lo Pilat, rëb zho:

—¿Pe nacne pquiaa luu guic zhiczuz
mguic co, ne me nac zhirey zha Israel?
Pe gacd nquiaa luu: “Rnee me, me nac
zhirey zha Israel.”

²² Pquiab Pilat rëb Pilat:

—Mīne pquia naa, laaw pquiale ga. Ni
sca none guiaana.

²³ Laa grë menguiib ne pquiaa Jesús lo
cruz ga, zeene blozh pquiaa zho me lo
cruz, bzhen zho xab me been zhow tap
lë, tib lëgaw biaannie zho tib tib zho. Laa
lar ne rbix me, tiblagaque naca, ndiibda;
²⁴ dzigo rëbchaa zho:

—Minritaa nagon dzuungrold ne.
Mīne naca gotsaa dzio new rif, dzigo zha
ne griequia zha co guiaanniew.

Ga briequia mīne raquiet lo Xtiidz
Dios, zaatne rnee: “Xab naa, mīne racw

naa nzian lë been zhow bgaaza lo zho;
laa mīne rbiix naa, bio zhow rif.” Ni
scadaa been gza menguiib co.

²⁵ Gax zaatne zo zhiczuz Jesús ga, zo
blalaa men wnaa. Ga zo xniaa Jesús, zo
tib bel xniaa me, zo Marí tsiel Cleof,
ni Marí Magdal. ²⁶ Gaxaque ga zo naa.
Zeene gon Jesús xniaa me, ni gon me
naa, rëbchaa me lo xniaa me:

—Been cuent nagon lëë xpëed luu i zo
i.

²⁷ Laa lo naa në me:

—Been cuent lëë xniaa luu i gon.
Bzhiguiel luu gan me.

Dzigo desde dze co, pcaania naa xniaa
me bianie naa me lidz naa, pteedlo naa
me.

Gut Jesús

(Mt. 27:45-56;

Mr. 15:33-41; Lc. 23:44-49)

²⁸ Rienle Jesús ne gataa laa me psiaal
dziin ne pxeel pxoz me me gun me, ni
par griequia grëse zigne rzeet lo Xtiidz
Dios ted me, hor co bredz me rëb me:

—Rnab zhis naa.

²⁹ Gax lo grë menguiib ne quianap me
ga, ga zo tib cant win no nziu bla. Zeene
bin zho sca rëb me, rias tib zho bgadz
zho tib lë zhiil lo nziu co, bzoob zhow
guic tib goobgui nool güeyquiaa zhow ro
me. ³⁰ Zeene bdziñ nziu co ro me, pquiin
me niipa, dzigo rëbchaa me:

—Lëew nagon, nataa laaw bza.

Zeene blozh sca bnee me, znuse
pquianrun guic me; laa me blozh.

³¹ Guini liu co nac tib dze ne mazdraa
nda lo zha Israel. Nacne güey grë zha
ne rnabey lo menguiidz güeynee zho lo
Pilat, gnabey Pilat tsietiits zho gzhibni
Jesús ni zha ne pquiagza me lo cruz ga,
zeena quietgazh zho lo cruz dze co; sac
racladzd zho scaque quia zho lo cruz
zeene laa dze nda co gdziñ.

³² Dzigo pxeel Pilat bla menguiib.
Zeene bdziñ zho, glose güeytiits zho ni

tib zha ne quiagza Jesús lo cruz ga; blozh ga, güeytiitsaque zho ni stib zho. ³³Zeene bdziñ zho zaatne zo zhicruz Jesús, gon zho laa me gutle; nacne bdi-itsd zho ni me.

³⁴Horco wbig tib menguiib co, bliz zho xlanz zho ro xcuxti me. Zeene dbod zho lanz co, nis ne, ren ne briece ga.

³⁵Naazhal gon znu been zho me. Laaw rne naa lo to zigne gocsew. Golliladza, sac ne nligaa diidzliw. ³⁶Ga briecequia miñe raquiet lo Xtiidz Dios, zaatne rnee: “Ni tib dzit ne no me quiitsd zho.” ³⁷Ni stib lugar, zaatne rnee: “Bii zanaque zho ganle cho nac men ne bliz lanz zho ga.”

Bgueets Jesús

(Mt. 27:57-61;

Mr. 15:42-47; Lc. 23:50-56)

³⁸Laa José, tib men Arimaté, zeene bin me laa Jesús gutle, dzigo güey me lo Pilat güeynab me diidzbey par grieelo tsielit me xcuerp Jesús lo cruz. Ye me xpëedscuel Jesús nac me, per pxobnend me ne ye me nacgza Jesús; sacne rdzieb me grë men Israel ne rlëe lo Jesús. Dzigo bdeed Pilat diidzbey.

³⁹Nicodem, men ne güeyzodiidznie Jesús ga tib pcow liu, ye me güeynal zhits José; güeynie me zig galptsiiptap kil tiblo zënex ne ríaa yaal ne lë mirr ni yaal ne lë áloe. ⁴⁰Zeene blozh biet Jesús lo cruz, psilo zho bdëeb zho zënex co xcuerp me; blozh ga, pchel zho me tib lar nquits; sac sca rqueets grë men Israel zhingutoo zho.

⁴¹Gax zaatne pquia Jesús lo cruz ga, niaa tib corral no niapse yag nex. Len corral co, ga ndieen tib baa tib cho quie, ni tib ngutoo gard ygueets len baa co; ⁴²dzigo nacne gase güeyqueets zho me, sac zhile runfalt sëeb dze nda co, ni baa cose nac miñe ríaan gax ga.

BRIEEBAN JESUS

(Mt. 28:1-10; Mr. 16:1-8; Lc. 24:1-12)

20 Gol dze ne rzobni zhmalá, sil-gaw, scase bii ncow rnaw, briece Marí Magdal zie me ro baan Jesús. Zeene bdziñ me, gon me laa quie ne nioog ro baa co bdiooble, laaw zole tib nëz.

²Horco lëälëd wbire nguzhoon me, biaad me zaatne no no grop no Pedr, biaadnie me diidz lo no, në me laa zho güeybeele Jesús len baa, dieen palo güeysan zho me.

³Dzigo lëälëd, briece no grop no Pedr, zioso no ro baa. ⁴⁻⁵Zeene bdziñ naa ro baa, blëz naa niip, dzigo bdiixlo naa len baa gon naa laa lar ne briel me zhoob ga; per bzëebd naa. Laa naa blozhdze bdiixlo len baa, zeene laa Pedr blanso. ⁶Zigne blanso Pedr bzëeb Pedr len baa, gon Pedr nligaa laa lar co zhoob ga, ⁷niicle lar ne briel guic mew, laaw zhoobaque ga; ndibëdsew, zhooba tib lad.

⁸Nacne bzëebaque naa. Zeene gon naa zha zhoob lar co, dzigoraá bliladz naa ne nli brieceban me. ⁹¡Sac hor co, bii gard tsoguc naa zha rnee lo Xtiidz Dios; sac ga raquiet ne ible zrieceban me!

Gon Marí Magdal Jesús

(Mr. 16:9-11)

¹⁰Ye Marí biire blanso ro baa ga stib. Zeene wbii no ga grop no Pedr, laa Marí bii zo ro baa ga.

¹¹Ga name zo Marí roon me. Sca roon me, tibaque zeene bui me nëz len baa co, ¹²gon me laa chop anjl zob leen co. Dib nquitsbiese rna xab grop anjl co, tib me zob nëz ne bzhoob guic Jesús, stib me zob nëz ne bio ni me; ¹³dzigo rëbchaa me lo Marí:

—¿Pe nacne roon luu?

—Roon naa —rëb Marí—, sac laa zho biadbee xcuerp Jesús nu, na dieen pa güeysan zho me.

¹⁴ Loxaque blozh sca bnee me, zeene pxtire lo me gon me laa tib men co zo gax zhits me. ¡Per ib beenbeyd me ne Jesús!

¹⁵ —¿Pe nacne roon luu? —rëb Jesús—. ¿Cho rguib luu?

Leḷ güeynie guic Marí rëb me bod men ne rquianap gaw, dzigo rëbchaa me:

—Bzhiguiel, telne luu biadbee me nu, bnë dien pa lo güeyan luu me; zeena ga naa gaxi naa me.

¹⁶ Horco bneelë Jesús Marí, bredz me me. Zeene bin Marí lë me, lëälëd biecw me; dzigoraa beenbey me Jesús.

—¡Maestro! —rëb me—. ¡Mod luu i!

Laa me zie gbig me lo Jesús. ¹⁷ Dzigo rëbchaa Jesús:

—¡Xeend luu naa! Sac gard guia naa lo Pxoze naa gbaa. Mine naca, güey güeynie diidz lo grë zha ne bzënal zhits naa; gudz lo zho: Laa naa nole nëz guia naa lo men ne nac Pxoze ne, men ne nac Dios ne rdziunbey ne.

¹⁸ Horco lëälëd wbi Marí ga, ziaadnie me diidz lo no. Blanso me bzodiidz me zha gon me Jesús, ni në me lo no zigne rëbse Jesús lo me ga.

Brieequia Jesús lo xpëdscuel me

(Mt. 28:16-20;

Mr. 16:14-18; Lc. 24:36-49)

¹⁹ Pcow liu dze dmingw co, grëse no ne nac no xpëdscuel me laa no pcaalsa; loxaque Mazh runfalt. Dziits nquiaa no yag yu, sac rdzieeb no grë zha Israel ne rlëenie me. Laa no ndxie ga, tibaque zeene brieequia me bzo me glowtaa lo no; pquiaabdiuzh me no. ²⁰ Blozhse pquiaabdiuzh me no, dzigo blu me len nia me lo no, zaatne biaaz clav zeene pquia me lo cruz, ni blu me ro xcuxti me. ¡Grëse no per nli rley no zeene bdzion no ne nli mew! ²¹ Blozh ga, në me lo no:

—¡Laa naa rmedz tib guieḷbley zdo to, zeena peet tsienied guic to! Zigne pxeel Pxoze naa naa bial naa, scagaa niina laa naa rxeḷ to.

²² Dzigo blub me lo no grëse no.

—Golcaania Espiritu Sant —në me—.

²³ Ni zeene gon gun to tib miech perdon, scaque Dios zun me zho perdon; laa telne siguielḷd zho gun to zho perdon, laa zho biaanle lo xtoḷ zho ga.

Gon Mazh Jesús

²⁴⁻²⁵ Zeene bdzion no Mazh (Mazh ne rnee zho “Mëëdgrop” ga), bzodiidz now lo Mazh, per biladzd Mazha, rnee Mazh:

—Rliladzd naa mine rnee to i gon. Zliladz naaw, per haxta ganlo naa me, haxta gan naa len nia me zaatne biaaz clav, ni cteed-xug naa ga; ni csëebnia naa ro xcuxti me zaatne biaaz lanz ga.

²⁶ Goc xon ngbidza, laa no pcaalsaque len yu co stib; hor cosi yele Mazh ndxiegrë no ga. Scaque dziits nsioog no ro yu, per tibaque zeene bdzion no laa Jesús bzëeb len yu ga stib, bzo me glowtaa lo no, pquiaabdiuzh me no. Blozhse pquiaabdiuzh me no, ²⁷ rëbchaa me lo Mazh:

—Wbig na Mazh, bui len nia naa, psëeb mzhugnia luu nu. Dien nia luu nu, psëebnia ro xcuxti naa. Gacchopdraa guic luu, sinque biladz ganle ne nli mban naa.

²⁸ Dzigoraa biladz Mazh ne nli mban me.

—Nasi rliladz naa mban luu —rëb Mazh—. Luu nac men ne rnabey naa, luu nac xDios naa.

²⁹ Pquiab Jesús rëb me:

—Laa luu rliladz niina, lëcxce laa luu gonle naa waa. ¡Dichos zha ne gliladz ne nli mban naa, niicle rand zho naa!

¿Pe nacne pquia grë diidz rii?

³⁰ Lo lal ne bzënie Jesús no, ndaldao milagr ne bdzion no been me, led grëda raquiet lo guits rii. ³¹ Mine pquiase naa nu, laaw pquia naa zeena zeene glab tow, guien to ganle ni gliladz to: Jesús nac men ne biaadsilaa ne lo xtoḷ ne, Dios

bzooblo me bīaad me, ni Xpēed Dios nac me; sac zha ne dib zdoo gliladz cho nac me, zgaa zho tib guielmban ndzon ne gdzind dze lozh.

Gon zho Jesús Galilé

21 Bded ga, wbiire brieequia Jesús lo no stib, zaatne nac ro nisdoo nroob ne rnee zho Tiberias.

²Tib bdze dzew, tipse ndxie no gza no Simón Pedr, Mazh, Natanael (men ne nac men Caná ga), bets naa Jacob ni schop zha ne nacgza no. ³Tibaque zeene në Pedr, laa Pedr tsie gooz mel. Dzigo rdzieets no:

—Yeque no sca zia guio ne.

Dzigo bziaab no tib len barcw win gza no, laa no zio.

Dipse guieel bdzionie no barcw co lo nis, per ni tib mel bgaad. ⁴Laa liu ziaadle lozh guini, zeene bdzion no laa tib men co zo ro nis, per ni tib no bdziunbeyd me. ⁵Dzigo bnee men co lo no, në me:

—Yo to dien xin, ¿pe bga ma?

Pquiab no rdzieets no lo me:

—Choot ma bgaad.

⁶Dzigo nëchaa me:

—Golron guiee ne rgaa ma i nëz derech ganle, znaaz to ma.

Dzigo bron no guiee co nëz derech. Zeene laa no cueew lo nis, ib lëbd no glis now; ndaldoo mel ne biodzë lena.

⁷—¡Pedr! —rep naa—. ¡Bina ganle, xmaistr ne i gon!

Zeene bin Pedra, lëëlëd wbix Pedr xab Pedr, biab Pedr lo nis; psilo Pedr bzhoobnis Pedr brieequia Pedr ro nis. ⁸Laa no bīaan len barcw ga; nole bdzinniew zaatne nac ro nis. Maase tapgaltsii metr sca bdioobniu no guiee co lo nis.

⁹Zeene brieec no len barcw, bdzion no laa gui noycle, laa tib mel zhooble lo gui co, ye quietxtil ne. ¹⁰Dzigo në Jesús lo no:

—Goltënie bla mel ne blozh bnaaz to i nu dien.

¹¹Dzigo güey Pedr bieep me len barcw, güeyxadz me guiee ne no mel ga; dzigo bdoobniu mew bdzinnie mew haxta zaatne nacpaa ro nis. Mel tafa, niapse ma mbeew, zeene bgab ma rgaa ma tib gayoo chooptsiptson lo grë ma; nicle scataa nzian ma, per blëb guiee co, briezda.

¹²Blozh ga, bredz me no, në me:

—¡Goltë na, zeena gowxeren to!

Ni tib no bnabdiidzd lo me dien pe ni mew; sac, ¡riennpaa no ne nli mew!

¹³Dzigo wbig me bdiiz me quietxtil co lo no, bzhen me mel ne, bneedz me ma lo no.

¹⁴Ga bion vüelt brieequia me lo no wlal ne brieegan me.

Bzodiidznie Jesús Pedr

¹⁵Blozhse bdioowxeren no, bredz Jesús Pedr, psilo zho bzë zho grop zho; dzigo rëb me lo Pedr:

—Simón (xingan Jonás), ¿pe nli dzigo rleynieraa luu naa que grë zha qui?

—Nquialadz naa luu —rëb Pedr—, ni nanlegaa luuw ganle.

—Pteedlo grë xpëcwxiil win naa sca —rëb me.

¹⁶Wbiire me, rëb me lo Pedr:

—Simón (xingan Jonás), ¿pe nlipaa dzigo rleynie luu naa?

—Nquialadz naa luu —rëb Pedr.

Dzigo rëb me:

—Pquiapan xpëcwxiil naa sca.

¹⁷Wbiireque me stib rëb me lo Pedr:

—Simón (xingan Jonás), ¿pe nlipaa nquialadz luu naa?

Zeene bin Pedr sca rëb me, mban goc zdoo Pedr; sac gale rac tson vüelt zinabdiidz me lo Pedr, dzigo rëb Pedr:

—Luu nac men ne rnabey, luu nana grësew, nan luu ganle nquialadz naa luu.

Dzigo rëb me:

—Telne nli nquialadz luu naa, yquiaanap luu xpëcwxiil naa sca.

¹⁸Zeene gon bii nguieg luu, led rso-ladz luu ganle luuzhal racw xab luu, rrieelo rie luu zaatne racladztaa luu; per zeene gon laa luu gac mengolraa, loxaque nia luu glis luu zhaale zha ne ygacwxab luu, ni zienie zho luu zaatne ni racladzd luu.

¹⁹Zeene znu rëb me lo Pedr, ga bzeet me zha nac guielgut ne yгаа Pedr, ni ga glu Pedr ganle pa lotaa men nroob nac Dios. Blozhse ga, rëbchaa me:

—¡Dënal zhits naa!

²⁰Dzigo nalaque naa zhits me grop me Pedr. Zeene ptsire lo Pedr, gon Pedr laa mëëdscuel ne scataa rleynie me ga, laa zho nal ga, zha ne zobpaa cue me ga lo xtsee co, zha ne wbigpaa bnabdiidz lo me dien cho nac zha ne tsielo me lадznia zha ne gut me; dzigo rëbchaa Pedr lo me:

²¹—Telzhe zha rii waa, ¿pe nac mine ted zho?

²²Rëbchaa me:

—¿Pe nadien gun luu ne racladz luu gacnan luuw? Telne gacladz naa, zrieelo gnabey naa gban mgui haxta len dze ne guiał naa stib. Led xcuenta luu ga. ¡Na zeen dënal zhits naa!

²³Zeene gocnan grëraa zha ne rliladz Jesús sca bnee me, grëse zho tibaque güeynie guic zho gdzindraa dze guet naa. Per led scada, sinque znu naca, rëb me: ¡Pe gun Pedr! Telne gacladz me, zrieelo gnabey me gban naa haxta gal dze ne guiaad me stib.

²⁴Grëse mine pquia naa nu gon, grop lo naa gon naaw, grëse zha ne nacgrë no nanpaa zho ganle ne diidzli rne naa.

²⁵Ndaldooraa grë ncuaaane nroob ne been Jesús, tel niaca mine yquiaw grësew, ni ygaad dib lo guidzliu tsotsow grë guits ne yquiaw ga.

MINE BEEN ZHA NE PXEEL JESÚS

BNEE XTIIDZ ME

1 ¡Diuzh Tiofl!

¹ ¿Yose luu dien bets? Naa gon nac Luc, laa naa rxel stib guits rii lo luu. Mine pxel naa lo luu glo ga, lo co pquia naa grëse mine been Jesús, grëse wseed ne blu me lo miech zeene psilo me xtsiin me ²haxta gol dze ne psan me diidz pe nac ncuaañe gun grë zha ne bzooblo me tsie tsienee Xtiidz me. Espíritu Sant bdeed guielbiini lo zho bien zho zha racladz me; lëe dze co ga zey me gbaa.

³Nli psacsi miech me, beet zho me, per brieegan me. Ni par glu ganle ne nli brieegan me, dipse len choo ngbidz brieequia me lo grë zha ne sca bzooblo me tsienee Xtiidz me. Gzataa zeene rrieequia me lo zho, rnee me lo zho zha rnabey Dios.

⁴Tib vuelt ndxie zho grë zho me, dzigo pso me diidz lo zho ible grieed zho lad guiedz Jerusalén, haxta quiet Espíritu Sant gdeed guielbiini lo zho zigne nacle xtiidz Pxoze me; ni biire rëb me lo zho:

⁵—Gol soladz ganle laa naa nile lo to: nli laa Juan pchoobnis, per niab nisa; sangue to zгаа to guielbiini ne gneedz Espíritu Sant, rrieequia Espíritu co chobnis to; ni zhile gdziñ dze ne laa min co gac.

⁶Len ngbidz ne sca nolulo me lo zho, tib vuelt bnabdiidz zho lo me, rëb zho:

—Ndiñ no men rnabey nac luu. ¿Pe niina na so luu gnabey luu, zeena cuec luu zha Israel ladznia zha Roma?

⁷Dzigo pquiab me rëb me lo zho:

—Dios, men ne nac Pxoze naa, ncuaañe gun me riegualde to gacnan tow, mese nan dien pa dzew, dien pa horgaaw; sac mese nac men ne grieelo gūa. ⁸Sinque to, zeene laa Espíritu Sant

gneedz guielbiini lo to, hor co laa to ygaa poder ne rap me, laa to csilo gnee lo grë zha Jerusalén cho nac naa; tsie to dib xtan zha Judé, dib xtan zha Samar, ni lo grëragaa miech, tsienee tow.

⁹Blozhse sca bnee me lo zho, zowique zho lo me, dzega, dzega laa me bzoquia gbaa. Glaale ziequia me zeene znuse bdop tib xcow, laa me biongueetsse len xcow co, gon draa zho me. ¹⁰Laa zho bii quiawique zhan gbaa zaatne gon zho biongueets me ga, tibaque zeene bdziñ chop mgui zaatne zo zho ga, dib nquits-biese rna xab grop mgui co; ¹¹rëb me lo zho:

—¿Pe nacne squitaa quiawi to zhan gbaa? Zigne gon to i nagon zey me gbaa niina, squique quiet me gbaa gal dze ne laa me guiaad stib.

¹²Blozh ga dzigo laa zho wbi guic gui co (lëe Gui Oliv ga). Zhisaque bzë zho laa zho bdziñle Jerusalén, lalse ne rzë zho dze ne rdziiladz zho lo dziin. ¹³Bdziñ zho zaatne rbëz zho, biep zho len yu ne riaan glaa; sac len yu glaa co ga no zho. Ga rbëz Pedr, rbëz Ndrés, Jacob, Juan, Lip, Mazh, Bartol, Matew, ni Jacob ne nac xingan Alfé; Simón Zelot, ni Judas menlidz Jacob. ¹⁴Grëse zho tibaque rcaalsa zho rzodiidznie zho Dios grë zho zha bets Jesús, xniaa me Marí, ni grëraa men wnaa ne nacgrë zho.

Bzo zha ne gun dziin ne psaan Judas

¹⁵Tib dze pcaalsa maase tib gayoo gal zho, dzigo guso Pedr bnee me lo zho, rëb me:

¹⁶—Grëse to bets, grëse to bzian, gol-gacnan ganle, mine been Judas zeene sca güeyto me Jesús, nole ne sca gaca. Lo Xtiidz Dios zhobneew, lëe min co pquiaa rey David zeene psiaab Espíritu Santa guic me. ¹⁷Ye Judas gocgza no, ye me nac diidz niun dziin ne nodziun no niina.

¹⁸ Ni nligaa laa ne niun me dziin co, leḷ been me guieḷntseeb pto me Jesús, ni blozh ga lëëque lo liu ne bziuu dimi ne bdiizh zho me ga, ga güeytsobe me bzob guic me lo liu, wbilgazh me, nëzrii nëzrec bliaaḷ leḷ me. ¹⁹ Miḅ co nacne zeene laa grë zha Jerusalén gocnaḅa, dzigo bleelë zho liu co “Liu Ren”.

²⁰ Zigne rneque naa ga —rëb Pedr—, ible lo Xtiidz Dios sca zhubnee; ni lëë miḅ co ga raquiet zaatne znu rnee:

Ible ziaandets lidz zho,

ni stib choot gbandraa zaatne bio zho.

Ni rneequew:

Zhaale zha ne guiaannie dziin ne no niun zho.

²¹⁻²² Miḅ co nagon, ible nonguiela so tib zha ne guiaaḅ xlugar Judas, gacgza zho no guioxobneḅ no ne nli brieëban Jesús. Nana sca, lo grë zha ne nacgrë no psilo bzianie no me zeene pchoobnis Juan me, haxta goḷ dze ne laa me zey gbaa, lad co goḷgotsaa cue ne tib zha ne so gacgza no.

²³ Dzigo ble zho tib meḅ ne lë José Barsabás (lëëque me ga rnee zho Just), ni stib meḅ ne lë Matí.

²⁴ Blozh ga, bnaḅ zho lo Dios, rëb zho:

—Dios, ndionḅ no luu nac meḅ ne rnabey no; ndionḅ no luuse nac meḅ ne runbey zdoo tib tib miech, gane niina laa no rnab lo luu, luu blu dien cho tib zha rii racladz luu so ²⁵ guḅ dziin ne psaan Judas; sac laa Judas zeyle zaatne rieguiaḷ Judas.

²⁶ Blozhse bnaḅ zho lo Dios, laa grop zha co bio rif. Nacne brieëquia meḅ ne lë Matí ga, dzigo dze cotaḅ laa me gocgza stsiiptib zha poxtl co.

Biaad Espíritu Sant

2 Zeene goc gadz zhmaḷ gut Jesús, lëë-taque dze co run grë zha Israel lni ne rnee zho Pentecostés. Dze co grëse zha ne no xnëz Jesús, laa zho pcaalsa. ² Laa zho ndxie grë zho, tibaque zeene bio tib

bi nroob zhan gbaa, zig nac zeene rrieë tib medox, haxta leḅ yu ne ndxie zho ga pquiab; ³ ni brieëquia nzian biini, rluw zig nac ludz miech, tibga tibga biini co blëz guic zho grëse zho. ⁴ Horco grëse zho pcaania guieḷbiini ne bdeed Espíritu Sant, psilo zho rnee zho grë xtiidz stib miech miḅ rsiaabtaa me guic zho.

⁵ Leḅ dze co nziandoo grë zha Israel ne no stib ladz beḅ bdziḅ Jerusalén, grë zha ne bii zienaḷ xley Dios. ⁶ Laa zeene bio bi co, ye zho no lad grë miech guizhiu ne bdopbe zaatne zob yu co; tib tib zho zeene bin zho laa grë zha ne pcaania guieḷbiini co noneë xtiidz zho, per nli rzee zdoo zho. ⁷⁻⁸ Rlozhd gwi zho rnee zho:

—iPe nli diidz rii! ¿Zha rrieëlo rnee grë zha qui xtiidz ne, ni led zha Galilé nac zho? iTib tib ne ndxie ne nu, zhaase zhaase diidz ne rnee ne! ⁹⁻¹⁰ Nu ndxie grë meḅ Part, meḅ Media, meḅ Elam, meḅ Mesopotam, meḅ Judé, meḅ Capadós, meḅ Pont, meḅ Asia, meḅ Frij, meḅ Panfil, meḅ Egipt, haxta grë meḅ ne ziaad nëz África, delant guiedz Ciren; grë meḅ Cret, meḅ Arab, grë zha Israel ne ziaad nëz Roma, grë meḅ Roma, zha ne zienaḷ zhiwseed zha Israel.

¹¹ Pe zhidaa ne —rnee zho—, ni diidz ne rneepaa ne tib tib ne laa ne nodzion rnee zha qui grëtaa milagr nroob ne run Dios.

¹² Grëse zho per nli rzee zdoo zho, rdziieldraa zho zha guḅ zho, rnabdiidzlsa zho rnee zho:

—¿Bay pe i? iNcuaḅe gard dzian ne!

¹³ Laa nogaa zho rzhidznie, rnee zho:

—Rzudz grë zha qui, gane squi rzë xtiidz zho.

Bdeed Pedr tib Iban

¹⁴ Dzigo bzoli Pedr gza me stsiiptib zha ne nac poxtl ga, psilo me nguiedz bnee me lo grë miech ne ndxie ga, rëb me lo zho:

—Grëse to, zigtaa zha Jerusaléna, zigtagaa zha ne blanso Jerusalén nuw, gołgona ganle. ¹⁵No bla to quianee rëb to rzuudz no, per led rzuuzdz no. Griinpaale name blan ngbidz, niicle niaca zha ne riepaa nziu, niacxe goon nale laa zho gzudz. ¹⁶Led rzuuzdz no, sinque niina nagon noyac grë miñe bzeet Joel padzeela (tib men ne biadteed xtiidz Dios), zeene znu rëb me:

¹⁷Znu rnee Dios:

Zeene wzhile runfalt gal dze co, laa naa cxel zhiEspíritu naa zdoo grëse miech;

grë xingan zhow, grë xindzoo zhow, laa zho cteed xtidz naa,

grë zha nguieg, nzian grë ncuaañe glulo lo zho,

grë mengol, nzian grë ncuaañe glu mcaal lo me.

¹⁸Len dze co,

grëse zha ne nguzobdiidz lo naa, niicle mguiw, niicle wnaaw laa naa cxel zhiEspíritu naa zdoo zho, dzigo grëse zho cteed xtidz naa.

¹⁹Nzian grë ncuaañe gzee zdoo to glu naa zhan gbaa,

scaque lo guidzliu, zan to ren, zan to bel, zan to grë goxdo.

²⁰Zeene zhile gdziñ dze ne guiaad men ne rnabey ne,

laa lo ngbidz ycow, laa mēē gna nizhnie zig rna ren.

Dze ne guiaad me ga,

dze co gac tib dze ne mazdraa nroob, tib dze ne mazdraa ndzon.

²¹Grëse zha ne dib zdoo gnab lo Dios yquia zdoo me zho,

grëse zha co scaania me zho.

²²Grëse to, gołquiaadiaga sca ganle! Led nanwen to ganle Dios pxeel Jesús, men Nazaret ne biaad lo guidzliu rii, Dios bnabey been me grë milagr nroob, been me grë ncuaañe bzee zdoo to; ga blu ganle ne nli Dios nacie me. ²³Laa zeene laa Dios bdeed diidz biab me ladz-

nia to (sac ible xtiidzle Dios naca, nanle me zha nac ne sca ted Jesús), laa to bnaaz me, bzobdoo to me, bnabey to gut me. Led to gon bloo me ladznia grë zha ntseeb ne sca psacsi me pquiaa zho me lo cruz. ²⁴Per bleeban Dios me, psilaa Dios me ladznia guielgut; sac lëbd guielgut ne lëew gnabey lo me.

²⁵Zeene bzeet David Jesús, znu rëb me:

Men ne rnabey naa, ran naa tibaque quianap me naa;

tibaque zo me cue naa nēz derech, ¿pe nac nadien ne lega pe gac naa?

²⁶Gacxe waa, nley no zdoo naa, niicle ludz naaw, rleya roolnie naa me.

Ni gane tibliladz rac naa;

²⁷sac nan naa niicle guet naa,

ib csaand me guiaan naa len baa,

ib gdeete me diidz xiñ xpēel naa.

Naa nac tib ngundziin lo me, ni rleynie me naa.

²⁸Me blu lo naa zha grieelo ygaa naa guielmban,

ni tib guielbley nroob ne ygaa naa zeene laa naa gdziñ lo me.

²⁹Bets, bzian, to ne nac to menladz naa, gołgona ganle: led miñe bdete pxozgol ne David bnee me nu; sac gon, zeene gut me güey zho güeyqueets zho me, ni haxta lo nadze laa xpa me bii niaa. ³⁰Sinque miñe bded Jesús ga bzeet me, sac gon tib zha ne biadteed xtiidz Dios goc me. Gocnanle me ne lo xtii me

grieequia Men ne nacle diidz ga cxel Dios, ni men co sob gnabey zigne bnabey me; sac scale rëb Dios lo me, ni haxta bzeet Dios lë Dios parne glu ne yquidied me. ³¹Dzigo zig nac zeene ranle me grëta miñe ted Jesús, nacie bzeet me ne ib zrieeban Jesús, rëb me guiaand xcuerp Jesús zaatne rbëz grëraa mengut, niicle xindgaaw.

³²Jesús ga gon bzeet me, sac zig nac Jesús grop lo no bdion no bleeban Dios me, ³³ni niina gbaa zob me cue Dios nēz

derech, sac me nac men r nabey. Ni zigne nacle xtiidz Dios men ne nac Pxoꝝ me, laa me pxeel Espíritu Sant lo no; ni niina grése ncuaaꝛe noyaꝛ tow, grése ncuaaꝛe noyongaa tow, xtsiin Espíritu Santow.

³⁴Laa naa rbire rne lo to stib gaꝛle, led mine bdeꝛe David ga bzeet David; sac gon, zeene gut David güeysobd David gbaa. Davitaque goc zha ne znu rëb:

Rëb Dios lo men ndzon ne r nabey naa: “Cue naa nëz derech, nu bzob,

³⁵nieeda lozh gnaz naa grése zha ne rlëë lo luu, csaꝛ naa zho ladznia luu.”

³⁶Grése to men wladz, gołgona sca gaꝛle: Jesús gon, men ne pquiaa to lo cruz ga, lëë men co nac men ne r nabey. Dios bzo me, ni Dios pxeel me biaad me lo guidzliu.

³⁷Zeene bin grë miech ne ndxie ga sca bnee Pedr, biab guiełnë zho, psilo zho rnabdiidz zho lo Pedr ni lo grëraa zha ne nacgza Pedr ga, rëb zho:

—Bets, nana, ¿pe nac ncuaaꝛe dziuun no?

³⁸Dzigo rëb Pedr lo zho:

—Tib tib to, gołsaan xquiełntseeb to, gołbig lo Dios, ni none chobnis to zeena guiaaꝛmbe to lo xtoł to; scagaa ible sxeel Dios Espíritu Sant gacnie to. ³⁹Sac psanle Jesús diidz ne ible sxeel me Espíritu Sant gacnie grése zha ne cuedz me sëëb xnëz me; zigtaa tow, zigtaa xpëëd tow, zigtagaa grëraa menzita.

⁴⁰Nzianraa grë ncuaaꝛe bzodiidz Pedr lo zho, ni pso me diidz lo zho csaan zho grëtaa guiełntseeb ne run miech lo guidzliu rii. ⁴¹Lo grë zha ne bzoobdiag grë mine pseed me zho dze co, rgaazho maase tsoꝛ mil; blozh ga, grése zho brobnis, laa zho gocgrë grë zha ne rliladzle Jesús ga.

Niowse mban zho

⁴²Grése zha ne rliladz Jesús ga, dib zdoo zho zianał zho grë mine rseed grë zha poxtl co zho, tibaque rcaalsa zho

rzodiidznie zho Dios, ni row zho guiełntxtil zigne psanse Jesús diidz gun zho. ⁴³Grëraa zha ne zo stib lad, rdzieb zho; laa grë zha poxtl co, nzian grë milagr noob ne run zho.

⁴⁴⁻⁴⁵Tipse rnee zho, rdeedlsa zho ncuaaꝛe rquiin zha ne nacgrë zho; zha ne quianie liu, tel pe grëragaa ncuaaꝛe quianie zho, haxta rto zhow, dzigo rguuiz zho dimi co lo grë zha ne guiełnd pe yquiin.

⁴⁶Gzataa dze rcaalsa zho len yadoo; rlozh ga, rcaalsaque zho lidz grë zha ne nacgrë zho row zho guiełntxtil zigne psan Jesús diidz ga; ine nley, ine ndooladz rbe zho grë zho rquiin zho guiełwagw ne runlo zho, ⁴⁷ni rley zho roolnie zho Dios. Grése miecha, rley zho ran zho sca niowse mban zho; ni zigse zie dzew, scase scase laa Dios rbedzraa grë zha ne rzëëb xnëz Jesús, laa zho racnzianraa.

Biac tib men ne në ni

3 Tib dze zig rbixwe ngbidza, briece Pedr grop Juan zie zho yadoo noob ne zob Jerusalén, sac lëë hor co nac horne rie zho yadoo riezodiidznie zho Dios.

²Gax ro yadoo co quia tib puert rnee zho Puert Ndzon, ga rzob tib zhey gol ib gacd së, sac nële ni me zeene gol me. Gzobse dze, rie zha ne riezooꝛ me ga rnab me gon lo grë zha ne rzëëb yadoo.

³Laa dze co, zeene gon me laa Pedr grop Juan zieded ga ne laa zho sëëb yadoo, zëëb nia me rnab me gon lo zho. ⁴Dze rwi zho lo me, tibaque rëb Pedr:

—Lo no bui.

⁵Dzigo blis lo me bui me lo zho, nan me bod no pe dimi ne gdeed zho lo me. ⁶Wbiire bnee Pedr lo me, rëb Pedr:

—Quianied naa dimi ygad naa lo luu. Ncuaaꝛe grielose gnedz naa, laaw gnedz naa niina, ĩniapse por Jesús (men Nazaret), laa naa rnab lo luu, niinagazh guso i zeen bzëni!

⁷Dzigo bzhen Pedr nia derech me bliso Pedr me, hor cogazh laa grop ni me ga bdaan, ⁸laa me psilo bzë. Rley me laa me bzëëb len yadoo gza me zho, lo guielbley co haxta rias me, ni roolnie me Dios.

⁹Grë miech ne no len yadoo, zeene gon zho laa me rzële, ni scataa rley me roolnie me Dios, ¹⁰bzee zdoo zho; sac runbey zho me, nappaa zho rzëd me glo, tibaque ran zho me rzob me zaatne quia Puert Ndzon ga rnab me gon.

¹¹Zeene laa Pedr grop Juan brieen len yadoo nroob co, yeque me nal zhits zho ib rsaand me zho, laa zho bdzin stib nëz cho yadoo co zaatne quia tib nsaap nroob ne rnee zho zhiNsaap Salomón. Nalaque grë miech co, rlozhd gwi zho, rlozhd gzee zdoo zho. ¹²Dzigo rëbchaa Pedr lo zho:

—¿Pe rac to? ¿Pe nacne squitaa rzee zdoo to, squitaa rwi to lo no, zig nac zeene no bdziunguiac men rii, zig nac zeene por nguzobdiidz no lo Dios gane brieelo psëë no me? ¹³Golgacnan ganle led scada; sinque Dios men ne bliladz Abraham, men ne bliladz Isaac, men ne bliladz Jacob, men ne bliladz grëraa xmengol ne, men co blu lo to niina ne nli men nroob nac Xpëed me Jesús. Lëë Jesús co ga gon bnaaz to, bloo to me ladznia zhiwxtis ne, ni zeene gocladz Pilat nsilaa Pilat me, pe liaadz to ndeed to diidz. ¹⁴Bdeete to diidz nlaa men ne nac men ndzon, men ne peet xtold; lel bnab to blaa tib zha ntseeb ne nzëëb ngutoo. ¹⁵Laa me, pquia to haxta beet to me, ni me nac men ne rdeed guielmban. Per bleeban Dios me, ni mban me niina; sac grop lo no bdzion no me.

¹⁶Ni niina men ne ran to biac nu, niapse por Jesús biac me; led runbeyle to me nanle to ganle rzëd me glo. Ne dib zdoo no rliladz no Jesús, gane brieelo bnab no beenguiac Jesús me.

¹⁷Grëse to bets, ne nac to menladz naa, rgobey naa niicle to ni niiclegaa

grë zha ne nac zhiwxtis ne, lega laa to bnabeyse bgaa Jesús beet to me, niicle to biendaque dien pe nacne sca been to. ¹⁸Laa Dios bneedz diidz been to grë guielntseeb co, sac sca goc grëse mine bzeet grë zha ne biadteed xtiidz Dios padzeela, zeene bzeet zho zha nac grë guielnë ne ted Jesús, Men ne nacle diidz cxeel Dios guiaad lo guidzliu.

¹⁹Do! nroob ga gon been to, gacxe nana gon waa golsaan xquielntseeb to, golbig lo Dios; zeena csanmbe me to lo xtol to. Me gneedz guielbley lo to stib, ²⁰ni zbiire cxeel me Jesús lo to stib, guiaad silaa me to. ²¹Gbaa no me niina, ni ga cuëz me nieeda gal dze ne laa Dios blozh bnabey goc grëse ncuaane none gac, zigne bzeetse grë zha ne pxeel me padzeela, biadteed xtiidz me. ²²Zig nac Moisés bzeet me laa Jesús guiaad, rëb me lo grë pxoz gol ne: “Dios men ne rnabey ne, ible znabey me ne lo xtii to grieequia tib men ne gac zig nac naa lo to niina. Zeene laa me guiaad, golgon xtiidz me; ²³sac zha ne gond xtiidz me, ib tedsod znitlo zho.” ²⁴Scaque Samuel, ni grëraa zha ne biadteed xtiidz me, grëse zho bzeetle zho grë ncuaane noyac len dze rii.

²⁵Grëse to, xmengol to nac grë zha co, ye to ga rëb Dios gunlay me zeene znu biaan me diidz grop me Abraham, rëb me: “Niapse por tib men ne grieequia lo xtii luu, laa naa gunlay grëse miech ne ndxie gdibdoose lo guidzliu.” ²⁶Ni niina ne laa Dios bleeban Jesús, gloque lo to pxeel me me, gunlay me to, zeena csaan to xquielntseeb to.

Güeyzo zho zho lo wxtis

4 Laa Pedr grop Juan bii noneeque lo grë miech co, zeene laa bla zha ne nac pxoz bdzin ga, bdzinnie zho tib zha non ne quianap yadoo co ni zla zha ne nacgrë zha saducé. ²⁻³Zigne bdzin zho bnaaz zho Pedr grop Juan, güeysëëb zho

zho ladzguuib; ni ne bdzele dzew, ga biaan zho dipse guieel co. Rlëë grë zha co, sacne laa Pedr grop Juan quianee lo grë miech co zha bleeban Dios Jesús; ni rnee zho grëse menġut, scaque grieeban zho.

⁴Niicle ne scataa rlëë grë zha rnabey co, per nzian zha ne ndxie ga bliladz Jesús; zig gaay mil rgaa loxaque zha bgui.

⁵Zeene biini liu co, grëse zha non, grëse zha ne rnabey lo menġuedz, laa zho pcaalsa. ⁶Ga bdziñ Anás menġ ne nac pxoz nroob ne rnabey, ga bdziñ Caifás, bdziñ Juan, bdziñ Lejandr ni grë zha ne nac menġlidz pxoz ne rnabey ga. ⁷Dzigo bnabey zho gocredz Pedr grop Juan, bzo zho zho glowtaa, bnabdiidz zho lo zho, rëb zho:

—Goġnë nadien, ħcho rnabey to, cho pxeel to ne squi no to?

⁸Horco laa Espiritu Sant bdeed guielbiini lo Pedr, pquiab Pedr rëb Pedr lo zho:

—Grëse to ne nac to zha ne rnabey lo menġuedz, grëse to ne nac to zha gol ne non xtiidz. ⁹Teġne miġe rlisqui to nac ne dien zha bdziuuġ no menġ rii ne laa ni me biac, ¹⁰goġsiguiel goġquiaadiaga ganġe, zeena gacnaġ tow ni gacnaġ grëragaa menġuedza. Jesús gonġ, menġ Nazaret ne bnabey to gut lo cruz ga, menġ ne bleeban Dios ga, menġ co beenġuiac menġ rii; ni laa to ranġaa me laa me zo lo ne nu. ¹¹Lëë Jesús ga raquiet lo Xtiidz Dios zaatne znu rnee: “Quie ne psëeb zha ne nozaa yu, ni nand zho lëepaa quie co nac miġe rnazdziits yu.” Ni scapaa nagonġ bzhaac to me. ¹²Loxaque me zrieelo csilaa ne lo xtol ne, sac bzodraa Dios cho stib zha ne niaad lo guidzliu niaadsilaa miech.

¹³Zeene gonġ grë zha wxtis co, scataa peet dzeb nod lo Pedr grop Juan, bzee zdoo zho; sac runbey zho Pedr, runbey zho Juan, nacd zho cho zha ne güey wseed nroob. Ga gonġ zho, pa lotaa

guielbiini ne bgaa Pedr grop Juan ne bzënie zho Jesús.

¹⁴Peet brielod nlisqui grë zha co, sac nligaa laa menġ ne biac ga zo lo zho ga.

¹⁵Dzigo mazd bnabey zho brieed Pedr ley grop me Juan; laa zho biaan bzodiidz zho dien zha gunġ zho zho, ¹⁶sac rien zho tib milagr nroob ga sca biac ni me co; niicle ne racladz zho yqueets zhow, per grële menġuedz bina. ¹⁷Nacne biaan zho diidz, ctseb zho zho gbiiredraa zho cseed zho miech zhiwseed Jesús; zeena lozhd gacnaġ grëraa miech zha biac menġ co.

¹⁸Dzigo bredz zho Pedr stib, grop me Juan, goctox zho lo zho.

—Laa no rso diidz lo to gonġ —rëb zho—, gbiiredraa to cseed to miech zhiwseed menġ ne rnee to Jesús ga.

¹⁹Pquiab Pedr grop Juan, rëb zho:

—Zha dien rzac to, ħpe nonguiela ga laa ne dziuuġ no miġe rnabey Dios, leġ miġe rnee to i dziuuġ no? ²⁰Grieelod gonġ dziuuġ no miġe rnee to i, sac grëse ncuaane bdzionġ no, grëse ncuaane bdzionġaa no ib none gnee now, zeena gacnaġ grëse miecha.

²¹Dzigo wbiire grë zha rnabey co, ntseeb rac zho lo zho pso zho diidz csee-traade zho miech; blozhse ga laa zho psilaa zho. Bdeetew diidz nsacsi zho zho, sac ndal miech ne rleynie Dios, rdeed zho xquizh lo me ne beenġ me milagr ²²beenġuiac me menġ co, ni choole iz rac sca gacd së me.

Bnab zho lo Dios

²³Zeene laa Pedr grop Juan bdziñ lo grë zha ne nacgrë zho, bzodiidz zho grëse teġ zha rëb grë zha rnabey co, zha rëb pxoz non co. ²⁴Grë zha ne nacgrë zho ga, zeene bin zhow grëse zho psilo zho bnab zho lo Dios, rëb zho:

—Dios, luu nac menġ ro ne rnabey grëtaa ncuaane no, luu bzaa gbaa, luu bzaa guidzliu, luu bzaa nisdoo, luu bzaa

grëraa ncuuaṅe no. ²⁵ Padzeela zeene bdeed Espíritu Sant guielbiini lo pxozgol no David, meṅ ne been xtsiin luu hor co; znu bnee me:

¿Pe nacne squitaa rac grë miech ne nacd zha Israel rlëenie zho Dios?

Racladz zho guṅ zho ncuuaṅe ni grieelod lo zho.

²⁶ Grëse zha non ne rnabey grë guiedz, tipse rac zho laa zho ractseeb lo Dios rlëenie zho me, ni rlëenie zho meṅ ne bzooblo me pxeel me lo guidzliu.

²⁷ Ni nligaa na scase goca. Guiedz Jerusalén nu, nu biaad rey Herod, biaad Pons Pilat, pcaalsa zho grë zho menladz no ni grë menzit, tipse bnediidz zho psacsi zho Jesús, meṅ ndzon ne bzooblo luu pxeel luu biaadguṅ xtsiin luu lo guidzliu nu. ²⁸ Grëse zigne psanle luu didz, scase been zho. ²⁹ Ni scaque niina, bui ganle zha racladz zho ctseb zho no parne peet gneedraa no; luu nac meṅ ne gocniṅ no ne nac no zha ne rdziuuṅ xtsiin luu, zeena gdzieebd no cseed no miech xtiidz luu. ³⁰ Laa no rnab lo luu, beṅguiac grë meṅ rzacnë, been grë milagr nroob, blu grë ncuuaṅe gzee zdoo miech; zeena gan zho ganle meṅ nroob, meṅ ndzon nac Xpëed luu Jesús.

³¹ Zeene blozh bzodiidznie zho Dios, masaque bzhidz zaatne ndxie zho ga; hor co grëse zho laa zho bgaaraa guielbiini ne bdeed Espíritu Sant lo zho; peet rdziebdraa zho laa zho zieseed miech Xtiidz Dios.

³² Leṅ dze co, grëse zha ne rliladzle Jesús ga, tibaque nac zho, tibaque rnee zho, tibaque nac mine zienie guic zho. Nod zha ne guiab lose zho yquiin ncuuaṅe rap zho; sinque grëse ncuuaṅe quianie zho cheṅ grë zho naca. ³³ Grë zha poxtl co, zeene rseed zho miech zha brieegan Jesús, nzian zha ne rliladz me; rlupaa ne Dios nacnie zho.

³⁴⁻³⁵ Ne nligaa tipse nac zho grë zho, nod zha ne guiab ne guieṅd pe yquiin, sac grëse zha ne quianie liu, zha ne quianie nzian yu, rto zhow dzigo rdeed zho dimi co rguiz grë zha poxtla lo zha ne rquiina. ³⁶ Sca been tib meṅ ne nacgrë zho lë José. (Zha xtii Leví nac me, gol me tib lo guidzliu win ne no lo nisdoo lë Chipr; zha poxtl-le bleelë me Bernabé. Bernabé, nac zig nac ne rnee ne: Zha ne rchoobladz zdoo miech.) ³⁷ Pto me tib lë liuṅ me, dzigo bdeed me dimi co lo zha poxtl, bdiiz zhow.

Znu bzhaac Ananí grop Safir

5 ¹⁻² Tib mgui lë Ananí, laa tsiel me lë Safir; ye me pto tib lë liuṅ me. Gonlo tsiel me, tel palal dimi ne bdo liu co, bzhenga me zhisa. Zeene laa me ziesan mine biaaṅ ga, lo poxtl, rëb me lëë grë dimi ne bdo liuṅ me ga. ³ Dzigo rëbchaa Pedr lo me:

—Ananí, ¿pe nacne bdeed luu diidz bzëëb mendox zdoo luu? Mendox i gon noquuil luu naṅ luu yquidiee luu Espíritu Sant, rnee luu lëë grë dimi ne bdo liuṅ luu nu. ⁴ Bien ganle cheṅ luu liu co. Dimi ne bdiizh zhow, cheṅ luuw, niac niuṅ luuw zigne niacdadztaa luu, ¿pe nac dzigo ne racladz luu yquidiee luu? Gon ganle led nod noquidiee luu, Dios i gocladz luu noquidiee luu.

⁵ Loxaque sca bin Ananí bnee Pedr, znuse biab Ananí liu, gagazh gut Ananí. Grëse miech ne bina, bdzieb zho. ⁶ Dzigo güey bla zha nguieg pchel zho ngutoo co lar, blis zho me ga laa zho ziequeets me.

⁷ Wdzeelaaque goca zeene laa tsiel me bdiin, ni lalnu güeynied guic me ne laa tsiel me gutle. ⁸ Nbnabdiidzaque Pedr lo me, rëb Pedr:

—Bnë dien, ¿pe nli lëë grë dimi ne bdo liuṅ to nu?

Pquiab wnaa co, rëb me:

—Nliw, lalgui pto now.

⁹—¿Pa brieë pensar qui lo to grop tsiel to? —rëb Pedr—. Ne squi tipse bnee to nan̄ to yquidie to Espíritu Sant; doḷ nroob i gon̄ been̄ to lo Dios. Laa zha ne güeyqueets tsiel luu blansole ro yu nu, ni niina gon̄ laa zho güeyaque luu.

¹⁰Diidz co blozh brieë ro Pedr, znuse biab wnaa co liu, guchedraa me ga. Zeene laa gza zha nguieg co bzëëb len̄ yu, laa me nixle ga; gon̄ zho gutle me, dzigo blis zho me güey zho güeyqueets zho me cue xpaá tsiel me. ¹¹Grëse zha ne gon̄ sca goc men̄ co grop me, zha ne bingaaw, zigtaa zha ne rliladz Jesúsá zigtagaa grëraa miecha, per nli bdzieb zho.

¹²Grë zha poxtl co, tibaque rcaalsa zho tib lo nsaap ne quia cho yadoo ga rnee zho zhiNsaap Salomón; nzian grë milagr ne rdeed Dios diidz run̄ zho.

¹³Grëse miech ne rcaalsa ga, rleynie zho grë zha poxtl co, nzian zho rliladz min̄ rseed zho, per rbigd zho gacgrë zho zho.

¹⁴Zigse zie dze, scase racndalraa miech ne rzëëb xnëz Jesús, mguisaque wnaasaque laa zho rliladz me dib zdoo zho. ¹⁵Zhoob diidz scataa milagr ne run̄ grë zha poxtl co. Dzigo psilo miech rbee zho grë men̄ rzacnë, rguix zho me ro nëz, no me zhoobse lo xlon me, no me zhoob lo yag ne ney zho me; rquiambëz zho maase zhimlëse Pedr guiab lad grë men̄ co zeene laa Pedr ted. ¹⁶Haxta grë guiedz win ne ndxie gax Jerusalén ga, rree grë miech rdziinnie zho grë men̄ rzacnë, no grë men̄ co noguitnie men̄ dox; grëse zho runguiac zha poxtl co zho.

Bio grë zha poxtl ladzguiib

¹⁷Zeene gon̄ men̄ ne nac pxoz nroob ne rnabey, ni grë zha saducé, scataa racnie miech grë zha poxtl co, per nli blëë zho, ¹⁸bnabey zho bgaa zho psëëb zho zho ladzguiib stib. ¹⁹Pcow liu co, guieela bdziñ tib xanjl Dios pxal me ro

ladzguiib, blee me zho ga; dzigo rëb me lo zho:

²⁰—Goltsie len̄ yadoo, grëse miech ne ndxie ga golnee lo zho, zeena gacnan̄ zho zha ygaa zho guielmban ndzon ne nodeed Dios niina.

²¹Biinigazh liu, silgaw laa zho bdziñ len̄ yadoo; psilo zho laa zho noseed grëse miech ne ndxie ga.

Laga laa zho noseed miech len̄ yadoo, laa men̄ ne nac pxoz nroob ga, grë me zha ne nacnie me, bnabey zho ycaalsa zha ne nac wxtis ni grë zha non lo men̄guiedz.

Zeene laa grë zha co pcaalsa, dzigo pxeel̄ zho zha ne ziebee grë zha poxtl co ladzguiib. ²²Bdziñ zho ro ladzguiib, ni tib choot guiend̄ len̄ co; rzhitsaque wbire zho güeynie zho diidz, ²³rëb zho:

—¿Choot guiend̄ len̄ ladzguiib! Dziits niooga bdziñ no, ga zo zha ne quianap; per zeene bzhal ro ladzguiib bziaab no, bdziñ no choot guiend̄ len̄ co.

²⁴Grë pxoz ne rnabey, ni men̄ ne zo lo men̄guiib ne rquianap yadoo, zeene bin zhow, rdzieldraa zho zha gun̄ zho. ²⁵Lëëtaaque sca no zho, zeene bdziñ tib zho rëb:

—Zha ne gon̄ bloo to ladzguiib ga, laa zho nolaque len̄ yadoo noseed zho miech.

²⁶Lëëled̄ brieë men̄ ne zo lo grë men̄guiib ne rquianap yadoo, brieenie me bla xaguiib me, güey zho niapse wen diidz güeyxi zho zha poxtl co len̄ yadoo; sac rdzieb zho ngoquie grë miech co zho. ²⁷Zeene bdziinnie zho zho lo grë zha wxtis co, dzigo rëb men̄ ne nac pxoz nroob ga lo zho:

²⁸—¿Pe nacne ronde to diidz? Led pso no diidz lo to csetraade to miech zhiwseed mgui ne nac Jesús ga. Ni na gon̄ dible lad guiedz nu nozhoobnen̄ zhiwseed to i, haxta rcaadzdoḷ to no ne no bdziuut me.

²⁹Dzigo pquiab Pedr rëb Pedr:

—Rdzion no minē rnabey samiech no, per glo none dziuun no minē rnabey Dios no. ³⁰Men co biladz grē pxozgol ne, ni men co gon bleeban Jesús, men ne sca psacsi to beet to lo cruz. ³¹Ni meque zeynie Jesús gbaa, bzoob me Jesús cue me nēz derech; sac Jesús nac men ne rnabey, men ne rsilaa miech lo dol. Ni Jesús gon, gdeed guielbiini lo grēse men Israel gbiire gbig zho lo Dios stib; zeena gunquizhd me zho xtoł zho.

³²Minē rnee no lo to nu diidzliw, nozhal bdziona, ni led loxaque nod-segaa; sinque ye Espiritu Sant men ne rx-eel Dios racnien grē zha ne ron xtiidz me, ye men co quianee ganle ne nliw.

³³Zeene bin zho sca rēb Pedr, blēeye zho, rzac zho tebaa gagazh gut zho gza zha poxtl co.

³⁴Lad zha wxtis co no tib zha farisé lē Gamaliel, ye me rseed miech Xley Dios, tib zha non nac me lo menguiedz; dzigo guso me bnabey me brieē grē zha poxtl co nēz ley, ³⁵bnee me lo grēraa zha ne ndxie ga, rēb me:

—Grēse to menguiedz, laa naa rso didiz lo to, golcobey gon dien pe gun to zha qui. Golguien ganle, nonguiel da ne lega minē gacladztaa to gun to zho.

³⁶Golsoladz ganle, padzeela squi bio tib men ne brieelē Teudas, rēb me laa me niac tib zha ne nabey, ndal zha ne wbig lo me, goclo zho zig tap gayoo. Ni pasē me nabey, zeene laa me gut nēzrii nēzrec bliaał grē zha ne gocnie me ga. ³⁷Laa len iz ne nodop lē miech, scaque brieequia tib men Galilé brieelē Judas. Ndal zha ne gocnie me, per zeene laa me gut scasaque nēzrii, nēzrec bliaał grē zha ne gocnie me; brieelodaque pe niun me. ³⁸Gane nagon rne naa lo to, mazd peet gunde to zha qui, golsaan zho squise golsilaa zho. Tsow glu telne guicse miech biab wseed ne ziaadnie zho i, zdziñ dze ne nitlow. ³⁹Laa telne nligaa Dios rsiaab guic zho squi rseed zho

miech, niacxe zlēb to gnitlo to wseed ne ziaadnie zho. ¡Telne guiab to gnitlo tow, nande to nend Dios ga tilnie to!

⁴⁰Grēse zha wxtis co bzoobdiag zho xtiidz Gamaliel, bien zho ne scataa nonguiel gaca. Dzigo biire bredz zho grē zha poxtl co, bdiñ zho zho, ni biire pso zho diidz lo zho gbiiredraa zho cseed zho miech zhiwseed Jesús. Blozhse ga, dzigo laa zho psilaa zho.

⁴¹Zeene laa zho wbi ga, rley zho por grētaa minē pteed grē zha non co zho loxaque ne riladz zho Jesús. ⁴²Ib psaaand zho zhiwseed Jesús, gzobse dze rie zho yadoo ni rieque zho stib yu stib yu, rnee zho lo miech ne nli lē Men ne zēēble didz cxeel Dios lo guidzliu ga nac Jesús.

Bzo gadz zha ne gun xyudar poxtl

6 Ni ne len dze co quiayac nziarraa miech ne rzēēb xnēz Jesús, dzigo psilo grē zha Gres rlisqui zho, rnee zho rdioond grē wnaa viud ne nac zha ladz zho zaacse; zeene rgaaz ncuaañe row zho, rgaad zho lal minē rgaaz grē wnaa viud ne nac zha Israel.

²Dzigo nacne bredz gza tsiipchop poxtl co grēse zha ne nole xnēz Jesús ga, bnee zho lo zho rēb zho:

—Gacnañ to ganle, grieelodraa ne noque so dziañ no dien zha ygaaz ncuaañe yquiin to, sac gon nonguiel da csaan no minē nac xtsiin no, ib none guioseedraa no miech Xtiidz Dios. ³Min co nagon, mazd golzo gadz zha bgui ne gun dziin co, lēeraasi golguien cho gzo to; golguib zha ne ndzinli, zha ne nixbiini, zha ne nacie Espiritu Sant; ⁴zeena sca guiob lo no gzodiidznie no Dios, gnab no lo me, ni cseed no grēraa miech Xtiidz me.

⁵Grēse zho rēb, wen sca gaca. Horcogazh psilo zho ble zho zha ne so gun dziin co. Bzo zho tib men lē Lip, tib men lē Prócoro, tib men lē Nicanor, tib men lē Timon, tib men lē Parmen, tib

meñ lë Xteb, rlupaa dib zdo me rliladz me Dios ni nacnie Espíritu Sant me; ni tib meñ Antioquí lë Nic, mazd glo Nic goc tib zha ne bleyniedox grë zhiwseed zha Israel. ⁶Dzigo güeynie zho gza zha co lo zha ne nac poxtl. Blozhse bñab poxtl lo Dios gacniën me zho, dzigo pxobnia poxtl guic zho, bñab zho lo Dios gdeed me guiełbiini lo zho.

⁷Zigse zie dze, laa Xtiidz Dios quia-gaazraa dib Jerusalén. Nzian grë zha ne rzëëb xnëz Jesús, haxta grë meñ ne nac pxoz, nzian zho laa zho bliladz me dib zdo zho.

Bnaaz zho Xteb

⁸Goc palal dzew, nzian grë milagr nroob ne run Xteb, sac tibaque sca dib zdo me rliladz me Jesús, ni nacnie Espíritu Sant me.

⁹Laa tib dze, brieequia bla zha ne rie tib xyadoo win zha Israel, lë “Esclavos Libertados” gocladz zho ndildiidznie zho Xteb. Brieaque zla zha Israel ne ziaad nëz Ciren, nëz Alejandrí, nëz Cilis, ni nëz Asia, ye zho gocza zha co rlëë zho lo Xteb. ¹⁰Gonse zho rlëbd xtiidz zho lo Xteb, sac niapse Espíritu Sant rdeed guiełbiini lo me, rien me pe rnee me lo zho; ¹¹dzigo bdiizh zho bla zha ne pt-sieets diidz, pquidie zho rëb zho bin zho laa Xteb noneenë Moisés ni rneenë me Dios.

¹²Zeene bin menguedza, blëë zho; nacne bnabeyaque zha ne rnabey lo menguedz bgaa Xteb güeyzo zho me lo wxtis. ¹³Ni güeynie zho bla zha ne lega bnexuu, rëb zho:

—Nliw, rtsidił mgui qui xyadoo ne, rtsidił me xley ne. ¹⁴Bdzionpaa no gon quianee me laa Jesús meñ Nazaret ne quiazeet zho dib i ctsił yadoo rii, ni ct-sëë me ley ne psan Moisés lo xmengol ne.

¹⁵Horco zeene laa grë zha wxtis co ni grëraa zha ne ndxie ga bui lo Xteb,

gon zho tib biini nroob ne riab lo me, masaque rlu me zig rlu tib xanjł Dios.

7 Dzigo bñabdiidz meñ ne nac pxoz nroob ga lo Xteb, rëb me:

—¿Bnë dieñ pe nli quiayun luu grë ncuaane rnee zho i?

²—Grëse to ne nac to meñladz naa —rëb Xteb—, laa naa rzaac to zig bets naa, zig pxozgaa naa. Golsiguiel golquiaadiag chop tson lan diidz ne gne naa lo to nu ganle: Padzeela, zeene bii no pxozgol ne Abraham dan ne lë Mesopotam, brieequia Dios ndzon ne no gbaa lo me, rëb Dios ³griee me ga, csan me grë meñlidz me, tsie me nëz ne glutaa Dios lo me.

⁴Nacne brie me xtan zha Caldé ga, bey me nëz Harán, ga wban me zhis. Laa zeene laa pxoz me gut, dzigo laa Dios bi-aadnie me nëz rii, zaatne mban ne nu nina. ⁵Niicle ne laa me blanso lo liu rii, ni tib lë win zaatne so ni me bdeete Dios lo me; per rëb Dios ib grë zha xpëed me guiaanniew. ¡Ni laa me quianied mëed len dze co! ⁶Rëbgazh Dios lo me, ib zieban grë zha xpëed me ga ladz beñ dipse len tap gayoo iz, ga csacsi miech zho gunçun zho zho dziin. ⁷“Per ib ted-sod sacsi naa zha ne csacsi zho ga”, rëb Dios, “ni ga griee zho glanso zho nu, nu goolnie zho naa.”

⁸Ni parne glu ib zac miñe bnee Dios lo Abraham ga, dzigo psan me diidz grëse mëëdbgui ne grieequia lo xtiı Abraham none tso tib bey lad zho. Miñ co nagon, zeene laa xpëed me Isaac goc xon ng-bidz, laa me bloo Isaac bey co. Scaque beñ Isaac xpëed me Jacob, ni scaque beñ Jacob gza tsiipchop zha ne goc xpëed Jacob; lëë gza tsiipchop zha co nagon goc pxozgol ne.

⁹Ziese pxozgol ne ga, blëënie zho bets zho zha ne lë José, pto zho José lo meñ ne zie wto nëz Egipt. Ni ne nacnie Dios José, ¹⁰psilaa me José lo grë-taa guiełnë ne bded José, ni gocniën me

José beenbey rey Egipt José. Ib psaaand me José, bdeed me guielbiini lo José. Zeene gon rey co scataa men nixbiini nac José, dzigo bnabey me bzo José goc me tib men non ne bnabey dipse Egipt; haxta grē ncuana non ne no lidz rey, me bnabeya. ¹¹Lëëtaaque len iz ne nac me dziin, biaad tib gbin; dipse xtan zha Egipt, dipse xtan zha Canaan mban bded miech. Grē zha ne goc pxozgol ne ga, guien draa pe gow zho. ¹²Laa zeene bin Jacob laa zho bxtil bii no Egipt, dzigo px-eel me zho güeyxi zho zho bga.

¹³'Zeene goc chop vult ziexi zho zho Egipt, dzigora gocnan zho bets zho ga rnabey Egipt; niiclegaa rey cow, hor coraa beenbey me bets José. ¹⁴Dzigo bnabey José güeyxi zho pxoz me Canaan, güeyxi zho tsiel zho, güeyxi zho xpëed zho. Lo grē zho rga zho tsongal tsiin, laa zho bdzin Egipt.

¹⁵⁻¹⁶'Sca nacne laa Jacob bey Egipt. Ga gut me, dzigo güeyqueets zho me Siquem, tib len baa ne bzhii Abraham lo Hamor; scaque grē xpëed me zha ne goc pxozgol ne ga, ga gut zho. ¹⁷Grē zha ne briequia lo xtii zha gol co, zha ne na guiab ne nac menladz ne, ndal iz ne bio zho Egipt ga, ni ndaldoo goc zho. Laa zeene ziaadyob cuee Dios zho ga zigne rëble me lo Abraham glo, ¹⁸laa men ne nac rey Egipt len dze co, psilo ptsidil zho; sac rsoladzdraa me grëtaa dziin ne been José lo menladz me. ¹⁹Psacsi me zho, been me zho zigne gocladztaa me, haxta bnabey me grëse mëëdbgui ne ral gan draa zho win parne guet win.

²⁰'Len dze copaa nagon gol Moisés, tib mëed niow nac win. Tson mëë bloolan xniala win win, ²¹laa zeene brielodraa ngolan me win, dzigo güeysan me win tib ro guiubee Egipt, ga bdziel tib xind-zoop rey win. Wnaa co gon win, biaan win lo me zig tib xpëed me; ²²haxta bioxco me grëse wseed ne rac zha Egipt, pseed win. Zeene laa win broob, tib men

nixbiini goc win, niicle ne gnee wina, niicle ncuane gungaa wina.

²³'Choo iz rap Moisés, zeene biab guic me güeyted me lo menladz me. ²⁴Dzigo gon me laa tib zha Egipt quiaquin tib zha Israel; nacne bzëëbaque me bla me zho, beet me zha Egipt co.

²⁵'Sca been Moisés, nan me nien grē zha Israel ne Dios bzo me gacnie me zho, csilaa Dios zho ladznia zha Egipt; per biend zho ne scaw. ²⁶Biini liu co, gon me laa chop zha Israel nodil, zie me nla me lo xtil zho, bnee me lo zho nonguield ga til zho, guien zho ganle menladz zho. ²⁷Dzigo biasaque tib zha ne noquiaaw ga pcheep zho me, ntseeb rac zho rëb zho lo me: "¿Cho bzo luu guiaadnabey luu no, guiaadlisquigaa luu dien pe nodziun no? ²⁸¿Te racladz luu ye gutaque luu no zigne beet luu zha Egipt co nieeg?"

²⁹'Zeene bin Moisés sca rëb zha co, hor co bzhoo me bey me nëz xtan zha Madián. Nëz co ptsieelnia me, ga gop tsiel me chop mëëdbgui.

³⁰'Choo iz goc no me nëz xtan zha Madián, tib dze no me cho gui Sinaí, tibaque zeene gon me laa tib anjl zo grol-taa tib lo yag zarz, masaque rso bel lo yag co. ³¹Bzee zdoo me, lëëtaaque laa me zie gbiggax me, zeene bin me tsi Dios rëb Dios lo me: ³²"Naa nac Dios ne bliladz pxozgol luu Abraham, pxozgol luu Isaac, pxozgol luu Jacob."

'Zeene bin Moisés tsi Dios, per nli bdzieb me; lo dzeb co per ni blisdraa me lo me nwi me. ³³Dzigo bnee Dios stib, rëb me lo me: "Blit lab luu, sac gax lo naa i zo luu. ³⁴Laa dze nagon bdzin ne laa naa csilaa grē zha Israel ladznia zha Egipt; sac ran naa zha nactaa grē guielnë ne noded zho ga, ron naa blactaa roon zho nosacsi zha co zho. Ni luu bzooblo naa tsiebee zho ga."

³⁵'Dzigo laa Dios pxeel Moisés ziesilaa me zha Israel; niicle ne glo rëb zho

lo me: “¿Cho bzo luu guiaadnabey luu no, guiaadlisquigaa luu dien pe nodzi-uun no?” Per me bzo Dios bnabey lo zho, blee me zho Egipt.

³⁶ Nzian grè milagr, nzian grè ncuuañe nroob ne gzee zdoe ne been Moisés blee me zho ga; zigtaa len guiedz Egiptow, zigtaa lo Nisdoo Nizhniew, zigtagaa grè dan bidz ne bio zho dipse len choo iz ne bzènie me zho ga.

³⁷ Moisés ga bzeet lo pxozgol ne, ne laa Dios gnabey lo xtiique zho greequia tib men ne cxeel me guidaeed xtiidz me, zigne pxeel me Moisés.

³⁸ Zeene nonie Moisés zho grè dan bidz co, Anjl ne bnee lo me guic gui Sinaí, me pteed xtiidz Anjl co lo zho; me pcaania ley ne biaan lo ne ga, diidz ne rap guielmban. ³⁹ Per ib bind zho xtiidz me, lel gocladz zho mbiire ney zho Egipt stib, ⁴⁰ bnabey zho Aarón rëb zho: “Bzaa tib mdio tedner lo no gacniën no laa no guioo Egipt stib; sac loxaque biadbee Moisés no ga, na choot nanð dien yo Moisés.”

⁴¹ Dzigo bzaa zho tib ngon yeen goc zhimdio zho, haxta beet zho grè ma ne bloogon zho lo mdio co; bleynie zho ncuuañe bzaania zho. ⁴² Nacne wbinladz Dios, psaan me zho; psilo zho bleynie zho grè ncuuañe ran zho zhan gbaa. Been zho zigne bzeetse zha ne biadteed xtiidz me padzeela, zeene rëb zho:

Goṣsoladz ganle,

laa ne nleynie to naa dipse len choo iz ne bio to grè dan bidz co,

laa ne niut ma ne ngogon to lo naa,

⁴³ lel grè mdio ne bzaa to, mdio co bleynie to, lo mdio co pquiiitsgzhib to.

Mdio ne rnee to Moloc,

zaatne zieetaa to tibaque ney to lidza,

zhmel mdio ne rnee to Renfán, pa csaan to ma.

Mincocxe waa, laa naa cuee to ladz to,

gzonëz naa to guey to grè dan ne riaan zitraa lo guiedz Babiloin.

⁴⁴ Len dze ne sca bio pxozgol ne grè dan bidz co, tib yu larse goc xyadoo zho, ga biotsow quie ne quia xley Dios. Dioszhal blu lo Moisés zha tsaa yu co. ⁴⁵ Goc bla iza, zeene blozh bnitlo Dios grè guiedz ne brin nu glo, laa Josué blansonieque yu co. Haxta len dze ne goc David rey, bii lëew nac xyadoo zho.

⁴⁶ David goc tib rey ne gocnziuu lo Dios, bleynie Dios me, dzigo gocladz me nzaa me tib yadoo nroob zaatne mbëzlo zho Dios. ⁴⁷ Per brielod nzaa mew, Salomónraa goc rey ne bzaaw. ⁴⁸ Nli laa yadoo co baa, per tel Dios, men nroob nac me, led yed me cuëz len grè yu ne rzaa miech. ⁴⁹ Zigne zhoobneeque lo Xtiidz me, zeene znu rëb me:

Gbaa nac zaatne zoob naa,

laa lo guidzliu nac zaatne rzo ni naa.

¿Zha nadien nac yu ne nan to gzaa to cuëz naa?

¿Pa nadien guiab to gzaa to zaatne gdziladz naa?

⁵⁰ ¿Niacxe led naad bzaa gbaa?, ¿niacxe led naad bzaa guidzliu?

⁵¹ Golgona sca ganle —rëb Xteb—, zigne beënaque grè pxozgol to ga padzeela, scadaaque gon quiyun to niina. Miech nad, miech ntseeb zdoe nac to; ib ronde to mine rnee Espiritu Sant. ⁵² Tel pxozgol to, nëlte gondze zho grè zha ne pxeel Dios biadnee xtiidz me; haxta beet zho grè zha ne bzeet ne laa Dios cxeel tib men peet xtold ne bzooblo me guiaad lo guidzliu. Ni niina ne laa Dios pxeel men co, scasaque been to, pt-sidiñ to me, bnabey to bgaa me beet to me. ⁵³ Tibaque squi quia to quiaguiits to Xley Dios; xanjlpaa me biaadsana lo to, ni runde to mine rnabea.

Beet zho Xteb

⁵⁴ Zeene bin zho sca rëb Xteb, blëeye zho haxta rowye ro zho rwi zho lo me.

⁵⁵Laa me, ne nacie Espíritu Sant me, zeene blis lo me bui me nēz gbaa, goṇ me lo guieṇdzon ne no Dios, gonpaa me laa Jesús zo cue Dios nēz derech. ⁵⁶Dzigo bnee me, rēb me:

—Ranpaa naa niina goṇ nzhialse gbaa, laa meṇ ne pxeel Dios biaad lo guidzliu ga, laa me zo cue Dios.

⁵⁷Miṇe been zho ptse zho diag zho, ni nguiedz roptsie zho parne gondraa zho pe rnee me; laa zho wbigbe bnaaz zho me, güeynie zho me tib lad ro guiedz. ⁵⁸Zha ne goc textigw ga, blee zho lar ne mbix zho, bdziṇ zhow tib lo mgui nguieg lē Saul, mgui co pquianapa; laa zho psilo bdeedquie me.

⁵⁹Sca nodeedquie zho me, laa me rnab lo Dios rnee me:

—Jesús, luu ne nac luu meṇ ne rnabey, luu pcaania zhiespíritu naa.

⁶⁰Dzigo pquitsgzhib me, ni pquiaa me stib redz nroob bnaab me lo Dios, rēb me:

—Dios, luu ne nac luu meṇ ne rnabey, doṭ ne quiaayṇ miech rii, laa naa rnab lo luu guṇquizhd luu zhow.

Loxaque blozh sca bnee me, laa me gut. Ye mgui ne lē Saul ga, bdeed diidz sca beet zho me.

8¹⁻²Dzigo pcaalsase bla zha bgui ne noxco rleynie Dios, güey zho güeyqueets zho Xteb; mban rac zho, bio zho xquielnē me.

Leṇ dze co, psilo zha ne sca rlēenie zha ne riladz Jesús, ptsidiṭ zho grēse zha ne riladz me; dipse leṇ guiedz Jerusalén pquianaṭ zho zho. Grēse zho bzhoon, zha ne zie grēraa guiedz ne ndxie nēz Judé ga, zha ne zieegaa nēz Samar; loxaque zha ne nacse poxtl biaan Jerusalén. ³Ntseeb rac Saul, rzac me tebaa zha gnitlogazh me grēse zha ne riladz Jesús. Stib yu stib yu zie me, riebezhoo me zho lidz zho, mgui wnaasaque rey me riesēeb me zho ladzguuib.

Bdziṇ Xtiidz Jesús nēz Samar

⁴Laa grē zha ne bzhoon Jerusalén ga, zaatne zieetaa zho rnee zho Xtiidz Jesús lo miech. ⁵Zig nac Lip, zeene bdziṇ me tib guiedz nēz Samar, psilo me bnee me Xtiidz Jesús lo grē miech co. ⁶Ndal zho rquiaadiag miṇe rnee me, rzee zdoz zho ran zho grētaa milagr ne ruṇ me. ⁷Ndal grē zha ne noguitnie mendox, riac zho, rquiaadan grē mendox co redz zeene laa ma rzhoon; grē zha ne gutoo, grē zha ne nde ni, ruṅguiac me zho. ⁸Grēse miech ne no guiedz co, rley zho.

⁹⁻¹¹Ga no tib meṇ ne rool diidz dox, lē Simón. Ye me rzee zdoz miech grē ncuaaṇe ruṇ me. Nzianle iz sca noquidie me zho, grēse menguiedz runbey me, haxta niats rac me rnee me guieṇdraa cho zig me. Grēse zho, haxta grē zha non rbig lo me, rzac zho lē poder ne rap Dios ga nacie me.

¹²Laa zeene bnee Lip lo grē miech co gocnaṇ zho diidz ndzon ne nac Xtiidz Dios, bin zho zha racladz Dios gban zho, bin zho cho nac Jesús; grēse zha ne bliladza, mgui wnaasaque, laa zho brobnis. ¹³Dzigo yeque meṇ ne lē Simón ga bliladz Jesús, ye me laa me brobnis; zaatne zieetaa Lip naṭ me zhits Lip, rzee zdoz me ran me grētaa milagr nroob ne ruṇ Dios.

¹⁴Grē zha poxtl ne no Jerusalén, zeene gocnaṇ zho scataa ndal zha Samar no-caania zhiwseed Jesús, dzigo pxeel zho Pedr grop Juan zie nēz co. ¹⁵Laa zho zie gnab zho lo Dios yгаа grē zha ne bliladze Jesús ga guieṭbiini chen Espíritu Sant; ¹⁶sac zeene bliladz zho Jesús, loxaque brobnisse zho, gard yгаа zho guieṭbiini co. ¹⁷Bdziṇ zho pxobnia zho guic grē meṇ co, bnaab zho lo Dios; dzigo grēse meṇ co laa me bgaa guieṭbiini ne rdeed Espíritu Sant.

¹⁸Zeene goṇ meṇ ne lē Simón ga, ne loxaque rxobniase zha poxtl co guic grē

miech co laa zho rgaa guielbiini ne rdeed Espíritu Sant, dzigo laa me rdeed dimi,¹⁹ rëb me:

—Golneedz poder qui lo naa; zeena ye naa zha ne cxobniataa naa guic yгаа zho guielbiini ne rdeed Espíritu Sant.

²⁰ Pquiab Pedr rëb Pedr lo me:

—¡Bien ganle pe rnee luu! ¿Pa bin luu ye xpoder Dios zac si miech? ¡Tebaa ninagazh nitlo luu grë xtimi luu i! ²¹ Ni lalnu rieguaıd luu gun luu dziin rii, ni gdziıdgaa dze gun luuw; sac mbed zdoo luu, zienied guic luu gun luu mine rnabey Dios. ²² Blee zhgab yozh qui guic luu, bnab lo Dios zeena togo squia zdoo me luu, gunquızhd me luu dol ne squi bza zdoo luu i; ²³ sac rlu niapse guielntseeb nonie guic luu, ni lëëque luu gon nosacsi luu ne squitaa noyunctal luu xtol luu.

²⁴ Pquiabse me rëb me:

—Golgun guielnzaac, golnab lo Dios yquia zdoo me naa, zeena ygaad naa grë guielnëdoh ne rnee to i.

²⁵ Blozhse bzodiidznie Juan grë miech co grop me Pedr, blozhse pseed zho zho Xtiidz Dios, laa zho wıbire zey zho Jerusalén stib. Guiedz ne rdedtaa zho dib xtan zha Samar ga, rnee zho Xtiidz Dios lo grë miech co.

Bzodiidznie Lip tib men Etiopı

²⁶ Laa Lip no Samar ga, tib dze brieequia tib xanjı Dios lo Lip, rëb me tsie Lip nëz ne rree Jerusalén zie nëz Gaza.

²⁷ Dzigo güey Lip nëz co. Tib dan ngana, lëëtaque laa tib men ne nac dziin lo rein ne lë Candás zie ga, dziin nroob nac me lo rein co, sac me ngotsow grë-taa dimi ne no Etiopı. ²⁸ Zobse me tib len carret nroob zie me ga; znu wıbirele me Jerusalén güeygan me Dios. Laa me zob leen co quialab me lo Xtiidz Dios mine pquiaa Isá, men ne biadteed xtiidz Dios padzeela.

²⁹ Dzigo bnabey Espíritu Sant Lip tsie Lip yгаа carret co lo Lip. ³⁰ Zeene bgaa carret co lo Lip, bin Lip pa lo nolab men co; nacne rëbchaa Lip lo me:

—¿Pe rien luu cho raquiet zaatne nolab luu i?

³¹ —Riend naaw —rëb me—, rquiin tib zha ne gnë lo naa dien zha naca.

Dzigo bredz me Lip biep Lip len carret co, güeysoob Lip cue me.

³² Znu rnee zaatne nolab me ga:

Zigne racse mëcwııl yeen zeene rnaaz zho ma rut zho ma, scadaa ndooladz goc me, peet beend me zeene laa zho zienie me. Ni zigne roptsied ma zeene rtsiib zho ma, scaque ni tib diidz ptsired me lo zho.

³³ Niicle ne gon zho scataa ndooladz me, per psacsi zho me.

¡Pa lotaa bdziı guielntseeb ne been grë menladz me!

Sac gon, ptiche zho xquielmban me lo guidzliu.

³⁴ Dzigo rëbchaa men co lo Lip:

—Bzhiguiel bnë lo naa dien, cho nu znu rzeet Isá lo rii. ¿Pe me bded min rii, te stib zhow ye?

³⁵ Dzigo rëb Lip lo me Jesús raquiet ga, ni bnee Lip grëraa mine nac zhiwseed Jesús. ³⁶ Laa zho no nëz, tıbaque zeene bdziı zho tib lugar co no nis; rëbchaa me lo Lip:

—¡Bui ganle laa nis no nu! Mazd bzhiguiel pchoobnisgazh naa.

³⁷ [—Zaca —rëb Lip—, totsaque dib zdoo luu rliladz luu Jesús.

—Rliladz naa me —rëb men co—, rliladz naa ne nli Xpëed Dios nac me.]

³⁸ Dzigo bnabey me blëz carret co ga. Biet me leen co grop me Lip bzëëb zho lo nis co, ga pchoobnis Lip me. ³⁹ Blozhse ga, laa Espíritu Sant blis Lip gondraa me Lip; per rley me laa me bio nëz stib, laa me zie.

⁴⁰ Zeene laa Lip brieequia, laa Lip nole guiedz ne lë Azot. Ga psilo me zigse zie

me, guiedz ne rdedtaa me rnee me Xtidz Dios lo grē miech co. Sca bio me nēz, haxta bdziñ me guiedz Cesarea.

Gon̄ Saul Jesús

9 Laa mgui ne lē Saul ga, per nli ntseeb rac me, tibaque ne laa guic me zienie gut me grēse zha ne riladz Jesús. Güey me lo meñ ne nac pxoz nroob, ² bdeed pxoz co ti xtiidz me guey lo grē zha ne zo lo xyadoo zho nēz Damasc, parne gacnie zho Saul gnaaz zho grēse zha ne riladz Jesús; zha ne ygaataa niicle mguiw niicle wnaaw, gzobdoo zho zho tsiesañ zho ladzguiib Jerusalén.

³ Laa Saul bio nēz, laa Saul zie. Zhile gdziñ me guiedz Damasc, tibaque zeene brieequia ti biinidoo zhan gbaa biab zaatne zie me ga. Grołtaa lo biinidoo co biiaan me, biabgagh me liu. ⁴ Liu nix me, bin me zēēb ti tsi meñ co rnee lo me:

—Saul, Saul, ¿pe nacne quianañ luu naa?

⁵ —Been̄ guieñzaac —rēb me—, bnē dien̄ cho luu.

Dzigo pquiab meñ co, rēb me:

—Naa nac Jesús meñ ne squi quiatsidil̄ luu. [Lēēque luu gon̄ nosacsi luu i, rzac luu zigne rzac ngon ne rcaañni, ni lēēque lo guuib lots ne rtseb zho ma riecaañni ma.

⁶ Rdzieb Saul, rzhidz me lo dzeb co rēb me:

—Bzhiguiel̄ bnē dien̄, ¿pe racladz luu gun̄ naa niina?]

Rēbchaa Jesús lo me:

—Guche i, güey Damasc, ga gnē zho ganle pe nac mine no gun̄ luu.

⁷ Zha ne ziegza Saul ga per nli bdzieb zho, haxta ni gacdraa gnee zho; loxaque tsi meñ co ron zho zēēb, per choot ran̄d zho.

⁸ Laa Saul guche ga. Zeene laa me pxal lo me gwi me ran̄draa me, ¡laa lo me pcowle! Zha ne ziegzale me ga bzhen̄ nia me bdziñ me Damasc. ⁹ Tson̄ dze sca

brieelod nian̄ me, gzase dze co dowd me, niicle peet god me.

¹⁰ Guiedz Damasc ga, ga no ti mgui ne riladz Jesús lē Ananí; dzigo gon̄ me Jesús, bredz Jesús me. Pquiab me, ¹¹ dzigo rēbchaa Jesús lo me:

—Güey nēz ne lē Derech, zaatne nac lidz ti mgui lē Judas; ga bnabdiidz meñ Tars ne lē Saul. Zeene quiazodiidznie me naa, ¹² blu naa lo me laa tib zha lē Ananí bdziñ rxobnia guic me, zeena gbiire gan̄ me stib.

¹³ Pquiab Ananí rēb Ananí:

—¿Saul ye? Ziyon naa name zha nac grētaa ncuaane noyūñ me Jerusalén, notsidil̄ me grē zha ne riladz luu.

¹⁴ Haxta pxoz nroob ne rnabey bdeed didzbey gnaaz me grēse zha ne no nēz rii.

¹⁵ —Güey —rēb Jesús lo Ananí—, sac laa naa bzooblolē me, ib me tsie grē guiedz zit tsieseed me miech xtidz naa, me gneew lo grē zha rnabey, ni lo grēgaa zha Israel. ¹⁶ Na naa glu lo me ganle zha nac grē guieñē ne gan̄ me, zeene laa me quiaayunle xtsin̄ naa.

¹⁷ Dzigoraa güey Ananí zaatne no Saul ga. Bdziñ me, pxobnia me guic Saul, rēb me lo Saul:

—Saul, bina ganle bets, laa Jesús gon̄, meñ ne rnabey, meñ ne brieequia lo luu zeene ziaad luu nēz ga, laa me pxeel̄ naa ziañ naa nu; zeena gnab naa lo me gunguiac me bziaalo luu, ni ycaania luu guieñbiini ne rneedz Espiritu Sant.

¹⁸ Zigne sca bnee Ananí, laa lo Saul biacgagh; lega zigne nac xmed meñ nac grē ncuaan̄ co brieē lo me. Horcogagh laa me brobnis. ¹⁹ Blozh ga laa me dowd stib, zhiga zhiga laa me wbire pcaa fuerz.

Goc bla dze no Saul lo grē zha ne riladz Jesús Damasc ga, dzigo brieē me ²⁰ güey me grē yadoo win ne no ga, rnee me lo grē miech co cho nac Jesús, rnee me lo zho ne nli Xpēēd Dios nac Jesús.

²¹ Rzee zdoo grēse miech co ran̄ zho sca rnee me, rneechaa zho:

—¿Led lëe men qui ga name scataa ntseeb rac Jerusalén, notsidil me grë zha ne riladz Jesús? Conque nac diidz min co ziaad me nu, ziadnaaz me zho tsiesan me zho lo grë pxoz ne rnabey.

²² Per zigse zie dze, mazdraa rac Saul tibaque ne rnee me lo grë miech co, lëe men ne zëëble diidz cxeel Dios lo guidzliu ga, nac Jesús. Grë zha Israel ne no ga, riendraa zho dien pe gliladz zho.

²³ Goc bla dze no me ga, laa grë zha Israel ne no ga blëe lo me; bnediidz zho rëb zho laa zho gut me. ²⁴ Dze guieel riesobnap zho gzaase zaatne rap biedz nroob ne ndze igo guiedz co nëz, riequiambëz zho ted me, gut zho me. Per gocnan mew, ²⁵ nacne gol ti pcow liu pcaalsa grë zha ne bliladz mine bnee me, bloo zho me ti len chicuid nroob, bzoob zho doow dzigo blit zho me cho biedz nroob ne sca ndze igo guiedz co. Sca bdeeda diidz brie me ga.

Bdzin Saul Jerusalén

²⁶ Zeene bdzin Saul Jerusalén gocladz me ndzin me lo grë zha ne riladz Jesús ga, per lel bdzieb zho zeene gon zho me, sac riladzd zho ne nli yele me bzëëb xnëz Jesús. ²⁷ Dzigo güeynie Bernabé me lo grë zha ne nac poxtl, bzodiidz Bernabé lo zho zha gon me Jesús zeene no me nëz zie me Damasc, zha rëb Jesús lo me; ni zha bdziebd me bnee me lo grë miech cho nac Jesús, len dze ne blëz me Damasc. ²⁸ Dzigoraa pcaania zho me. Laa zho gogza me, zaatne zietaa zho zieseed zho miech, ib rdziebd me rnee me cho nac Jesús.

²⁹ Briequia bla zha Israel ne rnee xtiidz zha Gres bdiididznie zho me. Zhisaque goca, laa zho gocladz niut zho me. ³⁰ Zeene gocnan grë zha ne riladz Jesús gaw, dzigo güeyan zho me guiedz Cesarea; ga brie me laa me zie nëz Tars, zaatne nac ladz me.

³¹ Len dze co, grëse miech ne no xnëz Jesús, zigtaa zha ne no Judé, zha ne no Galilé, zha ne nogaa Samar, nguieel rac zho peet lo guieelxtseeb nodraa zho; zigse zie dze riogucraa zho zha nac Xtiidz Dios. Grëse zho rioxco zho mban zho zigne rnabey me, tibaque nacie Espíritu Sant zho. Ni scagaa, zigse zie dze ndal grë miech ne rzëëbraa rcaania Xtiidz Dios.

Rieted Pedr lo grë zha ne riladz Jesús

³² Len ngbidz coque, zie ziaad Pedr rieted me lo grëse zha ne riladz Jesús. Nacne güeyted me lo grë zha ne no Lida. ³³ Guiedz co, beenbey me ti mgui lë Ené, gocle xon iz nix mgui co, ib gacd së me sac dipse me gutoo. ³⁴ Dzigo rëbchaa Pedr lo me:

—¡Ené, niinagazh gon laa Jesús gunguiac luu! Na zeen guche i blis xta luu.

Zigne sca bnee Pedr laa men co biac, laa me guche ga. ³⁵ Grëse men Lida, grëse men Sarón zeene gon zho sca biac men co, grëse zho bliladz Jesús.

³⁶ Gaxaque Lida riaan ti guiedz lë Jop. Jop ga no ti wnaa ne riladz Jesús, lë Tabit (laa xtiidz zha Gres rnee zho me Dorc). Nquialadz me miech, grë zha ne guiend pe yuiin, run me xyudar zho. ³⁷ Lega nacle blanguidz me, laa me gut.

Zha ne riladz Jesús ga, laa zho noxco dien zha ygueets me. Bgaz zho me, blozhse ga güeyxob zho me sti len yu ne riaan nëz glaa. Xco co no zho, ³⁸ zeene bin zho laa Pedr no Lida. Pxeelaque zho chop zha bgui zienie diidz lo Pedr tsieniob Pedr Jop.

³⁹ Zigne bdzinie zha co diidz, zienalgazh Pedr zhits zho. Bdzin zho lidz men co, zolinëz güeynie zho Pedr zaatne zhoob me. Nzian grë wnaa viud ndxie ga, wbigbe zho lo Pedr, roon zho rlu zho grë lar ne bdib me. ⁴⁰ Dzigo bnabey Pedr brie zho ley grëse zho, laa me bi-

aan ga, pquitsgzhìb me bñab me lo Dios. Blozhse ga wbig me lo ngutoo co, bnee me lo me rëb me:

—Guche i, Tabit.

Zigne sca rëb Pedr laa lo ngutoo co bzhial, zeene gon me laa Pedr zo ga, laa me bzobli. ⁴¹ Bzhen Pedr nia me, bliso Pedr me, dzigo bredz Pedr grë zha ne rliladz Jesús ga, ni grë wnaa viud co; gon zho laa me brieëbanle.

⁴² Dipse lad guiedz co bzhoob diidz sca brieëban wnaa co; grë zha ne bina, ndal zho bliladz Jesús dib zdoo zho.

⁴³ Nzianlaa dze biaan Pedr ga, blëz me lidz Simón ti men ne rcuudz grë guid ma.

Güeyzodiidznie Pedr Cornel

10 Guiedz Cesarea, ga no ti men lë Cornel, rnabey me lo ti partid menguiib lë partid Italian. ² Zigtaa mew, zigtaa grë menlidz mew, dib zdoo zho rliladz zho Dios, noxco zho mban zho zigne racladz Dios. Tibaque nonab zho lo Dios, ni nroob ncuaane rgad zho lo grë zha ne guiend pe yquuin.

³ Tib dze, bdzele dzew tibaque zeene gon me laa ti xanjl Dios bdziñ zaatne zo me, bredz lë anjl co me. ⁴ Dze rwi me lo anjl co, rdzieb me laa me pquiab. Dzigo rëbchaa anjl co lo me:

—Gocnan ganle grëse mine rnab luu lo Dios ron mew, ni ran me grëtaa yudar ne squi quiaayun luu lo grë zha ne guiend pe yquuin. ⁵ Gacxe waa, laa naa zialnie diidz lo luu: pxeel bla zha ne tsie guiedz Jop tsixi zho ti men ne lë Simón Pedr. ⁶ Gax zaatne nac ro nisdoo, ga no ti men lëque Simón, rcuudz me grë guid ma; lidz men co ga rëz me; ga tsieguib zho me.

⁷ Zeene laa anjl co zey, dzigo bredz me chop zha ne quia dziin lidz me, ni bredz me ti zhaguiib ne nacgrë zhaguiib ne zopaa gax lo me; dib zdoo zhaguiib co rliladz zho Dios. ⁸ Blozhse bzodiidz me lo gza zha co zha bzhaac me, dzigo laa me pxeel zho ziexi zho Pedr Jop.

⁹⁻¹⁰ Biini liu, zig rwe ngbidza gaxle Jop zie zho. Lëëtaaque hor co laa Pedr biep nëz glaa guic yu ne rbëz me ga. Rcaabedz me, dzigo laga noyacro ncuaane gow me laa me biep guic yu co ziezodiidznie me Dios. ¹¹ Dios nozodiidznie me, tibaque zeene gon me laa ti lar nroob ziad-zëëb zhan gbaa, nzhidoo gzatap nëza laaw bdziñ lo me. ¹² Grë lose ma no lo lar co, ga no ma ne rzë gza tap ni, no grë ma ne rzë zigne rzë meel, ni no grë ma ne rsiibe. ¹³ Horco bin me ti tsi men co, rëb lo me:

—Pedr, ma ne racladztaa luu gow luu zac gut luu ma.

¹⁴ Pquiab me rëb me:

—iMin cogaa nagon grieelod! Wlaltaa gard gow naa grë ma beed qui.

¹⁵ Rëbchaa men co lo Pedr:

—Grë ncuaane beenlayle Dios, nodne gnee luuw ncuaan beed.

¹⁶ Blulo lar co tib, bluloquew stib, laa zeene biontaa gon mew dzigo laaw biire bzoquia nëz gbaa.

¹⁷ Lëëtaaque laa Pedr no zhgab dien pe nacne sca gon me lar co, laa zha ne pxeel Cornel ga bdziñ ro yu ne rbëz me ga, ¹⁸ rnabdiidz zho me.

¹⁹ Zhgab co no Pedr, zeene rëb Espiritu Sant lo Pedr:

—Laa tson zha bgui gon ziaadguib luu.

²⁰ Biet, bnee lo zho. Ib peet tsienied guic luu güeynal zhits zho, sac naa rnabey ziaad-xi zho luu.

²¹ Dzigo laa Pedr biet ga, bdziñ me lo zha ne pxeel Cornel ga, rëb me lo zho:

—Naa nac Simón Pedr. ¿Pe nac mandad ne ziaad to?

²² Pquiab zho rëb zho:

—Laa no ziaad xmandad Cornel, ti men ne rnabey lo menguiib Cesarea. Laa me pxeel no ziaad-xi no luu, sac ti xanjl Dios rëb lo me cxeel me zha ne guiaad-xi luu tsie luu lidz me, tsienee luu lo me. Ti miech wen nac me, dib zdoo me rliladz me Dios, grëse zha Israel rleynie zho me.

²³ Dzigo bredz Pedr zho bded zho nëz len yu; ga biaan zho wdze co. Biiniraa liu zienie zho me, ye palal zha Jop, zha ne riladz Jesús zianał zhits me.

²⁴ Dze ne rac chop ngbidz brieë zho Jop, laa zho bdziñ Cesarea. Laa Cornel bredzle grë menlidz me, grë zha ne ndzieeldiidz me; ndal nac zha ne ndxie nie me lidz me, quiambëz me Pedr. ²⁵ Zeene laa Pedr bdziñ, brieë me güeydzieelo me Pedr, pquitsgzhib me lo Pedr nan me niun me Pedr zigne riegā me Dios. ²⁶ Dzigo bliso Pedr me, rëb Pedr lo me:

—jGuso i, nodne yquitsgzhib luu lo naa! Bien ganle samiechaque luu nac naa.

²⁷ Dzigo laa menguiib co guso ga. Nozodiidz zho laa zho bzëëb len yu. Zeene bdziñ zho zaatne ndxie grë miech co, ²⁸ psilo Pedr bnee me lo zho, rëb me:

—Nanle to ganle zha Israel naa, ni ib lo xley no rnabey nodne ziaab no lidz grë zha zit, per ni ctsieelsad no zho; per laa niina laa Dios blu lo naa, grëse miech ne beenlayle me nod pe nacne gbix zdoonaa gan naa zho. ²⁹ Gacxe waa, zigne gocnan naa laa to rbedz naa, zialnalgazh naa zhits zha ne pxeel to. Nana sca, gołnë dien pe nacne bredz to naa.

³⁰ Dzigo bzodiidz Cornel zha bzhaac me, rëb me:

—Nadze rac tap ngbidz ga, zig znaw gon, no naa lidz naa nu nocuan naa, ni nonab naa lo Dios. Tibaque zeene gon naa laa ti mgui zole lo naa, masaque ri-aazbel xab me, ³¹ në me: “Gocnan ganle grëse mine rnab luu lo Dios ron mew, ni ran me grëtaa yudar ne squi quiayun luu lo grë zha ne guiend pe yquiin. ³² Gacxe waa, laa naa zialnie diidz lo luu: pxeel bla zha ne tsie guiedz Jop tsixi zho ti men ne lë Simón Pedr. Gax zaatne nac ro nisdoo, ga no ti men lëque Simón, rcu-udz me grë guid ma; lidz men co ga rbëz me; ga tsieguib zho me.” ³³ Sca nagon në

men co lo naa, nacne bnabey naa biaadxi zho luu; ni xquizhga luu ne laa luu ziaad. Dios zobwi ganle, grëse no laa no ndxie nu par yquiaadiag no mine bnabey me luu gnë luu lo no.

³⁴ Dzigo rëbchaa Pedr:

—jNaraa rien naa, led yed Dios cue miech dien cho nac zha Israel, cho nacga zha zit! ³⁵ Sinqe grëse miech lo guidzliu, tel pa guiedztaa nac zho, rcaania me zho totsaque ron zho mine rnabey me, ni rioxco zho zaacse rban zho. ³⁶⁻³⁷ Rgobey naa ziyonle to Diidz Ndzon ne pxeel Dios lo menladz naa niina wriin. Lo Diidz Ndzon co rnee, ne zac guiaanwen miech lo Dios, totsaque gliladz zho cho nac Jesús, men ne zëëble diidz ga cxeel me (ni Jesús gon bzaa grëtaa ncuane no). Zig nac dib Judé, desde ne psilo Juan pseed me miech Galilé, laa zho gocnana. ³⁸ Ni nanaxe to ganle, bdeed Dios poder lo Jesús, pxeel me Espíritu Sant gocnie Jesús. Zaatne bdedtaa Jesús, pquia zdoon me miech, grë zha ne nosacsi mendox psilaa me zho ladzania ma; sacne nli Dios nacnie me. ³⁹ No ne nac no zha ne bzianie me, grop lo no bdzian no grëtaa milagr ne been me, zigtaa Jerusaléna zigtagaa dib Judéw. Jerusalénpaa ga beet zho me pquiaa zho me lo cruz, ⁴⁰ per zeene goc tson ngbidz laa Dios bleeban me, ni bneedz Dios diidz biire bdzian no me. ⁴¹ Led grëdraa miech gon me, loxaque nose bdzian me; sac ib Dios bzooblo no dzian no grë dziin ne been me. Haxta bdiownie no me, bdionie no me, ⁴² ni pxeel me no gnee no lo miech gacnan zho ganle laa Dios bzo me, me gun guielwxtis gal dze ne laa Dios cuedz grëse miech, zigtaa zha guta zigtagaa zha mbana. ⁴³ Me ga bzeet grë zha ne biadteed Xtidz Dios lo miech padzeela, zeene rnee zho: “Grëse zha ne gliladz cho nac me, silaa Dios zho lo dol.”

⁴⁴Laa Pedr bii quianeeque, zeene laa grë zha ne noquiaadiag ga bgaa guielbiini ne bdeed Espíritu Sant lo zho. ⁴⁵⁻⁴⁶Grë zha Israel ne ziegza Pedr ga, zeene gon zho laa grë zha co psilo quianeeque tib diidz, ni rdeed zho xquizh lo Dios, bzee zdoo zho gon zho ye grë menzit rga guielbiini ne rdeed Espíritu Sant. ⁴⁷Dzigo rëbchaa Pedr:

—¿Peraa nadien gbiaaz ne, ne cchoobnisa gazhd ne zha rii? Laa ne bdzianle ganle zigne rdeed Espíritu Sant guielbiini lo zha Israel, scaque bdeed me guielbiini lo zho.

⁴⁸Dzigo bnabey Pedr brobnis zho, laa zho bzëeb xnëz Jesús.

Blozh ga bnee Cornel lo Pedr cuëz me ga ti bla dze.

Bzodiidz Pedr zha güey me lidz Cornel

11 Grë zha poxtl ne no Jerusalén, ni grëraa zha ne riladzle Jesús zha ne no Judé, bin zho sca bliladz gza menzit co Xtiidz Dios. ²Dzigo zeene laa Pedr bdziñ Jerusalén güey bla zho güeytiidiidznie zho Pedr, ³blisqui zho lo Pedr pe nacne güey Pedr lidz menzit, pe nacne güeytownie Pedr zho.

⁴Dzigo psilo Pedr bzodiidz me lo zho zha nacne güey me lidz men co, rëb me:

⁵—Guiedz Jop no naa, tib dze lëetaque nozodiidznie naa Dios, tibaque zeene gon naa laa ti lar nroob ziadzëeb zhan gbaa, nzhidoo gzatap squina laaw ziaad nëz lo naa. ⁶Zeene bdixlo naa bui naa dien pe quia lo lar co, gon naa niapse ma no lo co, grë ma ntseeb, grë ma ne rzë gzatap ni, grë ma ne rzë zig rzë meel, ni grë ma ne rsiibe. ⁷Lo grë ma co nowi naa, zeene bin naa ti tsi men co, në lo naa: “Pedr, ma ne racladztaa luu gow luu, zac gut luu ma.”

⁸Dzigo pquiab naa rep naa: “Min cogaa nagon grielod, waltaa gard gow naa grë ma beed qui.” ⁹Nëchaa me lo

naa: “Grë ncuaaane beenlayle Dios, nodne gnee luuw ncuuan beed.”

¹⁰Tson vuelt sca gon naa lar co. Blulow tib, bluloquew stib, zeene biontaa gon naaw dzigo laaw biire zey gbaa.

¹¹Loxaque blozh gon naa lar co, laa tson zha bgui blanso ro lidz men ne blëz naa ga, pxeel men Cesarea co zho ziaadguib zho naa. ¹²Ni laa Espíritu Sant bneeque lo naa, no ganañ naa zhits zho, niicle ne zhazit nac zho; nacne bianal naa. Ye gza xoop zha ne zialnie naa nu bzë bio no.

¹³Bdziñ no lidz men co, psilo me bzodiidz me lo no zha bzhaac me, në me len yu no me, zeene gon me ti xanjl Dios, rëb anjl co lo me cxeel me bla zha ne tsie Jop tsixi zho naa ¹⁴zeena gane naa lo me zha grielo csilaa Dios me lo dol grë menlidz me.

¹⁵Laa naa psilo quiane lo me grë menlidz me, zeene grëse zho laa zho pcaania Espíritu Sant, ni bgaa zho grë guielbiini ne rdeed me zigne bgaaque new. ¹⁶Ga nagon psoladz naa xtiidz Jesús men ne rnabey ne, zeene znu në me lo ne: “Nli nisse pchoobnis Juan miech, sangue to zgaa to guielbiini ne rneedz Espíritu Sant.” ¹⁷Sca nagon pcaania zho Espíritu Sant, laa zho bgaa guielbiini ne rdeed me zigne bgaaque new. ¿Cho nac naa nadien ne glisqui naa mine run Dios?

¹⁸Zeene blozh bin zho grë mine bnee Pedr ga, peet rëbdraa zho. Psilo zho rleynie zho Dios, rdeed zho xquizh lo me; sac hor coraa bien zho ye grë menzit zrielo gbig zho lo Dios, gdeed me ti guielmban ndzon ne gdzind dze lozh lo zho.

Bliladz zha Antioquí Xtiidz Dios

¹⁹Zeene sca pquianañ zho grë zha ne riladz Jesús len dze ne beet zho Xteb ga, nëzrii nëzrec bliaañ zho. No zho bdziñ haxta Fenicia, no zho bdziñ Chipr, no-

gaa zho bdziñ nëz Antioquí. Zaatne bdziñtaa zho bnee zho cho nac Jesús, per loxaque lo grë meñladz zho bnee zhow. ²⁰Niicle ne scaw, lëëque grë zha Israel ne no Chipr, zha ne no Ciren, zeene laa zho bliladz Jesús güey zho guiedz Antioquí, bnee zho lo grë zha zit co cho nac Jesús. ²¹Ni ne nacie Dios zho, ndal grë miech co bzëëb xnëz Jesús.

²²Grë zha ne no Jerusalén, zeene gocnan zhow pxeelaque zho Bernabé güey Antioquí. ²³Zeene bdziñ Bernabé Antioquí, rley me gon me scataa quaiyunlay Dios grë miech co; dzigo pso me diidz lo zho ib csaand zho zhiwseed Jesús.

²⁴Ti meñ dib zdoó rliadz Dios nac Bernabé, nacie Espíritu Sant me, ti miech wen nac me; gane zeene laa me bdziñ ga nzianraa zha ne bliladz Jesús.

²⁵Goc palal dzew, dzigo güey Bernabé guiedz Tars güeyxi me Saul, bdziñnie me Saul Antioquí. ²⁶Dipse ti len iz blëz zho ga grop zho, blozh pseed zho grë zha ne bliladz Jesús. Ga gloopa psilo ne laa grë zha ne rliadz Jesús brieelë CRISTIAN.

²⁷Len iz co blalaa zha ne noteed xtidz Dios no Jerusalén. Dzigo brieë zho ga güey zho Antioquí. ²⁸Lad co no tib meñ lë Agab, psiaab Espíritu Sant guic me bnee me laa ti gbin dox gan miech nëz Israel. (Ni nligaa scase goca, lëë gbin co biaad len iz ne zobnabey meñ ne lë Claud.)

²⁹Grë zha ne rliadz Jesús Antioquí, zeene bin zho sca rëb Agab, nacie bnedidz zho grë zho, tel palalaa ncuaañe rgaa lo zho tib tib zho gdeed zhow gaclo ti gon cxeel zho lo zha Judé. ³⁰Dzigo ptop zho gon co, zeene laaw goclo, pxeel zho Bernabé grop Saul güeyšana lo grë zha rnabey ne zo lo zha ne rliadz Jesús nëz Judé.

Bio Pedr ladzguiib

12 Len dze co psilo rey Herod notsidil me grë zha ne rliadz Jesús.

²Rnabey me bgaa Jacob bets Juan, beet zho Jacob lo spad.

³Zeene gon Herod rley grë zha ne rnabey lo menguedz Israel ran zho zha rsacsi me grë zha ne no xnëz Jesús ga, dzigo rnabeyaque me bgaa Pedr bio Pedr ladzguiib; lëëtaque len dze co noyac lni Pascw. ⁴Laa Pedr no ladzguiib, rnabey me bzo xon nëz menguiib quianap Pedr. Quiambëz me tedse lni co, laa me cuee Pedr gan grë menguedz zha csacsi me Pedr.

⁵Grë zha ne rliadz Jesús, zeene gocnan zho scataa ndxienap menguiib Pedr no Pedr ladzguiib, psilo zho tibaque quianab zho lo Dios gacnieñ me Pedr.

⁶Nacle diidz pa dze cuee Herod Pedr. Wdze ne guini liu co, laa Pedr nixguiesse len ladzguiib; tib ga caden zob ti nia me, tibga menguiib tib nëz cue me, ni zhaaque zo zla zha ne quianap ro ladzguiib. ⁷Tibaque zeene biab ti binidoo len ladzguiib, laa ti xanj Dios bdziñ ga. Bdziñ me, pcaannia me cue Pedr, pcuaan me Pedr, rëb me:

—iNa zeen guche i!

Zigne sca bnee anjl co, lega zhal caden ne zob nia Pedr ga bzhihala brieew nia Pedr; ⁸dzigo rëbchaa anjl co lo Pedr:

—iPxidoo len luu, pquiaa lab luu ni luu!

Blozhse pxidoo Pedr len Pedr, ni pquia lab Pedr; rëbchaa anjl co:

—iWbix xab luu na, zeen dënal zhits naa!

⁹Nalse Pedr zhits anjl co laa Pedr brieë ga. Riend Pedr ne nli nosilaa anjl co Pedr, masaque rzac me nonixquieel mew. ¹⁰Bded zho chop len yu zaatne ndxie menguiib ne quianap, laa zho bdziñ zaatne quia puert guib ne rrieë ro nëz. Zigne bdziñ zho, zhal puert co bzhihala; laa zho brieë. Bzënie anjl co Pedr spalal, zeene gol zho zaatne rdedlra nëz co, dzigo laa anjl co psan Pedr ga.

¹¹ Dzigoraa bien Pedr led nonixquieel Pedr, nli Dios pxeel xanj me güeysilaa Pedr ladznia Herod, zeena gleyd zha Israel nian zho grë guielnë ne neded Pedr.

¹² Dzigo laa Pedr zie nëz lidz Marí, xniaa Juan Marcw; lëëtaque hor co nzian zho ndxie ga quianab zho lo Dios. ¹³ Zeene bdziñ Pedr pcaannia Pedr ro yu. Brieet i ndzoop ne quia dziin ga lë Rode, zieso ndzoop dien chow.

¹⁴ Zeene beenbey ndzoop co tsi Pedr, rley ndzoop. Lo guielbley co niicle pxaldaqe ndzoop ro yu, rias ndzoop zienie ndzoop diidz lo grë zha ne ndxie ga; rëb ndzoop laa Pedr bdziñ ro yu ga. ¹⁵ Per bililadzd zhow.

—iDieen pe rool luu! —rëb zho—.
iNcuane gliladzd ne rnee luu!

—iCoo, nli lëë mew! —rnee ndzoop—,
laa me zo ga.

—iLed meda, —rnee zho—, bod anjl ne quianap mew!

¹⁶ Sca no zho, laa Pedr bii nocaannia ro yu. Zeene güey zho pxal zho ro yu, bzee zdoo zho gon zho nli Pedra, laa Pedr zo ga. ¹⁷ Dzigo blunia Pedr lo zho gnee nguiedzd zho; laa zho bzëëbnie Pedr len yu. Ga psilo Pedr bzodiidz Pedr lo zho zha güeybee xanj Dios Pedr len ladzguuib; ni pso Pedr diidz lo zho sodiidz zhow lo Jacob, ni lo grëraa zha ne nacgrë zho. Blozhse ga, laa Pedr brieega.

¹⁸ Zeene biini liu, grë menguiib ne pquiapan Pedr len ladzguuib ga, rdziel-draa zho zha gun zho; sac ib biend zho dien yo Pedr. ¹⁹ Zeene laa Herod pxeel zha ne ziebee Pedr ladzguuib, pa sële Pedr. Dzigo güey zho güeynie zho diidz lo Herod; nacne bnabey Herod gocredz grë zha ne pquiapan Pedr ga, pquiep Herod zho; blozhse ga, bnabey Herod gut zho gzase zho. Bded ga, laa Herod brieet Judé zey me Cesarea.

Dow mziog Herod

²⁰ Len dze co, pcaalsa menguedz Tir ni menguedz Sidón güeynee zho lo Herod; sacne rlëënie Herod zho. Lëëque ti men ne nac dziin lo Herod lë Blast güeynie zho bnee lo Herod, bnab zho tilniedraa me zho, niicle zhagaaw laa zho gbig lo me; sac grëse ncuane rquuin zho, grë guiedz ne rnabey me ga rriew.

²¹ Dzigo bzo Herod ti dze ne tsie zho tsiezodiidznie zho me. Zeene gol dze co, got me lar niazh ne racw rey; bdziñ me bzob me lo zhixcan me, psilo me bnee me lo grë miech co. ²² Goc palo quianee me, psilo zho rleynie zho me, nguiedz roptsie zho rnee zho:

—iLed miechdraa i gon! iTi diosle i nac men qui quianee lo ne!

²³ Laa me bii quianeeque, zeene biet tib xanj Dios bdiñ me, psilo dow mziog me, gagazh gut me. Sca gut me, sac beenbeyd me ne Dios nac men ne non, men ne rnabey. ²⁴ Laa Xtiidz Dios, zigse zie dze laaw quiagaazraa lo miech; ndal zha cub ne nozëëb xnëz me.

²⁵ Jerusalén ga no Bernabé grop Saul len dze co; zeene bialse xtsiin zho, laa zho brieëque ga laa zho zie nëz Antioquí zienie zho Juan Marcw.

13 Lo grë zha ne rililadz Jesús Antioquí, nzian zha ne noteed Xtiidz Dios, nzian zha ne rseed miech Xtiidz Dios no lo zho. Lad grë zha co no Bernabé, no ti mgui lë Simón ne rnee zho “Men Yaas”, no ti men Ciren lë Lus, gaque no Saul, ni ti men lë Manaén, betspchoob Herod.

² Laa ti dze lëëtaque ndxie zho noyoolnie zho Dios ni nocuan zho, zeene laa Espíritu Sant bnee lo zho, rëb me:

—Golcueextso Bernabé i grop Saul, zeena csilo zho lo dziin ne gded naa gun zho.

³ Blozhse pcuan zho, blozhse bzodiidznie zho Dios, dzigo pxobnia zho guic

Bernabé grop Saul, bñab zho lo Dios gacniën me zho; bñee zho lo zho, laa zho zie.

Güey Saul Chìpr grop me Bernabé

⁴ Ga brìee Bernabé grop Saul zìenie Espìritu Sant zho bdziñ zho guiedz Seleucia, Seleucia bzëëb zho barcw laa zho zie nèz Chìpr (ti guidzliu win ne no lo nis-doo). ⁵ Ye Juan Marcw zìenie zho guñ xyudar zho.

Bdziñ zho ro guidzliu win co zaatne ndxie guiedz Salamin, biet zho barcw güey zho grë leñ xyadoo meñ Israel ne no ga, güeyseed zho miech Xtiidz Dios. ⁶ Ga brìee zho güeyted zho dipse lo guidzliu co bdziñ zho guiedz Pafos; guiedz ne bdedtaa zho bñee zho Xtiidz Dios lo miech. Pafos, ga beënbey zho ti meñ Israel lë Barjesús (laa xtiidz zha Gres rnee zho me Elim). Rquidie me rnee me xtiidz Dios noteed me lo miech, per diidz dox roļ me.

⁷ Guiedz co ga no ti meñ lë Sergio Paul, meñ co zob rñabey guidzliu co; dzigo lo meñ co ga no Barjesús. Ti meñ nixbini nac meñ ne lë Sergio ga, no me li-aadz gacnañ me zha nac Xtiidz Dios; dzigo bñabey me gocredz Bernabé grop Saul. ⁸ Zeene bdziñ zho psilo Barjesús quiaguib me diën pe yquiaaqui yquiaadiagd meñ rñabey co Xtiidz Dios.

⁹ Dzigo buitipaque Pabl lo Barjesús (Pabl nac sti lë Saul), ni ne nacie Espìritu Sant Pabl ¹⁰ rëb Pabl lo me:

—jBiche nu zhin mendox! Zhin mendox gon nac luu, squitaa noquidiee luu miech, notsidil luu diidzli. ¿Zha rna dze ne csaan luu mine nac luu i, squi notsidil luu Xtiidz Dios? ¹¹ Gon ganle, jlaa Dios csiabzi luu, niinagazh laa lo luu ycow, ni spalal xbiini ngbidz gandraa luu!

Zigne sca rëb Pabl laa lo meñ co pcow, nèzrii nèzrec zie me racladz me diën cho gnaaz nia me.

¹² Zeene gon meñ rñabey co sca pcow lo Barjesús, hor co bliladz me Xtiidz Dios, bzee zdoo me gon me scataa poder ne ziaadnie zhiwseed Dios.

Bdziñ zho guiedz Antioquí

¹³ Bded ga, laa Pabl gza Bernabé ni Juan bzëëb barcw stib, laa zho zie nèz xtan zha Panfil. Bdziñ zho guiedz Perg laa zho brìee leñ barcw, ga ptso Juan lo zho, laa Juan zey nèz Jerusalén; ¹⁴ laa zho bio nèz zie zho nèz xtan zha Pìsid, bdziñ zho sti guiedz lë Antioquí.

Zeene goļ dze ne rdziiladz miech lo dziin, güey zho xyadoo zha Israel. ¹⁵ Blozhse bded zha ne blab lo guits ne pquiaa Moisés, ni blab zho mine pquiaa grëraa zha ne biadteed xtiidz Dios padzeela, dzigo laa meñ ne rñabey yadoo co bñee lo Pabl grop Bernabé, rëb me lo zho:

—Telne racladz to gnee to chop lan xtiidz to, zac gnee tow niina.

¹⁶ Dzigo guso Pabl, blunia me lo grë zha ne ndxie ga cuedze zho, rëb me lo zho:

—Grëse to ne ndxie to nu, zigtaa tow ne nac to menladz naa, zigtaa togaaw ne nac to zha stib guiedz zha ne noxco gban zigne rñabey Dios; goļquiaadiag chop lan xtidz naa ganle gne naa lo to:

¹⁷ Dios ne rliladz no nac no meñ Israel, ib me bzooblo grë pxozgol no laa zho bgab lo me. Me gocniën zho zeene bio zho ladz meñ Egipt, ni me güeysilaa zho ga, blu me ganle ne nli meñ nroob nac me. ¹⁸ Dipse leñ choo iz ne bio zho grë dan bidz ne bded zho ga, pxecw me grëtaa xquieintseeb zho. ¹⁹ Blozh ga, bnitlo me gadz guiedz nroob ne ndxie xtan zha Canaán, bdeed me liu co lo zho. ²⁰ Ni dipse leñ tap gayoo groļ iz, me bzooblo grë zha ne bzo bñabey lo zho; lëe lultm zha ne bzo me ga bñabey lo zho goc profet Samuel. ²¹ Blozh ga, laa zho bñab so ti rey gñabey lo zho, nacie bzo

me Saúl, bzob Saúl choo iz goc me zhirey zho. Lëë pxoz Saúl ga brielë Cis, men ne ziaad lo xtii pxozgol no Benjamín. ²² Zeene laa Dios ptiche dziin co lo Saúl, dzigo bzo me David goc rey. Lëë David ga rzeet Dios zaatne znu rnee: “Rleynie naa xingan Isai zha ne lë David, laa naa gonle ib zun David mine gnabey naa.” ²³ Ni lo xtii David co nagon briequia Jesús, men ne pxeel Dios lo guidzliu bi-aadsilaa miech lo dol, zigne psanle me diidz lo xmengol no padzeela.

²⁴ Len dze ne merle xoobnen cho nac Jesús, len dze co bnee Juan Bautist lo grë men Israel: csaan zho xquieintseeb zho gnab zho perdon lo Dios, zeena chobnis zho. ²⁵ Laa zeene zhile gdzin dze ne gut zho Juan, dzigo bnee me lo miech rëb me: “Golgacnan ganle, led naad nac men ne quiambëz to ga cxeel Dios. Merle gunbey to me, ti men non nac me, per ni par gac naa ti ngundziin win ne glit lab me ni me raguald naa.”

²⁶ ‘Golgacnan sca ganle bets: zigtaa tow ne ziaad to lo xtii Abraham, zigtagaa tow ne nac to miech stib guiedz zha ne riladzle Dios, ib laa Dios pxeel Jesús csilaa me ne lo xtol ne grëse ne. ²⁷ Grë zha Jerusalén ni grë zha ne rnabey lo zho, ib biend zho cho nac Jesús, niicle ne scataa gzobse dze ne rdziiladz zho lo dziin, rlab zho lo grë guits ne pquiaa zha ne biadteed xtiidz Dios padzeela; haxta bnaab zho gut me zigne bneese grë zha co. ²⁸ Niicle ne gon zho peet xtold me, niicle ne briequiaad dol ne pquiaqui zho me, per bguib zho bdeeda diidz bnabey Pilat gut me.

²⁹ Blohse psacsi zho me, pteed zho me grëse zigne bzeetle grë zha ne biadteed xtiidz Dios ga, dzigo güey zha ne blit me lo cruz, güeyqueets zho me. ³⁰ Per bleeban Dios me. ³¹ Grë zha ne güeynal zhits me zeene briece me Galilé bdzin me Jerusalén, nzian zho gon me;

ni niina grëse zho laa zho quianee lo miech ganle cho nac me.

³² ‘Scaquegaa no grop no Bernabé, laa no ziaadnie diidz lo to gacnan to ganle niina ne laa Dios bleeban Jesús, laa me been mine bnee me lo pxozgol ne padzeela. ³³ Lëë Jesús ga raquiet lo Salm brop, zaatne rnee: “Xpëed naa nac luu. Desde nadze laa zho gunbey ne Xpëed naa nac luu.” ³⁴ Ni bzeetle Dios ne laa me cueeban Jesús, bzeetle Dios xind xcuerp me len baa; min co ga raquiet lo Xtiidz me, zaatne rnee: “Zunlay naa luu, zigne bnese naa lo David gun naa.” ³⁵ Laa stib lo Salm ne pquiaa David rnee: “Gdeete luu diidz xin xcuerp naa len baa.” ³⁶ Rlu led Davite raquiet ga, sac zeene bza dze ne goc me dziin lo menladz me laa me gut, ni zaatne pqueets zho me, ga bnitlo xcuerp me. ³⁷ Led meda, zhaa men ne raquiet ga; gacxe na rneew waa peet gacd xcuerp men co, zbeeban Dios me.

³⁸⁻³⁹ ‘iGrëse to bets, golgacnan sca ganle! ¡Jesús nac men ne rsilaa miech lo dol! Zha ne gliladztaa me dib zdoo zho, tel pe nactaa grë xtol zho, sanmbe me zho. Mine wlaalaa brieelod ngaa to, niicle ne ziana to xley Moisés; sac niicle gun tow grëse zigne naca, csanmbeda to lo dol.

⁴⁰ ‘iGolguien sca gacnroladzde to! Zeena ygaade to mine bzeet zha ne biadteed xtiidz Dios padzeela, zeene znu bnee zho:

⁴¹ Grëse to ne rzhidznie to mine nac diidzli, bii zan to ganle laa naa gun ti milagrnroob ne gzee zdoo to; per znitlo to, sac gliladzde tow niicle guiaad zha ne gzodiidza lo to.

⁴² Blozh bnee Pabl; laa zeene laa Pabl griee ga grop Pabl Bernabé bnaab grë miech co lo zho, siguiel zho quiet sti zhmal co biire tsie zho tsieseed zho zho. ⁴³ Zeene briece zho len yadoo co, nzian grë zha Israel, nzian grë zha stib guiedz

zha ne riladzle Dios zienaḷ zhits zho. Nēz no zho bnee zho lo grē miech co tiblīque tso guic zho tsienaḷ zho zhiwseed Dios, guien zho ganle pa lotaa noxco me zho.

⁴⁴Biet sti zhal me, miech guizhiu ne goclo len yadoo co, zootle zig grēse miech guiedz co pcaalsa ga ziequiaadiag zho Xtiidz Dios. ⁴⁵Zha ne rnabey lo grē zha Israel ne no ga, zeene gon zho scataa ndal miech ne goclo ga, blēē zho lo Pabl, ndox zho lo me, rēb zho led diidzlid nac mine rseed me.

⁴⁶Niicle Pabla, niicle Bernabéw bdiebd zho, dzigole bnee zho lo zho rēb zho:

—Nli to glo rieguaḷ yquiaadiag Xtiidz Dios ne nac to zha Israel. Per ne squi run to guieḷntseeb nēde to ycaania tow par yгаа to guieḷmban ndzon ne rneedz Dios; na laa no guioseed grē zhazit. ⁴⁷Ni scaleгаа rnabey Dios gaca, sac znu rnee me:

Laa naa bzole luu tsienee luu Xtiidz naa lo grē menzit,

luu gac zig ti biini ne gziini lo grē miech ne ndxie lo guidzliu;

zeena guien zho zha laa zho lo dol.

⁴⁸Grē zha ne nac zhazit, zeene bin zho sca rēb Pabl, per nli rley zho, rdeed zho xquizh lo Dios scataa ndzon nac Xtiidz me. Grēse zha ne nole yгаа guieḷmban ndzon ne gdeed Dios ga, grēse zho dze cogazh laa zho bliladz Jesús. ⁴⁹Dipse dan co, gocnaḷ miech Xtiidz Dios.

⁵⁰Grē zha Israel ne rlēē lo Pabl ga, psilo zho pquiiḷ zho grē men wnaa ne nac diidz noxco Xtiidz Dios, ni güey zho güeynee zho lo grē zha ne nac men non lad guiedz co; zeena ctsidiḷ zho Pabl grop Bernabé, gunxoon zho zho dan co. ⁵¹Zeene bin Pabla grop Bernabé, par glu ne nonguield sca been zha co zho, beenmbe zho grē yudie co ni zho laa zho briece ga, laa zho zie nēz Icon. ⁵²Grē

zha ne bliladz Jesús ga, nguieḷ rac zho, rdeed Espiritu Sant guieḷbiini lo zho.

Bdzin Pabl Icon grop me Bernabé

14 Zeene bdzin Pabl Icon grop me Bernabé, güey zho tib xyadoo zha Israel zob lad guiedz co, bnee zho Xtiidz Dios lo grē zha ne pcaalsa ga. Zigtaa zha Israela, zigtagaa zha lad guiedz cow, nzian zho bliladza. ²Laa grē zha Israel ne bliladzda, psilo zho bloo zho diidz lo grēraa miech guiedz co glēēnie zho Pabl grop Bernabé. ³Niicle sca been grē zha co per wbid zho, bii blēz zho ga, peet dzeb nod lo zho rie zho rienee zho Xtiidz Dios lo miech; scagaa Dios, nzian grē milagr ne bdeed me diidz run zho par glu ne nli Xtiidz me nonee zho.

⁴Dzigo grē miech ne no lad guiedz co goc zho chop dii, groḷ zho racnie grē zha Israel ne rlēē ga, zgroḷ zho racnie grop zha poxtl co. ⁵Zha ne rlēē ga, zigtaa zha Israela zigtagaa zha guiedz cow, bnediidz zho grē zho wxtis laa zho tsie tsiedeedquie zho Pabl grop Bernabé. ⁶⁻⁷Zeene bin Pabla grop Bernabé, mazd laa zho briece ga, laa zho zie nēz xtan zha Licaon. (Güey zho Listr, güey zho Derb ni grēraa guiedz ne ndxie gax ga; güeynee zho lo grē miech co zha nac Xtiidz Dios.)

⁸Guiedz Listr ga gon zho ti mgui nē ni, waltaa lo xquieḷmban me ib gard sē me; sac scale nē ni me zeene gol me. ⁹Zeene gon Pabl dze zob me rquiaadiag me mine nonee Pabl lo grē miech co, dzigo dzeque bui Pabl lo me, gon Pabl dib zdo me riladz me nli zrielo gunguiac Dios me; ¹⁰dzigo nguiedz bnee Pabl lo me, rēb Pabl:

—;Beenni ni luu, zeena bzoli!

Zigne sca bnee Pabl, znuse guso nguzhoon me, bzoli me laa me psilo bzē. ¹¹Zeene gon grē miech co sca biac me, psilo zho con xtiidz zho nguiedz rnee zho:

—iDiosle i gon, nasi zig rlu miech rlu me laa me biet gbaa ziaadgan me ne!

¹²iMasaque rzac zho lë xdios zho ga! Rnee zho Bernabé nac dios Júpiter, laa Pabl nac dios Mercur, sac Pabl nac zha ne ndziibraa rnee. ¹³Ro guiedz co ga zob xyadoo zhimdio zho Júpiter, dzigo briece pxoz ne no yadoo co grë me miech lad guiedz, zienie zho ngon, zienie zho guiee, nan zho gut zho ngon co cogon zho ma lo Pabl grop Bernabé. ¹⁴Zeene bien Pabla grop Bernabé wbinladz guic zho. Ptsiez zho xab zho, bzëëb zho lad grë miech co, nguiedz rnee zho lo zho:

¹⁵—iNdzinli golgac! iPe nacne squi rac to? iGolgan ganle miech guidzliuque nac no, tibaque nac ne grë ne! Laa no ziaad lo to ziadseed no to wseed cub ne nac Xtiidz Dios, zeena guien to csaan to grë ncuuaane paat rquiind ne run to i, gbiire gbig to lo Dios men ne nlipaa mban. Me bzaa gbaa, me psan guidzliu, me psan nisdoo, grëse ncuuaane no gbaaw, ncuuaane no lo guidzliuw, ncuuaane no lo nisdoo, me bzaaw grësew. ¹⁶Niicle ne glo bdeed me diidz been miech grë ncuuaane gocladztaa zho, ¹⁷per psaanladz me zho. Gocnie me zho zigne racnieque me ne niina, rsiaab me nisguie rac xcuaa ne, rneedz me ncuuaane rdioow ne gzataa dze, rneedz me guieibley lo ne.

¹⁸Niicle sca rnee grop zha poxtl co, nen bin grë miech co diidz beete zho ngon co ngogon zho ma lo zho.

¹⁹Leñ dze co, blalaa zha Israel ne ziaad nëz Antioquí ni nëz Icon bdzin Listr ga. Psilo zho bloo zho diidz lo grë miech co gocntseeb zho lo Pabl; güey grë miech co bdeedque zho Pabl.

Masaque bzhaac zho gutle Pabl, bdoobniu zho me güeyron zho me tiblاد ro guiedz. ²⁰Grë zha guiedz co zha ne rliladzle Jesús, zeene bin zhow, güey zho zaatne nix me ga. Lëëtaaque ndxie zho lo me, zeene laa me guche; ga guche me laa

zho zeynie me nëz leñ guiedz. Biini liu, pcaa me nëz grop me Bernabé laa zho zie nëz Derb.

²¹Bdzin zho Derb, psilo zho bnee zho Xtiidz Dios lo grë miech co; ndal grë zha ne bliladza. Blozh ga, laa zho wbi ga biire güeyted zho nëz Listr, güeyted zho Icon, ni güeyted zho Antioquí, ²²güeynee zho lo grë zha ne rliladz Jesús ga, pchoobladz zho zdoo zho, pso zho diidz lo zho, niicle nroob guielnë ne noded zho per none tibaque gac guic zho tsienal zho Xtiidz Dios; sac ible sca nzian ncuuaane ted zho laga gdzin dze ne gdzin zho zaatne rnabey Dios.

²³Tib tib guiedz co, bzose zho grë zha ne so gnabey lo grë zha ne rliladz Jesús ga; rlozhse rcuan zho grë zho zho ni rzodiidznie zho Dios, dzigo laa zho rsan zha co ladzania me yquianap me zho.

Bdzin Pabl grop Bernabé nëz Siria stib

²⁴Nëz no Pabl grop Bernabé bded zho dib xtan zha Pisisid, bzëëb zho xtan zha Panfil, bdzin zho guiedz Perg. ²⁵Blozhse bnee zho Xtiidz Dios lo grë miech co, dzigo laa zho briece ga, bdzin zho guiedz Atalia. ²⁶Atalia ga bzëëb zho barcw bdzin zho sti guiedz ne lë Antioquí, gataa laa zho psiaal viay co. Guiedz coque ga briece zho grop zho güey zho grë guiedz co güeynee zho Xtiidz Dios lo miech; zeene sca bnaab grë zha ne rliladzle Jesús ga lo Dios gacnieñ me zho tsiegun zho xtsiin me.

²⁷Zigne bdzin zho Antioquí ga, bnabey zho pcaalsa grëse zha ne rliladz Jesús, bzodiidz zho lo grë miech co grëse zha gocnieñ Dios zho güeygun zho xtsiin me, ni zha rquia zdoo Dios zha ne nacd zha Israel rbedz me zho ye zho rzëëb xnëz me.

²⁸Xtselaa bio Pabl ga grop me Bernabé, blëz zho lo grë zha ne rliladz Jesús ga.

Pcaalsa zho Jerusalén

15 Ga no Pabl grop Bernabé zeene bdziñ bla zha ne ziaad nēz Judé, psilo zho noseed zho grē zha ne riladzle Jesús ga, rnee zho lo zho ib none tso zho bey zigne rnabey xley Moisés, niicle ne riladzle zho Jesús; zeena sca csilaa Dios zho lo xtoļ zho.

² Zeene gon Pabl sca noseed zha co miech, nacne bdiidiidznieque Pabl zho grop Pabl Bernabé. Dzigo mazd bnediizd grē zha ne riladz Jesús ga, bzo zho zla zha ne gacza Pabl grop Bernabé tsie zho Jerusalén tsienabdiizd zho lo zha poxtl ni lo grē zha ne rnabey lo zha ne no ga, dien pe guiab zho.

³ Nacne briece zho zie zho. Nēz no zho bded zho xtan zha Fenicia, xtan zha Samar; zaatne notaa zha ne riladz Jesús, rzodiizd zho lo zho grēse zha nobedz Dios grē zha ne nacdraa zha Israel, rsaan zho grē zhiwseed xmengol zho laa zho riladz Jesús. Rley grē miech co ron zhow. Sca bio zho nēz, laa zho bdziñ Jerusalén.

⁴ Zeene bdziñ zho Jerusalén, pcaalsa grē zha poxtl, grē zha ne riladz Jesús ga, ni grē zha ne rnabey lo zho. Dzigo ga bzodiizd Pabl grop Bernabé grēse zha gocnie Dios zho, zeene güeyted zho grē dan co güeynee zho Xtiizd me lo miech.

⁵ Miñ co quianee zho zeene guso bla zha ne glo goc farisé rēb zho, grē zha ne nacd zha Israel zeene laa zho riladz Jesús ib none tso zho bey, ni none gon zho grēse miñe rnabey Xley Moisés. ⁶ Dzigo nacne bnabey grē zha poxtl co ni grē zha rnabey co, ycaalsa zho stib dien zhapaa gaca, pe nonguiela tso grē zha zit bey co.

⁷ Zeene pcaalsa zho, goc pa lo quianee zho zeene guso Pedr rēb Pedr lo zho:

—Grēse to bets, goļquiaadiag miñe gne naa lo to nu ganle. Led rsoladz to, zeene griinpaa psilo quiagaaz Xtiizd Jesús lo miech, ible Dios bzooblo naa

pxeel me naa gaseed naa grē zha ne nacdraa zha Israel giladz zho me. ⁸ Ni megaa ne runbey me zdoo tib tib miech, laa me blu ganle, niicle ne zha zit nac zho laa me pcaania zho; pxeel me Espiritu Sant nacnie zho, zigne pxeelaque Espiritu Sant nacnie ne. ⁹ Gotsaa gwi ne ganle, led yed Dios rbe dien cho nac zha Israel cho nacгаа zha zit; zigtaa zhaw, zigtagaa new, laa me pcaania ne porne dib zdoo ne bliladz ne me. ¹⁰ ;Zha nac dzigo ne racladz to gnabey to grē zha co gon zho grē miñe nac xley ne? ;Pe niacxe rienraa ne lo Dios dzigo? ;Niicxe ne name, niicxe xmengol ne brieelod ni-una zigne naca! ¹¹ Golguien ganle, zigtaa zhaw zigtagaa new laa me csilaa ne lo dol grē ne, per nacda por ncuaañe rdziun ne; sinque laa me csilaa ne porne nquialadz me ne.

¹² Zeene blozh sca bnee Pedr, dzese biac zho grē zho; dzigo laa Pabl grop Bernabé psilo bzodiizd grētaa milagr ne blu Dios lo grē menzit zaatne güeynee zho Xtiizd me lo grē miech co. ¹³ Blozhse bnee grop zha co, laa Jacob gusoque rēb me:

—Grēse to bets, goļquiaadiaggaa chop lan xtidz naa naganle gne naa lo to.

¹⁴ Laa Pedr bzodiizdle lo ne ganle zha psilo bredz Dios grē zha zit, bzooblo me zho ye zho gac zha ne sēeb xnēz me.

¹⁵ Ga nagon goca zigne zhoobneese lo Xtiizd me, miñe pquiaa grē zha ne pxeel me padzeela, rneew:

¹⁶ Tedse nu ganle, laa naa cuedz grēse miech ne ygab lo naa;

grē zha xtii David zha ne bzozit, laa zho gbig stib.

¹⁷ Horco grēse zha zit, laa zho gon ganle cho nac naa,

zeena grielo sēeb zho xnēz naa.

¹⁸ Znu nac xtiizd Dios, ni padzeelale bzeet me ne laa me gon miñ co.

¹⁹Min co nagon grë zha zit ne rlladzle Jesús, ib nonguielda ga gnabey ne zho gun zho mine nac xley ne. ²⁰Sinque mazd yquia tib diidz cxeel ne lo zho gon zho, grë ma ne rut miech rgogon zho lo grë zhimdio zho, ib gowd zho bëel co; grë ma ne rxieed ren zeene ret ma, gowd zho ma; ni niicle grëragaa ma ne gut zho, ib gowd zho xchen ma. Grë zha bgui, nodne tsonie zho wnaa ne nacd tseeel zho; niicle wnaagaaw, nodne tsonie zho mgui ne nacd tseeel zho. ²¹Niicle mazd padzeelaw, tibaque quiayon miech gund zho min co; sac desde hor co tib tib guiedz bzose Moisés tib zha ne gneew lo miech len xyadoo zho, dze ne rdziiladz zho lo dziin.

²²Blozhse ga, dzigo biaan zho diidz so chop zha ne tsie Antioquí tsienal zhits Pabl grop Bernabé, tsiesan zho ti diidz ne guey lo zha co. Nacne bzo zho Judas xingan Barsabás, ni bzo zho Silas; grop zha co, zha rien nac zho lo grëraa zha ne rlladz Jesús ga. ²³Pquia ti guits güey zho, rnee lo guits co:

“Zigne nose no Jerusalén nu, zigtaa zha ne nac poxtla, zha ne rnabeya ni grëraa zha ne rlladz Jesús nuw, grë no laa no rquiaabdiuzh to grëse to bets ne nac to zha ne no guiedz Antioquí, ni grëraa guiedz ne ndxie nëz Siria i, ni nëz Cilis.

²⁴Niina ne gocndion no laa bla zha ne nacgrë no nu biaad lo to i, biaadcots zho guic to dien peraa no gun to. Gacnan to ganle led nod pxeel zho, ²⁵⁻²⁷gane niina bzodiidz no grë no bzo no Judas ni Silas ziaadnal zhits Pabl grop Bernabé, laa zho ziaad i ziaadgan zho to. Zha nziuu nac Pabl grop Bernabé lo no, sac gon rbeeladz zho xquielmban zho quiayun zho xtsiin Jesús.

²⁸Lo godiidz ne bdziun no, laa no bdzianle nonguielda ne dien peraa gnabey no to gun to, ni niiclegaa Espíritu Sant scaque rnee me. Rquiind ne

peraa gun to, lëëlew ga totsaque tsoxco to ²⁹gowde to xpëel grë ma ne rgogon miech lo grë zhimdio zho; grë ma ne rxieed ren zeene ret ma, gowde to ma; ni niicle gowdgaa to xchen grë ma ne gut to. Grë zha bgui, nodne tsonie zho wnaa ne nacd tseeel zho; niiclegaa wnaaw, nodne tsonie zho mgui ne nacd tseeel zho. Min rii nagon nac mine no tsoxco to.

’Guiaannie Dios to sca.”

³⁰Gza tap zha co laa zho brie Jerusalén, laa zho zie nëz Antioquí. Zeene bdzin zho ga, bnabey zho pcaalsa grëse zha ne rlladz Jesús, dzigo bdeed zho guits co lo zho. ³¹Zeene gocnan grë zha co zha rnee low, rley zho sacne pchooblada zdo zho. ³²Blozhse ga, psilo Judas grop Silas pseed zho grë miech co Xtiidz Dios, zeena dib zdooraa zho gnalo zho Dios; sac bdeed me guielbiini lo Judas grop Silas rteed zho xtiidz me lo miech.

³³Xtselaa blëz Silas ga grop Judas, laa zeene gol dze ne laa zho gree gbiire zho nëz Jerusalén stib, ine güeyzonëz grë zha co zho, rdeed zho xquizh lo zho. ³⁴[Laa zho nole nëz, tibaque zeene rëb Silas laa Silas guiaanaque ga spalal dze.] ³⁵Laa Pabl grop Bernabé ible laa zho biaan ga been zho xyudar grë zha ne noseedle miech ga.

Ptso Pabl grop Bernabé

³⁶Goc palal dze no Pabl guiedz Antioquí ga grop me Bernabé, zeene rëb me lo Bernabé laa zho gbiire tsie grë guiedz ne güeynee zho Xtiidz Dios lo miech ga, par gacnan zho dien yo grë zha co. ³⁷Dzigo gocladz Bernabé ye Juan Marcw nienie zho; ³⁸per bzhiguield Pabl, sac zeene güeynie zho Juan glo, psanaque Juan zho guiedz Panfil, laa Juan biire zey Jerusalén, güeynal Juan nlozh nsi-aal zho lo dziin co.

³⁹Min co pquiaqui bneelsa Bernabé grop Pabl, nrooblaa güey lo xtiidz zho; nacne gataa laa zho ptso. Pcaa Bernabé nëz grop Bernabé Juan bzëëb zho barcw zie zho nëz lo guidzliu win ne no lo nis-doo lë Chipr; ⁴⁰laa Pabl goc grop Silas. Blozhse bñab grë zha co lo Dios gac-nien me Pabl grop Silas, laa zho brieë ga ⁴¹güeyted zho grë guiedz ne ndxie nëz xtan zha Siria, grë guiedz ne ndxie nëz Cilis, güeynee zho lo grë miech ne rliładz Jesús nëz co, güeychoobladz zho zdoo zho.

Beenbey Pabl Timoté

16 Len dze co güey Pabl grop Silas güeyted zho Derb ni güeyted zho Listr. Listr ga beenbey zho tib zha nguieg ne rliładz zaque Jesús lë Timoté, ti men Israel ne rliładzle Jesús nac xniaa me, laa pxoz me nac men Gres.

²Grëse zha Listr, zha Icon, zha ne rliładz Jesús tibaque rzeet zho Timoté rnee zho ti miech ndzinli nac me, nacne bnee Pabl lo me tsienal me zhits Pabl.

³Ni ne nod me bey ne rio zha Israel sac led zha Israeld nac pxoz me, dzigo bloo Pabl me bey co, zeena tsod pe glisqui grë zha Israel ne no nëz co.

⁴Laa me zienal zhits Pabl. Guiedz ne rdedtaa zho rnee zho lo grë zha ne rliładz Jesús ga, tsoxco zho gun zho grë mine pso zha poxtl ga diidz, grë zho zha rnabey ne no Jerusalén. ⁵Zeeñe ron grë zha cow, dib zdooraa zho rnalo zho Dios, zigse zie dze racnzianraa zha ne rliładz Jesús.

⁶Blozh ga, tibbdeed zho xtan zha Frij ni xtan zha Galás, sac bdeete Espíritu Sant diidz nienee zho Xtiidz Dios lo miech grë guiedz ne ndxie nëz Asia ga. ⁷Zeeñe bdziñ zho zaatne rsilo xtan zha Misia go-cladz zho nie zho nëz xtan zha Bitin, scaque bdeete Espíritu Sant diidz nie zho nëz co. ⁸Dzigo tibbdeed zho dib xtan

Misia bdziñ zho ti guiedz ne ndxie ro nis-doo lë Troas.

⁹Guieel co blulo ti mgui Macedon lo Pabl, rnab me gun Pabl guieñzaac tsie Pabl nëz co, tsiegun Pabl xyudar grë miech co.

¹⁰Nacne hor cogazh bzhixcuaa no, sac bien no ible Dios racladz guio no nëz co guionee no Xtiidz me lo miech.

¹¹Dzigo brieë no ga bziaab no ti len barcw bdziñ no ti lo guidzliu win ne no lo nisdo lë Samotras. Biini liu brieë no ga bdziñ no Neápolis, ga bliiaz no wdze co. ¹²Biini sti liu co brieë no Neápolis bziani no bdziñ no Filip. Lëë guiedz co riaan zaatne rsilo xtan zha Macedon, niapse men Roma no ga; nzianlaa ngbidz bliiaz no ga.

¹³Laa tib dze ne rdziiladz miech lo dziin, brieë no bio no tib lad ro guiedz co, gax ti ro guiubee, zaatne bdzion no rcaalsa zha ne rienab lo Dios. Bdziñ no nzianlaa men wnaa ndxie ga, dzigo psilo no bnee no lo zho cho nac Jesús. ¹⁴Lad co no ti wnaa Tiatir lë Lidia, rto me grë lar nizhnie nlaan mine nac lar niazh; ye me dib zdoo me rliładz me Dios. Laa me noquiaadiag mine nonee Pabl ga, zeene psiaab Dios guic me bliladz mew.

¹⁵Dzigo hor cogazh brobnis me grë menlidz me; blozh ga, bredz me no guio-biaaz no lidz me, nëchaa me lo no:

—Telne rzac to nli dib zdoo naa rleynie naa Dios, goltë sca cuëz to lidz naa.

Rzoobguic me lo no, nacne biobi-aazaque no lidz me.

Bio Pabl ladzguuib grop Silas

¹⁶Tib dze, lëëtaque zio no zaatne ri-ozodiidznie no Dios, bdzieelo no ti nd-zoop nguieg noguitnie mendox. Zëëb di-idz grëse tel pe rñabdiidz miech lo nd-zoop, rnee mendox cow; nroob dimi ne riab nia zha ne rnabey ndzoo. ¹⁷Nal

ndzooop zhits no, nguiedz roptsie ndzooop rnee ndzooop:

—¡Xtsiin Dios ndzon ne zob gbaa gon noyuu gza mgui rii! ¡Laa zho ziadseed to zeena gacnan to zha csilaa Dios to lo xtol to!

¹⁸ Nzian dze zaatne rdzieeltaa no ndzooop tibaque sca rnee ndzooop. Zeene bieedtaa guic Pabl, biireque me bnee me lo mendox ne noguitnie ndzooop ga, rëb me:

—Jesús nacie naa, ni laa naa rnabey luu gon niinagazh psaan ndzooop qui.

Zigne sca rëb Pabl laa mendox co bzhooñ.

¹⁹ Gza zha ne rnabey ndzooop ga, zeene gon zho rundraa ndzooop guielnsin co gdziniaa ndzooop dimi, bnaazaque zho Pabl grop Silas güeyzo zho zho lo wxtis, rëb zho:

²⁰⁻²¹ —¡Golwi ganle pe nac ncuaañe noyuu grop zha Israel rii lad guiedz nu! ¡Nogodil zho miech, laa zho quiseed miech ncuaañe nonguieldraa dziuuñ ne nac ne zha Roma!

²² Pcaalsa grëse miech co, grëse zho ntseeb rac zho lo Pabl grop Silas. Dzigo bnabey wxtis co briece xab zho grop zho bdeed bar zho zho, nroob bdiñ zho zho. ²³ Blozhse bdiñ zho zho laa zho psëeb zho ladzguiib, bnabey zho men ne quianap ladzguiib ga tibaque yquianap me zho, sac tel laa zho xoon me tsi-etizha. ²⁴ Zeene bin men co sca rëb zho, güeyaque me güeysëeb me zho stib lena mine riaañ caañraa, ga psëeb me ni zho lad chop lë yag nroob.

²⁵ Wdze co, zig grol guieela laa Pabl grop Silas bii noyoolnie Dios, ni rnab zho lo me gacniñ me zho. Grëse zha ne no ladzguiib ga, ron zho sca no Pabl grop Silas. ²⁶ Tibaque zeene bni ti zho-dox, psiniw dib nase ladzguiib co, grëse ro ladzguiib co bzhal, guuib ne no nia grë zha ne no ga, wbiła.

²⁷ Lëälëd briece mcaallo men ne quianap ga, zeene gon me grëse ro ladzguiib co zonial, masaque güeynie guic me bzhooñle grë zha ne no ga, bdobaque me spad ne ney me laa me zie gut me me. ²⁸ Horco broptsie Pabl lo me, rëb Pabl:

—¡Gute luu luu! ¡Grë no ndxie no, choot bzhioñd!

²⁹ Lëälëd bnab me biini, bzëeb nguzhooñ me len ladzguiib, masaque rzhidz me dzeb pquitsgzhib me lo Pabl grop Silas. ³⁰ Blee me zho ga, rëb me lo zho:

—Golnë lo naa, ¿pe nac mine gun naa zeena csilaa Dios naa lo grëtaa xtol naa?

³¹ —Dib zdo lo biladz Jesús, men rnabey ne pxeel Dios lo guidzliu —rëb zho—, dzigo silaa me luu lo dol, silaa me menlidz luu ne.

³² Dzigo güeynie me zho lidz me, bnee zho Xtiid Dios lo me grë menlidz me.

³³ Guieel co no me bdiib me zhits zho, zaatne brëe bar ne bloobar zho zho; blozhse ga, laa me brobnis grë menlidz me. ³⁴ Bnabey me goclo ti guielwagw downie me zho, rley me, niicle grëgaa menlidz mew rley zho ne laa zho biladz Jesús.

³⁵ Biini liu, pxeel wxtis zha ne güeynie diidz lo me cuee me Pabl ladzguiib grop Pabl Silas. ³⁶ Dzigo güey me güeynee me lo Pabl rëb me:

—Laa wxtis pxeel diidz cuee naa to ladzguiib; zacle nasca griece to, peet tsieniedraa guic to.

³⁷ Dzigo rëbchaa Pabl lo zha ne bdzinnie diidz ga:

—¡Zha ndzielguictaa zhiwxtis to gon! Squi ndxie menguiedz bdiñ zho no, ni gardle gacnan zho dien pe nli no pe falt ne rdziaap no. Bnabey zho bio no ladzguiib, ni zha Roma nac no; nana racladz zho zhlianse griece no. ¡Lëda ga gon! ¡Goltsie golguiab lo zho, lëezhal zho guiaad guiadbee zho no nu!

³⁸Dzigo güey zha co güeynie zho didz lo wxtis. Zeene bin wxtis zha Roma nac Pabl, bdzieb zho; ³⁹lëëlëd güey zho ro ladzguib güey nab zho dispensar lo Pabl grop Silas. Blee zho zho ladzguib, ni bnaab zho lo zho siguiel zho mazd gbi zho guiedz co.

⁴⁰Ga briece zho güey zho lidz wnaa ne lë Lidia ga, bnee zho lo grë zha ne pcaalsa ga, zha ne rililadz Jesús, pso zho diidz lo zho tiblrique gac zho tsienal zho xtiidz me. Blozhse ga, dzigo laa zho briece guiedz co.

Güey Pabl Tesalónica grop me Silas

17 Briece Pabl guiedz Filip grop me Silas, güey zho güeyted zho guiedz Anfípolis ni guiedz Apolonia, bdziñ zho guiedz Tesalónica. Lad guiedz co zob ti xyadoo zha Israel, ²dzigo güey Pabl güeynee me Xtiidz Dios lo grë zha ne rcaalsa ga, zigne runaque me grëraa guiedz ne zieded me.

Blëz zho ga tson zmal, gzobse dze ne rdziiladz miech lo dziin güey Pabl güeyzodiidznie Pabl grë zha co, ³bzeet me lo zho grë zaatne raquiet grëtaa ncuaañe ted men ne cxeel Dios lo guidzliu ga, ni zha grieeban me; ni blu me lo zho gacnan zho ganle lëe men co ga nac Jesús.

⁴⁻⁵Ndal zha ne pquiaadiag xcodiidz Pabl, bien zho ne nli sca naca, laa zho bliladz Jesús, ndal zho nac zha nëz Gres, zha ne noxcole mine r nabey Dios, ye blalaa men wnaa ne nac men non lad guiedz co. Laa zha Israel ne r nabey yadoo co, zeene gon zho scataa ndal zha ne bliladz Jesús, blëe zho; güey zho güeytop zho grë zha yozh ne quianzë lad guiedz co, ti ruid ne been zho lad guiedz. Güey zho güeyssäb zho lidz Jasón nan zho niebee zho Pabl ga grop Silas, ngo zho zho ladznia grë miech co.

⁶Zeene gon zho bgaad grop zha co lo zho, bnaaazaque zho Jasón ni zla zha ne

rililadz Jesús, bdoobniu zho zho bdzinnie zho zho lo wxtis, roptsie zho rnee zho:

—¡Golgan ganle laa zha ne sca quianzë nocots guic grë miech, laa zho blansole nu! ⁷Ni Jasónpaa rdeed zaatne rbëz zho. Racladzdraa zho gon zho mine r nabey rey César, sac rnee zho no sti zhirey zho lë Jesús.

⁸Grë zha wxtis co ni grë menguiedz ne pcaalsa ga, zeene bin zho sca rnee grë zha co, riendraa zho zha gon zho. ⁹Mine been zho beenquizh zho Jasón ti mult gza Jasón zla zha co, dzigo laa zho wbi ga.

¹⁰Pcow liu co, wxina laa grë zha ne rililadz Jesús ga bleese Pabl ga grop me Silas, pxeel zho zho nëz Beré. Zigne bdziñ zho Beré, gloque ti xyadoo zha Israel güey zho.

¹¹⁻¹²Grë zha Israel ne no Beré ga, rley zho rquiaadiag zho mine rnee Pabl grop Silas, gzobse dze rlab zho lo Xtiidz Dios rwi zho dien pe nli mine rnee zho ga. Ndal zha Israel co bliladz Jesús, ndal zha Gres ne, zigtaa mguiw zigtaa wnaaw; blalaa men wnaa co zha non nac zho guiedz co. Tibliladz nac grë miech co, gocntseebd zho zigne gocntseeb zha Tesalónica.

¹³Laa zeene gocnan zha Israel ne no Tesalónica laa Pabl nolaque guiedz Beré, güeyaque zho güeyquii zho grë miech co glëenie zho Pabl. ¹⁴⁻¹⁵Dzigo lëëlëd briece bla zha ne rililadz Jesús ga, zienie zho Pabl nëz ro nis; laa Silas grop Timoté biaan ga. Güey zha co güeysan zho Pabl guiedz Aten; laa zeene laa zho wbi, pxeel Pabl diidz lo Silas grop Timoté tsieniob zho Aten.

Len dze ne no Pabl Aten

¹⁶Laga quiambëz Pabl gdziñ Silas grop Timoté güey me güeyted me lad guiedz co, wbinladz guic me gon me led zhid grë mdio ne riegan grë miech co.

¹⁷Nacne bioxco me bnee me Xtiidz Dios

lo zho, güey me xyadoo grë zha Israel ne no ga, bzodiidznie me zho grë zho zha guiedz co zha ne riladzle Dios. Gzobse dze rie me len guiedz rienee me lo grë miech ne rdziñ ga. ¹⁸ Tib dze bdzieelo me bla zha rac ne zienal zhiwseed ti men lë Epicur, ni zla zha ne zienal wseed ne rnee zho estoic; psilo me bzeet me Jesús lo zho, bnee me zha brieegan Jesús. Zeene bin zho zha rnee me, no bla zho rzhidznie me, rnee zho:

—¡Dieen pe riab guic men qui rnee me, ziaadquidie me miech!

Zlagaa zho rnee, nend cho zhiwseed sti Dios ne riladz miech stib dan zienie Pabl, gane sca rnee Pabl; ¹⁹ dzigo rëb zho lo Pabl:

—Bzhiguiel mazd, së luu guio ne lozh sodiidz luu lo no dien zha nac wseed ne ziaadnie luu, ²⁰ sac waltaa gard dzion no grë ncuane rnee luu i.

²¹ No zho liaadz gacnan zho pe rnee Pabl, sac sca nac grë zha Aten, niicle-gaa grë zha ne quiazin ga, rdziladz zho rded-dze zho rzodiidz zho dien zha nac grë diidz cub ne griin ron zho.

²² Bdziñ zho ti guic gui win ne rnee zho Areópago, bzo Pabl glowtaa zaatne rcaalsa zho ga, bnee me lo zho rëb me:

—Grëse to ne nac to men Aten, ran naa ne nligaa rioxco to rleynie to grë men ne rzac to nac Dios; ²³ sac len dze rii biateed naa zaatne zob grë xdios to, haxta no zaatne niaa ti lo pcoog quia chop lan diidz ne znu rnee: “MIN RII NIAA PAR DIOS NE RDZIUUNBEYD NE.” Golgacnan sca ganle, Dios ne runbeyde to ga, runbey naa me ni lë zhiwseed me none naa lo miech len dze rii.

²⁴ Dios co bzaa guidzliu, me bzaa grë-taa ncuane no lo guidzliu; gacd ne guiab miech zha gzaa ti zaatne cuëz me, sac men nroob men rnabey nac me, me rnabey gbaa, me rnabey guidzliu. ²⁵ Nicole rquiindgaa me dien zha yquianap zho me, sac grëse ne ne nac ne miech, me

rneedz guielmban lo ne, me rneedz grë-taa ncuane rquiin ne. ²⁶ Lo tib nëzaque miech ne bzaa me ga, bnabey me brieequia grëse dii miech ne ndxie lo guidzliu niina, bdeedse me zaatne biaan tib tib dii co ni dien palal dze ne gban zho zaatne biaan zho. ²⁷ Laa me psan zho parne yguib zho me, tsoxco zho guien zho ganle zha nac me haxta gdziel me lo zho. Ni led zite ga zo me lo ne grë ne, ²⁸ sac gon, niapse por xpoder me laa xcuerp ne niaa zigne naca, laa ne mban, laa ne rriel. Lëew ga bnee bla menladz to, zha rac ne znu rëb: “Xtii Dios nac ne.”

²⁹ Gase na ganle gotsaa gwi ne, conque xti Dios name nac ne, pe nac dzigo gliladz ne lë Dios ga nac grë cho mdio or, cho mdio plat, cho mdio quie ne riab guic miech rzaa zho; ³⁰ ni ib sca riladz miech. Laa Dios gop zho paciens hor co sac runbeyd zho me; sangue niina laa me quiabedz zho, laa me rnab lo zho csaan zho grë ncuane bliladz zho ga gbig zho lo me, mese gleyne zho; ³¹ sac laa me bzole tib dze ne gacredz grëse miech lo me yгаа zho mine tsieguial zho tib tib zho, tel zha wban zho. Ni laa me blule ganle cho nac men ne gon guielwxtis co, lë men co ga gon bleeban me.

³² Zeene bin zho bzeet Pabl no ti men ne brieegan, nzian zho rzhidznie Pabl, zla zho rëb:

—Na dien pa sti dze lozh yquiaadiag no mine rnee luu i.

³³ Gataa pcuëz zho lo xcodiidz Pabl, laa Pabl wbi lo zho ga. ³⁴ Brieequia blalaa zha Aten bliladz Jesús, lë tib zho ga nac mgui ne lë Nich (men ne nacgrë zha ne nac wxtis) ni ti wnaa lë Dámaris.

Güey Pabl guiedz Corint

18 Brie Pabl Aten bdziñ me guiedz Corint. ² Ga beenbey me ti men Pont lë Aquil, ti zha xti zha Israel nac Aquil. Roma no me glo, wriin bdziñ me Corint ga grop tsieel me; sac bnabey rey

Claud brieë grëse zha Israel ne no Roma.
³ Dzigo güey Pabl blëz Pabl lo zho ga, sac ye zho rzhixcuaa grë lar nroob ne rquia ncal, tipse pquia zho dziin ga gza zho.

⁴ Gzobse dze ne rdziiladz miech lo dziin rie Pabl xyadoo grë zha Israel ne no ga, riezodiidznie me grë zha ne rcaalsa ga; zigtaa zha Israela, zigtagaa zha guiedz cow rnee me lo zho tso guic zho gliladz zho Jesús. ⁵ Zeene laa Silas grop Timoté bdziñ Corint, dzigo laa Pabl psilo gzobse dze güey me güeynee me Xtiidz Dios lo grë zha Israel ne no ga, rnee me lo zho cho nac Jesús. ⁶ Laa zeene gontaa me rond zho diidz, leñ ntseeb rac zho lo me haxta rneenë zho Jesús, dzigo bdzib me xab me lo zho, rëb me:

—¡Laa naa bial bialne naa lo to per pquiaadiagde to miñe rne naa; xtolle to nasca tel laa to nitlo! Gbiiredraa naa gne naa Xtiidz Dios lo to, na laa naa csilo ganew lo grë zha ne nacd zha Israel.

⁷ Dzigo laa Pabl psilo güey lidz ti men ne no gaxaque zaatne zob yadoo co lë me Just, dib zdoo me rililadz me Dios. ⁸ Len dze co ndal zha Corint bliladz Jesús zeene bin zho miñe rnee Pabl, haxta ti men ne rnabey xyadoo zha Israel lë Crisp, grë menlidz me bliladz Jesús, dzigo grëse zho laa zho brobnis.

⁹ Ti wdze blulo Dios lo Pabl, rëb me lo Pabl:

—¡Gdziebd luu! ¡Ib ycuëzd luu lo dziin ne noyū luu i, bnee xtudz naa lo grë miech qui! Ndal grë miech rii no sëëb xnëz naa. ¹⁰ Peet tsienied guic luu, choot grielod lega pe gun luu sac naa quianaap luu.

¹¹ Nacne blëz Pabl ga stib iz grol, pseed me grë miech co Xtiidz Dios.

¹² Laa zeene bzob men ne lë Galión zobnabey me xtan Acay, grë zha Israel ne no Corint ga bnediudz zho grë zho bnaaz zho Pabl güeyzo zho me lo Galión ¹³ rëb zho:

—Laa no ziaadnie mgui rii lo luu, sac laa me quiaguiits xley no, quiago me guic miech tsiegan zho Dios sti mod miñe ni nacdraa ley.

¹⁴ Laa Pabl zie gnee, zeene pquiab Galión rëb me lo grë zha co:

—Telne niaca miñe no pe ti falt, pe ti guielntseeb ne quiayun me, dzigosi naa raguiäl gun guielwxtis. ¹⁵ Per telne laa to ziaadnie me nu porne rdziladzde to miñe quiaseed me miech, rdziladzde to tel cho rzeet me, sac led scad nac xley to, tswogolgan dien pe gun to. Nodaque xtil to guic naa.

¹⁶ Bleega Galión zho nëz ley.

¹⁷ Dzigo bnaaz zha guiedz co ti men lë Sóstenes, men ne rnabey xyadoo zha Israel ga; gonlo Galión bdiñ zho me, per peet rëbd Galión.

Biire bdziñ Pabl guiedz Antioquí

¹⁸ Goc spalal dze no Pabl Corint ga, dzigo bnee me lo grë zha ne rililadz Jesús ga laa me gbi; ye Aquil ni Priscil wnaa ne nac tsieel Aquil nole guic tsienäl zhits me.

Nacne zeene laa me brieë, ye zho bzëëbgza me barcw, laa zho zie nëz Cencré. Lëëtaaque len dze co noxco Pabl gun me tel pe nac ncuaañe rëb me lo Dios gun me, dzigo zeene bdziñ zho Cencré bnabey me liu liu ptsiib guic me.

¹⁹ Cencré bzëëb zho barcw stib, zie zho nëz Efés. Bdziñ zho Efés, güey Pabl xyadoo grë zha Israel ne no ga güeynee me Xtiidz Dios lo zho. ²⁰ Dzigo bnaab zho mbëz me lo zho ga ti blalaa dze, per brieelod mbëz me ²¹ sac laa guic me no gdzinniob me Jerusalén ygaa me lni ne ziaadyob len dze co, rëb me:

—Na telne zneedz Dios diidz, bii zialteedaque naa dien yo to.

Gataa biaan Aquil grop Priscil, laa me bzëëb barcw stib zie me nëz Cesarea. ²² Cesarea brieë me barcw, laa me zie nëz Jerusalén. Bdziñ me güeyquiaabdi-

uzh me grë zha ne rililadz Jesús ga; biir-
eraa me ga bdziñ me Antioquí.

²³ Goc palal dze no me Antioquí, laa me brieque ga güeyted me grë guiedz ne ndxie dib xtan zha Frij, dib xtan zha Galás, güeynee me lo grë zha ne rililadz Jesús ga dib zdoo zho gleynie zho Dios.

²⁴ Leñ dze co bdziñ ti meñ xti zha Israel guiedz Efés, ti meñ Alejandríw lë me Apol. Ti zha rac nac me, rien me zha gnee me Xtiidz Dios lo miech. ²⁵⁻²⁶ Güey me xyadoo zha Israel ne no ga, nguieel rac me, peet dzeb guiend lo me psilo me nonee me lo zho grëse miñe bnee Juan Bautist zeene bzeet Juan Jesús; sac lox-
aque miñ co bin me zeene gocnan me cho nac Jesús.

Lad co co no Aquil ni Priscil, zeene gon zho zha rnee me, dzigo blozhse ga, bredz zho me blozh bnee zho lo me zharaa nac zhiwseed Jesús.

²⁷ Grë zha ne rililadz Jesús ga, zeene gocnan zho laa guic me no tsie me nëz Gres, dzigo ye zho rëb wen tsie me, pquiaa zho ti cart pxeel zho lo zha ne no nëz co zaacse ycaania zho me. Zeene bdziñ me nëz co, pseed me grë zha co. Rley zho blozh gocnan zho cho nac Jesús; ²⁸ sac squi ndxie miech rsioog me ro grë zha Israel, rnee me lo zho lële meñ ne quiambëz zho cxeel Dios ga nac Jesús, ni rlu me lo zho pa lo zhobneew lo Xtiidz Dios.

Biire güey Pabl Efés

19 Leñ dze ne no Apol Corint, laa Pabl bdziñ Efés. Blozhse güeyted Pabl grë guiedz ne ndxie nëz xtan zha Galás, laa me bdziñ ga. Ga bdzieel me blalaa zha ne rililadz Jesús, ² dzigo bna-
diidz me lo zho, rëb me:

—¿Pe bgaa to guielbiini ne nneedz Espíritu Sant, zeene bliladz to Jesús?

Pquiab zho rëb zho:

—¿Guelbiini ye? Gard gon dzion no reed Espíritu Sant guielbiini.

Dzigo rëbchaa Pabl:

³ —¿Pezhe waa pseed to zeene brobnis to?

—Zhiwseedse Juan Bautist gocndion no —rëb zho.

⁴ Dzigo bnee Pabl lo zho zha nac wrobnis ne baaadnie Juan. Rëb me lo zho nace wrobnis co par glu miech ne laa zho csaan guielntseeb, laa zho sëeb xnëz Dios; per grëse zha ne bgaa wrobnis co ib none gliladz zho Jesús, meñ ne bzeet Juan ga zeene rëb Juan ile ziaad me.

⁵ Miñ co bin zho nace brobnis zho stib zigne psan Jesús diidz. ⁶ Zeene laa Pabl pxobnia guic zho bnaab me gdeed Espíritu Sant guielbiini lo zho, hor co psilo zho nzian lo diidz ne rnee zho; ni bnee zho tel pe nac miñe racladz Dios gacnan miech. ⁷ Lo gza zho rgaa zho tsi-
ipchop, niapse zha bguiw.

⁸ Tson mëë blëz Pabl ga, tibaque rie me xyadoo grë zha Israel ne no ga, ible rdziebd me rnee me lo zho zha nac Xtiidz Dios, ni rguib me rgo me guic zho gliladz zho cho nac Jesús. ⁹ Per zeene gon me no palal zho ib rond diidz, lel psilo zho squi ndxie miech rneenë zho Jesús, nace bleextsoque me grë zha ne rililadzle Jesús, güeynie me zho zaatne nac xyuscuel ti meñ lë Tiran; ga rcaalsa zho gzobse dze rieseed me zho.

¹⁰ Dipse leñ chop iz blëz me ga pseed me grë zha co; nace grëse miech ne no dib nëz Asia ga, zigtaa zha Israela zigta-
gaa grëraa miech cow, bin zho zha nac Xtiidz Dios. ¹¹ Bdeed Dios diidz been me grë milagr nroob ne rzee zdoo miech; ¹² sac haxta lar ne rzëse nia me, lar ne rbixse me rzhoob lad meñ ne rzacné laa zho riac, niicle grëgaa mendox ne noguitnie miecha, rzhoon ma.

¹³⁻¹⁴ Ga quianzë gadz xpëed ti zhipxoz zha Israel lë Escev, stib guiedz stib guiedz rie zho rieguncxoon zho mendox ne noguitnie miech. Ti vuelt, nan zho na ye zho cuedz lë Jesús gacnien me zho

gun̄cxoon̄ zho mendox; bdziñ zho zaatne gun̄cxoon̄ zho ma, rëb zho:

—¡Zig zobwi Jesús ne rzeet Pabl, laa no rnabey to gol̄rieegazh i niina!

¹⁵ Pquiabaque ma rëb ma lo zho:

—Wen wen run̄bey naa Jesús ni nan̄-gaa naa cho nac Pabl, sangue to gon̄ ni lalnu run̄beyd naa to.

¹⁶ Znuse bias men̄ ne noguitnie men̄-dox co, bnaaz me gza zha co bdiñ me zho. Ib blëbd zho lo me, masaque dib brëë rna zho, ni xab zho nacwdraa, laa zho bzhooñ.

¹⁷ Grë miech ne no Efés, zigtaa zha Israela, zigtagaa grë zha guiedz cow, zeene bin zhow per nli bdzieb zho; grëse zho bien̄ zho ne nli men̄ non, men̄ rnabey nac Jesús.

¹⁸ Haxta ye grë zha ne rliladzle Jesús, hor co laa zho bleero pe nac grë ncuaane ndzinlid ne bliladz zho glo. ¹⁹ Nzian zha ne biil̄ diidz dox güeyxi zho grë xquits zho, squi ndxie miech laa zho bzëëga grësew. Zeene biobey palal goconon grë-taa guits co, biirew zig chooptsii mil pes plat. ²⁰ Ga blu poder ne nacie Xti-idz Dios, sac grë zha ne bina bdzëë lo xquielmban zho.

²¹ Bded ga, biab guic Pabl tsieted me nëz xtan zha Macedon, xtan zha Gres, gbiire me ga laa me tsie Jerusalén stib; haxta mee me Jerusalén gree me tsie me Roma. ²² Nacne ptedner me Timoté grop Rast (zha ne noyux̄ xyudar me len̄ dze co) zie zho nëz Macedon, laa me bii bi-aan̄ nëz Asia ga.

Gocntseeb zha Efés

²³ Len̄ dze co brieequia palal zha Efés ptsidiñ zho zha ne rliladz Xtiidz Dios.

²⁴ Guiedz co no ti men̄ ne run̄dziin̄ guuib plat lë Demetr, rzaa me grë yadoo yeen̄ zig niaada xyadoo xnaxnazh zho Dian; nroob dimi ne rial̄ me grë me zha ne run̄nie me dziin̄ co; ²⁵ bnabey me pcaalsa

grë zha ne quia dziin lo me, ni grëragaa zha ne run̄aque dziin co, rëb me lo zho:

²⁶ —Rien̄ naa ziyonle to, ziyangaa to gan̄le laa mgui ne rnee zho Pabl quianzë lad guiedz nu, rnee me nlid Dios ga nac grë mdio ne rzaa miech. Pe zhidaale miech quialiladz zhiwseed me nu; ni led loxaque nudsegaa, dible Asia quialiladz miecha. ¿Pe gnë to zha dziuun̄ ne?

²⁷ Gol̄guien̄ gan̄le noxtseeb guiabdraa xtsiin̄ ne, ni nan̄wen to gan̄le lëë xtimi ne nu. Ni tebaa min̄cosegaaw, min̄e mazdraa noxtseeb nend grëse miech csaanladz xyadoo nazhnazh Dian, nend grëse miech ne rleynie me dib Asia, diibгаа lo guidzliuw con guiaan̄ladz zho me.

²⁸ Zeene gon̄ grë zha co sca rëb Demetr, rlëë zho, roptsie zho rgo zho xviv Dian. ²⁹ Wdzeepaaw grëse menguedz laa zho pcaalsa, güey zho bnaaz zho Gay ni Aristarco chop zha Macedon ne rzënie Pabl, bdozni zho zho bdzinnie zho zho ro yulow.

³⁰ Nacne gocladz Pabl nie me nienee me lo grë miech co, per psaand grë zha ne rliladz Jesús ga. ³¹ Haxta bla zha wx-tis ne ndzieeldiidz Pabl, pxeel̄ zho diidz lo me tsied me.

³² Zhaase zhaase mee grë miech co ndxie zho ro yulow ga, no zho haxta ni rien̄d pe nacne zie zho ga. ³³ Blalaa zha Israel, zeene gon̄ zho scataa rac grë miech co, bdob zho zhicw ti men̄ lë Le-jandr gocladz zho nee me chop lan̄ xtiidz zho. Laa men̄ co blis nia me parne cuedze zho gnee me; ³⁴ zeene gon̄ zho zha Israel nac me, psilo zho stib grëse zho nguiedz roptsie zho, rgo zho xviv Dian mee zho:

—¡Men̄ ndzondoo nac Dian! ¡Men̄ ndzon nac xnaxnazh ne!

Zig chop hor bre zho ga sca roptsie zho.

³⁵ Dzigo brieen̄ men̄ ne zobnabey ga, blunia me lo zho cuedze zho; zeene laa zho bredze, psilo me bnee me lo zho rëb me:

—Golgona ganle, grëse miech lo guid-zliu nan zho guiedz rii zob nazhnazh Dian, nan wen zho gbaa biet me zob me nu; ³⁶ tsod zha ne guiab led scada. ¿Pe nac nadien ne squitaa rac to? Golguien ganle nonguielda i squi lëëlëd dieen pe rzhixcuua to. ³⁷ Golwi ganle, laa to ziaad-zo grop zha rii nu, ¿pe nadien been zho? Nacd zho cho zha ne quiaguitnie yadoo, cho zha ne nozhidzniegaa xnax-nazh ne. ³⁸ Nana, telne racladz Demetr pe glisqui me grë me zha ne rquianie me dziin, gacxe na no yulow waa. Niac niaad zho niaadnab zho guielwxtis, ni zogaa zha ne yquiaadiaga. ¡Ga glisqui zho pe run tib, pe runгаа stib! ³⁹ Laa telne noragaa pe racladz zho glisqui zho, dzigo niac niacredz grëse zha ne nac wx-tis, zha ngobey dien zha niaca. ⁴⁰ Sac gon ne squi been to nadze, noxtseeb glisqui zha Romaw lo ne; ni pe nadien dzieets ne telne laa zho glisquiw.

⁴¹ Blozhse sca bnee me laa me wbi lo zho ga, niicle zhagaaw laa zho zey.

Güey Pabl nëz Macedon ni nëz Gres

20 Zeene laa ruud co blëz, dzigo bredz Pabl grëse zha ne riladz Jesús, bnee me lo zho zaacse gac zho. Blozhse bnee me lo zho, laa me briece ga zie me nëz xtan zha Macedon; ² güeynee me lo grë zha ne riladz Jesús nëz co, pso me diidz lo zho zaacse gac zho. Nëz co briece me bdziñ me nëz Gres. Ga blëz me tson mëë.

³ Laa zeene laa me gbi ga tsie me nëz Siria, laa me ziele sëëb me barcw zeene gocnan me laa zha Israel ne no ga bnedidz pa tsietin zho me, nacne güeydaque me barcw, mazd bio me nëz güeyted me nëz Macedon.

⁴ Blalaa zha ne bzënañ biogza no me, bzë ti men Beré lë Sópater xingan ti men lë Pirr; bzë chop zha Tesalónica, Aristarco ni Segund; ti zha Derb lë Gay, Timoté, ni schop zha nëz Asia, Tíquico ni

Trófimo. ⁵ Gol no Filip laa zho bner, per biaan no diidz Troas cuëz zho no; ⁶ laa no bliaaz ga, ga bdieed no lni Pascw. Zeene bded lni co laa no bziaab barcw, laa no briece ga. Goc gaay ngbidz no no lo nis laa no bdziñ lo zho Troas, dzigo bliaaz no Troas ga gadz ngbidz.

⁷ Zeene gol dze dmingw, bio no yu ne rcaalsa zha ne riladz Jesús ga. Ti yu tson xcuaaw, laa no pcaalsa par dziiun no xtsee ne psan Jesús diidz ga gun grë zha ne riladz me. Laa no ndxie grë no, dzigo psilo Pabl pseed me no; nzian ncuaane nonee me lo zho sac guini liu co laa me griece ga; gol groñ guieela rsiaal-daque me. ⁸⁻⁹ Nzian nac biini ne noquia len yu co; zaatne nac ro ventan ga zob ti niib lë Tic. Wdzeelaaw rsiaal-daque Pabl, tibaque bzhen mcaal niib co, wbix niib ga biab niib nëz ley; ni glaaw, len yu ne riaan glaaraa ga ndxie no. Zeene güeylis zho niib laa niib gutle.

¹⁰ Biet Pabl, bdziñ me lo niib bdeedz me niib.

—¡Gdziebde to! —rëb me—. ¡Zrieaban niib!

¡Ni nligaaw brieceban niib! ¹¹⁻¹² Grëse zho per nli rley zho. Blozh ga bdzieep no glaa stib bdziñ no len yu co, dzigoraa bdiiz Pabl quietxtil pquini no. Blozhse bdziun no xtsee co, laa Pabl psilo bnee lo zho stib, quianeeque Pabl laa liu biini.

Bdziñ Pabl Milet

¹³ Lban co psiaal Pabl, laa me wbi ga laa me zie nëz Ason nzëni me; laa no bziaab barcw bdiednieer no lo me. Bdziñ no Ason ga bliaaz no me zigne biaan no diidz. ¹⁴ Zeene blanso me lo no, laa no bziaab barcw gza no me bdziñ no guiedz Mitilen. ¹⁵ Biini liu briece no Mitilen, bdieed no gax Quó, bietraa stib dze co bdziñ no Samos, ga bliaaz no; bzia no lo nis co zig sti dze dzigoraa bdziñ no Milet.

¹⁶ Biotieete no Efés, sac laa guic Pabl no gdzinniob me Jerusalén, zeena yгаа me lni Pentecostés. ¹⁷ Nacne zigne bdzin no Milet pxeel me diidz Efés bredz me grē zha ne zo lo zha ne rliladz Jesús ga. ¹⁸ Zeene blanso zho, bnee me lo zho rēb me:

—Wen wen runbey to naa, nanle to ganle zha noxco naa noyūn naa xtsiūn Jesús men ne rnabey ne. Wlal ne psilo ziyal naa nēz Asia nu, ¹⁹ blactaa biin naa lo grē minē bdeed naa, blactaa lo guielxtseeb ne ziyo naa, tibaque quianał grē zha Israel quīn zho naa. ²⁰ Per gon to ganle, tibaque bioxco naa bialseed naa to minē nac diidzli, zigtaa pseed naa to zaatne rcaalsa tow, zigtagaa pseed naa to stib yu stib yu. ²¹ Grēse miecha, tibaque minē pseed naa zho, minē bne naa lo zha Israel mincoque bne naa lo miech stib guiedz; grēse zho bnee naa lo zho none csaan zho xquielntseeb zho dib zdoo zho gnalo zho Jesús, zeena gbig zho lo Dios.

²² Scaque niina ne laa Espiritu Sant rnabey ga naa Jerusalén, nanđ naa dien peraa nac ncuaane gdzieelo naa ga; ²³ per nanpaa naa ible zgo zho naa ladzguuib, ible sacsi zho naa, sac guiedz ne gdziintaa naa min co rnee Espiritu Sant teed naa. ²⁴ Lo guielxtseeb co no naa per rquiad zdoo naa xquielmban naa; minē nziuuraa lo naa laga gdeeda diidz ib laa naa no gne lo miech pa lotaa rleynie Dios zho, zeena ine gley naa csiaal naa dziin ne bzo Jesús naa nu quiyayūn naa. ²⁵ Rien naa lo grē to ne nac to zha ne bialseed naa gocnan to zha nac xnēz Dios, gandraa to lo naa lo guidzliu rii. ^{26–27} Laa naa pseedle to grēse minē nac Xtiidz Dios, ib peet pqueetsd naa lo to; gacxe waa, tel cho tib to nitlo, led xtoldraa naa ga. ²⁸ Golguien sca, įgolquianap to, ni scagaa golquianap grē zha ne zo to lo! įGolwi ganle xnēz Dios no zho, haxta lo cruz gut Xpēed me bdiizh me xtol zho! Ni

stiba, įib Espiritu Sant bzo to yquianap to zho zigne rquianap baxtor xpēcwxiił zho!

²⁹ įNsin golso! Sac rienle naa zeene laa naa gbiche lo to, ib zrieequia grē zha ne guiaad guiaadquidie to, zguib zho zha gnitlo zho to zigne run grē coyot mēcwxiił. ³⁰ Haxta lad to, zrieequia bla zha ntseeb ne ctsēē Xtiidz Dios, squiil zho to tsienal to zhiwseed zho. ³¹ Gacxe waa laa naa rne lo to, įnsin golso! Golso-ladz ganle tsonraa iz, dze guieel pseed naa to, blactaa biin naa pso naa diidz lo to tib tib to zaacse gac to. ³² Dios nac men ne gacnien to, laa naa rsañ to ladznia me grēse to; Xtiidz Ndzon me mine rnee ganle zha nquialadztaa me to, lēew lozh quix biini to dib zdoo to gnalo to me, zeena yгаа to zaatne gneedz me cuēz to grē to zha ne noraa xnēz me.

³³ Wlaltaa ib rzobladz naa dimi, ib rzobladz naa lar, guiep naa tebaa zha yquianie naa grē ncuaan co. ³⁴ Len dze ne blēz naa lo to, gon to ganle niapse nia naa bdziniaa naa ncuaane pquiin naa, ncuaane pquingaa grē zha ne bzēnie naa. ³⁵ Ga blu naa lo to ganle, ib none dziuun ne dziin zeena grieelo dziuun ne xyudar zha ne guiend pe yquiin. Ib rianladzd naa xtiidz Jesús men ne rnabey ne, zeene znu bnee me: “Mazdraa nroob guielbley ne rgaa zha ne rgad, lēdle zha ne rad.”

³⁶ Zeene blozh bnee Pabl lo zho, laa me pquitsgzhib ga grē me zho bzodidznie zho Dios. ³⁷ Blozhse ga, tibga tibga zho wbig bnee zho lo me, bnaaz zho nia me, bdeedz zho me. ³⁸ Mban rac zho psilo zho roon zho, rsoladz zho rēb me gandraa zho lo me. Blozh ga, güey zho güeyzonēz zho me zaatne sēeb me barcw.

Biire güey Pabl Jerusalén

21 Blozhse bzhieen no nia grē zha Efés co, laa no bziaab barcw, laa

no zio bdziñ no ti lo guidzliu win ne no lo nisdoo co lë Cos. Biini liu brieë no ga bdziñ no lo sti guidzliu win co lë Rodas. Rodas brieë no bdziñ no guiedz Pátara. ²Guiedz Pátara, ga bziaab no ti barcw ne zie nëz xtan zha Fenicia. ³Zeene zieded barcw co ngali zaatne riaan guidzliu win ne lë Chipr, bui no nëz revés rlupaa guidzliu co. Laa no zio haxta bdziñ no guiedz Tir, xtan zha Siria, ga blëz barcw co biet grë yo ne neya.

⁴Zigne bdziñ no ga bdzieet no barcw bziaab no lad guiedz co, biodziel no grë zha ne rililadz Jesús ga; bliaaaze no lo zho ga ti zhmal. Dzigo psiaab Espiritu Sant guic zho rnee zho lo Pabl, tebaa siguiel me mazd tsied me Jerusalén.

⁵Zeene laa no brieë ga, grëse zha ne rililadz Jesús grë tsiel zho grë xpëed zho biazad-zonëz zho no ro nis co; dzigo lo yuzh co ga pquitsgzhib no grë no, bziodiidznie no Dios. ⁶Blozhse bzhieen no nia zho, laa zho wbi ga.

⁷Brieë no Tir bdziñ no guiedz Tolemaid, ga bio no bioquiaabdiuzh no grë zha ne rililadz Jesús ga, bliaaz no lo zho tib dze. ⁸Biini liu brieë no ga bdziñ no guiedz Cesarea, ga biobiaaz no lidz ti men ne noneeque Xtiidz Dios lo miech, lë Lip. Lë Lip co ga gocgza xsoop zha ne bzo been xyudar zha poxtl. ⁹Quianie me tap ndzoop ne gard ctsieelnia, gzase zho bdeed Dios guielbiini lo zho rnee zho tel pe nac mine racladz Dios gacnan miech.

¹⁰Nzianle dze goc no no lidz Lip, zeene blanso ti men ne ziaad nëz Judé lë Agab, biadquiaabdiuzh me no. (Ye me rnee tel pe nac mine racladz Dios gacnan miech.) ¹¹Zigne blanso me lo no ga, bzhen me lar ne rbe len Pabl, pxidoo mew nia me ni pxidoo mew ni me, në me:

—Znu gon rnee Espiritu Sant gzobdoo zha Israel bizhuan lar rii, co zho me ladznia zha Roma zeene laa me gdziñ Jerusalén.

¹²Grë zha ne rililadz Jesús ga, zeene bin zho sca rëb men co, r nab zho lo Pabl tsied me Jerusalén, yeque no sca rnee lo me. Mban rac no rdzioon no. ¹³Pquiaabaque me në me lo no:

—¿Pe nac dzigo roon to? Tel naa laa naa bleeladzle naa maase gzobdoo zho naa Jerusalén, niicxe haxta gut zho naa waa porne rleyne naa Jesús. ¡Loxaque rsiaab guielnë to naa i gon squi rac to!

¹⁴Bdzianse no nlid yquiaadiag me xtiidz no, dzigo mazd psaan no, rdzieets no: —Golgotsaa csaan ne, Diostaa nan dien zha gaca.

¹⁵Bdedse ga bzhixcuaa no laa no brieë ga, laa no zio nëz Jerusalén; ¹⁶blalaa zha ne rililadz Jesús Cesarea ga bzënal zhits no, bzënie zho ti men Chipr lë Mnasón. Izle rililadz me Jesús, lidz me biobiaaz no zeene bdziñ no Jerusalén.

¹⁷Grë zha ne rililadz Jesús Jerusalén, rley zho zeene gon zho laa no bdziñ, blëzlo zho no.

¹⁸Biini liu co güeynie Pabl no lidz Jacob bioquiaabdiuzh no me, lëëtaque laa grë zha rnabey ne zo lo grë zha ne rililadz Jesús Jerusalén ga, ndxie ga.

¹⁹Blozhse pquiaabdiuzh Pabl grë zha co, dzigo psilo me bzodiidz me lo zho grëse zha gocniën Dios me güeyseed me grë miech stib guiedz. ²⁰Zeene bin zhow per nli rley zho, rdeed zho xquizh lo Dios; dzigo rëbchaa zho lo me:

—Bets, ye zha Israel gon ndaldoo zho zililadz Jesús; per racladz zho tibaque tsienal zho mine rnabey Xley Moisés.

²¹Grë zha ne no nu bin zho laa luu güeyseed grë men wladz ne no guiedz zit, nac diidz blu luu lo zho tsienaldraa zho Xley Moisés, codraa zho xpëed zho bey, niicle tsienaldraa zho grë zhiwseed xmengol ne. ²²¿Zha ganle dziuun ne? Sac zeene gon zho laa luu blanso, ible ziaadguib zho luu. ²³No tap bets ne nu ziaadyoble gon zho mine bnee zho lo Dios; mine gaca güey ²⁴güeynie zho yadoo, golgun

grë miñe rnabey ley, bdiizh ctsiib guic to gza to; zeena ga gan grë zha rii ganle nlid grë miñe rnee miech luu ga.

²⁵ Sanguë grë miech stib guiedz zha ne riladz Jesús, laa no pxeelle diidz lo zho zigne bzodiidz ne nu: grë ma ne rut miech rgogon zho lo zhindio zho, gowd zho bëële co; grë ma ne rxieed ren zeene ret ma, gowd zho ma; ni niicle grëgaa ma ne gut zho, ib gowd zho xchen ma; grë zha bgui, nodne tsonie zho wnaa ne nacd tsieel zho; niicle wnaagaaw, nodne tsonie zho mguì ne nacd tsieel zho.

Bnaaz zho Pabl

²⁶ Laa Pabl zienie gza zha co. Biini liu güey me gza me zho güeygun zho miñe rnabey ley; blozh ga güey zho yadoo güeynie zho diidz pa dze gza miñe quiayun zho ga, zeena gal dze co laa zho tsienie gon ne gdeed zho tib tib zho.

²⁷ Laa zeene merle gza gadz ngbidz ne quiayun me miñe rnabey ley ga gza me zha co, lega naclew gon bla zha Israel ne ziaad nëz Asia laa me no len yadoo. Nacne wbig zho ²⁸ bzheñ zho zhicw me, roptsie zho rnee zho:

—¡Grëse to menguietz! ¡Golgun xyudar no gnaaz ne men rii! Sac lëë me ga quianzë quiaseed me zha wladz glëënie zho ladz zho, rnee me lo zho gundraa zho grë miñe rnabey ley, gapdraa zho respet yadoo rii; haxta grë zha zit zizëëbnie me nu. ¡Noguitniele me lugar nda rii!

²⁹ Sca rnee zho, sac gon zho Pabl len guiedz Jerusalén ga ziegrop me ti zha Efés lë Trófimo, dzigo rzac zho güeynie me zha co len yadoo.

³⁰ Pe ga bin grë menguietz, grëse zho bdzin wbigbe zho lo Pabl bdozni zho me bleë zho me len yadoo, zigne bleë zho me ga lëëled psioog zho ro yadoo; psilo zho noguin zho me, nan zho gut zho me.

³¹ Zeene gocnan men ne rnabey lo menguiib ne ndxie ga laa ruid co noyac,

³² lëëled brienie me grë xmenguiib me ni grëraa zha ne rnabey lo zho. Zeene gon grë zha ne noguin Pabl ga, laa grë menguiib co bdzin, dzigora a blëz bdiñ zho me.

³³ Dzigo wbig men rnabey co, bnabey me grë zhaguiib co bzoob zho Pabl chop caden. Bnabdiidz me lo grë miech co dien cho nac Pabl, pe quiayun me ne scataa rlëënie zho me. ³⁴ Psilo zho nguiedz roptsie zho, zhaase zhaase ncuanea rcaadzdoł zho me. Gonse men rnabey co rlud dien pepaa rliquisi zho, nacne bnabey me grë menguiib co ziesan zho Pabl yu ne rbëzpa a zho.

³⁵ Laa grë menguiib co csilo soquianie Pabl lo scaler ne rdzin ro yu co, gataa mazd bzooby an zho me, sac ntseeb rac grë miech co; ³⁶ nalbe zho, roptsie zho rnee zho:

—¡Golnitlogazh men qui! ¡Niinagazh golgut me!

³⁷ Laa grë menguiib co csëëble me len yu co, zeene bnee me lo men rnabey co, rëb me:

—¿Pe zrieelo gne naa ti xtiaz naa lo luu?

Dzigo rëb men rnabey co:

—¿Mod rac luu rnee luu xtiidz zha Gres? ³⁸ ¿Led luud ga dzigo nac ti zha Egipt ne psilo racntseeb lo gobiern len dze rii? Nac diidz, tap mil zha ntseeb nacie zho, laa zho ziese nëz dan.

³⁹ —Led naada —rëb Pabl— men Israel nac naa. Guiedz Tars gol naa, lëë guiedz co nac miñe nroobraa lo grë guiedz ne ngab Cilis. Na laa naa rnab lo luu, been guieInzaac bneedz diidz gne naa chop lan xtiaz naa lo grë miech qui.

⁴⁰ —Zaca —rëb men co.

Lo scaler co zo Pabl blunia me lo grë miech co cuedze zho. Zeene laa zho biacdze, dzigo psilo me bnee me xtiitsë me grë me zho, rëb me:

22 —Grëse to men wladz, laa naa rzaac to zig ti bets naa zig px-

ozgaa naa, golquiaadiag mine gne naa nu ganle zeena gacnan to quiyayund naa mine rquiaqui to naa.

²Zeene gon zho xtiidz zho rnee me, grëse zho dzese bre zho; dzigo rëb me:

³—Men Israel nac naa, guiedz Tars xtan Cilis ga gol naa, per Jerusalén nu broob naa, nu bio naa wseed, maistr Gamaliel goc men ne pseed naa. Pseed me naa grëse zigne nac xley xmengol ne, grëse zigne nac zhiwseed zho; pseed me naa tibaque noxco naa runnon naa lë Dios zigne noxcoque tow. ⁴Mine been to nu nadze, ye naa blactaa squi ben naa ptsidil naa grë zha ne riladz Jesús, pquiana naa yгаа zho guet zho; mgui wnaasaque razobdoo naa zho lidz zho rasan naa zho ladzguiib. ⁵Men ne nac pxoz nroob ni grë mengol ne goc wxtis guiedz rii len iz co, zha co nappaa ganle nli sca ben naa; sac zha bneedz ti xtiidz zho bi naa ndzinnie naa lo zha ne rnabey xyadoo grë men wladz ne no Damasc, zeena niacnie zho naa nianaz naa grëraa zha ne no ga riladz Jesús, nialnie naa zho Jerusalén nu nded zho caxtigw.

⁶Min copaa nagon brie naa nu za naa nëz co. Zhile gdzin naa Damasc, zig rwe ngbidza tibaque zeene ziaad ti bi-inidoo nëz zhan gbaa biab lo naa. ⁷Bi-abgazh naa liu, ga nix naa bin naa ti tsi men co rnee me lo naa: “Saul, Saul, ¿pe nacne quiana luu naa?” ⁸“¿Been guieln-zaac bnë dien cho luu!”, rep naa. Dzigo në men co lo naa: “Naa nac Jesús men Nazaret ne squi quiatsidil luu.”

⁹Grë zha ne zanie naa ga, bdzieb zho gon zho biini co, per biend zho pe rnee men co lo naa. ¹⁰Dzigo rep naa lo me: “Bzhiguiel bnë dien, ¿pe racladz luu gun naa niina?” Nëchaa me: “Guche i, güey Damasc ga gnë zho ganle pe nac mine no gun luu.”

¹¹Dzigo bzhen zha ne zanie naa ga nia naa, bdzinnie zho naa Damasc; sac lo bi-inidoo co pcow lo naa. ¹²Ga no ti mgui

lë Ananí, zëeb diidz rioxco me grë mine rnabey ley, grëse men wladz ne no ga nappaa zho ti men wen nac me; ¹³dzigo biaad me zaatne blëz naa ga, në me lo naa: “Saul, niinagazh gon bets laa luu gbiire gwi stib.” Zigne sca bnee me laa lo naa biac, gongazh naa me. ¹⁴Dzigo nëchaa me lo naa: “Dios men ne bliladz grë pxozgol ne, ib men co bzooblo luu gacnan luu pe nac mine racladz me gac, me bzooblo luu gunbey luu men ne nacle diidz ga cxeel me lo guidzliu, ni gon luu tsi men co. ¹⁵Ib laa me bzo luu tsienee luu lo miech mine bzhaac luu ga, mine bin luu ga. ¹⁶Guso i sca, zeena chobnizgazh luu. Dib zdoo luu bredz Jesús, bnaab lo me csanmbe me luu lo xtol luu.”

¹⁷Zeene laa naa blanso Jerusalén nu, tib dze lëetaque no naa yadoo nozodidznie naa Dios, ¹⁸tibaque blulo me lo naa në me: “Na zeena biobladz brie Jerusalén nu, sac ib gliladz grë miech rii mine gnee luu zeene gnee luu xtidz naa lo zho.” ¹⁹“Per runbey zho naa waa”, rep naa lo me, “nappaa zho scataa ra naa grë yadoo raxizhoo naa grë miech ne riladz luu, rnabey naa rguin zho zho ni rio zho ladzguiib, ²⁰niicle zeene beet zho Xteb men ne bnee xtiidz luu ga, ye naa bded diidz beet zho me, haxta pquianaap naa xab grë zha ne bdeedquie me.” ²¹Dzigo në me lo naa: “Na zeena pcaaniob nëz brie nu, sac gon laa naa cxeel luu stib dan tsienee luu xtidz naa lo grë menzit.”

²²Zeene bin zho sca rëb me bdeetraa zho diidz nee me, psilo zho nguiedz ropt-sie rnee zho:

—¡Ib rieguialdraa gban men qui!
¡Golnitlogazh me!

²³Nguietz zëeb tsi zho, ib rioogd ro zho, masaque rdzib zho xab zho ni rchoon zho yudie laglaa.

²⁴Dzigo psëeb men rnabey co Pabl len yu co, ni bnabey me grë menguiib co quin zho Pabl, zeena cueero Pabl dien

pe nac ncuuaṅe been Pabl, zha nac ne scataa rac grë miech co lo Pabl. ²⁵Laa zho blozhle pxidoo me, laa zho csilo quin me, zeene rëb me lo sti zha ne rnabey lo grë zhaguiib co:

—¿Pe nonguiela dzigo ne lega quin to ti zha Roma, ni gardle gac guielwxtis dien pe nlipaa no xfalt zho?

²⁶Zeene bin zha co sca rëb Pabl, lëëlëd güeynie zho diidz lo men ne rnabey zho ga, rëb zho:

—¿Zha gonṅun luu? Sac zha Roma me nac mgui co.

²⁷Dzigo güey men rnabey co rëb me lo Pabl:

—Bneeli lo naa, ¿dien pe nli na men Roma nac luu?

—Nliw —rëb Pabl—, zha Roma nac naa.

²⁸Rzedz yanṅun men rnabey co rëb me:

—¿Naasi zha Roma nac naa, ni nroob dimi bdizh naa bgab naa lo zha Roma!

Dzigo rëbchaa Pabl:

—Sangue naa, desde gol naa bgab naa lo zha Roma.

²⁹Grë zhaguiib ne bzo nguṅun Pabl ga parne cueero me, lëëlëd wbiche zho lo me, niicle men rnabey cow bdzieb me zeene gonṅun me nli zha Roma nac Pabl, sac nrooble nac falt ne niuṅun me ga lega nabey me nguṅun zho ti zha Roma.

Bnee Pabl lo wxtis Israel

³⁰Zeene biini liu, rnabey men rnabey co pcaalsa grë zhipxoz non zha Israel ni grë men ne nac zhiwxtis zho, sac racladz me gacnaṅun me dien pepaa nac ncuuaṅe rquiaqui rlëënie grë miech co Pabl. Dzigo pxadz me Pabl, blee me Pabl bzo me Pabl lo zho.

23 Dze bui Pabl lo grë zha wxtis co, dzigo psilo Pabl bnee me rëb me lo zho:

—Laa naa rneli lo to nu ganle, mbe zdoo naa, Dios zobwi ganle zanaṅd naa ncuuaṅe rdziguiend me.

²Zeene gonṅun Ananí (men ne nac pxoz nroob) sca rëb Pabl, rnabey me zha ne zo gax lo Pabl, rëb me:

—¿Golcap ro zha qui!

³Dzigo rëbchaa Pabl lo me:

—¿Tebaa squique cap Dios ro luu! ¿Nac luu gonṅun zig ti lidz nguts loxaque nëz zhtssew stib rna! ¿Pa rquiin ne laa luu zob i? Led luu zo par cobey luu telṅun pa ti ley ne zaguits naa, na lel luule nogu-itsa rnabey luu bdiṅun zho naa.

⁴⁻⁵Pquiabbe zha ne ndxie ga rëb zho:

—¿Bien ganle lo pxoz nroob i, lo men ne quiayuṅun xtsiin Dios i noquiabro luu!

—Golgunṅun dispensar —rëb Pabl—. Nand naa lëë pxoz nroob i, telṅun niaca mine nanṅun naaw ne scad naa; sac zhobnee lo Xtiidz Dios: “Gneenëd luu zha ne rnabey ladz luu.”

⁶Zeene bienṅun Pabl groṅun zha wxtis co zienaṅun zhiwseed zha saducé, zgroṅun zho zienaṅun zhiwseed zha farisé, dzigo psilo me nguiedz bnee me rëb me lo zho:

—¿Grëse to bets, golgona ganle, zha farisé nac naa, niiclegaa pxoz naaw farisé goc me! ¿Ni porne rililadzpa naa gonṅun zrieeban zha ne ret, miṅun co gane znu zo naa lo to nu!

⁷Zeene sca rëb Pabl, psilo zho bdiṅun idz zho. Goc zho chop dii, ⁸rriee zha saducé rnee nliid grieeban zha ne ret, nliid no anjl, nliid no espíritu; laa zha farisé-gaa na rnee zrieeban miech, no anjl ni no espíritu. ⁹Nguiendz zëëb tsi zho noneelsa zho, dzigo gusoque bla maistr ley ne nac-grë zha farisé, rëb zho:

—Laa ne bdziaṅun ganle, ¿ni ti falt rapd mgui qui! ¿Pe nadien dziuun ne? Nend ti espíritu ga, ti xanjlgaa Dios ga sca bnee lo me.

¹⁰Zeene gonṅun men ne rnabey lo menguiib ga, laa lo xtiṅun zho noyac nroobraa, bdzieb me rëb me nend znuse gzhiizh zho Pabl; rnabeyaque me gocredz menguiib güeyxi zho Pabl biire güeysaṅun zho me lenṅun yu ne rbëz zho ga.

¹¹ Goḷ guieel co, blulo Dios lo Pabl rēb me:

—Gdziebd luu, zigne bnee luu xtidz naa lo miech Jerusalén nu, scaque none tsiennee luuw lo grē zha ne no Roma.

Gocladz zho niut zho Pabl

¹²⁻¹³ Zeene biini liu, ndziibsrāa choo zha Israel bnediidz rēb zho gowd zho, ni tib ro peet guied zho haxta gut zho Pabl; telne gund zho mine nree zho maase csi-aabzi Dios zho. ¹⁴ Dzigo güey zho lo pxoz ne rnabey, lo grē zha ne nac zha non lo menguedz, bzodiidz zho mine no guic zho ga, ni rēb zho:

¹⁵—Nana gon, gōlnab lo men ne rnabey lo menguiib cxeel me Pabl lo to gzhe, golquiaalo noraa pe lozh yquiep to Pabl; laa no nsinle ziobmbiaaz. Zeene laa zho tednie Pabl, ga dziuut no Pabl.

¹⁶ Dieen zha bin ti xingan bzian Pabla, nacne lēēlēd güey win yu ne rbēz menguiib ga güeynie win diidz lo Pabl. ¹⁷ Dzigo bredz Pabl ti zha ne rnabey lo menguiib co, rēb Pabl lo zho:

—Bzhiguiel güeynie mēēd rii lo men ne rnabey to, sac laa win no tsienie ti diidz lo me.

¹⁸ Bzhen men rnabey co nia mēēd co, güeynie me win lo men nroob ne rnabey zho, rēb me:

—Laa naa zialnie mēēd rii nu me, dien pe nac diidz ne ziaadnie win lo luu; Pabl ne no ladzguiib ga bnaab lo naa guialnie naa win.

¹⁹ Dzigo bzhen men rnabey co nia win, güeynie me win stib nēz, bnaabdiidz me lo win dien pe nac diidz ne zienie win lo me. ²⁰ Dzigo rēbchaa win:

—Laa zha Israel gon bnediidz gnab zho cxeel luu pxey naa Pabl lo zhiwx-tis zho gzhe, yquiaalo zho gnē zho noraa pe yquiep zho me. ²¹ Bzhiguiel gliladzd luu xtiidz zho, sac ndziibsrāa choo zha ne nacgrē zho rēb zho laa zho tsiesoblan nēz gutgazh zho me zeene laa me ted. Bi-

aan zho diidz grē zho, gowd zho, ni tib ro peet guied zho haxta gut zho me; haxta rēb zho tel laa zho gund min co maase gdzibdee Dios zho. Ible zun zhow, lox- aque quiambēzse zho dien pe guiab luu.

²² Blozhse ga dzigo bzonēz me win, ni pso me diidz lo win choot lo gneed win ne laa win güeynie diidz lo me.

Güey Pabl lo gobernador Wech

²³ Lēēlēd bredz men rnabey co chop zha ne zo lo menguiib, rēb me:

—Laa zhaguiib gon none grieenaguieel tsie zho Cesarea, na zeen golzo zha ne tsie; none tsie chop gayoo zha ne sēni, tsongal tsii zha ne sob guay, schop gayoo zha ne güey lanz. Naguieelgazh, zig rlozh xtsee none grieen zho nu; ²⁴ sac laa zho none tsiesan Pabl Cesarea. Ni golcoxab ti guay ne sob Pabl, sac none ndip ndaan me gdziinne to me lo gobernador Wech Cesarea.

²⁵⁻²⁶ Dzigo pquiaa me ti guits ne güey zho gdzinnie zho lo gobernador, rneew: “;Diuzh Gobernador Wech!

’Naa nac Claud Lisias, laa naa rxel guits rii lo luu gzodiidz naa ganle zha nacne rnabey naa ziaadsan zho men qui zaadne zob luu i.

²⁷ ’Zha Israel bnaaz me gocladz zho niut zho me, laa zeene gocnan naa zha Roma nac me nacne pxeelaque naa zhaguiib güeyla me lo zho. ²⁸ Gocladz naa niacnan naa dien zha nacne rlēēnie zho me, dzigo bianie naa me lo zhiwx-tis zho. ²⁹ Ga gon naa led ncuaane rnad rlēēnie zho me; tel zha nac xley zho ncuaan co rlisqui zho; nacda ncuaane guiab ne riegual guet me, tsoyugaa me ladzguiib. ³⁰ Zeene gocnan naa laa palal zho bnediidz gut zho me, nacne rnabeyaque naa ziaadsan grē menguiib qui me lo luu i. Niiclegaa zha ne rlēēnie mew, laa naa rep lo zho guiaad zho lo luu i, zeena i gnē zho dien zha nacne rlēēnie zho me.

“Lëed bii gdzieel ne sca dien.”

³¹ Zeene laa liu pcow, zig rlozh xtseew laa grë menguiib co pcaanie Pabl nëz; dib guieel bio zho nëz bdzinnie zho me guiedz Antípatris. ³² Biini liu, loxaque zha ne zob guay ga pcaa nëz zienie zho me Cesarea, laa grëraa menguiib co wbiere bdzin Jerusalén stib.

³³ Zeene bdzin zho Cesarea, bdeed zho guits ne zienie zho ga lo men ne nac gobernador, dzigo laa zho psan Pabl ga.

³⁴ Blozhse blab me lo guits co, dzigo bnabdiidz me lo Pabl dien pa guiedz gol Pabl. Dzigo rëbchaa Pabl lo me, zha Cilis nac Pabl.

³⁵ —Nasca —rëb me—, zeene laa zha ne rlëenie luu glanso nu, dzigo yquiaadiag naa dien zhapaa nac xtil to.

Dzigo bnabey me, pqianap menguiib Pabl zaatne nac len xyulow Herod.

Gocredz Pabl lo gobernador Wech

24 Zeene goc gaay ngbidza, laa Ananí men ne rnabey lo pxoz bdzin ga, gza me blalaa zha ne nac zha non lo menguiidz Israel, zienie zho ti licenciad lë Tértulo; grë zho laa zho zie zienie zho diidz lo gobernador pe nacne rdilnie zho Pabl.

² Dzigo bnabey gobernador gocredz Pabl. Zeene laa Pabl bdzin, psilo licenciad co bzeet me grë ncuane rquiaqui zho Pabl, rëb me:

—Xquizhdoo luu gon gobernador, ne squitaa ndzielguic luu rien luu zha gnabey luu, gane zaacse mban menladz no niina, blactaa ncuane yquiiin lo no noyun luu. ³ Rzac zdoo now, tel pa lotaa zo no rsoladz no luu nac luu men ne rnabey no. ⁴ Nli nonguielda dziunneed no luu, per been ti guielnzaac pqiaadiag ganle pe nac ncuane rlisqui no quiayun mgui ne zo lo ne nu.

⁵ Masaque nac me lo no zig nac ti guielguidz dox ne rded, grëse guiedz quianzë me noyungüet me menladz no

gacndaan zho lo men ne rnabey no. Lëe me ga zo lo grë zha ne rnee zho nazaren.

⁶ Zeene bgaa me, lëetaque laa me no len yadoo ro ne zob Jerusalén quiayunnguzee me xyadoo no. Nacne gocladz no gagazh nguizh me falt co zigne rnabey xley no; ⁷ per biaad Lisias grë xmenguiib me ntseeb rac zho biaadla zho me lo no. ⁸ Na nagon zac luuzhal yquiep me, zeena gan luu ganle nli quiayun me grë mine rnee no nu.

⁹ Grë zha Israel ne zienal ga, pquiabbe zho rëb zho nli quiayun me grë min co.

¹⁰ Dzigo blunia men ne nac gobernador ga lo Pabl gnee Pabl; nacne psilo Pabl bnee me rëb me:

—Nanle naa ziele iz zob luu nu rquiaadiag luu grë ncuane rac xtan no nu, gane rley naa zial naa lo luu par yquiaadiaggaa luu ganle zha nac xtidz naa.

¹¹ Na rac tsiipchop ngbidz ga bdzin naa Jerusalén, biagan naa Dios len yadoo nroob ne zob ga (niicle tel niaca mine greee diidz ganle). ¹² Laa naa bia Jerusalén biagan naa Dios, choot biatilnied naa ga; niicle len grëragaa yadoo wina, ro nëzgaaw, wlalaa noquiild naa miech cho lo gacntseeb zho. ¹³ Grëse mine rquiaqui grë zha qui naa grieelod glu zho nliw, sac led ncuane godca.

¹⁴ Mine nac diidzli, niina wriin psan Dios ti Wseed Cub dien zha guiaanwen miech lo me, zha qui rzac led zhiwseete Diosa, sangue naa dib zdoo naa zanal naaw, dib zdoo naa quiayun naa dziin lo Dios men ne bliladz pxozgol no; ni scaquegaa, noxco naa grëse mine nac ley. Rliladz naa grëse mine bnee grë zha ne biadteed xtiidz me. ¹⁵ Rliladz naa zdzin dze ne cueeban Dios grëse miech, zigttaa zha wena zigtagaa zha ntseeba, ni haxta zha ye zho rliladz min co. ¹⁶ Ni min copaa nagon gane tibaque noxco naa guiaanmbe zdoo naa, guntaldras

naa xtoꝓ naa zigtaa lo Diosa zigtagaa lo samiech naaw.

¹⁷Nod naa Jerusalén tibaque, blale iz goc no naa ladz menzít; dze ne bdzín naa Jerusalén ga, laa naa bia porne zasan ti gon lo menladz naa ni zanie naa ti gon ne gded naa lo Dios. ¹⁸Min co nagon nacne no naa len yadoo zeene gon grè zha qui naa. Blozhe ben naa grè mine rnabey xley no rdziun no zeene sca riosan no gon, zeene laa bla zha Israel ne no nēz Asia blanso lo naa ga; per choot miech taf ndxienied naa ga, niicle choot noquildgaa naa. ¹⁹Zha co nagon rieguiaꝓ ni-aad nu, nlisqui zho tel pe ncuaane rzac zho nonguield noyun naa ga. ²⁰Zha ne ndxieгаа nu niina, zac gnè zho telne briequia falt ne rquiaqui zho naa zeene gocredz naa lo wxtis Jerusalén. ²¹Te goon falt ga naye ben naa, lēē gdib nguiedz bne naa lo zho rep naa: “Laa naa racredz lo to, zig nac zeene falt ga rap naa loxaque ne riladz naa dzin dze ne grieaban miech.” Scase nagon naca.

²²Nanle gobernador co led ncuaane gund zha ne riladz Jesús ga rquiaqui zho Pabl, dzigo bnee me lo zho cuēz zho needa gdzín Lisias, dzigo dien zhapaa guiaan xtil zho. ²³Bnabey me zha ne zo lo menguiib yquianap zho Pabl, ni pso me diidz zaacse gac zho lo Pabl, gdeed zho diidz ted grè zha ne ndzieeldiidz Pabl tsiegan zho Pabl.

²⁴Goc blalaa ngbidza, bnabey gobernador co gocredz Pabl lo me grop tsieel me Drusil, ti wnaa Israel. Laa me bredz Pabl, sac racladz me yquiaadiag me dien zha nac zhiwseed Jesús. ²⁵Zeene bzeettaa Pabl, zha nac guielwxtis, zha none tsoxco miech gund zho mine riaabtaa guic zho, ni zha gdzín dze ne gund Dios guielwxtis, dzigotaa laa me bdzieb, rēbchaa me lo Pabl:

—¡Lēēlewga na nadien! Na zeene guioba, dzigo naazhal cuedz luu guiaad luu ziodiidz ne stib.

²⁶Zhiga zhiga rbedz me Pabl, sac quiambēz me dien pe gdziibd Pabl dimi csilaa me Pabl.

²⁷Zeene goc chop iz sca no Pabl ladzguiib ga, laa Wech brieē guielgobernador, bzēēb ti men lē Pons Fest. Niicle brieē Wech per psilaad me Pabl, sac racladz me dien zha guiannziuuraa me lo grè zha Israel.

Güeyzo zho Pabl lo gobernador Fest

25 Zeene goc tson ngbidz bdzín Fest Cesarea pcaania me guielgobernador, laa me brieē güey me Jerusalén.

²Grè zha pxoz non ni grè zha ne rnabey lo menguiedz Israel, zeene bin zho laa Fest bdzín Jerusalén lēēlēd güey zho lo me güeyxob zho xdemand Pabl; ni ³bnab zho lo me cxeel me Pabl Jerusalén. Laa zho rnab min co sac laa zho bnediidzle, nēz tsiesoblan zho, yquiambēz zho ted Pabl gut zho Pabl. ⁴⁻⁵Per bdeete Fest diidz, rēb me laa Pabl nole ladzguiib ga, tel zha ne zrieelo tsie, ga glisqui zho tel pe nac falt ne rquiaqui zho Pabl; benque zlase dze laa me gbiire guey nēz co dzigo zac tsienal zho zhits me.

⁶Ndziisraa ti zhmal blēz me Jerusalén ga, dzigo laa me biire zey Cesarea. Zna dze bdzín me biinigazh liu co güey me yulow, bnabey me gocredz Pabl. ⁷Laa grè zha Israel ndxiele ga, wbig zho lo Pabl ndal grè falt nroob ne rcaadzdoꝓ zho me, per loxaque diidzsew, guiend zha glu zho ne nlipaa goca. ⁸Dzigo pquiab Pabl rēb Pabl:

—Grētaa mine rquiaqui zho naa i, ni tiba nlid. Wlaltaa gard quits naa xley no, gard quitnie naa xyadoo no, niicle gardgaa gacntseeb naa lo zhiwxtis zha Roma.

⁹—¿Pe racladzdgaa luu tsie luu Jerusalén? —rēb Fest—. Ga gbiire yquiaadiag naa xtil to i zeena glu dien chopaa rap doꝓ.

Sca rëb me, sac racladz me dien zha guianzziu me lo grë zha Israel. ¹⁰ Dzigo rëbchaa Pabl:

—¡Gad naa! ¡Nod pe nac ga naa ga, to rieguial gun guielwxtis rii! Benque nan wen luu ganle peet falt nzëëbd naa lo zha Israel. ¹¹ Tel niaca mine nli ziyun naa pe guielntseeb ne raguial naa guet naa, maase guet naa. Per na nappaa naa ni ti ncuane rquiaqui zho naa i nlid, ¿pe nac dzigo cho co naa ladznia zho gut zho naa? Laa naa racladz, mazd goľneedz didz tibaque ga naa lo zhiwxtis nroob ne, men ne zob Roma.

¹² Dzigo bzodiidz Fest grë me men rac ne nacie me dziin; blozhse ga rëbchaa me lo Pabl:

—Guiend rson sca. ¡Tel lo César racladz luu tsie luu, na maase tsie luu!

Gocredz Pabl lo Agrip

¹³ Zeene goc bla zhmalaa, laa rey Agrip grop wnaa ne lë Berenis bdzin Cesarea ga güeyquiaabdiuzh me Fest. ¹⁴ Nzianlaa ngbidz blëz me ga, dzigo bzodiidz Fest lo me laa Pabl sca no ladzguiib ga, rëb Fest:

—Len dze ne bii nac Wech dziin biab ti mgui ladzguiib nu, ¹⁵ laa len dze ne bia naa Jerusalén biaad grë zhipxoz non zha Israel, grë zha non ne rnabey lo zho, biaad-xob zho xdemand me lo naa ga, rnab zho lo naa gnabey naa guet me. ¹⁶ Dzigo rep naa lo zho led scad run zha Roma guielwxtis, ib none gacredz me gnee me chop lan xtiidz me lo grë zha ne rzoob xdemand me, ga glu telne nli mine rquiaqui zho me togo nlidgaaw; ¹⁷ nacne biaad zho nu. Zna dze blanso zho, bi-inigazh liu co bnabey naa gocredz me. ¹⁸ Tibaque ni naa bod no pe ti falt nroob ne rquiaqui zho me, per zeene biaad zho yulow gon naa ¹⁹ lëë gdib tel zha nac grë ncuane riladz zho min co rlisqui zho, ni rlisqui zho pe nacne zienal me zhiwseed ti mgui lë Jesús, gutle men co ni laa me nree mban me.

²⁰ Zeene gon naa grë ncuane co rquiaqui zho me nli riend naa zha gun naa, dzigo rep naa lo me, telne racladz-gaa me zac tsie me Jerusalén ga dien zha guiane lo xtil zho. ²¹ Per bnëd me, lel bnaab me tsie me lo César; gane niina laa me bii no i, nieeda gne naa lo César dien pa hor grieelo cxel naa me nëz co.

²² Dzigo rëb rey Agrip:

—Racladz naa gon tebaa zha yquiaadiag naa dien zha nac xtiidz mgui co.

—Na zho ganle —rëb Fest—, gzhegazh gnabey naa gacredz me.

²³ Biini liu, ti lni nroob ne rac laa Agrip ni Berenis bdzin len yu ne rac guielwxtis ga, grë zha non ne rnabey lo menguiib, grë zha non lo menguiidz, nal zho zhits me. Dzigo bnabey Fest gocredz Pabl, zeene laa Pabl bdzin ²⁴ laa Fest psilo bnee, rëb me:

—Niina ne laa luu ziaad nu rey Agrip, scagaa to ne nac to men ne ndxiegrë ne nu nadze, goľwi ganle lëë men rii nagon rlëeniedox zha Israel, racladz zho guet me; zigtaa Jerusaléna zigtagaa nuw ziyaadnab zho lo naa gnabey naa guet me. ²⁵ Sangue naa gonle naa rapd me falt, par guiab ne rieguial guet me; per laa me bnaab tsie me lo César, na laa naa no cxel me nëz co.

²⁶ Nli riend naa dien pe nac diidz ne cxel naa lo César, ne squi lega ncuane nlid rquiaqui zho me. Min co nagon bnabey naa gocredz me lo to nu, ni laga laa luu ziaadgaa nu rey Agrip, bzhiguiel pqiaadiag ganle zha rzë xtiidz me; zeena togo zziel naa pe nac diidz ne cxel naa gal dze ne laa me tsie nëz co. ²⁷ ¡Sac nonguield ga gun naa telne sobdoo me cxel naa me, ni tel cxeld naa diidz dien pe nac xfalt me!

Bnee Pabl lo Agrip

26 Dzigo rëb rey Agrip lo Pabl, mezhal gnee dien zha naca.

Nacne blis nia Pabl psilo Pabl bnee Pabl rëb Pabl:

²—Rley naa gon rey Agrip ne laa naa zial lo luu nadze, zeena gzodiidz naa lo luu gacnan luu ganle nlid grë ncuaañe rquiaqui grë menladz naa naa. ³Rley naa sac nan naa nappaa luu zha nac grë xcostumbr no, grë ncuaañe rliladz no. ¡Rnab naa lo luu sca, guieete luu yquiaadiag luu grë mine gne naa!

⁴Grëse zha Israel nan wen zho ganle zha mban naa, sac meëdlas naa bdzin naa Jerusalén, ga broob naa. ⁵Nappaa zho zha farisé goc naa, ni zha farisé nac zha ne rioxcoraa run grëse mine rliladz zha Israel. ⁶Per mazd gon, laa zho rlëë lo naa porne dib zdoo naa rliladz naa laa Dios beenle mine psan me diidz lo grë pxozgol no. ⁷Grëse zha Israel, zigne ziaad zho lo gza tsiipchop dii ne psan xmengol no, grëse zho dze guieel bii quiambëz zho gac min co. ¡Masaque rzac zho dol ga quiayun naa rliladz naa laaw gocle! ⁸Haxta to, zeene rzet naa zrieeban miech, rzhidz to ron tow, ¿pe rzac to naa grieelod Dios gun me min co?

⁹Glo nli ptsidil naa grë zha ne rliladz Jesús men Nazaret, masaque rzaac naa lëew ga quiayun naa. ¹⁰Pe zhidaa zha ne blo naa ladzguuib Jerusalén, haxta grë pxoz non bneedz diidz ben naa grë min co; ni zeene rnabey zho ret grë zha co, ye naa rded diidz ret zho. ¹¹Nzian grë yadoo win bia naa, biasacsi naa zho haxta gneenë zho Jesús. Blëeniedox naa zho, haxta grë guiedz zit bia naa biaguib naa zho.

¹²Min copaa nagon brie naa za naa guiedz Damasc, masaque grë pxoz rnabey bneedz ti xtiidz zho bi naa laa naa za. ¹³Tej gan luu ganle rey Agrip zha bzhaac naa: Zig rwe ngbidza, tibaque zeene ziaad ti biinidoo nëz zhan gbaa biab lo naa, ni lo grë zha ne zanie naa ga, nroobraa nac biini co lo xbiini ngbidz. ¹⁴Grëse no biab liu, dzigo

bin naa ti tsi men co rnee me xtiidz no, bredz me naa në me: “Saul, Saul, ¿pe nacne quiana luu naa? Lëëque luu gon nosacsi luu i, rzac luu zigne rzac ngon ne rcaanni, ni lëëque lo guiiib lots ne rtseb zho ma riecaanni ma.” ¹⁵Dzigo rep naa: “Been guieInzaac bnë dien cho luu.” Nëchaa men co: “Naa nac Jesús, men ne squi quiatsidil luu. ¹⁶¡Na zeena guche i, bzoli! Laa naa bredz luu zeena gun luu xtsin naa, tsiezodiidz luu lo miech mine blozh bzhaac luu nu, ni grëragaa mine naraa gan luu. ¹⁷Peet tsienied guic luu, naa yquianaap luu, niicle zhaladz luuw niiclegaa zha zita peet grieelod gun zho luu. Sac laa naa cxej luu grë guiedz zit ¹⁸tsienee luu lo miech gacnan zho mine nacpaa diidzli, zeena griee zho lo ncow gbig zho nëz lo biini, griee zho ladznia mendox ygab zho lo Dios. Dib zdoo zho gliladz zho naa zeena gun Dios zho perdon, ni ygaa zho zaatne gdzin grëse zha ne mbe zdoo.”

¹⁹Min co nagon rey Agrip nacne bioxco naa ben naa mine në men co lo naa ga. ²⁰Glose Damasc psilo naa bne naa lo miech, ga brie naa bdzin naa Jerusalén, bia naa dib Judé ni grë guiedz zit, bne naa lo miech csaan zho grë xquieIntseeb zho gbig zho lo Dios.

²¹Min co nagon nacne rlëenie zha Israel naa, biadnaaz zho naa len yadoo ro ne zob Jerusalén, gocladz zho niutgazz zho naa. ²²Gocniel Dios naa, gane laa naa bii zo nu quiane naa Xtiidz me zigtaa lo grë zha wina zigtagaa lo grë zha nona. Noseete naa miech stib wseed, sinque laa naa rne mine bzeetaque Moisés ni grëragaa zha ne biadteed xtiidz Dios padzeela. ²³Tej zha, bzeetle zho ib sacsi miech men ne cxeel Dios ga, ni me gac men ne glopaa grieeban, me gac zig ti biini ne gziini lo grëse miech, zigtaa zha Israela zigtagaa grë menzita.

²⁴Tibaque nguiedz bnee Fest rëb me lo Pabl:

—¡Bod rzhinle guic luu gon Pabl! ¡Ne tibaque nagon rio luu wseed gane squi riots xtiidz luu!

²⁵—Coo, gobernador Fest —rëb Pabl—, led rzhind guic naa. Niapse mine nac diidzli min co none naa, ²⁶laa rey Agrip zob i, me nan ganle nli grë mine rne naa nu. Tibliladz naa none naaw lo me, sac nanpaa naa nan me nli mine rnee naa, nacda ncuaaane goc ngeets zhliaan. ²⁷¡Led nli lëë rey Agrip rililadz luu mine bzeet grë zha ne biadteed xtiidz Dios padzeela? Nanpaa naa rililadz luuw.

²⁸Pquiab rey Agrip, rëb me lo Pabl:

—¡Zlalaque nu gon laa luu cole guic naa ye naa sëëb xnëz Jesús!

²⁹Dzigo rëbchaa Pabl:

—¡Nend zhilew o nroobragaaw, per rnab naa lo Dios led loxaque luudse sëëb xnëz me, sinque ye grëraa zha ne no-quaadiag mine none naa nu niina; zeena ygaa to mine bgaa naa nu, per led znud sob caden rii nia to!

³⁰Gataa laa Agrip guso, gusoque Fest, gusoque Berenis ni grëraa zha ne zobnie zho, laa zho brieë ga. ³¹Grëse zho rnee peet xtold Pabl, rapd me falt ne guiab ne rieguial guet me, rieguialgaa tso me ladzguiib.

³²—Niacpaa nsilaa ne me —rnee Agrip lo Fest—, telne nabd me tsiepaa me lo César.

Pxeel zho Pabl nëz Roma

27 Bdzin dzew, laa Fest bnabey tsie Pabl nëz Roma, dzigo laa zho psan Pabl ladznia ti men ne rnabey lo menguiib lë Jul, gza Pabl zlalaa zha ne no ladzguiib ga. Lëë Jul co rnabey lo tib dii menguiib ne rnee zho “Augusto César”.

²Ye no zional zhits Pabl grop no Aristarco, laa no bziaab ti xbarcw zha Adramit zie grë guiedz ne ndxie ro nis nëz Asia, laa no pcaa nëz laa no zio.

³Biini liu co laa no bdzin guiedz Sidón. Zeene bdzin no ga, wen goc Jul lo Pabl bdeed me diidz güey Pabl güeyquiaabdiuzh Pabl grë zha ne runbey Pabl ga, grëse zho rleynie zho me blëzlo zho me.

⁴Ga brieë no bdieed no tib ro guidzliu win ne lë Chipr, psaac guidzliu co palal, sac psilo rree me rtsire me barcw ne zio no ga. ⁵Laa no zio, bdieed no gax ro guidzliu ne nac xtan zha Cilis ni xtan zha Panfil, bdzin no ti guiedz ne ndxie xtan Licia lë Mira; ⁶ga bdzieet no barcw ne zio no ga. Lëëtaaque noguib Jul sti barcw ne guio no, laa ti xbarcw zha Alejandrí no gree ga tsie nëz Italia, dzigo bziaab no barcw co laa no zio stib.

⁷Tsow ga zie barcw co, nzian dze goca, nen dzigoraab dzin no gax guiedz Gnid; ib rbëzdaque me, nacne bguib zho dien pa nëz zhi rcaan me, dzigo güeynie zho barcw co nëz Cret. Tib ro guidzliu win co zio no bdieed no Salmon; ⁸nen bdzin no zaatne rnee zho Buenos Puer-tos, gaxle ga riaan ti guiedz lë Lasé. ⁹Nrooble dze goc no no lo nis, len dze co laa mëë nal psilole ni zëëb diidz gacd së barcw len mëë co, nacne bnee Pabl lo grë zha ne zienie no ga, ¹⁰rëb me lo zho:

—Golgona ganle, telne laa ne gree ni len dze rii, rgobey naa ib znitlonie ne barcw rii lo nis.

¹¹Laa ne niacnie Jul Pabl niac mine rëb Pabl ga, lel mazdraa bliladz me xtiidz zha ne rsëë barcw ni men ne nac bizhuana. ¹²Stiba, zaatne nac Buenos Puertos ga rapda zaatne zaacse cuëz miech len mëë nal, nacne nzian zho rëb mazd gdzin guiedz Fenice, ga zac gbiaaz no gdipse len mëë nal. Ro guidzliu win co riaan Fenice, nligaa zhi rcaan me ga.

¹³Zeene laa ti me win ne znu ziaadquia psilo brieë lo nis co, zootle na nli griedraa me. Nacne lëëled bnabey zho bziaab no barcw, blisglaa zho lar nroob ne rcaan me rzëw, laa no zio, gax gax

ro guidzliu co zienie zhow. ¹⁴ Zhisaque goca zeene laa ti me dox ne rnee zho Nordest psilo brie, laa me co psilo rt-sire barcw. ¹⁵ Niicle racladz zho tsienie zhow nēz ne no guio no ga, per rsaand me; gonse zho led ncuaaṅe gacda, mazd psaan zho zienie mew nēz ne racladztaa me.

¹⁶ Scale zienie me barcw ne no no ga, biotieed no gax ro guidzliu win ne lē Clauda, ga nē nē brieelo blis zho grē canó win ne naḷ zhits barcw ga bzēēba nēz leṅ barcw; ¹⁷ dzigo blibdoo zho barcw co zeena gbīḷda, ni blit zho lar nroob ne rcaan me rzēw, sac rdzieb zho rēb zho telne scaquia lar co nend tsieniezhoo mew nēz ro nis, pa tsiesob-nagwa lo yuzh.

¹⁸ Zeene biini sti liu co mazdraa rriee me, ni guixoo ne ziaadnie me, nacne blee zho grē yo ne no leṅ barcw blaal zhow lo nis. ¹⁹ Goc bioṅ ngbidz scataa zo guie dox co, bnabeyaque zho blee no grēse ncuaaṅe runxtsiin zho leṅ barcw blaal now lo nis.

²⁰ Goc bla ngbidza rbēzdaque guie dox co, rludraa lo mel per ni lo ngbidz rludraa, dzigotaa rdzieets no nli draa griequiaa no. ²¹ Niicle wagw choot rso-ladzdraa, dzigo bnee Pabl lo grē zha ne ziogrē no ga, rēb me:

—Tebaa nion to xtudz naa nagon nzhiguiel to nrieed ne Cret, zeena ndzieelod ne grē ncuaaṅe nodzian ne nu, niicle nlaaldgaa ne grē yo co lo nis. ²² Per laa ne znule bzhiaac zha dziuunraa ne. ḷGdziebde to! ḷPeet gacd ne! Niicle nitlo barcw rii, per choot peet gacd. ²³ Led nanle to ganle, xnēz Dios no naa ni xtsiin me noyūn naa, nieewdze pxeel me ti xanj me ²⁴ nē lo naa: “Gdziebd luu gon Pabl, peet gacd luu, sac ib none laa luu gdziṅ lo rey ne zob Roma. Niicle grē zha ne ziadgrēē luu leṅ barcw i peet gacd zho, sac bin me miṅe rnab luu.” ²⁵ Gane rne naa lo to peet tsienied guic to, nanle

naa csaand Dios ne, ible zac miṅe nē anjl co lo naa. ²⁶ Ib tedsod, no pa ti lo guidzliu win ne no lo nis rii tsiezo me rii ne.

²⁷ Zeene goc tsiida ngbidz sca nēzrii nēzrec zienie me no, laa no no lo Nisdoo Adriático. Wdze co, zig groḷ guieela, bien grē zha ne rsēē barcw ga gaxle ti ro guidzliu ga nonie barcw no; ²⁸ dzigo ptiix zho dieṅ palal quiet nis ga, gon zho lox-aque gaḷ yas guieta. Bzē zho spalal biire ptiix zhow stib, gale guieta loxaque tsi-iptib yas. ²⁹ Gataa laa zho bdzieb rēb zho nend pa tsiecaan barcw lo quie, dzigo psilēē zho lo doo ne zob gza tap guiib cruz nroob ne quia nēz zhits barcw, bron zho gza guiib co lo nis, zeena tsowga sē barcw; rzac zho tebaa laa liu biinile.

³⁰ Grē zha ne run dziin leṅ barcw, go-cladz zho nzhoon zho, psilo zho noxadz zho grē canó win ne ney barcw, rquiaalo zho zig nac zeene guiib cruz nroob ne ney barcw nēz quia w quialit zho csēēb zho leṅ nis. ³¹ Zeene gon Pabla, rēbchaa me lo Jul ni lo grē xmenguiib Jul:

—ḷLaa grē zha rii gon racladz xoon! Csaande to, sac telne laa zho xoon nli draa griequia to lo nis rii.

³² Dzigo pchug grē menguiib co doo ne zob grē canó win co, bron zhow lo nis.

³³⁻³⁴ Silgaw, bii ncow rnaw laa Pabl bnee lo zho gow zho, rēb Pabl:

—ḷNone gow to! Goḷwi ganle nale gac tsiin ngbidz ga ni ti lē peet gard gow to, ni squique raguieste to zaacse. Peet tsienied guic to, ni tib to peet gacd.

³⁵ Blozhse sca bnee Pabl lo zho, bzhen Pabl ti quietxtil, squi ndxie zho grē zho bdeed me xquizh lo Dios, dzigo been-groḷ me quietxtil co laa me psilo wagw. ³⁶ Dzigoraa peet güeyniedraa guic zho, ye zho laa zho psilo dow. ³⁷ Lo grē no zig zio no leṅ barcw co rgaa no chop gayoo tsongaltsiimtib.

³⁸ Blozhse bdioow no, dzigo laa zho blee grē zho bxtil ne zie leṅ barcw ga blaal zhow lo nis, zeena gnitnē barcw

spalal. ³⁹Zeene laa liu blozh biini, gon grë zha ne rsëë barcw ga laa ti lë ro guidzliu rlu gax ga, per riend zho dien paw. Natlaa nac ro guidzliu co, rlu zac gdziñ barcwa, nacne rëb zho dien pe grielod gdziñnie zho barcw ga. ⁴⁰Dzigo pchug zho doo ne zob guuib cruz nroob ne no len nis ga, biaanse guuib co ga. Psilëë zho doo ne naaz yag nlag ne rchug nis rzë barcw, ni blisglaa zho lar nroob ne rcaan me rzëw; zeena csëë mew gdziña gax ro guidzliu co.

⁴¹Per ziese zho, lëetse lo yuzh ne zobli len nis co güeytsiba, loxaque güeysëëbguica ga laa nëz zhitsa psilo nobilaque, sac grëse nis ne rias riecaan choo co. ⁴²Dzigotaa laa grë menguib co gocladz niut grë zha ne zie ga guey ladzguuib, rëb zho nend znuse xoobnis zho xoon zho. ⁴³Per bdeete men ne rnabey lo zho diidz, sac racladzd me gut zho Pabl. Mazd bnabey me zha ne rac rzhooobnis, zac ner zho xoobnis zho grieequia zho ro nis co; ⁴⁴laa grë zha ne gacd xoobnis, zac maase grë yag biats ne nobil barcw xoobnisnie zho. Sca bdeeda diidz brieequia no ro nis grëse no.

Blëz zho Malt

28 Zeene bdziñ no ga, dzigora gocndion no lëë guidzliu win ne lë Malt ga. ²Grë miech ne no ga pquiadox zdoo zho no, bzëëg zho gui bredz zho no bdzëë no, sac lala rac nal ni scataque bgaa no guie.

³Ye Pabl güey güeytop chop lë yag ne cuib lo gui. Lëëtaaque laa me nodziiba lo gui, tibaque bias ti meel ne zizhoon lo zhindzëë gui co, pquiaalay ma nia me, quiataque ma ga. ⁴Grë miech ne no ga, zeene gon zhow rneechaa zho:

—|Ise nagon rlu, nzëëb men qui ngutoo! Niicle blaa me lo nisdoo, per no guie|wxtis ne quianab guet me.

⁵Znuse bdzib Pabl nia me bron me meel co lo gui. ⁶Grëse zho rwi quiambëz

zho dien pa hor sigui me, te tibaque tsobe me liu ye guet me. Wdzeelaaw peet racd me. Laa zeene gon zho peet racd me, dzigo psilo zho rnee zho no cho ti dios nac me.

⁷Gaxaque ga quia tib lë liun men ne rnabey lo guidzliu win co lë Publ, dzigo bneedz me zaatne bliaaz no ga tson ngbidz ni bneedz me ncuane bdiioow no.

⁸Lëëtaaque len dze co laa pxoz me nix rlan xlëë ni yoobchen. Dzigo güeynee Pabl lo me, bnab Pabl lo Dios guiac me; blozhse bnab Pabl lo Dios, pxobnia Pabl guic me, laa me biac. ⁹Zeene bin grë miech cow, zha ne rzacnëtaa riadnie zho zho lo Pabl, runguiac Pabl zho. ¹⁰Dzigo rleynie zho no, nroob grë ncuane bgad zho lo no. Zeene gol dze ne laa no wbii ga, scasaque nroob ncuane yquiin no nëz bneedz zho.

¹¹Tson mëë bliaaz no lo guidzliu co, dzigo laa no brieë ga bziaab no ti len xbarcw zha Alejandrí, ti barcw ne blëz ga dipse len mëë nal co. Guic barcw co quia chop mdio, mdio ne rnee zho Cástor ni mdio ne rnee zho Pólux. ¹²Bdziñ no guiedz Siracús, ga bliaaz no tson ngbidz. ¹³Siracús brieë no, gax gax ro guidzliu zio no bdziñ no guiedz Regio; biini liu ine zhoob ti me ne ziaadquia lo nis co, dzigo laa no brieë Regio laa no zio. Biiniraa sti liu bdziñ no guiedz Puteoli, ¹⁴ga bdziñ no lo blalaa zha ne riladz Jesús. Bnab zho lo no gbiaaz no, nacne bliazaque no lo zho ga ti zhmal. Garaa brieë no bdziñ no Roma.

¹⁵Grë zha ne riladzle Jesús Roma, zeene bin zho laa no gdziñ ga, brieë zho biaad-xinëz zho no. Zhis zho biadzieel no zaatne lë Foro de Apio, szhis zho biaad zaatne lë Tres Tabernas. Zeene gon Pabl scataa biaad-xinëz zho no, rley me rdeed me xquizh lo Dios.

Bdzin Pabl Roma

¹⁶ Zeene bdzin no lad guiedz Roma, bdeed zho diidz Pablzhal bguib ti yu ne bléz me grop me menguiib ne quianap me, blood zho me ladzguiib.

¹⁷ Goc tson ngbidz bdzin no ga, dzigo bredz Pabl grè zha ne nac zha non lo zha Israel ne no ga. Blozhse pcaalsa zho, rëbchaa me lo zho:

—Laa naa bredz to nu gon bets, gacnan to ganle laa grè zha ladz ne bnaaz naa Jerusalén, güeyzo zho naa lo zhiwxtis zha Roma rnab zho guet naa, per gneli naa lo to ganle, peet bend naa lo zho, ni ti zhiwseed xmengol ne bditd naa. ¹⁸ Niicle wxtisgaaw, blozhse pquiep zho naa gon zho raapd naa falt, nacd naa zha ne riegual guet; dzigo gocladz zho nsilaa zho naa.

¹⁹ Per zeene gon naa néd menladz ne csilaa zho naa, nacne bnabaque naa ziaadnie zho naa lo César nu. Min co nagon nacne zial naa nu, ziald naa cto naa menladz ne o cteedquiegaa naa zho. ²⁰ Wen ne laa naa beenbey to nagon, ni beenbeygaa to naa; gacnan to sca ganle laa caden rii zob nia naa, per nacda por pe falt ne rap naa, sinque laaw zob nia naa porne rliladz naa laa Dios pxeelle men ne quiambéz menladz ne ga.

²¹ Dzigo pquiab zho rëb zho lo Pabl:

—jWaltaa, ni ti guits ib gard cxeel menladz ne lo no zaatne gzeet zho luu! Niiclegaa grè zha wladz ne zilanso nuw, rneed zho laa luu noyū pe guielntseeb. ²² Per na laga laa luu ziaad nu, siguiel luu sodiidz luu lo no dien zhapaa nac wseed ne rliladz luu i, sac blactaa zidzion no, zaatne notaa zha ne rliladza rlëenie miech zho.

²³ Dzigo pso zho ti dze ne tsie zho.

Zeene gol dze co, nzian zho pcaalsa zaatne rbéz Pabl ga. Dzigo psilo Pabl bzodiidz me lo zho zhapaa racladz Dios gban miech, ni rnee me lo zho gliladz zho lëele men ne nac diidz cxeel Dios ga nac Jesús; blu me lo zho grëse zaatne zhubneew, zigtaa lo grè mine pquiaa Moisésa, zigtagaa lo grè mine pquiaa grëraa zha ne biadteed xtiidz Diosa. Dipse dze sca bzodiidznie me zho grè min co.

²⁴ Brieequia bla zha ne bliladz grè mine bnee me ga, ni scaquegaa brieequia zha ne bliladzda. ²⁵ Grè zha ne riod zdoo mine rnee me ga, laa zho psilo noriee, nacne rëb me:

—Ib lëepaa mine nac to i ga nagon bzeet Espíritu Sant, zeene psiaab me guic profet Isá znu rëb Isá ²⁶ lo grè xmengol to:

Niicle peraa gon to, niicle peraa gan to, per peet guinde to;

²⁷ sac gocntseeb zdoo to.

Zob diag to, ni peet ronde to;

zob lo to, ni peet rande to.

Ncow nac guic to,

gane peet ronde to, peet rande to;

niicle rioxcdgaa to gbig to lo naa zeena csilaa naa to lo xtol to.

²⁸ Golgacnan sca ganle, min co gane laa Xtiidz Dios quiagaaz lo grè miech stib guiedz, ni zhasi gon noliladz zhow.

²⁹ [Zeene gon zho sca rëb Pabl mazdraa blëe zho, nodiidiidzlsa zho laa zho zey.]

³⁰ Dipse len chop iz bléz Pabl ga, ga bree me ti len yu ne bio me. Ga rdzin grè miech ne zienee lo me, ³¹ zha ne zietaa, rnee me lo zho zhapaa racladz Dios gban miech, ni rnee me lo zho gliladz zho cho nac Jesús. Dipse len dze co, ib biod zha ne ntsidil pe nacne sca noseed me miech.

GUITTS NE PXEEL PABL LO ZHA

ROMA

1 ¡Diuzh to grëse to!

¹Naa nac Pabl, naa nac tib ngundziin win quiayun naa xtsiin Jesús. Dios bredz naa pxeel me naa none naa Xtiidz Ndzon me lo miech.

²Padzeelale bnee Dios ne laa me cxeel Diidz Ndzon rii lo ne, lëew ga bzeet grë zha ne biaad padzeela biadteed xtiidz me lo miech, lëew ga raquiet lo guits ne zhobnee Xtiidz me. ³Lëew ga rnee ganle cho nac Jesús (men ne brieequia lo xtii rey David ne laa me goc miech lo guidzliu; ⁴sangue Espiritu Sant, pxobnen me ganle Xpëed Dios nac me; min co gane brieegan me).

⁵Zeene biaad Jesús, ga pxobnen me ganle tibaque noxco Dios ne; ni niina Diosaque bzooblo naa rxeel me naa none naa Xtiidz me lo grëse miech, zeena gliladz zho me, gon zho diidz gban zho zigne rnabey me. ⁶Zig nac to, glo lo guielcow ga ngab to; sangue niina laa me bredz to laa to ngab xnëz Jesús.

⁷Laa naa rxel guits rii lo to, grëse to ne no to guiedz Roma i. Golgacnan ganle rleynie Dios to, gane laa me bredz to ygab to lo me, gban to zigne no gban zha ne ngab lo me. Me ne nac me Pxoz ne, ni Jesús men ne rnabey, tibaque noxco me to, me nac men ne gacnien to zeena peet zhgab ctsebde to.

⁸⁻⁹Nanle to nasca ganle xtsiin Dios quiayun naa, dib zdoos naa quiaseed naa miech Diidz Ndzon ne nac zhiwseed Xpëed me.

Nu ne laa naa rsilo rne lo to, gloquered naa xquizh lo Dios ni lo Jesús por mine quiayun to grëse to, sac gon tel pa lotaa zëeb diidz ne nlipaa dib zdoos to rliladz to me. Me zobwi, me nan ganle zeene rnabtaa naa lo me, ib rianladzd

naa to, tibaque rnab naa lo me gacnien me to; ¹⁰ni tibaque rnab naa telne zneedz me diidz gdzin tib dze ne grieelo guial naa i guialgan naa to. ¹¹Ne nlipaa rquiabladz naa ganlo naa to, guialzhaal naa gnedz naa rson lo to guien to zha ycaaniaraa to guielbiini ne rneedz Espiritu Sant; zeena tiblique gac guic to dziitsraa so to. ¹²Ni scagaa tipse gac ne ziodiidz ne zha nac Xtiidz Ndzon Dios, mine rliladz ne; zeena tipse gac ne sodzits ne low.

¹³Bets, bzian, tel gan to ganle blactaa vuelt ziyacladz naa guial naa i guialgan naa to, per haxta lo nadze gon rrieelodaque guial naa. Ib laa guic naa no guial naa lo to i, zeena gacndalraa miech ne sëeb gliladz Xtiidz Dios, zigne ziyacndal zho grëraa zaatne ziyateed naa. ¹⁴Sac ible naa ragual cseed miech Xtiidz Dios, grëse zho niicle zha nona, niicle zha mbana; niicle zha raca, ni niicle grëgaa zha ne peet rienda. ¹⁵Mincoxe waa, tibaque laa naa racladz ye nëz qui guial naa guialne naa Xtiidz Ndzon Dios lo to, ne nac to zha ne no guiedz Roma i.

Poder ne rap Xtiidz Ndzon Dios

¹⁶Tel naa, ib rtoladzd naa gne naa Diidz Ndzon rii lo miech, sac ncuuan ro ne run Dios zeene rquiaadiag miecha. ¡Grëse miech ne gliladza, ib zlaa zho lo xtol zho! Laa guielnzaac co no niina par grëse miech. Glose lo zha Israel bdzina, laa niina laaw quiazin lo grëraa miech, zeena grëse zho gbig sëeb xnëz Dios. ¹⁷Sac gon, lëe Diidz Ndzon rii rlu zha rbiire rcaania Dios miech, rsanmbe me zho lo dol rbiire riaanwen zho lo me: totsaque nli dib zdoos zho gliladz zho mine nac Xtiidz me. Sca zhobnee lo Xtiidz me, zaatne rnee: “Zha ne biaanwenle lo Dios, ib zrieelo gbannie zho me, sacne dib zdoos zho rliladz zho mine nac Xtiidz me.”

Xtoł miech

¹⁸ Ndiönle ne ganle no guielñe ro ne csiaab Dios yгаа grēse miech ntseeb, miech ne nēd gac-wen, ni desde gbaa cxeel ne guielñe ne yгаа zho; sac por xquielntseeb zho rsaand zho gacnan grēraa miech mine nac diidzli.

¹⁹ Grē zha ntseeb, nanle zho zha nac Dios, sac mezhāl blu lo miech zha grielo gunbey zho me. ²⁰ Niicle ne grielod ganlo ne Dios, per de lo grētaa ncuaane bzaa me, grētaa ncuaane run me, gase rlu ganle cho nac me. ¡Gase rlu ne nli me nac Dios, ni gdzind dze ne lozh xpoder me!

Gacxe waa grē zha ntseeb, ib tedlaad zho lo guielñe ne csiaab me ga; ²¹ sac gon niicle nānpaa zho me nac Dios, ni ib rond zho xtiidz me. Nēd zho gunbey zho me zigne rieguiala, niicle xquizh nand zho gdeed zho lo me. Laa ne rzac zho na rien zho pe run zho, leł pcow xquielrien zho; rzac zho na lēew ga, gun zho ncuaane guiaabtaa guic zho. ²² Niicle ne rzac zho zharieñ zharac nac zho, per zha nac miech ne quialoozhraa lo xquieln xen; ²³ sac gon laa ne gunbey zho guielndzon ne rap men ne nacpaa Dios nguiamban, leł rsilo zho rzaa zho grē mdio ne niaa zigne rlu samiech guidzliu zho, grē mdio ne niaa zigne rlu grē ma ne rsiibe, grē ma ne rzē tap ni, grē ma ne rzēlen lo liu; leł grē ncuaan co ziegān zho laa ne gleynie zho men ne nacpaa Dios.

²⁴ Mincoxe nagon waa, rsaanladz Dios zho laa zho zienal grē ncuaane ndzinlid ne rzoobladztaa zho. Grē ncuaane ntoladzdox ne run zho, lēēque zha runnguzee zho rguitnie zho xcuerp zho. ²⁵ Sac laa ne gleynie zho diidzli mine rnabey Dios, leł mine rnee zha ne rquidie rleynie zho; leł grē ncuaane bzaale Dios, ncuaane psanle me, ncuaan co ziegān zho, lo grē ncuaan co

zieuqitsgzhīb zho; laa ne yquitsgzhīb zho, gleynie zho men ne nac Dios mban, men ndzon ne psan grētaa ncuaane no. ¡Diosse rieguial gunnon miech, men co rieguial tibaque goolnie zho! Sca rieguiala.

²⁶ Ne sca nagon nac zho, gane psaan Dios zho laa zho run grē guielyozh, ncuaane ngubeeguelto ne rieguialdraa gun miech. Grē wnaa laa ne gdeed zho diidz gnee tsiel zho lo zho, leł lēēque sawnaa zho rquiangob zho, laa zho zienal grēraa guielyozh; ²⁷ grēgaa mgui, laa ne gnee zho lo wnaa ne nac tsiel zho zigne biaan no gaca, leł lēēque sabgui zho rzoobladz zho. Ncuaane mbixladz run zho, rquiangob zho lēēque sabgui zho; ni ne sca run zho grē ncuaan co, lēē mine rdziniaa zho nac grē guielguidz yozh ne riaan lad zho; ndzinlidraa rac zho.

²⁸ Scataale nac zho, ni bii rzoliaadz zho gbig zho lo Dios, gane niicle megaa rlozh rsaanladz me zho, laa zho biaan lo grē zhgab yozh ne no guic zho, no zdoo zho, min co ne scataa nac zho. ²⁹ Nroobdoo nac xtoł zho, sac:

rsacsixuu zho samiech zho,
rzoobladz zho ncuaane quianied zho,
ractseeb zho lo samiech zho,
nē rac zdoo zho ran zho stib noded
samiech zho,
rut zho samiech zho,
rtsidil zho samiech zho,
rquidie zho samiech zho,
rquiadiidzguizh zho samiech zho,
miech yozh nac zho,
³⁰ rneenē zho samiech zho,
rquiabro zho lo samiech zho,
racniats zho lo samiech zho,
rlu zho ncuaane rapd zho, ncuaane nacd
zho;

rlēēnie zho Dios,
rio zho rbeeby zho grē guielntseeb,
rond zho xtiidz pxoz zho,
rond zho xtiidz xniaa zho,

³¹ racladz zho gon zho diidz, rund zho mine rnee zho, rleynied zho samiech zho, rund zho samiech zho perdon, rquiad zdo zho samiech zho.

³² Niicle ne nappaa zho zha rnabey Dios none gban miech, niicle ne nappaa zho grëse zha ne run guiełntseeb, ib tedsod znitlo zho; ni laa zho bii quiayuna, ni haxta rley zho ran zho cho grëraa zha ne run grë mine run zho.

Xquiełwxtis Dios

2 Ib tedsod no to gnë: “iZha ntseeb-taa miech ne sca run!” iPer gni naa lo to ganle, zigtaa zhaw, zigtaa tow, lalga ntseeb to grë to! Sac ye to gon run grë guiełntseeb co, gacxe waa, zha ne rzac rieguał zha co yгаа zho guiełnë ne csiaab Dios, ye zho rieguał min co. ²Ndion ne ganle Diosi zeene laa me gun guiełwxtis, grëse zha ne sca zienał guiełntseeb, ib tedsod zunquizh me zhow.

³Zha ne sca rlozhd gzee zdo pe quiayun stib zho, haxta rlisqui zho mine quiayun zha co, ni yeque zho quiayuna; masaque nan zho nagon zdedlaa zho zeene laa Dios guiaadgun xquiełwxtis me, masaque nan zho zha cose nitlo, laa zho tedlaa. ⁴None guien zho ganle pa lotaa nquialadz Dios zho, pa lotaa noyap me zho paciens noxecw me grëtaa ncuane run zho; sac laa me quiambëz csaan zho xquiełntseeb zho, yguudz zdo zho gban zho zigne rnabey me. ⁵Tełne tibaque squi ndip gac zdo zho, gond zho mine rnabey me; gacnan zho ganle, quiayunloraa zho grë guiełnëdox ne yгаа zho gał dze ne laa me gun guiełwxtis. Ni xquiełwxtissi me, zigne rieguał gaca sca gun mew.

⁶Gal dze co, laa me gdeed mine rieguał yгаа tib tib miech teł zha wban zho. ⁷Grëse zha ne güeynał beennon zho lë me, pxobnen zho xquiełndzon me,

güeynałd zho grë ncuane rnitlo, lo zha co gdeed me tib guiełmban ne gdziñd dze lozh. ⁸Sangue grë zha ne güeynał loxaque grë zhixco zho, güeynał zho grë guiełntseeb, laa ne nienał zho mine nac diidzli; zha co yгаа grëse zhian ne csiaab me.

⁹Ga nagon, grëse zha ne run guiełntseeb, zigtaa zha Israela, zigtagaa zha stib guiedza, ible zгаа zho tib guiełnëdox; ¹⁰sangue grë zha ne rban zaacse, zigtaa zha Israela, zigtagaa zha stib guiedza, ible zгаа zho lo xquiełndzon me, zunnon me zho. Ni led yedraa ga pe zhgab ctseb zho.

¹¹⁻¹⁵Grëse zha ne gunctal xtol, teł chotaa nac zho zunquizh Dios zhow; sac teł me, led yed me cue. Zig nac grë zha ne beenbeyd xley me, zunquizh me zho grë xtol zho; sac niicle ne gocnandpaa zho zha naca, per len zdo zho, guic zho, nappaa zho pa min nac guiełntseeb, pa mingaa nac guiełwen. Rrieequiacxe waa runbeyle zho xley Dios ga. Scaquegaa zha Israela, ne nac zho zha ne runbeypaa xley Dios, zunquizhaque me zho grë xtol zho; sac niicle ne runbeypaa zho xley me, per teł lozh ga mband zhow. Nanpaa zho pa min wen, ni teł lozh ga rond zho diidz gun zhow; sac gon, led-xe por ne gacnandse ne ley waa laa Dios ycaaniale ne, sinque none gban new.

¹⁶Zdziñ tib dze, zeene laa Dios cxeel Jesús, gunquizh me miech grëse doł ne been zho tib tib zho, niicle mine mazdraa rzac zho ngeets zhlian been zho; sac sca rnabey Dios gaca, ni min co noseed naa miech.

Zha Israel ni xley Moisés

¹⁷To ne nac to zha Israel, rzac to zienałpaa to xley Moisés, niats rac to, rzac to tose non lo Dios. ¹⁸Nanwen to zha racladz Dios gban to, nappaa to pa min wen sac pseed to xley me. ¹⁹Min co masaque rzac to to cseed zha ne no

lo ncow, grë zha ngoopdoĭ. ²⁰ Masaque rzac to to rienraa zha cseed to grë zha ne peet gacd, to rienraa zha quixbiini to grë zha ne peet rienĉ; sac rzac to ne nan to ley, tose nac zha ne ndziibraa nixbiini, tose nan minë nacpaa diidzli.

²¹ Nana, tel scataa rien to zha cseed to stib miech, ĩpe nac dzigo rwide to minë run to?

Conque to name mee lo miech cuand zho, ni rlozh ga toque quiaban. ²² Rseed to miech rnee to, tib zha ne nole tsiel, nodne yquiangob zho stib zha ne led tsield zho; ni rlozh ga toque noyun min co. Rnee to, rdziguiende to grë mdio, ni rio to rieban to yadoo ne zob grë mdio co.

²³ Rlozhd gacniats to rzac to quiayunnon to lë Dios ne nan to ley, ni nande to gon, lel quiaguitnie to lë me ga, sac mbande to zigne nac ley. ²⁴ Minë noyupaa to i ga gon raquiet lo Xtiidz Dios, zaatne rnee: "Por xtoĭ to, grë zha zit laa zho rneenë Dios."

²⁵ Tel to, rzac to porne nacse to zha Israel non to lo Dios, per ne squi mbande to zigne nac xley me, nacaque to zigne nac grë zha zit ne runbeyda. ²⁶ Nana, zha zit ne rioxco rban zigne nac xley me, ĩniacxe rieguiald dzigo guiannziuu zho lo Dios? Sanziuu me zho gon. ²⁷ Golgacnan sca ganle, glole zha zit co gon guiannziuu lo Dios, lëdle to ne nappaa to zha racladz Dios gban to, nappaa to minë psan Dios diidz yгаа to, ni rbande to zigne rnabey me.

²⁸ Golgacnan sca ganle, led porne nacdse to zhin zha Israel, porne bio to xbey zho, laa to nziuule lo Dios. ²⁹ Led scada gon, sinque zha ne nli dib zdoo rioxco minë rnabey Dios, zha co nziuu lo me. Sac tel Dios, rwidaxe me waa dien cho pe bey ne no, sinque laa me rcaania zha ne nlipaa dib zdoo, dib guic, rban zigne racladz me. Grëse zha ne znu nac,

nziuu zho lo Dios, niicle telne rzac to peet nond zho.

3 Nana, ĩpa lugar nadien ne riaannon zha Israel lo grëraa zha stib guiedz? ĩPa rquiin ne scataa rio zho bey? Zootle lëë lalaquew tel niaca minë niacd zho zha Israel. ² Per led scada, no pe nacne non zho. Sac gon, ible lo zho psan Dios xtiidz me mazd padzeela.

³ Nli ndal zho rond xtiidz me, per led mincod ctsëë me xtiidz me, minë bneele me lo zho. ⁴ Niicxe tel zharaa quiayunntal miech xtoĭ zho, sangue Dios ctsëëd me xtiidz me. Zigne zhubneeque lo Xtiidz me, zaatne rnee: "Minë rnee Dios, diidzli naca; niicle zha ne gacladz, guiend pe ncuaane glisqui zho lo me."

⁵ Sca nac Dios, gacxe waa rnee me grëse zha ne runctal xtoĭ, rieguial yгаа zho guielnë ne cxeel me. Ga nagon, rlu ne minë nac diidzli, min co run me. Nana, ĩpe ziab ne nonguield minë run me ga? ⁶ Minë nonguiel ga gon run me, sac tel gdziguien me grë zha ne runctal xtoĭ, ĩzha naczhe guielwxtis ne dzigo gun me?

⁷ Nana, nogaa zho gnë, ĩper pe nacne glisqui Dios doĭ ne rdziuu ne, ni tel por lëew rlu ne diidzli nac minë run me?

⁸ Per telne sca naca, rrieequia dzigo ib none gunctal ne xtoĭ ne parne yquiaraa zdoo me ne. Ni nzian zha ne nobee xquielto naa, rnee zho ib min co noseed naa miech. Ni zha ne sca rnee, ib tedlaad zho lo guielnëdox ne rieguial zho.

Grëse miech, ngoopdoĭ nac zho

⁹ Nana, ĩpe zdzieets ne dzigo ne nac ne zha Israel, nziuuraa ne lo grëraa miech stib guiedz? ĩLed scada gon! Niina blozh bzeet naa lo to, grëse ne ngoopdoĭ nac ne, zigtaa zha Israela, zigtagaa zha stib guiedza. ¹⁰ Zigne zhubneeque lo Xtiidz Dios, zaatne rnee:

ĩGuiend miech ne zienalpaa minë racladz Dios!

¡Ni tib zho guiend!

¹¹ Guiend zha ne niini guic;

guiend zha ne tsoxco yguib xnöz Dios.

¹² Grése zho laa zho zie nöz ne nitlo zho; niapse guieIntseeb zienał zho.

¡Guiend zha ne zienał miñe racladz Dios!

¡Ni tib zho guiend!

¹³ Ro zhow,

masaque been cuent naca zig nac len grē baa ne noyodz ngutoo;

niapse diidz ne rquidie zho zhoob lo ludz zho.

Grē diidz ne rnee zho,

masaque naca zig nac xvenen grē meel dox;

¹⁴ niapse grē diidz dox, niapse grē didznē rrieche ro zho.

¹⁵ Ni zhow,

masaque zombözlew dien pa tsiegut zho samiech zho;

¹⁶ loxaque guieInē, loxaque guiełzi rsan zho zaatne rded zho.

¹⁷ Ib nand zho ne zaacse gbannie zho samiech zho;

¹⁸ per ni Dios rdziebdraa zho.

¹⁹ Gacxe waa nroob nac guieInēdox ne yгаа grē zha ne runbey ley ni mband zho zigne naca, leł run zho grētaa guieIntseeb zig nac grē miñe goquiet nu. Ni niicle grēraa miech ne runbeyd ley, scaque ngoopdoł nac zho, ni ro zho guiend pe guiab zho lo Dios. ²⁰ Goł-gan sca ganle, grieelod guiaanmbe ne lo Dios, niicle paraa yquia ne gun ne miñe rnee ley; sinque par guieñ ne ganle ne ngoopdoł nac ne, gane biaan ley.

Silaa Dios miech zeene gnalo zho me

²¹ Sangue niina, tib ladle biaan ley, laa Dios bneedz stib mod ne guiaanwen ne lo me. Ni lo grēque guits ne ziaad ley, lo grē guits ne pquiaa zha ne biadteed Xti-idz Dios padzeela, ga raquieta. ²² Grése miech tel chotaa nac zho, tel petaa been zho, ib ziaanwen zho lo Dios totsaque dib zdoos zho gnalo zho Jesús, dib zdoos

zho gliladz zho me. Zha ne gliladztaa me, sac led yed Dios rbe.

²³ Zigne rne naa ga, grése ne miech ngoopdoł nac ne lo Dios, ni palal rdzieeld gdziñ ne lo xquiełndzon me.

²⁴ Per niina laa me blu ganle pa lotaa noxco me ne, gola zdoos me pxeel me Jesús bdiizh grése xtol ne, laa ne biaanwen lo me. ²⁵ Laa me been miñ co parne glu run me guiełwxtis, sac niicle bdizhd ne xtol ne, per pxeel me tib men ne bzhiee xchen bdiizha xcuent ne, lēē men co nac Jesús; gane niina grése zha ne gnalo men co, zun me zho perdon grētaa doł ne pxcw me been zho. ²⁶ Ni tib doł rapd me, ni scaque grē zha ne dib zdoos gnalo Jesús, sanmbe me zho lo xtol zho.

²⁷ Sca nagon psilaa Dios ne lo doł. ¿Cho nadien gacniats ga? Ni tib choot gacd gacniats, sac led por miñe bdziund new, sinque por grētaa miñe bded Jesús. ²⁸ Gocndion ne sca ganle: Niapse por dib zdoos miech gliladz zho Jesús, laa Dios ycaania zho; nacda por tso zho gun zho miñe rnabey ley.

²⁹ Nana, ¿pe zha Israelse sca ycaania me? ¡Lēda gon! Grése miech, sca ycaania me zho. ³⁰ Sac gon tibeyse ran Dios ne grése ne; zigtaa zha Israella, zigtagaa zha stib guiedza, sanmbe me ne lo grē xtol ne, totsaque dib zdoos ne gnalo ne Jesús.

³¹ Nana, ne znu rcaania Dios ne, no zho sac rquiindraa ley. ¿Zha yquiindzhew? Niinale ne znu dib zdoos ne rriladz ne Jesús, rienraa ne pa rquiina.

Dib zdoos Abraham bnalo me Dios

4 Zig nac pxozgoldoo ne Abraham, ¿pe been me ne laa Dios pcaania me? ² ¿Pe por guiełwen ne been mew? ¡Lēda! Telne scaw, nrieelo niacniats me (niicle ne nöz lo Dios ni palal rieguiald niacniats me). ³ Sac gon rnee lo Xtiidz Dios, ne dib zdoos me bliladz me Dios gane pcaania Dios me zig tib zha ne peet xtol.

⁴Zig nac tib zha ne run̄ dziin, dimi ne razh zho ible rieguiāl zhow, rate zhow ga. ⁵Sangue Dios zdoo me ral rcaania me miech, zha ne dib zdoo rnalo me, nacda por pe guiēlwen ne gun̄ zho par guiab ne laa zho rieguiāla. ⁶Ye rey David bzeet guiēlbley ro ne rgaa zha ne sca rcaania Dios, ⁷rëb David:

¡Wen zie zha ne run̄ Dios perdon!

Niicle nroob guiēlntseeb ne been̄ zho; tēl pe nactaa xtōl zho, glisquidraa mew. ⁸¡Wen zie zho sac gun̄quizhdraa me zho grë xtōl zho!

⁹Nana, ¿pe loxaque grë zha ne nose bey zrieelo ygaa guiēlbley co, te ye grë zha ne noda ye? Nacda por bey, laa ne blozh bzeet ganle niapse ne dib zdoo Abraham bnalo me Dios, min̄ co ne pcaania Dios me zig tib zha ne peet xtōld; ¹⁰sac gon̄ gard pe bey ne tso me zeene pcaania Dios me. ¹¹Pcaaniale Dios me dzigora bio me bey. Lega laa me biosse bey co, zeena glu ne laa Dios pcaaniale me porne dib zdoo me bnalo me Dios. Min̄cocxe waa, Abraham nac dad lo grëse zha ne nod bey, ni dib zdoo zho rnalo zho Dios; ni scagaa Dios, rcaania me zho zig tib zha ne peet xtōld. ¹²Ni meque nac dad lo grë zha ne no bey ni dib zdoo zho rnalo zho Dios, zigne bnalo me Dios zeene gard tso me bey co.

Zha goc miñe bnee Dios lo Abraham

¹³Psan̄le Dios diidz lo Abraham ne me guiaannie guidzliu, grë me zha ne greequiaraa lo xtī me; guiabd ne togo porne been̄ me miñe nac xley zha Israela, sinque ne dib zdoo me bnalo me Diosa. ¹⁴Nana, tēl niaca zha ne gun̄se miñe nac ley, zha cose ygaa min̄ co, rrieequia dzigo zhlëse ga bnalo Abraham Dios, niicle diidz ne psan̄ Dios lo me ga, nondaquew. ¹⁵Sac nac ley gon̄, zha ne gunda zigne naca, laa Dios csiabzi zho; laa zaatne guiēndgaa ley, gacd guiab zho cho noguitsa.

¹⁶Ne scacxe waa nac ley, gane niina lëese miñe no gun̄ ne nac dib zdoo ne gnalo ne Dios par ygaa ne miñe psan̄le me diidz ga. Grëse ne ygaa min̄ co, per nacdraaw dieñ cho zienal̄ ley, cho zienaldgaaw, sac miñe nonraa, dib zdoo ne gnalo ne Dios zigne bnalo Abraham me. Min̄cocxe waa, rrieequia Abraham nac pxoz ne grëse ne, ¹⁷zigne rëb Dios lo Abraham: “Laa naa bzo luu, luu gac dad lo nzian dii miech.” ¡Lëë Dios co nagon̄ bliladz Abraham, me rbeeban grë mengut, ni niicle haxta grë ncuaañe guiēnd, saa mew!

¹⁸Ndaldox rëb Dios gac lo xtī Abraham, ni bliladz Abraham miñe rëb Dios ga. Niicle ne zootle led ncuaañe gacda, per me dib zdoo me bliladz me ne zaca, ni scagaa bdziñ dze ne laaw goc. ¹⁹Tibaque bnalo me Dios, niicle ne lala ziele xtse me (zig tib gayoole iz me), ni lala tsiel me Sar, nacd me wnaa ne gap mëëd. ²⁰Ib goc chopd guic me niab me bod nliid niac miñe bnee Dios ga, sinque dzigole dib zdooraa me bnalo me Dios; haxta rdeed me xquizh lo Dios, ²¹sac nanppaa me men̄ nroob nac Dios zun̄ me miñe psan̄ me diidz ga. ²²Ne sca nagon̄ dib zdoo me rnalo me Dios, gane pcaania Dios me zig tib zha ne peet xtōld.

²³Zhobnee lo Xtiidz Dios sca pcaania me Abraham, ni laaw zhobnee zeena gancdion̄ ne ²⁴ye ne scaania me ne zig tib zha ne peet xtōld, totsaque dib zdoo ne gnalo ne Jesús, men̄ ndzon ne rnabey ne; ²⁵men̄ ne gut ga bdiizh me xtōl ne, men̄ ne brieeban ga, par glu me nli psan̄me me ne nëz lo Dios.

Jesús rsan̄me miech lo dol̄

5 Nasi laa ne nacle zig zha ne peet xtōld, laa ne biaanwenle lo Dios porne dib zdoo ne rnalo ne Jesús, men̄ ndzon ne rnabey ne. ²Sac por grëtaa miñe bded Jesús, laa ne bgaa guiēlnzaac rii nacie me ne, ni ib csaand ne me. Tib

guielbley nrooba lo ne, sac ndionpaa ne ib zgaa ne lo guielndzon ne no me.

³Ni scaquegaa nagon none gley ne zeene pe guielnë ne nodzian ne; sac ndion ne ganle, ga cseed ne lëb ne dziits so ne lo miñe riladz ne. ⁴Ni zeene sca dziits so ne, zlliladzraa ne dib zdoo ne; ni zeene dib zdoo ne riladz ne, zacnanpaa ne ib zgaa ne miñe riladz ne. ⁵Ni ndionpaa ne zgaa new, sac blu Dios rleynie me ne, pxeel me Espiritu Sant nacie me ne.

⁶Lëëtaaque zeene rdzieldraa miech zha gun zho par guiaanmbe zho lo dol, hor co laa Dios pxeel Jesús, biaad me gut me bdiizh me xtoł ne nac ne miech ngoopdol.

⁷Ndion ne ganle, niicle tib miech ne peet xtołda, tib miech ne mazdraa wena, led lega grieequiad tib zha ne cueeladz xquielmban guet por zha. ⁸Sangue Dios gon, niicle ne miech ngoopdol nac ne, blu me ganle pa lotaa nquialadz me ne, pxeel me Xpëed me Jesús, men co blee-ladz xquielmban gut me xcuent ne.

⁹⁻¹⁰Gotsaa gwi ne ganle, zha nactaa guielnë ne bded Jesús psanmbe me ne lo xtoł ne, psanwen me ne lo Dios; ni scaque nagon, ible me csilaa ne lo grëtaa guielnëdox ne csiaab Dios ygaa grë miech ntseeb. Ne nligaa, csaand me dzian ne guielnë co; sac gon, tel scataa miñe been me por ne zeene nac ne tib miech ngoopdol, zeene scataa ntseeb goc ne blëënie ne Dios, ¿pe lel na dzigo ne laa ne biaanwenle lo Dios, laa ne biaanle zig tib zha ne peet xtoł? ¹¹Gacxe waa, niina ne psanwen Jesús ne lo Dios, none ine gley ne ne laa ne ngable lo Dios.

Zha nacne biaan dol

¹²Znu gon nacne laa dol biaan: por miñe been Adán bind me xtiidz Dios, min co nac ne biaan. Ni por lëew pquiaqui laa guielgut biaanque, blozh ga grëse miech laa zho ret, sac grëse zho, tsod zha ne gunctald xtoł. ¹³Desde hor

co biaan runctal miech xtoł zho. Grëse miech ne bre lo guidzliu, desde Adán haxta len dze ne laa Moisés pcaania ley, beenctal zho xtoł zho, niicle ne guielndpaa tib ley hor co nlu ne doła. ¹⁴Gacxe waa ye zho, grëse zho gut; niicle ne bdiitsd zho merpaa xtiidz Dios zigne been Adán.

¹⁵Nli tib guielnë ga psan Adán, per niinagaa mazdraa nroob guielnzaac ne rneedz Dios lo ne. Por falt ne been Adán, biaan grëse ne ne nac ne miech laa ne no guet; per niina ne biaad stib men ne beend ni tib falt, por min co laa Dios rquia zdoo ne grëse ne, laa me rneedz tib guielmban ndzon lo ne; lëë men co nac Jesús. ¹⁶Tibaque nac dol co been Adán, per grëse miech biabzi; sangue Jesús zeene laa me biaad, grëse ne ne nac ne miech psilaa me ne lo grëtaa xtoł ne, psanwen me ne lo Dios. ¹⁷Dol ne beense Adán ga, min co pquiaqui grëse ne ne nac ne miech, laa ne biaan ladznia guielgut; sangue niina ne biaad Jesús, zrieelo ygaa ne tib guielmban ndzon. Guielmban ne ral zdoo Dios gdeed me lo grëse zha ne gbig lo me gun me zho perdon. ¹⁸Sca nagon naca: por falt ne been Adán ga, grëse ne ne nac ne miech laa ne biabzi, per zeene laa Jesús biaad, pquia zdoo me ne masaque me bdiizh grëse caxtigw ne riogual ne ga, laa me psanwen ne lo Dios parne grieelo ygaa ne tib guielmban ndzon. ¹⁹Golgan ganle, porne bdiits Adán xtiidz Dios, grëse ne ne nac miech laa ne goc zha ngoopdol; per scagaa, por bzoob Jesús grëse xtiidz Dios, zha ne gacladztaa, zrieelo guiaanwen zho lo me.

²⁰Ible laa ley biaan, par glu ganle pa lotaa nac grë falt ne noyun miech lo Dios. Per niicle scataa nac grë dol co, per blu Dios ganle mazdraa rquia zdoo me miech. ²¹Masaque bnabey dol miech, pxeela zho nëz ne nitlo zho; sangue zeene laa Jesús biaad, psanwen me ne lo

Dios, gane niina zha ne gnalotaa Jesús zгаа zho tib guielmban ndzon.

Zha ne mbanniele Jesús

6 Laa ne bdziañle ganle zha noxcotaa Dios ne. Nana, ¿pe zdieets ne dziu- unctalraa ne xtol ne zeena tsoxcoraa me ne? ² ¡Lëdraaw ga gon! Nodraa ne dziuun ne dol, sac gon, laa ne nacle niina zig tib zha ne gutle nëz lo dol.

³ Golgan ganle, zeene laa ne bziaab xnëz Jesús ni brobnis ne, rriequia gut ne ga zigne gut me. ⁴ Zeene brobnis ne rriequia bioliu ne ga, zigne bioliu Jesús. Ni zigne brieaban Jesús (por poder ndzon ne rap Dios), scaque ne rriequia brieaban ne, stible guielmban ne rdziaap ne.

⁵ Ni zigne sca rriequia gut ne zeene gut Jesús, scaqueгаа ndionpaa ne zbeeban me ne zigne brieaban me. ⁶ Ndion ne ganle, miech ne goc ne glo zeene scataa bional ne guieñtseeb, rriequia ye miech co pquianie me lo cruz. Ga bñitlo mine goc ne ga, zeena ygadoodraa ne lo dol; ⁷ sac gon, deque bñitlo grë mine goc ne glo, grieelodraa gnabey dol ne.

⁸ Nana, telne scale gutnie ne Jesús, ndionpaa ne ib zbannie ne me.

⁹ Ndion ne ganle brieaban Jesús, ni gdziñdraa dze guet me. Grieelodraa pe gun guielgut me.

¹⁰ Tibaque vuelte gut me bdiizh me xtol grëse miech, sangue niina mban me ni Dios mbannie me. ¹¹ Scagaa to nasca, golguien ganle laa to gutle lo dol, nodraa gnabey dol to stib, sinque laa to mbanle niina par gun to mine rnabey Dios. Golguien ganle, Jesúsle nacie to.

¹² Nana sca, gdeetraa to diidz gnabey dol xcuerp beñ to i, tso to gun to grë ncuane ndzinlid ne racladz xcuerp to. ¹³ Ib gdeete to diidz guiab to lo dol stib, gun to grë guieñtseeb; sinque golsan to ladznia Dios, ine golgun grë mine

racladz me. Golguien ganle, laa to gutle lo grë dol, Diosle mbannie to niina; ¹⁴ zeena scagaa gnabeydraa dol lo to, zigne beena to zeene scataa bioxco to mine rnabey ley. Sac gon rnabeydraa ley to niina, laa Dios blule ganle pa lotaa nquialadz me to biaadsilaa me to.

Nli nquialadz Dios ne, rnabeydraa ley ne. ¹⁵ Per nana, ¿pe ne rnabeydraa ley ne, pe ne nquialadz Dios ne dzeets ne dziuun ne grëtaa ncuane dñictal xtol ne? ¡Lëda ga gon! ¹⁶ Nanle to ganle, tib zha ne nanle cho lo yquia zho dziin, lo zha co ngadoo zho ni mine rnee zha co none gun zho. Zig nac zha ne ngadoo lo dol, niapse dol run zho ni mine tsieguial zho laa zho nitlo; sangue zha ne run mine rnabey Dios, scaania Dios zho zig tib zha ne peet xtol d. ¹⁷ Nli glo lo dol ngadoo to, per xquizh Dios zeene laa zho biadseed to Xtiidz me gocnan to zha laa to lo dol, laa to bliladza ni noxco to mban tow niina. ¹⁸ Ni zeene laa to brieeladznia dol, laa to bgab lo Dios; zeena mine rnabeyle me mincole gun to. ¹⁹ Znu bzet naa grë min rii lo to, zeena guien to zha naca.

Nana sca, zigne scataa bio to ladznia dol been to grëtaa guieyozh, grëtaa guieñtseeb, scagaa niina golsan to ladznia Dios, golban zigne rnabey me, zeena lozh guiaanmbe to zigne racladz me. ²⁰ Zeene scataa ngadoo to lo dol, ib wbande to zigne rnabey me.

²¹ ¿Pe nadien needz dol lo to? Lëe gdib mine ngaa to laa to nitlo. Zig nac niina, haxta rtoladz to zeene rsoladz to grë ncuane been to hor co. ²² Sangue niina, ne laa to brieeladznia dol laa to ngab lo Dios, ible ziaanmbe to zigne racladz me ni zгаа to tib guielmban ne gdziñ dze lozh.

²³ Sac gon, zha ne runctal xtol, lëe gdib mine tsieguial zho laa zho nitlo; sangue zha ne gbig lo Jesús, mine ral zdoo Dios

ygad me lo zho nac tib guielmban ne gdzindraa dze lozh.

7 Bets, bzian, to ne nac to zha ne runbey Xley Dios, nanwen to ganle, zeene zombanse miech dzigo rrieelo rnabey ley co zho.

²Zig nac tib mgui ne rtsieelnia, rnabey ley ne mguise gbannie wnaa ne nac tseeel mgui. Per tel gzoob ne glo mgui guet, dzigo gacdraa gnabey ley ne mguipaa gbannie wnaa co; telne gacladz zho ctsieelnia zho stib mgui, zaca. ³Nli nonguielda ga gun wnaa ctsieelnia zho stib mgui laga bii zomban tseeel zho; laa zeene gutle tseeel zho, led doIdraaw yguib zho stib zha ne ctsieelnia zho.

⁴Bets, bzian, scadaa nagon bzhaac to. Zeene sca gut Jesús, rrieequia ye to gut ga gane niina ngadoodraa to lo ley, nicile lëëgaaw grieelod gnabeya to. Jesús, men ne brieaban ga, mele nac tseeel cub to niina. Niinasi, zrieelele gban to zigne racladz Dios; ⁵sac glo (zeene scataa bdziunctal ne xtol ne, bdziun ne grëtaa ncuaane nonguieldraa niicle ne ndionpaa ne pe nac mine zhubnee lo ley no dziun ne), niapse grë ncuaane nxeel ne zaatne nitlo ne, ncuaan co bdziun ne. ⁶Blactaa bgadoo ne lo ley, sangue niina rrieequia gutle ne nëz lo ley, laa ne mbanle zigne rnabey Espiritu Sant.

Rca dol gac mine rnabey ley

⁷Nana, ¿pe zdzieets ne dzigo por leypaa rdziunctal ne xtol ne? ¡Coo, led scada! Tel naa gon, ib niacnand naa pe nac dol telne guiend ley. Niacnand naa ne dol ga gzoobladz ne chen ben, telne niacnand naa ne rnee lo ley: “Gzoobladz luu chen ben.” ⁸Zeene gocnan naa zha nac ley, dzigoraa bien naa niapse dol nac mine noyun naa; sac zeene guiend ley, rlud pe nac dol.

⁹Glo zeene riend naa zhapaa nac ley, tibaque rzaac naa ib peet dol rapd naa; per zeene gocnan naa zha nac ley, bien

naa ne ib raguial naa nitlo naa, sac dol quiayun naa. ¹⁰Nli laa ley biaan zeena guien ne zha grieele yгаа ne guielmban, per lel blu w ne raguial naa nitlo naa sac ngoopdol nac naa. ¹¹Ne nligaa bdziitnie dol naa, mine rsopaa ley diidz nod gun miech mincopaa ben naa; ni blozh ga, lëëque ley blu ne ib raguial naa nitlo naa. ¹²Niicle ne scaw, per Dios psana ni rquiin grë mine zhubnee low.

¹³Nana dzieets ne: conque telne wen nac ley, ¿zha nac dzigo ne lëëpaaw rlu ne rioguiel ne guet ne? ¡Coo, led scada! Sinque znu naca: dol pteedquie ne lадznia guielgut. Ga rlu ganle zha nactaa dol, sac gon lëëque ley pquiin dol pteedquiew ne lo guielgut. Ga blu ley ganle zha ntseebtaa nac dol. ¹⁴Got-saa gwi ne ganle wen ley, led leyd rxin sinque ne rxin; sacne rrieequia ngadoo xcuerp ne lo dol.

¹⁵Tel naa, riend naa pe nacne znu rac naa, niicle ne racladzpaa naa gun naa ncuaane nonguiel per nëda, lel ncuaane rzoobladz naa min co run naa.

¹⁶Grë ncuaane run naa, now riennpaa naa nonguielda; haxta guic naa, zdoo naa, rien naa wen ley sinque naa quia-guits mine rnabeya. ¹⁷Nana, niicle ne rien naa scaw per gacd pe gun naa, sac ngadoo xcuerp naa lo dol, masaque dol rcheep naa run naa ncuaane ndzinlid.

¹⁸Rien naa miech ngoopdol nac naa, ni palal ncuaane ndzinli gacd gun naa; nicile ne racladz naa gac-wen naa, per rrieeloda. ¹⁹Zeene racladz naa gun naa ncuaane rquiin, per rrieelod gun naaw; laa zeene ni naa gundraa naa ncuaane ndzinlid, lel mincole run naa. ²⁰Ni ne znu lel grë ncuaane racladz naa, min co run naa, gase rlu ne led naadse quiayun grë ncuaan co; sinque dol quianabey xcuerp naa run naaw. ²¹Rien naa niicle ne racladzpaa naa gun naa ncuaane wen, per lel guielntseeb run naa. ²²Zdoo naa, guic naa, rleynie naa Xley Dios, racladz

naa gban naa zigne rnabey me; ²³per dzigo rtse dol lo naa, rriyelod gun naa ncuuane nonguiel. Masaque dol rnabey xcuerp naa, racladzda gun naa ncuuane rnabey Dios; sac ngadoo xcuerp naa lo dol.

²⁴¡Probsaxe naa, znutaa nac xcuerp ngoopdol naa nu! ¿Cho samiech ne dien grielo csilaa naa low; sac ncuuane gnitlo naa min co mazdraa rdziladza?

²⁵¡Xquizh Dios pxeel me Jesús biaad-silaa me ne lo dol!

¡Jesús nac men ne psilaa naa!

(Znu nagon rzac naa: rien naa nonguiel gun naa mine nac Xley Dios, per xcuerp naa lel laaw zienal mine rnabey dol.)

None gban miech zigne racladz Espiritu Sant

8 Laa ne gocndion nasca ganle, zha ne ngab lo Jesús ndziiboldraa zho, ²sac zha ne ngab xnéz me, laa Espiritu Sant psilaale zho lo dol, laa me psilaale zho ladznia guielgut, laa me bdeedle tib guielmban cub lo zho.

³Waltaa ib brieelod ley nsilaaw ne lo dol, gane mazd laa Dios pxeel Xpëéd me biaadsilaa ne. Brieelod ley, sac grëse miech laa ne tsienal zho mine rnabey ley, mazdraa zienal zho ncuuane runctal xtol zho. Gane zeene pxeel Dios Xpëéd me, goc me miech (lëëraasi ni tib dol beend me), men co gut bdiizh grëse xtol ne, dzigo ga laa me psilaa ne ladznia dol.

⁴Gacxe waa, niinasi zrieelo dziuun ne grë mine rnabey ley, per none gdeed ne diidz guional ne mine rnabey Espiritu Sant, ni lalnu gdeete ne diidz gac mine racladz xcuerp ne nu.

⁵Grëse zha ne mban zigne racladz xcuerp ngoopdol zho, loxaque grë min co rioxco zho; laa zha ne mban zigne racladz Espiritu Sant, mine rnabey Espiritu Sant rioxco zho.

⁶Zha ne sca rioxco loxaque mine racladz xcuerp ngoopdol zho, nëz ne nitlo zho ga zie zho; sangue zha ne rioxco mine racladz Espiritu Sant, laa zho zie nëz ne ygaa zho tib guielmban; peet dzeb, peet zhgab ctsebdraa zho.

⁷Ni stiba, zha ne rioxco loxaque mine racladz xcuerp ngoopdol zho, rlëënie zho Dios ga, sac nëd zho gban zho zigne rnabey xley me; ni niicle gacladzga zho, grieelod zho. ⁸Mincoxe waa, ib rzacd zdo Dios grë ncuuane run zho.

⁹Sangue to, mbandraa to zigne racladz xcuerp to, sinque laa to mban zigne racladz Espiritu Sant. Sca mban to, sac Espiritu Sant nacie to. Nanle to ganle zha ne nacie Espiritu Sant, nlid xnéz Jesús no zho. ¹⁰Ni to ne nac to zha ne nolie xnéz Jesús, ible zgaa to tib guielmban ndzon, sac laa Dios psilaale to lo dol. Nli zig nac xcuerp to, ncuuane nitlo naca, sac por dol biaan sca no gaca; sangue zhiespirtuw, nitloda. ¹¹Dios bleeban Jesús, ni scagaa telne nli nacie to zhiEspiritu me, meque cueeban to.

¹²Bets, bzian, nodne dziuun ne ncuuane racladz xcuerp ngoopdol ne, zig nac zeene pe nzëeb ne low. ¹³Sac telne grë ncuuan co tsienal to, ible znitlo to; sangue telne gnab to gacnien Espiritu Sant to csaan tow, dzigo ible zgaa to tib guielmban. ¹⁴Sac grëse zha ne zienal zigne racladz zhiEspiritu Dios, ga rlu ne nliipaa xpëéd Dios nac zho.

¹⁵Golguien ganle, laa Dios bneedz zhiEspiritu me lo to, sac xpëedle me nac to niina. Tsoode to sca gdziebd to me, zig nac zeene cho tib ngundziin win nac to lo me. Xpëéd me nac ne, gacxe waa zac tibliladz gnee ne lo me guiab ne: “¡Papá yeen!” ¹⁶Ni Espiritu coque runquien ne ne nli xpëéd me nac ne.

¹⁷Nana ne laa ne nacle xpëéd Dios, scagaa dzigo ye ne ible zgaa ne grëtaa ncuuane bdeed me lo Jesús.

Nli zгаа ne lo grē guielndzon ne no Jesús ga, per scagaa none dzian ne grē guielnē niina ne laa ne ngab lo me.

Guieľndzon ne naraa guiaad

¹⁸ Guieľnē ne dzian ne lo guidzliu rii, loxaque ne ngab ne lo Jesús, led ncuaañe rmad ga; mazdraa nroobdoo nac lo guieľndzon ne naraa dzian ne. ¹⁹ Zig nac grētaa ncuaañe bzaa Dios, masaque quiambēznēw gdziñ dze zeene laa grē zha ne nac xpēēd Dios ygaa lo guieľndzon co; ²⁰⁻²¹ sac gon, gaľ dze co laa guidzliu guiaanmbe lo grētaa ncuaañ paat rquiind, lo grētaa guieľntseeb ne no low niina. Dios bdeed diidz biaan grē ncuaañ co low, per zeene gaľ dze co, zeene laa grē zha ne nac xpēēd Dios laa lo grētaa guieľntseeb, yew laaw laa.

²² Laga quiambēz grē ncuaañ co gdziñ dze co, masaque mban raca, rzaca zig rzac tib meñ wnaa ne quiayal xpēēd. ²³ Ni ndion ne ganle, haxta ne, ne nac ne zha ne nacie Espíritu Sant (zeena glu ne ible zгаа ne grētaa ncuaañe gneedz me), mban rac ne quiambiaaz ne gdziñ dze co, zeene laa Dios ctsēē xcuerp rii ne ni ycaania me ne zig xpēēdpaa me.

²⁴ Ndion ne ible zbee Dios ne lo grētaa ncuaañe rac lo guidzliu rii, per nana laa ne quiambiaaz dzianpaa ne gaca. Tib ncuaañe lēē ranle ne noyac, nod pe nacne yquiambēzraa new, ²⁵ per zeene quiambēz ne tib ncuaañe naraa gac, dzigo nodne guieed ne, sinque inē tiblifique gac ne yquiambēz new.

²⁶ Ni scagaa zeene lēbdraa ne, rien-draa ne zha gun ne, Espíritu Sant nac meñ ne gacniē ne. Zig nac zeene gzodidznie ne Dios, tel nesew nanđ ne zhapaa nonguiel gnee ne lo Dios, dzigo Espíritu Sant runcee ne grē diidz ne rienđ ne zha nac. ²⁷ Ni Dios ne nac me meñ ne nānpaa pe rza zdoo miech, rien me pe rnee Espíritu Sant, sac mine racladz Dios gac miñ co rnab me.

Tsod ncuaañe yquiaaqui csaanladz Jesús ne

²⁸ Ndion ne ganle, zha ne nli dib zdoo rleynie Dios, zha ne rioxco gac grē mine racladz me, grēse ncuaañe rded zho, led lega rdete zhow, sinque no zaatne rquiina lo zho. ²⁹ Ni ndion ne ganle, zha ne nanle me ygab xnēz me, desde mazd glow, pso me zho gac zho zig nac Xpēēd me Jesús. Lo grē zha ne nac xpēēd me, Jesús nac meñ nroob. ³⁰ Ni grē zha co, laa me quiabedz zho, quiasilaa me zho lo dol, laa zho noyaanwen lo me; zeena ygaa zho lo guieľndzon ne no me.

³¹ ;Zha nactaa ncuaañe lēē run Dios! Nana, tel scataa racnie Dios ne, ¿cho nadiē grieelo lega pe gun ne? ³² Golgot-saa gwi ne ganle, haxta xpēēd me bdeed me gut xcuent ne, grēse ne ne nac ne miech. Nana, ¿pe lel grē pe stib cos dzigo yquia zdoo me gneedz me lo ne?

³³ Ible Dios bzooblo ne, gacxe waa, ;choot rieguialđ glisqui gnē lēda nodziun ne! Sac gon, Dioszhal psanmbe ne lo dol. ³⁴ ;Choot rieguialđ ycaadz-dol ne! Sac gon laa Jesús gutle bdiizh me xtol ne; per brieēban me, ni na laa me zob cue Dios zaatne rieguial me nac me meñ non. Ga no me quianab me lo Dios por ne. ³⁵ ;Tibaque rleynie Jesús ne! Zeene nodzian ne guieľnē, zeene mban rac ne, zeene rtsidil miech ne, ib guiabd ne togo bod rleynied me ne. Ni-icle zeene guieľngaa pe gow ne, guieľnd pe gacwxab ne, o noxtseebгаа ne guet ne, ib guiabd ne togo psaanladz me ne. ;Tibaque rleynie me ne! ³⁶ Ni zig nac xcuent guielgut, laaw raquetaque lo Xtidz Dios, zaatne rnee:

Grēse no ne nac no zha ne ngab lo luu, tibaque noxtseeb no lo guielgut; masaque rzac miech no zig rzac zho grē mēcwxiil ne golle guet.

³⁷Niicxe peraa waa dieed ne, zdziuuñ ne gan low ni palal csañwinda ne, sac Jesús nacnie ne; ni rleyniedox Jesús ne.

³⁸Nañween naa tsod ncuaane yquiaaqui csaanladz Dios ne:

per ni guiełgut,

per ni guiełmban,

per ni anjl,

per ni mendox,

per ni grē ncuaane noyac niina, grēgaa ncuaane naraa gaca.

³⁹Niicle grē ncuaane no glaa zhan gbaaw,

niicle grē ncuaane no guietraa zhan guidzliuw,

niicle grēragaa ncuaane bzaa Diosa.

¡Ni tiba ycada, sac tibaque rleynie Dios ne! Ni laaw blule me ganle, zeene pxeel me Jesús (men ne rnabey ne), men ne gut bdiizh grēse xtoł ne.

Ible Dios bzooblo zha Israel

9¹⁻³Bets, bzian, ¡blactaa racladz naa guien grēraa zha Israel cho nac Jesús! Rquianē zdoo naa zho nac zho menladz naa, tibaque mban rac zdoo naa rsoladz naa zho. Haxta Jesús, haxta Espíritu Sant nañ ganle rquiad zdoo naa naa niicle maase gdzibdee miech naa, maase nitlo naa guia naa zaatne gandraa naa Dios, telne niaca por min co laa zho guien zha gbig zho lo Dios.

⁴Blactaa quiayacnieñ Dios zho, ni rond zho xtiidz me. Bzooblo me zho gac zho zha ne ygab lo me, haxta bzënie me zho, gon zho ganle men ndzon nac me; biaan zho diidz grē zho me zha mod gunlay me zho. Psan me ley lo zho zeena guien zho zha gban zho, ni psan me diidz lo zho zha gleynie zho me. Nzian grē ncuaane bnee me gdeed me lo zho.

⁵Lëë pxozgoldoo zho ga goc Abraham, goc Isaac, goc Jacob, ni lo dii co ga briequia zha ne bded zig menlidz Jesús. Me nac Dios, me rnabey grëtaa ncuaane no,

ni me rieguial gacnon gzataa dze. Ible sca rieguiala.

⁶Nana, no zho guiab godcaque grē mine bnee Dios ga yгаа zha Israel. Per led scada. Sinque lëë min co rgaa zha ne nlipaa rnalo Dios, sac zha co nac zha ne nlipaa nac zha Israel. ⁷Nacda ne loxaque ziaad zho lo xti Abraham, laa zho nacle merpaa zha Israel; sac gon, niicle ne nzian mëed pquianie Abraham, per rëb Dios loxaque Isaac gac cuent zig xpëed Abraham. ⁸Gase naganle rlu, zig nac niina, grē zha ne ziaad lo xti Abraham, led grëd zho ngab lo Dios; sinque zha ne bzooblome me zigne bzooblo me Isaac, zha co ngab lo me. ⁹Sac zig nac Isaac, ible Dios bnee lo Abraham grop Sar, ne laa Isaac gac mëed lo zho.

¹⁰⁻¹¹Ni scasaque xpëed Isaac. Bdziñ dze, zeene laa Isaac ptsieelnia wnaa ne lë Rebec, dzigo gop Rebec tibnëz mëedbgui. ¹²Bii zoney Rebec grop mëdyeen co, laa Dios bzooblome win ne brieelë Jacob rëb me, ne ible Jacob gac zha non lo Esaú, win ne glo gal. ¹³⁻¹⁵Laaw zhobneeque lo Xtiidz Dios, zaatne znu rëb me: “Ible Jacob bzooblo naa beenlay naa, bzoblod naa Esaú.” Gard gal grop mëed co, per ni gard gacnañ win zha nac guiełntseeb, zha nacгаа guiełwen, laa me bzooblome tib win. Ga nagon, blu Dios ne mese nac men ne rieguial rzooblo tel cho zha ne ygab lo me, nacda por pe ncuaane noyuuñ zho.

Nana, ¿pe dzieets ne guiełntseeb ga sca run Dios? ¡Led guiełntseebda! Tib vuelt rëb me lo Moisés: “Zha ne gacladz naa yquia zdoo naa, squia zdoo naa zho.” ¹⁶Ga nagon, zha ne runlay me, nacda porne zha rquiaguiba, o rioxcogaa zho yгаа zhow; sinque laa zho rgaaw, porne me rquia zdoo zho. ¹⁷Gotsaa gwi ne ganle zha beenndip me zdoo rey Egipt. Lo Xtiidz me zhobnee zeene rëb me lo rey co: “Ible laa naa bzo luu nac luu rey, luu yguib glu naa poder ne rap

naa, zeena dib lo guidzliu guienn miech ganle naa nac Dios.”

¹⁸ Ga nagon rlu, zha ne gacladz me yquia zdoo me, rquia zdoo me zho; ni scagaa, zha ne gacladz me gunndip me zdoo, runndip me zdoo zho. ¹⁹ Nana, no zho gnë: “Telne scaw, ¿pe nac dzigo rllisqui Dios mine run miech, tel mezhaz rhabey zha nac zho tib tib zho?” ²⁰ Per nana, ¿cho nac ne par glisqui ne mine run Dios? Zig nac tib guies ben, niacxe zllisquiw lo men ne bzaaw, guiaba: “¿Pe nacne znu bzaa luu naa?” ²¹ Led zha ne run dziin co, zrieelo gzaa zho tib guies zigne gacladztaa zho; tib le ben ne xen zho, zac gzaa zhow tib guies niow, o gzaagaa zhow tib guies beelze.

²² Scaquegaa nagon rzac Dios miech. Grë zha ne psanle me nitlo, ible rap me derech csiaabzhian me zho, glu me poder ne rap me; per laa me bii quiayap zho paciens nieeda gdziñ dze co. ²³⁻²⁴ Grëgaa zha ne bzooblo me ygaa lo guieñdzon ne no me, zigtaa new ne nac ne zha Israel, zigtagaa zha stib guiedza; ible rap me derech bzooblo me ne, sac rquia zdoo me ne. ²⁵ Gołsoladz ganle zha bzeet Osé, men ne biadteed xtiidz Dios padzeela. Bzeet me ible zbedz Dios grë zha ne nacd zha Israel ygab zho lo me, zeena gleynie me zho niicle ne rleynied me zho glo. ²⁶ Laa stib lugar bzeet Osé, zha bnee Dios lo zho, rëb me: “Ngabde to lo naa, per zdziñ dze ne laa to gac xpëed naa, ne nac naa Dios nguiamban.”

²⁷ Laa Isá stib men ne biadteed xtiidz Dios padzeela, zeene bzeet me zha Israel rëb me: “Niicle ne ndaldoo nac zha Israel pale yuzh ne ndxie ro nisdoo, per zhis zho gac zha ne ycaania Dios; ²⁸ sac ziaadyoble gun Dios xquielwxtis me lo guidzliu, zigne bneele me.” ²⁹ Min co ga bzeet Isá mazd glo, rëb me: “Telne niaca mine yquiad zdoo Dios zha Israel, znitlo me zho grëse zho zigne bnitlo me zha Sodom ni zha Gomorr.”

**Zha ne nacd zha Israel
laa zho wbig lo Dios**

³⁰ Nana guiab ne: ¿Zha nac dzigo ne rcaania Dios zha zit? Laa me rcaania zho niina sac dib zdoo zho rnaloo zho me, niicle ne wlaltaa ib bioxcd zho dien zha nsilaa me zho lo dol. ³¹ Laa zha Israel, niicle ne rioxco zho run zho grë mine rhabey ley parne csilaa me zho, per ib laad zho lo dol sca. ³² Laad zho, sac zienied guic zho gnalo zho Dios, rzac zho por grë ncuane gunse zho laa zho laa lo dol. Mincocke waa, zeene laa Jesús bi-aad, bzhaac zho me zig tib quie ne rriel ni ne riab ne liu. ³³ Lëe min co ga zhobnee lo Xtiidz Dios, zaatne mee: Sxel naa tib men lo zha Israel, me gac zig tib quie ne griel ni zho; sangue zha ne dib zdoo gnalo me, tsod dze ne tso zho guieñë, guiab zho pe nacne bnalo zho me.

10 Bets, bzian, ne nlipaa rzaac naa tebaa zha laa grëse zha Israel lo dol, tibaque rnab naa lo Dios guien zho gbig zho lo me, zeena laa zho lo grë xtol zho.

² Parga nli ran naa noxco zho gbig zho lo me; per rund zho mine no gun zho. ³ Ib riend zho zdoo Dios ral rsilaa me miech lo dol, laa zho rzac por mine gun zho laa me csilaa zho. Ib nëd zho gun zho mine racladz Dios. ⁴ Sac gon, laa Dios racladz Jesús gnalo zho zeena guiaanmbe zho lo grëse xtol zho; sac Jesússe nac men ne brieelo been grëse mine rhabey ley.

⁵ Bzeet Moisés rëb me, zha ne gnalo ley ne lëew csilaa zho, none gun zho grëse mine rhabeya; ⁶ sangue zha ne gnalo Jesús ne me csilaa zho, nacda dien peraa gun zho. Nacda ncuane tso zho guiab zho, tebaa zha tsie zho lo me gbaa, gnab zho csilaa me zho (ncuane gacda ga, dzigo rriequia racladz zho quiet me ga stib); ⁷ o guiaabgaa zho tsie zho zaatne noliu grë gutoo, tsienab zho lo

me csilaa me zho (ncuaane gacdaque ga, ni stiba led gad no me, laa me brieebanle). ⁸Rquiind paraa tsieguib zho csilaa me zho, zig rzac zho zdoo zho, zig rzac zho ro zho, sca gax lo zho zo me quiamböz me csilaa me zho. Min co nac miñe noseed no miech, rnee no lo zho: ⁹Zha ne cueero guiab zho Jesús nac men ne rnabey lo xquielmban zho, ni dib zdoo zho gliladz zho nli bleeban Dios me, dzigo silaa me zho lo grē xtol zho. ¹⁰Sac none dib zdoo ne gliladz ne, dzigo sanmbe Dios ne lo dol; ni none cueero ne pe nac miñe rililadz ne, dzigo scaania me ne. ¹¹Rnee lo Xtiidz me: “Zha ne dib zdoo gliladz Jesús, quitnied me zho.”

¹²Grēse miech, niicle zha Israela, nicilegaa zha stib guiedza ible sca ycaania me zho, sac led yed me rbe; me rnabey zho grēse zho, ni grētaa ncuaane rap me, zdeed mew lo zha ne gnaba lo me. ¹³Rnee lo Xtiidz me: “Grēse zha ne gnab lo Dios csilaa me zho lo dol, ible silaa me zho.”

¹⁴⁻¹⁵Nana, no zho gnē: ¿Per zha gnab zho lo me, ni runbeyd zho me? Nli gunbeyd zho me, tel niaca miñe gard cho cxeel zha ne tsienee Xtiidz me lo zho, parne gon zho cho nac me. Ni min co rzeet Isá, zeene rēb me: “¿Zha wentaa ziaad zha ne ziaadnie Xtiidz Ndzon Dios!”

¹⁶Rgaaz Xtiidz Dios, per led grēd zho rzoobdiaga, zig rbiireque Isá, rnee me: “Dios, bui ganle choot nēd gliladz Xtiidz luu, miñe rne naa.” ¹⁷Sac gon, parne dib zdoo ne gnalo ne Dios, ib none yquiaadiag ne Xtiidz me ganle cho nac Jesús.

¹⁸Zig nac zha Israel, ¿niacxe gard gon zho Xtiidz Dios? ¿Binle zhow! Blactaa zha ne ziyadnee Xtiidz me, haxta zaatne mazdraa zita, laa miech quiayacnan Xtiidz me. ¹⁹No hor rne naa: ¿Pe ib riend zha Israel, telne gbigd zho lo me csilaa me zho, laa me csilaa miech stib guiedz? ¿Per rienle zhow! Sac bzeetle Moisésa padzeela, zeene rēb Dios laa

me ycaania miech stib guiedz, zha ne ib peet riend; zeena tednē zdoo zha Israel, togo ziaa zho biini. ²⁰Mincoque ga pquiaa Isá, zeene rēb Dios:

Grē miech ne ni zienied guic yguib zho naa, laa zho beenbey naa.

²¹Laa zha Israel, blactaa bzēēb nia naa lo zho ni naa niacnie naa zho, per pa nion zho xtidz naa, lel gocntseeb zho lo naa.

Zha Israel ne wbig lo Dios

11 Per guiabd ne togo psaanladzle Dios zha Israel. Golgan ganle, zha Israelacxe waa nac naa, zha xtii Benjamín, zha xtii Abraham nac naa; ²dzigo led psaanladz Dios zho (nac zho zha ne padzeelale bzooblo me ygab lo me).

Golsoladz ganle, zha rēb Dios lo Lí, men ne biadteed xtiidz Dios padzeela, zeene bzodiidznie Lí Dios ³grētaa ncuaane noyun zha Israel, ptsil zho zaatne riegān grē miech me, beet zho grē zha ne pxeel me noteed xtiidz me, ni laa zho quianañaque gut zho Lí. Rzac Lí guiendraa zha ne ron xtiidz me, ⁴dzigo hor co rēb me lo Lí: “Led tibd luu riaan, no zgadz mil zha ne gard yquitsgzhib lo Baal, naa bzooblo zho ygab zho lo naa.”

⁵Scaquegaa niina nagon led grēd zha Israel psaanladz Dios, no palal zha ne pquia zdoo me ble me zho ygab zho lo me. ⁶Rne naa pquia zdoo me zho, sac guiabd ne togo por demas wen zho gane ble me zho; sac gon, tel por wen zhow, nlid dzigo ne rquia zdoo me zho.

⁷Znu nagon naca: Zha Israel ne bzooblome, zha cose guiaanwen lo me. Laa los demas zho, lel lozh gacndip zdoo zho, ⁸zigne zhoobneeque lo Xtiidz me, zaatne rnee: “Beenndip Dios zdoo zho, riend zho zha gbig zho lo me; niicle ne zob lo zho, per rac zho zig rac zha ne rand; niicle zob diag zho, per rac zho zig rac zha ne peet rond. Ni scataque nac

zho haxta lo nadze.”⁹ Mincoque bzeet rey David, zeene rëb me:

Lëëque grë zhilni zho, lëëque grë ncuaañe row zho, gac zig len doo ne, len guix ne tsietsobe zho;

zeena yгаа zho guielnë ne rieguial zho.

¹⁰ Guiaañ zho zig tib zha ne rold lo,

guiaañ zho zig tib zha ne blozh blengw zhits.

Psilaa Dios zha ne nacd zha Israel

¹¹ Grë zha Israel ne sca gocndip zdo, guiabde to togo laa zho bnitlole ga. ¡Lëda! Sinqe laa me bdeed diidz sca goc zho, zeena gbig grë zha stib guiedz lo me csilaa me zho lo xtol zho; ni tednë-gaa zdo zho gan zho laa me rcaania zha stib guiedz. ¹² Nana, telne scataa guielnzaac ne bgaa miech stib guiedz ne znu racndip zdo zha Israel, ¿pe lalgue dzigo zeene laa zho gbiire guiaanwen lo Dios stib? ¡Zha naczhe grëraa guielnzaac ne yгаа miech!

¹³ To ne nac to miech stib guiedz, led nanle to ganle, ible Dios bzo naa none naa Xtiidz me lo to. Scagaa naa, dib zdo naa rioxco naa run naaw, ¹⁴ zeena togo soobladz palal zha ladz naa ye zho squi gbig lo Dios csilaa me zho lo xtol zho.

¹⁵ ¡Que talzhe ndzona zeene laa zho gbiire gbig lo Dios stib! Nli laa Dios psaan zho, laa grëgaa miech stib guiedz laa zho biaanwen lo me. Gacxe waa, ¡tib guielbley nrooba zeene laa me ycaania zha Israel stib! Sac gon, rrieequia grieeban zho ga.

¹⁶ Zigne pcaania Dios xmengol zha Israel bgab zho lo me, scaquegaa scaania me xpëed zho; sac gon, zig nac tib zhan yag, zeene ndaan low mine naaza len liu, ndaanaque zhicwa. Scaque nagon, zeene bzooblo Dios xmengol zha Israel, yele zho ga bzooblo me.

Nana, gzoob ne nac zha Israel zig tib zhan yag oliv: low nac xmengol zho, laa zho nac zhicwa. ¹⁷ Bdzin dze brug palal

zhicwa, dzigo ga bguid zhicw yag oliv dan; lëe yag oliv dan co nac to ne nac to miech stib guiedz. Sca nac ne laa Dios pcaania to zigne pcaania me xmengol zha Israel; ye to laa to nogaa guielnzaac co. ¹⁸ Lëëraasi, guiabde to togo nonraa to lo zha ne nac zhicwa mine brug ga. Golguien ganle, por lo yag ndaan zhicwa.

¹⁹ Nana, nend guiab to: “Per riogual now, gacxe waa no biañ xlugar zhicwa, mine brug ga.”

²⁰ ¡Golgap cuidad gon! Nli lëe biche zho, laa to biañ xlugar zho, porne bnëd zho nalo zho Dios zigne bien to rnalo to me; per golguien gacniatsde to. ²¹ Golgan ganle, niicxe zha name zhicwpaa yag co nac zho ni ptiche me zho, ¡pelel to dzigo!

²² Golwi ganle zha wentaa Dios, per scagaa rdziladz me gats xtiidz me. Mincoque waa gondzed me grë zha co, laa to gon wen goc me lo to. Lëëraasi none gon to mine rnabey me, sac gon telne gonde tow, scaque gandzed me to.

²³ Nana, zig nac zha Israel ga, telne gbiire gbig zho lo me, ible squiid me zho lo yag co stib. ¡Golgan ganle men nroob nac Dios! ²⁴ Niicxe to na, nac to zig yag oliv dan, pquia zdo me to pquid me to zhicw yag oliv wen co, ¡pelel zha Israel dzigo yquiad zdo me, gbiire yquid me zho lo yag ne nacpaa zho!

Scaania Dios zha Israel ne bzozit lo me ga

²⁵ Bets, bzian, laa naa gni lo to ganle zha nac mine no guic Dios gun me. Niicle ne riend miecha niina, per racladz naa gacnan tow, zeena gacniatsde to ne squi bzooblo me to: Nli ndal zha Israel racndip zdo zozit zho lo me niina, per zeene laa grë miech stib guiedz blozh wbig lo me, ²⁶ hor co grëse zho, laa zho gbiire gbig lo me stib ycaania me zho.

Zigne bzeetle zha ne biadteed xtiidz me, zeene rëb zho:

Guiedz Siôn, ga griee men ne cuee zha Israel lo xquielntseeb zho.

²⁷ Dzigo laa Dios csilaa zho lo grëtaa xtol zho, zigne psanle me diidz lo zho.

²⁸ Len dze rii rlëë zha Israel ron zho none gnalo zho Jesús, par laa zho lo dol. Znu rac zho zeena gdeeda diidz gbig to lo Dios, nac to zha stib guiedz; sangue Dios rleynie me zho, sac scale rëb me lo grë pxozgol zho. ²⁹ Me bzooblo zho, dzigo ible scaania me zho; sac gon, led yed me ctsëë xtiidz. ³⁰⁻³¹ Glo to nac zha ne ib bind xtiidz Dios, laa niinagaa na zha Israel nëd gon xtiidz me. Per zigne rquia zdoo me to niina, scaquegaa zdziñ dze ne yquia zdoo me zho. ³² Grëse miech, zig-taa zha Israela, zigtagaa tow ne nac to miech stib guiedza, laa Dios bneedz diidz sca gocntseeb to lo me, zeena grielo glu me ganle ne lalga rquia zdoo me ne.

³³ ;Gotsaa gwi ganle zha men nroobtaa nac Dios! ;Pa lotaa rac me, pa lotaa rien me! ;Pa lotaa rioxco me miech! ;Cho grielo guien pe nac mine no guic me gun me, pe nacgaa gun mew? ³⁴ Zigne zhobneeque lo Xtiidz me, zaatne rnee: “;Choot nand pe no guic Dios gun me! ;Choot grielod guiab lo me, znu znu been! ³⁵ Wlaltaa choot gard pe gdeed lo Dios, par guiab ne laa Dios zëëb.” ³⁶ ;Peet gon nzëëbd Dios lo miech! Sac grëtaa ncuuaane no, me psana, me naaza, ni me rnabeya.

;Mese nac men ndzon, tibaque gotsaa dziuunnon ne me! Sca rieguiala.

Gołban zigne rdziladz Dios

12 Bets, bzian, laa to gocnanle ganle pa lotaa nquialadz Dios to. Nana sca, dib nace to gołsan to ladznia me, gac to zig tib gon mbe, tib gon ne gley me ycaania me. Sca glu to ne nli rleynie to me.

² Ib tsienaldraa to grë ncuuaane ndzinlid ne noyac lo guidzliu rii, grëse zhgab ne paat rquiind, gołcueew guic to; zeena gban to zigne racladz me, ni guien to ganle zha wentaaw zeene zienal ne mine rnabey me.

³ Ne znu nac naa zha ne pquia zdoo Dios noyuu naa dziin rii, nligaa laa naa rso diidz lo to, ndzinli gołgac, ib glude to ncuuaane ni nacle to, sinque golguien cho nac to, zha rnalo to Dios. ⁴⁻⁵ Gołgan ganle zha niaa xcuerp ne: nzian lë niaaw, ni tib tiba nose zaatne rquiina; scaque nagon nac grë zha ne ngab lo Jesús, nzian nac ne, per tib tib ne nose zaatne rquiin ne, tsod zha ne yquiind. Grëse ne none gnalolsa ne grë zha ne nacgrë ne.

⁶ Tib tib ne bneedzse Dios guielbiini lo ne, par grieeo dziuun ne dziin ne pso me ne dziuun ne lo me. Gacxe waa, zha ne pso me cteed xtiidz me, none gnee zhow zigne csiaab mew guic zho;

⁷ zha ne pso me gun ncuuaane yquiin lo grëraa miech, none gun zhow.

Zha ne pso me cseed miech, none min co gun zho;

⁸ zha ne pso me gdeedlban miech, none lban gdeed zho.

Zha ne pso me ygad, none dib zdoo zho ygad zho;

zha ne pso me so gnabey, none ndzinlise gnabey zho;

zha ne pso me cchoobladz zdoo zha ne mban noded, none nley gac zho tsinee zho lo miech.

⁹ Dib zdoo to gołleynie samiech to. Gandzede to grë ncuuaane ntseeb, niapse ncuuaane rquiin gołtsienal. ¹⁰ Ine niowse gołleynie grë zha ne nacgrë to, gacnguizhde to, quitniede to zho.

¹¹ Nguieel gołgac, gacmbechde to, dib zdoo to gołtsoxco gołgun mine nac xtsiin Dios.

¹² Nley gołgac lo guielmban rii, gołsoladz ganle zha nactaa grë ncuuaane no

gneedz Dios lo to; gołxecw lo grë guielnë ne gan to; tibaque gołzodiidznie Dios.

¹³ Gołtsoxco xliaadz grë zha ne nacgrë to ngab to lo Dios; zaacse gołcuëzlo zha ne ziaadted lidz to.

¹⁴ Grë zha ne rtsidił to, laa ne gdzibdee to zho, gołnab gunlay Dios zho.

¹⁵ Zha ne no guielbley, gołgacnie zho lo xquielbley zho; zha ne nogaa guielnë, gołgacnie zho lo xquielnë zho.

¹⁶ Gacniatsde to. Grë zha ne rzac miech peet nond, gołtsieelsa zho; guiabde to to nac zha ne racraa. Niowse gołbannie zha ne nacgrë to.

¹⁷ Zha ne csacsi to, gunde to ne yeque to csacsi zho. Gołtsoxco wen gołgac lo grëse miech. ¹⁸ Tilniede to samiech to, gołtsoxco tibaque wen gołbannie zho.

¹⁹ Gołguien, zha ne csacsi to, ib guiabde to ne tozhal ctsire guielnë co, sinque gołsana ladznia Dios, metaa nan zha gun me xquielwxtis me; zigne ziaad lo Xti-idz me zeene rëb me: “Naa raguial gun guielwxtis, naa gunquizh miech tel pe nac dol ne zëeb zho. ²⁰ Gacxe waa, zha ne rlëe lo luu, zeene gan luu mban rac zho rcaabedz zho, mazd bdeed ncuaaane gow zho; gangaa luu mban rac zho rnab zhis zho, bdeed ncuaaane guie zho. Sac zeene sca gun luu, stoladz zho csoladz zho mine been zho luu; rrieequia gui ga cuib guic zho.” ²¹ Gołguien sca, niapse guielwen gołtsienal, zeena sca ycuëez to lo guielntseeb. Gdeete to diidz ne ye to gun guielntseeb.

Golgon mine rnabey wxtis

13 Grëse to none gon to xtiidz zha ne nacpaa wxtis. Sac grëse zha ne nac wxtis, ible Dios rdeed diidz ne laa zho rac dziin co. ² Gacxe waa, zha ne racndaan lo wxtis, rrieequia ye lo Dios ga racndaan zho; ni zha ne racndaan, lëëque zha rguib ted zho caxtigw ga. ³ Gołgan ganle, ible laa wxtis zo, par zha cobey caxtigw ne tsieguial zha ntseeb.

Telne racladzde to sca tsoxtseeb to lo wxtis, zaacse gołgac; scagaa zha, tsod pe nacne ygaal zho to. ⁴ Dios psan rzo zho ni zha rtedlo to, ni scagaa, telne pe guielntseeb ne gun to, zhaque gnabey pe caxtigw ne yga to; sac gon, ible laa Dios bzo zho gun zho guielwxtis. ⁵ Gacxe waa, ib none gon to mine rnabey zho, zeena tsoxtseebde to lo zho, ni scagaa niicle nëz lo Diosa ine tiblise no guic to.

⁶ Scaque dimi ne no gdeed to lo zho, gołdeeda; sac rquini dimi co parne grieele gun zho tel pe nac dziin ne no gun zho. ⁷ Gołguien sca, dimi ne no gdeed to lo zho, gołdeeda; mine rnabey zho to gun to, gołguna. Golleynie zho, quitniede to zho, gołguien zha non nac zho.

Golleynie samiech to

⁸ Grë ncuaaane rieguial to gun to, gołgungazha zeena bdedgaw; sangue samiech to, none tibaque gleynie to zho. Zha ne rleynie samiech, grële mine zhobnee lo Xley Dios ga quiayun zho. ⁹ Sac telne rleynie to samiech to zigne rleynie to to, nod pe nacne csacsi to zho; guiab to: laa to yquidie zho, laa to gut zho, laa to cuan zho, laa to tsonie tsiel zho, gzoobladzga to grë ncuaaane quianie zho.

Gacxe waa, zha ne rleynie samiech zigne rleynie zho zho, grële mine zhobnee lo Xley Dios ga quiayun zho. ¹⁰ Zha ne rleynie samiech, rsacsidraa zho zho; ni min co rnabey Dios. Gacxe waa, grëse ne none gleynie ne samiech ne.

¹¹ Ib none gban ne zigne racladz Dios, golle na tsaa ne biini; sac gon, laa dze ne ycaania Dios ne bii ziaadgaxraa, lëdle zeene psilo rnalo ne me. ¹² Dziuun ne cuent laa guieel lozhle ted, laa biini ne guini liu dze ndzon co ziaadle; gacxe

waa, ni lalnu guionald ne mine racladz mendox, sinque mine racladz Dios, min co golgotsaa dziuun ne. ¹³None ndzinli gban ne:

dziuun ne guielgonziu,
dziuun ne grè lni yozh,
yquiangobd ne zha ne led tsieeld ne,
dziuun ne grè guielyozh ne racladz xcuerp ne,

dilnied ne samiech,
glëenied ne zho zeene stib noded zho.

¹⁴Golgotsaa gnab ne lo Jesús sca, zig zie dze lozh csanmbe me xquielrien ne, csanmbe me zdoo ne, gac ne zigne racladz me. Dziuundraa ne grè ncuane ndzinlid ne racladz xcuerp ne.

Gzeed zdoo to mine run zha ne nacgrè to

14 Golcaania zha ne gard tsoguic-paa zha nac Xtiidz Dios. Telne no palal mine riladz to zhaa rzac zho, glisquide tow lo zho. ²Gzoob ne, no to rzac peet nacda gow to grè lose guielwagw, laa zha ne na gard tsoguic-paa Xtiidz Dios, rzacgaa wena telne scuaan guizhyese gow zho; ³ga nagon, ni stib ni stib nod pe nacne glisqui dien cho pe row, dien cho pe rowdga; sac gon grèse to, Dios bzooblo to ngab to lo me. ⁴Nana zig nac zho, lo Dios ngab zho, led lode tow; ¿cho nac to dzigo tso to glisqui to dien pe run zho? Dios nac men ne nan telne lëew o lëdgaaw ga quiaayun zho; men nroob nac Dios, me gdeed guielbiini lo zho guien zho gban zho zigne racladz me.

⁵Scaque, no zho zianal dien pa dzepaa none gleynie zho Dios, nogaa zho rnee zac tel pa dzetaa gleynie zho me. Per peet nacd ga, zac tib tib zho gunse zho mine rzac zho rdziladz me. ⁶Tel pa dzetaa wena, totsaque run zhow par gunnon zho me. Scaquegaa guielwagw, wena zha ne gow grëlosew; niicle zha ne ncuuegaa ncuane gow, wenaquew, tot-

saque run zhow par glu zho ne rleynie zho me, ni rdeed zho xquizh lo me.

⁷⁻⁸Sca nagon naca, per led min cod dzieets ne dziuun ne mine gacladztaa ne. Grèse ne ne nac ne zha ne ngab lo Dios, laa ne mban par dziuun ne mine rnabey Jesús, ni zeene guetgaa ne, lo me none gdzin ne. Gacxe waa, niicle niina ne zomban new, niicle zeene gutlegaa new, ladznia me no ne. ⁹Sac gon, tel Jesús gut me ni brieaban me; gacxe waa, me rnabey ne grèse ne, zigtaa zha mbana zigtagaa zha guta.

¹⁰Jesús rnabey ne tib tib ne. Gacxe waa, nonguielda glisqui to lo zha ne rund mine run to; nonguielda por mincose sac to zho zig zha ne peet nond, tso to gneedraa to lo zho. Ni stiba, gal dze ne laa Dios gun guielwxtis, grèse ne laa ne none gacredz lo me. ¹¹Zigne raquietaque lo Xtiidz me, zaatne rnee me:

Naa nac Dios mban, gneli naa lo to ganle: grèse miech, ible squitsgzhizh zho lo naa, cueero zho ne nli naa nac Dios.

¹²Sca nagon gaca, tib tib ne ib laa ne no cueero lo me tel zha wban ne.

Csande to zdoo zha ne nacgrè to

¹³Nana sca, zha ne sca rund grè mine run to, ible glisquidraa tow lo zho. Golguien, gunde to ncuane rgobey to yquiaaqui gunctal zho xtol zho, o csaan-gaa zho Xtiidz Dios. ¹⁴Tel naa, nana-paa naa led dollda gow ne grè lose guielwagw; sac niicle Jesúsca scaque nac xtiidz me. Sangue zha ne rzac dolja, mazd gowd zhow; sac tel laa zho gowa, xtol zho ga gunctal zho. ¹⁵Zig rne naa ga led dollda, per telne xtsinpa row to tib ncuane rquiaqui rsan to zdoo stib zho, ga rlu to ne rleyniede to zho. ¡Golguien sca, gowde to ncuane yquiaaqui sozit zho lo Dios! Sac gon, blactaa guielnë ne bded Jesús psilaa me zho.

¹⁶Ib gunde to grè ncuane yquiaaqui gneenë miech to, niicle ne nana-paa to led

dolda. ¹⁷Zha ne ngab lo Dios, miñe none tsienie guic zho nac ne ndzinli gban zho, tiñnied zho samiech zho, iñe nley gac zho (miñ co nac miñe rdeed Espíritu Sant); led tsod zho dien pe zac gow zho, pe zac guie zho, pegaa gacda. ¹⁸Sca rdziladz Jesús, ni zha ne sca gban, zleynie Dios zho, niiclegaa grè miecha zleynie zho zho.

¹⁹Goltsoxco sca, gunde to ncuaañe codil pe grè zha ne nacgrè to; zeena tipse gac to lozh tsoguc to zha racladz Dios gban to. ²⁰Ib gunde to, ne por tib guielwagw codil to grè zha ne ngable lo Dios. Zig rmele naa ga, grèlose guielwagw mbew, peet nacda gow new; sinque mine nonguielda, nacne gow ne mine nappaa ne yquiaaqui csan ne zdoo stib zho. ²¹Mincoxe waa, mazd gowde to pe scuaan bëël, guiede to nziu, telne miñ co yquiaaqui gunctal to xtoł zho; ni tel pe grèraa ncuaañe nan to tsod zdoo zho, gunde tow.

²²Niicle ncuaañe nappaa to dolda gun tow, niiclegaa nêz lo Dios led dolda; per mazd gunde tow zeene zo zha ne rzac dola. ¡Wen zie zha ne sca niicle nappaa zho dolđ nac miñe gun zho, per rund zhow, parne gunctald zho xtoł zho!

²³Sangue zha ne racchop guic riend zho dien pe zow zho tib guielwagw, ni lozh ga row zhow, runctal zho xtoł zho ga; sac beend zho miñe rzac zho rdziladz Dios. Grèse ncuaañe rzactaa zho wend ni gun zhow, xtoł zho ga gunctal zho.

Golgacnie zha ne nacgrè to

15 ¹⁻²Golguien sca, to ne nac to zha ne dziitsle zo lo Xtiidz Dios, golgacnie grè zha ne gard sodziits lo Xtiidz me. Golgun ncuaañe tso zdoo zho, ncuaañe yquiin lo zho, zeena lozh guien zho zha gnalo zho Dios; led tsode to gun to ncuaañe yquiinse lo to.

³Golgan ganle, niicle Jesúsa bguibd me niac ncuaañe nquiin lo me. Zigne

raquetaque lo Xtiidz Dios, zaatne rnee: “Grètaa diidznè ne rnee zha ne rlèè lo Dios, grèsew pcon zho me.”

⁴Grèse miñe raquiet lo Xtiidz Dios, padzeela pquiaw; ni ib laaw pquia zeena gacndion ne zha no gban ne. Lèew rnee none nley gac ne, lèew rnee guieete ne yquiambiaaz ne ygaa ne grè miñe bzeetle Dios. ⁵Dios men ne rneedz guielbley co, men ne racnien ne guieete ne, me gacnien to niowse gbannie to grè zha ne nacgrè to. Golleynie zho zigne rleynie Jesús to, ⁶zeena grèse ne tipse gac ne dziiołnie ne Dios, Pxož Jesús, men ndzon ne rnabey ne.

Grèse miech noyon Xtiidz Ndzon Jesús

⁷Golguien sca, grèse zha ne nacgrè to, golcaania zho zigne pcaania Jesús to. Sca golgun, zeena xoobnenraa lè Dios.

⁸Golsoladz ganle, zeene biaad Jesús nroob ncuaañe been me lo zha Israel, me biaadgun grètaa miñe bzeetle Dios padzeela. Ga blu Jesús grèse miñe rnee Dios, ib run mew. ⁹Ni golsoladz ganle, ye grè miech stib guiedz biaadsilaa me, gane niina grèse zho roolnie Dios, ne scataa pquia zdoo me zho. Miñ co raquiet lo Xtiidz me, zaatne rnee: Zoolnie naa luu, ni zlu naa lo grè zha stib guiedz ne men non nac luu.

¹⁰Stib lugar rnee:

To ne nac to miech stib guiedz, jine nley golgac grè to zha Israel!

¹¹Ni no stib zaatne rnee:

Grèse to ne nac to miech stib guiedz, jolleynie Dios! jGolsannziuu lè me!

¹²Mincoque ga bzeet Isá, zeene znu pquiaa me:

Zrieequia tib men lo xtií Isáf;

men co gnabey lo grèse miech stib guiedz,

ni me gnalo zho grèse zho.

¹³Min̄cōcxe waa, to ne nac to miech stib guiedz, rnab naa lo Dios (men̄ ne psan̄le diidz pe nac gr̄e n̄cuaane ygaa ne ga) gneedz me guieḷbley lo to, gacnie me to peet zhgab ctsebde to niina ne laa to rliadzle me. Rnab naa lo me, gacnieḷ Esp̄ritu Sant to in̄e gley to yquiamb̄ez to gac gr̄e min̄e psan̄le me diidz ga.

¹⁴Bets, bzian, nan̄le naa zha wen nac to, nacle to zha ne csan̄ zdoō stib zho; rien̄le to zha racladz Dios gban to, rien̄le to zha cso to diidz lo gr̄e zha ne nacgr̄e to; ¹⁵per lo guits rii gon̄ nzian n̄cuaane rso naa diidz lo to. Guiabde to togo ndox naa lo to, sinque laaw ben̄ naa zeenā guiaan̄ladzde tow. ¹⁶Ne n̄quialadz Dios naa, laa me bzooblo naa noyūn̄ naa xtsiin̄ Jesús, none naa Xtiidz Ndzon me lo gr̄e miech stib guiedz, zeenā csan̄mbe Esp̄ritu Sant zho; lozh ga gded naa zho lo Dios zig tib gon̄ ne gley me ycaania me.

¹⁷Gacxe waa, tel̄ niina rley naa sac noyacnieḷ Jesús naa noyūn̄ naa dziin̄ ne pso Dios naa. ¹⁸Me noyacnieḷ naa none naa Xtiidz me lo gr̄e zha stib guiedz, zeenā gban zho zigne racladz me. Ni laa zho nobig lo me, sac ran̄ zho gr̄ese min̄e rne naa mban̄ naaw zigne naca, ¹⁹ni ran̄ zho zha racnieḷ Esp̄ritu Sant naa run̄ naa gr̄e milagr, gr̄e n̄cuaane rzee zdoō zho. Sca nagon̄ none naa Xtiidz Jesús lo zho, brie naa Jerusalén briequia naa haxta n̄ez xtan zha Ilir. Guiabde to togo rtix naa diidz. ²⁰Ni laa naa noxco za naa zaatne waltaa gard gon̄ zho cho nac Jesús, zeenā gas̄ëbd̄ naa zaatne ziyele zha ne güeynee Xtiidz me. ²¹Laa naa zanaḷ zigne zhobnee lo Xtiidz Dios, zaatne rnee: “Gr̄e zha ne waltaa gard gon̄ cho nac me, zeene gan̄ zho gr̄etaa n̄cuaane run̄ me, laa zho gun̄bey me.”

Racladz Pabl tsie Pabl Roma

²²Nzian vuelt gocladz naa nialgan̄ naa to, per ib bdeetew diidz, sac laa naa bia

gr̄e dan co biaseed naa miech. ²³Izle ga na tibaque sca no guic naa, laa niina ne laa naa psiaḷ lo xtsin̄ naa, nataa nagon̄ ible ziaḷ naa. ²⁴Laa naa no ga Spañ, dzigo l̄ë n̄ezle ga teed naa Roma i guialgan̄ naa to. Tib guieḷbleya lo naa guialquiabdiuuzh naa to, dzigo lozh ga siguiel̄ to gun̄ to xyudar naa grieelo ga naa n̄ez Spañ.

²⁵Laa niina, laa naa no ga Jerusalén gasan̄ naa tib gon̄ lo gr̄e zha bets, zha bzian ne no ga; ²⁶sac gr̄e zha bets, zha bzian, ne no n̄ez Macedon, ni n̄ez Acay, laa zho bnediidz been̄lo zho palal dimi cxeel̄ zho yquii gr̄e zha prob ne no n̄ez co. ²⁷Niapse zdoō zho gol̄ ptop zho gon̄ co, sac rzac zdoō zho gr̄etaa min̄e been̄ zha Jerusalén lo zho; sac gon̄, zha co güeynee Xtiidz Ndzon Jesús lo zho. Laa niina, laa zho rxeel̄ palal n̄cuaane rgaa lo zho yquii zha Jerusalén.

²⁸Zigne lozh nagon̄ gasan̄ naa gon̄ co Jerusalén, dzigo laa naa teed guialgan̄ naa to i zigne nile naa ga. ²⁹Rien̄ naa nroob guieḷn̄zaac ne gneedz Dios lo to zeene laa naa guial̄.

³⁰Bets, bzian, gol̄guien̄ gan̄le Jesús rn̄abey ne gr̄e ne; ni rleyne ne zha ne nacgr̄e ne, sac Esp̄ritu Sant nacnie ne. Gane niina, laa naa rnab lo to, gol̄gotsaa gnab ne lo Dios gacnieḷ me naa; ³¹gol̄nab lo me, csilaa me naa ladznia gr̄e zha Israel ne gard guien̄ cho nac Jesús. Gol̄nab lo me, in̄e gley gr̄e zha bets ne, zha bzian ne, ycaania zho gon̄ ne gasan̄ naa lo zho nu; ³²zeenā in̄e nley no zdoō naa glanso naa lo to, in̄e gdziiladz naa len̄ dze ne cūez naa lo to i. Sca nagon̄ no guic naa, totsaque gneedz Dios diidz gaca. ³³Ni me ne nac me men̄ ne rbee miech lo gr̄ese zhgab, lo gr̄ese guieḷxtseeb, me gacnieḷ to. Sca gaca.

Bdiuzh

16 Bets, bzian, len̄ dze rii laa Feb, tib wnaa ne run̄ xtsiin̄ Dios guiedz

Cencré, laa me guiaad nëz lo to i. ²Laa naa rso diidz lo to, zeene glanso me i niowse golcaania me, golcaania me zigne rieguaļ ycaania ne zha ne ngab lo Dios. Golsguieļ goldeed grē ncuaaņe yquiin me; sac gon, tel me ndal grē zha ne ziyacnie me lo xliaadz zho, haxta naa blactaa ziyacnie me naa.

³Ni rnab naa lo to, golsguieļ goldeed zhibdiuzh naa lo grē zha qui.

Goldeed tib zhibdiuzh naa lo Aquil i, grop tsiel me Priscil. Blactaa ziyacnie zho naa zidziuuņ no xtsiņ Jesús, ⁴haxta bdedlaa zho niet zho psilaa zho naa lo guielgut. Rzadox zdoo naa miņe been zho ga, niicle grēragaa zha zit ne nacgrē new, rzac zdoo zhow.

⁵Ni scagaa, grē zha ne rcaalsa lidz zho riegooļnie Dios, goldeed zhibdiuzh naa lo zho. Goldeed zhibdiuzh naa lo Epenet, rley naa rsoladz naa me; lēē me nac zha Asia ne glopaa bzēēb xnēz Jesús.

⁶Goldeed zhibdiuzh naa lo Marí, blactaa noyuu me xtsiņ Jesús lo to.

⁷Goldeed zhibdiuzh naa lo Andrónic, lo Junias, grop menladz naa zha ne no i; gzapaa no zho bdzio ladzguib. Glo zho bliladz Jesús lo naa, zha nziuu nac zho lo grē zha ne pxeel Dios nonee Xtiidz me.

⁸Goldeed zhibdiuzh naa lo Ampliat, lēē stib zha ne rdzieel xtidz naa ga; ⁹lo Urban, rsoladz naa me, tipse bdziuuņ no xtsiņ Jesús grop no; lo Staquis, stib zha ne nziuu lo naa, goldeed zhibdiuzh naa lo zho; ¹⁰lo Apel, ye me blactaa ncuaaņe bded me blu me ganle ne nli dib zdoo me rnalo me Jesús; lo grē zha ne no lidz Ristob ne.

¹¹Goldeed zhibdiuzh naa lo Herodion, ye me menladz naa nac me; lo grē zha ne no lidz Narcis, zha ne rliladzle Jesús; ¹²lo Trifen, lo Trifós, ni lo Pérsida, gza men wnaa rii blactaa noyuu zho xtsiņ Jesús.

¹³Goldeed zhibdiuzh naa lo Ruf, zēēb xtiidz me lo grē zha ne nacgrē ne;

goldeed zhibdiuzh naa lo xniaa me ne, run naa cuent lēē stib xnia naa ga, blactaa pteedlo me naa. ¹⁴Goldeed zhibdiuzh naa lo Asíntric, lo Flegon, lo Hermes, lo Patrob, lo Hermas ni lo grēragaa zha bets ne nacgrē zho.

¹⁵Goldeed zhibdiuzh naa lo Filólogo, lo Jul, lo Nerew grop bzian me, lo Olimp ni lo grēraa zha bets ne nacgrē zho.

¹⁶Grēse to bets, grēse to bzian, golcaania zhibdiuzh naa. Grēse zha ne rliladz Jesús nëz rii, laa zho rxeel bdiuzh lo to.

¹⁷Nu ne laa naa csiaalle lo guits rii, laa naa rso diidz lo to, nsin golso lo grē zha ne ziaad loxaque dien zha codiļ zho to, dien zha gungüet zho to, rlu zho miņe ni nacdraa Xtiidz Jesús; yquiaadiagde to zhiwseed zho.

¹⁸Grē zha co, led xtsiņdraa Jesús ga run zho, sinque laa zho noxco ncuaaņe gdeed guxt xcuerp zho. Diidz nex, diidz ndooladz rnee zho; grē miech ne beelze pe rliladz, znuse rquidie zho zho.

¹⁹Sangue to, zēēb diidz ne ib rsaande to miņe nac Xtiidz Dios, zienaļ to miņe rnabey me.

Rley naa ron naa squitaa nguzobdiidz to. Racladz naa tibaque squi niini gac to, zeena guien to niapse ncuaaņe yquiin gun to, ni lalnu tsođe to lo guieļntseeb. ²⁰Scagaa Dios men ne rtiche grēse zhgab, grēse dzeb, merle quixdze me Satanás, zeena peet grieelodraa gun ma. Jesús, men ndzon ne rnabey ne, me gacniēn to.

²¹Golcaania zhibdiuzh Timoté, men ne quianie naa xtsiņ Jesús, laa me rxeel bdiuzh lo to; scaque zha ladz naa Lus, Jasón ni Sosípater, laa zho rxeel bdiuzh lo to.

²²(Naa nac Ters, naa noquia guits rii, ye naa laa naa rxel zhibdiuzh naa lo to i. Rleynie naa to, sac ye to ngab lo Jesús. ²³Golcaania zhibdiuzh Gay, men ne rbēz naa lidz, laa me rxeel bdiuzh lo to. Lidz me nu rcaalsa grē zha ne rliladz

Jesús nöz rii. Ye Rast, meṅ ne nac wx-tis quianap xtimi guiedz rii, ni bets ne Cuart, laa zho rxeel bdiuzh lo to. ²⁴ Jesús meṅ ne rnabey ne, me gacniē to grēse to. Sca gaca.)

²⁵ Laa naa rsaṅ to ladznia Dios, me gacniē to lozh sodziits to lo Xtiidz me, miṅe none naa lo miech. Haxta zeene gard tsaa guidzliu, znu no guic Dios csilaa me grē miech lo xtoḷ zho, perchoot gočnaṅda, naraa laaw bzhoobneṅ.

²⁶ Laa niina, nzian zaatne nogaaz Xtiidz me, zeena grēse zho guiē Jesús none gnalo zho, ni miṅe rnabey me miṅ co no guṅ zho. Grē zha ne biadteed xtiidz Dios padzeela, bzeetle zho ne znu gaca, ni ible Dios rnabey ne znu gaca. ²⁷ ¡Mese nac Dios, mese nac meṅ ne nli-paa rien! ¡Tibaque sca golgotsaa dziu-unnon ne me, grēse ne ne nac ne zha ne ngab lo Jesús! Sca rieguiāla.

Pabl

GUITS NE GLO PXEEL PABL LO ZHA

CORINT

1 ¡Diuzh to grëse to! ¹Naa nac Pabl, ible Dios bzooblo naa znu quiayun naa xtsiin Jesús. Grop no bets ne Sóstenes rquiaa guits rii rxeel no lo to.

²Laaw ziaad lo to i, grëse to ne nac to zha ne ngable xnëz Dios no to guiedz Corint i, nac to zha ne bredz Dios ngab lo me, psanmbe me to zeene laa to bliladz Jesús; zigne psanmbeque me grëse miech ne no dib lo guidzliu, zha ne bliladz Jesús, men ne rnabey ne grëse ne.

³Dios men ne nac Pxoze ne, ni Jesús men ne rnabey ne, me gacnien to, me glu lo to ganle pa lotaa noxco me to; zeena peet tsienied guic to.

⁴Gzataa zeene rzodiidznie naa Dios, rded naa xquizh lo me por grëtaa ncuaane zineedz me lo to, niina ne laa to rliladz Jesús. ⁵Sac gon porne rliladz to Jesús, blactaa ziyunlay me lo xquielmban to, noyacnien me to quiayoguicraa to zha nac zhiwseed me, rien to zha gnee tow lo miech. ⁶Rlu zienal to mine nac Xtiidz Jesús, zigne binse tow, ⁷gacxe waa bneedz Dios grëtaa guielbiini lo to, zeena guien to zha gban to, laga quiambëz to gdziñ dze ne guiaad Jesús men ne rnabey ne. ⁸Ni Dios nac men ne gacnien to tiblque gac to lo Xtiidz Jesús, zeena ni tib falt rapde to gal dze co. ⁹Sca nac xtiidz me, ni mesi gon ct-sëed me mine rnee me, ible laa me bredz to gacnie to Xpëed me Jesús, men ndzon ne rnabey ne.

¹⁰Gacxe waa bets, bzian, laa naa rso diidz lo to niowse golgac, tsodildraa to. Ine tipse golgac grë to, tel pe nac dziin ne gun to, tel pe rzac to, tipse golnee. Ne nligaa golgona, zig nac zeene Jesússhal

noso diidz rii lo to. ¹¹Sac gon në tib zhalidz Cloé lo naa nodilla to i; ¹²no to dien cho xnëz ngab to. No to rnee: “Xnëz Pabl no naa”; riasaque zha ne rnee xnëz Apol no zho, rrieequiagaa zha ne rnee xnëz Pedr no zho; haxta no zho rzac zhase nac zha ne nliipaa no xnëz Jesús. ¹³Ne squi rac to, ¿pe rzac to dzigo squi nzian lë nac Jesús? Zha ne rnee xnëz Pabl no zho, ¿pe niacxe naa pquia lo cruz gozh xtol zho?, ¿te brobnis zho ye par ygab zho lo naa?

¹⁴¡Xquizh Dios led naad pchoobnis to grë to, lëese chop zha ne pchoobnis naa nac Crisp ni Gay! ¹⁵Zeena tsod pe nacne guiab to xnëz naa ngab to, sac naa pchoobnis to. ¹⁶Ah, ni naaque gon pchoobnis grë menlidz Stef. Bod lëese zha ne pchoobnis naa ga, ¹⁷sac gon pxeeldaxe Jesús naa waa cchoobnis naa miech, sinque laa me pxeel naa cseed naa zho gacnan zho zha grieelo laa zho lo dol. Haxta bod ligase bzhaac to mine bialne naa lo to, sac ib zanañ naa pe guielrac, pe diidz ngan ne gne naa; sac nacda gleynie miech zha rnee naa, sinque gliladz zho cho nac Jesús, pe nacne gut me lo cruz.

Diosse nac men ne rien

¹⁸Min co nagon noxco naa, maase nicle no grë zha ne rzac ncuaane paat rquiind ga been Jesús gut me lo cruz, per lëe zha co nole nëz ne nitlo zho; sangue ne ne nac ne zha ne psilaale me lo dol, ndion ne ganle ga blu pa lotaa nac poder ne rap Dios. ¹⁹Noyaca zigne zhobneeque lo Xtiidz Dios, zeene rëb me:

Znitlo naa grë guielrac ne rzac zho csilaa zho,
niicle rzac zho mazdraa zhooba guic zho,
ni lalnu yquiinda.

²⁰Ni nligaaw, grë zha rac, grë zha rien, grë zha ne rzob dien cho nroobraa rac, ib blud grë zhiwseed zho ga lo zho zha csilaa Dios zho, chogaa nac Dios. Ga blu

Dios ganle lega nacse grë guielrac ne no lo guidzliu rii. ²¹ ¡Diosse nac men ne rien! Bien me grielod gunbey miech me por xquielrac zho, nacne bnabey me zha ne dib zdoos gliladz xtiidz me, zha co csilaa me; niicle ne rzhidznie miecha, rzac zho ncuuaane paat rquiinda.

²² Zig nac grë zha Israel, grë zha Gres ncuuaane paat rquiinda rzac zho. Grë zha Israel, racladz zho ganlo zho grë milagr nroob par glu ne diidzliw; laa zha Gres na zienalgaa gaca zigne nac zhiwseed zho, sac laa zho zienal guielrac ne no lo guidzliu rii. ²³ Gacxe waa zeene rnee no lo zho Jesús men ne pquia lo cruz, men cose csilaa miech, rlëe zha Israel ron zhow; laa zha Gres, rzhidznie. ²⁴ Sangue ne, ne nac ne zha ne bredzle Dios bzëeb xnëz me, zigtaa zha Israela, zigtagaa grëraa miecha, ndion ne ganle Jesús nac men ne biaadlu pa lotaa nac poder ne rap Dios, me biaadlu pa lotaa nac xquielrac Dios. ²⁵ Mine rzac miech paat rquiind ga been Dios, ni nand zho ndziibguicraa nac min co lo grë xquielrac zho; zha ne rza-cgaa cholze cho men nsis ga sca gut lo cruz, ni nand zho lëe men co mazdraa ndip lo grëse miech guidzliu.

²⁶ Bets, bzian, golgan ganle lo grë to ne nac to zha ne ngab xnëz Dios, led grëde to nac zha rien nëz lo miech, led grëde to nac zha non, zha ne ziaadgaa lo grë dii ne nziuu lo zho. ²⁷ Per ib laa Dios nobedz grë zha ne rzac miech peet riend, grë zha ne rzac zho nac zha nsis, parne gunctoladz me grë zha ne rzac zho nac zha rac, zha non. ²⁸ Laa me nobedz grë zha ne sca rzac miech paat rquiin, zha ne rzac zho peet nond, parne guioog ro grë zha ne rzac zho nac zha non, zha nziuu. ²⁹ Ga rlu me ganle ni tib choot grielod gacniats lo me. ³⁰ Golwi ganle, niapse por me laa ne nacie Jesús, grë guielrac, grë guielrien ne rdziaap ne, Jesús bneedza, ni Jesús nac men ne psilaa ne lo grë-taa xtol ne, men ne psanmbe ne laa

ne bziaab xnëz Dios. Dios bnabey sca goca. ³¹ Gacxe waa choot grielod gacniats, zigne ziaadaque lo Xtiidz me zaatne rnee: “Zha ne racladz gacniats, mazd gunnon zho Dios por grëtaa ncuuaane run me.”

Xtiidz Jesús bnee Pabl

2 Gacxe waa tel naa, golsoladz ganle bets, bzian, len dze ne bialseed naa to Xtiidz Dios, bned naa dien pe didz nroob, dien pe diidz ndzielguic lo to. ² Bend naa dien peraa nseed naa to, sinque mine nac zhiwseed Jesús min co bialne naa, zeena gacnan to cho nac me ni pe nac ne pquia me lo cruz. ³ Lega gzhe gzhe rac naa, haxta rzhidz naa, rdzieeb naa no naa lo to. ⁴ Zeene laa naa psilo bne Xtiidz Dios lo to i, gon to ganle ib bned naa zigne rnee grë zha ne nac zha rac lo guidzliu rii; per blu Espíritu Sant ganle nacda beelze pe wseed, ni blu ganle pa lotaa poder ne rap Dios. ⁵ Sca bne naa lo to, sac laa naa racladz zha ne gbig sëeb xnëz Dios, me gnalo zho, gnalod zho grë mine nac xquielrac miech.

⁶ Parga nli no zaatne rnee no grë didz nroob, diidz ndzielguic, per laa min co rnee no lo grë zha ne rienraa zha nac Xtiidz Dios, ni nacdgaaw zigne nac grë xtiidz ndzielguic grëraa miech, grë didz ne rleynie grë zha rnabey ne no lo guidzliu rii; sac zigtaa zhaw, zigtagaa zhiwseed zhow, ncuuaane tibrded naca. ⁷ Grë diidz ne rnee no, ndzielguic naca, sac zhiwseed Diosa, lëe xquielrac me ga. Ndzielguica, sac ga rlu me zha no guic me csilaa me miech gdzin zho lo guielndzon ne no me; gocnand miecha padzeela, per nolew zeene bzaa me guidzliu. ⁸ Grë miech ne no len dze rii, rioguicd zho zha nac xquielrac Dios; sac telne nioguic zhow nabeyd zho nquia men ndzon ne nac Jesús ga lo cruz. ⁹ Zigne zhubneeque lo Xtiidz Dios, zaatne rnee:

Ncuaane waltaa gard guien miech, nac grë mine quianiele Dios gdeed me lo grë zha ne nlipaa gbig lo me gleynie zho me.

Ncuaane choot gard gana, ncuaane choot gard gona.

¹⁰ Sanguë no laa no ndionlew, sac pxeel me zhiEspiritu me blu lo no zha naca, men co nan grëse mine no guic me.

¹¹ Zig nacle tib miech, grieelod gacnanpaa ne dien pe nac mine no guic zho, pe nacgaa mine rza zdoo zho, loxaque zhiespirituse zho nana; scaque Dios, loxaque zhiEspiritu me nan grëse mine no guic me gun me. ¹² Ni tel no, Espiritu co nacie no (nacie no espiritu ne quianzë lo guidzliu rii), ni ible laa Dios pxeel me lo no zeena gacndion no zha nactaa grë ncuaane nole guic Dios gneedz me lo ne. ¹³ Zeene rzeet no grë guielnzaac co, laa no rneew zigne rneedz zhiEspiritu me guielbiini lo no, rneed now zigne riab guic grë zha rac ne no lo guidzliu rii. Laa no rnee grë min co zigne rlu zhiEspiritu mew, ni ible laaw nac par grë zha ne rioguicle zha racladz Espiritu co.

¹⁴ Grë zha ne nacie zhiEspiritu Dios, cholze miech nac zho, grieelod tsoguic zho zha nac grë mine rlu Espiritu co lo no. Rzac zho ncuaane paat rquiind naca, sac grieelod guien zhow ne zhase. ¹⁵ Sanguë zha ne rioguicle zha racladz Espiritu co, rien zho pe nac mine rlu me.

¹⁶ Ni nligaa zha guien zhow, zigne zhobneeque lo Xtiidz Dios, zaatne rnee: "Choot grieelod gacnan pe nac mine no guic Dios gun me, choot grieelod glu lo me pe nac mine no gun me." Per no, ndion now, sac grë ncuaane nan Jesús, bneedz me diidz lo no ye no gocndiona.

Gnalod zho samiech zho

3 Bets, bzian, ne nligaa gard grieele gne naa lo to zigne rne naa lo grë zha ne rioguicle zha nac mine racladz

zhiEspiritu Dios, sinque tibaque laa naa rne lo to zigne rne naa lo grëraa miech guidzliu, sac rrieequia bii mëdyeen nac to lo zhiwseed Jesús. ² Niapse ncuaane ligase ziseed naa to, laa ne cseed naa to ncuaane ndzielguic. Rrieequia nidzse nonedz naa quiaye to, laa ne gow to grë ncuaane row zha gol. Haxta niinagaa gard tsoguic to zha nac grë mine ndzielguic, ³ sacne laa to bii zienal mine run miech guidzliu, laa ne gun to mine racladz Dios. Golguien ganle zha rac to, no to rlozhd glëëlsa to, rlozhd tilsa to. jLed squid gon no gac zha ne nole xnëz Dios! ⁴ Pe i na rriee bla to rnee: "Tel no xnëz Pabl no no", rrieequegaa zla zha ne rnee: "Tel no xnëz Apol no no." Gase rlu ganle zienalde to mine racladz Dios, sinque laa to zienal mine no guic to.

⁵ Nana, ¿cho nac Pabl, chogaa nac Apol parne no yquiaaqui tsodil to? Nli no biadseed to Xtiidz Dios, per tib ngundziin winse nac no lo me, bdziuun no mine rnabey me no. ⁶ Nac cuent rii zig nac tib guielgon, naa blo bni liu, laa Apol bgaala; per Dios nac men ne bnabey blana ni me pchooba. ⁷ Golwi sca ganle Diosse nac men non, sac me pchoob bni co, tel no peet ncuaane nroob bdziuun no, lëë gdib tib bloo bni liu, stib bgaala. ⁸ Zigtaa zha ne bloo bni liuw, zigtagaa zha ne bgaala, lal nac zho grop zho; ni Diosse nac men ne gdeed mine rieguial zho tib tib zho por dziin ne been zho. ⁹ Tib ngundziin winse nac no lo Dios grop no Apol; laa to nac zig tib lë liu ne quiaayan Dios, zig tib yu ne quiazaagaa me.

¹⁰ Pa lotaa wen Dios, sac bzooblo me naa naa psilo yu co, ni blu me lo naa zhapaa none tsaaw. Nli naa bgaa blee xcimienta, per niina zhaale zha ne nosoquiaw. Tib tib zha ne nosoquia yu co, none guien zho zaacse gzhixcuaa zhow, tsienal zho zigne nacle xcimienta ga, ¹¹ sac gon nod pe nacle csëëb zho stib

cimient, tibaque cimient no, lëë cimient co nac Jesús.

¹² ¡Laa cimient co nole! Nana no zho gzaa yu co niapse guuib or, niapse guuib plat, no zho gzaaw grë quie niazh, no zho gzaaw yag, nogaa zho gzaaw grë pe guizh, pe yag xiidgaa. ¹³ Zeene gdzin dze ne laa Jesús gun guielwxtis, ga glu dien zha nac xtsiin zho; sac gal dze co grësew laaw none ted lo gui, ga glu dien pa min lëbraa. ¹⁴ Zha ne pquiin ncuaañe rlëb lo gui, ib tedsod zgaa zho mine rieguial zho gdeed Dios lo zho; ¹⁵ laa zha ne pquingaa grë ncuaañe znuse rec, mbe scase nitlo xtsiin zho. Peet ycaaniad zho, haxta zha pense tel zha laa zho lo gui co, zigne rzac zha ne rec lidz.

¹⁶ Golgacnañ ganle xyadoo Dios gon nac to, sacne zdoo to rbëz zhiEspíritu me. ¹⁷ Tel xyadoo Dios, tib yadoo mbe, tib yadoo nda naca; gacxe waa, zha ne gnitlow ib tedsod znitlo Dios zho. ¹⁸ Golguien sca zaacse golgac, tel no zha ne rzac nroob rac zho wseed lo guidzliu rii, gnalod zho min co; nend lel lo co no zho, ygaad zho mine nacpaa guielrac, guielrac ne rneedz Dios. ¹⁹ Sac gon grë guielrac ne no lo guidzliu rii, ncuaañe beelze naca nëz lo Dios. Zigne raquiteaque lo Xtiidz me zaatne rnee: “Grë zha rac ne no lo guidzliu rii, lëëque lo grë guielrac ne zienał zho, ga rlu Dios ganle paat rquiinda.” ²⁰ No stib zaatne rnee: “Nanle Dios grë zhgab ne nonie guic grë zha rac, ncuaañe paat rquiinda.” ²¹ Tsoode to sca lozhd gacniats to dien cho xnëz miech guidzliu rii no to, golguien ganle grëtaa ncuaañe no, laa Dios psana par yquiina lo to. ²² Zig nac guidzliu, guielmban, guielgut, ladznia to now, nicle ncuaañe no niinaw, ncuaañe nara-gaa ziaada, chen tow; haxta Pabl, Apol, Pedr, ib laa no zo nu par dziuun no xyudar to. ²³ Grëse to tibaque xnëz men ne no to, lëë men co nac Jesús, men ne px-eel Dios.

Zha rzac zha ne rienee xtiidz Dios

4 Golguien sca tib moz winse nac no lo Jesús, laa me bzoo no noseed no miech xtiidz me mine gocnand miech padzeela. ² Ni zha ne gon znu run tib dziin, ible none nguzobdiidz gac zho lo men ne rnabey zho. ³ Gacxe waa tel zha rzac to naa, tel zha rzacgaa grëraa miech naa, peet zienied guic naa. Haxta ni mine rzaac naa nac naa, peet nonda, rieguiald guiep naa znutaa znutaa nac mine noyun naa. ⁴ Nli peet dzeb nonied guic naa guiep naa nend cho pe glisqui lo naa, per led mincod gni naa ni tib dol rapdraa naa; loxaque Dios nan zha nac naa, me gneedz mine gagual naa. ⁵ Gacxe waa, gunde to ne glole to guiab dien cho nac zha ne wenraa; sac min co gun men ne rnabey ne gal dze ne laa me guiaad. Gal dze co, me cxobnen ganle zhapaa nac ne tib tib ne, haxta grë mine rza guic ne, mine no zdoo ne, laaw glu me; grë no ne nodziuun no xtsiin me, dze co laa me gneedz mine riogualpaa no tib tib no.

⁶ Bets, bzian, niina ne nozet naa no lo to nu grop no Apol, quiayunnond naa naa, nicle nosanwindgaa naa me. Ga sca ganle golwi, zeena cseed to gban to zigne nac Xtiidz Dios, tsoode to lozhd dien cho non, chogaa nond. ⁷ Stiba, ¿cho nadien në lo to ne gunnon to to? Grë ncuaañe rap to, grë ncuaañe rac to, ¿niacxe led Diosd bneedza lo to? Dios name bneedza lo to, ¿pe nac dzigo no to rlozhd gacniats to zig nac zeene por xquiełliger to bgaa tow? ⁸ Niats rac to, masaque rzac to grële zhiwseed Dios nan to, gaxle zo to lo me, haxta rzac to tole nac zha rnabey, paat rquiindraa no. Wenzhe tebaa nligaa zha rnabeyle nac to, zeena haxta ye no zley no.

⁹ No hor rzaac naa, diunavez win psan Dios no ne nac no zha ne nonee xtiidz me, loxaque lo no rwi miech, rwi grë anjl dien zha rac no; zig run miech rieso

zho lo zha ne rnabey zho ret. ¹⁰Ne znu quiadziuuñ no xtsiin Jesús, masaque zha yozh nac no lo miech, laa to gon xquizh me zha rien nac to lo zho. Zha nsis, zha zozhidzle rzoob zho no, laa to zha ndaan, zha ndip nac to. Masaque zha nziiu nac to lo zho, laa no rzac zho ni gand zho lo no. ¹¹Haxta lo nadze blactaa zaatne retgbin no, zaatne retnis no, per ni lidz no, per ni lar ne dziaacw no guienđ, rdib rdzaag no rdziuuñ no dziin rdziniaa no ncuane rquiin no. ¹²Ni rlozh ga rreeque miech rsacsi zho no. Rreequia zha ne rdzibdee no, per rdziuuñ no gdzibdeequ no zho, sinque mazd rnab no lo Dios gunlay me zho; zha ne rtsidil no, rdziuuñcasd no zho. ¹³Rreequia zha ne nē rnee lo no, per no, diidz wen rtsire no lo zho. Masaque rzac miech no, zig rzac zho grē ncuane paat rquiindraa, zig rzac zho grē ncuane nole lo guizh.

¹⁴Laa naa rzet grē min rii lo to, per nacda par gunc̄toladz naa to, sinque laa naa rzeta zeena guien to zaacse gac to, golguien ganle rleyne naa to, rzaac naa to zig tib xpēed naa. ¹⁵Niicle niaca mine ndal zha ne guiadseed to i, nicxe guiaad nzian mil zho waa, per led grēd zho tsoxcopaa to zig rioxco tib dad xpēed zho. Zigne rne naa ga, xpēed naa nac to, rreequia pxoz to nac naa, sac gon naa glo bialne xtiidz Dios lo to, laa to bzēeb xnēz Jesús. ¹⁶Goltsoxco sca, golban zigne mban naa. ¹⁷Ni ible mincopaa gon laa naa rxel Timoté ziaad lo to i, lēe stib xpēed naa i, ne nligaa rleyne naa me, tib zha nguzobdiidz nac me lo men ne rnabey me. Laa me ziaad i, me gzodidz lo to ganle zigne rseed naa miech grēse zaatne ziyateed naa, scagaa noxco naa mban naaw.

¹⁸Rien naa no bla niats ne nac to i, rzac nliidraa guial naa lo to i stib. ¹⁹Gacnañ zho ganle, gneedzse Dios diidz, ible laa naa none guialniob, dzigo bii zdzian ne dien pe nli na nacnie zho xpoder Dios,

te loxaque rnee zho ye. ²⁰Sac gon zha ne ngab xnēz Dios, grē mine rnee zho none glu nacnie zho xpoder me, nacda loxaque diidzse. ²¹¿To nadien zha racladz to? ¿Pe rdziladz to guial naa guialgactox naa lo to i, te mazd wen ye niapse diidz ndooladz, diidz nex guialne naa lo to?

Zha ne runc̄tal xto!

5 Zēeb diidz gon, lad to i no tib zha bgui ne quiayun tib dol nroob; per ni grēraa miech ne gard gliladz Xtiidz Dios rund min co. Bin naa lēeque xniaa pchoob zho quiangob zho. ²Yo na ne rzac to grēle zhiwseed Dios nan to, gaxle zo to lo me! ¡Laa ne ctoladz to, laa ne tso to guielnē, cuee to zha qui lad to, lel no to rlozhd gacniats to!

³Niicle ne zozhaald naa lo to i, per zeene bin naaw tibaque nonie guic naa zha gaca. Nu laa naa gni lo to ganle zha riegual gac zha co: ⁴Grē to ne nac to zha ne ngab lo Jesús, rnab naa lo to ycaalsa to zigne rnabey me. Ndiionle ne ganle zeene laa to ycaalsa, ga zo Jesús lo to, scagaa naa, golgun cuent lo to i zo naa. ⁵Squi ndxie to grē to, golzonēz zha co, golcueegazh zho lo to i, tsie zho tsietsobe zho lадznia mendox, ga tednē xcuerp zho guien zho ganle pe noyun zho; nanđ new togo zzhixcuaa zho stib, zeena ycaania Jesús zho gal dze ne laa me gbiire guiaad.

⁶XLēse gon squitaa racniats to rzac to zha mbe nac to, ni randze to zha ne quiayun dolđox qui! ¡Pe riende to telne glisquide to mine quiayun zho, ib tedsod zrieequiaraa zha ne squi gunc̄tal xto! ⁷Zha ne squi nac, masaque nac zho zig nac grē guielguidzdox ne znuse rded; golcueegazh zho sca, zeena ine mbe gac to nēz lo Dios, tete to guielguidz qui. Golguien ganle laa Jesús psanmbele ne, mincopaa gut me, goc me gon nēz lo Dios zig carner yeen ne rgogon zho lo me lni Pascw. ⁸Golgotsoo gban ne

zigne racladz Dios, grëse tel zha wban ne glo, grëse guielyozh, grëse guielntseeb ne bdziuuñ ne, none csaan new grësew. Ndzinli sca golgac, goltsienal mine nac diidzli; none mbe gac to nëz lo Dios, zig guietxtil ne notsd ncobi.

⁹Lo stib guits ne pxel naa lo to ga, laa naa psole diidz lo to ganle ctsieelsade to grë miech yozh ne ndzinlid mban. ¹⁰Zeene sca pso naa diidz lo to, guiabde to togo naca parne ctsieelsadraa to grë zha ne gard gliladz Xtiidz Dios, zha ne rquiangob zha ne led tseeld, grë zha ne zienal loxaque gunlo dimi, grë zha ne run guielgbaan, grëгаа zha ne rnalo grë mdio. Led zha coda, sac laga mban ne lo guidzliu rii, ible zanlsa ne grë ne zho. ¹¹Singue zha ne bzet naa ga ctsieel-sade to, nac zha ne nacle diidz xnëz Dios no zho, ni noque zho quiayunctal zho xtol zho, no zho rquiangob zha ne led tseeld zho, no zho zienal loxaque gunlo dimi, zhiga zhiga laa ne gleynie zho Dios lel zhaa ncuane rleynieraa zho, no zho rquiadiidzguizh samiech, no zho rzudz, nogaa zho run guielgbaan. Ne nligaa zha ne sca nac, per ni tib guielwagw gowniede to zho. ¹²Tel grëraa zha ne gard gliladz Xtiidz Dios, led ned rioguaial glisqui mine quiayun zho, Dios nac men ne gunquizh zhow. ¹³Sangue zha ne nacgrë ne, zeene noyun zho tib ncuane ndzinlid, ib rieguial glisqui new lo zho. Gacxe nana sca, zha ne squi quiayunctal xtol i, golcueegazh zho lad to, ni spalal gandzedraa to zho.

Zha none gac guielwxtis

6 Laa to gocnanle ganle, to rieguial glisqui tel pe nac ncuane nonguield run zha ne nacgrë to. Lëda i gon run to, zeene pe tib dil rap to, lëëlëd zie to lo wxtis laa ne gbig to lo zha ne nacgrë to, zha csiooglo lo xtil to. ²¿Niacxe nande to zha ne ngab xnëz Dios, zha co cobey zha nac xtol grëraa miech zeene

gal dze ne laa Dios gnabeya? ¿Pe nac dzigo grielod tose csiooglo lo tel pe dil win ne rap to? ³Haxta grë anjl name, ne gon cobey pe nac grë mine quiayun zho. Gacxe waa, grë dil ne rac lo guielmban rii, ne rioguaial cobey zha guiooglo low. ⁴Sca gon gun to, led node to, rnadse pew laa to ziele lo wxtis. ⁵¿Pe ni tib lë guielto guien zha ne grielod gnee lo to, cuëz lo xtil to? ⁶Nazdpaa rdziladz to dil, ¿pe i na lëëque zha ne nacgrë to quiadilnie to, ni rlozh ga zieque to zienie to xtil to lo zha ne riladz Dios? ⁷Pe riende to tib guielto doxle i squi no to lëëque to quiadilla. Mazd golxecw tel cho pe run to.

⁸Mazdraa gon mbana squi no to rsacsi to miech, ni haxta zha ne nacgrë to rsacsi to. ⁹Nanle to ganle zha ne squi run guielntseeb, grielod gdziñ zho za-atne rnabey Dios. Tseniewguite guic to sca. Golsoladz ganle grëse zha ne run guielyozh:
zig nac zha ne rquiangob zha ne led tseeld zho,
zig nac zha ne rquiangob zha ne nole tseel,
zig nac zha ne nac mrash,
zig nac zha ne rnalo grë mdio laa ne gnalo zho Dios,
ni tib zho grielod gdziñ zaatne rnabey Dios. ¹⁰Scaque:
zha ne nac ngbaan,
zha ne zienie guic loxaque dien zha gunlo dimi,
zha ne nac ngonziu,
zha ne rzhixcuaa diidzguizh,
zha ne rungüet miech par cuan zho zho; ni tib zho ygaad guielnzaac co. ¹¹Blalaa to bio lo grë dol co glo, sangue niina miech mbele nac to nëz lo Dios, laa Jesús ni Espíritu Sant psanle to zig tib zha ne peet xtol, laa me psanwenle to nëz lo Dios.

Guncald zho xtoł zho

¹²Nli ndal ncuaañe zac gun ne, guncaldald xtoł ne, niicle choot rcaadgaaw, per led grēda rquiin. Teł naa, niicle no ncuaañe zrieelo gun naa, par runđ naaw; sac racladzd naa guien naaw, lozh ga lēew gnabey naa. ¹³Zēeb diidz rnee zho: “Laa guielwagw biaan par gow miecha, scagaa zdoo zho laaw biaan par tsodzēw guielwagw.” Nli scaw, per guiabd ne togo por min co lega gowcho ne. Pa rquiin ne lega tedso gow ne, sac gon zigtaa zdoo new, zigtagaa guielwagwa, dzin dze ne gnitlo Diosa. Guielwagw ga na, sangue grē guilyozh nerun miech rquiangob zho zha ne led tsielld zho, biaanđ ne par dziuun ne min co, sinque laa ne biaan par gban ne zigne rdziladz Dios, sac me rnabey ne. ¹⁴Teł new nitlod ne, sac gon zigne bleeban Dios Jesús con poder ne rap me, scaque zbeeban me ne zeene laa dze co gdzin.

¹⁵Golgacnan ganle, rriequia lēē tiblē xcuerp Jesús nu gon nac ne tib tib ne. Nana, ¿pe nonguielga ga dzigo gdzieel tib lē xcuerp me ga xcuerp tib wnaa ro nēz? ¿Nonguielga gon! ¹⁶Sac gon zha ne raanie tib wnaa ro nēz, rriequia tibaque rac zho ga grop zho wnaa co. Rnee lo Xtidz Dios, par me: “Zeene laa mguí racgrop tib wnaa, tibaque miech rac zho ga grop zho.” ¹⁷Scagaa zha ne rzēeb xnēz Jesús, tibaque rac zho grop zho me, zhiEspíritu me racnie zho.

¹⁸Gacxe waa, gunde to guilyozh yquiangob to zha ne led tsielde to. Lo grē dol ne no, min riise nac mine xcuerp-paa miech rguitnie zho. Sac gon zha ne run guilyozh co, masaque rsanbeed zho zho ga. ¹⁹Golguien ganle, zha ne nole xnēz Dios, masaque zha nac zig tib yadoo zaatne rbēz Espiritu Sant, Espiritu ne rdeed Dios rbannie zho. Led nedraa rnabey xcuerp ne, ²⁰Diosle rnabeya, sac gon bzhiile me ne ni nroob goncon ne lo

me. Gacxe waa, zigtaa xcuerp new, zigtaa xpensar new, gotsaa yquiin new par cxobnen ne ganle pa lotaa men nroob nac me.

Rtsire Pabl lo zhiwnabdiidz zho

7 Lo guits ne pxeel to lo naa, nzian ncuaañe rnabdiidz to, nu ganle laa naa ctsire lo wnabdiidz co: nli wena, telne niaca mine grielow ctsieelnad ne. ²Per parne tsod pe yquiaaqui cho gon guilyozh, tsonie zho zha ne led tsielld zho, mazd wena zigtaa mguiw, zigtaa wnaaw ctsieelnia zho, tib tib zho gbaniese zho tsielld zho zigne rieguała.

³Zha ne ptsieelniale, zig nac mgui none gnee zho lo tsielld zho zeene racladz me, scaquegaa wnaa zeene racladz tsielld zho gnee lo zho none siguielld zho. ⁴Sac gon wnaa ne rtsieelnia, led zhadraa rnabey xcuerp zho, sinque tsielld-le zho rnabeya; scaquegaa mgui zeene laa zho rtsieelnia, tsielld-le zho rnabey xcuerp zho. ⁵Golguien sca, niicle mguiw niicle wnaaw nodne yca zho xcuerp zho lo tsielld zho. Laa telne rzacgaa zho none yquiind zho tsielld zho tib blalaa dze, sac rquiabladz zho gzodiidznie zho Dios, wena totsaque guiaan zhow diidz grop zho. Per zigne ted ga, gbiireque gnee zho lo tsielld zho, sac gon zha ne grielod cxcw, nend ccheep mendox zho gon zho guilyozh.

⁶Ne znu rne naa lo to, guiabde to nagon togo rne naa nopaa ctsieelnia to. ⁷Teł naa, rzac naa wena tebaa grēse to znu ctsieelnia, zigne nac naa; per na ncuaañe gacd ga, sacne zhaase zhaase nac ne tib tib ne. No zho pso Dios ctsieelnia, nogaa zho pso me ctsieelnia, per rley zho mban zho zigne nac zho. ⁸Zig nac grē zha ne bii tib, grēgaa zha ne gutle tsielld, wena tebaa grielo scase guiaan zho, ⁹per telne rien zho lēbd xcuerp zho, dzigo mazd ctsieelnia zho. Mazd wena

ctsieelnia zho, lëdle so zho tib zho ni tel rec rdzu zho.

¹⁰ Sangué zha ne ptsieelniale, laa naa rso diidz lo zho csaand zho tsiel zho, ni nacda xtidz naa, sinque ible sca rnabey Dios. ¹¹ Laa tel zha ne guiaabgaa csaan zho tsiel zho, zaca, per lëeraasi grielodraa gbiire ctsieelnia zho, mazd mine naca telne zrieelow ycatsieel zho stib, o guiaangaa zho tipse zho.

¹² Nu na ganle laa naa gnegaa chop lan xtidz naa lo zha ne led yed tsiel riladz Xtiidz Dios; tib diidzse naca gni naaw, nacda mine rnabeypaa Dios. Zha bgui ne mbannie tib wnaa ne riladzd Xtiidz Dios, per telne rio guic wnaa gbanne wnaa zho, nodne csaan zho wnaa.

¹³ Scaquegaa wnaa ne mbannie tib mgui ne riladzd Xtiidz Dios, nod csaan zho mgui co telne riopaa guic mgui gbanne mgui zho. ¹⁴ Zigtaa mguiw, zigtagaa wnaaw, zha ne sca mbannie tib zha ne riladzle xtiidz Dios, ye zho runlay Dios ga, nenda haxta zio dze ne ye zho gliladz xtiidz me. Sac telne ctso zho, laa ne gbigraa xpëed zho lo Dios, lel znu sozit mëed. ¹⁵ Nana, telne zhalgaa zha ne riladzd Xtiidz Dios ga, rnab csaanlsa zho, peet nacda maase ctso zho, nod pe nacne gzoobguicpaa tsiel zho lo zho cuëz zho. Sac gon zha ne riladzle Xtiidz Dios, laa me bredz zho parne zaacse gban zho, bredzd me zho par tsodil zho; ¹⁶ stiba, nand zho dien pe zdziñ dze ne gliladz tsiel zho Xtiidz Dios.

¹⁷ Mine naca tib tib to goltsoxco gun to mine rdziladz Dios. Zigtaa zha ne pso me ctsieelnia, zigtagaa zha ne pso me scase guiaan, sca none gac to; scagaa zha ne ncaatsieel-le zeene riladz zho xtiidz me, none sca guiaan zho niicle telne riladzd tsiel zho xtiidz me. Grëse zha ne ngab lo me, diidz rii rso naa lo zho. ¹⁸ Zig nac grë zha ne nole bey xcuerp zeene laa zho rzëeb xnëz me, sca no zho bey co gund zho ne yqueets zhow. Zha ne na nodgaa

bey co zeene rzëeb zho xnëz me, scaque nod pe nacne tsopaa zho bey co. ¹⁹ Mine mazdraa non lo me, gban zho zigne rdziladz me, guiendraa ne dien cho no bey, chogaa nota.

²⁰ Zigne rneque naa ga, grëse zha ne rzëeb xnëz Dios, tel zha nac zho zeene laa me bredz zho, scase none guiaan zho.

²¹ Zig nac zha ne nac ngundziin lo ben, peet tsienied guic zho guiab zho dien zha griee zho ladznia zha ne rnabey zho; per telne gdeeda diidz, zac tsoxco zho dien zha griee zho lo zha co. ²² Zha ne sca nac ngundziin lo ben zeene bzëeb zho xnëz Dios, guien zho ganle rrieequia zonlaale zho, sac gon laa Jesús psilaale zho lo grëtaa dol ne bio zho. Zha ne nacdgaa ngundziin lo ben zeene bzëeb zho xnëz Dios, guien zho ganle tib ngundziinle nac zho lo Jesús niina, me rnabey zho.

²³ Golguien ganle, grëse to laa Dios bzhiile to ni nroob gocnon to, gacxe waa mele rnabey to; ni toгаа, lo me none gun to dziin, gdeete to diidz lega gnabey miech to. ²⁴ Sca nasca gon bets gaca, tib tib to zigne nacse to zeene bzëeb to xnëz Dios scase no gban to, ine gleynie to me.

²⁵ Stib wnabdiidz ne run to ga dien zha gac zha ne gard ctsieelnia, gneli naa lo to ganle, guien tib xley Dios mine gnabeypaa dien zha gac zho. Per golquiaadiag mine gne naa nu ganle zha rzaac naa, nanle to ganle, zha ne znu rquia zdoo Dios rbedz me, mine rquiin min co rnee zho. ²⁶ Grë ne ne nac ne zha ne riladz Xtiidz Dios len dze rii, nligaa ngan nac lo xquielmban ne, gane zoot naa wena zha ne sca gard ctsieelnia, maase guiaantib zho. ²⁷ Zha bgui ne na ptsieelnialejaa, grielod gni naa guiaantib zho; sca mbannie zho tsiel zho; per tel zha ne gard ctsieelnia, mazd sobd guic zho ctsieelnia zho. ²⁸ Zha ne racladzpagaa ctsieelnia, zigtaa mguiw zigtaa wnaaw, led dold ga gun zho telne laa zho ctsieelnia; per gacnan zho ganle, zeene laa zho

pcatsieel-le, ib tedsod nroob guieḽnē ne gan zho por grē minē noyac len dze rii.

²⁹ Mine none guien to: zhisle nac dze ne so ne lo guidzliu rii, led nroob nac ngbidz ne grieelo dziuun ne xtsiin Dios; gacxe waa, zha ne nole tsieel, mazd sac zho zho zig tib zha ne guieḽd tsieel. ³⁰ Zha ne quianie dimiw, zha ne no guieḽbleya, zha ne nogaa guieḽnēw, gdeete zho diidz yca grē ncuaan co lo zho par gun zho xtsiin me. ³¹ Zha ne bienle runfalte grētaa ncuaaḽe rquiin zho, gdeete zho diidz ctse grē ncuaan co lo zho, sac zigtaa guidzliuw, zigtaa grē ncuaaḽe no low, zdzin dze ne nitlow.

³² Mine racladz naa peet zhgab ctсед to. Golwi ganle, zha bgui ne tib, tiblque zienie guic zho run zho mine rdziladz Dios, mine nac xtsiin me. ³³ Laa zha ne no tsieel, grieelodraa sca gac zho, sac laa guic zho zienie zha gbannie zho tsieel zho, zha grieelo gun zho mine rdziladz me, min co rionieraa guic zho. ³⁴ Scaque grē men wnaa, zha ne tib, rioxcoraa zho run zho mine rdziladz Dios, dib nase zho rbeeladz zho zho lo xtsiin me. Laa zha ne ptsieelniale, xco ne dieḽ zha gbannie zho tsieel zho, dieḽ zha grielo gun zho mine rdziladz tsieel zho, xco co rioraa zho.

³⁵ Laa naa rne min rii lo to, per guiabde to togo rca naa ctsieelnia to, sinque laaw rne naa parne guien to zha gun to, zeena grielo zaacse gac to gun to mine rnabey Dios. ³⁶ Zha ne quianie wnaa nguieg, telne rzac zho nonguieḽda ga scase ted lo xquieḽnguieg xpēed zho, sinque none ctsieelnia zho, peet nacda, led doḽd ga ctsieelnia zho. ³⁷ Laa telne rzacgaa zho, wenraaw ctsieelniad xpēdwnaa zho, ible scale pquiabladz zho guiaaḽ meed, wenaque ga telne sca rzac zho. ³⁸ Wen ga gun zha ne sca gdeed diidz ctsieelnia xpēdwnaa, per mazdraa wen ga gun zha ne rzac mazd ctsieelniad xpēed.

³⁹ Nana, wnaa ne retgaa tsieel, nli zeene mban tsieel zho rnabey ley ne tsieelse zho gbannie zho; per zeene laa tsieel zho ret, zac ctsieelnia zho tel cho stib mgui ne racladz zho, totsaque zha ne noque xnēz Diosa. ⁴⁰ Per tel naa, rzac naa mazdraa wen gban zho telne tsodraa guic zho ctsieelnia zho stib; sca nagon rzaac naa wena, ni led xtiidzde naaw sac rien naa led tibd naa, Espiritu Sant nacnie naa.

Bëel ne rgogon zho lo mdio

8 Stib wnabdiidz ne run to ga, dieḽ zha nac guieḽwagw ne rgogon zho lo grē mdio, pe zrieelo gdioowa, te grieeloda ye. Zootle na grēle to nan min co; per no hor zeene squi rzac ne grēlew nan ne, lel racniats ne, laa ne gacndooladz ne gnee ne lo grē zha ne nacgrē ne dieḽ zha gun zho parne tsogucraa zho Xtiidz Dios. ² Zha ne rzac grēlew rac zho, ga rlu zho ganle peet rienḽ zho. ³ Tel Dios runbey me tib tib miech, nanpaa me cho nac zha ne rleynie me.

⁴ Zhapaa dzigo gaca, ¿pe wena dioow ne xpēel grē ma ne rgogon zho lo mdio ga, te wenda ye? Ndionle ne ganle grē mdio ne riegāḽ miech led Diosd ga, tibaque men ne nac Dios no. ⁵ No zho rzac nziandox Dios, nziandox men rnabey no, no me no gbaa, nogaa me no lo guidzliu, ⁶ sangue ne ndion ne ganle tibaque Dios no, lēe men co nac Pxoḽ ne, me psāḽ grētaa ncuaaḽe no, me psāḽ ne parne dziuunbey ne me. Ni scaquegaa, tibaque men ne rnabey ne, lēe me ga nac Jesús, me bzaa grētaa ncuaaḽe no, me nac men ne rneedz xquieḽmban ne. ⁷ Per no zha ne rililadzle Xtiidz Dios, bii gardaque guien zho ne tibaque Dios no. Tibaque rzac zho mban mdio, gane zeene rquiin zho bëel ne rgogon zho lo mdio racchop guic zho, lēeque zha runctal xtoḽ zho ga sca run zho. ⁸ Golguien sca, tel Dios rwid me dieḽ cho pe row.

Guiabd ne togo por gow ne o gowdga ne bëël co laa ne guiannziuu lo me.

⁹Laa to nanle nasca, peet nacda yquiin to guielwagw co, per scagaa golcobey adel min co yquiaaqui gunc̄tal to xtol̄ tib zha ne squi bii racchop guic. ¹⁰Sac gon, nenda tibliladz to zob to zaatne riegān grē miech mdio noquiin to bëël co, ni gan̄ tib zha ne bii racchop guica. Zeene gan̄ zho to, nend yeque zho gbig gow zhow, per zeene lozh ga tibaque laa guic zho tsienie lēda ga been zho. ¹¹Zha ne sca gun, niicle ne nli rien̄ zho peet nacd ncuane noyūn zho ga, per por zha laa zha co gunc̄tal xtol̄. Gunc̄cade to, golguien ganle ye zho ga psilaa Jesús zeene gut me lo cruz; ¹²gacxe waa, telne sca gun to por to yquiaaqui gun zho tib ncuane rzac zho nonguield, lole Jesús ga quiayūn to falt. ¹³Min co nagon, tel naa mazd maase gowd naa bëël co, telne por min co yquiaaqui gunc̄tal naa xtol̄ tib zha ne nole xnēz Dios; sac lēda ga gun naa gac naa zig tib quie ne griel̄ ni zho.

Mine rieguial̄ zha ne run̄ xtsiin̄ Dios

9 Zigne nagon zac gun to grē ncuane wen ne racladz to, scaquegaa naa, zac gnab naa ncuane wen ne racladz naa. Tel̄ naa gonlo naa Jesús men̄ ne rnabey ne, Dioszhal bzo naa pxeel̄ me naa none naa Xtiidz me. Ne squi ptsëë Dios lo xquiel̄mban to zeene bial̄seed naa to, i rlu ganle me nacie naa.

²No zha ne rzac nlid Dios pxeel̄ naa, sangue to nanwen to ganle me pxeel̄ naa, sac gonlo to mine ben̄ naa, mine blu naa; ni scagaa niina, lo xquiel̄mban to i rlu ganle ne nli xtsiin̄ me quiayūn naa. ³Grē zha ne sca rzac nlid Dios pxeel̄ naa, rzac zho peet raguiald̄ naa, gacnan̄ zho ganle: ⁴¡Raguiald̄ naaw gon! Ni grēragaa zha ne rdziungza no xtsiin̄ Dios, rioguiald̄ no gneedz to ncuane yquiin no, gneedz to zaatne gbiaaz no. ⁵Tel̄ naa, haxta raguiald̄

yquianie naa tib men̄ wnaa ne gac tsieel naa, ine sēnie naa me zigne run̄ grēraa zha ne rdziungza no dziin rii, zig nac Pedr, zig nacgaa grē zha bets men̄ ne rnabey ne. ⁶¿Te loxaque grop no Bernabé naye znu zhaaque no dziuun̄ no stib dziin, par gdziniaa no ncuane dioow no? ⁷Golgan̄ ganle, zig nac zha ne rzëëb lo xtsiin̄ men̄guib, ¿niacxe zhaa lo dziin ne rdziniaa zho ncuane row zho rio zho lo xtsiin̄ men̄guib? ¿Zha ne rangaa, niacxe rieguiald̄ zho yquiin zho ncuane rac zaatne ran zho? ¿Zha ne na rangaa ma, niacxe rieguiald̄ zho yquiin zho ma zigne racladz zho?

⁸Guiabde to togo bod guicse naa riab mine rne naa nu, golgan̄ ganle haxta lo ley ne psan̄ Moisés ⁹no tib zaatne rnee: “Zeene guncun̄ to xcon to dziin gzëeni ma mzion zhobxtil gacmbew, code to guix ro ma, golsaan gow ma mine ygaa ro ma.” Golwi ganle zha rnee Dios, nana pe nan̄ to ngonse rquia zdoo me. ¹⁰Lēda gon, grēse ne rquia zdoo me ne. Ga rlu me ganle, zha ne run̄ xtsiin̄ me, ible rieguiald̄ zho ycaa zho mine non xtsiin̄ zho. Zig nacaque guielgon, zigtaa zha ne rana, zigtagaa zha ne run̄mbe grē guiel̄nzaac co, ible rieguiald̄ zho yquiin zhow. ¹¹Tel̄ no, rrieequia nazho tib gon i bdziuun̄ no biadseed no to Xtiidz Dios, ¿niacxe rioguiald̄ no dzigo gneedz to ncuane yquiin no?

¹²Blalaa zha ne nale griin̄ riaadted lo to i, rnabey zho to rdeed to ncuane rquiin zho, ¿pe lel̄ no dzigo rioguiald̄ gnaba lo to? Mazdraa gon̄ rioguiald̄ no gnab now, per haxta lo nadze gard dziuun̄ no min co, notaa nan̄ zha rdziniaa no ncuane rdioow no; zeena guiaand̄ zdoo to, lozh ga laa to csaan mine nac Xtiidz Dios. ¹³Led nanle to ganle, grē zha ne run̄ dziin len̄ xyadoo Dios, psan̄ me didz grē ncuane nac gon, ga xen̄ zho pe yquiin zho, zig nac zha ne run̄ dziin zaatne nac lo pcoog, lo ncuane rielogon

miech ga, ga rdioob ncuaaṅe row zho. ¹⁴Ni scaquegaa psan̄ Jesús diidz, zha ne cseed miech Xtiidz me, ib none lo dziin co gdziniaa zho pe yquiin zho. ¹⁵Per tel̄ naa gon̄, wlaṭaa peet gard gnab naa lo miech.

Laa naa rzet min̄ rii lo to, per guiabde to togo run̄ naaw parne csilo to pe gneedz to lo naa. Ib zanaḷd naa min̄ co, sac rley naa znu quiayazhd̄ naa quiayun̄ naa xtsiin̄ Jesús, mazd maase guetgbin̄ naa, lèdle ctiche zho guieḷbley rii lo naa. ¹⁶Niicle ne znu quiayazhd̄ naa quiayun̄ naa dziin rii, per ni lalnu racniatsd̄ naa, sacne ible laa Dios bzo naa par gne naa Xtiidz me lo miech; ni, ḷprobsaxe naa tel̄ne gned naaw! ¹⁷Noyund̄ naaw par dien̄ pe premio yгаа naa, sac zig rne naa ga Dios bzo naa, me rnabey naa quiayun̄ naaw, masaque nacse naa zig tib ngundziin̄. ¹⁸Par naa, lèele premio nu nac guieḷbley rii ne znu liga quiaseed naa miech Xtiidz Dios, rnabd̄ naa gneedzpaā zho ncuaaṅe yquiin naa niicle ne raguiaḷ naa gnab naaw.

Tsoxco zho yгаа zho premio

¹⁹Stiba mazdragaa wena, znu choot noneedzd̄ ncuaaṅe yquiin naa, sac sca grielod cho gnabey naa; per niicle ne nagon̄ choot rnabeyd̄ naa, zhaal naa rac naa zig tib ngundziin̄ lo grèse miech, parne gdeeda diidz tso guic zho sèeb̄ zho xnèz Jesús. ²⁰Gacxe waa zeene no naa lo grè zha Israel, rac naa zigne rac zho, zeena tso guic zho gliladz zho cho nac Jesús. Zeene nogaa naa lo grè zha ne zienaḷ xley zha Israel, niicle ne rnalodraa naa ley, per run̄ naa grè ley ne zienaḷ zho, zeena sca grielo yquiabladz zho sèeb̄ zho xnèz Jesús. ²¹Scaquegaa zeene no naa lo grè zha ne run̄beyd̄ ley co, rioxco naa rac naa zig tib zha ne run̄beyda; per guiabd̄ ne togo haxta grè ncuaaṅe rleyniedraa Dios run̄ naa. Laa naa run̄ min̄ co, zeena ye zho sèeb̄ xnèz Jesús.

²²Grè zha ne pense quiayacnaṅ zha nac Xtiidz Dios, zeene no naa lo zho, run̄d naa gne naa grè ncuaaṅe gard guien̄ zho zha nac, run̄d naa csan̄win naa zho, sac mine rioxco naa lozh gliladz zho cho nac Dios. Tib tib miech, rguib naa rac naa zigne rac zho, parne grielo gzodiidz naa lo zho cho nac Jesús, zeena gacnaṅ zho zha sèeb̄ zho xnèz Dios. ²³Laa naa run̄ min̄ co, parne gdeeda diidz gnee naa Xtiidz Dios grèse lo miech, ni scagaa, gley naa gan̄ naa ye zho yгаа lo guieḷndzon ne zhobnee lo Xtiidz Dios.

²⁴Naṅle to gan̄le zha rzac zha ne rie tib lo corr, nzian zho nac zha ne rie per tibaque zha ne run̄ gan̄, zha co rcaa tib premio. Golgun̄ cuent nasca tib lo corr i no to, grèse to goltsoxco xoon̄ to zeena grèse to yгаа tib premio. ²⁵Grè zha ne sca rio tib lo wguīt, par grielo gun̄ zho gan̄ rioxco zho ran̄ zho xcuerp zho, run̄d zho ncuaaṅe csiaab xfuers zho. Nroob cuidad ne rap zho zho par gun̄ zho gan̄ tib coron guizh nguia ne znuse rgool̄. Scase nac premio ne rгаа zho, sangue ne gon̄, laa ne noxco yгаа ne tib premio ne gdziṅd̄ dze nitlo. ²⁶Gacxe waa, tel̄ naa tibaque noxco naa dien̄ zha xoon̄raa naa. Nan̄paa naa pa gdziṅ naa, nacd̄ naa zig zha ne riend̄ dien̄ pa gdziṅ, zha ne lega rquiaagaa puñet, rdeete zhow zaatne no yгааaw. ²⁷Ni lalnu rdete naa diidz gac mine racladztaā xcuerp naa, tibaque rnabey naaw parne guien̄a ncuaaṅe nonguieḷ min̄ co none guna, led gunda ncuaaṅe racladztaaw. Laa naa run̄ min̄ co zeena gun̄ naa gan̄, sac gon̄, guieḷtodox ga grieequia naa znu no naa none naa lo miech zha gun̄ zho, ni tel̄ lozh ga naapaze biaan̄ bend̄ naa gan̄.

Nodne gleynie miech mdio

10 Bets, bzian, golsoladz gan̄le zha bzhaac grè pxozgol ne zha ne sca bzènie Moisés ga. Pxeeḷ Dios tib xcow beṅ ncal zaatne zieetaa zho, ni

pteed me zho lo Nisdoo Nizhnie. ²Zig-taa lo xcow cow, zigtaa lo nisdoo cow, masaque rrieequia lo co brobnis zho, parne tibaque niac zho niacnie zho Moisés.

³Grëse zho gon milagr nroob ne been Dios, bnabey me bliiaal quietxtil zhan gbaa bdeed me dow zho, ⁴beencta me nis tib cho quie bdeed me go zho no zho dan bidz co. Lëële Jesús ga bdeed nis co go zho. Lo zho ga zo me, rrieequia me ga nac quie ne bda nis go zho, sac mese rzhixcuaa lo grëtaa xli-aadz miech. ⁵Niicle scataa gon Dios zho, per led grëd zho bioxco nion xtiidz me, nacne ndal zho bnitlo bioliuse zho dan co. ⁶Gase na ganle gotsaa gwi ne zha bzhaac zho, zeena gzoobladzd ne dziuun ne grë ncuaane ndzinlid ne been zho. ⁷Golguien gleyniede to mdio, zigne been zho. Rnee lo Xtiidz Dios: “Blozhse dow zho, go zho, laa zho psilo biee lo zhimdio zho.”

⁸Gotsaa gwi ne ganle, pe guieinë ne bgaa zho zeene brieequia bla zho lega bionie wnaa, tib dzeque bnabey Dios gut galptson mil zho. ¡Ni lalnu tsod guic to gun to min co! ⁹Ib gunglëëde to Dios, sac zha, zeene benngulëë zho me, bnabey me brieequia grë meel pquiaa maw zho, ndal zho gut. ¹⁰Niicle glisquidgaa to tel pe nac mine quiayun me, sac tel zha, sca been palal zho; nacne pxeelaque me anjl ne rnitlo, ndal zho bnitlo anjl co. ¹¹Sca nagon bzhaac grë pxoz gol ne ga, gotsaa guien ne sca dziuund ne mine been zho, mine been zho ga laaw zhobnee lo Xtiidz Dios parne gacndion new, guien ne zaacse gban ne, ne nac ne miech ne mban len dze rii ne znu ziaadyoble nitlo guidzliu.

¹²Gacxe waa, zha ne rzac mbanpaa zho zigne racladz Dios, none nsin so zho zeena gund zho ncuaane gunctal xtol zho. ¹³Nli no ncuaane rcheep ne gunctal ne xtol ne, per nacda ncuaane griin rien.

Pe zhidaa miech ne zieded lo min co. Tsod mine guiab ne ib lëbd ne griee ne lo. Mine naca none gnalo ne Dios, sac tel me ib csaand me guiab ne tib lo ncuaane glëbd ne griee ne; sca nac xtiidz me, ni mesi gon ctsëed me mine rnee me. Me nac men ne gacnie ne griecelo griee ne low.

¹⁴Bets, bzian, golguien sca ib none csaan to grë mdio, gnalodraa tow. ¹⁵Miech nixbiini nac to, grë mine me naa lo to nu, nan to ganle ncuaane rquina. ¹⁶Golwi ganle, zeene rdioow ne guietxtil, rdio ne vin, rdziuun ne xtsee ne been Jesús ga, ga rlu tipse nac ne grë ne nacnie ne me. ¹⁷Niicle ne ndal nac ne, per ne tibaque guietxtil ne rdioow ne, min co gane tibaque cuerp nac ne grë ne, ni lëë xcuerp Jesús ga. ¹⁸Scaque zha Israel, zeene row zho xpëel ma ne riogon lo Dios, ga rlu zho ne nacnie zho me.

¹⁹Zha ne rmalogaa mdio, zeene row zho grë ncuaane riogon lo mdio, scaque tibaque rac zho grë zho mdio. Per guiabde to togo mban mdio, togo mazdragaa nac bëel ne rgogon zho lo mdio. ²⁰Mine racladz naa guien to, zeene sca run grë miech pe rgogon zho lo grë mdio, lo mendox ga rgogon zhow, led lo Diosda. Golguien sca, ib tsiesëebde to lo grë zha ne quiayownie mdio, zeena gacniede to mendox. ²¹Lëdraaw ga gon gun to, tel rlozhse rquiin to xtsee ne psan Jesús diidz ga dziuun ne, ni tsieque to tsieque to, tsietow to zaatne rownie zho mendox. ²²¡Guncade to, gunglëëde to Dios! ¡Golguien ganle, lëbd ne dzian ne xquielblëë me!

Zha gun zha ne riladzle Jesús

²³Zig rne naa ga: “Nli zac gun ne ncuaane gacladztaa ne, per led grëda nonguiel.” Tel naa, zriecelo gun naa ncuaane gacladztaa naa, per led grëda yquiin par gun naa xyudar grëraa zha bets ne, lozh tsoguc zho Xtiidz Dios;

²⁴ sac gon, ib none dzioxcō ne grēraa zha ne nacgrē ne. ²⁵ Zig nac grē bēēl ne rdo lo lgui, zac gow tow, ib gunde to gnabdidz to diēn zha naca, sac gon nend bēēl ne biogon lo mdiow, dzigo laa dzeb co tsonie guic to. ²⁶ Golguien ganle, Dios psan guidzliu, scagaa grētaa ncuaañe no low chen me naca.

²⁷ Zeene tel zha tsiegaa to tib wagw lidz tib zha ne gard gliladz Jesús, bēēl ne gneedztaa zho golgowa, per scaque gnabdiidzde to diēn zha naca; zeena peet dzeb tsonied zdoo to. ²⁸ Per telne grieequia tib zha ne gnē bēēl ne biogon lo mdiow, gowde tow; zeena csande to zdoo zho. ²⁹ Niicle ne ndionpaa ne led dōld ga gun to gow tow, per zha ne gana ga sadol zdoo zho.

Nana gnē to: “¿Pe nac dzigo por stib zho grieelod gun naa minē racladz naa? ³⁰ Tel rded naa xquizh lo Dios zeene pe tib guielwagw ne rquiin naa, ¿pe nac dzigo por minē rzacse stib zho, grieelod gow naaw?” ³¹ Golguien ganle, racda por zha cose; sac grēse ncuaañe dziuun ne, haxta ncuaañe dioow new, ncuaañe dio new, none zeene nodziuun new cxobnen ne ganle pa lotaa men nroob nac Dios. ³² Gotsaa guien ne sca ganle dziuund ne ncuaañe yquiaaqui csan ne zdoo stib miech, zigtaa zha Israela, zha stib guiedza, zha ne nolegaa xnēz Diosa. ³³ Tel naa, zanałd naa ncuaañe gdziladz naa naase, sinque rioxco naa grētaa ncuaañe run naa, run naaw par gacnie naa grēse miech, zeena grielo tso guic zho gnab zho lo Dios csilaa me zho lo xtol zho.

11 Golwi sca, zigne ran to noxcō naa mban naa zigne blu Jesús, scaquegaa to gołtsoxcō gban to zigne ran to mban naa.

² Bets, bzian, rleynie naa to gon sac tibaque rsoladz to naa, ni rioxco to zianał to grē minē pseed naa to. ³ Per gołsoladz ganle: grēse men wnaa, none

zha bgui gnabey lo zho, tel zha bgui Jesús rnabey lo zho, zigne rnabey Dios lo me. ⁴ Gacxe waa, tel tib zha bgui yase nozodiidznie zho Dios, quiateedgaa zho xtiidz me, ni zob xombrel zho; xquielto Jesús ga rbee zho. ⁵ Scagaa men wnaa, tel zhoobd bay guic zho ni zo zho nozodiidznie zho Dios, quiateedgaa zho xtiidz me, xquielto mgui ga rbee zho; sac ga rlu zho rond zho minē rnabey mgui. ⁶ Telne racladzdgaa zho gdze lad guic zho, mazd gnabey zho chug guitsguic zho. Laa telne rtoladz zho chuga, rtoladz zho gacruxa, dzigo mazd cxobguic zho xpay zho.

⁷ Grē zha bgui, nod pe nacne gdze lad guic zho, sac choot samiech guidzliu zho rnabeyd lo zho. Zeene bzaa Dios mgui, bzaa me zho zigne nac me, zeena glu zho ganle pa lotaa men non nac me; scagaa wnaa, laa wnaa biaan par glu zho ganle non mgui. ⁸ Gotsaa gwi ne ganle, letxe xcuxtid wnaa waa biao mgui, sinque xcuxti mgui briece biao wnaa. ⁹ Stiba, zeene psan Dios wnaa, ib laa me psan zho par gacnie zho mgui. ¹⁰ Gacxe nagon waa ib none gdze lad guic wnaa, zeena glu ganle nguzobdiidz zho lo zha ne rnabey zho; haxta grē anł ne no gbaa zley zho gan zho min co.

¹¹ Per guiabde to togo peet nond wnaa, gołsoladz ganle psanle Dios diidz zigtaa mguiw, zigtaa wnaaw rquinlsa zho; sac telne guiend wnaa guiend mgui, telne guiendgaa mgui guiend wnaa. ¹² Gotsaa gwi ne ganle, zeene biao wnaa cho mgui briece dzit ne biao wnaa, per zeene laa wnaa biaan, haxta lo nadze wnaale rzo mgui; zigtaa mguiw, zigtaa wnaaw Dios psan zho grop zho. ¹³ ¿To nadien zha rzac to? ¿Pe nli nonguiela gdze lad guic wnaa zeene nonab zho lo Dios, te nonguielda ye? ¹⁴ Golwi ganle ib no gdze guic wnaa, biaanle zho roob guits guic zho parne ctsew lad guic zho; ¹⁵ tel zha, haxta rleynie zhow zeene scataa noola,

sangue ne nac ne zha bgui, guiełtow ga guiool guitsguic ne. ¹⁶Teł nogaa zha ne rzac led scada, maase gnee zho. Per ible znu gon noseed no miech, ni grëragaa zha ne rlıladzle Xtıdz Dios, rien zho ne nli scaw.

Zha none gac xtsee ne psan Jesús

¹⁷Bets, bzian, ne nligaa rley naa tıbaque rsoladz to naa, per bin naa zeene rcaalsa to row to xtsee ne psan Jesús diıdz, laa ne gley to ycaalsa to, leł quıayunctal to xtol to. Mıncosi nagon ni lalnu rıod zdoo naaw. ¹⁸Zıyon naa gzobtaa zeene rcaalsa to, pe na tsıegald tıłdıdz to, laa ne tıpse gac to leł rlëelsa to. Ni rgobey naa nli scaw. ¹⁹Rien naa masaque rzac to ible sca none gac to, parne glupaa cho nac zha ne non xtıdz, zeena guıannziuu zho lo miech.

²⁰Led zhıxtseedraa Jesús i gon run to. ²¹Sac ron naa zeene laa to row, masaque lëelëd rac to row to ncuaañe zıenie to, ıb rwide to no zha ne rdzın ga quıanıed zho nroob ncuaañe gow zho. Squı rzob to rowcho to, haxta rzudz to; laa zha mbanse rac zho gıeelod gow zho ncuaañe row to. ²²ıMod guıend lıdz to, ga sob to gow to, guıe to haxta zaatne guıeltaa to, led node to runctoladz to zha ne squı guıend pe yquıın? I gon rlu to rleyñıede to grë zha ne no xnëz Dios. ıNi palal gon rdzıguıend naa ncuaañe noyun to i!

²³Golşoladz ganle zha nac ne laa xtsee rıı bıaan, Jesús psan diıdz gaca, sca gocnan naaw ni scagaa bıallu naaw lo to. Wdze ne bnaaz zho Jesús ga, zeene blozh dowxtseenıe me xpëedsuel me, bzhen me tib guıetxtil, bdeed me xquızh lo Dios; ²⁴blozhse bdeed me xquızh, nzıan lë been me guıetxtil co, bdeed mew lo zho rëb me: “Golşııına, rııeequia lëë xcuerp naa nu, sac gon znu gon zho xcuerp naa parne csılaa naa to grë to.

Golgun xtsee rıı, parne glu to ganle tıbaque rsoladz to naa.”

²⁵Blozh ga, scaque bzhen me tib cop no vin, rëb me lo zho: “Lëë stıb trat cub nu gon rıaan Dios grë me miech, rııeequia xchen naa nu nac vin rıı, ren ne tso sell trat co par glu nona. Gzataa zeene znu guıe to vin, golşoladz ganle zha naca.”

²⁶Golguıen sca, zeene guntaa to xtsee co zaacse golşuna, sac gon, ga quıaxobnen to lo miech Jesús nac meñ ne gut xcuent to, psılaa me to. Tıbaque none gun to xtsee co, haxta gdzın dze ne laa me guıaad stıb.

²⁷Gacxe waa, zha ne rıenıewgıt guıe rquıınd zho xtsee co zıgne no yquıın zhow, dol nroob ga run zho, xcuerp Jesús ga, xchen me ga noguıtne zho.

²⁸Zeene gun to xtsee co, none wen wen sob to ganle zha naca, pe nacne laaw rac, dzıgo lozh ga zac yquıın tow. ²⁹Sac gon zha ne lega gow guıetxtil co, lega guıe zho vin co, sac zhow zıg beelze pe xtsee; rııeequia guıelnë ne ygaa zho ga gow zho, guıelnë co ga guıe zho.

³⁰Mıncocxe waa, blactaa zha ne nacgrë to i quıayaan nsıs, nogaa zho rzacnële, haxta nzıan zho gutle.

³¹Tełne nıaca mıne wen wen gwı ne ganle zha nac xtsee co, tsod pe nacne pe guıelnë ne cxeel Dios dzıan ne. ³²Nı zeene sca-gaa rteed me ne tib caxtıgw, laaw run me parne tsa ne bııni gbııre gbig ne lo me, zeena led yed ne nıto gal dze ne nıto grëraa miech ne zıenañ ncuaañe lo guıdzlıu rıı. ³³Bets, bzıan, golguıen sca zeene ycaalsa to gun to xtsee co, golcuëz grëraa zha ne nacgrë to dzıgo tıpse golşılo golşııına. ³⁴Teł zha ne rıen-gaa lëbd zho lozh gdzın grëraa zha ne nacgrë zho, mazd gowgazh zho lıdz zho, zeena yguııbd zho ygaa zho guıelnë co.

No spalal mıne racladz naa gacnan to, per naa zeene guıal naa nëz quı dzıgo gne naaw lo to.

Guiełbiini ne rdeed Espíritu Sant

12 Bets, bzian, nugaa na ganle laa naa gzet zha nac guiełbiini ne needz Espíritu Sant, sac racladz naa wen wen guieł to zha naca. ²Rsoladz to ganle zeene gard gliladz to Xtiidz Dios, nêzrii nêzrec bio to güeygan to stib stib grê mdio, ncuaane ni tib lan diidz rneed; sanque Dios ne riladz to niina, led scad nac me. ³Per nsin gołso dieł cho nac zha ne noteedpaa xtiidz me, sac nzian zha ne rnee xtiidz Espíritu Sant noteed zho lo miech, per tel rzo zho rdzibdee zho Jesús, ga rlu rquidie zho. Sac zha ne nli nacie Espíritu Sant, rdzibdeed zho Jesús, sinque rlu zho ne me rnabey zho, ni haxta dib zdoo zho rnee zhow.

⁴Tib tib zha ne riladz Jesús, zhaase zhaase nac guiełbiini ne rгаа zho, per tibaque men ne rdeeda, lëe men co nac Espíritu Sant. ⁵Nzian mod zrieelo dzi-uun ne dziin lo Jesús, per grêse ne me rnabey ne. ⁶Tib tib ne zhaase zhaase mod ne rlu Dios nacie me ne, per grêse ne me nac men ne rlu zha dziuun ne xtsiin me.

⁷Guiełbiini ne needz Espíritu Sant lo ne tib tib ne, laaw needz me parne dzi-uunlsa ne xyudar grê zha ne nacgrê ne gacndionraa ne zha racladz Dios.

⁸No lo zho rdeed me guiełbiini rien zho zha cso zho diidz lo miech,

no lo zho rdeed me guiełbiini rseed zho grê ncuaane ngan ni rlu zhow lo miech.

⁹No lo zho rdeed me guiełbiini dib zdoo zho rnalo zho Dios, niicle ncuaane mazdraa ngan rnab zho lo me, raca.

No lo zho rdeed me guiełbiini zeene rnab zho lo Dios, riac grê men rzacnë.

¹⁰No lo zho rdeed me guiełbiini rnab zho lo Dios rac grê milagr,

no lo zho rdeed me guiełbiini rteed zho xtiidz Dios lo miech,

no lo zho rdeed me guiełbiini rien zho cho nac zha ne nlipaa nacie me, cho zhagaa nacie mendox.

No lo zho rdeed me guiełbiini rnee zho stib diidz ne gard cseed zho,

no lo zho rdeed me guiełbiini rien zho pe rnee zha ne rnee diidz co, dzigo rnee zhow.

¹¹Grêse guiełbiini, Espíritu Sant rdeeda, ni me nan pa mine needz me lo ne tib tib ne. ¹²Lo grêse ne ne nac ne zha ne no xnêz Jesús, rrieequia xcuerp me nac ne. Tel cuerp, niicle ne nzian part niaaw, per tibaque naca. ¹³Ndal miech ne nac xcuerp me, no zho nac zha Israel, no zho nac zha zit, lo grê zho no zho ngadoo lo ben, nogaa zho zonlaa, per grêse ne tibaque Espíritu ne nacie ne, sac tibaque Espíritu bgaa ne zeene brobnis ne.

¹⁴Gotsaa gwi ne ganle, no ni ne, no nia ne, no diag ne, nzian lë niaa xcuerp ne, per tibaque naca. ¹⁵Gacxe waa telne niaca mine rnee ni ne, grieelod guiaba porne nacda nia ne, nacda xcuerp ne.

¹⁶Scaque diag ne, grieelod guiaba porne nacda bziaalo ne led yedraaw nac xcuerp ne. ¹⁷Sac telne niaca mine gdipse xcuerp ne niaa bziaalo ne, ¿zha nadien gon ne? Telne gdipsegaa xcuerp ne niaa diag ne, ¿zha gzoobzhi ne?

¹⁸Lëezhe wen led scad psan Dios xcuerp ne, sinque grêse part ne niaaw bzaa mew zigne go-cladz me, psanse mew zaatne rquiina tib tiba. ¹⁹Sac telne tipse niaa grêse part ne nac xcuerp ne, ¿zhazhe rlu ncuaan co!

²⁰Gocda sca, sinque zhaase zhaase nac tib tib part co, per grêsew tibaque cuerp naca. ²¹Gacxe waa grieelod guiab bziaalo ne lo nia ne: “Ib rquiind naa luu”;

guiaabgaa guic ne lo ni ne: “Ni lalnu rquiind naa to.” ²²Grêse part ne niaa xcuerp ne nose zaatne rquiina, haxta mine mazdraa nda lëe min co rquiinraa.

²³Stiba, no part ne niaa xcuerp ne rzac ne zhi nona, no part haxta rtoladznie

ne, per gotsaa gwi ne ganle part co nac zaatne ranraa ne, rioxcoraa ne rdze; ²⁴sangué part ne nziuu lo ne, zienied guic ne dien zha gdzew. Ible sca psan Dios xcuerp ne, zeena sca gacnon part ne rzac ne zhi non. ²⁵Sca niaa xcuerp ne, grése part ne niaaw rquiinsaw xcompañera; led yeda rtsolsa. ²⁶Golwi ganle, zeene nē tib part xcuerp ne, grése part ne niaaraaw zienie nē co; scaquegaa zeene rdioon tib part co grēsew zienie guielb-ley co.

²⁷Laa naa rne min rii lo to, sac racladz naa guien to sca none tipse gac to. Golguien ganle xcuerp Jesús i nac to grē to, tib tib part ne niaa cuerp co i nac to, rquiinsa to zha ne nacgrē to. ²⁸Ni zigne sca tib tib part ne niaa cuerp nose zaatne rquiina, scaquegaa grése zha ne no xnēz me, bzose Dios zho pe nac dziin ne gun zho:

no zho rienee xtiidz me lo miech,
no zho rteed xtiidz me lo miech,
no zho rseed miech xtiidz me,
no zho rnab lo me rac grē milagr nroob,
no zho rnab lo me riac men rzacnē,
no zho rioxco run xyudar grē miech,
no zho rzo rac zho zha rnabey,
nogaa zho rnee grē diidz ne gard cseed zho.

²⁹Golgan ganle, psod me zho grése zho tsienee xtiidz me lo miech, grése zho cteed xtiidz me, grése zho cseed miech xtiidz me, grēsegaa zho gnab gac milagr. ³⁰Niicle psodgaa me zho grése zho gnab guiac men rzacnē, grése zho gnee stib diidz, grēsegaa zho gnee zha nac grē diidz co. ³¹Zhaase zhaase nac guielbiini ne rgaa tib tib zha ne no xnēz me, per goltsoxco ygaa to guielbiini ne mazdraa rquiin.

Sca nagon naca, per golquiaadiaga ganle, nu laa naa gzet lo to stib mine mazdraa non lo grē guielbiini rii.

Guiełwleynie

13 Mine mazdraa rquiin gon nac ne gleynie ne samiech ne. Teł niaca mine bgaa naa guielbiini rne naa grē lose diidz ne rnee miech, haxta grē diidz ne rnee xanjł Dios rne naa, ni teł rleynied naa samiech naa, ɷpa dien rquiin rac naa grētaa diidz co? Rrieequia nac naa ga zig tib lē guib ne loxaque rzedz.

²Teł niaca mine rteed naa xtiidz Dios lo miech, rien naa pe nac mine naraa cxobnen me, grése wseed ne no rien naa, ni rleynied naa samiech naa, ɷpaat rquiinda! Teł dib zdoogaa naa rnalo naa Dios, haxta ncuaane mazdraa ngan rnab naa run mew, ni rleynied naa samiech naa, ɷpeet nonda!

³Teł quiizgaa naa grē ncuaane quianie naa lo grē zha ne guien pe yquiin, haxta gded naa naa tsec naa, per teł rleynied naa samiech naa, ɷzhlēse ga gun naa min co!

⁴Sac gon zha ne nli mban zigne nac guiełwleynie co:

riednied zho samiech zho,
wen rac zho lo samiech zho,
racnēd zdoos zho, niicle ran zho wenraa
noded stib miech lo zho,
rund zho ne lēēque zha gunnon zho,
racniatsd zho lo samiech zho,
⁵rund zho ncuaane coguelnē zho,
gunglēēgaa zho samiech zho,
zianald zho ne tebaa lose zho yquiin grē
pe cos,

nacd zho zha ne lega zolēē,
rapguelnēd zho samiech zho,
⁶ni lalnu riod zdoos zho mine run zha ne
rsacsi samiech,
mine rleynie zho nac diidzli.

⁷Zha ne nli rleynie samiech, ni lalnu peet grielod yca gleynie zho zho; rquiaadiag zho mine rnee zha co, rzhidznied zho zho; tibaque rquiabladz zho wen grieequia zho, rsaand zho zho, tibaque racnie zho zho.

⁸Zdzin dze yquiindraa cho cteed xtiidz Dios lo miech, yquiindraa gnee zho stib diidz, yquiindraa grē guielrac, sangue guielwleynie gdzind dze ne nitlow. ⁹Niicle ne nogaa ne guielbiini ne rneedz Espiritu Sant, niicle no zha ne rien zha gnee zho Xtiidz Dios lo miech, per palalse nac ncuaaņe rien ne niina. ¹⁰Sangue gal dze ne laa Dios lozh gzhix-cuaa ne zigne no gac ne, grēse guielbiini ne rdziaap ne niina, paat yquiindraaw.

¹¹Masaque nac ne niina zig tib mēēd-las. Tel naa, zeene goc naa mēēd-las grēse ncuaaņe bne naa, grēse ncuaaņe bien naa, grēse ncuaaņe pseed naa, grēse ncuaaņ co ben naaw zigne run grēraa mēēd-las. Per zeene laa naa broob, laa naa baa biini, grēse ncuaaņ co laa naa bienpaa zha naca; laa guielmēēd-las co bded. ¹²Scadaa nagon rziac ne niina, palalse rien ne zha nac Dios, rriequia rdzianse ne me niina zigne ran ne zhimlē ne lo beelze pe tib lē vidr; per zdzin dze laa ne dzianlo me zigne nacpaa me. Palalse ndion ne niina zha nac me, palalse rsilo rdzian ne me, per gal dze co laa ne dziuunbeypaa me zigne runbey me ne niina, nanpaa me zha nac zdoo ne tib tib ne.

¹³Golgacnan sca ganle, grē guielbiini co zdzin dze ne yquiindraaw, sangue ne znu: dib zdoo ne rnalo ne Dios, noniepaa guic ne zac miņe rnee me, ni rleynie ne samiech ne, lozhda. Per lo gza tsona nagon, guielwleynie co nac miņe gdzind dze ne gdzē.

Zha ne rnee stib diidz

14 Laa to nanle pa miņ nac miņe mazdraa non, igolleynie samiech to sca! Per scagaa goľnab yгаа to guielbiini ne rneedz Espiritu Sant. Zig nac guielbiini ne rgaa zha ne rteed xtiidz Dios lo miech, goľnab yгаа to miņ co zeena sca grielo cseed to miech xtiidz me.

²Sac tel zha ne rgaa guielbiini rnee zho stib diidz, zeene rnee zho diidz co choot rien dien pew, sac lo Dios ga rnee zho. Tel pe nac miņe rnee zho ga, Espiritu Sant rsiaaba guic zho, per choot racnand dien zha naca. ³Sangue zha ne rgaa guielbiini rteed zho xtiidz Dios lo miech, miņe rnee zho ga rqiina par tsoquicraa miech zha racladz me, par guien zho pe nonguiel gun zho, ni rchooblada zdoo zho.

⁴Tib zha ne sca rnee stib diidz, lose zho rquiin guielbiini co, sac zhase riogucraa zha racladz Dios; sangue zha ne rteed xtiidz me, diidz ne rnee zho rquiina lo grēraa zha ne no xnēz me, grēse zho riogucraa zha racladz me. ⁵Wena tebaa grēse to yгаа guielbiini co gnee to stib diidz, per mazdraa gon wena cteed to xtiidz Dios lo miech, cseed to miech xtiidz me; sac miņ co mazdraa rquiin, lēdle gnee to stib diidz. Zacaqueгаа gnee to stib diidz co, totsaque lozhse gnee tow, gneegazhaque to dien zha naca; zeena sca yquiina lo grēraa zha ne no xnēz Dios. ⁶Bets, bzian, to gase nadien, tel niaca miņe glanso naa lo to i csilo naa gne naa stib diidz, ĩpa dien yquiina lo to? Per tel glanso naa, iņe csilo naa clar gne naa lo to pe nac miņe zinee Dios lo naa, pe nac grē miņe rien naa, pe nac miņe ziaadyob gac, zha nac grē miņe zhobnee lo Xtiidz Dios, led grēse miņ co zien to zha naca, ni squina lo to grēse to.

⁷Haxta grē ncuaaņe rool miech, zig nac bzie zig nacгаа vihuel, tel csilo zha ne noyoolā tel zhataa gool zhow, ĩzha dien guien miech pa di noyool zho? ⁸Zig nacгаа zha ne rcuedz cornet lo menguiib, telne tel zhataa ycuedz zhow, ĩzha dien gacnan menguiib pe nac vis ne quiayun zho? ⁹Scadaa nagon run to zeene rnee to stib diidz lo miech, ĩzha nadien guien zho pe nonee to? Rriequia lo mese ga rnee to. ¹⁰Zig nac lo guidzliu ndal lo diidz rnee miech, per tib

tiba nose mod ne rnee zhow, nose zha ne riena. ¹¹ Telne guiaad tib zho lo naa csilo zho gnee zho, ni rienḁ naa pe quianee zho, grieelod guienḁ naa pe racladz zho, guienḁgaa zho zha rzaac naa.

¹² Nana sca, zha ne rquiabladz yгаа guielḁbiini ne rneedz Espiritu Sant, gnab zho yгаа zho miḁe grieelo yquini lo grēraa zha ne nacgrē zho, zeēna grē zho tsoguc zha racladz Dios gban zho.

¹³ Gacxe nagonḁ waa, zha ne rnee stib diidz, none gnab zho gdeed Espiritu Sant guielḁbiini lo zho guienḁ zho pe nac grē didz co, parne gnee zhow lo miech; ¹⁴ sac zha ne sca rnee stib diidz, tel so zho gnab zho lo Dios, rienḁ zho pe nonab zho, loxaque zhiespirituse zho quianee ga. ¹⁵ Gacxe waa zeēne gnab ne lo Dios, zeēne goolḁnegaa ne me, zac gnee ne stib diidz, per scagaa none gnee ne diidz ne rienḁ ne, miḁe rienḁgaa grēraa miech.

¹⁶ Sac gonḁ tel stib diidz nonee ne noyoolḁnie ne Dios, nodeed ne xquizh lo me, ḁzha dienḁ yquiab grēraa zha ne ndxie ni rienḁ zho pe rnee ne? ¹⁷ Niicle ne ndzon sca nodeed ne xquizh lo Dios, per zha ne noquiaadiaga ga, paat yquiinda lo zho.

¹⁸ Xquizh Dios, tel naa ye naa rne stib diidz, ni mazdraa gonḁ rne naaw que zha ne rneew lo to i, ¹⁹ per zeēne zo naa zatne ndxie grē zha ne noquiaadiag Xtiidz Dios runḁ naa ne gnee naa stib didz, sinque rne naa miḁe guienḁ zho. Rienḁ naa wenraaw gne naa maase gaayaque lan diidz, per miḁe guienḁ zho, lēdle so naa gne naa tsii mil diidz, ncuaaḁne ni tib choot guienḁ.

²⁰ Bets, bzian, golḁguienḁ sca golḁsaan guielḁmēēdlas qui. Zacgaa gac to mēēdlas per nēz lo guielḁntseeba, sangue xpensar to golḁgac zig zha ne biaa biinile.

²¹ Gotsaa gwi ne ganḁle zha nac stib didz. Zhobnee lo Xtiidz Dios rēb me, laa me cxeelḁ miech stib dan miech ne rnee stib diidz, par gnee zho lo zha Israel; per niicle tsienee zha co, ib guienḁ zhow.

²² Gase naganḁle rlu rquiind stib diidz co par grē zha ne rnalole Dios, sinque laaw rquiin parne grē zha ne nod xnēz me ganḁ zho ganḁle nli no me. Zha ne nole xnēz me, zha co rquiin gon zho pe nac miḁe racladz me gacnaḁ zho, pe nac miḁe zhobnee lo Xtiidz me. ²³ Per niicle scaw, telne zob bla zha ne sca gard gliladz Xtiidz me, zobgaa bla zha ne pense rsilo rquiaadiaga, ni csilo to gnee to stib didz, zeēne ganḁ zhow lēētaa miḁe guiab zho rzhinḁle guic to sca rac to. ²⁴ Laa telne grēse to no noteed to xtiidz me, nonee to miḁe racladz me gacnaḁ miech, zha ne sca gard gliladz Xtiidz me, zha ne sca pense rsilo rquiaadiaga, zeēne gon zho grētaa miḁe nonee to, haxta ziaa zho biini zienḁ zho ne nli tib miech ngoopdolḁ nac zho. ²⁵ Zigse quianee to laa zdoos zho lozh yguudz, laa zho ted yquitsgzhib zho gnab zho perdon lo Dios; ga guienḁ zho ganḁle ne nli nacie me to.

²⁶ Bets, bzian, golḁguienḁ sca zeēne ycaalsa to cseed to Xtiidz Dios, zigtaa zha ne goolḁ, zha ne cteed xtiidz Diosa, zha ne gnee stib diidza, zha ne gnee-gaa zha nac diidz co, none tsienie guic zho miḁe gonḁ zho ga laaw yquini parne tsogucraa los demas zho zha racladz Dios gban zho. ²⁷ Zeēne gnee zho stib diidz, none choptaa zho, tsontagaa zho gneew. None tibga zho gnee, ni rquiin zole zha ne gnee pe nac diidz co. ²⁸ Laa telne guienḁ zha ne grieelo gnee dienḁ pe naca, nodne gnee zhow; mazd lenḁ zdoose zho gnee zhow, Diosse gon pe nonee zho.

²⁹⁻³⁰ Scaque zha ne cteed xtiidz Dios, choptaa zho, tsontagaa zho gneew, laa grēraa zha ne ndxie none yquiaadiag zho miḁe nonee zho. Telne lēētaque nonee tib zho, ni csiaab Dios guic stib zho gnee, dzigo none cuēz zha ne quianeele ga zeēna grieelo gnee zha co. ³¹ Sca none gaca, none tibga tibga zho gnee, zeēna grēse zha ne ndxie grieelo gon zho dienḁ

pew, parne cseed zho, ni gacnguieelraa zho lo Xtiidz Dios.

³² Zha ne sca rteed xtiidz Dios, none cseed zho gnabey zho zho, cuëz zho nieeda gdziñ hor ne gnee zho. ³³ Sac tel Dios, rdziladzd me guiots gnaaz pe cos, rdziladzd me ncuaane nzhiitni. Mine rdziladz me zaacse gac tib cos, ni scagaa run grëraa zha ne no xnëz me.

³⁴ Ni stiba, zeene sca rcaalsa to, racladz naa guien grë men wnaa dzese sob zho. Nodne so zho ye zho gnee, sac gon mgui rnabey zigne zhubneequé lo Xtiidz Dios. ³⁵ Ncuaane racladz zho gacnan zho, ro yu ga gnabdiidz zhow lo zha bgui, sac gon, rdzieelda lëëpaaze wnaa gnee zaatne rcaalsa to rquiaadiag to Xtiidz Dios. ³⁶ Zaacse sca golgac, golguien ganle grieelod gun to mine notaa guic to, sac gon led loxaque todse nac zha ne runbey Xtiidz Dios, par guiab to zigne racladz to gac tib cos, sca none gaca.

³⁷ Mine rne naa lo to nu xtiidz Dios naca, zha ne rteed xtiidz me lo to i, zha ne rapгаа pe stib guielbiini ne rneedz Espiritu Sant, zha co gunbey ganle nli mine rnabey mew. ³⁸ Zha ne gliladzdgaaw, maase gliladzd zhow.

³⁹ Sca nagon naca. Goltsoxco sca yгаа to guielbiini cteed to xtiidz Dios lo miech, zeena gacnan zho zha racladz Dios gban zho; per scagaa, ib ycade to tel cho zha ne rnee stib diidz. ⁴⁰ Per zigne rne naa ga, grëse mine gun to none zaacse gun tow, tib tiba gacsew hor ne rieguiala.

Brieeban Jesús

15 Bets, bzian, nu laa naa gbire gzet lo to ganle zha nac Xtiidz Dios. Zigne bialseed naa tow, scataque naca; led yeda rdzëë. Lëew ga pcaania to, ni haxta niinagaa rliladz tow. ² Lëew rlu zha grieelo ycaania Dios to, totsaque nli dib zdo to bliladz tow, ni bii lëëgaaw rnalo to.

³ Zeene bial naa lo to i, pseed naa tow zigne pcaaniase naaw. Gocnan to cho nac Jesús, gocnan to por xtol ne gut me lo cruz, zigne zhubneesew lo Xtiidz Dios.

⁴ Gocnan to ganle zeene goc tson ngbidz pqueets zho me laa me brieeban, zigne raquietaquew lo Xtiidz Dios. ⁵ Len dze ne brieebanle me ga, gonlo Pedr me, nicle grëragaa zha ne nacgza Pedr bzënie zho me, gonlo zho me sac güeyted me lo zho. ⁶ Güey me güeyted me zaatne ndxie ndziibsráa gaay gayoo zha ne nole xnëz me, grëse zho gon me; ndal zha co bii mban niina. ⁷ Bded ga gonaque Santiagw me, ni biire güey me lo zha ne bzënie me ga stib; ⁸ goc palal tiempa, lega naclew haxta lo naa brieequia me. Tel naa gon, rrieequia nac naa zig tib mëed ne rzamëed, ⁹ lo grëraa zha ne nac poxtl, ni lalnu peet nond naa, per ni rdzieeld gnee zho naa poxtl; sac gon pa lotaa pt-sidiñ naa grë zha ne gloopaa bzëëb xnëz Dios. ¹⁰ Per xquizh Dios tibaque noxco me naa, bzooblo me naa gane laa naa nac mine nac naa niina. Ni led zhlëdgaa bzooblo me naa, sac gon nroobraa xtsiin me noyun naa lo mine noyun grëraa poxtl; per rned naa togo naase quiayuna, sinque me noyacnie naa rrieelo noyun naaw.

¹¹ Laa naa rzet min rii, per nacda par glu dien cho nroobraa noyun xtsiin me, sac mine mazdraa non nac ne noseed no miech Xtiidz me; lëew biadseed no to, ni bliladzdgaaw tow.

¹² Nana sca, racladz naa gnë to dien zha nacne no bla to i rnee nlid grieeban mengut; led wen wen name gocnan to brieeban Jesús. ¹³ Telne rnee to nlid grieelo grieeban mengut, rrieequia gon rnee to ga nlid brieeban Jesús. ¹⁴ Nana telne brieeban me, paat rquiind mine dzigo noseed no miech nu, zh-lëse znu noteed-xtse ne rnalo ne Dios. ¹⁵⁻¹⁶ Rrieequia noquidiee no miech, sac gon tibaque rnee no lo zho bleeban Dios

Jesús; ni telne nli rrieeband mengut, ye Jesús dzigo bii noliu me niina. ¹⁷ Stiba, telne nliid brieaban me, zhlése dzigo rnalo to me ycaania me to; telne nliid brieaban me, scase bii zëëb to grë xtol to. ¹⁸ Grë zha ne bliladz me, zha ne nacle mengut niina, lëë bnitlole zho ga dzigo. ¹⁹ Nana telne loxaque lo guielmban riise nona gnalo ne Jesús, ne dzigo nac miech ne mazdraa nxen.

²⁰ Per gacnan to sca ganle, ¡brieaban Jesús! Me nac men ne glojaa brieaban lo grëraa miech guizhiu ne grieaban.

²¹ Grëse ne ne nac ne miech, ible laa ne none guet; sac laa guielgut biaan por mine been Adán; per niina ne laa Jesús bиаad, por mine been me grëse mengut laa zho none grieaban. ²² Zigne grëse miech ret porne ziaad zho lo xtií Adán, scaquegaa grëse zha ne gbig lo Jesús, zгаа zho tib guielmban ndzon. ²³ Ible sca none gaca, ndion ne ganle laa Jesús brieabanle, ni zeene laa me guiaad, grë zha ne no xnëz me laa zho grieaban.

²⁴ Gal dze co laa me lozh gnitlo mendox ni grëraa ma ne nacie ma, dzigo laa me csan grëse miech ne no xnëz me lадznia Dios men ne nac Pxoз me; dze cотaa nagon laa Dios gun guielwx-tis. ²⁵⁻²⁶ Sac ible Jesús nonabey haxta gdziñ dze co, zeene laa me gnitlo grëse meyozh ne rlëë lo me; zig nac guielgut, lëëw nac mine lultm gnitlo me. ²⁷ Zigne zhobneeque lo Xtiidz Dios, ladznia me biaan grëtaa ncuaañe no; per guiabd ne togo ye Dios no ladznia me, sac gon Dios nac men ne bdeeda lo me. ²⁸ Gacxe waa, zeene gal dze ne laa me sca lozh gnitlo grë zha ne rlëë lo me, Pxoз me nac men ne gnabey lo me; sac gon men co gocnie me been me gan, ni men co nac men ne nrabey.

²⁹ Nana, ne rnee to i nliid rrieeban mengut, ¿pe nac dzigo no zha ne rrobnis xcuent zha ne gutle? ³⁰ Telne niaca mine nliid grieaban mengut, ¿pe nac nadien

znu gzataa dze quiabeeladz no no lo grë guielxtseeb? ³¹ Bets, bzian, nligaaw tel naa gon gzataa dze noxtseeb naa lo guielgut; nanle to ganle zeene rne naa rleynie naa to, diidzli rnee naa; scaquegaa niina, mine rnee naa nu diidzliw. ³² Ne nligaa zeene glo bial naa guiedz Efés nu, ntseeb goc miech rii lo naa, pale grë ma ntseeb. Telne nliid grieaban mengut, zhlése dzigo nodeed naa grë min co; mazd tel zhataa dzigo gban ne, zigne rëbaque diidz ne rëb: “¡Golgot-saa dioow ne, golgotsaa dio ne, benque guielgutse quiambiaaz ne!”

³³ Per lëda ga gon. Zha ne zianañ min co, ib yquiaadiagde to xtiidz zho, zeena gacde to zigne nac zho; zigne zëëbaque diidz: “Telne ndzinliid miech ne ctsieelsa luu, zdziñ dze ne gac luu zigne nac zho.”

³⁴ Golquix biini sca, gunctaldráa to xtol to; pe rtoladzde to, golwi ganle no bla to i gard sëëb xnëz Jesús, haxta ni riend zho zhápaa nac Dios.

Zha grieaban mengut

³⁵ Nana, no to gnë: “¿Per zha grieaban mengut? ¿Zhazhe nac cuerp ne grieabannie zho?” ³⁶ ¡Aque nxen wnabdiidz co! ¿Pe rande to zig nac grë midz ne rio liu rac bni, rlozhse rnitlo midz co dzigo laa guizh ne naca ga rlan? ³⁷ Tel rnee to zha nac cuerp ne grieabannie zho, golwi ganle zig nac zhobxtil, zig nac grëra-gaa midz, ¿pe niacxe zigne nacsew riow liu, scasaque naca rлана? Led zeene laaw rlan, guizhle naca. ³⁸ Tib midzse naca riow liu, Diosle nac men ne rdeed zhiblaga zigne racladz me. Tib tib midz, psanle me dien zha gluw zeene laaw glan. ³⁹ Zigne zhaase zhaase nac tib tib midz, tib tib guizh, scaque nzian lo cuerp no.

Zig nac miech, zhaa nac xcuerp zho lo xcuerp ma, niicle magaaw, zhaa nac xcuerp ma ne no lo liu, zhaa nac xcuerp ma ne no lo nis, ni zhaaque nac xcuerp

ma ne rsiibe. ⁴⁰Grë anjl ne no gbaa, zhaa nac xcuerp zho lo xcuerp ne nac ne miech guidzliu; zhaa nac xquielniow cuerp co lo xquielniow cuerp ne no lo guidzliu. ⁴¹Gotsaa gwi ne ganle, zig nac xbiini ngbidz zhaa naca lo xbiini mëë, lo xbiinigaa mel. Niicle melgaaw, zhaase zhaase nac xbiini ma tib tib ma, no ma palalse rlu, nogaa ma rol rna. ⁴²Scadaa nagon, zhaa rlu cuerp ne rap miech niina, ni zhaagaa glu mine ygaa zho zeene laa zho grieeban. Cuerp ne rdziaap ne niina, ncuaañe tib rded naca, sangue cuerp ne grieebannie ne gal dze co, led yedraa min co nitlo. ⁴³Mban nac cuerp rii, sac rzacnëw, reta; sangue cuerp ne grieebannie ne, tib cuerp ne gdzind dze nitlo gaca. Lega zozhidz cuerp rii, sangue cuerp co tib cuerp ndip ndaan gaca. ⁴⁴Cuerp ne rdziaap ne niina, tib cuerp ngoopdol naca, sangue cuerp ne grieebannie ne, min co gac tib cuerp ne gban zigne racladzpa Dios. Sac zigne znu no cuerp ne rquiin lo guielmban rii, scaquegaa no mine yquiin stib lo guielmban ne gneedz Dios.

⁴⁵Golsoladz ganle, mee lo Xtiidz Dios Adán goc miech ne glopaa biaan ni Dios nac men ne bdeed guielmban lo Adán; sangue Jesús, me rap guielmban, ni zrieelo gdeed me guielmban co lo miech. ⁴⁶Scaque nagon, glo rgaa ne cuerp ngoopdol ne rdziaap ne niina, dzigora yгаа ne cuerp ne gban zigne racladzpa Dios. ⁴⁷Gotsaa gwi ne ganle, zeene biaan Adán yudiese bzaa Dios me; sangue Jesús, men gbaa nac me. ⁴⁸Grëse ne nac ne miech, cuerp ne rdziaap ne lo guielmban rii, zigne gocdaa xcuerp Adán naca; per zha ne gnalo Jesús, zeene laa zho grieeban laa zho gaple tib cuerp zigne nac xcuerp me. ⁴⁹Masaque nac ne niina zigne goc Adán, ni scaquegaa zdzin dze ne glu ne zigne rlu Jesús. ⁵⁰Gol-gacnan sca ganle, cuerp ne rdziaap ne lo guidzliu rii, grielod gdzina zaatne

rnabey Dios; sac rdzin dze ne rnitlow, grielod gaca tib cuerp ne guete.

⁵¹Wen wen golzoobdiag mine gne naa lo to nu ganle, waltaa choot gard gacnana: Grëse ne ne nac ne zha ne rnalo Jesús, gal dze co zigtaa zha ne mbana, zha ne gutlegaaw ible stsëë Dios xcuerp ne. ⁵²Znuse gac min co zig nace zeene riab tib belye; lëë min co gac lultm vult ne yuedz xanjl Dios zhitrompet zho. Zeene sedz trompet co, hor co grëse zha gut, laa zho grieebannie tib cuerp ne gdzindraa dze nitlo; scagaa grë zha ne bii zomban, hor co laa xcuerp zho gdzëë. ¡Grëse ne dziaap tib cuerp cub! ⁵³Ible sca none gaca, ib none gdzëë xcuerp ne gaca tib cuerp ne xind, tib cuerp ne gdzindraa dze nitlo. ⁵⁴Zeene gac min co, ga griequia mine raquiet lo Xtiidz Dios zaatne mee: “Nasi laa guielgut bnitlo, guielmbanle nac mine rnabey. ⁵⁵Ah guielguta, ¿yora na zeene scataa psacsi luu? ¿Yora zeene scataa gondip xtiidz luu?” ⁵⁶Grieeodraa pe gun guielgut ne hor co, sac led yedraa hor co tso dol, led yedraa hor co gnabey ley; sac por dol gane rrieelo rsacsi guielgut ne niina, ni por ley rlu pe nac xtol ne. ⁵⁷¡Xquizh xquielnzaac Dios pxeel me Jesús, sac gon por Jesús zrieelo grie ne ladzna guielgut!

⁵⁸Bets, bzian, ne nac to zha ne rleyne naa, golguien sca tibaque dziits golso lo Xtiidz Dios; zig zie dze goltsocora golgun xtsiin me, benque nanle to ganle, grëse xtsiin me mine rdziun ne nacda ncuaañe zhlëse.

Gon ne guey Jerusalén

16 Laa zig nac gon ne noyacro guey gac xyudar grëraa zha ne no xnëz Jesús Jerusalén, laa naa rso diidz lo to zigne psoque naa diidz lo zha Galás.

²Tel palal run to gan tib len zmal, lo co golcob mine ral zdoo to gdeed to gac gon co; gzobse dze goltsiesana lo

zha ne noyundlow. Adel na ganle haxta glansoraa naa i, dzigoraa no to dien zha topa. ³Ni golzobloga dien bla zha ne tsie tsiesana, na zeene glanso naa i dzigo yquia naa tib guits ne güey zho tsiesan zhow; ⁴ni tel rquiinpagaa ye naa ga, dzigo na maase ga naa ganie naa zho.

⁵Len dze rii no guic naa gateed naa nëz Macedon, dzigo gale grie naa glanso naa lo to i. ⁶Nend zbëz naa lo to i palal dze, togo iquegaa teed naa len mëë nal ne ziaad; ni racladz naa zeene gbi naa i, siguiel to gun to xyudar naa tel pa nëz ne no ga naa len dze co. ⁷Tejne zneedz Dios diidz cuëz naa lo to grë len dze co, zbëz naa, sac racladz naa tib guialteed naa lo to i. ⁸⁻⁹Niina ne no naa Efés nu, len dze riipaa rlu ndal miech ne no liaadz ycaania Xtiidz Dios, gane zbëz naa nu haxta ted lni Pentecostés. Nligaa ndal zha ne no liaadz co, per scagaa ndalque zha ne rtsidila.

¹⁰Nacle diidz laa Timoté guiaad i; tel nand new naraa guiaad me, golsguiel zeene glanso me zaacse golcaania me, zaacse golcuëzlo me, zeena tsonley zdoo me; golgan ganle, ye me quiayun xtsiin men ne rnabey ne. ¹¹Golguien csanwinde to me, sinque golgap me respet; zeena zeene glanso me lo naa nëz rii ine nley gac me csoladz me zha biadted me lo to i. Laa naa quiambëz glanso me nëz rii, gza me zha ne guiaadnalraa zhits me.

¹²Sangué bets ne Apol, blactaa bnab naa lo me niaadgza me zha ne ziaad i niaadgan me to, per rzac me grieeloda niina. Rien naa zeene gdeedtaaw diidz, ible ziaad me ziaadgan me to.

¹³Bets, bzian, nsin golso, tibaque gonalalo Dios. Ib ctsëede to xtiidz to, tibaque goltsoxco tsienal to mine rnabey me.

¹⁴Ncuane guntaa to, golconie guic to gun tow porne rleynie to Dios, porne rleyniegaa to samiech to.

¹⁵⁻¹⁶Laa naa rso diidz lo to, niowse gon golgac lo grë zha bets ne, zha ne run xyudar to i; zig nac Stef grë menlidz me, golgon xtiidz zho. Led nanle to ganle, Stef nac tib men ne glopaa bilidz Xtiidz Dios nëz Gres i grë menlidz me; ni desde dze co laa me pquiabladz tibaque squi quiayun me xyudar grëraa zha ne no xnëz Jesús. ¹⁷Rley naa gon zeene gon naa laa me blanso nu gza me Fortunat ni Acaic, haxta stib gac zdoo naa gongan naa zha no to, masaque gun naa cuent grële lo to ga gon naa. ¹⁸Ne nligaa bloonley zho zdoo naa, ni rien naa scaquegaa to nley gac to niina zeene gon to zha no naa. Golguien gon zha non nac zho, golwi ganle pa lotaa nac dziin ne quiayun zho.

¹⁹Grëse zha ne no xnëz Jesús nëz Asia nu, laa zho rxeel bdiuzh lo to, golcaania zhibdiuzh zho. Scaque Aquil grop me Priscil, ni grëraa zha ne rcaalsa lidz zho rieseed Xtiidz Dios, grë zho laa zho rxeel bdiuzh lo to. ²⁰Scagaa grë zha ne no nu, ye zho laa zho rquiaabdiuzh to. Zeene ycaalsa to i, ine golnaaznialsa, golqueedzsa, golcaania zhibdiuzh no.

²¹Nu laa naa cso schop lan xtidz naa lo to, ni golwi ganle naazhal yquiaw: ²²Grëse zha ne gon nëd gleyniepaa Jesús, miech ndziibdeele ga nac zho. ¡Ni ile gon ziaad me! ²³Mese nac men ne gacnien to, me nac men ne no zhixco to, sac ne nligaa rleynie me to.

²⁴Niicle naaw rleynie naa to, sac gon tibaque nac ne ngab ne lo me. ¡Lëed biidzieel ne sca!

Pabl

BROP GUITS NE PXEEĽ PABL LO ZHA

CORINT

1 ¡Diuzh to grëse to!

¹ Naa nac Pabl, grop no bets ne Timoté, laa no rquia stib guits rii rxeel no guiedz Corint i. Nanle to ganle Dios bzo naa, pxeel me naa none naa Xtiidz Ndzon Jesús lo miech.

Laaw ziaad lo to i, grëse to ne nac to zha ne ngab xnëz Dios; zigtaa tow, zigtaa grëragaa zha ne no dib nëz Gres iw.

² Dios men ne nac Pxoze ne, ni Jesús men ne rnabey ne, me gunlay to, me glu ganle pa lotaa noxco me to zeena peet zhgab ctsebde to.

³ Bets, bzian, golgotsaa gwi ne ganle, ¡zha ndzontaa Dios, Pxoze Jesús men ne rnabey ne! Sac gon, pa lotaa rquia zdoo me ne, pa lotaa rchoobladz me zdoo ne ⁴ lo grëtaa guieñe ne rdieed ne. Ni laa me rchoobladz zdoo ne gon, zeena sca-gaa grëraa zha ne rdzian ne no guieñe, mban rac zho, guio ne guiochoobladz ne zdoo zho zigne rchoobladzque me zdoo ne.

⁵ Zig nac niina, nroob guieñe ne nodieed no loxaque ne riladz no Jesús, per scaquegaa ib rsaand me no tibaque nochoobladz me zdoo no. ⁶⁻⁷ Laa no nodzian grë guieñe rii, sacne noxco no nonee no lo miech zha laa zho lo dol, parne scagaa grieelo cchoobladz no zdoo to. Lo grë guieñe rii, me nac men ne nochoobladz zdoo no, gane ndion no scaque squia zdoo me to, schoobladz me zdoo to zeene gdziñ dze ne laa to gan grë guieñe ne nodzian no nu niina. Ni me gon nac men ne gacnieñ to glëb to gan tow.

⁸ Bets, bzian, tel niaca mine nian to ganle zha nactaa grë guieñe nroob ne bdieed no zeene no no nëz Asia. Ne

nligaa nroob psacsi zho no, ncuuaane lëbdraa no lo grë guieñe co, tibaque rdzieets no bod gataa niet no. ⁹ Masaque bzhiaac no len dze co zig rzac tib zha ne nole guet, laa zho quiambëzse gal hor ne guet zho. Garaa bdzion no peet grieelod dziuun no ne nose, sinque Dios none gnalo no, mese zac csilaa no lo grëtaa guieñe; sac tel me, haxta menngut rbeeban me.

¹⁰ Ni nligaa bleee me no lo guieñe co, bla me no lo guieñgut co; ni ndion no scaque zla me no lo grëraa guieñtseeb ne dzian no, ¹¹ totsaque gacnie to no tibaque gnab to lo me gacnieñ me no. Zeena, tibaque gac ne grëse ne gdeed ne xquizh lo me.

¹² Rley no sacne rien no choot no-quidied miech, ndzinli mban no, zigtaa zeene zo no lo tow, zigtaa zeene zogaa no lo grëraa miecha. Per guiabd ne togo por niini now, sinque ne nquialadz Dios no gane quiayacnieñ me no znu mban no. ¹³ Grë mine rnee no lo guits ne zix-eel no lo to, niapse diidzliw, ni mine rgobey no grieelo guieñ to min co rquiaa no; gane racladz naa gdziñ dze ne guieñ tow. ¹⁴ Nli runbeydpaa to zha nac naa, per racladz naa gley to zeene ran to naa, zigne gleyaque naa gan naa to gal dze ne laa Jesús, men ne rnabey ne guiaad stib.

¹⁵⁻¹⁶ Sca nagon rzaac naa, gacxe na ni naa glo nialgan naa to, dzigo ile nrie naa nia naa nëz Macedon. Ni zeene mbire naa nëz co, nialteadaque naa lo to i stib; zeena niac chop vult ne nionley zdoo to. Lozh ga, ine niowse nzonëz to naa nia naa nëz Judé. ¹⁷ Ni pasëe naa nial. Per guiabde to togo bod notiblid guic naa zeene sca bne naa, o nacgaa naa zig nac grë zha ne laglaase rnee tib diidz, laa len zdoo zho nanpaa zho gund zhow. ¹⁸ Dios zobwi ganle rdziuunscad no. Mine rnee no, rdziuun now.

¹⁹ Golgan ganle, zigtaa naaw, zigtaa Silvana, zigtagaa Timotéw, no biadseed

to cho nac Jesús, meñ ne nac Xpëed Dios; ni zig nac Jesús, rquidied me. Grëse miñe rnee me ruñ mew, ²⁰ ni grëse miñe psañ Dios diidz guñ me, grësew noyuuñ mew; gane niicle nogaaw rnee no lo miech ganle ible ruñ me miñe rnee me, ga rlu ganle pa lotaa meñ nroob nac me. ²¹ Ni lëë Dios co gon nozhixcuaa lo xquieñmban ne, laa ne ngab xnëz Jesús niina; me bzooblo no nonee no Xtiidz me. ²² Haxta pxeel me Espiritu Sant zdoon, rriequia bloobey me ne ga, par glu ganle lo me ngab ne, ni ible zгаа ne grëtaa guieñzaac ne bnee me gneedz me lo ne.

²³ Me zobwi, me nan ganle pe nacne gard guial naa. Gard gon guial naa, per por tow; sac rquia zdoon naa to, racladz naa loxaque guialquiago naa to i, lozh ga mban gac to. ²⁴ Guiabde to sca togo bod racladz no guiaad no. Nli rquiindraa to guiadnee no lo to zha gliladz to Dios, sac dib zdoole to riladz to me; per laa no racladz ine guiaadlonley no zdoon to i. Golguien sca, min co racladz no, racladz no guiaadloguieñe no to.

2 Min co nagon bend naa ne nial naa, ² sac nonguieñda ga coguieñe naa to, ni to nac zha ne rgonley zdoon naa. ³ Ne racladzaxe naa min co waa, gane pxel naa tib guits co lo to glo, zeena nzhixcuaale lo guieñto ne nobee to i, zeene laa naa nlanso. Sac tel lega nlanose naa, laa ne ndzio ne guieñbley, lel guieñe ndzio ne. Ni nan to ganle, tipse nac guieñbley ne rdziaap ne; ñniacxe zrieelo nley gac to telne ran to mban rac naa?

⁴ Tel gan to ganle zeene pxel naa guits co, ñne nlipaa mban rac naa no naa zhizhgab to! Haxta roon naa zeene noquiaa naaw. Laa naa pxel guits co lo to, per pxeld naaw par ngoguieñe naa to; sinque laaw pxel naa, zeena xixcuaan-iob lo ncuane ndzinlid ne noyac i; ni laa naa ben min co sacne rquia zdoon naa to. ⁵ Zeene bin naa zha nac dol ne noyuuñ zha co i, zig rne naa ga: bio naa guieñe; per

rien naa mazdraa nroob bio to guieñe. ⁶ Nana gon, ne squi laa to pteedle zho tib caxtigw, ñlëew ga na! ⁷ Golguiaanladz miñe been zho ga, golneewen lo zho stib, golchoobladz zdoon zho zeena gacmband zho. Sac telne csaanladz to zho, nend scase lozh guiuu zho lo xquieñe zho. ⁸ Rnab naa lo to, golleynie zho stib, zigne rleynieque to zho glo.

⁹ Ni stiba, laa naa pxel guits co lo to, zeena dien pe zon to diidz guñ to miñe rne naa lo to ga. ¹⁰ Golguiaanladz miñe been zha co sca, tel naa laa naa biaanladzlew. Jesús zobwi ganle laa naa benle zho perdon, zeena gbiire zaacse gac to; ¹¹ ni scagaa gleyd mendox gunguet ma ne. Led nanle to ganle, zombëzle ma dien zha gnitnëz ma ne.

Tibaque noxco Pabl cseed miech Xtiidz Dios

¹² Bded ga nagon dzigo bia naa guiedz Troas. Zeene bdzin naa ga, ne nligaa bneedz Dios diidz niun naa xtsiin me ga. ¹³ Nac diidz ga ndzieelo naa bets ne Tit, per zeene gon naa bdzind me, biotiblidraa guic naa. Nacne brieque naa ga bia naa nëz xtan zha Macedon, biaguib naa me.

¹⁴ Per, ñxquizh xquieñzaac Dios! Sac zaatne ziotaa no, Jesús ner lo no, me rlu ganle rdziuuñ no gan lo grëtaa ncuane rca. Tibaque rnee no lo miech gacnan zho ganle cho nac me, sca quiaxobnen no Xtiidz me, zig rzëbxlaa tib ncuane nex rlaa. ¹⁵ Haxta no, masaque nac no lo Dios zig tib ncuane sca nex rlaa; sca nac no lo me sacne laa no ngable lo Jesús. Nëzrii nëzrec nex zëbxlaa gox co, zigtaa lo grë zha ne ngable xnëz Diosa, zigtagaa lo grë zha ne zie nëz ne nitlow. ¹⁶ Par grë zha ne nole nëz ne nitlo, masaque rzac zho no zig tib gox ne nguid rlaa, haxta rsoladz zho pe nac guieñgut ne quiambëz zho; sangue grë zha ne nole xnëz Dios, rzac zho no zig tib gox nex ne runçso-

ladz zho guielmban ndzon ne no yгаа zho. ꝑNi led choꝓd zha ne gon grielo gun dziin rii! ¹⁷Nu rquiin zha ne dib zdoo rquiabladz gun dziin lo Dios, glu zho ne nli Dios pxeel zho, ne nli Jesús nacie zho. Sac no zha ne, loxaque rquiaalo zho ye zho rseed miech Xtiidz Dios, per laa zho ruᅇa par cuee zho dimi.

3 Nana ne znu me naa, guiab to bod yeque no rdziuun zig ruᅇn zha ne sca rquidie ga, læēque zha ruᅇnon zho, rio zho dieen pe diidz ne rquia rey zho par glupaa dien cho nac zho. Ni lalnu rdziuun nond no no, niicle peet diidz rquiindгаа no. ²Led yed no rquiin pe didz ne dzeey no, to rlu cho nac no. Grēse miech ne gan zha notsēē Dios lo xquielmban to, gase gunbey zho no, ga glu pe nac dziin ne rdziuun no. ³Gane rreequia nac to zig tib diidz ne quialu ganle cho nac no. Jesús zhal pquiaa diidz co, ni pquiind me pe tint ne nquiaa mew, sinque laa me pquiaaw con guielbiini chen zhiEspíritu Dios, men ne nguiamban. Ni pquiindгаа me pe lo guits ne nquiaa mew, sinque laa me pquiaaw zdo to.

⁴Ni ndionpaa no nli scaw, sac Dios zhal rluw, ne nac no zha ne ngab lo Jesús. ⁵Per guiabd ne togo nose rrieelo rdziuun grē mine rdziuun no, led scada, Dios nac men ne racniēn no rdziuun now; ⁶sac me bdixbiini no zha cseed no miech diidz cub ne psan me. Gane laa no noseed miech niina, per rseete no zho tsienal zho mine rnabey ley, sinque laa no noseed zho guien zho tsienal zho mine rnabey Espiritu Sant. Sac tel leya, læē gdib rnabeya guet grēse miech ngoopdol; sangue Espiritu Sant, laa me rlu zha yгаа zho tib guielmban ndzon.

⁷Goꝓsoladz ganle, zha blu Dios biini ne nac xquielndzon me zeene pcaania Moisés ley ne rnabey guet grē zha ngoopdol. Biinidoo ne biaan lo Moisés dze co, haxta læbd lo zha Israel gwi zho

lo me, per dzega dzega biuu biini co. ⁸Scaque nagon nolu Dios xquielndzon me, niina ne laa Espiritu Sant nolu zha yгаа miech guielmban; per, ꝑmazdraa gon nroob nac guielndzon rii! ⁹Sac gon, tel scataa blu xquielndzon Dios zeene biaan guet grē zha ngoopdol; mazdraa dzigo nroob nac guielndzon ne rlu niina. ¹⁰Ne nligaa, palalse ga nac biini ne blu lo Moisés zeene pcaania Moisés ley co, mazdraa nroob biini ne ziaadnie xtiidz cub Dios niina. ¹¹Ni stiba, bza dze ne been ley co dziin; sangue xtiidz cub me, gdzind dze ne gdzēew. Gacxe waa, mazdraa nac biini ne ziaadniew.

¹²Ni ne ndionaxe no waa gdzind dze ne gdzēew, gane tiblque laa no noneew lo miech; ¹³rdziuund no zig been Moisés. Sac tel Moisés, pquia tib læ lar lo me dzigo gond zha Israel zha bnitlo biini ne biaan lo me ga. ¹⁴Ni rreequia ye lo grē zha Israel ga sca bdze, gacxe waa, haxta lo nadze riend zho zha zhobnee lo Xtiidz Dios, mine psan me padzeela. Ible riend zho ne bdedle dze ne pquiin diidz gol co, Jesúsle none gliladz zho niina. Me nac men ne cxal lo zho. ¹⁵Ne nligaa sca nac zho, haxta lo nadze niicle rlabraa zho lo guits ne pquiaa Moisés ga, tibaque ndip nac zdo zho.

¹⁶Per tel zha ne csaan grē guielntseeb, dib zdo zho guien zho cho nac Jesús, ible zlit me lar co lo zho; ¹⁷sac gon, miech ne naciele zhiEspiritu me, led yedraa zho ngadoo lo ley gol co. Ni ndion ne ganle, meque ga nac Espiritu. ¹⁸Gacxe waa, grēse ne ne ngab ne xnēz Jesús, led yedraa lo ne ndze. Masaque nac ne niina zig tib quiewan, zeene ran miech zha mban ne, ga ran zho ganle pa lotaa nac xquielndzon Dios. Tibaque nozhixcuaa zhiEspiritu me lo xquielmban ne, zigse zie dze noluraa me zha nactaa guielndzon ne rap me.

4 Ne nligaa noxco Dios ne, gane niicle peet nond no laa me bzo no quianee

no Xtiidz Ndzon me lo miech; ni choot rsaand dziin rii.

²Zeene rseed no miech, choot rquidied zho par gliladz zhow. Choot nolud wseed ne ziaate lo Xtiidz Dios; guieltole ga, tel dzio no yquidiee no miech, cseed no zho ncuane nacdraa Xtiidz me. Me zobwi ganle niapse diidzli rnee no, niicle grëгаа zha ne rdziunbey no, nan zho rquidieed no.

³No grë zha ne ib nëd tsoguic zha nac zhiwseed Dios mine nonee no; sac lëëque grë xtol zho notse lo zho, laa zho zie nëz ne nitlo zho. ⁴Nëd zho gliladz zhow, sac ible mendox (ma ne nonabey lo guidzliu rii) noyun ncow xquielrien zho; gane riend zho ycaania zho Xtiidz Ndzon Jesús, men ndzon ne biaadlu ganle zhapaa nac Dios.

⁵Laa no quiaseed miech, per rseete no zho gacnan zho dien cho nac no, sinque laa no noseed zho gunbey zho cho nac Jesús. Gacnan zho, ne me nac men ne rhabey; laa no, tib ngundziin winse nac no lo to, sacne rleynie no me. ⁶Ne nligaa tib ngundziin winse nac no! Golwi ganle Dioszhal, men ne bnabey biaan biini ne rziini guidzliu, me bdixbiini guic no bien no xquielndzon me ga biaadlu Jesús.

Rsaand Dios zha ne dib zdoo rnalo me

⁷Ne nlipaa, lega nacse no zig nac tib guies yu ne notsow grëtaa ncuane ndzon ne zieneedz Dios lo no. Gase na ganle rlu, Dios nacchena grësew, peet nond no loxaque nose.

⁸Me nacie no, niicle nroob zhgab ne rio no, per racmband no; niicle nroob nac guielxtseeb ne rdzian no, per choot rdziebd. ⁹Tibaque notsidił miech no, per rsaand Dios no; niicle rsacsi zho no zootle laa no nitlole, per rbiire riochee no ga stib. ¹⁰Zaatne ziotaa no, quianał miech gut zho no, zigne beenaque zho Jesús; per me rsilaa no ladznia zho. Ga rlu ganle ne men mban nac me, ni me nac-

nie no. ¹¹Gzataa dze noxtseeb no gut miech no, loxaque ne rdziun no xtsiin me; per ga rdeeda diidz rlu no ganle pa lotaa nacie me no, niicle ne tib lëse ben nac no. ¹²Ne nligaa, tibaque noxtseeb no lo guielgut ne znu nonee no Xtiidz Jesús; per scagaa, porne biadnee now i laa to bgaa guielmban ne gneedz Dios lo to. ¹³Niicle nagon ne znutaa noxtseeb no, per ndionpaa no me quianap no, gane rdziebd no noseed no miech Xtiidz me; zig zhobneeque lo Xtiidz me, zaatne rnee: “Bliladz naa mine rnee me, gane rne naaw.” ¹⁴Ni ndion ne ganle, zigne bleeban me Jesús, scaque zbeeban me ne, lozh ga tipse gac ne gdzinnie Jesús ne lo me.

¹⁵Grëse guielnë ne nodzian no, laaw nodzian no sacne nligaa noxco no to; zeena grëse to sëëb xnëz me. Sac telne ndal grë zha ne sëëb xnëz me, scaquegaa ndal zha ne gdeed xquizh lo me, cxobnen zho pa lotaa men ndzon nac me.

¹⁶Mincoxe waa, ib choot riablod. Nli zigse zie dze laa no bii noyoxraa, sangue zhiespïritu no, zigse zie dze laaw racncubraa, laaw riaanmberaa nëz lo Dios.

¹⁷Ni stiba, niicle ne znutaa nodzian no grë guielnë rii, per ncuane tib rded naca, led ncuane rnada; sac gon, zeene laa no lozh dieed grë min rii, mazdraa nroob nac lo guielndzon ne ygaa no, ni mincosi gdzindraa dze lozha. ¹⁸Gacxe waa, choot rdziunscasd grë ncuane quiadzian no lo guidzliu rii, sinque laa guic no nonie ygaa no grëtaa guielbley ne no gbaa. Sac grë ncuane ran ne nina, ncuane tib rded naca; sangue grë ncuane gard dzian ne ga, led yedraa min co nitlo.

5 Ni ndion ne ganle, zeene laa xcuerp rii ne nitlo, laa Dios gneedz stib mine gdzindraa dze nitlo. Masaque nacse xcuerp rii ne zig nac tib yu guizh win ne rbëz miech lo wгаа; sangue cuerp ne gneedz me lo ne, rriequia naca zig

tib yu ne gbiaazpaa ne gbaa. ²¡Blactaa guielñe ne rdieed ne niina ne rdziaap ne cuerp rii! Gacxe waa, quiambiaaznē ne gdziñ dze ne gneedz me stib cuerp co. ³Sac gon, led niapdse espíritu gdziñ ga, sinque none gapa cuerp. ⁴Ne nli-gaa, niina ne mbannie ne cuerp rii, zeene nē nodieed ne, rziac ne tebaa laa ne mbanniele stib cuerp co. Per par ygaa ne cuerp cub co, ible none guet ne. Per zie-nied guic ne sca, sinque laa ne racladz zhits cuerp riise tsie cuerp co, zig nacse ne niina ygaa ne guielmban ndzon co. Sca rziac ne, sac choot rdziladzd guet. ⁵Dioszhal bzo ne ygaa ne min co, ni ible zaca, sac gon laa me pxeelle Espíritu Sant nacie ne.

⁶Teł no, min co nagon quiambiaaz no; ndionle no laga mbannie no cuerp rii, grielod ygaa no min co, grielod gdziñ no zaatne no Jesús. ⁷Nli rdziand now niina, per dib zdoo no riladz no ib laaw none gac. ⁸Gacxe waa, haxta nley rac zdoo no quiambiaaz no gdziñ dze co; rziac no tebaa laa no briele leñ cuerp rii, zeena guiobannie no Jesús. ⁹Min co nagon, tibaque noxco no gac no zigne rdziladz me, zigtaa niina ne no no lo guidzliu riiw, zigtagaa zeene gdziñ no lo mew. ¹⁰Sac gon, grēse ne zdziñ dze ne laa ne gacredz lo me zaatne gun me guielwxtis. Grēse ne ne nac ne miech, teł zha mban ne niina ne rdziaap ne cuerp rii: zigtaa zha ne zaacse mbana, zigtagaa zha ne teł zhataa mbana, ga ygaa ne mine guioquia ne tib tib ne.

¹¹Min rii nagon nonie guic no, gacxe waa noxco no nonee no lo miech zha nac Xtiidz Dios. Ni me nan ganle dib zdoo no nodziun no dziin rii, ni racladz naa guien to ganle sca nac no.

Zaacse golgac lo Dios

¹²Grē mine blozh bne naa nu, zig bnele naa ga: nacda par dziuunnon no no. Laa no rnee grē min rii, zeena guien-

paa to ganle cho nac no; ni scagaa, guien to zha ctsire to lo xtiidz grē zha ne squi riaad i rlozhd gacniats zho. Teł zha, laglaase rlu zho miech wen nac zho. ¹³Nligaa, dib zdoo no noxco no xtsiin Dios, laa miech masaque rzac zho riot-sle guic no. Nana niicle teł riotsgaaw, per xtsiin Dios nodziun no. Sangue no, ndionpaa no riotsd guic no; laa no rdziun grē min rii, sacne noxco no cseed to Xtiidz me. ¹⁴Laa no nodziun dziin rii, sacne rleyne no Jesús, maase teł zhataa rzac miecha.

Ndionpaa no Jesús bgaa guielgut ne niogual ne; scaquegaa, ndion no niina ne laa no bziaab xnēz me, rriequia gutle no lo grētaa ncuane ndzinlid ne bdziun no glo. ¹⁵Gacxe nagon waa, grēse zha ne rzēeb xnēz me, nodraa gban zho zigne notaa guic zho, sinque laa zho none tsoxco gban zho zigne rdziladz me; guien zho ganle, me gut bdiizh me xtol zho (ni brieaban me), par ygaa zho tib guielmban ndzon ne gdziñ dze lozh.

¹⁶Gotsaa guien sca, zha ne nole xnēz Dios, ziaacd ne zho zig rzac grēraa miech zho, rzac zho peet nond zho. Teł naa glo sca bzhaac naa Jesús, masaque bzob naa cholze miech nac me; sangue niina, ndionpaa ne ganle cho nac me. ¹⁷Sac gon, grēse zha ne ne nliipaa dib zdoo riladz Jesús, stible miech nac zho. Grēse teł zha goc zho glo, laa min co bdedle. ¡Ncuble nac lo xquielmban zho! ¹⁸Ni loxaque Diosse gon zrieelo sca gunn-cub miech. Sac gon, me pxeel Xpēed me Jesús biaadtizh grēse xtol ne, laa ne biaanwen lo me. Ni scagaa niina, me bzo no znu quiaseed no miech, zeena gacnan zho zha grielo guiaanwen zho lo me. ¹⁹Znu gon naca: Laa Dios nodeed diidz niina guiaanwen miech lo me, gunquizhd me zho teł pe nactaa xtol zho, totsaque gliladz zho cho nac Jesús. Min rii nagon bzo me no nonee no lo miech. ²⁰Golgan sca ganle, xmandad

Jesús nac no. Me zobwi ganle laa no r nab lo to niina: ¡Golguiaaⁿwen lo Dios! Golguien ganle, rriequia gon Dioszhal rso diidz rii lo to. ²¹ Sac gon, Dios bzo Jesús bgaadz me grëse xtol ne, niicle ne ni tib dol rapd me; zeena niina ne laa ne wbig lo me, grieelo ndzinli gban ne, zigne racladz Dios. ¡Masaque Jesús bdi-izh grëse xtol ne, psanwen me ne lo Dios!

6 Gotsaa gwi ne ganle pa lotaa noxco Dios ne. Gacxe waa, no ne nac no zhingundziin me laa no rso diidz lo to: golguien golgon mine nonee me lo to niina. ² Lo Xtiidz me, no tib zaatne znu zhobnee:

Lëetse len dze ne nosilaa naa miech, laa to bnab gacnie naa to.

Lëetse len dze ne rdeeda diidz gac mine quiambëz to, laa grë xliaadz to blanso lo naa.

¡Ni lëe dze co nu nagon bdziñ!
¡Nadzegazh quiambëz me gbig miech lo me, zeena csilaa me zho!

³ Dziin rii quiadziuuñ no, choot quiadziuuñctald xtol miech, choot noguibd sozit zho lo Dios. Zaatne ziotaa no, tibaque noxco no zaacse gac no, zeena tsod pe yquiaaqui zho gneenë zho Dios. ⁴ Zigtaa ncuanea rdziuuñ now, zigtaa grëgaa ncuanea nodieed now, rlu no ganle ne nli xtsiin me nodziuuñ no. Tel pe nactaa grë guielnë ne nodieed no, tel pe nactaa grë xliaadz no, niicle no zaatne rsacsi miech no, per choot rietede. ⁵ Blactaa zaatne rguin zho no, zaatne rsioogyu zho no, zaatne rree zho ndal zho racntseeb zho lo no. Blactaa rdib rdzaag no rdziuuñ no dziin, no zaatne rree zhimcaalo no dipse guieel, no zaatne retgbin no.

⁶ Ne nligaa rdzioxco no ndzinli mban no, choot rietede, wen wen rdziuuñbey no zha nac Xtiidz Dios, sca ran miech ganle ne nli Dios pxeel no. Dib zdoo no rleynie no samiech no, wen rac no lo

zho, zilu no ganle pa lotaa racnie Espíritu Sant no.

⁷ Niapse mine nac diidzli min co rnee no, ni scagaa Dios, nolu me ganle ne nli scaw. Niapse guielwen, niapse diidz ndooladz rlu no ne nli lo Dios quiadziuuñ no dziin. ⁸ Choot rsaand mine pso Dios no nodziuuñ no, maase niicle mine runtaa miech no. No zaatne runnon zho no, nogaa zaatne rzhidznie zho no; no zaatne rneenë zho no, nogaa zaatne rleynie zho no. Niicle ne diidzli rnee no, per no zho rzac noquidiee no miech. ⁹ Runbeyd miech cho nac no, sangue Dios runbey me no. Niicle ne tibaque noxtseeb no lo guielgut, per peet gard gac no laa no bii mban; niicle ne rsacsi zho no, per choot gard guet. ¹⁰ Niicle ne no hor mban rac zdoo no, per znusaque rneedz Dios tib guielbley zdoo no. Nacd no zha dimi, per nroob nac grë guieln-zaac ne rgaa miech zeene rnee no lo zho. Rdziaapd no grë ncuanea rap grëraa miech, per ncuanea rdziaap no, nroob nona.

¹¹ Bets, bzian, ne no to Corint i, laa no rzodiidznie to, laa no rnee lo to grëse zigne rza zdoo no. Ne nligaa rleynie no to. ¹² Telne rzac to gard gacpaa ne tipse, per led nod naca. Tel no rleynie no to, sinque to gon rien no laglaase rleynie no. ¹³ Ne nligaa peet rqueets naa lo to, laa naa rne lo to zig rnee tib dad lo mëed. ¡Scaquegaa to, golsiguie! zaacse golgac!

Zhaa nac biini lo guielcow

¹⁴ Golguien, guiabde to tipse gac to grë to zha ne gard sëeb xnëz Dios. Golgan ganle, tib zha ne nole xnëz me, rdzieeld gac zho zig rac zha ne bii no lo dol. Zig nacgaa biini, zhaa nac biini, zhaagaa nac lo guielcow. ¹⁵ Sac gon, tel Jesús, ¿niacxe tipse nac me grë me mendox? Scaquegaa grë zha ne nole xnëz mew, grieelod tipse gac zho grë zho zha ne no lo dol. ¹⁶ Tel xyadoo Dios, nacda zig nac

xyadoo grē mdio. Ni rriequia gon ne nac xyadoo me, zigne raquiet lo Xtiidz me zaatne rnee:

Na gbannie naa to, ine sēnie naa to.

Naa gliladz to, ni scagaa to, lo naa ygab to.

¹⁷ Gacxe waa, rbiire me rnee me:

¡Golrree lad grē zha qui, goľbiche lo zho! Gunde to grē ncuaañe ndzinlid ne run zho,

golbig lo naa, naa ycaania to.

¹⁸ Naa gac PxoZ to grēse to, scagaa to, laa to gac xpēēd naa.

Lēē xtiidz men ne rnabey to nu.

7 Bets, bzian, gotsaa gwi ne ganle zha nactaa ncuaañe psan Dios diidz ygaa ne. Gacxe waa, golgotsaa lozh griece ne lo grē zhgab yozh, lo grē ncuaañe ndzinlid ne runctal xtoľ ne. None zigse zie dze dzioxcoraa ne gban ne zigne rdziladz me.

² Ne nligaa, zaacse golgac golcaania no stib. Teľ pe guielnē ne noded to, teľ zha rzac to, to bguiba; zig nac no, choot noquidiede to, choot nosacside to.

³ Guiabde to togo noquiago naa to nu, laa naa nile ganle dib zdoo no rleynie no to. Leñ ngbidz ne gbantaa no lo guidzliu rii, ib csaand no to. ⁴ Laa naa rne grē min rii lo to, sacne nanpaa naa zha nac to, nanpaa naa zac gne naa lo to zigne nose guic naa. Zeene rsoladz naa to, haxta rianladz naa grē mine nodeed naa, ine rianad tib guielbley zdoo naa; haxta riats naa ne runbey naa to.

⁵ Wlal ne blanso no Macedon nu, ni tib lē notiblid guic no; lala noxtseeb no lo grē zha ne quianaľ no, lala nonieque to guic no dien yo to. ⁶ Per rsaand Dios zha ne no lo zhgab, me pchoobladz zdoo no; sac zeene blanso Tit lo no nu, ⁷ blansonie me diidz zaacse pcaania to me. Per nli rley no bdzion ndzinlile mban to, nē me bio to guielnē grē leñ dze ne bded ga, ni nē me nonie no guic to, quiambēz to tebaa zha ganniob to lo no stib.

⁸ Zeene pxel naa guits co lo to glo, mban goc zdoo naa sac bien naa ib zgoguielnēw to, sangue niina racmbandraa zdoo naa; sac rien naa niicle ne bio to guielnē tib bla dze, per na laa ncuaañ co bdedle. ⁹ Gacxe waa rley naa niina, per guiabde to togo rley naa bio to guielnē, sinque rley naa gon naa laa to wbiire wbig lo Dios por guielnē ne bio to ga. Ni sca nagon racladz Dios gun grē zha ne ngab xnēz me zeene runctal zho xtoľ zho, gane rienpaa naa led psacsid no to ga. ¹⁰ Zeene Dios rdeed diidz sca rio miech guielnē, lo guielnē co laa zho rbig lo me rsanmbe me zho lo xtoľ zho; rsaan zho teľ pe nac ncuaañe ndzinlid ne noyun zho. Zha ne sca rac-wen lo Dios, nodne gacmban zho guiab zho pe nacne bded zho guielnē co. Laa grēraa guielnē ne ran miech, zig nac zha ne nod xnēz Dios, loxaque rlozh runmbana zho, laa zho bii zie nēz ne nitlo zho. ¹¹ Golgan ganle, pa lotaa bzhixcuaa to niina ne bio to guielnē co. Haxta baa to biini, bioxco to blee to zha co lo doľ ne quiayun zho ga; bien to ganle nonguiela rlisqui naaw. Gacxe waa, zeene gon to pa lotaa nac doľ co, güeyniew guic to ni wbinladz to; gonzedraa to zho. Niicle ne gocladz to tebaa i zo naa nedz naa rson dien zha niun to; per tibaque beenquizh to zho mine been zho ga. Wen ne sca been to, ga blu to ganle rdziguierende to doľ ne been zho.

¹² Ne nligaa tibaque noxco no zaacse gac to. Zeene pxeel no guits co lo to, guiabd ne togo zhizhgabpaa zha ne been doľ co no no, zhizhgabpagaa pxoz zho; sinque laa no pxeela sac tibaque noxco no zaacse gac to. ¹³ Gacxe waa, zeene bdzion no bin to diidz been to mine rnee no lo guits co, per nli rley no.

Ni zeene bdzion no grēse to zaacse blēzlo to Tit, mazdraa bley no; niicle megaa rley me ne squi niowse gon to me; haxta nguieel rac me niina. ¹⁴ Bzodiidzle naa lo

me, ne squitaa wen miech nac to, gane rley naa psande to naa guielto. Tel naa niapse diidzli rne naa, zig nac niina, zig repse naa lo Tit scase gon me rac to. ¹⁵Rleynie me to, rzac zdoo me zeene rso-ladz me grese to ndooladz goc to pcaania to me, ni bin to diidz been to mine bnabey me to. ¹⁶¡Ne nligaa, rley naa niina bin naa squi zaacse rac to! ¡Nasi, nanpaa naa racnie to naa zigne racnie naa to!

Dib zdoo to goldeed gon

8 Bets, bzian, laa no gzodiidz lo to ganle pa lotaa quiayacnieñ Dios gre zha ne ngab lo Jesús nëz Macedon nu. ²Nli nroob gre guieñe ne quiayan zho, per nguieel rac zho. Len dze ne bded nu beenlo zho tib gon, niicle ne zhis ncuane rap zho, per nroob gon ne beenlo zho. ³Laa naa rnew lo to, sac naazhal gona. Ne nligaa, dib zdoo zho bleeladz zho gre ncuane bloogon zho; ncuane rgaataa lo zho laa zho bdeeda. ⁴Dzigo bnaab zho lo no gdeed no diidz ye xgon zho guey lo gre zha ne nacgre ne, zha ne guieñd pe yquiiñ. ⁵Ni ledsew ga, bzee zdoo no zeene bdzion no blozhse psan zho zho lадznia Dios, laa zho wbig lo no në zho, mine csiaabtaa Dios guic no gnabey no zho, zun zhow. Ni lalnu gon giueynied guic no gun zho gretaa min rii.

⁶Niina ne bdzion no znutaa biabgan zho nëz rii noyunlo zho gon rii, nacne rdzieets no lo Tit siguiel me guiaad me nëz lo to i stib; zeena lozh gunlo to gon ne bnabeyle me to i quiayunlo to. ⁷Rdziuunbey no to: dib zdoo to rnalo to Dios, zha niini nac to, rien to zha gnee to Xti-idz Dios lo miech, nguieel rac to run to xtsiin me, ni pseed to rleynie to samiech to. Nana sca, zig nac gon rii, scaque dib zdoo to goltsoxco golgunlow.

⁸Laa naa bzet lo to nu zha been zha Macedon, per guiabde to bod nonabey naa to scapaa gun to. Sinque laa naa bzeta lo to, zeena gacnan to ganle ye

zha co pquiabladz bdeed gon co. Nu nagon rdeeda diidz glu to ne nli rleynie to gretaa zha ne nacgre ne, led loxaque diidzsew. ⁹Golwi ganle, zig nac Jesús pa lotaa noxco me ne. Niicle ne me nachen gretaa ncuane no, per bdeed me diidz goc me zig tib zha ne peet rapd; ga bgaa ne gretaa guieñzaac ne rap me. Laa me been min co sacne rleynie me ne.

¹⁰Wena, tebaa tsoxco to lozh gunlo to gon qui. Golsoladz ganle, topaa psilo bleebey gaclow wdibiz ga, ine nguieel rac to psilo to. ¹¹Nana sca, zigne psilo to hor co, scaquegaa niina nguieel gol-gac golsiaal lo dziin co. Golquiabladz tel palalaa ncuane rgaa lo to tib tib to, dib zdoo to goldeeda; ¹²sac zeene dib zdoo miech rquiabladz zho cogon zho, tel palalaa mine yгаа lo zho, scaania Diosa. Nanle me palal ncuane rgaa lo tib tib miech, gnabd me ncuane ni quianied zho.

¹³Sac nacda ne ygad to grese ncuane rap to lo stib zho, lozh ga guiaanmban to; laa zha yquianie gresew. ¹⁴Led scada. Laa min rii rac, zeena grese ne lalga ncuane yquianie ne. Niina ne rgaaw lo to, goldeed palala yquiiñ gre zha ne rapd nrooba; zdzingaa dze na pe gunfalt lo to, dzigo laa zho gneedz tel pe nacгаа ncuane quianiede to. Sca none dziuunlsa ne xyudar zha ne nacgre ne, zeena zig rne naa ga: lalga ncuane yquianie ne. ¹⁵Golsoladz ganle, znu rnee lo Xti-idz Dios: “Zha ne ptop nrooba, beenda sobr lo zho; niicle beenfaltegaaw lo zha ne ptop zhisa.”

Laa Tit guiaad i stib

¹⁶Xquizh Dios psiaab me guic Tit, zigne rzacaque naa to scaque rzac me to; tibaque nonie to guic no. ¹⁷Zeene bnaab naa lo me siguiel me guiaad me lo to i, bzhiguieelga me; ni nolegaa guic me guiaad me, sac ne nligaa racladz me guiaadso me lo to stib. ¹⁸Nëz rii, no tib

bets ne, nroob yudar quiayun me no-gaaz Xtiidz Dios lo miech; zaatne rcaal-sataa zha ne no xnëz Dios nu, grëse zho runbey me, tib men nziuu nac me lo zho. Me gacgrop Tit, niina ne laa no cxeel Tit lo to i; ¹⁹ni meque bzooblo zho, sënäl zhits no zeene guiosan no gon rii. Nozhal guiosaña, sac ne nligaa dib zdoo no noxco no zha gac xyudar grë zha ne guiend pe yquii. Nu rlu me ganle pa lotaa men nroob nac Dios, sac me quiayacniën ne ne laa dziin rii noyac. ²⁰Gza no bets co guio, zeena gzadolld zdoo miech guiab zho nend zha lega zhiëen no palal gon rii, sac gon nligaa nroob naca. ²¹Dios zobwi ganle mbe lo no, ni racladz no ye miech gan zho ganle ne nli zha legal nac no. Min co nagon, nacne sca guio no gza no.

²²Rdziuunbey no stib bets ne nu, rdzian no nli dib zdoo me rleynie me Dios. Niina ne laa grop zha co guiaad i, ye me guiaadnal zhits zho. Rley me ne laa me guiaadgan to i, sac ziyon me ye to noxco gacnie to zha ne nacgrë ne.

²³Tel nanđ new cho gnabdiidz lo to dieñ cho nac Tit, golguiab lo zho tipse nac no grop no me, xyudar naa noyun me quiaseed no to. Ni tel gnabdiidz zho cho nac schop zha ne ziaadnal zhits me i, dzigo golguiab grë zha ne ne no nëz rii pxeel zho, dib zdoo zho noxco zho mban zho zigne rdziladz Dios. ²⁴Golguien sca, gza zho zigne ziaad zho lo to i, niowse golcuëzlo zho. Golllu ganle ne nli dib zdoo to rleynie to zho, zigne rleynieque to naa; zeena gacnan grëraa zha ne nacgrë ne nli mine rnee no zeene rzodiidz no lo zho zha nac to.

9 Nanle naa, rquiindpaa gni naa lo to zha gdeed to gon ne gaclo nu gac xyudar grëraa zha ne nacgrë ne, sac laa to noyunlolew. ²Runbey naa to, nanle naa ible rquiabladz to gun to xyudar zho, gacxe waa rley naa rzodiidz naa lo zha ne no nëz Macedon nu, rne

naa lo zho: wdibizlaa psilo to nëz Acay i quiayunlo to gon co. Mincoxe waa, zeene bin zhow, nzian zho pquiabladz laa zho bdeeda. ³Per laa no rxeel gza bets rii ziaad i, ziaadguncsoladz zho to lozh gunlo niob tow; zeena glu ganle led lega rneed no zha nac to. ⁴Sac gon guielto ga griequia naa lo zha rii, tel guialnie naa bla zho i, ni gan zho peet gard gaclo. Nli ziaan naa guielto, per mazdraa gon nac guielto ne guiaan to. ⁵Min co nagon, ni naa mazd cxeel naa zha rii, ziaadnerga zho zeena gun zho xyudar to lozh ycaalsa gon ne pquiabladz to gunlo to ga.

Laa naa rnab lo to, tel pe nac ncuaane cogon to, dib zdoo to goldeeda. Golguien zha cogon to. ⁶Golwi ganle zha nac guielgon: Zha ne zhis ran, zhis guielnzaac ne rcaa zho; sangue zha ne nroob ran, scagaa nroob guielnzaac ne rlis zho. ⁷Tib tib to sca, golcobey palal ncuaane gdeed to. Mine gdeedta to, dib zdoo to goldeeda; ib gunde to ne guiab to por rac-wnabsew laa to gdeeda. Sac gon, zha ne dib zdoo rdeed ncuaane rgogon zho, rleynie Dios zho. ⁸Ni me ne nac me men ne rrieelo rneedz grëse ncuaane rquii, me nac men ne gneedz grëta ncuaane yquii to; ni haxta ziaan mine gdeed to gac xyudar grëraa zha ne nacgrë ne. ⁹Zigne raquietaque lo Xtiidz me, zaatne rnee:

Zha ne nguzobdiidz lo Dios,
dib zdoo zho rgad zho ncuaane rap zho
lo grë zha ne guiend pe yquii;
ni scagaa sëëb diidz ne miech wen nac
zho.

¹⁰Dios gunlay ncuaane quianie to, ygaaw gdeed to, ni scagaa me gacniën to nroobraa guielnzaac ne yгаа to. Golwi ganle, zha runlay me zha ne ran: Me psan grëse lo bni ne ran zho, ni meque rchooba; rlozh ga, nroob guielnzaac ne rlis zho, rgaaw row zho.

¹¹ Ne nligaa, Dios nac men ne gunn-roob ncuane quianie to, zeena scagaa nrooba cogon to. Golguien ganle, zeene laa no guiosana lo grè zha ne yquiina ga, bactaa gley zho gdeed zho xquizh lo Dios. ¹² Led lega nacdse gon ne gdeed to i. Sac gon, led loxaque xyudardse zho guna, sinque zeene laa zho ycaaniaw, haxta squiablazd zho dib zdoo zho gdeed zho xquizh lo Dios. ¹³ Zley zho gan zho grètaa ncuane cxeel to yquiin zho; ni zleynie zho Dios gan zho ron to mine rnabey Xtiidz Jesús. ¹⁴ Haxta dib zdoo zho gnab zho gacniën Dios to, por grètaa guieInzaac ne gdeed me ga yгаа zho.

¹⁵ Xquizh xquieInzaac Dios, sac gon tel me nroobraa nac guieInzaac ne bneedz me lo ne! jGotsaa gwi ne ganle, haxta Xpëed me bleeladz me!

Rieguial gnabey Pabl lo zha Corint

10 Ziyon naa rnee zho i, zeene zose naa zit nguieex rzë xtidz naa rxel naa; laa zeene zo naa lo to, rdziel naa pe gne naa. Sangue tel naa, tibaque nac naa, ndooladz rac naa lo to, nicle zeen tel pe diidz ne rsogaa naa, ndooladz rne naaw; zig gun Jesús, tel niaca mine mezhah gnee lo to. ² jTebaa gdziind dze pe yquiaaqui glu naa xquieIn-dox naa lo to! Zha ne squi rzac lalaque nac no grè no grèraa miech, rnee zho mine run miech, mincoque rdziuun no, jtebaa siguiel zho zaacse gac zho, sac racladz naa tilnie naa zho!

³ Nli miechse nac no, per ib zionald no gacndaan no zigne racndaan grèraa miech guidzliu. ⁴ Sac tel no, choot rnalod grè guuib las ne rnalo zho, sinque laa no rnalo poder ro ne rap Dios; min-cosi zrieelo gnitlo grètaa guieIntseeb ne racladz mendox gac. ⁵ Con poder rii, zrieelo csioog no ro zha ne squitaa lega rnee, zha ne racndaan nëd zho gacnan miech cho nac Dios. Grè zha ne racntseeb lo Dios, con poder rii zrieelo

co no guic zho gbiire gbig zho lo me, gac zho tib miech nguzobdiidz lo Jesús. ⁶ Ni poder co yquiin no gnee no lo to lozh guien to gban to zigne racladz Jesús; lozh ga, grèragaa zha ne racntseeb, lëëquew yquiin no par gacnan zho ganle zha rieguial gac zho.

⁷ Zha ne rnee i loxaque rzedz yan naa, laglaase ga ran zho, nand zho zhapaa nac naa. Naasi xnëz Jesús no naa; gacxe waa, zha ne rnee xnëz me no zho, none guien zho ganle cho nac naa. ⁸ Nana no to guiab guieInatsle nu, sac rlu naa ne naa rnabey lo to. Per nacda guieInats, ible Dios bzo naa gnabey naa lo to, ni laa me bzo naa par glu naa zha tsienal to grè mine rnabey me, bzod me naa par yquidiee naa to tsienal to nëz ne nitlo to. ⁹ Golgacnan sca ganle Dios bzo naa, guiabde to togo lega rnese naa par ctseb naa to. ¹⁰ Sac nanle naa no zha ne rnee i: “Gonde to mine rnee men qui. Loxaque lo guits ne rxeeel me squitaa ndox rzë xtidz me, per loxaque diidza. jZeene zo me lo ne, tib zha yozhsew, per ni rien d me zha gnee me!” ¹¹ Per led scada gon. Nina ne laa naa guial i, laa naa glu lo zho ganle zigne rzë xtidz naa zo naa zit, sca nac naa.

¹² Ib guiabde to, togo ye naa quiayun zigne run zha qui, lëëque lëë zho runniats zho. Tib guieInxen ga, sac gon lëëque zha runnon zho. ¹³ jTel no, choot rdziuunniatsd no ncuane ni nacd no! Ni zeene rnee no cho nac no, per mine bzo Dios no nodziuun no min co rnee no; ni mecxe waa bzo no quiaseed no to.

¹⁴ Ible rioguial ne no gnabey lo to, sac gon no gloopaa biaad i biadseed no to zha nac Xtiidz Ndzon Jesús; choot noziaabd zaatne rioguiald no. ¹⁵ Stiba, rdziladz no gdaannie no xtsiin stib miech. Laa no bii cseed to lozh tsoguic to zha nac Xtiidz Dios, zeena haxta yele to gun xyudar no ygaazraa Xtiidz me. ¹⁶ Dzigosi nagon laa no guio grèraa guiedz ne ndxie dib nëz

qui, guioseed no zho gacnan zho zha laa zho lo dol; per zig rneque naa ga, guiosi-aabd no zaatne psilole stib zho, zeena gan miech ganle rdaannied no xtsiin stib zho.

¹⁷Znu ziaad lo Xtiidz Dios, zaatne rnee: “Zha ne zienie guic xoobnen lē zho por dziin ne run zho, mazd tsoxco zho xoobnen lē Dios.” ¹⁸Sac paat rquiinda ne lēēque ne gunnon ne, miñe mazdraa rquiin nacne Dioszhal glu zha non nac ne.

Nlid Dios pxeel zha qui

11 Laa naa rnab lo to, golxecw yquiaadiag to miñe gne naa nu, niicle tel no miñe rzac to rquiind! ²Golgacnan ganle, zigne rzac Dios to scaque rzaac naa to, ib racladzd naa cho guiaadquidie to. Miñe racladz naa Jesússe gleynie to, zig run wnaa nguieg ne no xtiidz ctsieelnia. Sac tel wnaa nguiega, mgui ne no xtiidz zho mgui cose rleynie zho, haxta rdzin dze ne rtsieelnia zho. ³Sca none grieequia to lo me; per rdzieeb naa gon nend zha yguib mendox yquuil ma to, gondraa to miñe rnabey Dios, dzigo laa to gac zig rac grēraa miech ndzinlid. Sac gon tel Ev, sca pquuil ma Ev.

⁴Laa naa rzet min rii lo to, sac rien naa, zha ne riaadtaa i ween rdeed to diidz rquiaadiag to zhiwseed zho. No zho rzeet Jesús, rzeetгаа zho espíritu, per rzeete zho me zigne biadseed no to; rneegaa zho zha laa miech lo dol, per nacda zigne pseedle to glo. ⁵Haxta rnee zho, rienraa zho lo grēraa zha ne no- teed Xtiidz Dios; sangue naa, nanpaa naa led scada, zrieelo glu naa lo zho ganle peet riend zho. ⁶Nend nli gacd naa gne naa zigne rneetaa zho, per zeene rne naa rienpaa naa ne diidzli none naa; ni zianlegaa tow ganle.

⁷Rzaac naa lēda ga ben naa, zeene bial naa bialseed naa to Xtiidz Dios; sac rso-

ladz to ganle ib peet bnabd naa lo to, scase bialseed naa to. Niicle mban bdeed naa, per bioxco naa wbig to lo Dios bgaa to guielnzaac nroob ne rap to niina. ⁸To rieguial needz ncuaañe nquiin naa, na le grē zha ne nole xnēz Jesús len dze co, zha co pxeel ncuaañe pquiin naa, rriequia bla naa xtimi zho ga. ⁹Niicle bdzin dze ne peet quiendraa lo naa, per ni tib lo to ib psodziind naa; lēētaque len dze co biaad bla zha bets ne zha ne ziaad nēz Macedon, zha co biaadnie ncuaañe pquiin naa. Ib peet bnabd naa lo to hor co, ni gdziindгаа dze ne pe gnab naa. ¹⁰Ni golgacnan ganle, ib tedsod sodidz naa grē min rii dib nēz Gres i. Ible zun naaw, led yed naa rquidie, sac gon runbey naa zha nac Xtiidz Jesús. ¹¹Per guiabde to togo rlēēnie naa to, racladz naa csan naa to guielto; sac Dios zobwi ganle rleynie naa to. ¹²Golgacnan sca led scada, sinque laa naa gun min co, zeena csioog naa ro zha ne rlozhd gacniats i, rnee zho ye zho quiayun xtsiin Dios zigne quiadziun now. ¹³Sanguie no, ndion no nlid Dios pxeel zho, lega noquidiese zho to i squi no zho, rquiaalo zho zig nacne nli xtsiin Jesús quiayun zho.

¹⁴Ni led ncuaañe gzeed zdoo ne ga. Sac ible sca run mendox, no hor rzēēb ma rded ma zig tib xmandad Dios. ¹⁵Gacxe waa, zha ne squi run xtsiin ma, mincoque run zho rquiaalo zho rac zho zig cho miech wen, rquidie zho miech! Per dzin dze ne laa zho yгаа guielndox ne tsieguial zho, zaatne tsietizh zho grētaa miñe noyun zho i.

Blactaa ncuaañe zadeed naa

¹⁶Laa naa rnab lo to nu stib, golquiaadiag miñe gne naa, niicle tel rzē xtidz naa zig rzē xtiidz zha ne rzhinle guic. Nli lega niats gne naa, per golxecw gon tow, sac laa naa gunnon naa zig run grē zha qui. ¹⁷Led Jesús dnabey znu gne

naa, sinque masaque laa naa gun min rii, zig run tib zha ne riotsle guic. ¹⁸ Te^l squitaa niats rac zha qui lëëque lëë zho runnon zho, lozhd gool zho lo to dien pe nac ncuaane noy^{un} zho; golquiaadi-aggaa mine gne naa nu na ganle:

¹⁹ Conque rzac to name nixbiini to, ¿zha nac dzigo rdeed to diidz rquiaadiag to ncuaane rnee grë zha yozh qui? ²⁰ ¿Pe ib riende to ganle quianabeyzhoole zho to i, quiasacsi zho to, quiaquidie zho to, quiala zho grë ncuaane rap to, quiasanwin zho to, ya zig zgap zho lo to? ²¹ ¿Haxta rtoladz naa gon, sac laa ne naa squi nabey to lel zhale squitaa no!

Grë ncuaane riats zho i nac zho, ye naa zrieelo sca gunniats naa naa (znu nagon rac zha ne rhin guic). ²² ¿Te^lne riats zho rnee zho zha Israel nac zho? Yecxe naa waa zha Israel nac naa. ¿Te^lne rnee zho lo dii ne bzooBlo Dios ga ziaad zho? Ye naa lo dii co zial naa. ¿Te^lne rnee zho Abraham nac xmengol zho? Men cocxe waa nac xmengol naa. ²³ ¿Te^lne niats rac zho rnee zho xtsiin Jesús quiyun zho? Gacnan zho ganle, naasi xtsiin paa me quiyun naa. Nroob dziin ne ziyun naa, blactaa ncuaane zadeed naa, pe zhidaa zigo miech naa ladzguiib, blactaa zineedz dooguid zho naa, blactaa zaatne zadedlaa naa lo guielgut. ²⁴ Gaayle vuelt zisacsi zhiwxtis zha Israel naa, galptsib guieega nia dooguid bneedz zho naa. ²⁵ Tsonle vuelt zineedzyag zho naa, stib vuelt bneedzquie zho naa. Tsonle vuelt zadieelo naa rdedquie barcw ne no naa len nisdoo; tib vuelt, tib dze tib guieel bzhoobse naa lo nisdoo. ²⁶ Pa lotaa grë dan ne ziya naa. Nzian vuelt ne bdedlaa naa niet naa: zaatne bdedlaa naa lo nis guiubee, zaatne bdedlaa naa lo ngbaan, zaatne bdedlaa naa lo grë menzit, zaatne bdedlaa naa lo grë menladz naa. Ziyoxtseeb naa lo guielgut, zigtaa zaatne nac len guiedza, zaatne nac dana, zaatne nac lo nisdoo, zigtagaa lo grë zha ne

laglaase rquiaalo rliladz Jesús. ²⁷ Blac-taa rdib rdzaag naa run naa dziin, blac-taa guieel ni niip raaguiesd naa, blac-taa zaatne retgbin naa, zaatne retnis naa, zaatne rcuan naa, zaatne mbanse rcuub naa ni guiend lar ne piix naa. ²⁸ Ni zhaaque tibaque nonie guic naa dien yo to, grëse to ne nac to zha ne nole xnëz Dios, zha no to tib tib guiedz zaatne squi blansole Xtiidz Dios. ²⁹ Zeene ron naa cho tib to racladz guiaan zdoo, mban rac naa zeene rrieelod gane naa lo zho; zeene rongaa naa cho tib to quiyunctal xtol stib zho, ni rrieelod galisqui naaw lo zho, scaque mban rac zdoo naa.

³⁰ Grë mine bne naa nu, nacda guielni-ats; telne rieguialpaa gunniats naa naa, mazd gzet naa grë mine rlu ganle peet gacd gun naa naase. ³¹⁻³³ Zig bzhaac naa tib vuelt zeene bia naa Damasc, len dze co zob tib gobnador nac dziin lo rey Aret. Bnabey gobnador co xmenguiib me pquianap zho gzase puert ne rap biedz nroob ne ndze igo ro guiedz co; nan me naaz zho naa ngo zho naa ladzguiib. Per brieelod naaz zho naa, sac grë zha ne nole xnëz Jesús ga, zeene bin zhow dzigo bloo zho naa tib len chicuid pteed zho naa tib ro ventan ne quia cho biedz nroob co. Sca bdeeda diidz brie naa ga, biabd naa ladznia gobnador co.

Ni Dios gon, men ne nac Pxoz Jesús, men ne rieguial dziunnon ne gzataa dze, me zobwi ganle diidzli rne naa.

Racniatsd Pabl

12 Nanle naa nonguilda lëëque ne gunniats ne, per laa naa sodiidz lo to ganle zha nac grë ncuaane zinabey Dios zilulo lo naa, ni grëgaa mine zinee me lo naa.

²⁻³ Niina rac tsiida iz ga blis Dios naa güeynie me naa gbaa. Nand naa dien pe dib znu naa bia naa, te zhiespirituse naa ye güeynie me; loxaque mese nan dien zha güeynie me naa. Loxaque mine

bien naa ne laa naa bia lugar ndzon co, ⁴ga bin naa grë diidz ndzon ne wla-taa gard gon miech, ncuaañe guiend zho zha naca, ni nodgaa diidzbey gne naaw. ⁵Zrieelopaa nagon gunniats naa naa ne laa naa bia ga, per ib gund naa min co. Laa ne gunniats naa naa zig rnele naa ga, mazd gzet naa grë miñe rlu ganle peet gacd gun naa naase. ⁶Ni tel gacladz-gaa naa gunniats naa naa por miñe blozh bzet naa nu, led guieñxend ga gun naa; sac miñe nlipaa gaclad. Per rund naa min co, sac laa naa racladz tozhald guieñ cho nac naa, benque ran to ganle zha mban naa, rangaa to zha rne naa.

⁷Ne nligaa ndzondoo nac grë ncuaañe blu Dios lo naa ga, zac nazho gunniats naa naa sac naa gona; per parne gund naa min co, laa Dios bdeed diidz biaad tib xmandad mendox psanwin naa, baañ tib yoob xcuerp naa zig nac zeene pe tib quiets nroob ne niaaz naa. ⁸Tsonle vuelt zinab naa lo Dios ctiche me yoob rii; ⁹biontaa vuelt në me lo naa: “Bui ganle laa naa naciele luu, ni min co nac miñe rquiinraa lo luu. Peet tsienied guic luu sca, zha ne squi nsis rac, ga rdeeda diidz rlu naa ne nli naa nacie zho.” Min co nagon rley naa, sac ne znu nsis rac naa, grëse miech zeene ran zho grë-taa ncuaañe rrieelo run naa, rien zho nli Jesús nacie naa. ¹⁰Ne nligaa rley naa, sac niicle ne miech gzhe gzhele rac naa, niicle nroob guieñe ne nodeed naa, niicle rbidzgo miech lo naa, rtsidil zho naa, no hor guieñd pe yquiin naa, per rley naa sac laaw nodeed naa porne no naa xnëz Jesús. Rne naa rley naa, sac zeene sca zootle grieequidraa naa lo zhgab ne no naa, hor co laa Dios rlu ne me nacie naa.

¹¹ñNligaa lega guieñxenle nu znu rne naa, rac naa zig tib zha ne rzhinle guic! Per to gon rap dol, sac laa ne cxobnen to nli miech wen no, lel zhaa miñe noyun to. Nli nacd naa cho zha non, per tsod

ncuaañe csanwin grë zha qui naa, niicle ne squitaa rzac zho zha rien nac zho, niicle ne mee zho Dios pxeel zho. ¹²Gol-soladz ganle, zeene bialseed naa to i, blu naa lo to ne nli Dios pxeel naa noteed naa Xtiidz me, blactaa grë ncuaañe bneedz Dios diidz blu naa lo to, blactaa grë milagr, blactaa grë ncuaañe bzee zdo to gon to. Biod dze ne nieednie naa to. ¹³Lëese miñe bend naa lo to i, nacne nab naa needz to pe nquiin naa; sac grëraa zaatne ziyaseed naa miech, zha nneedz ncuaañe rquiin naa. ¡Golgun dispensar telne rbinladz guic to min co!

Nonie zha Corint guic Pabl

¹⁴Laa naa nozhixcuuaale par guialgan naa to stib. Nu gac tson vuelt guial naa lo to i; ni scaquegaa niina gon ib csodziind naa lo to. Sac tel naa, noguibd naa dien pe gneedz to lo naa, sinque to guialguib naa. Golguien ganle, niicle ne racladzde to, per rriequia gon mëed nac to lo naa; ni ndion ne ganle, led mëete rieguial gdeed ncuaañe yquiin dad, sinque dad none gdeed ncuaañe yquiin mëed. ¹⁵Ne nligaa, tib guieñbleya lo naa quiateedlo naa to, laa naa noxco guieñ to zaacse gban to, zeena gdzin to zaatne gneedz Dios cuëz to. Xco co no naa, ib rquiad zdo naa lozh grë ncuaañe rap naa, o lozhgaa naa lo xco co; maase niicle squi zootne laa ne rleyneraa naa to, lel nozozit to lo naa.

¹⁶Nanle naa, no bla zha ne mee i: “Nli peet bnabd me zeene biadseed me ne, per ne squi miech ndzielguic nac me bod no pa stib mod ne rien ne quiban me ne.” ¹⁷Nana, zig nac zha ne zixel naa ziyaadgan to i, ¿pe niacxe biaadban zho to? ¿Pe niacxe biaadquidie zho to? ¹⁸Naa quia bnab naa favor lo Tit biaad me i, ni pxel naa stib zha bets ne biaadgrop me. ¿Pe no pe bnab zho lo to? Gol-gacnan ganle nodziuuñd no min co, sac zigtaa naaw, zigtagaa mew, dib zdo no

nodziuuñ no dziin rii, choot noquidied miech.

¹⁹Nana gza zdoo to guiab to bod parne guiaaŋwen no lo to, gane znu rne naa. Dios zobwi gañle led scada. Bets, bzian, grē miñe none naa lo to nu, laaw rne naa sacne racladz naa lozh tsoguic to gban to zigne nac Xtiidz Dios. ²⁰Sac gon, rdziladzd naa telne glanso naa lo to i, ni gañ naa racde to zigne racladz naa; dzigo niicle togaaw, tsod zdoo to zeene gañ to laa naa glisquiw. Adel gon zeene laa naa glanso i, leñ dil no to; zha ne nē rac zdoo dien cho stib noded, zha ne nozhixcuuaa diidzguizh, zha ne quia- neenē, zha ne quiaacniats; nend haxta chop tson diile nac to. ²¹Tel gañ naa sca rac to, mbe gon stoladznie naa to ni haxta siaabguieñē to naa; sac nanle naa ni lalnu rdziladzd Dios grē miñ co. Zig nac grē zha ne squi padzeelale quiaayunc- tal xtoñ ni rsaand zho grētaa guieiyozh, grētaa ncuane ndzinlid ne bii quiaayun zho, mbe gon sigoon zho naa.

Rso Pabl diidz

13 Niina nagon ne gac tson vult guialgañ naa to, tel pe nactaa falt ne cho quiaayun i, guiaanda scase. Zigne rnee lo Xtiidz Dios: Tel no chop zho, tsongaa zha ne nana zha nac falt co, zha ne beena ga ib none laa zho quizh xfalt zho. Nu rac bion vult ne rso naa diidz rii lo to. ²Laaw nile naa lo to lultm vult ne bialgañ naa to, ni niina laaw rneque naa stib: Grēse zha ne quiaayunc- tal xtoñ i, zigtaa zha ne padzeelale squi no, zigtagaa zha ne wriin psilow, gacnan zho gañle zeene laa naa glanso i, grēse miñe quiaayun zho ib tedlaad zho, laa naa gunquizh zhow zigne rieguial zho. ³Ga gañ to gañle nli Jesús rnabey naa, ni Xti- idz me none naa lo to; sac mesi gon, gdziguiend me sca gac to, sinque zigne racladz me sca none gac to. ⁴Nli nguudz goc me bdeed me diidz pquiaa zho me

lo cruz hor co, sangue niina men rnabey nac me; laa me mban niina niapse por poder ne rap Dios. Ye no, zig nac niina miech nguudz nac no, per ible zgaa no tib guieimban ndzon, sacne me nacnie no; ni zrieelo gnabey no to sacne rdzi- aap no xpoder me.

⁵Nana sca, tozhal golcobey dien zha mban to. Wen wen golcobey dien pe nli dib zdoo to rililadz to Jesús. ¿Pe nli mban to zig none gban zha ne rililadz me? ¿Pe zig zie dze rienraa to ne me nacnie to, me rnabey lo to? ¿Te loxaque diidzse ye nac ne laa to rililadz me? ⁶Sangue no gon, wen wen ndion no zha mban no, ndion- paa no ne lo Jesús ngab no.

⁷Tibaque rnab no lo Dios cxobnia me guic to zaacse gban to. Ni guiabde to togo par guiaannziuu no lo miech gane noxcopaa no zaacse gac to; sinque laa no rdziuuña parne gban to zigne rieguial gban zha ne nli no xnēz Dios. Miñ co nagon noxco no, niicle tel rzac to lēda nu quiadziuuñ no. ⁸Sac tel no, laa no zional gac to miech wen, zha ne zienal miñe nac diidzli; choot ziaate par lega gactox no lo to. ⁹Gacxe waa, tib guieibley nroob ga lo no, telne zhal to znuse xixcuua to, gac to zha ne nlipaa dib zdoo rleynie Dios; laa ne yquiambēz to guiaadlisqui no grē ncuane noyun to. Laa no racladz gdziñ dze ne gac to zigne rdziladz Dios, ni miñcogaa quianab no lo me.

¹⁰Laa naa rso diidz rii lo to lo guits ne rxel naa nu, sacne racladzd naa gac- tox naa lo to zeene laa naa glanso i. Nli Dios bzo naa rnabey naa lo to, ni miñe racladzpaa naa nacne lozh tsoguic to zhi- wseed me; ib racladzd naa yquiaago naa to.

¹¹Nu ne laa naa csiaal lo guits rii, laa naa rnab lo to bets, laa naa rnab lo to bzian: Nley golgac, goltsoxco gban to zigne racladz Dios, zha ne mban rac, gol- choobladz zdoo zho; ine niowse golban, tipse golgac. Scagaa Dios zleynie me to,

ni haxta zacnie me to zeena peet ctsebde to.

¹²⁻¹³ Nana sca, tib tib zha ne nacgrë to golquiaabdiuzh zho, ine golxen_n nia zho. Grëse zha bets ne, zha bzian ne, zha ne rililadz Jesús nëz rii; laa zho rxeel_l bdiuzh lo to. Golcaania zhibdiuzh zho.

¹⁴ ;Dios sca guiaannie to! Ine nley golgac, golgan_n ganle pa lotaa rleyne me to. Peet tsienied guic to, Jesús nac men_n ne noxco grë zhizhgab to; ni scagaa Espíritu Sant gacniën to tibaque tipse gac to.

Pabl

GUTS NE PXEEL PABL LO ZHA

GALÁS

1 ¡Diuzh to grëse to!

¹ Naa nac Pabl, tib zha ne pxeel Dios nonee Xtiidz Ndzon me lo miech. Led miechd bzoo naa, led miechd pxeel naa, sinque Jesús pxeel naa, me ni Dios Pxoze me, men ne bleeaban me.

² Laa naa rxeel tib guts rii ziaad lo to zigne no to nëz Galás i, nac to zha ne ngab lo Jesús; rquiaabdiuzh naa to, ni scagaa grë zha rii laa zho rxeel bdiuzh lo to. ³ Dios men ne nac Pxoze ne, ni Jesús men ndzon ne rnabey, me nac men ne tsoxco grë zhizhgab to, zeena peet tsienied guic to. ⁴ Jesús bdeed xquielmban bdiizh me xtol ne, psilaa me no lo grëtaa guieintseeb ne no lo guidzliu rii, laaw been me zigne gocladzse Dios men ne nac Pxoze me. ⁵ ¡Gotsaa dziuunnon ne Dios sca, ni gdziind dze ne csaan ne dziuunnon ne me! Sca rieguiala.

⁶ Rzee zdoo naa gon ne gardle gac nroob dze ga, laa to bzozitle lo Xtiidz Ndzon Dios, men ne bredz to pcaania me to, porne nquialadz Jesús to. Wseed ne riladz to niina, masaque rzac to na mincogaa csilaa to lo dol. ⁷ Per guien-draa stib wseed ne gon csilaa ne lo dol. Mine naca zha ne biadseed to i, lega rquidiese zho to, racladz zho ctsë zho mine nac Xtiidz Ndzon Jesús.

⁸ Grëse zha ne guiaadnie stiblo wseed mine pseete no to, ni gnë zho lëe min co csilaa to lo dol; zha ne sca gun, miech ndziibdeele ga nac zho. Tel chotaa sca gun, niicle tel naazhala, tib anjl ne guietgaa gbaaw, ible zdzibdee Dios zho. ⁹ Bnele naaw lo to, ni na laaw rneque naa stib: Tel cho zha ne guidseed to stiblo wseed mine pseete no to, ni gnë zho lëe min co csilaa to lo dol, ible zdzibdee Dios zho.

¹⁰ Nana gon ne znu rne naa, no to guiab parne guiannziuu naa lo miech gane znu rne naa; per golgacnan ganle, quiaguibd naa guiannziuu naa lo miech, sinque laa naa noxco gun naa mine rnabey Dios. ¡Sac telne lel ncuaae gleynie miech noxco naa, nlid dzigo xtsiin Jesús ga noyuu naa!

Jesús pxeel Pabl gnee Pabl Xtiidz me

¹¹ Bets, bzian, golgacnan sca ganle: Wseed ne nac Xtiidz Ndzon Jesús, mine bialseed naa to, led guicd miech bibaba. ¹² Paat biad naa nseed miech naaw, sinque Jesús zhal bneedza lo naa.

¹³ Led nanle to ganle, zha nactaa grë mine ben naa zeene bii no naa lo zhiwseed zha Israel; ptsidil naa grë miech ne no xnëz Jesús, blëenie naa zho, pquiana naa nloozh naa zho. ¹⁴ Bzhoob diidz ne naa nac zha ne pseedraa lo grë menladz naa, zha ne tipse biagrëe naa scuel; naa nac zha ne neer lo zho, sac naa run grëse mine rnabey zhiwseed zha Israel, ni naa rioxcoraa run grëse mine been grë pxozgol no. Sca nagon goc naa lo zha Israel.

¹⁵ Ible güeynied guic naa, antes ne gal naa laa Dios bzooblolle naa gunbey naa Xpëed me; laa me bleextsole naa, niapse porne nquialadz me naa. Zeene bdzin dze co ¹⁶ laa me blu me lo naa, bzo me naa ga naa zaatne ndxie grë miech ne nacdraa zha Israel, gaseed naa zho Xtiidz me mine glu zha laa zho lo dol. Zeene blozh gon naa Xpëed me, biad naa niaguib naa ne goon dien cho nseed naa, ¹⁷ ni niicle biadgaa naa Jerusalén, nianabdiidz naa lo grë zha ne pxeelle me nonee Xtiidz me; sinque laa naa bia nëz Arab, wbirele naa nëz co, dzigoraa bdziin naa Damasc stib.

¹⁸ Gocle tson iza dzigoraa bia naa Jerusalén, hor coraa beenbey naa Pedr; blëz naa lo me ga tsiin ngbidz. ¹⁹ Gaque beenbey naa Jacob bets Jesús, laa grëraa

zha ne pxeel Jesús noyuu xtsiin me, ni tib zho gonḁ naa. ²⁰ Dios zobwi ganle didzli nac grē minē rne naa nu, led lega rned naaw.

²¹ Zeene brie naa ga, laa naa bia nēz Siria ni nēz Cilis. ²² Grē zha Judé zha ne nole xnēz Jesús, gard gunbey zho naa len dze co. ²³ Diidz ronse zho rnee zla zha ne nacgrē zho: “Men ne scataa pquianaḁ ne, yeḁ me noseed miech Xtiidz Dios, ni glo scataa gocladz me nitlo mew.” ²⁴ Dzigo rley zho, rdeed zho xquizh lo Dios ne yeḁ naa rliladz Jesús.

Rcaania zho Pabl

2 Zeene blozh tsiida iza, dzigo laa naa biire bia Jerusalén stib, bio no grop no Bernabé, ni bionie no Tit. ² Laa naa bia, sac ib Dios blu lo naa ne no ga naa. Dzigo ga pcaalsa no grē no zha ne zo rnabey lo grē zha ne no xnēz Jesús ga, bzodiidz naa lo zho zha noseed naa grē zha ne nacd zha Israel Diidz Ndzon ne rlu lo zho zha laa zho lo dol, ni naa zeena guien zho ganle ne nli rquiin dziin ne benle naa, ni minē quiayungaa naa. ³ Ni nligaa bley zho bin zhow.

Niicle ne led zha Israeld nac Tit, per bnabeyd zho niopaa Tit bey ne rio grē zha Israel. ⁴ Per lo zha ne zioobgza no ga, lad co brieequia bla zha ne bnab nio Tit bey co, per choot pquiaadiagd xtiidz zho. Nac diidz ye zho rliladz Jesús, per nliḁ; ib blud zho cho nac zho, ngeets bzēb zho lad no biadleets zho dien zha mban no, niina ne Jesúsle rnabey no, rnabeydraa ley no. Gocladz zho nquiaadiag no xtiidz zho, biire ndziuuḁ no minē rnabey ley. ⁵ Per ni palal bdeete no didz niac minē rnee zho, laa no racladz guiaannie to Xtiidz Ndzon Jesús minē rlu zha laa miech lo dol, sac min co nac diidzli.

⁶ Grē zha non ne zo rnabey lo grē zha ne no xnēz Jesús ga (zha non guiab ne, per ndion ne ganle grēse ne tibaque nac

ne nēz lo Dios) ⁷⁻⁸ ib peet blisquid zho lo naa, niicle peet pseetragaa zho naa. Sinque laa zho gocnan ganle ne ib Dios bzoo naa gun naa xtsiin me, gaseed naa grē zha ne nacd zha Israel guien zho zha laa zho lo dol; zigne bzoque me Pedr noseed Pedr zha Israel. Dios men ne bzo Pedr quiaseed Pedr zha Israel, lēēque me bzo naa quiaseed naa grē zha ne nacd zha Israel.

⁹ Gacxe waa, zig nac Pedr, Jacob, Juan, zha ne zo rnabey lo grē zha ne rliladz Jesús ga, laa zho bien ne ible naa bgaa guienzaac rii, bneedz Dios dziin rii lo naa. Dzigo rley zho haxta bzhen zho nia no grop no Bernabé, laa no biaan diidz ne zha tsieseed zha Israel, laa no guioseed grē zha ne nacd zha Israel. ¹⁰ Lēēse minē pso zho diidz lo no, dzioxco no dziuuḁ no xyudar grē zha ne guienḁ pe yquiin; ni nligaa ib nonguiel min co ni laaw noyoxco naa.

Ractox Pabl lo Pedr

¹¹ Laa zeene biaad Pedr Antioquí, dzigo ga nli laa naa goctox lo Pedr, sac ncuane ndzinlidraa quiayun Pedr. ¹² Glo, grēse zha ne nacd zha Israel zha ne rliladzle Jesús, rzēnie Pedr zho, tipse rbenie Pedr zho zeene laa zho row; ni blozh ga, zeene laa bla zha ne pxeel Jacob bdziḁ ga, pasēraa Pedr sca tipse niownie zho, laa Pedr bzozit lo zho. Rdzieb Pedr zha ne bdziḁ ga, sac lēē zha co racladz, grēse zha zit ne rzēb xnēz Jesús ib none tso zho bey ne rio zha Israel. ¹³ Grē zha Israel ne nole xnēz Jesús ga, yeque zho laa zho gocnie Pedr lo xtseb Pedr ga, haxta ye Bernabé wbig lo zho. ¹⁴ Nacne zeene gon naa sca zienal-draa zho zigne nacpaa wseed ne ziaadnie Xtiidz Dios, squi ndxie grēse zha ne rcaalsa ga goctox naa lo Pedr, rep naa: “Luugase name niicle ne zha Israel luu, ni mband luu zigne nac zhiwseed zha Israel, ꝑe nac dzigo ne racladz luu gnabey

luu grë zha ne nacd zha Israel, gban zho zigne nac zhiwseed zha Israel?”

Zha rlaa miech lo dol

¹⁵ Golquiaadiaga ganle, tel no desde gol no zha Israel nac no, nacd no zigne nac grëraa miech ngoopdol ne nac stib nacion; ible pseed no grë mine nac xley zha Israel. ¹⁶ Sangue niina laa no ndion ganle, niicle mazdraa gun miech mine nac ley grielod guiaanwen zho lo Dios, sinque zha ne dib zdoo gliladz Jesús, zha co nac zha ne guiaanwen lo me. Gacxe waa, ye no laa no bliladz Jesús dib zdoo no, zeena guiaanwen no lo Dios; ni laa no guiaanwen lo me porne dib zdoo no rliladz no Jesús, nacd porne dziuun no mine nac ley. Sac gon niicle zha ne tsoxcoraa gun zho grë mine nac ley, grielod guiaanwen zho lo Dios.

¹⁷ Nana ne laa no wbig lo Jesús parne guiaanwen no lo Dios, no zha ne rzac dol ga. Masaque rzac zho xtol no ga rdziuunctal no porne rliladz no Jesús, per, led scada gon! ¹⁸ Mazd dol ga gun naa, telne rlozhle rseed naa miech rne naa lo zho ne led leyd nac mine csilaa ne lo dol, ni lozh ga naaque no lozhd tsoxco gun grë mine nac ley. ¹⁹ Sac tel naa, ib brieelod niun naa grë mine rnabey ley, ni zha ne rguiits ley gon ib none guet zho; gane niina masaque rriequia laa naa gutle. Niina ne laa Jesús gut por grë xtol naa, rriequia ye naa gutnie me ga, zeena grielo gun naa mine rnabey Dios. ²⁰ Led naadraa nu znu mban, Jesúsle nu mbannie naa, ni guielmban ne mban naa niina, lëe min rii bneedz Dios lo naa porne rliladz naa Xpëed me, men ne rquia zdoo naa, men ne bleeladz xquielmban ga beet zho me bdiizh me xtol naa. ²¹ Nana, telne niaca mine nli zrieelo guiaanwen ne lo Dios porne gun ne mine nac ley, zhlëse ga dzigo biaadguet Jesús. Golgacnan sca ganle, Jesússe nac men ne csanwen ne lo Dios,

gacxe waa nonguielä ga csan ne me tibläd, ni pa lotaa ga pquia zdoo Dios ne.

Jesús none gliladz miech

3 ¡Nadzpaa nxen to nac to zha Galás! ¿Pe goc to, cho biaadgunüet guic to squi rac to? Pe led zeene biadseed no to, wen wen gocnan to cho nac Jesús, ni zha nacne sca beet miech me lo cruz. ² Zhal to golcobey dien, ¿pe ne been to grë mine nac xley zha Israel, laa to bgaa guielbiini chen Espíritu Sant, te ne bliladz to Xtiidz Diosa ye? ³ Pa lotaa gon rdzin lo xquieln xen to i, conque laa to gonle ganle ne niapse por guielbiini chen Espíritu Sant laa to psilo mban tib guielmban cub, ni na nanaque to tsienal to ley. ⁴ Pe nlipaa rnee to, ¿pe lega scase nazho gon to grë guielnë ne pteed miech to, zeene psilo bliladz to Xtiidz Jesús? ⁵ ¡Golzhixcuaa guic to! Golguien ganle, laa Dios bneedz zhiEspíritu me lo to, ni laa me noyun grë milagr lo to, per nacd porne run to mine rnabey ley, sinque porne dib zdoo to rliladz to Xtiidz mew, mine biadseed no to.

⁶ Zig Abraham, porne dib zdoo me bliladz me xtiidz Dios mine rëb Dios lo me, gane pcaania Dios me zig tib zha ne peet xtol. ⁷ Golgacnan sca ganle, grëse miech ne dib zdoo gliladz Xtiidz Dios, grëse zha co laa Dios ycaania zho zig xpëedpaa Abraham. ⁸ Ni mine nodzian ne niina, ib lo Xtiidzle Dios zhubneew, zeene bnee me ne grëse miech ne nacd zha Israel, silaa me zho telne dib zdoo zho gliladz zho me. Lëe min co ga bnee me zeene znu rëb me lo Abraham: “Grëse miech ne ndxie dibdoo lo guidzliu, zha ne dib zdoo gliladz naa zigne rliladz luu naa, zunlay naa zho.” ⁹ Gane grëse zha ne dib zdoo rliladz Jesús, runlay me zho zigne beenlayaque me Abraham, zeene laa Abraham bliladz me dib zdoo Abraham.

¹⁰ Sangué zha ne rnalo ley ne lëwéw csilaa zho, laa zho noyac ndziibdeele ga, sac lo Xtiidz Dios no tib zaatne rnee: “Ndziibdee grë zha ne grielod gun grëse zigne nac ley.” ¡Ni tsod zha ne gon grielo gun grëse mine rnabey ley! ¹¹ Gase naganle rlu tsod tib zha ne grielo guiaanwen lo Dios por gun zho mine nac ley; ni laaw zhubneeque lo Xtiidz Dios zaatne rnee: “Zha ne guiaanwen lo Dios, laa zho guiaanwen porne dib zdoo zho gliladz zho me; ni zha co ygaa tib guielmban ndzon.” ¹² Led yed ley rnab dien cho dib zdoo gliladz; sinque rneew: “Zha ne racladz gban, none gun zho grëse mine rnabey ley.”

¹³ Min co nagon, grëse ne nac ne miech laa ne biabdee, sac brielod mban ne zigne nac ley. Per niina, laa Jesús bиаad-silaa ne lo grëtaa dee co, masaque lëë grë dee ne nac ne ga bi me zeene sca pquia me lo cruz; zigne zhubneeque lo Xtiidz Dios, zaatne rnee: “Miech ndziibdee ga nac grëse zha ne ret rquianga zho tib lo yag.” ¹⁴ Ni por mine sca bded Jesús ga, min co niina grëse miech ne nacd zha Israel, zac ygaa zho grëse guielnzaac ne bzeet Dios lo Abraham ga; ni niicle tib tibгаа zha ne ngab lo mew, scaania zho Espíritu Sant, Espíritu ne rëb me cxeel me lo grë zha ne dib zdoo gliladz me.

Zha ne nlipaa nac xpëéd Abraham

¹⁵ Bets, bzian, laa naa gzet ncuane rac lo guidzliu rii. Nanle to ganle, zeene laa chop miech run tib trat, rquia mine rnee zho ga lo guits ni rquia lë zho lo guits co grop zho; zeene laa lë zho pquiase ga, ni tib zho gacdraa ctsëë trat co. ¹⁶ Nana gotsaa gwi ne ganle zha been Dios: Psan me xtiidz me lo Abraham, ni tib lo men ne grieequia lo xti Abraham. Raquiete nzian zho, rëbd me: “grë zha xti Abraham”, sinque tibaque men ne bzeet me, ni lëë men co ga nac Jesús.

¹⁷ Znu nagon nac mine quiane naa lo to nu: Tib trat ga been Dios grop me Abraham, zeene rëb me scaania me grëse zha ne dib zdoo gliladz me; ni ible laa xtiidz co me biaan zig tib trat ne quia lë me lo. Min co nagon, grielod ctsëë ley trat co; zig nac ley, blozhle tap gayoo galptsii iz biaan xtiidz co me zeene laa ley bиаad. ¹⁸ Nana, telne por gun ne mine rnabey ley, laa ne ygaa grë guielnzaac ne bzeet Dios lo zhitrat me gdeed me por tib men ne grieequia lo xti Abraham; ¿pazhe dzigo rquiin trat co? Sac lo trat co gon raquiet ne por tib men ne grieequia lo xti Abraham, laa me gneedz guielnzaac co lo ne.

¹⁹ Nana gnë to: “¿Pa dzigo rquiin ley ne laa ley biaan, ni tel nole trat co glo?” Laaw biaan gon zeena glu ganle zha nac miech, ib rond zho mine rnabey Dios zho, laaw been dziin laga bdzin dze ne laa men ne briequia lo xti Abraham ga bиаad, men ne bzeet Dios ga zeene psan me xtiidz me lo Abraham. Ni tel ley, dze ne pcaania zha Israela tib xanj Dios pxeel me bdeeda lo Moisés, dzigo Moisésle psana lo menguedz Israel. ²⁰ Sangué dze ne been Dios trat co grop me Abraham ne laa me csilaa miech lo dol, pxeeld me cho tib miech, cho tib anjlgaa niaadnie xtiidz me; sinque mezhal biadnëew lo Abraham.

¿Pa rquiin ley?

^{21–22} Nana gnë to: “¿Zig gocladz dzigo lëë nsiooglo xley Moisés lo trat ne been Dios ga?” ¡Led scada! Sac grielod ygaa ne guielmban ndzon ne gdzind dze lozh ga, telne gnalo ne ley; ib grielod ley csanwena ne nëz lo Dios. Telne niaca mine nrielo ley nsilaaw miech lo dol, nod pe nacd dzigo nxeel Dios Xpëéd me, bиаad me biadbee me miech ladznia dol (sac rnee lo Xtiidz Dios masaque ngadoo miech lo dol). Jesússe gon zrielo csilaa miech lo dol, totsaque

dib zdoos zho gnalo zho me, mese zrieelo gdeed guieḽmban ndzon co lo zho.

²³ Zeene gard guiaad Jesús ga, laa ley co pquiiin pquianapa ne zigne rquianap wxtis zha ne nioogyu, laga bdziḽ dze ne laa me biaad. ²⁴ Zig tib ngudziaan ne ri-aannie mēēdwīn, sca pquiiin ley co lo ne, pseeda ne zha gban ne, ni gacnan ne cho nac Jesús, meḽ ne csilaa ne lo doḽ zeene dib zdoos ne gliladz ne me. ²⁵ Saḅgue niina ne laa Jesús biaadle, led ley codraa gnabey ne, ni niicle rquiiin-dragaa pe cseeda ne. ²⁶ Gacxe waa, tel to xpēēdle Dios nac to porne dib zdoos to riladz to Jesús, ²⁷ ni grēse zha ne brobnisle porne no zho xnēz Jesús, laa zho rlu ganḽe ne Jesúsle nacie zho, ni laa zho zienal gban zho zig racladz me. ²⁸ Mincoocxe nagon waa, grēse ne tibaque nac ne niina, guieḽdraa ne goon cho nac zha Israel, cho nacгаа zha zit; dieḽ cho nac ngundziin, cho nacгаа zha ne rnabey; goon dieḽ cho nonraa pe mguiw te wnaaw ye; sac grēse zha ne naciele Jesús, tibaque nac zho grē zho. ²⁹ Ga nagon, telne ngable to lo Jesús, dzigosi nli zha xtii Abraham nac to, ni zгаа to grē guieḽnzaac ne bzeet Dios zeene psan me xtiidz me lo Abraham.

Zha ne nac xpēēd Dios

4 Golgona ganḽe, nligaa tib mēēdwīn lēē, niicle guiaannie win ncuaane rap pxoz win, per lega nacse win zig tib ngundziin win ne run xtsiin pxoz win. Niicle chen win grē ncuaan co, per grieelod win gnabey wina. ² Laa win riaan ladznia zha ne ran win, zha ne rseed win dieḽ pe nac ncuaane gun win, laga gdziḽ dze ne laa win zacḽe ycaania ncuaane psan pxoz win.

³ Scadaa nagon bzhiaac ne glo zeene gard guiaad Jesús, rrieequia masaque ngadoo ne lo grē ley co, ni lo grēraa ncuaane rac lo guidzliu rii. ⁴ Laa zeene bdziḽ dze ne laa Dios pxeel Xpēēd me

Jesús lo guidzliu (tib wnaa bded por xniaa me, bzoob me diidz been me grēse zigne rnabey xley zha Israel), ⁵ laa me biaadsilaa ne, biadbee me ne ladznia ley co, bdiizh me grē xtoḽ ne, zeena ycaania Dios ne gac ne mēēd lo Dios. ⁶ Ni parne glu ganḽe ne nli xpēēdle Dios nac ne, pxeel Dios zhiEspiritu Xpēēd me blēz zdoos ne; gacxe waa niina laa ne rien mee ne lo me: “¡Papá yeen!” Espiritu co mee ne Pxoz ne nac me.

⁷ Ga nagon, led yedraa niina nac ne zig cholze cho ngundziin, sinque xpēēdle Dios nac ne, ible ye ne yгаа grē guieḽnzaac ne rap Dios.

Rnee Pabl rnabeydraa ley

⁸ Bets, bzian, golsoladz ganḽe, zeene bii gard gunbey to meḽ ne nacpaa Dios, masaque rrieequia ngadoo to lo ncuaane nac zhimdio to hor co, rdib rdzag to run to grē mine rzac to rdziladz grē mdio co. ⁹ Nana, laa to runbeyle Dios, mazd gni naa ganḽe ledaa Dios runbeyle to, ¿pe nac dzigo racladz to gbiire tsiegan to, tsiequitsgzhīb to lo grē mdio co, gbiire guiab to ladznia grē ncuaane paat rquiind co, gnabeya to? ¹⁰ Rquia to gon run to grē lni, dieḽ pa mēē ndzonraa, dieḽ pa dze nac dze ndaraa, pa iz nac iz ne ndaraa, dieḽ pa dze zac pe gow to, pa dzeegaa gacda. ¹¹ ¡Rdziebnie naa to gon! ¡Pe nlipaa zhlēse bialseed naa to, ne squi laa to racladz csaan mine bialne naa lo to!

¹² Bets, bzian, laa naa rnab lo to golban zigne mban naa, tel naa niicle ne zha Israel nac naa per zanaḽdraa naa mine nac xley zha Israel. Ngadoodraa naa lo ley, gane rne naa: Golban zigne mban naa. Ni guiabde to togo bod nend no pe falt ne been to lo naa. ¹³ Led rsoḽadz to ganḽe, rzacne naa len dze ne psilo pseed naa to zha laa to lo doḽ; min co nacie nzianlaa dze blēz naa lo to i. ¹⁴ Niicle ne sca rzacne naa, gonḽe to naa; laa

ne mbix zdoo to nian to xquielguidz naa, znu pquia zdoo to naa, rley to blözlo to naa pale cho xanjl Dios o Jesúsгаа, tel niaca mine mezhala niadseed to. ¹⁵ Ne nlipagaa rleydoo to len dze co! Tel niaca mine niac mbee to bziaalo to, zootle zig mbee tow ngad tow lo naa. ¿Yo gre guielebley co na? ¿Yo ne scataa rleynie to naa len dze co? ¹⁶ Nana, pe reb to rlee naa lo to ne znu rne naa mine nacpaa diidzli. ¡Leda gon!

¹⁷ Golquiaadiaga ganle, gre zha ne gon squi ziadseed to i niina, nli laa zho noxco to per zhaa ncuane no guic zho. Laa zho racladz tebaa zha guiaanladz to naa, csaan to gre mine bialseed naa to, zeena gbig to lo zho. ¹⁸ Rtsidild naa pe nacne cho gacnie to, totsaque zha ne nli nquialadz tow. Zig nac naa tibaque noxco naa to, led loxaque zeene zodse naa lo to i. ¹⁹ Xin, ne nlipagaa gon rdedne naa ran naa squi rac to! Masaque nac guielne rii lo naa niina, zig tib yoob ne rquia gre men wnaa ne gap meed. Ni lee nola naa guielne rii nu nagon, haxta gdzin dze ne gan naa laa to wbiire wbig lo Jesús stib. ²⁰ Tebaa niaca mine grieelo guialzhaal naa lo to i niina, zeena gan naa zha no to, dzigo dien zha gnegaa naa lo to; per na ne znu zit zo naa, nand naa dien pe nacraa ncuane noyun to.

²¹ Zha ne racladz gnabey xley zha Israel zho, racladz naa gne zho dien, ¿pe ib riend zho zha zhobnee lo guits ne ziaad Xtiaidz Dios ²² zaatne raquiet xingan Abraham? Rneew: Chop xingan Abraham, tib meed co gop wnaa ne nac ngundziin lidz me, laa stib meed gop wnaa ne nacpaa tsiel me. ²³ Xpeed wnaa ne nac ngundziin ga, laa win goc meed zig greera xpeed miech; sangue meed ne gop tsiel me ga, laa win gol porne ib Dios reb ne laa me yquanie win.

²⁴ Lo grop wnaa co, tibga me rlu ganle zha nac grop trat ne been Dios: Mine

bzhaac Agar, ga rlu ganle zha nac trat ne been Dios guic gui Sinaí. Grese zha ne zienal trat co, nac zho zig goc xpeed Agar, ladznia trat co no zho. ²⁵ Gzoob ne Agar nac Gui Sinaí, gui ne riaan nez Arab; me nac guiedz Jerusalen ne ndxie len dze rii, sac tel gre menguietz Jerusalen, masaque ngundziin nac zho lo ley. ²⁶ Sangue wnaa ne gocpaa tsiel Abraham ga, rrieequia me nac Jerusalen ne no gbaa, zaatne ngab gre zha ne no xnöz Jesús, sac led yedraa gre zha co ngadoo lo ley; ye ne ngab ga, ni gzoob ne lee xnuaa ne ga nac wnaa co. ²⁷ Lee Jerusalen co ga raquiet lo Xtiaidz Dios, zaatne znu rnee:

Luu, ne nac luu wnaa ne brieelod niap meed, bley niina;

nguiel goc, nguiedz broptsie lo guielebley qui,

luu ne bdzind dze niacnan luu zha nac yoob meed.

Sac gon ndalraa xpeed wnaa ne brieelod niap meed,

ledle gre xpeed wnaa ne gop meed.

²⁸ Bets, bzian, golgacnan sca ganle, laa ne nacle niina zig Isaac, xpeed tsielpaa Abraham, wnaa ne gacd yquanie meed ga; sac tel Isaac, ib Dios psan diidz ne laa Isaac gac meed lo Abraham. ²⁹ Ni zigne sca bleenie xpeed wnaa ngundziin co Isaac, meed ne Dioszhal psan diidz gal ga; scasaque niina, no zha ne rlee ran zho zionald ne mine rnabey ley, sinque laa ne zional dib zdoo ne riladz ne Jesús. ³⁰ Ni nana, led lo Xtiaidzaque Dios zhobnee ganle zha reb Dios lo Abraham, reb me: “Wnaa ne nac ngundziin lo luu i, bzonöz me grop xpeed me, nonguield ne ye meed qui guiaanne ncuane csan luu lo xpeed tsiel luu.” ³¹ Gacxe nagon waa, tel ne nacd ne zig xpeed wnaa ngundziin co, sinque laa ne nac zig xpeed tsielpaa Abraham.

Dziits go_lso

5 Peet lo ngadoodraa ne niina, sac gon_l laa Jesús bиаadsilaale ne, sinque to none dziits so zeena ygadoode to lo xley zha Israel. ²Naa nac Pabl, ni naazhal rne lo to nu. Golgona sca gan_le, telne laa to gdeed diidz tso to xbey zha Israel, nacdiedraa to Jesús ga dzigo. ³Ni laaw gneque naa lo to nu stib, grëse zha bgui ne rio bey co, ib none gun_l zho grëse zigne rnabey ley co. ⁴Zha ne rzac por gun_l zho grë mine rnabey xley zha Israel, min_l co laa Dios csilaa zho lo dol, gacnan_l zho gan_le, lel_l nozozit zho lo Jesús ga; ygaad zho guelznaac ne yгаа zha ne gnalo Jesús. ⁵Sangue tel_l no, ndionpaa no silaa Dios no lo dol, sacne dib zdoо no rliladz no Jesús ni nacie Espíritu Sant no. ⁶Sac zha ne nli nole xnëz Jesús, peet liaadz nodraa zho bey ne rio zha Israel. Mine noxcoraa zho nac ne dib zdoо zho gliladz zho Jesús, ni scagaa grieelo gleynie zho samiech zho.

⁷¡Ese tow nli! ¿Pex goc to waa? Zaacse name rac to zeene psilo to bliladz to mine nac diidzli. ¿Cho pquuil to ne nëdraa to tsienal_l tow? ⁸Mine squi nonie guic to i niina, led zhiwseete Dios i, men_l ne bredz to grie to ladznia ley. ⁹Golguien_l sca, adel_l ye to sac zig rëb diidz ne nee: “Niipaxe ncobi waa runcsibe ncob quietxtil.” ¹⁰Per nannpaa naa, ible men_l ndzon ne rnabey ne men_l co gacnie to, zeena csaande to mine nac diidzli; ni zha ne squi racladz gungüet to, tel_l chotaa nac zho ib tedsod siaabzi Dios zho.

¹¹Bets, sangue naa tel_l niaca mine nli ye naa quianabey tso grë zha ne rliladz Jesús xbey zha Israel zig quianee zha qui, bod goonzhe ni ctsidil_ldraa zha Israel naa dzigo, glëëdraa zho zig rlëëtaa zho niina zeene ron zho rne naa zha nacie bиаadguet Jesús lo cruz. ¹²Zha ne squi ziaadnabey tsojaa to bey ne rio zha bgui

nëz Israel, ¡tebaa mazd ladaque zho yga zho, niicxe gdib nacse zho waa cueni-aal_l zho, led tsod zho noyunneed zho to! ¹³Bets, golguien_l gan_le ne ygadoodraaxe to lo ley waa, min_l co nacie bиаadsilaa Jesús to. Per guiabde to togo ne laa me psilaale to, laa to gun_l ncuaane guiaabtaa guic to. Gunscade to, sinque tib tib to golleynie samiech to, ine golgun_l ncuaane rquiin grë zha ne nacgrë to; ¹⁴sac niina totsaque gban to zigne rnabey Dios nu: “Bleynie samiech luu zigne rleynieque luu luu”; lëële grë mine nac ley ga gun_l to. ¹⁵Per tel_l laa ne gleynie to zha ne nacgrë to, lel_l dil_l no to, zig run_l grë ma ne lëëque ma noquiaalaylsa, lëëque ma noyowlsa; dzigo lëëque to gnitlo to ga. ¡Gunscade to!

Zha ne lega mbanse

¹⁶Gacxe, laa naa rnab lo to: Gol_lsoxco golban zigne racladz Espíritu Sant, ni me gacnie_l to; led tsode to dien_l zha gun_l to grë ncuaane ndzinlid ne racladz xcuerp to. ¹⁷Sac gon_l grëse ncuaan_l co, rleynied Espíritu Santa. Laa xcuerp ne run_l ncuaane racladzd Espíritu Sant, ni ncuaane racladzgaa Espíritu Sant nëd xcuerp ne gac min_l co. Gunde to mine racladz xcuerp to sca. ¹⁸Telne gban to zigne rnabey Espíritu Sant, dzigosi nodraa pe nacie ygadoо to lo xley zha Israel.

¹⁹Ni miech ne sca run_l grë ncuaane ndzinlid, ib paat nguetsd zho: rionie zho zha ne led tseeld zho, run_l zho grë ncuaane ndzinlid ne racladzttaa xcuerp zho,

²⁰riegan_l zho grë mdio, rnab zho pe sac samiech zho, rlëënie zho samiech zho, rdil_lnie zho samiech zho, rzac zho adel_l cho glale tseel zho, rmadse pew laa zho rlëële, runctil_l zho miech, rguib zho rtso miech,

rbeextso zho dien cho zha ne gacnie zho,
²¹ nē rac zdoo zho ran zho ncuaañe
 quianie stib miech,
 rzudz zho,
 rcaalsa zho zaatne loxaque rowcho zho,
 ni run zho grē guieļyozh.

Grē ncuaañ co run zho ni grēragaa
 ncuaañe ndzinlid ne sca nac. Laa naa
 rbire rso diidz lo to, gunde to grē ncuaañ
 co; sac gon grēse miech ngoopdoļ ne sca
 rban, grieelod gdziñ zho zaatne rnabey
 Dios.

²² Sanguē zha ne zienal mīñe racladz
 Espiritu Sant, znu nac zha co:
 rleynie zho samiech zho,
 tibaque nguieeļ rac zho,
 peet dzeb nonied guic zho,
 rxecw zho, rreedniobd zho,
 niowse rnee zho lo samiech zho,
 niapse ncuaañ wen run zho lo samiech
 zho,
 run zho mīñe rnee zho gun zho,
²³ miech ndooladz nac zho,
 zha rnabey xcuerp zho.

Ni telne gban ne zigne nac grēse mīñ
 rii, ni tib ley noguuitsd ne ga. ²⁴ Grēse
 miech ne nli xnēzle Jesús no, zieniedraa
 guic zho gun zho grē ncuaañe ndzinlid
 ne bzoobladz zho padzeela, grē ncuaañe
 ndzinlid ne racladznē xcuerp zho, sac
 rien zho paat rquiind ncuaañ co lo zho.
²⁵ Gacxe nagon waa, telne nli mbannie
 ne guieļmban ne rneedz Espiritu Sant,
 goļgotsaa dzion ne mīñe rnabey me.
²⁶ Dzigosi gacniatsdraa ne lo samiech ne,
 tsienaldraa ne dien cho glaaraa guiaan,
 tso ne nē gac zdoo ne gan ne grē ncuaañe
 rap zho, ncuaañe racгаа zho.

None gacnie ne samiech ne

6 Bets, bzian, telne gan to laa cho tib
 zha ne nacgrē to noyūñ pe tib doļ,
 dzigo to ne nac to zha ne nlipaa zienal
 mīñe rnabey Espiritu Sant, to goļnee lo
 zho. Diidz wen, diidz ndooladz goļco
 zdoo zho gbiire xixcuaa guic zho; ni sca-

gaa tib tib to none nsin so to, sac gon
 adel nenda yeque to sca sac. ² Zeene ran
 to zha ne mban noded, goļgun xyudar
 zho, goļchoobladz zdoo zho, sac gon sca
 rnabey Jesús gban miech.

³ Tel zha ne rzac zha non nac zho,
 ni laa zho peet nond zho; lēēque zha
 noguitnie zho ga. ⁴ Tib tib to, wen
 wen goļguieñ dien pe quaiyūñ to, telne
 ncuaañe ndzinliw ine goļley, per tsode
 to glēē zdoo to gan to mīñe run stib zho.
⁵ Sac tib tib ne, psose Dios ne pe nac
 xtšiñ me mīñe gun ne.

⁶ Grē zha ne noseed Xtiidz Dios, ib
 none ncuaañe rgaataa lo zho gdeed zhow
 yquiin zha ne noluw lo zho.

⁷ Tsienie wguite guic to sca, sac gon
 led yed Dios guiab ne quitnie ne. Tib tib
 ne, tel pe nac mīñe run ne mīñcoque ct-
 sire me lo ne. ⁸ Zha ne run grē ncuaañe
 ndzinlid, lēē mīñe cueequia zho ga laa
 zho nitlo. Laa zha ne gun grē mīñe rn-
 abey Espiritu Sant, lēē mīñe yгаа zho ga
 nac tib guieļmban ndzon ne gdziñd dze
 lozh. ⁹ Gacxe nagon waa, tibaque gotsaa
 dzioxco ne dziuūñ ne ncuaañe ndzinli,
 ncuaañe rquiin, guieete ne; sac telne sca
 tibaque dzioxco new, zeene gal dze co
 laa ne yгаа mīñe guioquia ne. ¹⁰ Zeene
 gdeedtaaw diidz sca, goļgotsaa dzioxco
 ne dziuūñ ne xyudar grēse samiech ne, ni
 nana zeene zha ne noque xnēz Dios nac
 zho, mazdraa rieguiaļ dziuūñ ne xyudar
 zho.

Rso Pabl diidz

¹¹ ;Goļwi ganle, naazhal pquia nu!
 ;Goļwi ganle mbee mbee nac letr rii
 pquia naa rso naa diidz lo to! ¹² Grē zha
 ne gon squi racladz tsopaa to bey ne rio
 zha Israel, laa zho runa zeena glēēnied
 miech zho, zigne rlēēnie zho grē zha ne
 rseed miech ne ib laa Jesús gut lo cruz,
 psilaa me grēse miech lo doļ.

¹³ Nana, niicxe grē zha ne nole bey
 co, rundaque zho grē mīñe rnabey ley;

sinque laa zha qui nagon quiaguib tebaa gdeed to diidz tso to bey, zeena sca lozhd guiats zho ne zha bnabey to bio to bey. ¹⁴ Sangué tel naa, ib quiaguibd naa ne dien zha gacniats naa, sinque laa naa quiaguib gacnan miech ganle zha nac ne laa Jesús gut lo cruz. Sac tel naa, por grë mine bded Jesús ga, grëtaa ncuaane no lo guidzliu laaw psan naa tib lad; ni niicle naagaa, sca rzac grë miech guidzliu naa. ¹⁵ Grëse zha ne ygab xnëz Jesús, nacda ne dien cho no bey ne rio zha Israel, chogaa noda; sinque mine non nacne ctsëë Dios lo xquielmban zho.

¹⁶ Grëse to ne nac to zha ne zienal didz ne rso naa nu, Dios yquia zdoo to, ni me gacniën to ctsebd grë zhgab to; niicle tow ni niicle grëragaa zha ne ngable lo mew.

¹⁷ Bets, bzian, golgacnan sca ganle, ib racladzdraa naa gon pe yquiaaqui gbi-ire gaquiet mine bnele naa lo to nu; sac tel naa, grëtaa mdel ne no xcuerp naa nu, lëëlew nac bey ne rlu ganle ne nli lo Jesús ngab naa, ni xtsiin me noyun naa.

¹⁸ Jesús men ndzon ne rnabey ne, me tsoxco grë zhzhgab to. Sca gaca.

Pabl

GUITS NE PXEEL PABL LO ZHA EFÉS

1 ¡Diuzh to grëse to!
¹ Naa nac Pabl, tib zha ne pxeel Jesús nonee Xtiidz me lo miech, sac ible Dios bnabey ne sca gaca.

Laa naa rxel guits rii lo to grëse to bets, grëse to bzian, zigne nose to guiedz Efés i, ne nac to zha ne ngable lo Dios niina ne tibleque laa to riladz Jesús. ² Dios men ne nac Pxoze ne, ni Jesús men ndzon ne rnabey, me glu lo to guien to ganle pa lotaa noxco me to, ni me gacniën to ctsebd grë pe zhgab to.

³ ¡Gotsaa dzioolnie ne Dios, Pxoze Jesús, men ndzon ne rnabey ne! Sac gon, zha nactaa grë guielnzaac nroob ne bneedz Espíritu Sant lo ne niina ne laa ne ngab xnëz Jesús. ⁴ Haxta zeene gard cue guidzliu, bzooblo Dios ne gac ne zha ne gdziñ lo me zeene laa ne gliladz Jesús, gac ne tib miech peet xtold, zha ne gban zigne racladz me. ⁵ Nquialadz me ne, gane bzooblo me ne gac ne xpëed me zeene laa ne gliladz Jesús, ib me sca bnabey gaca sac ib sca gola zdoo me.

⁶ Mincoxe waa tibaque none dzioolnie ne Dios, sac gon zha wentaa me lo ne, pxeel me Xpëed me men ne nquialadz me ga, biaadgunlay me ne. ⁷ Ne nligaa nquialadzdoo Dios ne, gane pxeel me Xpëed me bzhiee xchen psilaa me ne lo grë dol ne ngadoo ne, been me ne perdon grë dol co. ⁸ Ni led loxaque mincodse, sinque haxta bneedz me guielriën lo ne, bdixbiini me ne, ⁹ ni bneedz me diidz gocndion ne pe nac mine no zdoo me, mine mese nan, mine nole me gun me. ¹⁰ Sac niina laa ne ndionle: Grëse ncuane no gbaa, ncuane no guidzliu, tibaque gaca grëw ni Jesús gnabeya grësew; sca gaca zeene laa dze co gdziñ.

¹¹ Grëse ncuane bnabeyle Dios no gac, run mew zigne racladz me. Got-saa gwi ne ganle, glole bzooblo me ne ygaa ne grë guielnzaac ne nacle diidz gdeed me lo grë zha ne no xnëz me, guielnzaac ne bgaa ne zeene laa ne bziaab xnëz Jesús. ¹² Ni laa me bzooblo ne, zeena ne ne nac ne zha ne glopaa psilo bnao Jesús, cxobnen ne lo miech ganle pa lotaa men nroob nac me.

¹³ Xquizh Jesús, ye to zeene laa to psilo pquiaadiag diidzli, Diidz Ndzon ne ree ganle zha laa to lo dol, ni bliladz to cho nac Jesús, laa Dios pxeel Espíritu Sant lo to zig tib bey, bey ne rlu lole me ngab to; zigne bneele me glo. ¹⁴ Ne znu pxeel me Espíritu Sant nacie ne, ga rlu ganle ib nli zgaa ne grë mine bneele me gdeed me lo grë zha ne ngab lo me, ni lëe min co ygaa ne zeene gal dze ne laa me blozh psilaa grë zha ne ygab lo me; zeena grë ne gleynie ne me por squitaa men nroob nac me.

Rnab Pabl guielbiini lo Dios

¹⁵ Zeene gocnan naa ne nlipaa dib zdoo to riladz to Jesús, ni ne nli nquialadz to grëraa miech ne no xnëz Dios, ¹⁶⁻¹⁷ rded naa xquizh lo me. Zeene rzodidznetaa naa me, rsoladz naa to, rnab naa lo me gneedz Espíritu Sant guielbiini lo to guien to cho nac me, zeena lozh gunbey to me. Lëe me nac xDios Jesús, lëe me nac Pxoze ndzon ne. ¹⁸ Rnab naa lo me quixbiini me guic to, guien to ganle zha nactaa grë ncuane ygaa to ne laa me bredz to, guien to ganle zha ndzontaa, zha nontaa ncuane gdeed me lo grëse miech ne ngab lo me, ¹⁹ ni guien to zha nroobtaa guielrnabey ne rap Dios, pa lotaa naca; lëe guielrnabey co nacie ne ne nac ne zha ne no xnëz me. Lëe guielrnabey co ga blu me ²⁰ zeene bleeban me Jesús bzoob me me cue me gbaa, zaatne rieguial sob me ne nac me men rnabey, ²¹ bzo me me, me rnabey

lo grëse zha ne rnabey, lo grëse zha ne non, ni lo grëragaa ncuaa^{ne} no; niicle ni-inaw, niicle len^{ne} dze ne naragaa guiaada. ²²Grëse ncuaa^{ne} notaa, laa Dios psana ladznia me, ni bzo Dios me me rnabey lo grëse zha ne no xnëz me. ²³Sac grëse zha ne no xnëz me rrieequia xcuerp me ga nac zho, gacxe waa grëse zha ne nac cuerp co, zha none cxobnen^{ne} ganle pa lotaa men^{ne} nroob nac me. Tel^{ne} pe lotaaw me nacie zho, sac grëtaa ncuaa^{ne} no ladznia me now.

Ne noxco Dios miech gane psilaa me zho

2 ¡Laa Dios bneedzle tib guielmban cub lo to niina, niicle ne ntseeb goc to glo! Golsoladz ganle, zeene scataa beenctal to xtol^{ne} to, masaque nac to lo Dios hor co zig tib zha ne gutle, ²laa to güeynal^{ne} niapse grë ncuaa^{ne} ndzinlid ne rac lo guidzliu rii, been^{ne} to grë mine rnabey ma ne rnabey lo mendox, ma ne rcheep grë zha ne ib nëd gon xtiidz Dios.

³Grëse ne sca wban ne glo, bional^{ne} ne ncuaa^{ne} ndzinlid ne bzoobladztaa ne, bdziuu^{ne} ne ncuaa^{ne} bdeedtaa guxt xcuerp ngoopdol^{ne} ne, ncuaa^{ne} biaabtaa guic ne. Ni ne scataa nac ne, ib biogual^{ne} ngaa ne lo guielnëdox ne cxeel^{ne} Dios, lo guielnë ne noxtseeb grëraa miech niina. ⁴Per ne nquialadz Dios ne nac ne miech, gane pquia zdoo me ne, ⁵ni niicle ne rrieequia mengutle nac ne ne scataa quiazziuu^{ne} ne grë dol^{ne} co, per bleeban me ne; lëe min^{ne} co ga been^{ne} me zeene bleeban me Jesús. ¡Laa me psilaa ne lo guielgut co, niapse por mezhah noxco ne!

⁶Laa me bleeban ne, zeena yгаа ne guiosobnie ne Jesús zaatne gnabey Jesús.

⁷Zigtaa len^{ne} dze riiw, zigtagaa len^{ne} dze ne ziaadraaw, ga gan^{ne} miech ganle pa lotaa nquialadz me ne, pa lotaa wen me lo ne, sac pxeel^{ne} me Jesús biaadsilaa ne.

⁸Golgan^{ne} ganle, ne wen me mezhah noxco guiaanwen miech lo me, gane rsilaa me

ne lo dol^{ne} zeene laa ne riladz Jesús dib zdoo ne; guiabd ne togo por pe guielwen ne gun^{ne} ne laa me csilaa ne. Ible zdoo me ral rsilaa me miech, ⁹racda ne por pe guielwen ne gun^{ne} zho; zeena gdaanied zho guielwen ne run^{ne} zho. ¹⁰Dios nac men^{ne} ne psan^{ne} ne, ni niina ne laa ne bziaab xnëz Jesús, laa me bredz ne dziuu^{ne} ne grë guielwen ne racladz me, mine bzooblole me ne dziuu^{ne} ne.

Grëse zha ne ngab lo Jesús, tipse nac zho

¹¹Golsoladz ganle miech ngoopdol^{ne}, miech ne ngabd lo Dios, miech beed, sca lë to lo grë zha Israel glo (sac zha, ne rio zho bey zigne rnabey xley zho, rzac zho miech wen, miech mbe nac zho, zha nac zha ne ngabpaa lo Dios). ¹²Len^{ne} dze co gard ygab to lo Jesús, gard gac to tipse grë to zha Israel, led yede to no lo trat ne biaan^{ne} Dios grë me zha Israel, nan^{ne}de to grë diidz ne psan^{ne} me lo zho. Lega laa to mbanse, runbeyde to Dios, ni tib guielnzaac quiambëzde to yгаа to. ¹³Sangue niina ne laa to bzëeb xnëz Jesús porne bzhiee xchen me psanmbe me to, laa to ngable lo Dios.

¹⁴Jesús nac men^{ne} ne psanwen ne grë ne, ptiche me grëtaa ncuaa^{ne} pca zaacse ndzianlsa ne; zigtaa zha Israela, zigtagaa zha zita, tibaque been^{ne} me ne lo me niina. ¹⁵⁻¹⁶Zeene pquia me lo cruz, gataa ptiche me grë ley ne zienal^{ne} zha Israel, ne scataa rsanglaa zho zho; gane niina zigtaa zha Israela, zigtagaa zha zita, laa me been^{ne} zho tipse, been^{ne} me zho tib guiedz cub ne ngab lo me. Sca nac ne laa me psanwen zho grë zho, ni psanwen me zho nëz lo Dios.

¹⁷Jesús nac men^{ne} ne biaadnie Xtiidz Ndzon me lo ne grëse ne, gocndion^{ne} ne zha guiaanwen ne nëz lo Dios, zigtaa tow ne nac to zha ne zit zo lo Dios glo, zigtagaa zha Israela ne nac zho zha ne gax zo lo me. ¹⁸Gane niina, niicle zha Israela,

niicle zha zita, zrieelo ygab zho lo Dios men ne nac Pxoꝛ ne, zeene laa Espíritu Sant gunquien zho none gbig zho lo me. ¹⁹Gacxe waa, tel to nacdraa to menzit niina, lole Dios ngab to, lal non to, lal nac to grē to grēraa zha ne ngab lo me. ²⁰Golguien ganle, grēse ne niina gzoob ne nac ne zig tib yu ne noyaa, yu ne psilo grē zha ne pxeel Dios nonee xtiidz me lo miech niina, grē zha ne pxeelgaa me pteed xtiidz me lo miech padzeela, ni Jesús nac quie ne naaz yu co. ²¹Grēse zha ne ziana mine rnabey me, rriequia nosoquiaraa zho yu co ga, haxta guirew gaca tib yadoo ne nlipaa mbe nēz lo Dios. ²²Zig nac to gon, tib tib to ne nac to zha ne ngab lo Jesús, ye to nac yadoo co, zaatne rbēz Espíritu chen Dios.

Pabl nac zha ne güeyseed zha zit

3 Ni ne bialnecxe naa Xtiidz Jesús lo to waa, gocnan to ne niicle men zit nac to zrieelo ygab to lo Dios, min co gane znu nioogyu naa nu. ²Nanlaxe to ganle ne wen Dios, laa me bzo naa gun naa dziin rii cseed naa grē menzit. ³Laa me blu lo naa zha nac grē ncuaane no guic me gun me, mese naṇa per laa me blu lo naa zha naca, ni laa palala psilo bzetle naa lo to lo guits rii. ⁴Zeene glab tow i, dzigo guien to ganle ne nli naṇ naa zha nac grē mine gun Jesús, mine mese naṇ. ⁵Wlaltaa choot miech gocnanda, laa niina laa Dios pxeel zhiEspíritu me bneedz guielbiini lo no gocndion now, zigtaa no ne nac no zha ne pxeel me nonee xtiidz me, zigtagaa grē zha ne pxeel me noteed xtiidz me. ⁶Ni znu naca: grēse zha zit, zgaa zho guielnzaac ne rēb Dios gdeed me lo grē zha ne ngab lo me, tibaque nac guielnzaac ne ygaa zho grē zho zha Israel. Niicle zha Israela, niicle zha zita, laa Dios quiambēz gdeed me guielnzaac co lo zho, totsaque gliladz zho Xtiidz Ndzon Jesús.

⁷Niicle ne tib miech peet nond nac naa, per laa Dios bzooblo naa gne naa lo miech gacnan zho mine blozh bzet naa nu, me nacne naa, me rneedz grētaa poder ne rap me parne grieelo gun naa dziin rii. ⁸¡Ncuaane gzee zdoo new! Golwi ganle, naa nac tib zha ne mazdraa peet nond lo grē zha ne ngab lo Dios; per laa me bzooblo naa, naa bgaa dze ndzon rii gne naa Xtiidz Ndzon me nu lo grē zha zit, zeena gacnan zho ganle pe zhis-taa grē guielnzaac ne gdeed Jesús lo zho. ⁹Gne naa lo zho gacnan zho ganle zha nactaa grē mine no guic Dios gun me, mine wlaltaa choot gard gacnan; Dios, men ne bzaa grēse ncuaane no. ¹⁰Nana gnē to: “¿Pe nacne sca been me?” Laa me beena zeena grēse zha non, zha rnabey ne no gbaa, zeene gan zho tipse nac zha Israel grē zho zha zit ngab zho lo me, ga guien grē zha gbaa co ganle zha ndzielguictaa Dios. ¹¹Sca nac mine no guic me padzeela, ni zeene laa me pxeel Jesús laaw goc. ¹²Gacxe waa, niina ne laa ne ngable lo Jesús, peet lo ngadoodraa ne, niinasi zrieelo gbig ne lo Dios, sac ndion ne zha ne rnalo Jesús ible scaania Dios zho. ¹³Laa naa rso didz lo to sca, niicle ne znutaa quiadeed naa loxaque ne bialseed naa to, gunde to ne minrise laa zdoo to guiaan, sinque golley golwi ganle nu rlu zha nziuu, zha non nac to lo naa.

Nquialadz Jesús miech

¹⁴⁻¹⁵Zeene rsoladz naa grētaa mine no guic Dios gun me, ni mine beenlegaa me (me ne nac me Dad lo grēse zha ne ngab lo me, niicle lo guidzliu nuw, niicle gbaagaaw); rded naa xquizh lo me. ¹⁶Ni ne squitaa ndzon, ne squitaa ncuaane lozhd nac grētaa guielnzaac ne rap me, laa naa rnab lo me cxeel me zhiEspíritu me gneedz xfuers to dziits so to. ¹⁷Ni rnab naa lo me tibaque dib zdoo to gliladz to Jesús, zeena scagaa tibaque

gbannie to me, parne guien to ganle pa lotaa nquialadz me to. ¹⁸Ga guien to ganle grë to grëraa zha ne ngab lo me, ne nligaa pa lotaa nquialadz me to, nacda ncuuaane grielo ctiix ne, guiab ne lalnuw. ¹⁹Niicle ne znu nacda ncuuaane grielo guiab ne znu znu naca, per laa naa rnab lo me zig zie dze guienraa to pa lotaa rleynie Jesús to; zeena glu ganle ne nli nacie Dios to.

²⁰Ni Diossi gon ne nac me men ne ndzon, mazdraa ncuuaane grielo gneedz me lo ne, lëdle mine riab guic ne rnab ne lo me; ni ncuuaane gaca gon, sac me nacie ne. ²¹Grëse ne ne nac ne zha ne no xnëz Jesús, jibaque golgotsaa gleynie ne me sca, ne squitaa ndzon me! Sca rieguiala.

None tipse gac zha ne riladz Jesús

4 Zigne rne naa ga, laa naa nioogyu nu loxaque ne run naa xtsiin men ndzon ne rnabey, per laa naa rnab lo to zaacse gulgac, golban zigne rieguial gban grë zha ne bredzle Dios ngab lo me, sac gon laa me bredzle to. ²Gulgac tib miech ndooladz, tib miech wen, tib miech nlëëguicd, tib miech ne guieed-nied samiech sinque ine gleynie to zho. ³Wenle na ndxie to niina, ni Espiritu Sant nac men ne gacnen to; zeena tibaque squi tipse gac to. ⁴Sac gon tibaque cuerp nac ne grë ne, tibaque Espiritu nacie ne, ni tibaque nac mine ndion ne gneedz Dios lo ne, ne laa me bredz ne. ⁵Tibaque men ndzon ne rnabey ne, tibaque men ne riladz ne, tibaque wrobnis ne no par grë ne ne dib zdoo ne riladz ne me; ⁶tibaque Dios no, me nac Pxoze ne grëse ne, me nac men nroob ne zo lo ne, me racnen ne grëse ne, ni me nacie ne.

⁷Tipse nac ne, per tib tib ne psose Jesús ne pe nac dziin ne grielo dziuun ne lo me, zigne gola zdoo me. ⁸Min rii

ga raquiet zaatne znu zhoobnee lo guits ne ziaad Xtiidz Dios:

Blozhse psanwin me grëse zha ne rlëë ran me,

laa me biire zey gbaa stib;

ni psose me tib tib miech pe nac dziin ne grielo gon zho lo me.

⁹Golgotsaa gwi ne ganle, Jesús raquiet nu, nneew “biire zey me gbaa stib”, ga rlu ganle tib men ne biet gbaaw biaad me lo guidzliu. ¹⁰Sac me biet gbaa, ni biire zey me gbaa stib, zeena glu ganle tel pa lotaa zrieelo gdziin me. ¹¹Ni mezhaz rzo ne tib tib ne pe nac dziin ne dziuun ne; me rzo:

zha ne rxeel me gnee xtiidz me,

zha ne rxeel me cteed xtiidz me,

zha ne rienee Xtiidz Ndzon me tib tib lo miech zha laa zho lo dol,

zha ne rteedlo grë zha ne ngab lo me, ni zha ne rseed zho zha nac Xtiidz Ndzon me.

¹²Laa me run min co, sac laa me racladz grëse zha ne ngab lo me lozh xixcuua lo xquielmban zho, zeena guien zho zha gon zho xtsiin me; ¹³haxta gdziin dze ne tibaque mine giladz ne grë ne, grëse ne dziuunbeyna ne men ne nac Xpëed Dios. Laa ne lozh sodziits, haxta gac ne zig me.

¹⁴Gacdraa ne zig choj cho mëedlas ne beelze pe riladz; niicxe guiaad grë zha ne guiaadnie stib wseed, zha ndzinlid ne zombëz loxaque dien zha gdeeda didz yquidie zho miech; yquidied zho ne. ¹⁵Sinque guional ne mine nac diidzli, ine gleynie ne samiech ne, tibaque laa ne guional zigne nac Jesús, men ne rnabey lo ne grë ne ne ngab ne lo me (rriequia xcuerp me nac ne, me nac guic cuerp co).

¹⁶Ni ne me nac men ne rnabey lo ne, me rnabey zha gac tib tib dziin ne pso me ne dziuun ne; niicle ne nzian ne, per tipse nac ne laa ne nodziuun dziin ne pso me ne, zeena xixcuuaraa lo xquielmban

ne, ni lozh guien ne zha gleynieraa ne samiech ne.

Guielmban cub ne rneedz Jesús

¹⁷Laa naa rso diidz lo to nu, ni golquiaadiaga zig nac zeene men ndzon ne rnabey ne rneew lo to: gbandraa to zigne mban grëraa miech ne zozit lo Dios, grë zha ne mban zigne notaa guic; ¹⁸sac tel zha, ncow nac guic zho. Gard yгаа zho guielmban ndzon ne rdeed Dios, nand zho zha nac guielmban co sacne ndip zdoo zho. ¹⁹Laa zho gocnadle, niapse lo grë ncuane ndzinlid no zho, ib rgobeyd zho run zho grëtaa guielyozh ne no. ²⁰Sangue to gon, ne nac to zha ne no xnëz Jesús niina, led mincod noseed to; ²¹telne nli noquiaadiag to ganle cho nac me, telne nli rien to zhiwseed me mine rlu ganle zha nac diidzli.

²²Miech yozh ne goc to glo, grëtaa ncuane ndzinlid, grëtaa guielyozh ne gocladztaa xcuerp to been to, ;golsaana! ²³None gdzëe lo xquielmban to, zigtaa grë mine no zdoo to, zigtagaa grë mine rza guic to, ²⁴golgac tib miech cub, zacace golban, ndzinli golgac; zeena glu ganle ne nli beenncuble me to zigne racladz me.

²⁵Golguien sca, yquidiedraa to samiech to, sinque niapse mine nac diidzli golnee, sac gon tel ne pe nacne yquidielsa ne ni tibaque nac ne grë ne.

²⁶Telne glëe to, code to guielblëe co zdoo to dib dze, sac gon dol ga. ²⁷Gunde to mine racladz mendox.

²⁸Zha ne goc ngbaan lëe, cuandraa zho, sinque gun zho dziin gdziniaa zho ncuane yquiin zho, zeena scagaa grieelo gun zho xyudar zha ne guien pe yquiin.

²⁹Gneede to diidznë, sinque diidz ne ndzinli, diidz ne yquiin golnee, zeena zha ne gona ine cchoobladza zdoo zho, ine yquina lo zho. ³⁰Golguien, gunde to

ncuaane coguielnë to Espiritu Sant. Golgan ganle laa Dios pxeel me, nac me zig tib bey ne glu ganle ne nli lo Dios ngab to, gal dze ne laa me lozhpaa csilaa grë zha ne ngab lo me. ³¹None csaan to: guielnialadz, tso to gow gzhizh zdoo to; glëedraa to, sobzhiandraa to, coredzdraa to, gactseebdraa to, ni grëragaa guielntseeb ne no, gunde tow. ³²Sinque none: wen gac to lo samiech to, golquia zdoo samiech to, golgun samiech to perdon, zigne beenaque Dios to perdon zeene laa to beenbey Jesús.

None glu cho nac zha ne ngab lo Dios

5 To ne laa to nacle xpëed Dios ni nqualadz me to, goltsoxco gac to zig me. ²Zaacse golban, golleynie samiech to zigne rleynie Jesús to, sac gon tel me, haxta bleeladz me me gut me xcuent ne, gut me biogon me lo Dios psanmbe me ne lo xtol ne, me goc tib gon ne pcaania Dios.

³Golguien sca, none glu to ne nli xnëz Dios no to; gunde to grë guielyozh ne run grë zha ne zienald zigne nacpaa guieltsieel, gunde to grë ncuane yozh ne run miech ndzinlid, gunde to grë ncuane run grë zha ne zienal loxaque dien zha gunlo dimi. Gunde to grë ncuane co, per ni gzodidzde tow.

⁴Gneede to grë diidzguidz, gneede to grë diidz ne paat rquind, gneede to grë diidz ro nëz; sac gon rdzieeldraa gnee to grë ncuane co; sinque Dios golgoolnie, goldeed xquizh lo me.

⁵Nanle to ganle, grëse: zha ne zienaldraa zigne nac guieltsieel, zha ndzinlid ne run grëraa guielyozh,

zha ne mbidz (zha ne rleynieraa dimi, laa ne gleynie zho Dios); ni tib zho grieelod gdziñ zaatne rnabey Jesús grop me Dios.

⁶Gdeete to diidz lo zha ne gacladz yquidie to gnë zho peet nacd grë min co, sac gon, grëcxe min co waa run grë zha ne néd gon xtiidz Dios, lozh ga, lëë mine tsieguial zho laa zho yгаа lo guielzi ne csiaab me. ⁷Golguien sca, yquiaadiagde to xtiidz grë zha ne sca rnee, per ni ct-sieelsade to zho.

⁸Nli, ¿lëë?, ndzinlid wban to glo, rrieequia lo ncow ga bio to, gocnie to mendox; sangue niina ne laa to nacie Jesús men ne nac biini, rrieequia lo bi-inile no to. Golguiena sca, zaacse golban, ⁹sac niina ne laa to nole lo biini, none gac to:

tib miech wen,

tib miech ne zianał gac mine nac diidzli, tib miech ne rnee diidzli.

¹⁰Goltsoxco guien to zha racladz Dios gban to. ¹¹Gandzede to grë ncuaañe ndzinlid ne run grë zha ne no lo ncow, sinque gollisquiw; ¹²sac grë ncuaañe run zho ngeets zhliian, haxta ncuaañe ctoladz ne gnee new. ¹³Grëse zha ne gbig lo biini co, zien zho ganle zha nactaa grë ncuaañe yozh ne noyun zho; sac gon telne biiniw, tsod ncuaañe guianngeets low. ¹⁴No tib zaatne znu zhobnee lo Xtiidz Dios, rneew:

Luu ne tibaque guieel no luu, blee mcaal lo luu;

brieel lad grë zha ne squi nole lадznia guielgut,

zeena gban luu lo biini ne nac Jesús.

¹⁵Golguien sca:

Miech nixbiini golgac, ndzinli golban; gbande to zig choł cho grë miech nxen ne run mine notaa guic.

¹⁶Cteed zhlëde to xtse to lo ncuaañe paat rquiind, niicle ne niapse grë min co zianał grëraa miech len dze rii.

¹⁷Gunde to ncuaañe paat rquiind ne rza guic to, sinque golguien dien pa min-paa racladz Dios gun to, dzigo goltsoxco min co golgun.

¹⁸Gzudzde to, sac gon lo guielgonziu run miech ncuaañe nonguieldraa; sinque mazd golnab gneedzraa Espiritu Sant guielbiini lo to, zeena ine:

¹⁹gool to grë salm, grë himno, grë cant ne csiaab Espiritu Sant guic to; dib zdoo to golgoolnie men ndzon ne rnabey.

²⁰Goldeed xquizh lo Dios men ne nac Pxož ne, por grëtaa ncuaañe ran to, ncuaañe rded to; golguien ganle lo Jesús ngab to.

Zha none gban zha ne riladz Jesús

²¹To ne nac to zha ne ngable lo Jesús, tib tib to golgon mine rnee zha ne nacgrë to, zeena glu ganle me nac men non lo to.

²²To ne nac to men wnaa ne ptsieel-niale, golgon xtiidz tsieel to, zigne riox-coque to ron to mine nac xtiidz men ndzon ne rnabey. ²³Sac ible tsieel to nac men ne no gnabey lo to, zigne Jesús rnabey lo grë zha ne no xnëz me (ni me psilaa zho lo dol, laa zho nac zig xcuerp me). ²⁴Ni zigne sca ron zho xtiidz me, scaque none gon to mine rnabey tsieel to to.

²⁵Togaa ne nac to zha bgui ne ptsieel-niale, golleynie tsieel to, zigne rleynie Jesús zha ne no xnëz me. Tel me haxta bleeladz me xquielmban me, ²⁶blee me zho lo dol, ni biaanmbe zho zeene laa zho pquiaadiag xtiidz me, wban zhow ni brobnis zho; ²⁷zeena gal dze ne laa me ycaania zho, laa zho nacle miech ne riegual gdziñ lo guielndzon ne no me, ni tib dol rapdraa zho, miech mbele nac zho, zig tib lë lar nquitsbie ne ni tib pxud neyd. ²⁸Sca nagon none gun mgui, none gantsi zho tsieel zho zigne rantsi zho xcuerp zho. Mgui ne rantsi tsieel, rrieequia xcuerp zho ga rantsi zho; ²⁹sac gon, tsod tib zha ne lëëque zha csacsi xcuerp

zho, sinque ran zhow. Ni scadaa nagon rzac Jesús grëse miech ne ngab lo me, ³⁰sac nac zho zig xcuerp me. Ni lëë tib lë cuerp co nu nac ne.

³¹Zha ne pcatsieel-le, ible tibaque cuerp nac zho grop zho, laaw zho-bneeque lo Xtiidz Dios zaatne rnee: "Ib none greezhaa mgui lo pxoz zho, lo xniaa zho, zeena gbannie zho tsieel zho gac zho zig tibaque miech grop zho."

³²Rgobey naa ngan tsoguic to zha nace chop miech gac tibaque cuerp; per ga gon rlu ne niicle nzian ne per tibaque cuerp nac ne, ni lëë xcuerp Jesús ga.

³³Mine racladzpa naa csoladz to nu: to ne nac to men bgui, none gleynie to tsieel to zigne rleynieque to xcuerp to; ni niicle togaa ne nac to men wnaa, none gon to xtiidz tsieel to, cueede to xquielto zho.

6 To ne nac to mëëd, golgon xtiidz pxoz to, xtiidz xniaa to, sac sca nonguiela, ni scagaa glu ne nli rleynie to Dios. ²Golgan ganle, lo grë xley Dios no tib mine znu rnee: "Bin xtiidz pxoz luu, xtiidz xniaa luu, zeena ine niowse gac lo xquielmban luu, ni nroob dze ne gban luu lo guidzliu rii." Ni lëëw glopaa rnee ganle pe nac mine ygaa zha ne gun mine rnabeya, ³sac rnew, niowse gac lo xquielmban zho, ni nroob dze ne gban zho lo guidzliu rii.

⁴Togaa ne nac to men nguzan, gunde to ncuane yquiaaguieñe to xpëëd to, sinque golcobey dien zha gun to parne gon zho diidz, ni cseed zho gban zho zigne rdziladz Dios.

⁵To ne nac to zha ne ngadoo ladz-nia ben, golgon xtiidz men ne rnabey to. Golguien zha rnabey to, dib zdoo to, goltsoxco golgun xtsiin zho, zig nac zeene xtsiin Jesús ga noyun to. ⁶⁻⁷Gunde to ne loxaque zeene zose zho lo to, dzigose yquiaalo to gun to dziin zeena guianzuiu to lo zho, sinque ine nguieel golgac golgun xtsiin zho, zig nac zeene

xtsiin Jesús ga quia to, ine dib zdoo to quiayun to mine racladz Dios. ⁸Benque nanle to, zigtaa zha ne ngadoo ladz-nia bena, zigtagaa zha ne rnabeya, zdeedse Dios mine tsieguial zho tib tib zho tel pe nac ncuane wen ne noyun zho.

⁹Togaa ne nac to zha ne rnabey, niowse golgac lo zha ne quia xtsiin to, gactseebe to lo zho. Golguien ganle, zigne rzacaque zho, scaque rzac to, no tib men ne rnabey to grë to, lëë me ga zob gbaa; ni tel me gon led yed me guiab dien cho rnabey, chogaa run dziin.

None nsin so zha ne riladz Jesús

¹⁰Bets, bzian, nu ne laa naa csiaalle, laa naa rnab lo to gon tibaque golnalo Dios; golgan ganle, con grëtaa guielrnabey ne rap me, me gneedz grë lose fuerz lo to. ¹¹Zig nac grë menguiib, ible no grë ncuane rqiin zho zeene laa zho rie lo dil, scaque to niina nagon, golquien grë lose fuerz ne bneedz Dios lo to, zeena glëbd mendox gunguet ma to. ¹²Golgan ganle, led-xe miech guidzliud waa nodilnie ne, sinque laa ne nodilnie grë me yozh ne quianzë zhan gbaa, ma ne quianabey grëtaa guielntseeb ne rac lo guidzliu rii. ¹³Gane nagon none yquien to grëse lo fuerz ne zineedzle Dios lo to, zeena guiablode to zeene laa grë me ntseeb co csilo ygaal to; ni scagaa, zeene laa ma biablo, tibaque dziits so to grë to.

¹⁴Dziits sca golso:

Dziits golso lo mine nac diidzli, zigne dziits dziits rzhidoo len menguiib zeene laa zho tsie lo dil.

Golgun mine nonguiel zeena ctse to lo mendox, zigne rtse ncuane racw menguiib lo grë ncuane gnitlo zho.

¹⁵Nsin golso zeene laa to tsiene Xtiidz Dios lo miech gacnan zho zha guiaanwen zho lo me, zigne nsinle zo menguiib zeene laa zho no tsie lo dil.

¹⁶Guiaanladzde to, golnalo Dios, zeena peet grielod gun grë me yozh co

to, zigne rnalo menguiib guiiblag ne rsaac zho lo zha ne nodilnie zho.

¹⁷ Golsoladz ganle laa Dios psilaale to lo guielgut, golsaca zigne rzac menguiib pchog guuib ne rzob guic zho, rsilaaw zho lo guielgut. Ni golsac Xtiidz Dios mine rneedz Espiritu Sant lo to, zigne rzac menguiib xquib zho.

¹⁸ Nsin sca golso, guiablode to. Tibaque golzodiidznie Dios. Golnab lo me mine rsiaab Espiritu Sant guic to, golnab gacnieñ me grëse zha ne ngab lo me; ni ¹⁹ golnab lo me gacnieñ me naa, csiaab me guic naa pe nac mine gne naa, peet dzeb tsod lo naa gne naaw lo miech; zeena gacnan zho ganle, zha nac Diidz Ndzon ne rnee zha laa miech lo dol, mine choot gocnand glo.

²⁰ Ib me bzo naa cteed naa xtiidz rii me lo grë zha zit, ni mincocxe waa rquiaqui

znu no grë guuib rii nia naa, ngoguiu zho naa nu. Golnab lo me gacnieñ me naa, gdzieebd naa gne naa ganle cho nac me. ¡Nsin sca golso!

²¹ Laa naa rxel Tic lo to, me nac tib men nziuu lo naa, dib zdoo me laa me quiayun xyudar naa lo xtsiin men ndzon ne rnabey ne. Me guiaadnie diidz lo to ganle zha rac naa, zha no naa nu. ²² Min-copaa ziaad me i, ziaadnie me diidz zha no no nëz rii, zeena ine gley to tsoxcoraa to mine rililadz to.

²³ Rnab naa lo Dios men ne nac Pxoz ne, ni lo Jesús men ndzon ne rnabey, me gacnieñ to peet zhgab ctsebde to, ine tibaque gliladz to me, ine gleynie to samiech to. ²⁴ Me gunlay to, grëse to ne nac to zha ne nlipaa dib zdoo rleynie Jesús.

Pabl

GUITS NE PXEEL PABL LO ZHA

FILIP

1 ¡Diuzh to grëse to!

¹ Naa nac Pabl, grop no Timoté laa no rxeel guits rii guiedz Filip i. Laaw zi-aad lo to ne nac to zha ne ngable lo Dios, ni nacie to Jesús; zigtaa tow, zigtaa zha ne zo lo tow, zigtagaa zha ne ruñ xyudar zhow. Nanle to ganle zigtaa naaw, zigtaa Timotéw, tib ngundziin nac no lo Jesús.

² Dios men ne nac Pxoze ne, ni Jesús men ndzon ne rnabey, me glu ganle pa lotaa noxco me to, zeena ni tib zhgab ctsebe to.

³ Zeene rsoladztaa naa to, rded naa xquizh lo Dios; ⁴ ni zeene rzodiidznie naa me, rley naa gon rnab naa lo me gacnien me to; ⁵ sac desde dze ne laa to psilo bliladz Jesús haxta lo nadze, tibaque laa to quiayacnie naa, quiayun to xyudar naa noseed naa miech Xtiidz Ndzon me. ⁶ Ni nannpaa naa, zigne squi psilo Dios nozhixcuaa me lo xquielmban to, zigse zie dze laa me gzhixcuaaraa to, zeena nsinle zo to gal dze ne laa Jesús guiaad stib.

⁷ Min co racladz naa, ni ib rieguiala sac ne nligaa rleyne naa to. Sac ib rsaande to naa, zigtaa zeene znu no naa ladzguiiba, zeene zonlaagaa naaw, zaatne racpaa rne naa ni rlu naa ganle ne nli diidzli nac Xtiidz Jesús. ⁸ Dios nan ganle pa lotaa nonie to guic naa, rquianë zdoonaa to, zigne rzacaque Jesús ne.

⁹ Rnab naa lo Dios gacnien me to, zig zie dze gleynieraa to samiech to, tsabiiniraa to, ¹⁰ zeena guien to cue to niapse grë ncuane ndzinli gun to. Sca ine ndzinli nac lo xquielmban to, ni tib xtol to guien gal dze ne guiaad Jesús; ¹¹ zaacse gban to. Ga glu to ganle lëë min co blu Jesús lo to, zeena sca csanglaa to Dios.

¹² Bets, bzian, racladz naa gacnan to ganle niicle tel pe nactaa ncuane nodeed naa, per led mincod gon cuèz ygaazdraa Xtiidz Ndzon Jesús, sinque lel znu mazdraa ndal miech ne noquiaadiaga. ¹³ Sac tel niina, zigtaa grë zha ne rquia dziin lo gobierna, ni grëragaa miecha, laa zho nanle ganle ne loxaque noyun naa xtsiin Jesús gane znu no naa ladzguiib. ¹⁴ Sac ndal grë bets zeene gon zho laa naa znu biab ladzguiib, laa zho bguiaalraa laa zho noseed miech Diidz Ndzon rii; peet rtoladzdraa zho, peet dzeb guindraa lo zho, masaque Dios rnalo zho.

¹⁵ Parga nli no stib dii zha ne psilo noyun dziin co, per laa zho noyuna loxaque par dien zha guianzzuu zho, sac në rac zdoon zho ran zho zha none naa Xtiidz me. Per zigne no zha ne sca nac, noque zha ne nli dib zdoon zho quiaseed zho miech. ¹⁶⁻¹⁷ Lëë zha co nagon rlu ne nli rleyne zho naa; sac nan zho ib laa Dios bzo naa gne naa ni glu naa lo miech ganle ne nli diidzli nac Xtiidz Jesús; laa zha ne sca noyun dziin co par guianzzuu zho, rzac zho na tel mazdraa glaa guiaan zho lo naa, mazdraa lozh coguielnë zho naa ne laa naa znule no ladzguiib. ¹⁸ Per par naa, pex gun naa zho. Tel zha ne zie dib zdoon, zha ne zieedgaa dib zdoon, totsaque ne Xtiidz Jesús quiaseed zho miech; min co nac mine mazdraa rley naa.

¹⁹ Ni zleyragaa naa, sac nan naa ib zrie naa zaatne niogyu naa nu; sac lala quianab to lo Dios por naa, ni lala nacie zhiEspíritu Jesús naa. ²⁰ Dib zdoonaa racladz naa, tiblique gac naa lëëb naa gan naa mine tedtaa naa, gdzind dze ne gun naa ncuane cuee xquielto naa. Racladz naa cxobnen naa ganle zha men rotaa nac Jesús; niicle tel niaca por min co yquiaaqui gut miech naa. ²¹ Sac gon, par naa laa naa mban par gun naa mine rnabey Jesús, ni zeene guet-

gaa naa, nannaa naa tib guielbley nroob ne yгаа naa. ²²Per tel laga mban naa, nzianraa ncuaane grieelo gun naa lo me; dzigo nagon riendaque naa dien pa min wenraa. ¡Pe wena gbanraa naa, te wena ye prontga gbi naa lo guidzliu rii! ²³No hor rzaac naa gbanraa naa, nogaa hor rzaac naa tebaa laa naa wbile lo guidzliu rii; zeena ziagaa naa lo Jesús, sac nligaa zoot naa laa naa bdzinle lo me. ¡Min co mazdraa wen, ledle cuéz naa lo guidzliu rii! ²⁴Per rien naa ible none cuéz naa, sac rquiinpaа to naa. ²⁵Mincoxe nagon waa, rgobey naa zbanraa naa, zeena lozh cseed naa to choobraa to lo Xtiidz Jesús, ine nley gac to laa to rliadza; ²⁶ni zeene laa naa gbire guial lo to i, rien naa nroob gley to, zdeed to xquizh lo Jesús porne racnien me naa.

²⁷Per mine rsopaa naa diidz lo to gon: Goltsoxco golban zigne no gban zha ne ngab xnéz Jesús, zeena niicle telne grielod guial naa, racladz naa gon naa tipse nac to gré to, tiblque dziits zo to lo Xtiidz Dios; ni noxco to dien zha gliladz gréaa miech Jesús, ²⁸ni lalnu rdziebde to gré zha ne rléé ran to. Ga guien zho ganle néz ne nitlo zho zie zho, sangue to ga rlu ne laa Dios psilaale to lo xtol to, ni nacie me to. ²⁹Sac gon, ible none gan to guielné porne no to xnéz me, bzooblod Jesús to loxaque par yгаа to guielnzaac qui gnalo to me. ³⁰Niicle tow, niicle naagaaw none dzian ne min co. Gonle to ganle zha nactaa gré ncuaane bdeed naa, ni ziyongaa to gré mine nodeed naa niina.

Goc Jesús tib men ndooladz

2 Nanle to ganle Jesús rchoobladz zdoo to, me rlu zha gleynie to samiech to, tipse nac to ni Espiritu Sant nacie to; nanle to ganle none yquia zdoo to samiech to. ²Gacxe nana sca, golconley zdoo naa, ine tipse golgac, golleynie gré zha ne nacgré to, tipse golnee,

ni tipse golgac tel pa lo dziin ne gneditz to gun to. ³Ncuaane gun to, guiabde to ne laa to guna par dien zha csanwin to stib miech, zeen dien zha guianzuiu to; sinque ine ndooladz golgac, masaque goltsienie guic ne nonraa stib miech lo to. ⁴Ib yguibde to ne lose to yquiin ncuaane gun to, sinque golguib dien zha gun to xyudar gréaa miech.

⁵Golsoladz ganle pa lotaa ndooladz goc Jesús len dze ne biaadte me lo guidzliu, scaquegaa nasca ndooladz golgac. ⁶Sac tel me:

Niicle ne Dios nac me,
per led mincod niab me nrieed me lo
guielndzon ne no me,
⁷sinque grése zigne nac me, laa me
psana tib lad,
laa me goc zig tib ngundziin win,
biaad me gol me lo guidzliu rii goc me
miech.

Nacle me miech,
⁸ni bii psanwin me me lo miech,
haxta bdeed me diidz pquiaa zho me lo
cruz,

zig run zho cho gré zha yozh.
⁹Mincoxe waa, psanglaaraa Dios me,
biaan me men ne mazdraa non, men ne
mazdraa nroob;

¹⁰zeena zeene laa me gaquiet,
grése zha ne no gbaa, grése zha ne no lo
guidzliu,

ni grése zha ne no néz len guidzliu, laa
zho yquitsgzhib,

¹¹ni grése zho laa zho cueero, guiab zho
ganle ne nli me nac men ne rnabey.
Ga laa zho cxoben ganle, zha men
nroobtaa nac Dios, men ne nac Pxo
me.

Zha ne nac biini lo guidzliu rii

¹²Bets, bzian, ne nligaa rleynie naa to. Laa naa rnab lo to (zigne bioxco to bin to xtidz naa zeene bléz naa lo to i, scaquegaa niina niicle ne zit zo naa, golgon mine rne naa nu), ib gdeete to di-

idz guiab to ladznia doḷ stib, niina ne laa Dios psilaale to; golguienḡ tsieniewguite guic to. ¹³ Benque Dioszhal rsiaab guic to rquiabladz to gunḡ to miḡe racladz me, ni scagaa me racniēnḡ to rrieelo runḡ tow.

¹⁴ Ni ncuaaḡe rieguialḡ to gunḡ to, iḡe nguieelḡ golḡac golḡuḡa, peet glisquide to, ni niicle tiḷdiidzdgaa to; ¹⁵ zeēna tsod pe nacne cho glisqui guiab zho laa to pe falt, pe doḷ ne quiayunḡ. Gollu ganḡle nli xpēēdle Dios nac to; zaacse golban, nicne ne ladaque grē miech ntseeb, miech ncow ne ndxie lo guidzliu rii no to. Golḡac zig tib biini lo zho, zigne rziini mel gbaa lo ncow ne nac guieel. ¹⁶ Ib csaande to Xtiidz Ndzon Jesús, diidz ne rdeed guielmban, lēēw golconie guic to. Sca golḡac, zeēna galḡ dze ne laa Jesús guiaad stib, per nli gley naa ganḡ naa led zhlēd brie naa bialḡ naa, bialseed naa to. ¹⁷ Zig nac niina, telḡ niaca miḡe no gded naa xquielmban naa gaca zig tib gon, parne dib zdooraa to gliladz to Dios, haxta zley naa gded naa xquielmban naa; sac racladz naa ye to yḡaa guielḡbley. ¹⁸ ¡Golley sca! Zigne no guielḡbley rii zdoo naa, scaqueḡaa to golco nley zdoo to, zeēna grē ne gley.

Timoté ni Epafrodit

¹⁹ Telḡne gneedz menḡ ndzon ne rnabey ne diidz, racladz naa cxeelniob naa Timoté guiaadwi dienḡ zha no to, zeēna haxta stibḡac zdoo naa zeēne laa Timoté glansonie diidz lo naa. ²⁰ Me cxelḡ naa, sac guieḡnd stib zha ne zienie guic zig zienie guic naa, telḡ led med; sac telḡ me nonie to guic me. ²¹ Grēraa zho, ncuaaḡe yquiin lo zho rioxco zho, laa ne tsoxco zho miḡe nac xtsiiḡ Jesús. ²² Laa Timoté, led nanḡle to ganḡle zha ndzinli nac me, telḡ niina iḡe tib mēēd nac me lo naa, nroob yudar ne quiayunḡ me noseed no miech Xtiidz Ndzon Jesús. ²³ Ible laa guic naa no cxelḡ naa me lo to i, loxaque gacnanse naa dienḡ zha csaḡ wxtis rii xcuent naa nu. ²⁴ Ni

ye naa nend pronaque guialso naa i dienḡ yo to, sac rienḡ naa ible zneedz Dios diidz guialḡ naa.

²⁵⁻²⁶ Ni rgobey naa nonguielḡaquew cxelḡ naa bets ne Epafrodit guiaad me nēz qui, sac laa me rbanle to, ni no me zhḡab bin me laa to gocnanḡ ne laa me bzhaacnē. Nli laa to pxeelḡ me lo naa nu, ni blactagaa noyunḡ me xyudar naa ne znu mban nodeed naa, blactaa noyacie me naa lo dziin ne nodziunḡ no. ²⁷ Ni nligaa bzhaacnē me, nzhooc goc me zootle laa me nietle; per pquia zdoo Dios me ni pquiaagaa zdoo Dios naa peet gocd me, sac gonḡ nole naa guielḡnē, ni telḡ pe niacaque me mazdraa niac nroob xquielḡnē naa. ²⁸ Minḡ co nagonḡ laa naa cxelḡgazh me, zeēna gley to ganḡ to lo me stib, ni scagaa niicle naaw zley naa. ²⁹ Golley sca gonḡ golcaania me, golguienḡ ganḡle bets to nac me, bets new grē ne ne nac ne zha ne ngab lo Dios; ni grēraa zha ne nac zig nac me, golḡeynie zho. ³⁰ Golganḡ ganḡle, telḡ me haxta bdedlaa me niet me nu niina ne biaadgunḡ me xtsiiḡ Jesús; per ib pquiad zdoo me me, blee-ladz me xquielmban me biaadgunḡ me xyudar naa, porne brieelod niaad-zhal to.

Ncuaaḡe mazdraa non

3 Bets, bzian, golḡey ne laa to ngab lo Jesús menḡ ndzon ne rnabey. Miḡe ziesole naa diidz lo to, guieete naa zneque naaw stib, sac ncuaaḡe yquiin-gaa lo tow: ² ¡Ib cxende to lo grē mēcw dox qui! Grē miech ndzinlid ne squi quianzē, racladz zho tsopaa zha bḡui bey, sac rzac zho zha ne sca tso bey, ga rlu xnēzle Dios no zho. ³ Sangue ne, ndionḡle ne zha nac diidzli, zha ne rleynie Dios zigne rsiaab Espiritu Sant guic zho, ni dib zdoo zho runḡ zhow, zha co nac zha ne nliḡaa no xnēz me. Ne ne nac ne zha ne no xnēz me, Jesús nac menḡ ne rdziunḡnon ne, sac ndionḡ ne por me laa

Dios ycaania ne; rmalod ne grë ncuaañe laglaase, ⁴sac telne scaw; zig nac naa pe zhistaa ncuaañe dzigo zrieelo gnalo naa. Tel no zha ne rzac por ncuaañe been zho min co laa Dios csilaa zho; tel scaw, nroobraa ncuaañe ziyun naa lo zho: ⁵Xon ngbidz raap naa laa naa birole bey co, zha Israel nac naa, lo xti Benjamín zial naa, merpaa zha Israel nac naa; sac niicle pxoz naaw, niicle xnias naaw zha Israel nac me. Niicle xley-gaa zha Israela, nroob pseed naaw, zha farisé goc naa; ⁶bleynedox naa grë mine zienal zha Israel, gacxe waa pquianal naa grë miech ne no xnëz Jesús; zig nac mine raquiet lo ley, grësew ben naaw zigne naca, ib biod dze ne cho zha pe nlisqui lo naa.

⁷Lëë grë ncuaañ co rnalo naa len dze co, sangue niina Jesús rnalo naa, grëse ncuaañ co laaw psanle naa tib lad. ⁸Ni led loxaque psandse naaw tibladd, sinque grësew peet nondraaw lo naa, mine non lo naa niina nacte beenbey naa cho nac Jesús, men ndzon ne rnabey naa. Niina ne laa naa runbey me, grëse ncuaañ co rzaac naaw zig rzac ne grë pe guizh beed, sac laa naa racladz gbigraa naa lo me, ni gacniera naa me. ⁹Zanaldraa naa gun naa mine rnabey ley par guiaanmbe naa lo dol, sinque laa naa zanal dib zdoo naa gliladz naa cho nac Jesús; sac zha ne dib zdoo rnalo me, sanmbe Dios zho lo dol. ¹⁰Racladz naa guienraa naa zha nac Jesús, ni gaap naa poder ne pquian Dios zeene blische me me len baa, ye naa teed grë mine bded me, ni cueeladz naa xquielmban naa zigne bleeladz me xquielmban me; ¹¹ni scagaa, nannpaa naa ye naa grieeban gal dze ne guiadbeeban me grë zha ne no xnëz me.

Stsëë Jesús xcuerp zha ne ngab lo me

¹²Gnid naa togo laa naa benle gan, nasi laa naa nacle zigne racladz Jesús gac naa; led scada, laa naa bii noxcow,

sac nannpaa naa zac naa zigne no guic me gac naa zeene psilaa me naa. ¹³Bets, bzian, gard gun naa gan; per xco co no naa; grëse ncuaañe bded laaw biaanladzle naa, laa guic naa zienie ncuaañe naraa ziaad. ¹⁴Masaque rzaac naa niina zig rzac zha ne rie prueb lo corr, rded naa fuerz gdzin naa zaatne cneedz Dios zhipremio naa, guielnzaac ne rbedz Dios ne yгаа ne zeene laa ne riladz Jesús.

¹⁵Ni ib znu none tsonie guic grë zha ne nlipaa dziits zo lo Xtiidz Dios; telne nogaa bla zha ne rzac led scada, per Dios gdeed guielbiini lo zho guien zho ganle zha naca. ¹⁶Ni negaa, grë mine rienle ne zha nac, none gban new.

¹⁷Bets, bzian, golwi ganle zha mban naa, ni zha mbangaa grë zha ne zienal mine blu no lo to grë to; dzigo sca golban. ¹⁸Sac gon nzian zha ne nacgrë to i (blactaale zizet naa zho lo to, ni niina haxta roon naa rzet naa zho stib), laa zho mban zigne racladztaa zho, rlëë zho ron zho pe nac gut Jesús lo cruz; ¹⁹ni nëz ne nitlo zho ga zie zho. Laa ne tsienal zho mine rnabey Dios, laa zho zienal grë ncuaañe gdeed guxt zdoo zho, ncuaañe gdeed guxt xcuerp zho. Loxaque grë ncuaañe mbee guielto zienal zho, per zha rlozhd gleynie zhow; niapse grë ncuaañ lo guidzliu rii nonie guic zho.

²⁰Sangue ne, laa ne zional ncuaañe yгаа ne gbaa, sac gbaa nac zaatne ngab ne, ni laa ne quiambiaaz quiet Jesús gbaa guiaad me stib (me nac men ne psilaa miech lo dol, me nac men ndzon ne rnabey); ²¹zeena ctsëë me xcuerp ben wich ne nu, gaca zig nac xcuerp ndzon me. Ni ib zun mew, sac nroob poder ne rap me rnabey me grëtaa ncuaañe no.

Rnab Pabl nley gac zha Filip

4 Bets, bzian, ne nlipaa gon rleynie naa to, haxta rzaac naa tebaa laa naa ranle lo to; to nac xquielbley naa, to nac zig tib premio lo naa por grëtaa xtsiin

Jesús minē beñ naa lo to. Laa naa rso diidz lo to, tibaque squi dziits gołso, ib csaande to zhiwseed Jesús.

²Rnab naa lo bzian ne Evodia, ni lo bzian ne Síntique glëëlsadraa zho, none tipse gnee zho; sac gon beł zho, xnëz Dios no zho grop zho. ³Ni luu gon bets, ne nac luu zha ne tibaque quiayacnie naa lo dziin ne quiadziuuñ ne, laa naa rnab lo luu bnee lo grop wnaa qui gneewen zho stib, sac gon ye zho blactaa minē bded zho zeene bzënal zho zhits naa biotiiz no Xtiidz Jesús, ni zeene güeynalгаа zho zhits Clement, ni zla zha ne rdziuungza no dziin. Laa lë zho zhooble len libr ne quia lë grëse miech ne bgaale guielmban ne gdzindraa dze lozh.

⁴¡Golley sca, tibaque golley! ¡Golgan ganle lo Jesús ngab to! Ni rneque naaw stib: ¡Golley! ⁵Golguien zaacse gołbanne grëse samiech to, zeena haxta gzëëb diidz ganle ne nli miech ndzinli, miech ndooladz nac to. ¡Golguien ganle, ile ziaad men ndzon ne rnabey ne!

⁶Tel pe nac grë ncuaañe quiated to, tsode to zhgab, gdziebde to, sinque gołzodiidznie Dios, gołsan grësew ladznia me; per led loxaque gnabdse to, sinque gołsoladz gołdeed xquizh lo me. ⁷Ni zeene sca csañ to grë xliadz to ladznia me, haxta tibiladz guiaan zdo to, peet dzeb tsoniedraa zdo to, peet zhgab tsoniedraa guic to, masaque Jesús nac men ne nacie to; grëraa miech ib guienđ zho zha nac ne scataa tibiladz rac to.

⁸Bets, bzian, nu ne laa naa csiaalle guits rii laa naa rnab lo to, min rii gołconie guic to:

niapse minē nac diidzli,
niapse grë ncuaañe nonguiel gac,
niapse grë ncuaañe rac zigne nac diidzli,
niapse grë ncuaañe mbe,
niapse grë ncuaañe gleynie miech,
niapse grë ncuaañe gley miech gon zho,
niapse grë ncuaañe yquiin,

niapse grë ncuaañe gzee zdo miech ni gleynie zho.

Grë min rii gołconie guic to, ni lëew gołsoxco gon to.

⁹Ni gołguien gon, grë min pseed naa to, min psan naa diidz lo to gon to, grë min bin to bne naa lo to, min gon to beñ naa, grë min co gołtsienal; zeena scagaa zacnie Dios to ib peet zhgab ctsebdraa to.

Gon ne bdeed zha Filip

¹⁰Ne nlipaa rded naa xquizh lo men ndzon ne rnabey ne, ni rley naa ne laa to pxeel grë ncuaañe yquiin naa stib. Nan naa ne led biaanladzde to naa, sac tibaque noxco to dien zha gon to xyudar naa; sinque bdeedniobda diidz. ¹¹Rley naa ne laa to psoladz naa, maase niicle nodpaa naa zhgab co dien pa griee pe yquiin naa, sac pseedle naa peet zienied guic naa niicle tel zhataa nodeed naa. ¹²Nan naa zha nac guielprob, ni nanquegaa naa zha nac zeene quianie ne nroob ncuaañe yquiin ne. Pseedle naa rzac zdo naa minē nodeedtaa naa, niicle zeene biodzë zdo naaw, zeene rcaabedzгаа naaw; niicle zeene nroob ncuaañe yquiin naa no, zeene peet guienđгаа. ¹³¡Grësew rrieelo naa, sacne nacie Jesús naa, me rneedz xfuers naa! ¹⁴Per wen ga been to, pxeel to ncuaañe pquiin naa lëëtaque len dze ne peet guienđ lo naa.

¹⁵Zeene brie naa nëz xtan zha Macedon i, len dze ne wriin psilo noseed naa miech Xtiidz Ndzon Jesús ga, tosaque nac zha ne been xyudar naa, beenlo to gon pxeel to lo naa, porne rleyne to dziin rii. ¹⁶Scasaque len dze ne no naa Tesalónica, blalaa vuel pxeel to pe pquiin naa.

¹⁷Guiabde to togo bod ne dien zha ygadraa miech lo naa gane rzetpaa naaw; lëda, sinque rley naa ne squi rala zdo to rgad to, sac squi nroo-

braa guielnzaac ne ygaa to. ¹⁸Tel na gon, grele ncuaane yquiin naa no, haxta nrooblew nu. Ni ne pxelaque to Epafrodit biaadsann stib neza, haxta bdesole goclow lo naa nu. Gretaa ncuaane bgad to lo naa, rrieequia naca zig tib gon ne bdeed to lo Dios, zig tib gox ndzon ne sac zdoo me ycaania me. ¹⁹Scagaa niina nagon, grese ncuaane yquiintaa to, Dios men ndzon ne riladz ne, me gneedza lo to, porne nligaa dib zdoo to riladz to Jesss; sac gon, nroobdoo gre guielndzon, gre guielzaac ne rap Dios. ²⁰¡Leë xDios ne ga, me nac Pxoz ne grese ne! ¡Gotsaa dziuunnon ne me sca, mesi gdzind dze ne nitlo xquielndzon me! Sca rieguala.

²¹Goldeed tib zhibdiuzh naa lo grese zha ne no xnez Jesss i, gre zha ne squi noxco mban zigne racladz Dios. Scagaa gollcaania zhibdiuzh gre zha bets ne, zha ne no lo naa nu. ²²Gollcaania zhibdiuzh grese zha ne no nu, zha ne riladz Jesss; haxta ye gre zha ne rquia dziin lo rey Roma nu, laa zho rxel zhibdiuzh zho lo to.

²³Jesss, men ndzon ne rnabey ne; me noxco to, me nonie gre zhizhgab to. ¡Me gunlay to grese to!

Pabl

GUITS NE PXEEL PABL LO ZHA COLÓS

1 ¡Diuzh to grëse to!
¹ Naa nac Pabl, tib zha ne pxeel Jesús nonee Xtiidz me lo miech, sac ible Dios bnabey ne sca gaca. ² Grop no Timoté laa no rxeel guits rii Colós i, laaw ziaad lo to grëse to ne nac to zha ne noxco mban zigne racladz Dios, ni dib zdoos to rleynie to Jesús.

Dios men ne nac Pxoos ne, me glu ganle pa lotaa noxco me to, zeena peet dzeb tsonied guic to.

³ Gzobtaa zeene rzodiidznie no Dios, Pxoos Jesús men ndzon ne rnabey ne, rnab no gacnie me to, ni rdeed no xquizh lo me ne squitaa rneedz me guielbiini lo to; ⁴ sac zidzion no ne nli-paa dib zdoos to riladz to cho nac Jesús, ni rleynie to grëse zha ne no xnëz Dios. ⁵ Min co nonie guic to, sac desde dze ne psilo pquiaadiag to Xtiidz Ndzon Jesús mine nac diidzli, laa to gocnan ganle no tib guielnzaac nroob ne yгаа to gbaa.

⁶ Golgacnan sca ganle, Xtiidz Ndzon Jesús, wseed ne riladz to, nzianraa zaatne quiagaaza, ni lëew notsëe lo xquielmban miech, zigne bdzëëque lo xquielmban to zeene pquiaadiag tow, laa to bien ganle ne nligaa pa lotaa noxco Dios to. ⁷ Lëe min co ga biadseed Epafra to; tib men ne nziuu lo no, ye me rquiagza no dzin; ranaxe to ganle zha rioxcotaa me xtsiin Jesús. ⁸ Me bzodidz lo no ne squitaa rneedz Espiritu Sant guielbiini lo to, rleynie to samiech to.

⁹ Gane zeene bdzion no squitaa ndzinli mban to, tibaque laa no quianab lo Dios quixbiiniraa Espiritu Sant guic to, guien to zhapaa nac grë mine racladz Dios gun to; ¹⁰ zeena grieelo gban to zigne no gban zha ne no xnëz Jesús, tibaque gun to ncuane conley to zdoos me; dzigosi

grëse ncuane ndzinli ne gun to, zlupaa ncuane rquiina, ni zioguicraa to zha nac Dios. ¹¹ Ni rnab no lo me, niapse por poder ne rap me gunndip me zdoos to, gunndip me guic to; zeena niicle tel pe nactaa guielnë ne gan to, ib peet tsienied guic to, ib sacxuude to, ¹² ine glye to gdeed to xquizh lo me nac me Pxoos ne, ne squi laa me bzooblo to, psanmbe me to; zeena gdzin to lo biini zaatne yгаа to mine no gdeed me lo grëse miech ne no xnëz me. ¹³ Sac me nac men ne blee ne lадznia mendox, ma ne rnabey lo guielcow, psan me ne lадznia Xpëed me Jesús, men ne rleynie me ga. ¹⁴ Jesús nac men ne bdiizh grëse xtol ne zeene sca gut me lo cruz, me nac men ne psanmbe me ne nëz lo Dios.

Grë ncuane been Xpëed Dios

¹⁵ Niicle ne gard dzian ne Dios, per laa Xpëed me biaad biaadlu lo ne ganle zha nac me, sac zigne nacse me scaque nac Xpëed me; ni lадznia Xpëed me no grëtaa ncuane no. ¹⁶ Zeene bnabey me tsaagrëtaa ncuane no gbaa, grëtaa ncuane no lo guidzliu; Xpëed me bzaaw grësew, zigtaa grë ncuane rdzian new, zigtagaa grë ncuane grielod dzian new, zig nac grë “me mban” ne rap guielrnabey, rap poder. Jesús bzaaw grësew, ni ible par me biaaw. ¹⁷ Nole Jesús zeene baa grë ncuane co, me naaza, gane tib tiba nosew zaatne rieguiala. ¹⁸ Ni grëse zha ne no xnëz me, me nac men nroob ne rnabey lo zho; grëse zho laa zho nac zig tib cuerp, dzigo me nac guic cuerp co. Me nac men ne nole glo, ni me nac men ne glopaa brieeban; zeena glu ganle me nac men ne mazdraa nroob, me nac men ne mazdraa non; ¹⁹ sac ib Dios bnabey zigne nacse Dios scaque nac me.

²⁰ Niapse por Jesús grëse ncuane no zigtaa lo guidzliuw, zigtagaa gbaaw, laaw baaanwen lo Dios, ni lëe min co goc zeene sca bzhiee xchen Jesús lo

cruz. ²¹ Zig nac to, glo zit zo to lo Dios, rriequia rlëenie to me, sac niapse grë ncuane ndzinlid güeynie guic to been to; ²² sangue niina laa Jesús psanwenle to lo me, zeene sca goc me miech pquiaa zho me lo cruz. Ni laa me psanwen to, zeena ine mbele to, ni tib dol rapdraa to gdziñ to zaatne no me. ²³ Per parne grieelo gdziñ to ga, none tiblque golgun guic to, goltsienal Xtiidz Ndzon me mine riladz to, ib guiaanladzde to guieinzaac ne no yгаа to, zigne raquiet lo Diidz Ndzon ne pqiaadiag to ga. Lëe Diidz Ndzon co quiagaaz dipse lo guidzliu niina, ni ye naa nac tib zha ne quia quianeew lo miech.

Dios bzo Pabl tsoxco me zha ne ngab lo Dios

²⁴ Grë guieinë ne noyan naa porne rleynie naa to, rley naa noyan naaw. Laa Jesús gonle grë guieinë co zeene psilaa me grë zha ne ngab lo me niina, laa niina ye naa noyan spalala, loxaque ne noseed naa zho Xtiidz Ndzon me, ne nac zho zig xcuerp me. ²⁵ Ni ible Diosгаа bzo naa noyan naa dziin lo grë miech ne no xnëz me, zig nac to, gocnieñ me to bzo me naa bne naa grëse zigne nac Xtiidz Ndzon me lo to. ²⁶ Diidz ndzon ne gocnand grëtaa zha gol ne ziyaadmban wlal ne bre guidzliu, laaw gocnand grë zha ne no xnëz me niina. ²⁷ Ible zha gocladz me gacnan grëtaa guieinzaac ne yгаа zho zeene laa zho gacnan diidz co; haxta to ne nac to zha zit. Ni lëe diidz ndzon co nu: Zha ne nacie Jesús, me gdzinnie zho zaatne nac lo guieindzon ne no me.

²⁸ Gacxe waa, zaatne ziotaa no, Jesús nac men ne rzeet no lo miech, ni megaa rneedz guieibiini lo no rseed no zho, rso no diidz lo zho; zeena gac zho tib miech ndzinli, zigne no gac zha ne ngab lo me. ²⁹ Min co nac dziin ne noxco naa, per led dziin ligada, gane dib nacse guiein-

daan, dib nacse fuerz ne rneedz me lo naa, noxco naa noyan naaw.

2 Racladz naa gacnan to ganle ne nli-paa tibaque no to guic naa, zigtaa tow, zigtagaa zha Laodicéw, ni grëragaa zha ne gard ganlo naaw. ² Rnab naa lo Dios ib guiaannd zdoos to, tipse gac to ine gleyne to grë zha ne nacgrë to, lozhraa tsaa biini xquielrien to guien to ganle zhapaa nac Jesús, sac gon naaraa bdeed Dios diidz gunbey miech me. ³ Me nac men ne rap grëse guieirac, grëse guieibiini nroob chen Dios. ⁴ Laa naa rne min rii lo to, zeena choot yquidiede to, nicle paraa ndzielguic rzë xtiidz zho. ⁵ Nicle ne nli zozhaald naa lo to i, per zhiespíritu naa nacie naa to, ni rley naa ran naa squi zaacse mban to, tiblque nac guic to dib zdoos to riladz to Jesús.

Tib guieimban cub

⁶ Nana sca, zigne bzëeb to xnëz Jesús gnabey me to, scagaa goltsienal mine rnabey me, ⁷ masaque ladznia me golsan xquieimban to, me golnalo, gollu ganle ne nli dib zdoos to riladz to me, zigne pseed no to, ni tibaque goldeed xquizh lo Dios.

⁸ Nsin golso: ib gac-wete to lo grë zha ne guiaanndie wseed lo guidzliu rii, grë godiidz ne paat rquiind, sac laa zho gacladz yquidie zho to. Tel zha, ib rzeete zho lo miech dien cho nac Jesús, sinque lel grë ncuane run grë xmengol zho, grë wseed ne rleynie grë miech lo guidzliu, min co rseed zho miech. ⁹ Sangue ne, ndion ne ganle zigne nac Dios scapaa nac Jesús. ¹⁰ Gacxe waa, to ne nacie to Jesús, peet rquiindraa to. Me nac men ne rnabey lo grëse zha ne rap poder, lo grëse zha ne rnabey.

¹¹ Zeene bnalo to Jesús rriequia hor co bio to tib bey, per nacda zig nac bey ne rio xcuerp zha bgui, sinque tib bey ne rlu ne laa to psaanle grë dol ne been to glo; ni Jesús nac men ne bloo to bey co.

¹²Ni zeene brobnis to, rriequia bguet-snie to me ga ni brieebannie to me, sacne bliladz to poder ro ne rap Dios men ne blische me len baa. ¹³Glo zha gutle nac to nêz lo Dios, lala por grêtaa xtol to ni porne gard co Jesús to bey co; laa zeene bleeban Dios Jesús, men ne pxeel me biaadsilaa ne lo dol, laa to wbiire bgaa guielmban stib. ¹⁴Ptiche Dios grêse mine rioguiâl ne, sac bdiits ne mine nac xley me; grêse dol co pcaadz me Jesús zeene laa Jesús pquia lo cruz. ¹⁵Ni zeene sca bded Jesús, ga psiaablo me mendox; grê me yozh ne rap poder, me ne rap guielrnabey, psan me ma guielto; sac gasi laa me blu lo miech ganle ne nli ladzniale me no ma.

Grê wseed ne paat rquiind

¹⁶Gacxe waa, ib guncasde to zha ne rlisqui dien pe nacne pe row to, pe nacne pe rie to, pe nacne runde to grê zhilni zha Israel, runndade to dze ne rquia mëe yeen, runndade to dze ne rdziiladz zha Israel lo dziin. ¹⁷Grê min co bioxco miech zeene gard guiaad Jesús, per lega gocse ncuuan co zig tib zhimlê guielbini ne biaadnie Jesús. ¹⁸Ib gliladzde to xtiidz grê zha ne squi racladz csozit to lo Dios, niicle squitaa rquiaalo zho ndooladz rac zho, squitaa rleynie zho grê anjl, rnee zho goon dieen pe ncuane gbaa ne zielulo lo zho, lëëque lëë zho rlozhd gunniats zho por grê zhiwseed zho. ¹⁹Led yed zho ngab lo Jesús, men ne rnabey lo ne grêse ne ne nac ne zha ne ngab lo me. Tel ne, me racniën ne, tipse noyun me ne, laa ne noyabiiniraa zigne racladz Dios.

²⁰Zeene sca gut Jesús, gataa bnitlo me grêtaa mine nac to glo, gane niina ngadoodraa to lo grê ncuane zienal grëraa miech guidzliu. ¿Pe nac dzigo ne bii zienal to grê min co? ²¹Zig nac grê mine rnabey zho to, rnee zho: “Nod gon yquiin to ncuuan rii, nod gow to min

rii, gacd ygaal to ncuuan rii.” ²²Ncuane tib rded nac grê ncuane qui, zig nac guielwagw led ncuane gdiid ga, grêse wseed qui miechse bleebeya. ²³Parga nli na zootle nixbiini nac grê wseed co, sac rioxco zho dien zha tsiegan zho grê anjl, rac ndooladz zho lo miech, ni rsacsi zho xcuerp zho; per rrieelod grê ncuuan co ctsëew xpensar zho, zdoo zho, parne gnabey zho xcuerp zho.

3 Golguiën ganle, stible guielmban rap to niina, lëë guielmban co bgaa to zeene brieeban Jesús; gacxe waa, goltsoxco ygaal to grê guielnzaac ne no gbaa, zaatne zob Jesús cue Dios nêz derech. ²Grê guielnzaac ne no gbaa min co golconie guic to, led grêd ncuane no lo guidzliu rii; ³sac gon, rriequia gutle to lo grê ncuane no lo guidzliu rii, laa to mbanniele Jesús, zigne racladz Dios. ⁴Laa ne rdziaap tib guielmban cub niina, sacne nacnie ne Jesús; gal dze ne laa me guiaad stib, laa ne no gdziin lo me gban ne zaatne nac lo xquielndzon me.

Zha gban zha ne riladz Jesús

⁵Gacxe nana sca, golsaan grêtaa guielntseeb ne run miech lo guidzliu rii: tsoniede to zha ne led tsieelde to, gunde to grê ncuane mbeeguielto, gdeete to diidz gnabey xcuerp to to, gunde to ncuane ndzinlid ne racladz to, ni gacblêde to lo dimi (sac tel scaw, dzigo dimi san to xlugar Dios).

⁶Grê dol rii run grê zha ne nêd gon xtiidz Dios, lozh ga lëë mine tsieguiâl zho laa zho ygaal lo guielzi ne csiaab Dios. ⁷Zig nac to, grê min co been to glo; ⁸sangue niina, none csaan tow, ni lalnu: glëënedraa to samiech to, sobzhiandraa to, gundraa to guielntseeb, gneenëdraa to samiech to, gneedraa to diidzguidz, ⁹yquidiedraa to samiech to.

Sac gon, nacdraa to zigne nac to glo, laa to brielee lo grëtaa mine been to. ¹⁰Stible nac lo xquielmban to niina: tib miech cuble nac to, ni laa to bii nodzëë haxta que ne gac to zigne racladz Dios men ne psan miech, zeena scagaa lozh gunbey to zha nac me. ¹¹Zha ne bgaale guielmban cub rii, led yedraa zho cue dien cho zha nac zha Israel, dien cho zhagaa nac zha zit; dien cho no bey, dien cho nodgaaw; dien cho ziaadz guiedz nroob, dien cho ziaadgaa guiedz win; dien cho rac, cho gacdgaa; dien cho run xtsiin ben, dien chogaa nac zha rnabey. Mine rquinnraa niina, nacne grëse zho guien ganle Jesús nac men ne mazdraa non, me none gnalo zho.

¹²Golgan ganle, zha nquialadzttaa Dios to, ib laa me ble to gac to miech ne ygab xnëz me. Zaacse sca golban, ne nliipaa dib zdoo to:

golquia zdoo samiech to,
niowse golgac lo samiech to,
ndooladz golgac lo samiech to,
nguidzladz golgac lo samiech to,
guieedniede to samiech to.

¹³Guieedniede to samiech to, ni zeene cho zha run pe tib falt lo to, golgun zho perdon. Golguien ganle zha been Dios to perdon; scaque to, none gun to samiech to perdon. ¹⁴Ni mine mazdraa none tsoxco to, golleynie zha ne nacgrë to zigne racladz Dios, zeena tipse gac to; ni scagaa gleynie to grëraa samiech to. ¹⁵Jesús nac men ne ctiche grëtaa ncuane ndzinlid ne no zdoo to, zeena niowse gbannie to samiech to. Lëë tib guielnzaac co no ygaa to ne laa Dios bredz to, ni scagaa none gban to, zeena tipse gac to grë to. Golsoladz goldeed xquizh lo me.

¹⁶Niapse mine nac Xtiidz Jesús golconie guic to, golco zdoo to. Golquini grë guielbiini ne rneedz me lo to, golseed grë zha ne nacgrë to, ni zha ne rxin,

golnee lo zho zaacse gac zho. Dib zdoo to goldeed xquizh lo Dios por grëtaa mine run me, ine golgoolnie me grë salm, golgoolnie me grë cant ne rdziolnie ne me. ¹⁷Ncuane guntaa to, niicle zeene gnee tow, zeene gungaa to tib dziina, golguna zigne rdziladz Jesús, men ne rnabey ne; ni tibaque goldeed xquizh lo Dios men ne nac Pxoaz to, niina ne laa to ngable lo Jesús.

¹⁸To ne nac to men wnaa ne ptsieel-niale, golgon xtiidz tsieel to, sac ible sca nonguiel gban miech ne no xnëz Jesús.

¹⁹To ne nac to men bgui ne ptsieel-niale, golleynie tsieel to; ganchogde to lo me.

²⁰To ne nac to mëed, golgon mine rnee pxoz to, mine rnee xniala to, sac sca rdziladz Dios.

²¹Togaa ne nac to men nguzan, gunde to ncuane gunglëë to xpëed to, zeena csande to zdoo zho.

²²To ne nac to zha ne lega run xtsiin ben lo guidzliu rii, golgun grëse mine rnabey zho to; gunde to zeene zose zho lo to dzigose yquiaalo to gun to dziin, zeena guiannziiu to lo zho; sinque dib zdoo to golgun xtsiin zho, golguien ganle Dios zobwi ran me pe run to.

²³Grëse dziin ne gun to, ine nguieel golgac golguna, zig nac zeene xtsiinzhall Dios noyun to. ²⁴Benque nanle to, zгаа to mine gdeed Dios lo grë zha ne ngab lo me, telne gon to diidz; sac gon Jesús nac men ne nliipaa rnabey to, ni lo me quia to dziin. ²⁵Golgon diidz sca, sac zha ne gonda, ib tedsod zdeed Jesús mine tsieguial zho; sac gon, tel me led yed lo me ncuue miech.

4 Togaa ne nac to zha ne quia miech xtsiin, zaacse golgac lo zho, csacside to zho. Golsoladz ganle, ye to tib ngundziin nac to lo men rnabey ne zob gbaa, ni me zobwi ganle pe run to.

Gnab zho gacniën Dios Pabl

²Bets, bzian, tel̄ petaa rzac to tibaque golzodiidznie Dios, nsin golso, goldeed xquizh lo me. ³Golnab lo me gacniën me no, grieelo ziaab no zaatne guioseed no miech Xtiidz Ndzon Jesús, gnee no lo zho ganle cho nac Jesús men̄ ne beenbeyd miech padzeela; sac zig nac niina por min̄ co znu nioogyu naa nu. ⁴Golnab lo me gneedzraa me guiel̄biini lo naa, zeene cseed naa miech xtiidz me, guien̄ zho mine rne naa; gun̄ naa dziin co zigne no gun̄ naaw.

⁵Golquien̄ guiel̄biini ne rneedz Dios lo to, zeena guien̄ to zha gnee to, zha gac to lo zha ne gard gliladz Xtiidz Jesús; ni zeene sca rdeeda diidz sodiidznie to zho, golnee lo zho ganle zha nac Xtiidz me. ⁶Golguien̄ tib godiidz ndzinli, tib godiidz niowse, min̄ co golzodiidznie zho, ni none guien̄ to zha ctsire to lo xtiidz zho tib tib zho.

⁷Laa bets ne Tic guiaad i, me guiaadnie diidz lo to ganle zha no naa nu. Rleynie no me, tibaque laa me noxco quiadziuungza no me xtsiin̄ men̄ ndzon ne rnabey ne. ⁸Ga nagon̄ laa naa rxel̄ me, me gnë lo to ganle zha no no nëz rii, ni gnee me lo to zeena cchoobladz me zdoos to. ⁹Ye menladz to Onésimo guiaadgrop me. Rleynie no Onésimo, ye me tibaque noxco me xtsiin̄ men̄ ndzon ne rnabey ne. Grop zho guiaadnie diidz i ganle zha nac grë ncuane quiayac nëz rii.

¹⁰Golcaania zhibdiuzh Ristarc, men̄ ne nioogyunie naa nu, zhibdiuzh Marcw

betsyeen̄ Bernabé (laa naa nile lo to ganle, tel̄ne laa Marcw guiaadgan̄ to i, niowse golcuézlo me); ¹¹ni zhibdiuzh Jesús, tib men̄ ne rneeqe zho Just. Lo grë zha Israel ne riladz Jesús, lëese gza zha rii nac zha ne quiayun̄ xyudar naa quiaseed no miech zha sëeb zho xnëz Dios, ni blactaa zichoobladz zho zdoos naa.

¹²Golcaania zhibdiuzh menladz to Epaf̄r, ye me quiayun̄ xtsiin̄ Jesús nëz rii; tibaque rzodiidznie me Dios rnab me dziits so to lo Xtiidz Jesús, ni tibl̄ique gac guic to tsoxco to gban to zigne rnabey Dios. ¹³Nan̄paa naa ganle pa lotaa nonie to guic me, grë to zha Laodicé ni zha Hierápolis.

¹⁴Golcaania zhibdiuzh Demas ne, ni zhibdiuzh Luc men̄ ne run̄ rmed, lëe stib men̄ ne nziuu lo no nu.

¹⁵Goldeed tib zhibdiuzh no lo grë zha ne no guiedz Laodicé, zha ne nacgrë ne. Goldeed zhibdiuzh no lo zhuz Ninf, ni lo grëraa zha ne rcaalsa lidz me i, rie-goolnie zho Dios.

¹⁶Zeene gon̄ lozh glab to lo guits rii, dzigo golxeela lo zha Laodicé, zeena ye zho glaba; ni scagaa to, gollab mine cxel̄ naa lo zho. ¹⁷Ni golguiab lo Arquip, tsoxco me zaacse gun̄ me dziin ne bdeed Dios lo me i.

¹⁸Naa nac Pabl, golgan̄ ganle naazhal pquia tib bdiuzh rii nu rxel̄ naa lo to. Golsoladz ganle ladzguiib no naa. Dios nac men̄ ne gunlay to, me glu lo to ganle pa lotaa noxco me to.

Pabl

**GUITS NE GLO PXEEL
PABL LO ZHA
TESALÓNICA**

1 ¡Diuzh to grëse to!
¹ Naa nac Pabl, gza no Silas ni Timoté, laa no rxeel guits rii Tesalónica i; laaw ziaad lo to grëse to ne nac to zha ne ngable lo Jesús, men ndzon ne rnabey, ni lo Dios men ne nac Pxoze.

Dios ni Jesús, me glu ganle pa lotaa noxco me to, zeena peet zhgab ctsebbe to.

² Tibaque rdeed no xquizh lo Dios men ne nac Pxoze ne, squitaa rneedz me guielbiini lo to; gzobtaa zeene rzodidznie no me rzeet no to lo me. ³ Ni zeene rzeet no to lo me, rsoladz no grëtaa dziin ne run to niina ne dib zdoo to rleynie to me, ni zha quialëb to lo grëtaa guielnë ne noyan to, tibaque nonie guic to ne ible zdziñ dze ne laa Jesús guiaad stib.

⁴ Bets, bzian, rleyniedox Dios to, ni ndion ne ganle me bzooblo to ygab to lo me. ⁵ Zeene biaad no biadseed no to Xtiidz Ndzon Jesús, znuse ptsëew lo xquielmban to, sac gocnie Espíritu Sant to bien to ganle niapse diidzli nac grë diidz ne nonee no lo to; scagaa no, gon to ganle zha mban no, ga blu ne nli diidzli nac grë mine noseed no miech. Ni golsoladz ganle zha biaadbannie no to i, bdzioxco no bdziuuñ no xyudar to, sac ne nligaa rleynie no to.

⁶ Scagaa to, pseed to wban to zigne mban no, ni zigne wban men ndzon ne rnabey ne. Laa to pcaania xtiidz me, blozh ga, niicle nroob guielnë ne bded to, per bneedz Espíritu Sant guielbley lo to, ib peet güeynied guic to. ⁷ Grëse zha ne riladz Jesús nëz Macedon, nëz Acay, zeene bin zho zha mban to, yeque zho laa zho pseed mban zho zigne mban to. ⁸ Ni ne squi ndzinli mban to, nzianraa za-

atne rzeet miech Xtiidz Ndzon Jesús, led loxaque gropdse lugar rii. Zaatne ziota no, zhoob diidz ne squitaa dib zdoo to riladz to Dios, rquiindraa ne no gzodidza lo zho. ⁹ Zhale rzodiidz grëse zha biaad no lo to i, zha scataa niow blëzlo to no len dze co, ni zha psaan to grë zhiwseed xmengol to, grë ncuaañe nac mdio lo to, laa to bliladz men ne nacpaa Dios ne nguiamban, ni laa to zienal mine rnabey me. ¹⁰ Ni rzodiidz zho zha zienie guic to ne ible zdziñ dze guiet Jesús gbaa guiaad me stib, ni quiambëz to gdziñ dze co. Xpëed Dios nac Jesús, Dios bleeban me lo guielgut, ni me psilaa ne lo guielnëdodox ne ziaadyob guiaad.

Zha güeyseed Pabl zho

2 Bets, bzian, nanle to ganle zeene biaad no lo to i biaad-zhlëd no, brieelo pseed no to. ² Niicle ne wriin psacsi zho no guiedz Filip hor co, per laa no bii biaad ladz to i, ni niicle igaaw bioxtseebaque no, per ib bdziebd no laa no pseed to Xtiidz Ndzon Jesús; sac ndion no Dios nacie no. ³ Ni diidzli nac mine pseed no to, choot biaate par nquidiee no to, niicle biaategaa no par dien pe niaadla no lo to. ⁴ Xtiidz Dios bnee no, me bzo no gnee no lo miech zha laa zho lo dol, ni min co nac dziin ne quiadziuuñ no. Nli nzian zha ne rlëñiew, per laa no bii rdziuuñ dziin co; sac zionald no gac mine rdziladz miech, sinque laa no zional gac mine rdziladz Dios, men ne nan ganle pe rza zdoo ne.

⁵ Gon to ganle, bneed no pe diidz niow lo to par nquidiee no to, niicle bguibdgaa no dien zha ndeeda diidz needz to dimi lo no. Dios zobwi rdziuuñd no min co. ⁶ Wlaltaa ib bguibd no dien zha niacnon no lo miech, niicle lo tow, niicle lo stibgaa miecha. ⁷ Laa ne nlu no ganle zha rnabey nac no, sac gon Jesús pxeel no, lel ndooladz goc no lo to. Masaque zigne rleynie men wnaa xpëdyeen me, nda nda

raṅ me win; scadaa bleynie no to, ⁸ bio no bdzioxco no pseed no to Xtiidz Dios. Ne nlipaa bleynie no to, telne niaca miṅe niedziṅa haxta mbeeladz no no niet no por to.

⁹ Bets, bzian, rsoladzaxe to gaṅle ni lalnu ib psodziind no to; blactaa, dze guieel bdziuuṅ no dziin, nozhal bdziniaa ncuaaṅe pquiin no leṅ dze ne biadseed no to. ¹⁰ Dios zobwi raṅ me gaṅle zha nac lo xquielmban no, ni niicle togaaw (ne nac to zha ne ngab lo me) goṅ to gaṅle ndzinli wban no zeene biaad no i, bdziuuṅd no ncuaaṅe mbee no diidz ro miech, sinque laa no bdziuuṅ miṅe rdziladz Dios. ¹¹ Masaque rziaac no to zig rzac tib dad xpëed zho, blactaa pchoobladz no zdoo to, bloonley no zdoo to tib tib to; ¹² pso no diidz lo to zaacse gac to, gban to zigne no gban zha ne no xnëz Dios, menṅ ne bredz to gdziṅ to lo xquielndzon me, zaatne rnabey me.

¹³ Ne nligaa rdeed no xquizh lo Dios, sac zigne biadnee no Xtiidz me lo to, laa to pcaaniaw, bienṅ to Xtiidz me naca, nacda ncuaaṅe bleebey miech. Ni nligaa Xtiidz Diosa, gacxe waa zha ne rliladza zigne rzac tow niina, rzhixcuaa lo xquielmban zho. ¹⁴ Per zeene laa to bliladza, laa menladz to psacsi to; bded to zigne bdedaque grë zha Israel ne rliladz Jesús, sac telṅ zhaw psacsi menladz zho zho. ¹⁵ Ni lëëque zha ne psacsi zho ga, zha co bñab psacsi zho Jesús menṅ ndzon ne rnabey, zigne beetaque zho grë zha ne pxeelṅ Dios biadteed Xtiidz me; ni lëëque zho benxcooṅ no. Ncuaaṅe rbinladz Dios ruṅ zho, rlëënie zho grëse miech, ¹⁶ rtsidiṅ zho pe nacne nonee no lo grë zhazit zha laa zho lo doṅ. Loxaque quiayunctalraa zho xtoṅ zho, per, ṅprobsaxe zho, sac guieṅdëdax no ziaadyob cxeelṅ Dios ygaazho!

Racladz Pabl tsiegaṅ Pabl zho stib

¹⁷ Bets, bzian, nli gard dzianlolsa ne wlal ne wbiin no i, per tibaque rsoladz no to; blactaa rnee no telpaa zha guiaad-dzianṅ no to. ¹⁸ Telṅ naa blactaa gocladz naa nialṅ naa, nialgaṅ naa to. Laa no niaadde, per ptse mendox lo no goṅ, pca ma xnëz no pasëṅ no niaad. ¹⁹ Guiabde to togo quiayaanladz no to, sac goṅ to rnalo no conley zdoo no galṅ dze ne laa Jesús guiaad stib. To glu nli bdziuuṅ no xtsiinṅ me, to glu ne nli rioguiṅ no ygaazho no premio ne gneedz me. ²⁰ Ne nligaa rley no rdzianṅ no zha mban to, haxta riats no zeene raquiet to; sac to rlu gaṅle ne nli xtsiinṅ Dios nodziuuṅ no.

3 ¹⁻² Ni ne scataa tibaque nonie to guic no, dzigo mazd pxeelaque no bets ne Timoté biaad lo to i, laa no biaaṅ guiedz Aten. (Nanaxe to gaṅle ye Timoté nacgza no quiadziuuṅ no xtsiinṅ Dios, quiaaseed no miech Xtiidz Ndzon Jesús.) Laa no pxeelṅ me biaadgaṅ me to, biadchoobladz me zdoo to, biadnee me lo to lozh sodziits to lo Xtiidz Dios; ³ zeena niicle telṅ pe guieṅdë ne noyanta to, ib guiaandṅ zdoo to. Nanle to gaṅle grëse ne ne rliladz ne Jesús, ib laa ne no dzianṅ guieṅdë. ⁴ Led rsoladz to zeene biaad no i, bneegazh no ne ib laa ne no dzianṅ guieṅdë; ni goṅ to gaṅle scase goca.

⁵ Ne nligaa tibaque bionie to guic naa, nacne mazd pxeelaque no Timoté, biadso me dienṅ pe bii zianaṅ to miṅe nac Xtiidz Dios; sac ni naa nend pquiil mendox to biire zianaṅ to ncuaaṅe rnabey ma, dzigo zhlëse biadseed no to.

⁶ Laa niina ne laa Timoté blanso nu stib, blansonie me diidz, në me niowse mban to, rleyinie to grë zha ne nacgrë to, dib zdoo to rliladz to Dios. Ni në me rleyinie to no, ye to racladz tebaa zha gaṅ to lo no, zigne rziaacaque no.

⁷ Minṅ co nagonṅ, bets, bzian, niicle ne nroob zhgab, nroob guieṅdë ne nodieed

no nu, haxta biaanladz no grë ncuuan co zeene gocndion no dziits zo to lo Xti-idz Dios, mine rililadz ne. ⁸Haxta stib goc zdoo no bdzion no squi tiblrique laa to rleynie men ndzon ne rnabey ne; ⁹ni rdzieltraa no diidz ne gnee no gdeed no xquizh lo Dios por to. Ni ne znu-taa bloomley to zdoo no, haxta Dios ran ganle pa lotaa rley no. ¹⁰Dze, guieel, quianab no lo me gneedz me diidzbey gbiire dzian no lo to stib; zeena lozh cseed no to grëraa mine no gacnan to lo Xtiidz me.

¹¹Dios men ne nac Pxoze ne, ni Jesús men ndzon ne rnabey ne, me gacnien no grielo guiaaddzian no to. ¹²Jesús gacnien to tsaaraa to biini, zeena gleynieraa to grë zha ne nacgrë to ni grëraa samiech to, zigne rleynie no to. ¹³Ni rnab no lo me, gacnien me to tiblrique gac to lo Xti-idz me, zeena ine mbe zdoo to, ni tib dol rapde to zeene laa me gzo to lo Dios men ne nac Pxoze ne, gal dze ne laa me guiaad stib con grë zha ne nacie me.

Guielmban ne rdziladz Dios

4 Zig zobwi Jesús men ndzon ne rnabey, laa no rso diidz lo to: zigse zie dze goltsoxcoraa gban to zigne rdziladz Dios, ²benque nanle to zhaw, sac lëe min co bnabey Jesús no biadseed no to gun to. ³Sac gon, laa Dios racladz mbe guiaan to lo me, gunde to guiele-yozh yquiangob to zha ne led tseeelde to.

⁴Grë zha bgui, zeene laa zho gnee lo tseeel zho, none niowse ndzinli gac zho; ⁵gund zho zigne run grëraa miech ne nand zha nac Xtiidz Dios; sac tel zha co, rzac zho loxaque par gdeedse guxt xcuerp zho, mincose rquini wnaa. ⁶Ni-icle yquiangobde to tseeel sabgui to; sac zha ne sca run, sabgui zho ga rguitnie zho; ni dol co ible tedsod zunquizh Dios zhow. Golsoladz ganle psole no diidz rii lo to glo, ni na laa no rneequew stib. ⁷Golguien ganle, bredzdaxe Dios ne waa

parne dziuun ne grë guiele-yozh, sinque laa me bredz ne gban ne zigne racladz me. ⁸Gacxe waa, zha ne zienald wseed rii, gacnan zho ganle xtiidz Dios ga (men ne rdeed Espiritu Sant lo zha ne ngab lo me) noguiits zho, led xtiidzd cholze samiech zhow.

⁹Laa zig nac guielewleynie, nanle to zha no gleynie to grë zha ne nacgrë to. Rquiind cso no diidz lo to dien zha gun to, sac Dioszhal pseed to zha gleynie to zigtaa zha ne nacgrë tow, zigtagaa grë samiech tow. ¹⁰Zig nac grë zha bets ne, zha bzian ne, zha ne no xtan zha Macedon, zëeb diidz rleynie to grë zha co. Goltsoxco sca, golveynieraa samiech to.

¹¹Ni stib mine rso no diidz lo to: niowse golbannie samiech to. Mine nac xtsiin to tib tib to, min co goltsoxco, tozhal goldziniaa ncuane yquini to; ¹²zeena peet gunfalte lo to, ni scagaa grë zha ne gard gliladz Xtiidz Dios, haxta gzee zdoo zho gan zho zha mban to. Golsoladz ganle psole no diidz rii lo to glo.

Ib ziaad Jesús stib

¹³Bets, bzian, nu na ganle laa naa gzodiidz lo to zha gac grë zha ne ret, zha ne ngable lo Dios; zeena tsoode to guielnë zig rzac grë miech ne gard guien gnalo Jesús.

¹⁴Ne, ne dib zdoo ne rililadz ne nli gut Jesús ni bleeban Dios me; scaquegaa none gliladz ne ible zbeeban Dios grëse zha ne dib zdoo rililadz Jesús, zeene laa Dios cxeel me guiaad me stib. ¹⁵Golgacnan sca ganle, znu gon nac xtiidz me: Grëse zha ne ngab lo me, zha ne bii zomban gal dze co (gal dze ne guiaad Jesús) tednerd zho lo grë zha ne gutle. ¹⁶Zeene laa me guiet gbaa, redz ro ne yquia, zlu zëeb tsi tib zha ne quianabey, tsi tib anjl ne nonraa, ni tsi zhitrompet Dios; hor co laa me guiet gbaa, laa grë zha ne ngab lo me, zha ne gutle, laa zho grieeban. ¹⁷Dzigo tipse gac zho grë zho zha ne

bii zomban ga, laa zho soquia laglaa lo xcow tsiedzieelo zho me; dzigosi gdzin-draa dze ne gbiche zho lo me.

¹⁸Nana sca mine rne naa nu, golsodidza lo grëse zha ne nacgrë to; zeena conley to zdoo zho.

5 Bets, bzian, nana par gni naa lo to dien pe guidze te guieel guiaad me, choot ndionda. ²Golgacnan ganle, lega nacle zeene gan miech laa me ziaadle, zig nac zeene rzëëb ngbaan yu guieel, cho dien nannaa pa hor sëëb ngbaan? ³Zeene laa grë miech guiab: “Nasi wen ndxie ne, peet guiełtseeb nodraa”, tibaque zeene guien zho laa dze ne nitlo zho bdzinle, ni gasi grielodraa cho csilaa zho. Sac zig znuse rnaaz yoob men wnaa ne bdzinle dze gap xpëëd; scadaa gdzin dze co.

⁴Sangue to, bets, bzian, nacdraa to zha ne nonziaab lo ncow, tel pa hortaa guiaad me nsinle zo to; sacdraa to dze co zig rzac miech ngbaan, lega nacle zeene ran zho laa ngbaan rdzin.

⁵Miech ne nole lo xbiini Dios nac to, niini zo to; nacdraa to zha ne no glowtaa guieel, zha ne no lo ncow; ⁶gacxe nagon waa, niini golso, tsienalde to mine run zha ne zienal guiełntseeb; sac nac grë zha co zig nac zha ne nixguies, tibaque guieel no zho. ⁷Sac tel guieela, guieel raaguies miech, niicle zha ne rzuudzgaaw guieel rzudz zho. ⁸Sangue ne ne nac ne zha ne niini zo, none guien ne pe nac ncuane noyac. Tibaque dib zdoo ne gliladz ne Dios, gleynie ne samiech ne, zeena csaaca ne zig rsaac ncuane racw menguiib lo grë ncuane gnitlo zho; ni csoladz ne ganle laa Dios psilaale ne lo guielgut, gotsaa ziaac new zig rzac menguiib pchog ne rzob guic zho rsilaaw zho lo guielgut. ⁹Sac gon bredzdaxe Dios ne waa yгаа ne guiełnëdox ne no guiaad, sinque laa me bredz ne csilaa me ne lo guiełnë co. Ni lëë min co rac zeene laa ne rililadz Jesús. ¹⁰Zeene gut Jesús, ga

bdiizh me xtol ne; zeena yase mban ne o gutlegaa ne gal dze ne guiaad me, per me gbannie ne.

¹¹Nana sca, tib tib to goldeed xfuers zha ne nacgrë to, niapse diidz ne gun xyudar zho choobraa zho lo Xtiidz Dios, min co golnee lo zho; zigne quiayunaque to niina.

Rso Pabl diidz

¹²Bets, bzian, laa no rso diidz lo to: Niowse golgac, niowse golnee lo grë zha ne pso Dios noyun xtsiin me lo to, zig nac zha ne zo lo to, zha ne rnee lo to zha no gban to. ¹³Golguien ganle cho nac zho, golleynie zho, sac gon led lega nacd dziin ne quiayun zho lo to. Golsoladz sca: jZaacse golban, tilniede to samiech to!

¹⁴Tel cho zha ne nacgrë to i, rsilo quiayacgbech, golgactox lo zho, zeena guien zho gun zho dziin. Grë zha ne quiasaan Xtiidz Dios, golnee lo zho zeena gleynie zhow stib; grëgaa zha ne gard tsoguicpaa zha naca, golgun xyudar zho tsoguic zhow; niicle grëragaa zha ne nacgrë tow, ib guieedniede to zho. ¹⁵Golguien tel pe guiełntseeb ne run miech lo to, guiabde to ne scaque gun to zho; sinque mazd goltoxico tibaque niowse golgac lo grëse miech, niicle lo zha ne nacgrë tow, niicle lo grëragaa miecha.

¹⁶Tibaque nley golco zdoo to.

¹⁷Tibaque golzodiidznie Dios.

¹⁸Goldeed xquizh lo Dios, niicle zeene noyan to guiełnëw, zeena nogaa to guiełbleya, sac sca racladz me gun grëse zha ne no xnëz Jesús.

¹⁹Golquiaadiag mine rnee Espiritu Sant lo to, ni golguna.

²⁰Golquiaadiag mine rnee grë zha ne rnee grë diidz ne rsiaab Dios guic zho; ²¹wen wen golwi dien pe nac mine rnee zho, dzigo mine rzac to rquinraa lo to, min co golseed.

²² Gołbiche lo grëse guiełntseeb ne no.

²³ Dios, meñ ne rtiche grëse dzeb, grëse zhgab, mezhal csanmbe to lo grë-taa guiełntseeb; dib nacse to (zhiespíritu tow, xalm tow, xcuerp tow) zeeña ni tib doł rapde to gał dze ne laa Jesús meñ ndzon ne rnabey ne gbiire guiaad stib.

²⁴ Me bredz to, ni mesi ruñ me miñe rnee me, gane ndioñ no ne ib zuñ me miñ rii.

²⁵ Grëse to bets, grëse to bzian, laa naa rnab lo to gołsiguiel gołnab lo Dios gac-nieñ me no.

²⁶ Gołcaania zhibdiuzh no i, iñe gołxen nia grë zha ne nacgrë to, gołlu ne nli rleynie to zho.

²⁷ Meñ ndzon ne rnabey, me rnabey naa laa naa rso diidz lo to, glał to guits rii lo grëse zha ne nacgrë to i.

²⁸ Jesús, meñ ndzon ne rnabey ne, me glu lo to ganle pa lotaa noxco me to.

Pabl

BROP GUITS NE PXEEL PABL LO ZHA

TESALÓNICA

1 ¡Diuzh to grëse to!

¹ Naa nac Pabl, gza no Silas ni Timoté; laa no rxeel stib guits rii guiedz Tesalónica i, laaw ziaad lo to grëse to ne nac to zha ne nole xnëz Dios, men ne nac Pxoze ne, ni Jesús men ndzon ne rnabey.

² Dios men ne nac Pxoze ne, ni Jesús men ne rnabey, me glu ganle pa lotaa noxco me to, zeena peet zhgab ctsebde to.

³ Bets, bzian, ible rieguiala gdeed no xquizh lo Dios ne squitaa noneedz me guielbiini lo to; sac gon zigse zie dze dib zdooraa to riladz to Xtiidz me, ni rleynieraa to samiech to. ⁴ Zaatne rdzintaa no lo grë zha ne nole xnëz me, ne nligaa rley no rzodiidz no lo zho zha squitaa dziits zo to, tibaque dib zdoos to riladz to me niicle maase rtsidil miech to, niicle maase nroob guielnë ne quiadet to. ⁵⁻⁶ Nli nroob guielnë noyan to, per scagaa laaw noyan to zeena tsieguial to gdzin to zaatne rnabey me. Nu rlu ganle, Diossi zeene run me guielwxtis, zigne no gaca sca run mew. Zig nac niina, grë zha ne squi nosacsi to i, ib zгаа zho guielnëdox ne csiaab me.

⁷ To ne nac to zha ne quiadet grë guielnë qui, golgona ganle, gal dze ne quiet Jesús gbaa guiaad me stib, ible zгаа ne descans ne gneedz me. Gal dze co, laa me quietnie grë xanj me, zha ne rapraa poder; ⁸ masaque tib beldox ne quietnie me, sac dzigosi laa me guiaad csiaabzi me grëse zha ne nëd niunbey Dios, grëse zha ne nëd nquiaadiag Xtiidz Ndzon me. ⁹ Grëse zho laa me gnabey guey zho lo guielnëdox, zaatne gdzindraa dze griece zho. Lëë bichele zho lo me ga, ib gdzind dze gan zho lo xquielndzon

me, gangaa zho grëtaa poder ne rap me. ¹⁰ Dze co, grëse zha ne no xnëz me laa zho goolnie me, gunnon zho me. Grëse zho see zdoos zho gan zho me; ye to gacgrë zho, sacne bliladz to Xtiidz me mine biadseed no to.

¹¹ Gacxe waa, tibaque laa no quianab lo Dios gacnie me to grielo gban to zigne racladz me; zeena glu ganle led zhlëd zbooblo me to. Ni rnab no lo me gneedz me xpoder me lo to, zeena grielo gun to grëse ncuane rquiabladz to, zeena grieequia grëse dziin ne quiyun to porne riladz to me. ¹² Zeena sca cxobnen to ganle pa lotaa men nroob nac Jesús, men ndzon ne rnabey ne; ni niicle megaaw, zunnon me to. Sac zigtaa mew, zigtagaa Diosa, noxco me to.

Ziaad Jesús stib

2 Bets, bzian, ib laa Jesús men ndzon ne rnabey ne no guiaad, ni laa ne gbannie me. ² Zeene gon to laa miech gnë laa dze co bdzinle, niicle gnë zho Espíritu Sant bneew lo zho, gangaa to palo nonee zhow zaatne ndxie nzian miech, o cxeelgaa zho pe tib guits lo to zig nac zeene no pxeela; gliladzde tow. Laa no rso diidz lo to, peet tsienied guic to, gdziebde to. ³ Ib gdeete to diidz yquidie zho to. Sac gon ansraa ne gdzin dze co, ib none grieequia grë miech ne gacntseeb lo Dios; lozh ga, laa tib mgui ne nacie mendox grieequiaque, zacntseeb me lo Dios, per gabil ga nitlo me.

⁴ Lëë zha co ctsidil grëse zhiwseed Dios, grëse ncuane naclay lo miech; ni haxta zie zho ziesob zho zaatne nac len xyadoo Dios, guiab zho zha nac Dios. ⁵⁻⁶ Per no tib men ne notse lo zho niina, laga gdzin dze ne laa zho guiaad. Golso-ladz ganle, blactaa bzeet naa min rii lo to len dze ne blëz naa i. ⁷ Grëse ncuane no guic zha ntseeb co gun zho, laaw rsilole; loxaque runfalt gdeed men ne notse lo

zho ga diidz guiaad zho. ⁸Zeene laa zho guiaad, hor co laa Jesús guiaadaque con grë xquielndzon me, dzigo me ne grieese ro me gloozh me zho, gnitlo me zho.

⁹Masaque mendox gnabey zha ntseeb co, niapse xpoder ma gap zho, nzian ncuaañe glu zho; zun zho grë ncuaañe gzee zdoo miech, per led ncuaañe nlida. ¹⁰Zun zho grë ncuaañe lozh yquidie zho grë zha ne nole nëz ne nitlo, zha ne ib bzhiguield nlliladz miñe nac diidzli. Tel niaca miñe nlliladz zhow, nleynie zhow, nsilaa Dios zho. ¹¹Saan Dios tsienal zho grë ncuaañ co, ni zlliladz zhow zig nac zeene diidzliw; ¹²per ib siaabzi Dios zho, sac laa ne gliladz zho miñe nac diidzli, lel mazdraa gleynie zho grë guielntseeb.

Zha ne bdedlaale lo dol

¹³Bets, bzian, golguien sca tibaque golgotsaa gdeed ne xquizh lo Dios; sac gon tel to padzeelale bzooblo me to csilaa me to lo dol. Nacle diidz zeene laa to gliladz Xtiidz me, miñe nac diidzli, laa Espíritu Sant csanmbe to lo me. ¹⁴Min co nagon nacre pxeel me no biadseed no to xtiidz me, guien to zha laa to lo dol; zeena gdziñ to zaatne nac lo xquielndzon Jesús, men ndzon ne rnabey ne. Gacxe waa, zha nziuu nac to lo me.

¹⁵Golguien sca, dziits golso, ib csaande to grë miñe pseed no to len dze ne biaad no i, niicle miñe rneegaa no lo to lo guits ne rxeel no. ¹⁶⁻¹⁷Ni Jesúsaque, men ndzon ne rnabey ne, ni Dios men ne nac Pxoze ne, me gneedz xfuers to dziits so to; zeena grëse miñe gnee tow, miñe gun tow, wen grieequiaw. Me blu ganle pa lotaa rleynie me ne, laa me bneedz tib guielbley ne gdziñd dze lozh lo ne, ni psan me diidz pe nac miñe naraa no ygaa ne. Ga rlu ganle pa lotaa noxco me ne, niicle ne rioguald new.

3 Bets, bzian, nu ne laa no csiaalle, laa naa rnab lo to golnab lo Dios gacnien

me no, zeena znuse znuse diiz no Xtiidz Ndzon men ne rnabey ne; ni zha ne gontaaw, guien zho ycaania zhow zigne pcaania tow. ²Ni golnab lo me csilaa me no ladznia grë zha ntseeb, zha ne run miñe notaa guic; sac gon led grëd miech rlliladz Xtiidz Dios.

³Dios men ndzon ne rnabey, miñe rnee me run mew; gacxe waa, ible zacnien me to dziits so to lo Xtiidz me, ni squianap me to tsobede to ladznia mendox. ⁴Ndion no ne me noyacnien to noyun to grë miñe pso no diidz lo to, ni scagaa me gacnien to bii gun tow. ⁵Me gacnien to grieelo gleynie to samiech to zigne rleynie Dios ne, ni guiuude to lo guielnë, sinque golgac zigne been Jesús.

None gun zho dziin

⁶Bets zig zobwi Jesús, laa no rso diidz lo to: Tel cho zha ne nacgrë to i, nëdraa yquia dziin gdziniaa zho ncuaañe gow zho, ib ctsieelsade to zho; sac gon pseete no to min co. ⁷Tel no, gon to ganle zha wban no zeene bliaaz no lo to i; ni sca gon none gban to. Ib bdeddzed no, ⁸biod dze ne lega ndioow zhlë no xcuun miech, blactaa haxta guieel bdziun no dziin bdziniaa no pe pquiin no; ib psodziind no lo to. ⁹Niicle ne ib rieguial nab no lo to needz to ncuaañe nquiin no, per choot peet bnabd. Miñe bdziun no pquiaa no dziin bdziniaa no pe pquiin no, par gan to ganle zha nonguiel gban to. ¹⁰Led rsoladz to len dze ne bliaaz no i, pso no diidz rii lo to: Zha ne nëd gun dziin, scagaa nodne gow zho. ¹¹Laa nina laaw rzetaque naa stib, sac zidzion no no bla zha ne nacgrë to i, mbe rundraa zho dziin scase quiated dze zho; loxaque nëzrii nëzrec no zho rzëeb zho lo grë ncuaañe rieguiald zho. ¹²Zig zobwi Jesús men ne rnabey ne, laa no rso diidz lo zha ne sca run: none gun zho dziin gdziniaa zho ncuaañe yquiin zho.

¹³Bets, bzian, ib guieete to, tibaque gołtsoxco gołgun niapse grë ncuaane yquiin lo samiech to.

¹⁴Teł cho zha ne nacgrë to i nëd gon diidz gban zho zigne rso no di-idz nu, gołwi dien chow, dzigo ctsieel-sadraa to zho; zeena sca ctoladz zho.

¹⁵Per guñde to zho zig ruñ zha ne rlëenie samiech, sinque gołnee lo zho gac-wen zho; gołguien ganle bets to grë to.

¹⁶Jesús nac meñ ne rtiche grëse zh-gab, grëse guiełxtseeb, me cuee to lo

grëse zhizhgab to, lo grëse guiełxtseeb gzataa dze. Me gacnieñ to grëse to.

¹⁷Naa gon nac Pabl, naazhal pquia bdiuzh rii rxel naa lo to; naazhal pquia lë naa nu. Gołgan ganle lëe xletr naa nu.

¹⁸Jesús meñ ndzon ne rnabey ne, me gacnieñ to, me glu lo to ganle pa lotaa noxco me to.

Pabl

GUITS NE GLO PXEEL PABL LO

TIMOTÉ

1 ¡Diuzh Timoté!

¹ Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios men ne psilaa ne lo dol, ni Jesús men ne rnalo ne, me bnabey quiayun naa dziin rii.

² Laa naa rxel guits rii lo luu, rzaac naa luu zig tib xpëéd naa ne squi dib zdoos luu riladz luu Jesús. Dios men ne nac Pxoos ne, ni Jesús men ndzon ne rnabey ne, me yquia zdoos luu, me tsoxco grë zhizhgab luu zeena peet tsienied guic luu. Min co racladz naa, ni min co rnab naa lo Dios.

³ Zigne psoque naa diidz lo luu len dze ne laa naa za nëz xtan zha Macedon ga, laa luu biaan Efés i; scagaa niina laaw rneque naa lo luu stib; Sca no luu i, bnee lo bla zha ne squi no i, csetraade zho miech grë zhiwseed zho, sac ncuane paat rquiinda. ⁴ Bnee lo zho, csaan zho grë cuent gox qui, zhale noyunroobraa goon dien zharaa, peraa been grë xmen-gol ne. Ncuane paat rquiind ga, lox-aque runctiidiidza miech; mazd lo lal ne nodiidiidz zho, tsoxco zho cseed zho miech ganle pe nactaa grë guielnzaac ne rgaa grë zha ne rquiabladz dib zdoos riladz Jesús.

⁵ Laa naa rso diidz rii lo luu, sac racladz naa guiaanmbe zdoos grëse miech qui, guiaanmbe xquielrien zho ni dib zdoos zho gliladz zho Dios; zeena scagaa grielo gleynie zho samiech zho. ⁶ Sac gon, no bla zha ne quiasaanle Xtiidz Ndzon Jesús mine nac diidzli, lel lo grë cuent ncuane paat rquiind co no zho. ⁷ Racladz zho zha cseed miech zha nac xley Dios, ni niicle zha riend zha naca; zeene rseed zho miech ni zha riendaque dien pe rnee zho.

⁸ Ndionle ne ganle nli wen ley ne psan Dios, per tel niaca mine yquini miecha zigne psan me yquiina. ⁹⁻¹⁰ Golguien ganle, biaan ley par gnabeya grë miech ne nole xnëz Dios, sinque laaw biaan par gnabeya grë:

zha ne racndaan lo Dios,

zha ne rond xtiidz Dios,

zha ntseeb,

zha ngoopdol,

zha ne rzacdraa ne men nroob nac Dios,

zha ne rugitnie lë Dios,

zha ne rut pxoos,

zha ne rut xniaa,

zha ne rut samiech,

zha ne rionie zha ne led tsieeld,

zha ne nac mrazh,

zha ne rban samiech rieta zho zho stib

nëz,

zha ne rquidie,

zha ne rzeet lë Dios par gliladz miech xti-

idz zho, ni nannaa zho led diidzlid

rnee zho.

Par grë zha rii nagon biaan ley; grë zha ne mband zigne nac Xtiidz Ndzon Dios;

¹¹ wseed ne rlu ganle zha laa miech lo dol. Ni lëe wseed co gon pso Dios naa none naa lo miech.

Pquia zdoos Dios Pabl

¹² Rded naa xquizh lo Jesús men ndzon ne rnabey ne, porne bzooblo me naa gun naa xtsiin me, ni noyacniën me naa ne laaw quiayun naa. ¹³ Ne nligaa rded naa xquizh lo me, sac glo ntseeb goc naa, bneenë naa me, ptsidil naa grë zha ne no xnëz me, ntseeb goc naa lo zho. Ni niicle ne scataa nac grë ncuane ben naa, per pquia zdoos me naa; sac len dze co gard gliladz naa cho nac Jesús, lega lo xquieln xen naa ga sca ben naa.

¹⁴ ¡Pa lotaa pquia zdoos Dios naa! Ga blu me ganle zha noxcotaa me naa, pxobnia me guic naa biladz naa cho nac Jesús, ni zig nac niina dib zdoos naa rleynie naa me. ¹⁵ Mine rne naa nu ni-

ina, diidzliw, ni racladz naa grëse miech gliladz zho ganle, ible laa Jesús baaad lo guidzliu, baaadsilaa me grëse miech lo xtoł zho; ni naapaa gon goc tib zha ne mazdraa ngoopdoł. ¹⁶Gacxe waa pquia zdoo Dios naa, niicle ne scataa miech ngoopdoł naa per psilaa Jesús naa. Ga blu ganle pa lotaa paciens ne rap me; ni ga gwi grëraa miech ganle, zha ne gliladz me, zгаа zho tib guielmban ne gdziñd dze lozh. ¹⁷ ;Tibaque sca golgotsaa dziuunnon ne me, golgotsaa gnee ne grë diidz ndzon lo me, zigtaa niinaw zigtagaa len grëraa izdoo ne ziaada! Sac gon, me nac men nroob ne rnabey, men ne gdziñd dze ne nitlo. Sca rieguiala.

¹⁸Timoté, xin, laa naa rso diidz lo luu gon: Tibaque dziits bzo, ib guiaand zdoo luu; psoladz ganle scaque nac didz ne bnee grë zha bets ne zeene psiaab Dios guic zho bzeet zho pe nac grë mine pso Dios luu gun luu. ¹⁹Bien tibaque dib zdoo luu bliladz Jesús, ib gund luu ncuane nan luu ndzinlid, zeena ine mbe xquielrien luu; sac gon no zha ne niicle riennaa zho pa min nac ncuane ndzinlid, ni laa zho runa. ;Mincoxe waa, grë zha ne sca nac, rsaanga zho mine bliladz zho! ²⁰Zig nac Himené grop Lejandr, sca been zho; per laa zho bzonëzle naa sca tsie zho xnëz mendox telne sca racladz zho; zeena guien zho ganle nodne gneenë zho Dios.

Gac-wnab lo Dios por grë miech

2Laa naa rso diidz lo to: Golguien none gnab to lo Dios por grëse miech ne ndxie lo guidzliu, golnab lo me gunlay me zho, gacnien me zho; ni goldeed xquizh lo me por grëtaa ncuane run me. ²None gnab to lo me gacnien me grëse zha ne nac wxtis, grëse zha ne rnabey, gdeed me guielbiini lo zho zaacse gun zho guielwxtis, zaacse gnabey zho; zeena tibliladz cue miech,

ine gban ne zigne racladz me, sin choot peet glisquid lo ne.

³Sca nagon nonguiel dziuun ne, ni sca-gaa rdziladz Dios, men ne pxeel Jesús baaadsilaa grëse miech lo doł; ⁴men ne racladz grëse miech sëeb xnëz Jesús, gacnan zho mine nac diidzli. ⁵Guien zho ganle ne tibaque Dios no, ni tibaque men ne zac gdziñnie grëse miech lo me: lëë men co nac Jesús, men ne goc miech baaad lo guidzliu; ⁶sac gon Jesús nac men ne bdeed xquielmban, beet zho me, bdiizh me xtoł miech. Min rii nagon racladz Dios gacnan miech len dze rii. ⁷Ni laa me pxeel naa none naaw lo grëse zha ne nacd zha Israel, noseed naa zho grëse mine nac diidzli, zeena guien zho dib zdoo zho gliladz zho Dios. (Mine rne naa nu diidzliw, rquidieed naa.)

⁸Laa naa racladz sca, zaatne notaa zha ne dib zdoo rliladz Dios, grëse zha bgui none gzodiidznie zho Dios. Ni zeene gzodiidznie zho me, none ine mbe zdoo zho, choot lo zha rlëed zho, choot zha nodilnied zho. ⁹Laa grë men wnaa, racladz naa tsoxco zho zaacse gacwxab zho, niowse, tibliladzse gac zho. Sac grë men wnaa ne rliladz Dios, par gluniow zho rquiind ne goon dien paraa xixcuua guitsguic zho, dien pe quie rbebni, pe or gac xnil zho, gac zhibguiaa zho, pe lar nizh ne gacwgaa zho. ¹⁰Par gluniow zho, rquiin zaacse gbannie zho samiech zho, zig none gban zha ne nole xnëz Dios. ¹¹Zig nac len yadoo, none tibliladzse gac zho, dzese sob zho yquiaadiag zho tel pe nac wseed ne noyac; ¹²gnedzd naa diidz ne zha so cseed miech, o zhagaa gnabey lo mgui. None dzese sob zho, ¹³sac gon zeene psan Dios miech lo guidzliu, glose bzaa me Adán, dzigora bzaa me Ev. ¹⁴Ni stiba, pquidied mendox Adán, sinque laa ma güeyquidie Ev; ni porne bliladz Ev xtiidz ma, ga bdiits Ev xtiidz Dios. ¹⁵Per silaa Dios wnaa lo xtoł zho, telne dib zdoo zho gliladz zho

me, tsoxco zho gban zho zigne racladz me, guien zho gun zho mine rieguial wnaa, gap zho xpëed zho ni cchoob zho win.

Zha ne so lo grë zha ne ngab xnëz Dios

3 Zha ne racladz so gnabey zho lo grë zha ne no xnëz Dios, tib dziin wen ga rquiabladz zho gun zho. Sca zëeb diidz rnee miech; ni nligaaw. ²⁻⁴ Per ga nagon rquiin:

tib zha ne zaacse mban,
zha ne mbannie loxaque wnaa ne nacse tsiel zho,
zha ne tibliladz,
zha ne nixbiini, rien pe run,
zha ne mbe lo, choot lega gzhidznied zho,
zha ne ine nley rac, rbëzlo zho miech lidz zho;
zha ne rien zha rseed miech,
zha ne rquiad lo nziu,
zha ne rleynied dil,
zha ne wen zdoos,
zha ne zaacse mbannie samiech,
zha ne rzonald dimi,
zha ne zaacse mban lidz,
zha ne rrieelo rnabey lidz, rnabey xpëed,
zha ne nguzobdiidz nac xpëed, rbeed mëed xquielto zho.

⁵ Sac tel zha ne rrieelod gnabey lidz, gnabey xpëed; ¿pe lel ne so zho gnabey zho lo grë zha ne no xnëz Dios dzigo grieelo zho?

⁶ Niicle tib zha ne griinpaasילו bliladz Xtiidz Dios grieelod gac zho dziin co; sac nend lëëque lëë zho gunnon zho, lozh ga lëëque zha yguib guiabdee zho. Golsoladz ganle zha bzhaac mendox. ⁷ Ni ye rquiin tib zha ne zëeb xtiidz ne miech ndzinli nac zho, haxta lo zha ne nod xnëz Dios; zeena tsod lega pe glisqui miech lo zho, sca gleyd mendox gac mine racladz ma.

Zha ne gun yudar len yadoo

⁸⁻¹² Scaquegaa zha ne so gun xyudar zha ne gnabey ga, ga rquiin:
tib zha ne zaacse mban,
zha ne rnee niapse diidzli,
zha ne rleynied guielgonzui,
zha ne zienald dimi,
zha ne dib zdoos rliiladz grëse mine zhobnee lo Xtiidz Dios (mine rliiladz ne, mine nac diidzli),
zha ne mbe lo,
zha ne mbannie wnaa ne nacse tsiel zho,
zha ne rrieelo rnabey lidz,
zha ne rrieelo rnabey xpëed.

Ni stiba, antes ne so zho none glugazh zho dien pe nli zrieelo gun zho dziin co. Zig nac tsiel zhow, none gac me:

tib wnaa ne zaacse mban,
wnaa ne rleynied diidzguizh,
wnaa ne rleynied nziu,
wnaa ne rquidied.

¹³ Sac zha ne zaacse gun dziin co, ziannziuuraa zho lo grë zha ne ngab lo Dios, ni scagaa ine mbe lo zho haxta no ro zho gnee zho lo miech zha nac ne laa zho rliiladz Jesús.

Mine rliiladz zha ne ngab lo Dios

¹⁴ Ib laa guic naa no guialniob naa i, guialgan naa luu; per laa naa rxel didz rii lo luu, ¹⁵ zeena telne grieelod guialniob naa, per laa luu nanle naganle cho gzo luu yquiaanap grëraa zha ne ngab xnëz Dios nguiamban; zha ne runbey mine nac diidzli, ni rlu zho ganle ne nli diidzliw. ¹⁶ Ne nligaa nroobdoos nac wseed ne ziaad lo Xtiidz Dios, mine rliiladz ne, ngan guien miech zha naca. Nu raquiet mine been me:

Goc Jesús miech biaad me lo guidzliu, ni blu Espiritu Sant ganle ne nli Xpëed-paa Dios nac me;

ni gon grë anjl me.

Brieets bliaal Xtiidz me grë guiedz,

ndaldoo miech ne bliladz ganle cho nac me,
blozh ga biire zey me lo guielndzon ne no me gbaa.

Zha ne rsaan Xtiidz Dios

4 Ib laa Espíritu Sant rneele ne len dze ne ziaadyob guiaad Jesús stib, ndal grè zha ne rililadzle Xtiidz me, laa zho csaana laa zho tsienal grè mine rnee zha ne rquidie, grè mine nac zhiwseed mendox. ²Grè zha ne guiaadnie wseed co, ni lalnu yquiad zdo zho zeene laa zho yquidie miech. ³Haxta stsidil zho ctsieelnia miech, znabey zho ycuee ncuaane gow miech; zig nac zeene led Diosd psan ctsieelnia miech, zig nac zeene led med psan grè ncuaane gow zho. Me psana grèsew, zeena grèse zha ne ngab xnèz me (zha ne beenbey didzli), zeene laa zho yquina gdeed zho xquizh lo me. ⁴Sac grèse ncuaane psan Dios, wena; zig nac grè ncuaane rac wagw, peet nacda yquiin new, totsaque gdeed ne xquizh lo me zeene laa ne yquina, ⁵ni gnab ne gunlay mew; sac zeene rdeed ne xquizh lo me ni rnab ne gunlay mew, rsanmbe mew.

None gun Timoté xtsiin Jesús

⁶Zeene cseed luu grè zha bets ne, zha bzian ne i, pseed zho grè mine rne naa lo luu nu, tibaque mine nac zhiwseed Dios güeynal; sac sca no gun zha ne squi zo quianap grè zha ne ngab lo Dios. ⁷Ib yquiaadiagd luu grè cuent gox, grè cuent nxen ne paat rquiind; sinque Xtiidz Dios bioxco, min co bloonie guic luu. ⁸Gzoob ne zha ne rguit, wguit ne run zho, nli rquiina lo zho par gac macis xcuerp zho; per zig nac Xtiidz Dios, mazdraa rquiin dzioxco new; sac mincosi squiina lo ne zigtaa lo guielmban riiw, zigtagaa lo guielmban ne naraa dzian new. ⁹iNe nligaa sca riegual gun miech, ni grèse zho none tsoxco zhow! ¹⁰Ni gacxe waa,

laa ne quia dien zha gliladz zhow, niicle ne nroob grè guielnè ne quiadziañ ne; sac ible Dios nac men ne rnalo ne, men nguiamban ne rsilaa grèse miech lo dol; sac grèse zha ne dib zdo rililadz me, rsilaa me zho. ¹¹Bioxco sca pseed zho grè mine rne naa lo luu nu, ni bnee lo zho gun zhow.

¹²Nli lèè tib zha nguiegse nac luu, per blu lo zho ganle zha none gban zho: Zeene gnee luu, niowse bguib didz ne gnee luu, zaacse goc, ine bleyne samiech luu, tibaque dib zdo luu bliladz Xtiidz Dios, ine ndzinli wban; zeena gan zho ganle niicle ne zha nguieg luu, per nixbiini luu.

¹³Laga gal dze ne glanso naa i, bioxco blab Xtiidz Dios lo grèse zha bets ne, zha bzian ne i, bnee lo zho zha naca, bnee diidz ne conley zdo zho; zeena ine nguieel gac zho. ¹⁴Ib csaand luu grè guielbiini ne bneedz Dios lo luu i (guielbiini ne bgaa luu zeene psiaab me guic grè zha ne rnabey lo grè zha ne no xnèz me, pxobnia zho guic luu). ¹⁵Grèse mine rne naa lo luu nu, bioxcow; zeena gan grèraa miech ganle zigse zie dze laa luu quiyabiiniraa lo Xtiidz Dios. ¹⁶Bien zaacse goc, bien mine nac Xtiidz Dios, min co pseed miech, ib csaand luuw; zeena tedlaa luu lo grètaa guielnè ne no guiaad, ni scagaa haxta grè zha ne rquiaadiag wseed ne rlu luu ni rban zhow, ye zho zlaa zho lo guielnè co.

Men wnaa ne gutle tsieel

5 Grè zha bgui gol ne nac bets ne i, zeene zha rxin zho, bien gactoxd luu lo zho, sinque zaacse bnee lo zho zig nac zeene lo pxoz luu nonee luu; niiclegaa zha nguiega, zaacse goc lo zho, been zho cuent zig tib bets luu. ²Scaque grè men wnaa ne nac zhagol, ndooladz bnee lo me, been cuent lo xniaa luu ga zo luu; lo grè wnaa nguiega, ndzinli goc,

niowse bnee lo zho, bien ganle rrieequia tib bzian luu ga.

³⁻⁶ Grë men wnaa ne gutle tseeel, men ne nlipaa choot rapd, to none cteedlo me; totsaque nli Diosse rnalo me, dze guieel tibaque nozodiidznie me Dios. Sac no zho mban zigne notaa guic zho, laa zho zienal loxaque grë ncuane gdeed guxt xcuerp zho; zha ne sca run, rrieequia gutle zho ga. Laa tel men wnaa ne scaque gutle tseeel, ni no xpëed me, no xiag me, dzigo zha none cteedlo me; none cseed zho gan zho menlidz zho, gan zho pxoz zho, gan zho xnial zho, sac gon me pchoob zho. Sca nonguiela, ni scagaa rdziladz Dios.

⁷ Pso diidz rii lo grë zha ne nacgrë to i, zeena cseed zho sca gban zho, ni scagaa tsod pe nacne gneenë miech zho. ⁸ Sac zha ne tsoxcod gan zha ne nacgrë zho, ni mine mazdraa telne niicle menlidz zho tsoxcod zho gan zho, rdzieeld dzigo guiab zho laa zho rliladz Dios, haxta mazdraa nac xtol zho que tib zha ne gard liladz me.

⁹⁻¹⁰ Ni stiba, grë men wnaa viud qui zha ne rquiabladz gun pe xtsiin Dios, bien zha ne psale tsongal iz zha co psëeb lo list. Ni wen wen gocnan telne:

bionied me stib mgui zeene bii zomban tseeel me,
 zaacse mban me,
 zaacse pchoob me xpëed me,
 dib zdoo me rbëzlo me miech lidz me,
 ndooladz rac me lo grë zha ne no xnëz Jesús,
 run me xyudar grë zha ne no lo tib guielnë;
 ni run me niapse ncuane wen ne rquiin lo samiech me.

¹¹⁻¹² Laa grë zha ne bii nguieg, ib yquiaad luu lë zho lo list co; sac nac wnaa nguieg, zeene sob guic zho ctsieelnia zho, laa zho ctsieelnia stib. Loxaque gunctal zho xtol zho ga, telne glo rquiabladz zho gun zho xtsiin Dios ni

lozh ga laa zho csaanaquew. ¹³ Ni ye nac wnaa nguieg, rdziladz zho rquianzë zho; ni telne peet dziin gund zho, racgbech zho; ni stiba, zeene sca guieud pe gun zho dzigo laa zho rzhixcuaa diidzguizh, laa zho rzëeb lo grë cuent ne rieguialdraa zho. ¹⁴ Gacxe waa, racladz naa grëse wnaa nguieg ne sca ret tseeel, mazd ctsieelnia zho stib; zeena yquiaanap zho xpëed zho, yquiaanap zho ro lidz zho. Sca yguibd zho tso grë zha ne rlëeniele Xtiidz Jesús, gneenëraa zho zha ne rliladza. ¹⁵ Sac gon, blale wnaa ne sca gut tseeel zieriee xnëz Dios, lel laa zho zienal grë mine rnabey mendox.

¹⁶ Psoadz ganle, tel cho tib zha bets ne, tib zha bzian ne i raclidz tib men wnaa ne gutle tseeel, none zha gan me, laa ne gnalo zho ne to yguib dien zha gdioon me; zeena grë ncuane runlo to i, zgaaw yquiin grë men ne nlipaa guieud cho gan.

Mine rieguial zha ne zo lo zho

¹⁷ Grë zha ne zo rnabey lo grë zha ne ngab xnëz Dios, zha ne zaacse noyun dziin co, zig nac zha ne tibaque rnee Xtiidz Dios lo miech, zha ne rseedgaa miech zha naca, tel palal ncuane rcaa zho, ible rieguial ycaa zho chop lalgaw. ¹⁸ Got-saa gwi ne ganle zha quia lo Xtiidz Dios, rneew: “Code to guie ro xma to, zeene no ma ye noguuits ma zhobxtil; jgolsaan gow ma!” Laa stib lugar rnee: “Zha ne run dziin, ib none ycaa zho mine non xtsiin zho.”

¹⁹ Bien gon Timoté, zeene guiaad zho lo luu, guiaad-zo zho tib men ne rnabey lo to, ib yquiaadiagd luu mine rnee zho, telne gzod zho chop tson zha ne gon ne nli been me mine rquiaqui zho me. ²⁰ Telne bind me diidz, bii noyun me dol co, dzigo squi ndxie grë zha ne nacgrë to, goctox lo me; zeena sca gdzieb grëraa zho gunscad zho. ²¹ Zig zobwi Dios, zig zobwi Jesús grë xanj me, laa naa rso di-

idz lo luu, been mine rne naa lo luu nu. Gdzieebd luu, yquiad zdo luu, bnee lo zho tel chotaa nac zho.

²² Zeene gzo luu zha ne gun xtsiin Dios, gund luu ne lega tel chotaa gzo luu; sac gon, nend leetse zha ne rap pe tib falt gzooblo luu, dzigo laa miech guiab nanopaa luu zha nac zho ni rliquid luuw lo zho. Ible gdeete luu diidz gun luu ncuane guncal xtol luu. ²³ (Gnid naa togo ible grielodraa guie luu vin, zac guie luu niipyeena maase poc poc, laa ne guie luu niab nis; zeena glunedraa zdo luu.) ²⁴ Sac gre zha ne no lo dol, no dol co znuse rzoobnen; nogaaw, haxta gal dze ne laa zho gacredz lo Dios, dzigorraa xoobnena. ²⁵ Scaquegaa zha ne run guielwen, no ncuane co znuse glu; nogaaw, niicle ne rluda niina per ible zdzin dze ne laaw glu.

Zha ne quiazhoo xtsiin ben

6 Gre zha bets ne, zha bzian ne, zha ne lega run xtsiin ben, none gon zho xtidz men ne quia zho xtsiin; zeena yguibd zho gneene miech Dios, gneene zho Xtidz me mine noseed ne miech.

² Scaquegaa gre zha ne run xtsiin men ne riladzle Xtidz Dios, none gon zho mine rnabey me zho; led guiabd zho por bets zhow, gun zho mine racladzaa zho. Ni gale none tsienie guic zho wenraa greequia gre dziin ne noyun zho; sac gon lo tib men ne no xnz Dios ga, lo tib men ne rleyne zho ga yquii xtsiin zho.

Grese mine none naa lo luu nu, pseed gre miech quiw, ni pso diidz lo zho gun zhow. ³ Zreequia zha ne guiaadnie stib wseed, mine ni nacdraa Xtidz Jesus; sac zhiwseed Jesus rlu zha gban gre zha ne no xnz Dios. ⁴⁻⁵ Zha ne sca rlu stib wseed, lega:

tib miech niats ga nac zho,
ible peet riend zho,
runbeyd zho mine nac diidzli,

rdziladz zho rdildiidznie zho miech; ga rlan,

laa miech rdillsa,

laa miech rleelsa,

laa miech rbidzgosla; rlozh ga,

riladzdraa zho pe rnee samiech zho.

Masaque nan zho telne seeb zho xnz Dios, nroob dimi ne gunlo zho.

¡Bien ib ctsieelsad luu zha co! ⁶ Parga nli zha ne rzeeb xnz Dios, zeene rzac zdo zho mine rzoladzaa Dios lo zho, tib guielnzaac nroob ga rga zho. ⁷ Ni sca nonguiela, sac gon zeene rlanso ne lo guidzliu, peet rlanosied ne; ni scaquegaa zeene laa ne gbi, peet grielod guie ne. ⁸ Gacxe waa, none sac zdo ne ni gley ne totsaque gneedz Dios ncuane gow ne, ni ncuane gacwxab ne. ⁹ Sac gre zha ne rzoobladz xen nroob dimi, no zho rquii mendox zho run zho ncuane ndzinlidraa par gdziniaa zho dimi co; rlozh ga rzhin lo xquielmban zho, haxta rnitlo zho. ¹⁰ Sac nac dimi, zeene rzoobladzdox miecha, ga rzobni ne laa zho run gre guielntseeb. Ndal zha ne ziesaan Xtidz Dios, sac laa zho zienal dien zha xen zho nroob dimi; per rlozh ga, stib stib guielne ne ziedzin lo zho.

Dib zdo Timote giladz Timote Dios

¹¹ Sangu luu gon, bien ganle xnz Dios no luu, gund luu gre ncuane co. Bioxco zaacse wban, tibaque bioxco gban luu zigne racladz Dios, dib zdo luu bliladz me, bleynie me ni bleynie samiech luu, ndooladz goc lo zho, ni lalnu ib guiaand zdo luu.

¹² Bleeladz luu been gre dziin ne run zha ne dib zdo riladz Dios, zigne run zha ne rie lo dil, rbeeladz zho zho. Gon ganle, laa luu nole nez ne yгаа luu guielmban ne gdzind dze lozh, ib csaand luu nez co; sac niicle Dios ible min co bzooblo me luu. Psoladz ganle, squi ndxie miech bleero luu ne dib zdo luu riladz luu Xtidz Jesus. ¹³ Dios (men ne

rdeed xquielmban grëtaa ncuaane no), ni Jesús (men ne ni lalnu bdziebd zeene güeyzo zho me lo Pons Pilat, bnee me cho nac me); me zobwi ganle ¹⁴ laa naa rso grë diidz rii lo luu, bioxco beena zigne no gaca. Tibaque bioxcow haxta gal dze ne gbiire guiaad Jesús, men ndzon ne rnabey ne. ¹⁵ Ib laa me no guiaad! Ni Dios cxeel me zeene laa dze co gdzin. Dios men nroob ne rnabey, men ne rnabey lo grëtaa zha ne nac rey, lo grëtaa zha ne rnabey. ¹⁶ Mesi ib gdzind dze guet me, lo biini ne no mew, tsod zha ne glëb gdzin ga; ni tib miech lo guidzliu rii gard gan me, ni grielodgaa gan zho me. jGacxe waa, ible me none dziuunnon ne, sac gon men non, men rnabey nac me! Min co nagon no dziuun ne.

¹⁷ Grë zha ne rapchen, bnee lo zho cseed zho gdaannied zho grë ncuaane rap zho, ib gnalod zho grë ncuuan co; sac gon ncuaane tib rded ga. Dios none gnalo zho, ni mesi rneedz me grëtaa

ncuaane wen ne rquiiin ne. ¹⁸ Gudz lo zho gacmbidzd zho, none gon zho grë ncuaane yquiiin lo samiech zho, ycad zho ncuaane quianie zho, ine gon zho xyudar zha ne peet quianied. ¹⁹ Zha ne sca gon, tib guielnzaac nroob ne yгаа zho; lëë guielnzaac co gan zho len dze ne ziaadraa. jNi haxta zгаа zho tib guielmban ne gdzind dze lozh!

²⁰ Timoté, laa naa rbire rso diidz lo luu nu gon: ib csaand luu dziin ne bneedz Dios lo luu i. Yquiaadiagd luu grë wseed yozh ne ziaadnie stib miech, wseed ne rneenë Xtiidz Dios, niicle ne rnee zha ne ziaadniew zha rac nac zho, per nlid ne diidzli rnee zho. ²¹ Sac gon, blale zha ne ziesaan mine nac diidzli, laa zho zienal wseed co; per riend zho lel znu rziaabnëz zho ga.

Dios men ndzon ne rnabey, me noxco luu, me gzhixcuaa lo grë zhizhgab luu. Me gacniend luu peet tsienied guic luu.

Pabl

BROP GUILTS NE PXEEL PABL LO TIMOTÉ

1 ¡Diuzh Timoté!
¹ Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios bzo naa quiaseed naa miech didz ne rdeed guielmban lo zha ne rzëëb xnëz Jesús.

² Laa naa rxeļ stib guits rii lo luu i gon xin; xin rne naa lo luu sac rzaac naa luu zig tib xpëëd naa. Miņe racladz naa ni rnab naa lo Dios men ne nac Pxož ne, ni lo Jesús men ndzon ne rnabey ne, yquia zdoo me luu, ni me tsoxco grë zhizhgab luu; zeena peet tsienied guic luu.

³ ¡Gzataa zeene rzodiidznie naa Dios rzet naa luu lo me, niicle guidzew, niicle guieela, tibaque rded naa xquizh lo me ni rnab naa lo me gacnien me luu! Dib zdoo naa noxco naa zanaļ naa miņe rnabey me, zigne bioxcoque grë xmen-goldoo naa güeynaļ zhow.

⁴ Zeene rsoladz naa blactaa roon luu zeene wbi naa i, zoot naa tebaa zha ganniob naa luu stib; zeena tsonley zdoo naa. ⁵ Ni rsoladz naa scataa dib zdoo luu rliladz luu Dios; lëëdaaque xnanit luu Loid, ni xniaa luu Eunis, ni nanpaa naa scataque dib zdoo luu rliladz luu me.

⁶ Gacxe waa, laa naa rso diidz lo luu pquiin grëse guielbiini ne bneedz Dios lo luu zeene pxobnia naa guic luu, ni bnab naa beenlay me luu. ¡Ib csaand luuw!
⁷ Sac gon, laa Dios rneedz zhiEspiritu me lo ne, parne sodziebdraa ne, parne dziaapraa ne xfuers me, gleynieraa ne samiech ne, ni tsabiiniraa ne. ⁸ Gacxe nod pe nacne gdzieeb luu, bnee lo miech ganle zha nac Xtiidz Ndzon Jesús; ni icle gdzieebdga luu ne znu nioogyu naa nu, loxaque ne rliladz naa me. Sinque bloo zdoo luu ne ib laa luu no gan grë guielnë rii, loxaque ne quiaseed ne

miech Xtiidz me, diidz ne rlu ganle zha laa zho lo doļ. Ga nagon rquiin fuerz ne rneedz Dios lo ne. ⁹ Gotsaa gwi ne ganle laa me psilaa ne lo grëtaa xtoļ ne, ni bredz me ne gban ne zigne racladz me. Ni nacda por pe guielwen ne bdziuuņ ne, sac haxta zeene gard cue guidzliu, laa me psan diidz ne laa me glu ganle pa lotaa rleynie me ne.

¹⁰ Ni niina ne laa me pxeel Jesús (men ne rsilaa miech lo doļ), laa me blu ganle ne nli nquialadz me ne. Jesús nac men ne biaadtiche poder ne rap guielgut, ni biaadlu me ganle parne ygaa miech tib guielmban ne gdzind dze lozh, none gliladz zho Xtiidz Ndzon me. ¹¹ Ible miņ co nagon nacne bzo Dios naa gne naa Diidz Ndzon rii lo miech, pxeel me naa ga naa grë guiedz zaatne nodraa zha Israel, gaseed naa zho zha naca; ¹² miņ-cocxe waa znutaa grë ncuaane nodeed naa. Per ni lalnu ib rtoladz naa, sac wen wen nan naa cho nac men ne rliladz naa, ni nan naa mesi zrieelo yquiaanap me naa nitnëzd naa haxta gal dze ne laa me guiaad.

¹³ Bien, güeynaļ grë miņe pseed naa luu, sac gon miņ co nac miņe rquiin. Tiblique bliladz Dios, iņe bleynie samiech luu zigne no dziuuņ ne ne nac ne zha ne no xnëz Jesús. ¹⁴ Espiritu Sant men ne nacie ne, me yquiaanap luu, me gacnien luu ib csaand luu zhiwseed Dios, ib csaand luu dziin ne bzo Dios luu guņ luu.

¹⁵ Nanlaxe luu ganle zha been zha Asia, grëse zho bzozit lo naa; zig nac Figel, zig nac Hermoj, mbe psaan zho naa. ¹⁶ Sangue Onesifr, rnab naa lo Dios yquia zdoo Dios me grë menlidz me, sac blactaa biadchoobladz me zdoo naa. Niicle ne znu nioogyu naa nu, per ib beend me ne ntoladz me niaadgan me naa; ¹⁷ sinque zigne blanso me lad guiedz Roma nu, pquiaguib me naa haxta bdziel naa lo me. ¹⁸ Ni zoladzaxe luu ganle, pe

zhistaa been me xyudar ne zeene no ne guiedz Efés i; rnab naa lo Dios yquia zdoos Dios me gal dze ne laa grése miech gacredz lo Dios.

Dziits so Timoté lo Xtiidz Dios

2 Xin, sangue luu gon tibaque squi dzi-its bzo lo Xtiidz Dios, gon ganle Jesús noxco grése zhizhgab luu.

² Grése mine gon luu pseed naa miech, scagaa niina bioxco bneew lo zha ne rgobey luu grielo tsie tsieneew lo stib miech. ³ Ib gacmband luu zeene noyan luu gré pe guielné, sinque bioxco been xtsiin Jesús zigne no gon luuw, masaque been cuent xmenguuib me nac luu. ⁴ Sac gon, tib zha ne nac menguib, grielod sēēb zho pe stib lo cuent ne nacd xtsiin menguib, sac none nsin so zho gon zho tel pe nac mine rnee men ne rnabey zho. ⁵ Bioxco been mine rnee men ne rnabey ne, zig run zha ne rie tib lo wguite; sac zha co telne tsoxcod zho quit zho zigne nacpaa lo wguite, ycaaniad zho premio. ⁶ Been xtsiin me zigne no gaca, zig run zha ne ran; gon ganle zha ne rioxco ran, zha glopaa rquiin guielnzaac ne rac zaatne ran zho. ⁷ Mine blozh bzet naa nu, blooniew guic luu, ni Jesús nac men ne gneedz guielbiini lo luu guien luu zha naca.

⁸ Tibaque psoladz ganle cho nac Jesús, zha briequia me lo xtii rey David, ni zha brieaban me; zig nac naa min co rzet naa lo miech zeene rseed naa zho Xtiidz Ndzon me, par laa zho lo xtol zho. ⁹ Ni ne nonecxe naa Diidz Ndzon rii waa, gane nroob guielné ne noyan naa; zig nac niina, laa naa ngadoo zaatne nioogyu naa nu zootne cho zha dox. Ni niicle ne znu nioogyu naa nu, sangue Xtiidz Dios led yeda nioogyu. ¹⁰ Laa naa quiaxecw mine quiaeedtaa naa, zeena grése zha ne bzooblolo Dios gliladz Jesús, grielo yquiaadiag zho zha laa zho lo dol, ni zha

yгаа zho tib guielmban ndzon ne gdziidz dze lozh.

¹¹ Ni znu gon naca:

Telne xnēzle me no ne zeene laa ne guet, ib zgaa ne guibannie ne me.

¹² Niicle nroob guielné dzian ne porne riladz ne me, scagaa ible dzidz ne zaatne gnabeynie me ne;

telne guiab ne runbeyd ne me, scaquegaa me ziab me runbeyd me ne.

¹³ Niicle telne rianladz ne me, sangue me rianladz me ne; mine rnee me run mew, sac mesi rtsēēd me xtiidz me.

Tsoxco Timoté grieequia xtsiin Timoté

¹⁴ Bien, beencsoladz gré zha bets ne i, zha bzian ne i gré min rii. Zig zobwi Dios ganle laa naa rso diidz lo luu, gudz lo zho tildiidz niedraa zho miech gré godiidz ne paat rquind; led ncuane ndzinlida, lox- aque rungüeta guic zha ne rquiaadiaga.

¹⁵ Tibaque bioxco zaacse grieequia xtsiin Dios, mine noyun luu, zeena wen grieequia luu zeene laa luu gdziidz lo me. Zigne nacse Xtiidz me, sca pseed miecha. ¹⁶ Yquiaadiagd luu gré wseed yozh, ncuane ni lalnu paat rquind; zha ne ziana wseed co, zig zie dze laa zho rzoitraa lo Dios. ¹⁷ Lega nac zhiwseed zho zig nac gré guielguidzdox; sac tel guielguidzdoxa, znuse rded miecha ni zha ne glana ible zet zho. Zig nac Himené grop Filet, wseed co rleynie zho, ¹⁸ sac tel zha ziana draa zho mine nac diidzli; rnee zho bleebanle Dios gré mengut. No palal zha ne riladzle Xtiidz Dios, zeene ron zho min co, riendraa zho dien pa mine gliladz zho. ¹⁹ Sangue zha ne nli-paa no xnēz Dios, tsod pe nacne griee zho xnēz me sac lole me ngab zho; zigne zho bneeque lo Xtiidz me zaatne rnee: “Runbey Dios cho nac zha ne nli-paa no xnēz me”; ni rneequew: “Gré zha

ne nlipaa ngab xnëz Jesús, none csaan zho grëse guiełntseeb.”

²⁰Zaatne nac lidz tib zha ricw lëë, no grë xtsiin rotie zho minë niaa or, minë niaa plat, ni noquegaa minë niaa yag, minë niaa beñ. Minë mazdraa ni-azh, min co rquiin zho rio ncuaañe row miech; laa minë beelze niaa, ga rgo zho ncuaañe row ma. ²¹Scaquegaa miech, zeene csaan zho grëse ncuaañe paat rquiind, ible squiin zho lo Dios gun zho xtsiin me minë mazdraa nroob, zigne rquiin grë trast niazh co.

²²Nac lo guiełnguieg, ndal grë ncuaañe ndzinlid rio guic miech run zho, sangue luu gon tsienied grë ncuaañ co guic luu, bioxco zaacse wban, dib zdo luu bnalo Dios, ine bleyne grëse samiech luu, tilnied luu zho; grë zha ne squi nli mbe zdo, rbedz zho Dios, zaacse wbannie zho. ²³Ib yquiaadiagd luu grë godiidz ne paat rquiind, sac gon loxaque runctila miech.

²⁴Zha ne squi run xtsiin Dios, nodne tso zho dien pe tildiidz zho; sinque none wen gac zho lo grëse miech. None guieł zho zha cseed zho miech; ib guieednied zho miech, ²⁵ndooladz gac zho gnee zho lo zha ne rlëenie Xtiidz Dios. Ni scagaa Dios cxobnia guic grë zha co, yguudz zdo zho csaan zho grë xquiełntseeb zho, gacnan zho minë nac diidzli; ²⁶zeena tsaa zho biini gree zho ladznia mendox, zaatne gadoo zho.

Leñ dze ne ziaadyob nitlo guidzliu

3 Ni none gacnan luu ganle, zeene laa dze ziaadyobpaa nitlo guidzliu, nroob nac guiełnë ne gan grë zha ne no xnëz Dios. ²Zriequia grë zha ne: gacładz tebaa lose zho yquiin grëtaa ncuaañe no, loxaque dimi gleyne zho, niats gac zho, zdaannie zho ncuaañe ni rapd zho, zneenë zho Dios,

gond zho xtiidz pxoz zho, xtiidz xniala zho;

sacd zdo zho minë gun miech lo zho, laa zho gban zigne notaa guic zho, ib yquiaadiagd zho Xtiidz Dios.

³Gacnandraa zho pe nac guiełwleyne, ib yquiad zdo zho,

loxaque diidz gzhixcuaa zho, lëbd zho gnabey zho xcuerp zho, sacsi zho samiech zho,

stsidil zho grëse ncuaañe rquiin,

⁴zgo zho zha ne ndzieeldiidz zho nia zha ne quin zho,

ni lalnu guiełto tsod lo zho,

loxaque dien zha gdeed guxt xcuerp zho tso zho, laa ne yguib zho xnëz Dios.

⁵Squiaalo zho ye zho riladz Dios, per lo grë ncuaañe gun zho, ga glu ne riladzd zho me.

Bien, ib ctsieelsad luu grë miech ne sca nac. ⁶Sac lëë zha ne nacgrë zho ga, rzëeb yu rietsitnie grë wnaa yozh ne zienal ncuaañe gdeedta guxt xcuerp.

⁷Tibaque no zho dieen peraa rseed zho, per ib rioguicd zho minë nac diidzli.

⁸Zigne been chop zha ne biil diidz dox padzeela, Janes grop Jambres, gocndaan zho lo Moisés; scaque run zha co nina, rlëeniedox zho minë nac diidzli.

Miech yozha, ndzinlidraa nac guic zho, nacd zho zha ne gliladz Xtiidz Dios;

⁹per gacdaquew xtse, zeene laa diidz guieł ganle pe clas miech nac zho, dzigo lëëque grë ncuaañe yozh ne run zho cuee xquiełto zho; zigne bzhaacaque zha ne sca blëenie Moisés.

Csaand Timoté minë pseed me

¹⁰Sangue luu, nanle luu ganle zha nac grë minë pseed naa luu. Wen wen nan luu ganle zha mban naa, pe no guic naa gun naa, zha dib zdo naa riladz naa Dios, zha dib zdo naa rleyne naa samiech naa, riednied naa zho. ¹¹Nanle luu ganle zha rneedz Dios xfuers naa, rlëeb naa grëtaa minë rteed miech naa,

zig been zho naa guiedz Antioquí, guiedz Icon ni Listr, blactaa pquiianał zho naa; per tibaque gocnie Dios naa, psilaa me naa lo grëtaa guielxtseeb co. ¹²Ni scagaa naca, grë zha ne rquiabladz gban zigne rnabey Jesús, ible squianał miech zho. ¹³Per probsaxe grë zha ne sca quiayunc-tal xtol, zha ne sca noquidie miech, zig zie dze laa zho noteedquie zho nëz ne nitlo zho. Quiaguitnie zho miech, ni quiaguitniegaa mendox zho.

¹⁴Sangue luu gon, csaand luu grë miñe pseed luu. Nanwen luu ganle diidzliw, ni runbeygaa luu cho nac grë zha ne bneew lo luu. ¹⁵Ni stiba, zigne ziadroob luu psilo quiaseed luu Xtiidz Dios, ni lëew bdixbiini guic luu gocnan luu ne Jesús none gliladz miech parne laa zho lo dol. ¹⁶Dib nacse Xtiidz Dios, Espiritu Sant psiaaba guic zha ne pquiaaw, laaw biaan:

rseeda ne miñe nac diidzli,
rsow diidz lo ne guien ne pa lo quiaxin
ne,
rseeda ne zaacse gban ne.

¹⁷Zeeña sca grëse zha ne no xnëz Dios, grieelo wen wen cseed zho, ni guien zho zha gun zho grëse dziin ne rquiin, dziin ne rieguial zho gun zho.

None gnee Timoté Xtiidz Dios

4¹⁻²Zig zobwi Dios, zig zobwi Jesús men ndzon ne rnabey ne, laa naa rso diidz lo luu, bnee Xtiidz Dios lo grëse miech. (Jesús nac men gunquizh miech grëtaa ncuane been zho, zigtaa zha ne mbana zigtagaa zha ne gutlew, zeene gdzin dze ne laa me guiaad gnabey me.) Bioxco tel pa hortaa bneew lo zho, niicle zeene rzac luu riobda. Bloo guic zho gliladz zhow, bnee lo zho zeene gan luu pe falt ne noyun zho, ni scagaa bloonley zdoos zho. Bioxco tibaque pseed zho, ib guieednied luu zho. ³Sac gon, zdzin dze ne siguieldraa miech yquiaa-zho miñe nac diidzli; sinque laa

zho yquiaguib zhaase zhaase dien cho cseed zho tel pe nac ncuane rdziladzse zho yquiaadiag zho. ⁴Gleynied zho Xtiidz Dios, laa ne yquiaadiag zho miñe nac xtiidz me, lel laa zho tsoxco yquiaadiag zho grë miñe nac zhiwseed miech guidzliu. ⁵Sangue luu gon, nsin bzo gdeete luu diidz gungüet zho luu. Zaacse been grë miñe pso Dios luu gun luu, bnee lo miech zha laa zho lo dol; niicle tel pe nactaa guielnë ne noded luu, gacmband luu.

⁶Rien naa ziaadyoble ne laa naa gbi lo guidzliu rii, zhile gdzin dze ne laa zho gut naa. ⁷Len ngbidz ne wban naa, tibaque dib zdoos naa bliladz naa Dios; xtsiin mew, laaw ben naa zigne bnabey me naa, ni laaw psiaalgaas naa niina. Zigne runda grë menguiib ne rie lo dil, sca bleeladz naa naa ben naa xtsiin me; ⁸laa na nagon, miñe quiambëzse naa nac premio ne no gneedz me lo naa. Lëe premio co gneedz me gal dze ne guiaad me guiaadgun me guielwxtis; ni led loxaque naadse ygaaw, sinque grëse zha ne rleyne me, grë zha ne dib zdoos quiambëz gdzin dze ne guiaad me stib, grëse zha co ygaas premio co.

Tsieniob Timoté

⁹Bzhiguiel guiaadniob luu guiaadgan luu naa nu; ¹⁰sac zig nac Demas, laa me bichele lo naa. Psanaque me naa nu laa me zie nëz Tesalónica; sac mazdraa nonie grë ncuane lo guidzliu rii guic me. Bay zig nac Crescent, laa me brieze zie me nëz Galás; Tit na, zieegaa nëz Dalmás; laa zho zie zaatne nacle diidz tsie zho. ¹¹⁻¹²Niicle Tic guien nu, sac laa me pxel naa zie me Efés. Loxaque Lucse biaan lo naa nu.

Psoladz gon tsieguib luu Marcw, zeene laa luu guiaad nëz rii bzhiguiel guiaadnie luu me; sac rquiin me nu gun me xyudar naa lo xtsiin Dios. ¹³Ni psoladzpaas guiaadnie luu lar ne rbiix naa, miñe psan

naa guiedz Troas lidz Carp; ni guiaadnie luu grē xquits naa. Ib guiaanladzd luu miñe nac grē guits nroob ga.

¹⁴Teļ gan luu ganle nzian ncuaane nonguiēdraa been Lejandr naa, meñ ne nac wncadzguiib ga; per Diostaa nan zha gunquizh me Lejandr grē miñe been Lejandr ga. ¹⁵Ni niicle luugaa gon, nsi-
naque bzo lo me; sac ne nlipaa rlēenie me wseed ne nolu ne lo miech nu.

¹⁶Zeene glopaa gocredz naa lo wxtis, choot bzēd nriee xfavor naa, grēse zho biche lo naa; rnab naa lo Dios gunquizhd me zho miñe been zho, sca psaan zho naa. ¹⁷Sangue meñ ndzon ne rnabey ne psaan me naa, me pchoobladz zdoo naa, haxta bdeeda diidz bnee naa Xti-
idz me lo grē zha zit rii. Sca gocnieñ me naa, gun naa cuent role meedz psilaa me naa; ¹⁸ni niicle niinagaa, nanle naa ne ib silaa me naa lo grētaa ncuaane racladz

miech cteed zho naa, ni me yquiaanap naa haxta gaļ dze ne laa me gdzinnie naa zaatne rnabey me gbaa. ¡Me rieguiāļ guiaannon gzataa dze, niicle nadzew, gzhew, ni grēragaa leñ izdoo ne ziaada!

¹⁹Bzhiguiēļ bdeed tib zhibdiuzh naa lo Aquil i grop Priscil, ni lo grē zha ne no lidz Onesifr. ²⁰Gacnan to ganle, laa bets ne Rast biaan Corint, laa Tró-
fimo biaan guiedz Milet, sac rzacnē me. ²¹Bioxco gon guiaadniob luu, zeena blansole luu nēz rii zeene laa mēē nal sēēb. Pcaania zhibdiuzh Eubul, zhibdi-
uzh Pudent, zhibdiuzh Lin, zhibdiuzh Claud; ni grēragaa zha bets ne, zha bzian ne, zha ne no nēz rii, laa zho rxeel bdi-
uzh lo luu.

²²Jesús meñ ndzon ne rnabey, me gac-
nie luu. Dios glu lo to ganle pa lotaa noxco me to. ¡Me gunlay to grēse to!

Pabl

GUITS NE PXEEL PABL LO

TIT

1 ¡Diuzh Tit!

¹ Naa nac Pabl, tib ngundziin win nac naa lo Dios, tib zha ne pxeel Jesús nonee Xtiidz Ndzon me lo miech. Laa naa none xtiidz me, zeena grëse miech ne bzooblöle Dios, gliladz zho me, gacnan zho zhapaa nac wseed ne zionał ne (wseed ne rnee zha none gbannie miech Dios), ² wseed ne rlu ganle ible laa ne quiambiaaz ygaa ne tib guielmban ne gdziindraa dze lozh. Ansraa ne tsaa guidzliu, laa Dios bzeetle ne laa me gneedz guielmban co, ni mesi gon led yed me rquidie. ³ Ni niina ne laa dze co bdzin, laa me blu lo ne ganle zha nac xtiidz me, mincopaa nagon bzo me naa none naa lo miech. Lëe me ga nac Dios ne psilaa ne lo dol.

⁴ Laa naa rxel guits rii lo luu gon Tit. Rzaac naa luu zig tib xpëed naa, sac nan naa nli dib zdoo luu rililadz luu Dios zigne rililadz naa me.

Rnab naa lo Dios men ne nac Pxoze, ni lo Jesús men ne psilaa ne lo dol, glu me ganle pa lotaa noxco me luu, zeena peet zhgab ctseebd luu.

⁵ Rsoladzaxe luu ganle, zeene psan naa luu lo guidzliu win ne lë Cret i, laa naa psan luu zeena lozh gun luu grëraa dziin ne no gac i, ni psan naa diidz lo luu zha gzo luu zha ne so gnabey lo grë zha ne rililadz Jesús, tib tib guiedz qui. ⁶ Bien sca, zeene gzo luu zha co, ga rquiin:

tib zha ne zaacse mban, zeena peet glisquid miech lo zho;

tibaque wnaa ne mbannie zho, men ne nacse tseel zho,

zaacse quiachooob zho xpëed zho, rililadz mëed Dios (zëëbd diidz pe guielntseeb ne noyun mëed, o rondgaa mëed diidz).

⁷ Sac zha ne sca so lo grë zha ne no xnëz Dios, ib none gac zho tib zha ne ndzinli mban, sac gon xtsiin Dios ga gun zho. Nodne gac zho:

zha nlëëguic,

zha ngonziu,

zha nad ron diidz,

zha nguibdil,

zha ne rzonał dimi.

⁸ Sinque none gac zho tib zha ne:

ndzinli nac guic,

ine niowse rdeed zho zaatne rbëz miech ne rdziñtaa lidz zho,

rioxco zho run zho niapse ncuaañe rquiin lo samiech zho,

zienał zho gac niapse mine nac diidzli,

rioxco zho run zho niapse mine rnabey Dios,

rrieelo zho rnabey zho guic zho, rnabey zho xcuerp zho.

⁹ Ni none tibaque tsienał zho mine nac Xtiidz Jesús, mine pseed zho; zeena guien zho zha gnee zhow lo grë zha ne gard tsoguic zha naca, ni grieelo zho glu zho lo grë zha ne rlëenie Xtiidz Jesús, guien zha co nonguielda ga glëenie zhow. ¹⁰ Sac no ndal grë zha ne nëd gon Xtiidz Jesús niina, ncuaañe paat rquiind rseed zho miech, rquidie zho; ni lëepaa zha ne sca run nac zha Israel.

¹¹ Gacxe waa, ib none guioog ro zho; sac gon par cueexlëse zho dimi no zho noseed zho miech grë ncuaañe paat rquiind; zaatne no tib yu miech, grëse zho rquidie zho.

Bien sca gon nsin bzo lo grë zha Cret i. Sac gon, ¹² tib menladzaque zho, tib men rac lo zho bzeet ganle zha nac zho zeene znu bnee me: "Nandraaque zha Cret, loxaque noquidielsa zho samiech zho. Masaque mban zho zigne mban grë ma ntseeb ne no guix; loxaque gowse zho zienie guic zho, rbech zho gun zho dziin." ¹³ Ni nligaa sca nac zho. Gacxe waa, bien gdziguiend luu grë mine run zho, goctox lo zho zeena sodziits zho

lo Xtiidz Ndzon Jesús mine no gliladz zho. ¹⁴Bnee lo zho yquiaadiagdraa zho beelze pe grë godiidz ne rbeebeey zha Israel, ni niicle yquiaadiagdgaa zho grë mine rnabey zha ne rlëënie Xtiidz Ndzon Jesús.

¹⁵Golgan ganle, grë miech ne ndzinli nac guic, zha ne mbe xquielrien, ncuane notaa, mbe naca lo zho; sangue zha ne riladz Xtiidz Dios, zha ne ndzinlid nac guic, tsod tib ncuane mbe glulo lo zho; sac desde zdoo zho, desde xquielrien zho mbed. ¹⁶Rnee zho runbey zho Dios, per rlu nlida sac ndzinlid mban zho. Zha yozha, xquielndaan yozh zho zienie zho, led zha ne guiabd ne gun ncuane yquiina.

Znu nac Xtiidz Ndzon Jesús

2 Sangue luu gon, none gnee luu lo grë miech qui zigne nacse Xtiidz Jesús.

²Grë men bgui ne nac zha gol lo to i, bnee lo zho:

tibiladz gac zho,

gund zho ncuane cuee xquielto zho,

quix zho biini, ncuane ndzinli tsienal zho gun zho;

tiblique gac zho lo Xtiidz Jesús,

gleynie zho samiech zho, ni

dziits so zho tel pe nactaa grë guielne ne noyan zho.

³Scaquegaa grë men wnaa ne nac zhagol, bnee lo zho:

gban zho zigne no gban zha ne nole xnëz Dios,

gzhixcuad zho diidzguizh,

gzuzdz zho.

None zaacse gac zho, ⁴zeena zha glu lo grë wnaa nguieg zha gban zho. Cseed zho grë wnaa nguieg:

gan zho tsieel zho,

gan zho xpëed zho,

⁵gac zho tib wnaa nix biini,

quintied zho tsieel zho;

zaacse gun zho xtsiin zho,

niowse gac zho, niowse gnee zho,

gon zho xtiidz tsieel zho; zeena tsod pe nacne gneenë miech Xtiidz Dios.

⁶Ni scaquegaa bnee lo grë zha bgui nguieg, gac zho zha nix biini. ⁷Luuzhal zaacse been grëse ncuane no gun luu, zeena ga gwi zho ganle zha none gban zho. Zeene cseed luu zho, ine tibiladz goc, gund luu ne quitnie luu zho. ⁸Bguib diidz ne gnee luu, zeena choot peet glisquid lo luu; ni scagaa, grë zha ne rlëënie Xtiidz Jesús, stoladz zho zeene gan zho guieñd pe glisqui zho lo ne.

⁹Grë zha ne lega run xtsiin ben, pso diidz lo zho gon zho xtiidz men ne quia zho xtsiin, niowse gac zho, niowse gnee zho, yquiabrod zho lo me. ¹⁰Ib cuand zho, sinque ine ti miech mbe lo gac zho; zeena ga gan miech ganle zha niowtaa nac lo xquielmban zha ne zienal Xtiidz Dios, men ne psilaa ne lo dol.

¹¹Grë diidz rii nagon pso lo zho. Got-saa gwi ne ganle zha noxcotaa Dios miech, gacxe psilaa me ne lo dol waa; ¹²sac laa me racladz csaan ne grëse guielntseeb, csaan ne grëtaa ncuane rleynie zha ne nod xnëz me, guieñ ne ndzinli gban ne, tibaque gwi ne dieñ pa min wen, pa mingaa wend, ine dzioxco ne gban ne zigne racladz me. ¹³Sca none gban ne, haxta dzianlo ne gdzin dze ne laa Jesús guiaad stib, zigne psanle Dios diidz; gal dze co, laa me guiaad con grë xquielndzon me. Me nac Dios ro ne riladz ne, me psilaa ne lo dol. ¹⁴Sac gon, me bgaadz guielgut ne niogual ne, me bdiizh grëtaa guielntseeb ne bdziun ne, psanmbe me ne lo grëtaa ncuane bdziun ne; gane niina, lo me ngab ne, ni none dzioxco ne gban ne zigne rnabey me.

¹⁵Grë min rii nagon pseed grë miech qui, bnee lo zho gban zhow. Zeene riegala gdziebd luu goctox lo zho, sac gon luu riegual gnee lo zho. ;Sca been, zeena choot quitnied luu!

Znu rieguiäl gban zha ne no xnëz Dios

3 Beencsoladz zho ganle none gon zho mine rnee grë zha ne nac wxtis, gac zho tib zha nguzobdiidz, ni ib soliaadz zho gun zho grë tel pe ncuane yquii lo samiech zho. ²Guien zho gneenëd zho samiech zho, ine zaacse gbannie zho samiech zho, niowse gac zho, niowse gnee zho, ni zeene cho lo gnee zho none ndooladz gac zho, ndooladz gnee zho.

³Sac gon haxta ne, ib peet rien d ne glo, ntseeb goc ne, bdiits ne grë mine rnabey Dios; laa ne ziole nëz ne nitlo ne hor co, masaque bgadoo ne lo grë-taa ncuane racladz xcuerp ne, lo grë-taa ncuane ndzinlid ne bley ne bdzi-uun ne. Niapse guieIntseeb bional ne, në rac zdoo ne rdzian ne ncuane quianie, ncuane run stib miech; zigtaa row rzhi-izh zdoo zho gon zho ne, scaque ne, zha ne rdziantaa ne, row rzhiizh zdoo ne bdzian ne zho. ⁴Per bdzin dze, zeene laa Dios (men ne psilaa ne lo dol) blu ganle pa lotaa nac xquielwen me, pa lotaa nquialadz me miech, ⁵laa me psilaa ne; per guiabd ne togo por pe ncuane wen ne bdziuun new, sinque porne pquia zdoo me new. Psanmbe me ne lo grë-taa xtol ne, rreequia gol ne ga stib, ni bzhixcuaa Espiritu Sant lo xquielmban ne. ⁶Niapse por Jesús men ne psilaa ne ga, laa Dios pxeel Espiritu Sant rneedz me grëse guieIbini ne rquii lo ne. ⁷Por mine been Jesús ni mine been Espiritu Sant laa ne biaanwen lo Dios; ni porne noxco me ne gane bnabey me sca goca. Gane niina, ndion ne ib zgaa ne tib guielmban ne gdzind dze lozh, sac ib sca nac xtiidz me.

⁸Mine rne naa lo luu nu, diidzliw. Racladz naa tibaque gnee luuw lo grë

zha qui, zeena grëse zho ne nac zho zha ne rililadz Dios, tsoxco zho gun zho niapse grë ncuane ndzinli; sac gon, min co nac mine nonguiel, ni mincogaa rquii lo grëse miech.

⁹Biche lo zha ne racladz tilidiidznie luu grë ncuane paat rquiind, zig nac grë godiidz dien pe been grë mengol padzeela, dien pe nonguiel tsienal ne ley, te nonguiel da ye. Ncuane paat rquiind ga, loxaque runtila miech; ni lalnu rieguiald gaquieta.

¹⁰Tel cho zha ne rsilo rgodil grë zha ne rililadz Dios, blisquiw lo zho. Bnee lo zho tib, tel gan luu rond zhow, bnee lo zho stib; telne rondaque zhow, dzigo bzonëz zho gan zho dien pa nëz tsie zho. ¹¹Zha ne sca run, gase rlu ne zieniedraa guic zho gon zho mine rnabey Dios; sac nana-paa zho dol ga, ni laa zho runa.

¹²Laa naa no cxel tib zha ne guiaad i, yase cxel naa Artem o cxeelgaa naa Tic. Zeene glanso zho i, siguieel luu guiaad luu Nicópolis ga gdzieel ne; sac ib ga ni naa cuëz naa len mëe nal ne ziaad nu. ¹³Laga no luu i, bioxco zaatne grieeletaaw been xyudar Apol grop me licenciad Zenas. Bdeed grë tel pe ncuane yquii zho nëz; zeena peet gun-falte lo zho, grieeo gdzin zho zaatne no tsie zho. ¹⁴Grëse zha ne nacgrë ne ne rililadz ne Jesús, none cseed zho gun zho xyudar zha ne no liaadz; glu zho ganle rquii zho, led zhlëd mban zho.

¹⁵Grëse zha ne no lo naa nu, laa zho rxeel bdiuzh lo luu i. Bzhiguiel bdeed tib zhibdiuzh no lo grëse zha ne rleynie no i; sac ye zho rililadz Jesús.

Guiaannie Dios to sca dien. Peet tsienied guic to, me gacnieu to; sac gon me noxco grëse zhizhgab to.

Pabl

GUILTS NE PXEEL PABL LO

FILEMÓN

1 ¡Diuzh Filemón!

¹Naa nac Pabl, laa naa no ladzguiib nu loxaque ne quiayun naa xtsiin Jesús; grop no Timoté laa no rquia guits rii.

Laa no rxeela lo luu gon Filemón, ne nligaa rleyne no luu squi ye luu noyun xtsiin Jesús. ²Laaw ziaad lo to i gza to bzian ne Apia, bets ne Arquip tib zha ne noyunaque dziin rii, ni grëraa zha bets, zha bzian ne rcaalsa lidz luu i.

³Dios, men ne nac Pxoz ne, ni Jesús men ndzon ne rnabey, me glu ganle pa lotaa noxco me to, zeena peet zhgab ct-sbede to.

⁴Ib riaanladzd naa luu, zeene rzodidznie naa Dios, tibaque rded naa xquizh lo me squitaa noneedz me guielbiini lo luu. ⁵Sac ziyonle naa squitaa dib zdoo luu riladz luu Jesús, rleyne luu me, ni scaque rleyne luu grë zha ne ngab lo me. ⁶Rnab naa lo Dios, grëse mine noseed luu grë zha ne no i, tsoguic zhow, zeena ygaa zho grëse guielnzaac ne rdeed Jesús lo grë zha ne ngab lo me. ⁷Rley naa gon bets, sac zigtaa naa zigtagaa grëraa zha ne ngab lo Diosa, blactaa ziechoobladz luu, zigonley luu zdoo no, rlu luu ganle nli rleyne luu no.

⁸Niicle ne rieguala gnabey naa luu mine racladz naa gun luu, sac gon Jesús bzo naa none naa Xtiidz me, ⁹per gnabeyd naa luu, sinque laa naa rnab lo luu yquiaadiag luu ganle zha racladz naa; sac gon ndion ne zigne rleyne naa luu, scaque luu rleyne luu naa. (Gon ganle, mengol ne nac Pabl nu nonee lo luu, laa naa nioogyu nu loxaque ne quiayun naa xtsiin Jesús.) ¹⁰Niina gon ne laa Onésimo glanso lidz luu i stib, bzhiguiel zaacse pcaania me, gon ganle

rriequia mëed nac me lo naa niina, sac nu len ladzguiib nu bne naa Xtiidz Dios lo me, xquizhgaad Dios bliladz mew.

¹¹Nli glo tib zha peet xtsiind nac me lo luu, sangue niina gon, zigtaa lo luuw zigtagaa lo naaw nroob yudar ne gun me. ¹²Laa me biire ziaad lo luu i, niowse pcaania me; masaque been cuent naa i zial i. ¹³Gocladz naa mbëz me lo naa nëz rii, zeena me niun dziin lo naa nu xcuent luu, ne znu nioogyu naa nu loxaque ne noseed naa miech Xtiidz Ndzon Jesús. ¹⁴Per gocladzd naa niunga naa mine no guic naa, ni nand naa dien pe gnë luu; gane ni naa mazd telne zrieelow, per zdoo luu gala.

¹⁵Nli laa Onésimo biche lo luu palal dze; per niina ne laa me glanso lo luu stib, lëë guiaanle me lo luu i. ¹⁶Per bien gon, sacdraa luu me niina zig tib zha ne runse xtsiin luu, gon ganle rriequia tib bets luu i, tib zha ne nziuu lo luu i nac me. Tel naa, sca rzaac naa me, gacxe waa none gleynie luu me; sac gon tel niina, led loxaque tib ngundziindse nac me lo luu, sinque ye tib bets luu nac me, sac gon yele me ngab lo Dios.

¹⁷Telne nlipaa rzac luu naa zig tib bets luu, porne tibaque men ne riladz ne, nana sca been cuent naa i zial i, pcaania me zig nac zeene naa glanso lidz luu. ¹⁸Ni tel no pe guielqui ne been me lidz luu, tel pe zëëbgaa me lo luu, lo naa bnaba. ¹⁹Wi ganle, naazhal pquia diidz rii nu: Naa quizha. ¡Zig nac luu, gon ganle zëëble luu lo naa, ni haxta nroobraa zëëb luu! Sac gon, naa bnee Xtiidz Dios lo luu laa luu bgaa guielmban ndzon ne gdzind dze lozh.

²⁰Sca gon bets gaca, bzhiguiel been guielnzaac co; bloonley zdoo naa, bien ganle tibaque lo men ne ngab ne.

²¹Laa naa pxel guits rii lo luu, sac rien naa ible zon luu mine rne naa lo luu nu, rgobey naa haxta nroobraa mine gun luu lo mine rnab naa. ²²Lëë nëzle nu rn-

abaque naa lo luu, siguiel luu gneedz luu lidz luu cuëz naa zeene laa naa guial i; sac rien naa ib zun Dios mine quianab to lo me, zneedz me diidz guial naa guialgan naa to.

²³ ¡Dios guiaannie luu sca! Pcaania zhibdiuzh Epaf, men ne nioogyunie naa len ladzguiib nu loxaque ne rdziuuñ no

xtsiin Jesús. ²⁴ Scaquegaa zla zha ne quiadziuungza no dziin, zig nac Marcw, Ristarc, Demas ni Luc, gza zho laa zho rxeel bdiuzh lo luu.

²⁵ Jesús men ne rnabey ne, me glu ganle pa lotaa noxco me luu. ¡Me gunlay luu!

Pabl

GUTS NE BEY LO GRË ZHA

ISRAEL

1 Padzeela, ndal vuilt bnee Dios lo grë pxozgoldoo ne, pxeel me grë zha ne biadteed xtiidz me lo zho, bnabey me grë zha co zhaase zhaase mod ne bnee zho. ²Sangue niina, Xpëëdpaa me Jesús pxeel me biadnee xtiidz me lo ne. Jesús men ne bzaagrop me grëtaa ncuaane no, ni men ne bzo me gnabeya grësew. ³Zeene biaad Jesús lo guidzliu, me blu ganle zha ndzontaa Dios, zhapaa nac Dios, sac Dios nac me; me naaz grëtaa ncuaane no, ni por xtiidz me laaw quiayun dziin. Ni zeene blozh bdiizh me xtoĭ ne, dzigo laa me biire zey gbaa bzob me cue Dios, zaatne rieguial me ne nac me men ne rnabey.

⁴Ga rlu ganle men nroob nac Jesús, led lega lëd me Xpëëd Dios; men nroob nac me lo grë anjl. ⁵Ni tib lo anjl bneed Dios zigne bnee me lo Jesús, zeene rëb me: “Xpëëd naa nac luu. Desde nadze laa zho gunbey ne Xpëëd naa nac luu.” Stib vuilt zeene bzeet me Jesús, rëb me: “Xpëëd naa nac me, naa nac Pxoze me.” ⁶Ni zeene biaad Jesús lo guidzliu; men ne nac Xpëëdpaa me ga, rëb me: “Grëse xanjĭ naa, none yquitsgzhib zho lo me.”

⁷Zaatne raquiet anjl, rneew: Tib mandadse nac zho lo Dios, pale zigne rzhoon me sca rzhoon zho rie zho zaatne rnabey me zho; me rnabey rlu zho zigne rlu bel.

⁸Sangue zaatne raquiet Xpëëd me, rneew: Dios, luu nac men ne zobnabey, ni gdziind dze ne griece luu; zeene run luu guielwxtis, zigne rieguiala sca run luuw.

⁹Ni palal rdziguiend luu grë guielntseeb, niapse ncuaane ndzinli, ncuaane nonguiel, min co rleynie luu;

min co gane bzooblo Dios luu, nac luu men ne rnabey, luu nac men ne mazdraa nroob guielbley bgaa.

¹⁰Laa stib lugar rnee:

Men rnabey nac luu, luu bzaa guidzliu, luu bzaa bgaa dib nacsew.

¹¹Nli zdziñ dze nitlo grë ncuaan co, grësew zlozha zigne riozh grë lar,

¹²dzigo laa luu ctibëda, zig rdibëd grë lar, laa luu cuee stib min cub; zigne run zha ne rtsëëxab.

Sangue luu, tibaque nac luu, nacd luu men ne nitlo, nacd luu men ne lozh xquielmban.

¹³Haxta rëb Dios lo me:

Cue naa nëz derech, nu bzob, nieeda lozh gnaz naa zha ne rlëë lo luu, csan naa zho ladznia luu.

Nligaa men nroob nac me lo grë anjl, sac ni tib lo anjl bneescad Dios. ¹⁴Lo me ga sca bnee Dios, sac gon grë anjl, mese nac zho run zho dziin lo Dios, rxeel me zho rquianap zho zha ne nacle diidz laa lo grëtaa guielnë ne csiaab me.

2 Gacxe nagon waa, gotsaa guien ne ganle ib none dzioxcu ne wen wen gwi ne zha nac Xtiidz Ndzon Jesús mine zidzion ne; zeena gnitnëzd ne. ²Sac gon, niicle zeene xanjse Dios biadteed xtiidz me lo miech padzeela, ni gocnona; grëse zha ne güeynalda, pteed Dios zho caxtigw ne rieguial zho. ³¿Pe lelgue niina dzigo ne Jesús zhal biadnee zha laa ne lo dol? ¿Zha dien tedlaa ne lo caxtigw, telne dzioxcod ne mine rnee me? Nli zha ne binlew zha co biadnew lo ne, per me nac men ne psilo bneew; ⁴niicle Diosgaa, blactaa grë ncuaane quialu me, blactaa grë milagr ne run me, rlu me ganle ne nli diidzli biadseed zho ne; ni zhaagaa grë guielbiini ne ral zdoo me rdeed Espíritu Sant lo grë zha ne dib zdoo rnaló Jesús.

Jesús nac men ne grielo gdzinnie miech lo Dios

⁵Zig nac lo guidzliu cub ne ndion ne naraa gneedz Dios, psand me ne anjl gnabey low. ⁶Lo Xtiidz me zhonee ganle zeene znu rëb David lo me:

¿Cho nac miech ne squitaa noxco luu zho?

Zig nac tib men qui, ¿pe nacne squitaa runnon luu me?

⁷Tib blase dze psanwin luu me palal lo grë anjl; na laa luu psanglaa me stib, beennon luu me, bzo luu me mele gnabey.

⁸Grëtaa ncuane no, laa luu psana ladz-
nia me.

Nli gard gac grë mine bnee David ga, ⁹per ndionle ne ganle zha psanwin Dios Jesús lo grë anjl tib bla dze, ni blozh ga zeene laa me gut xcuent ne grëse ne, hor co laa Dios biire psanglaa me, laa Dios biire beennon me. Ni nligaa noxco Dios miech, nqualadz me ne, gane bdeed me diidz gut Jesús psilaa me ne lo grëse xtol ne.

¹⁰Ible sca gocladz Dios, men roob ne bzaa grëtaa ncuane no, ible me bdeed diidz scataa grë guielnë ne gon Jesús; gane niina, Jesússe nac men ne grielo ner lo grëtaa miech guizhiu ne no ygab lo me, gdzinnie Jesús zho lo guielndzon ne no me.

¹¹Grëse ne ne nac ne zha ne psanmbe Jesús ngab ne lo Dios, yele ne nac mëed lo Dios. Gacxe waa, rley Jesús rnee me bets me nac ne; ¹²no tib lugar lo Xtiidz Dios zaatne raquiet zeene znu rëb me:

Zne naa lo grë bets naa, gacnan zho ganle cho nac luu; ni zeene ycaalsa zho grë zho, tipse dzioolnie no luu.

¹³Stib vult rëb me:

Dios nac men ne rnalo naa.

Ni rëb me:

Laa naa nu, quiayacnie naa grë zha ne nac xpëed Dios.

¹⁴Min co gane, zigne znu nac ne miech, scaque Jesús goc me miech zigne nac ne. Sca bdeeda diidz gut me, ni zeene gut me, ga psanwin me mendox, sac glo masaque ladznia ma no miech par gnitlo ma zho. ¹⁵Sca psilaa me grë miech ne ngadoo lo guielgut; rriequia ngadoo zho, sac tibaque nonie xtseb guielgut guic zho.

¹⁶Ni wen wen ndion ne ganle, zeene biaad Jesús, biaate me par gacnie me grë anjl, sinque laa me biaad par gacnie me grë zha ne no ygab lo Dios. ¹⁷Gacxe waa, goc me zig nac miech, zigne nac ne ne nac ne bets me; ni parne scagaa grielo gac me pxoz nroob ne gnab lo Dios por ne. Pquia zdoo me ne, bloogon me me bdiizh me grëtaa xtol ne; ¹⁸nroob nac grë guielnë ne bded me, pquiana men-dox nquii ma me niab me lo dol. Ni ne mezhal bded grë min co, nappaa me zha rzac zha ne nodeda, gane ible zacnien me zho.

Gunndipde to zdoo to

3 Bets, bzian, to ne nac to zha ne bredz Dios ngab to lo me; golguien cho nac Jesús, men ne pxeel me biadteed xtiidz me lo miech, men ne bzo me nac pxoz nroob ne rnalo ne niina.

²Tib men nguzobdiidz briequia Jesús lo Dios, zigne nguzobdiidzaque briequia Moisés zeene pquianap me grë zha Israel. ³Per Jesús nac men ne non, sac gon lo me ngab grë miech co, laa Moisés loxaque pquianap me zho. ⁴Zig nac zha ne rzhixcuaa tib yu, nli non zho, per mazdraa non men ne bzaa grëtaa ncuane no; ni lëe men co nac Dios. ⁵Nli bin Moisés diidz been me xtsiin Dios, per laa me gocse zig tib ngundziin pquianap me grë zha Israel co, ni pteed me xtiidz Dios lo zho. ⁶Sangue Jesús, Xpëed Dios nac me, ni me rnabey grëse zha ne ngab

lo Dios. Ni grëse ne, ne nac ne zha ne no xnëz me, lo Dios ngab ne; totsaque inë nley gac ne dib zdoos ne yquiambiaaz ne gac grë minë nacle diidz gneedz me lo ne.

⁷Ndionle ne sca ganle, men ro nac Jesús, gacxe waa gotsaa gwi ne ganle zha raquiet lo Xtiidz Dios rnee Espiritu Sant lo ne, rnee me:

Telne gon to gnee me lo to nadze,

⁸gunndipde to zdoos to,

gunde to zigne been grë pxozgol to, gocntseeb zho lo Dios, zeene sca mban noded zho, no zho grë dan ngan co.

⁹Ga raquiet ganle zeene znu rëb Dios:

Ncuaañe lëbdræa guic naa been zho,

per dipse len choo iz, blactaa ncuaañe gon zho ben naa.

¹⁰Zeene gon naa scataa nac zho,

laa ne gon zho diidz tsie zho nëz ne rlu naa lo zho, lel zhaa ncuaañe run zho;

nacne nli benngulëe zho guic naa.

¹¹Lo guieblëe co, bdeete naa diidz ndzin zho zaatne nded naa ndziiladz zho.

¹²Bets, bzian, golguien sca ganle ib gunndipde to zdoos to, zeena sozite to lo me ne nac me Dios nguiamban. ¹³Gzataa dze, golnee lo grë zha ne nacgrë to (nasraa laga rdeeda diidz), zeena ni tib tsienald grë ncuaañe runctal xtol miech, lozh ga lëew yquiaaqui gacntseeb to lo Dios.

¹⁴Sac gon, par gdzin ne zaatne no Jesús, ib none tiblique gac ne, tibaque gnalo ne Dios zigne bnalo ne me zeene psilo bdziunbey ne me. ¹⁵Ni nadzegazh none dzioxco ne min co. Golsoladz ganle zha rnee lo Xtiidz me:

Telne gon to gnee me lo to nadze,

gunndipde to zdoos to,

gunde to zigne been grë zha ne sca gocntseeb lo me ga.

¹⁶Ni lëe min co gon bzhaac zha ne güeybee Moisés Egipt. Bin zho bnee Dios lo zho ni blozh ga gocntseeb zho lo me,

¹⁷beenctal zho xtol zho. Dipse len choo

iz ne sca bio zho dan co, bieednie me zho. ¹⁸Zeene gon me rond zho xtiidz me, nacne bnee me lo zho rëb me gdziind dze ne gdzin zho zaatne ndeed me ndziiladz zho. ¹⁹Ni nligaaw bdziind zho, grëse zho gut dan co; sac sca beenndip zho zdoos zho, ib bliladz zho minë rnee me.

4 Sca nagon bzhaac grë miech co. Gacxe nagon waa, zig nac niina ne laa me rnee ganle laa me gneedz lugar ne gdziiladzga ne, none ndzinli gac ne, zeena ni tib choot sacd zig bzhaac grë zha co. ²Sac zigne nagon nonee Dios lo ne niina dien zha gdzin ne zaatne gneedz me ga, znuque bnee me lo zho; per zhlëse bin zhow, ib bliladz zhow dib zdoos zho. ³Sac loxaque zha ne dib zdoose rliladz xtiidz Dios, zha cose zrieelo gdzin zaatne nacle diidz ga gdeed me gdziiladz zho. Mincoxe waa, zeene gon me bliladz zha co xtiidz me, bdeete me diidz ndzin zho ga.

Niaale zaatne gdziiladz zho ga, nolew zeene blozh bzaa Dios grëtaa ncuaañe no. ⁴Sac gon rnee lo Xtiidz me: “Xoop ngbidz bzaa me grëtaa ncuaañe no, laa zeene gol ngbidz gadz laa me bdziiladz.” ⁵Niaalew nagon, sinque ne gocntseeb zho lo me gane bdeete me diidz ndzin zho.

⁶Grë zha ne glo gocnan xtiidz me ga, brieelod ndzin zho; per zig nac niina, laa me bii quiambëz sëeb grëraa zha ne no sëeb. ⁷Gacxe waa, laa me biire pso stib dze ne yгаа zho guieinzaac co. Lëe min co ga znu bzeet David, zeene rëb me: “Telne gon to gnee me lo to nadze, gunndipde to zdoos to.” Ndaldoole iz sca bzhaac grë zhagol co, dzigoraa znu bzeet David; ⁸ga nagon rlu no stib lugar ne gdziiladz miech. Nacdraaw zaatne bdzinie Josué grë zha ne biaan zeene blozh gut grë zha ne gocntseeb ga; sac telne lëele lugar co ga, nsodraa Dios stib dze ne yгаа miech guieinzaac co. ⁹Min co nagon, ndion ne ible no stib lugar co,

ni ga gdziñ grëse zha ne ngab lo Dios. ¹⁰Grëse zha ne gdziñ ga, gasi laa zho gdziiladz lo grëtaa xtsiñ zho, zigne bdziiladzaque Dios zeene blozh bzaa me grëtaa ncuaañe no.

¹¹Gacxe nana sca, golgotsaa dzioxcō ne dziuun ne miñe rnabey Dios, zeena gdziñ ne ga; dziuund ne zigne been grë zha wladz ne sca bind xtiidz me. ¹²Sac Diosi gon, diidz ne rnee me, nona. Zeene rnee me, rien ne grëse miñe nac ne. Nan me pe no guic ne, pe rza zdoo ne; niicle ncuaañe rzac ne mazdraa nguetsa, nan mew. ¹³Tsod ncuaañe tsonguets lo me. Grëse ncuaañe rac, me ran; ni tib tib ne, lo me cueero ne grëse tel zha mban ne.

Lëe pxoz nroob ga nac Jesús

¹⁴Per zig rne naa ga, rdziaap ne tib pxoz nroob niina, ni pxoz cosi men ne bzoquia gbaaw. Lëe me ga nac Jesús, men ne nac Xpëed Dios, me none gnalo ne; none tiblque gac ne. ¹⁵Sac gon mesi rquia zdoo me ne, csaand me ne zeene zootle laa ne guiable lo dol, sac tel me gonle me zha nac lo guidzliu rii, gonle me grëtaa mod ne rquiil mendox ne par gunctal ne xtol ne. Bzhaac me zigne rziacaque ne niina, lëeraasi biabd me lo dol. ¹⁶Gacxe nagon waa, ine tibiladz golgotsaa gbig ne lo Dios, ndion ne ganle ible squia zdoo me ne, ni ible zacniñ me ne zeene rquiinpaan me gun me xyudar ne, sac ne nligaa noxcō me ne.

5¹⁻³Ible Jesús nac zhipxoz nroob ne niina. Gotsaa gwi ne ganle, men ne rgaac rac pxoz nroob, ladaque miech rcuee me run me dziin co, ni laa me rzo rteed me xtiidz miech lo Dios. Zig nac grë gon ne rgogon miech lo Dios, xchen ma ne rut zho par guiooglo lo xtol zho, me riesana lo pcoog; ni saquegaa riesan me miñe guiooglo lo xtol me; sac gon, miech guidzliuque nac me. Ye me rzac zigne rzac grëraa miech, gane rien me

rquia zdoo me grë zha ne peet rien, grë zha ne mazdraa ngoopdol.

⁴Ni zha ne sca rac pxoz nroob, led zhald zho rzëeb zho rac zho dziin co, sinque Dioszhal rzooblo zho zigne bzooblo Dios Aarón, men ne glopaa goc pxoz nroob. ⁵Zig nac Jesús, Dioszhal bzooblo me ne laa me nac zhipxoz nroob ne; men ne znu rëb lo me: “Xpëed naa nac luu. Desde nadze laa zho gunbey ne Xpëed naa nac luu.” ⁶Ni rëb me:

Luu nac pxoz nroob, gdziñ dze ne gdzëe luu,

luu gac zig pxoz Melquisedec.

⁷Zeene bii zo Jesús lo guidzliu rii, tib vult mban rac me zig zet me lo guielñe, haxta roon me, nguiedz bnee me bnab me lo Dios csilaa Dios me lo guielgut co; scagaa Dios psilaa Dios me, sac tib men nguzobdiidz nac me. ⁸Niicle ne Xpëed Dios nac me, per tib men nguzobdiidz goc me, maase mincopaa pquiaqui nroob guielñe ne bded me. ⁹Ni ne sca bin me diidz been me grëse miñe bnabey Dios me, gacxe waa grëse miech ne gban zigne nac xtiidz me, me gdeed tib guielmban ne gdziñdraa dze lozh lo zho; ¹⁰ni bzo Dios me nac me pxoz nroob niina, zigne gocaque Melquisedec pxoz nroob.

Gacde to zig cho mëdyeen

¹¹Racladz naa gneraa naa lo to nu pe run zhipxoz nroob ne, zha nac me, per ne squi rac to peet nëde to yquiaadiag to, ngan gne naa lo to zha naca. ¹²Lo lal dze ne psilo rnalo to Jesús, haxta none tole cseed miech niina, per na gon lel rquiin to dien cho gbiire csilo cseed to stib. Rac mëdyeen to i gon, laa ne gow to ncuaañe row zha brooble lel racladz to tibaque nidz guie to. ¹³Sac gon, mëdyeen rie nidz, ni rien win dien pe nac ncuaañe ntseeb, pegaa nac ncuaañe wen. ¹⁴Sangue grëloraa guielwagw, min co rquiin grë zha gol, ni zha co niinile zho,

rin zho pe nac ncuaane wen, pegaa nac ncuaane ntseeb.

6 Gacxe waa, none tsoxco to gac to tib zha gol. Gunde to ne mine pseedse to glo zene psilo bnalo to Jesús, lo min co ib grieede to. Laa to pseedle ganle:

zha none csaan to guielntseeb gbig to lo Dios,

zha none gnalo to Dios,

²zha cxobnia to guic stib zho, gnab to lo Dios por zha,

zha nac wrobnis,

zha cueban Dios gre mengut,

zha gun Dios guielwxtis ne gloozh gretaa guielntseeb.

³Grele min rii nanu to. Laa niina telne zneedz Dios diidz, laa to cseed mine no-raa gacnanu to.

⁴Sac gonu, no ncuaane grieelod gac telne gneedzd Dios diidz gaca. Zig nac zha ne squi bienle zha nac Xtiidz Nd-zon Dios, bley zho gonu zho gol zdo Dios psilaa me zho, bdeed Espíritu Sant guielbiini lo zho, ⁵bienu zho zha wentaa nac xtiidz me, zha grieelo seeb zho zaatne ziaadyob gdzin zho (zene glu Dios gre poder ne rap me), ⁶ni lozh ga csaan zhow, tsienal zho guielntseeb stib; grieelod nose co guic zho gbiire seeb zho xnez Dios. Ni zha ne gonu sca runu, rrieequia noquiaa zho Jesús lo cruz ga stib, gbiire gzhidznie miech me. ⁷Zig nac tib le liu ne rgaa grese nisguie ne riab, zene rrieequia gre ncuaane ran zho low, runlay Diosa; ⁸laa telne niapse yag guiets, niapse gre guizh guiets roob low, paat rquiinda; ib tedsod dzibdee Diosa, ni lozh ga znabey me tseca. Scaque nagonu nac miech ne runbey Xtiidz me.

⁹Bets, bzian, laa naa rne min rii lo to, per guiabde to togo mine runu to rzet naa. Telu to, rin naa brieele to lo gre guielntseeb, lole Dios ngab to niina. ¹⁰Nanle to ganle, Diossi ncuaane rieguial tib tib miech, min co rdeed me lo zho. Gretaa ncuaane noyun to ni-

ina ne rleynie to me, gre telu zha rquia zdo to benu to xyudar greraa zha ne no xnez me, ni noyungaa tow niina; gresew ible guiaanladzd mew. ¹¹Mine rzoobladz naa, tibaque squi nguieel gac to, zena scagaa zgaa to gre ncuaane nacle diidz gneedz Dios lo to. ¹²Sac dzigosi guieete to, ib gbechde to; masaque laa guic to tsienie ycaania to gretaa mine bneele me gneedz me lo ne; zigne been gre zha ne nlipaa bnalo me.

Mine rnee Dios runu mew

¹³⁻¹⁴Golsoladz ganle, zene psanu Dios xtiidz me lo Abraham benu mew zigne bneese mew. Leeb hor co reb me laa me gunlay Abraham, ni ndal gun me lo xti Abraham. Ni leebque le me bzeet me, par glu ne ible zunu me mine bnee me. ¹⁵Scagaa Abraham, tiblque bliladz me ne laaw gac; leeb gdib pquiambez me bdzin dze co.

¹⁶Zig nac miech, par glu ne zunu zho mine rnee zho, dzigo rzeet zho le tib menu ne mazdraa non lo zho; ni deque sca runu zho ga rlu ne gdzeedraa xtiidz zho. ¹⁷Scagaa Dios, laa me bzeet le me sac guiendraa stib menu ne mazdraa non lo me. Ga blu me ne ible zunu me mine bnee me ga.

¹⁸Zeene sca rsanu Dios diidz, ni rzeet me le me, choot grieelodraa ctseeb mine rnee me, ni niicle megaaw nacd me menu ne rquidie. Gacxe waa, grese ne ne nac ne zha ne wbig lo me, none ine nley gac ne, sac ndionpaa ne ne ible zneedz me mine psanu me diidz ygaa ne. ¹⁹Min co nagonu, none tiblque gac ne zig tib barcw ne dziits zob lo nis, sac no ncuaane naaza lenu nis; ndionu ne ganle, ible zdzin ne lenu yadoo nroob ne zob Jesús. ²⁰Laa me bner bdzin me ga nonab me lo Dios por ne. Me nac pxoz nroob niina, ni gdzin-draa dze ne gdzeeb me; laa me nac zig goc pxoz Melquisedec.

Pxoz nroob ne lë Melquisedec

7 Nanle to ganle Melquisedec goc rey guiedz Salem, ni meque goc pxoz lo Dios ro ne zob gbaa. Gołsoladz ganle, zeene znu wbirele Abraham güeyguncxoon me zha ne no grë guiedz ne rlëë lo me, Melquisedec goc pxoz ne güeydzieelo me, beenlay Melquisedec me. ²Dzigo lo grëse ncuuaane bla me lo grë zha co, been mew tsiilal, bdeed me tib lalgaw lo Melquisedec.

Melquisedec nac zig nacne rnee ne “guielwxtis”, min co nac ne rnee zho me “rey ne run guielwxtis”; ni rneeque zho me “rey ne rucüez lo dil”, sac Salem (guiedz ne goc me rey ga) nac diidz co zig nac ne rnee ne “zaatne guiend dil”. ³Ib raquiete dien cho goc pxoz me, dien cho goc xniaa me, dien cho gocgaa xmengol me; niicle raquietegaa dien zha blanso me lo guidzliu, dien pe gutgaa me. Ziaad gac me zig Xpëed Dios, men ne nac zhipxoz nroob ne, men ne gdzind dze gdzëe.

⁴Rlu men non goc Melquisedec; sac gon:

a) Gołwi ganle, haxta pxozgol ne Abraham bdeed palal ncuuaane bla me ga, lo Melquisedec. ⁵Nana, telne niac Melquisedec zha xtii Leví guiab ne por min co pcaa mew, sac zeene laa ley biaad rnabeya ne grëse zha Israel, tel pe nactaa ncuuaane quianie zho run zhow tsiilal rdeed zho tib lala lo zha xtii Leví, sac zha co nac pxoz; ni tibaque dii ne nac zho. ⁶Laa Melquisedec, niicle ne led zha xtii Leví nac me, per bnab me bdeed Abraham tib lal grë ncuuaan co lo me.

b) Me beenlay Abraham; ni laa Abraham bianaaniele diidz pe nac mine gdeed Dios lo Abraham. ⁷Ni ndion ne ganle men nroob nac zha ne runlay.

⁸c) Grë pxoz ne sca rcaania gon co, rdzin dze ne laa zho ret; sangue

Melquisedec, zigne raquiet me lo Xtii dz Dios rlu ne mban me.

⁹d) Rrieequia ye grë pxoz ne brieequia lo zha xtii Leví ye zho ga bdeed gon lo Melquisedec, zeene sca bdeed Abraham gon co lo me. ¹⁰Sac niicle ne gard gal Leví hor co, per racle Leví cuent ga, sac xpëëdaque Abraham goc Leví.

¹¹e) Grë pxoz ne brieequia lo xtii Leví ga, zig nac Aarón; zha co nac zha ne blu ley lo menguiedz Israel; per brieelod zho mbee zho miech lo dol, gane laa ne nxeel Dios stib pxoz ne ziaad lo xtii Aarón, mazd pxeel me tib pxoz zig pxoz Melquisedec.

¹²Zeene sca ptsëe Dios lo dii ne ziaad pxoz, hor co nacne bdzëëque grë xley pxoz. ¹³⁻¹⁴Ndion ne ganle, Jesús men ne nac pxoz cub niina, lo xtii Judá brieequia me, ni ni tib zha dii co gard gac pxoz, sac ib bzod Moisés zha dii co ne laa zho niac pxoz. ¹⁵Ga nagon rlu ne nli grëw bdzëe. Sac gon, Jesús men ne nac pxoz niina, men ne nac zig pxoz Melquisedec, ¹⁶nacd mew porne ziaad me lo xtii Leví, sinque porne nac me tib men ne gdzind dze lozh xquielmban. ¹⁷Zigne raquietaque me, zaatne rnee:

Luu nac pxoz nroob, gdzind dze ne gdzëe luu,

luu gac zig pxoz Melquisedec.

¹⁸Gataa laa grë xley pxoz biaan tib lad, sac grëse mine bnabey pxoz hor co run miech, paat pquiinda. ¹⁹Ni lalnu brieelod nsanwena miech lo Dios; sangue niina, mazdraa wen zio ne, sac ndionpaa ne Jesús nac men ne csanwen ne lo Dios, sac me nac men nroob ne rnalo ne.

²⁰Dioszhal rëb Jesús gac tib pxoz ne gdzind dze gdzëe, ni haxta bzeet me lë me parne glu ne ctsëed me xtii dz me; ²¹laa grëraa pxoz ne ziezo, ib beend me ne sca nzeet me lë me. Sac gon, lose Jesús znu rëb me:

Luu nac pxoz nroob, gdzind dze ne gdzëë luu,

luu gac pxoz nroob zig Melquisedec.

Naa rnew, ni naasi ctsëed naa xtidz naa.

²²Mincoce waa ndion ne, diidz ne bi-aannie Dios miech ga gdzind dze ne gdzëw; sac gon, por Jesús laaw noyac.

²³Glo, ndaldoo zha ne goc pxoz, sac grëse zho miech nac zho, rdziñ dze ne laa zho ret, zeene laa tib zho ret laa stib zho rzo. ²⁴Sangue Jesús, led yed me gree par dien cho stib so, sac mesi gdzind dze ne guet me. ²⁵Gacxe waa, grëse ne ne nac ne miech, zha ne gbigtaa lo me parne ycaania Dios zho, ible silaa me zho lo dol, ni lëë blaale zho ga. Tibaque laa me gnab lo Dios por zha, sac gdzind dze ne guet me.

²⁶Jesús nac tib men ne nlipaa mbe, ni tib dol rapd me, ib rdziguiend me guieintseeb; gacxe waa, beennon Dios me, ni lëepaa pxoz nroob co nagon rquiin ne. ²⁷Led yed me nac zigne goc grëraa pxoz nroob ne bio glo. Grë pxoz co, gzobse dze rut zho ma ne rgogon zho lo Dios, parne csanmbe me zho lo xtol zho; ni rutaque zho ma ne rigogon lo Dios parne guiaanmbe grëraa menguedz; sangue Jesús, tibaque vuelt bdeed me gon co, ni mezhac goc gon co. ²⁸Stiba, glo, zha ne rgaac rac pxoz nroob zigne rnabey ley, ye zho runctal zho xtol zho; sangue niina ne laa Dios psan stib xtiidz me, laa me bzo Jesús nac me zhipxoz nroob ne, mesi tib men mbe nac me, ni gdzind dze ne gdzëë me.

Jesúsle nac men ne rteed xtiidz ne

8 Lo grë mine quiane naa nu, mine racladzpa naa gacnan to nac min rii: Jesús nac zhipxoz nroob ne, ni zaatne zob Dios, men nroob ne rnabey, ga zob me. ²Gbaa no me, ga quiayun me dziin zaatne nacpaa yadoo, Dios bzaa yadoo co, led yedraa min co bzaa miech.

³Ndion ne ganle, zha ne rac pxoz nroob, laa zho rzo, zeena grë ma, grë-gaa ncuane rgogon miech, zha rdeeda lo Dios; scaquegaa Jesús, ye me bdeed me gon lo Dios. ⁴Tel niaca mine bii no me lo guidzliu niina, grielod gac me pxoz nroob, sacne nole pxoz nroob ne rdeed grë gon co lo Dios, zigne rnabey ley. ⁵Grë dziin ne run grë zha ne rac pxoz nroob lo guidzliu rii, lega nacsew zig zhimplë grë mine rac gbaa; yadoo ne rio zho lo guidzliu riiw, lega nacsew zig zhimplë yadoo ro ne zob gbaa. Golsoladz ganle, zeene laa Moisés gzaa yadoo, rëb Dios lo me: “Zigne gon bluse naa lo luu guic gui ga, sca none gzaa luuw.” ⁶Gacxe waa, tel Jesús men ne nac zhipxoz nroob ne niina, mazdraa non dziin ne quiayun me; sac gon, zeene pso Dios me gac me pxoz nroob, psan Dios diidz stib zha grielo yгаа ne grë guieinzaac nroob ne gneedz Dios lo ne, ni me gunctsin ne lo Dios.

⁷Wenraa nac diidz ne psan Dios ga, sac telne niaca nlëb diidz ne biaan glo ga zeene rëb me zha guiaanwen miech lo me, dzigo nod pe nacne mbiire nsan me stib xtiidz me. ⁸Ni bzeetlegaa me ne laa me csan stib xtiidz me, sac grë zha ne bianne xtiidz me glo, loxaque beenctal zho xtol zho. Min co ga raquiet lo Xtiidz me, zaatne znu rnee:

Rnee men ndzon ne rnabey: Zdziñ dze ne gbiire guiaan no diidz grë no zha Israel, ni zha Judá.

⁹Per gacdraaw zig diidz ne biaan no grë no xmengol zho, zeene rrieequia bzheen naa nia grë zha gol co, blee naa zho lo caxtigw ne noded zho Egipt; sac ni lalnu güeynalđ zho diidz ne biaan no ga, nacne niicle naagaaw, psaanladz naa zho.

¹⁰Zeene gdziñ dze co,

znu nac diidz ne guiaan no grë no zha Israel:

Grëse xley naa, nis nis gacnan zhow, zig nac zeene haxta len zdoo zho, len guic zho zhubneew.

Dzigosi laa zho gunbey naa ne naa nac xDios zho,

ni niicle naagaaw, laa naa gunbey zho ne lo naa ngab zho.

¹¹ Dzigosi yquindraa tso zho gnee zho lo menlidz zho, lo menladz zho: "None gunbey luu Dios gon."

Sac len dze co, grëse zho runbeyle zho naa,

niicle zha ne mazdraa wina, niicle zha ne mazdragaa nona.

¹² Tel pe nactaa xquielntseeb zho, zun naa zhow perdon;

gdzindraa dze csoladz naa grë falt ne been zho lo naa.

¹³ Zeene sca bzeet me ne laa me csan stib xtiidz me, ga rlu ne rquiindraa mine biaan glo ga; sac nac grë ncuaan gox rquiindraaw, laaw nole par nitlow.

Yadoo ne no gbaa

9 Zeene glo biaan Dios diidz ga grë me zha Israel, hor co biaan diidz lo zho zha tsiegan zho me, ni zha tsaa yadoo ne gac zaatne tsiegan zho me. ² Dzigo bzaa zho tib yu mantiad ne goc yadoo co, groltaa len yu co pquiaancaan zho tib lar nroob, goc len yu co chop len. Tib lena, mine riaan nëz ro yadoo, ga nac zaatne Nda, ga rzo tib candeler ne niaa niapse or, ni rzo tib mezh ne rbib guietxtil ne naclayle. ³ Laa stib lena, mine riaan nëz zhits lar co, ga nac zaatne Ndadoo; ⁴ ga rzo tib yag ndiaab niapse or lada, dzigo lo co rec yaal; leen coque zhoob tib guin scaque niapse or ndiaab lada. Len guin co no grop lë quie lag ne pquia ley ne pcaania Moisés, ga no bar ne bzhen Aaron, bar ne bdzib ben ga; leen coque no tib guies win niaa niapse or, len guies co no palal maná, guietxtil

ne bguiaan Dios grë mengol co. Lëe guin co biaan par csoladz zho zha nac diidz ne biaannie Dios zho. ⁵ Zhits guin co zoli chop anjl ne bzaa zho, masaque rbebel grop anjl co rtsiig me xiil me rtse me zhits guin co, zaatne rliaal xchen grë ma ne riogon lo Dios, par guiooglo lo xtol menguedz. Par gne naa zha nacraa grë ncuaan co, nneedzraaw diidz nu niina.

⁶ Sca nagon biao yadoo co, dzigo grë zha ne rac pxoz tibaque rzëeb zho zaatne Nda ga; ga riegun zho dziin ne rnabey ley zho gun zho. ⁷ Laa stib lena, zaatne Ndadoo ga, loxaque men ne nace pxoz nroob rrieelo rzëeb ga, ni tibaque vuelt tib len iz rzëeb zho. Zeene rzëeb zho, rienie zho xchen ma ne rgogon zho par guiooglo lo xtol zho, ni guiogloogaa lo grë xtol menguedz, dol ne biend zho been zho. ⁸ Gase na ganle rlu Espíritu Sant lo ne, gacd sëeb grëraa miech zaatne Ndadoo ga, laga bii sca chop len nac yadoo.

⁹ Golgotsaa gwi ne niina na ganle zha naca: Glo, niicle ne scataa riesan zho gon, scataa rut zho ma ne rgogon zho, per brieelod grë ncuaan co nsanmbew zdoo zho; ¹⁰ sac hor co, laa zho güeynal grë ncuaane laglaase, rio zho dien pe zac gow zho, dien pe zac quie zho, dien zha gaz zho, dien zha tsar nia zho par guiaanmbe zho. Laa zho been min co, sac hor co gard gancub diidz ne biaannie Dios zho ga. ¹¹ Sangue niina ne laa Jesús biaad, niina ne mele nac pxoz nroob, por me laa miech ygaa grë guielnzaac ne bneele Dios ga. Bdzin dze laa me bzëeb yadoo ro ne zob gbaa (yadoo ne mazdraa non, yadoo ne mazdraa nzhixcuaa, yadoo cosi led yeda bzaa miech), ¹² zeene bzëeb me, bzëebnied me pe xchen chiv yeen, pe xchen ngon yeen, zigne been grëraa pxoz nroob; sinque xchenpaa me bzëebnie me zaatne Ndadoo ga; tibaque vuelt bzëeb me, ni lëe psanmbele me ne lo grëtaa xtol

ne ga. ¹³Nana, telne scataa pquiin zho xchen ngon yeen, xchen chiv yeen, rio zho rzëëg zho tib vac yeen rliaal xquidie co lad zha ne rap falt, par gbiche dol co guiaanmbe zho lo Dios. ¹⁴Pe lel xchen Jesús dzigo? Mazdraa gon nac xchen me, ible sanmbew ne lo grëtaa ncuuaane paat rquiind ne bdziuun ne glo, niinasi zrieelo dziuun ne mine rnabey Dios nguiamban. Sac gon, tel Jesús ni tib dol rapd me, ni Espíritu Sant bloo zdoo me bdeed me me goc me tib gon mbe. ¹⁵Gacxe waa, Jesúsle nac men ne gdziinne ne lo Dios, niina ne laa Dios psan stib xtiidz me. Zeene gut me, ga bdiizh me grëtaa xtol miech, zigtaa zha ne biaannie diidz glo cow, zigtagaa zha ne nobedz me len dze riw; niinasi grëse zho zrieelo yгаа zho guielmban ne gdziind dze lozh ga, zigne nacle xtiidz me.

¹⁶Gotsaa gwi ne ganle, xtiidz miech, mine rsan zho par dien zha gac grë ncuuaane rap zho zeene laa zho guet, laga bii mban zho grielod gacnon diidz co; ¹⁷sinque haxta ret zho, dzigo laa diidz co racnon. ¹⁸Scaque nagon, zeene psan Dios xtiidz me glo, gutgash ma ne brieen ren bzhiee dzigoraa laa diidz co psilo gocnon. ¹⁹Golgotsaa csoladz ganle, zeene blozh bnee Moisés lo menguedz zha nac diidz ne psan Dios ga, laa xchen ngon yeen, xchen chiv yeen ndxiembëzle notsa nis; dzigo bzoob me tib lë guits mëcwxiiil rna nizhnie tib guic bar, blozh ga, psëëb mew lo ren co blaal me ren co lo guits ne quia grë diidz co, ni blaal mew lad grëse miech co, ²⁰ni rëb me lo zho: “Laa ren rii bzhiee, zeena gacnan to desde nadzetaa laa diidz ne psan Dios lo to nu csilo gacnon, none gun to mine rnabeya.” ²¹Blozh ga, blaalaque me ren co gdipse len yadoo, ni blaal mew grëse lad ncuuaane racdziin len yadoo.

²²Sca nagon nac ley co, grëse ncuuaane no guiaanmbe, ib ren rsanmbew; scaque miech, haxta rzhiee xchen ma ne rio-

gon dzigoraa riooglo lo xtol zho. ²³Min-cocxe waa, sca pxiee Moisés xchen ma biaanmbe yadoo co ni grë ncuuaane racdziin lena (nacse yadoo co zig zhimlë yadoo gbaa); sangue yadoo gbaa, ga pquiin ren ne mazdraa non lo xchen ma, ni lëë ren co goc xchen Jesús. ²⁴Zeene bzëëb Jesús zaatne Ndadoo güeynee me lo Dios por ne, güeyd me len yadoo ne bzaa miech, sinque len yadoo gbaa güey me; sac gon, nacse mine no lo guidzliu rii zig zhimlë mine no gbaa. ²⁵Grë pxoz nroob, gzob iz rie zho zaatne Ndadoo rienie zho xchen ma; sangue Jesús, xchenpaa me güeynie me, ni tibaque vult güeylogon me me. ²⁶Telne ye me niun zig run grëraa pxoz co, pe zhistaale vult na ziyet me wlal ne bre guidzliu, jper na, led yed me! Zeene laa dze bdziin, laa me biaad, xchenpaa me bzhiee, ni tibaque vult bzhieew psanmbew ne lo dol grëse ne ne nac ne miech. ²⁷Zigne biaan tibaque vult ret miech, lozh ga zeene laa Dios gun guielwxtis, laa zho none gacredz lo me; ²⁸scaquegaa tibaque vult gut Jesús bdiizh me xtol grëse miech; ni zdziin ne guiaad me stib, per guiaatraa me par biire quizh me xtol miech, sinque laa me guiaadsilaa grë zha ne quiambëzlo me, zeena gand zho grëtaa guielnë ne csiab Dios.

Tibaque vult goc Jesús gon

10 Grë mine rnabey ley run pxoz, lega nacsew zig tib zhimlë grëtaa mine been Jesús por ne. Horco nicle gzobse iz rienie grë miech co gon zigne rnabey ley, per brieeloda nsanmbew zho lo dol. ²Tel niaca mine gon cose nsanmbe zho, dzigo tibtaa vult ne niesan zhow lëë niaanmbele zho ga; nicle zhagaaw, niennpaa zho ne laa zho mbele. ³Per na, gzobse iz zeene laa zho riesan gon co rsoladz zho ne bii no zho lo dol, ⁴sac gon, grielod ne

xchense ngon yeen, xchense chiv yeen guiaanmbe miech lo dol.

⁵ Mincocxe waa, zeene laa Jesús biaad lo guidzliu, pe led znu rëb me lo Dios:

Grë xchen ma, grë ncuane riaadlogon zho lo luu, racladzdraa luuw; gane bnabey luu goc naa miech, zial naa lo guidzliu.

⁶ Grë ncuane rzëeg zho, grë ren ne rxiee zho, par guiaanmbe zho lo dol; racladzdraa luu gan luuw.

⁷ Gane niina, laa naa zial nu Dios, zeena gun naa mine gnabeytaa luu; zigne zho bneelee lo Xtiidz luu gac naa.

⁸ Gotsaa gwi ne ganle, blozhse rëb me racladzdraa Dios tso zho pe ncuane tsielogon zho lo me, tso zho cxiee zho xchen ma, gzëeg zho ma par guiaanmbe zho (niicle ne lo ley sca rnabey gun zho); ⁹ dzigo rëb me: “Dios, laa naa zial nu zeena gun naa mine gnabeytaa luu.” Gase nagon rlu ptiche me diidz ne psan Dios ga glo, laa stib diidz cub ne biannie Dios miech ga psilo noquiiin. ¹⁰ Ni nligaa been me mine bnabey Dios, bdeed me me gut me lo cruz; ne sca nagon been me mine bnabey Dios, ga psanmbe me ne lo dol. Tibaque vuelt sca goc me gon co, ni lëe psanmbele me ne ga.

¹¹ Grë pxoz, gzobse dze rio zho len yadoo rdziib zho grë gon ne riesan miech; blactaa iz tibaque sca nodziib zho grë gon co, per brieloda nsanmbew miech lo dol; ¹² sangue Jesús gon, tibaque vuelt bzhiiee xchen me goc me gon psanmbe me miech lo dol. Laa niina, cue Dios nëz derech ga zob me, ¹³ quiambëz me gdzin dze zeene grëse zha ne rlëe ran me, laa zho guiaanwin lo me. ¹⁴ Tibaque gon ne bdeed me ga, psanmbegazh me grëse zha ne nodzinnie me lo Dios. ¹⁵⁻¹⁶ Ni nligaa scaw, haxta Espíritu Sant, zeene blozh bzeet me zha rëb Dios guiaannie me zha Israel diidz stib, zha nis nis gacnan zho xley Dios, zig nac zeene haxta len zdoos zho, haxta

len guic zho zho bneew; ¹⁷ dzigo bzeet me zeene znu rëb Dios: “Tel pe nactaa xquieIntseeb zho, tel pe nactaa xtol zho, gdzindraa dze ne csoladz naaw.”

¹⁸ Golgotsaa gwi ne sca ganle, rsoladzdraa Dios xtol ne sac laa Jesús bdiizhlew; gacxe waa, nodraa dzio ne dien pe gon ne gdeed ne par csanmbe me ne.

None gbig ne lo Dios

¹⁹ Bets, bzian, glo loxaque men ne nace pxoz nroob rzëeb len yadoo zaatne Ndadoo ga; sangue niina, haxta zaatne Ndadoo len yadoo gbaa zrieelo gdzin ne, sac xquizh xquieInzaac Jesús, bdeed me me bzhiiee xchen me psanmbe me ne. ²⁰ Zeene sca gut Jesús, rrieequia tib nëz cub ga pxal me par gdzin ne zaatne ygaa ne guielmban; lëe nëz co ga bzhiial zeene sca briez lar ne quia len yadoo ga. ²¹ Ni ne me nac zhipxoz nroob ne no me yadoo gbaa, ²² niinasi zacle gdzin ne haxta lo Dios. Nana sca, dib zdoos ne golgotsaa gbig ne lo Dios, dib zdoos ne golgotsaa gnalo ne me, benque laa me psanmbele ne lo grëtaa ncuane yozh ne rza zdoos ne, rza guic ne; rrieequia bgaz me ne tib nis mbe. ²³ Tiblique sca golgotsaa gac ne, benque ndion ne ganle ible dzin dze ne gac mine riladz ne; sac Dios psan diidz co, ni ndion ne rquidied me.

²⁴ Golgotsaa dzioxco ne cseedlsa ne gleynie ne zha ne nacgrë ne, ni dziuun ne ncuane yquiiin lo ne grë ne. ²⁵ Dze ne nacle diidz ycaalsa ne dzioolnie ne Dios, ible none ycaalsa ne grëse ne, guionald ne mine run grë zha ne rozit. None cso ne diidz lo grë zha ne nacgrë ne, conley ne zdoos zho dziits so zho lo mine riladz ne; xco co none dzio ne niina ne laa dze ne guiaad Jesús ziaadgaxle.

²⁶ Zha ne beenbeyle zha nac diidzli, ni lozh ga xtsiinpaagunctal zho xtol zho, tsodraa gon ne csanmbe zho lo dol co; ²⁷ lëetaa mine tsieguial zho nac guieInëdox ne ygaa zho zeene laa Dios gun

guielwxtis; dze co laa me cxeel zho lo guidox, zaatne nitlo grëraa zha ntseeb ne gocndaan lo me. ²⁸ Gotsaa gwi ne ganle, niicxe ley ne na pcaania Moisés padzeela ga, zha ne rguiits mine rnabeya, ni tel no chop tson zha ne gon ne nliw, niicle mazdraa mban rac zho ib rdedlaad zho rut zho zho. ²⁹ Nana, zpe lëlgue zha ne dzigo quiits mine rnabey Jesús? Mazdraa gon nac guielnë ne yгаа zho, sac noguitnie zho xchen Jesús ga, rzhidnie zho Espiritu Sant ga sca gun zho. Noguitnie zho ren co, ni lëew bzhiee biaanmbe zho lo dol, lëew bzhiee zeene psan Dios stib xtiidz me zha gbig miech lo me; rzhidnie zho Espiritu Sant, ni men co no zhixco zho. ³⁰ Zha ne sca gun, ible nroob guielnë ne yгаа zho; sac ndion ne ganle zha nac xDios ne, me znu rnee: “Naa raguiäl gun guielwxtis; naa gded mine rieguiäl tib tib miech.” Ni zhubneeque lo Xtiidz me: “Grëse miech, lo me cueero zho grë ncuane been zho.” ³¹ ;Ne nligaa ncuane gdzieb ne ted grë zha ntseeb ne sca guiab ladznia Dios, men nguiamban! ³² Sangué to, golsoladz ganle zha bded to zeene griinppaa psilo bnalo to Jesús, niicle ne scataa nroob guielnë ne gon to, per beenctalde to xtol to. ³³ Blactaa dziiitnie miech to, squi ndxie zha ne nowi laa zho nosaci to; ni blactaga gon to nosaci zho zha ne nacgrë to. ³⁴ Grë zha ne biab ladzguiib, mbanse rac zdoo to ran to zha rac zho; niicle zeene biaad zha ne biaadla grë ncuane nacchen to, psaan to ptiche zhow, peet güeyniedaque guic to; sac nanle to mazdraa nac guielnzaac ne yгаа to gbaa, ni mincosi gdziind dze ne nitlow. ³⁵ Nana sca, scaque dziits golso; sac telne tibaque gnalo to Dios, ible zgaa to guielnzaac ne gneedz me. ³⁶ Ible guiaand zdoo to, tibaque dziits golso golgun mine rnabey me; zeena yгаа to grë ncuane bneelee me gneedz me lo to. ³⁷ Golsoladz ganle, znu zhubnee lo Xtiidz me:

Ible ile ziaad men ne nacle diidz guiaad ga, led nroobdraaw, laa me glansole.

³⁸ Grë zha ne zienal mine nac diidzli, ible zban zho sac rnalo zho naa;

laa telne guiaand zdoo zho sozit zho lo naa, ni lalnu gleynied naa zho.

³⁹ Sangué ne gon, nozozite ne lo Dios, sinque dib zdoo ne rnalo ne me. Grë zha ne sca rzozit lo me, nëz ne nitlo zho ga zie zho; laa ne gon, ible zgaa ne tib guielmban ne gdziind dze lozh, sacne znu dib zdoo ne rnalo ne me.

Zhapaa nac ne dib zdoo ne gnalo ne Dios

11 Znu nac ne dib zdoo ne gnalo ne Dios. Zha ne dib zdoo rnalo Dios, tiblique zienie guic zho ne ible zgaa zho mine quiambëz zho gdeed me lo zho; niicle ncuane gard gan zhow, per rzac zho zig nac zeene ranle zhow. ² Zig nac grë xmengol ne, ne scacxe waa bnalo zho Dios gane bleynie me zho.

³ Scagaa niina, ne dib zdoo ne rnalo ne Dios, gane rililadz ne me bzaa guidzliu ni grëragaa ncuane no, zeene bnabey me biaaw, niicle ne peet guiend hor co.

⁴ Gotsaa gwi ne ganle lëe bla zhagol ne dib zdoo bnalo Dios nu:

Zig nac Abel, ne dib zdoo me bnalo me Dios, gane bleynie Dios gon ne bdeed me, lëdle gon ne bdeed bets me Caïn. Ne sca bnalo me Dios, gane pcaania Dios me zig tib zha ne peet xtold, ni pcaania Dios gon ne bdeed me ga; gacxe waa, haxta lo nadze, niicle ne gutle me, bii raquiet ganle pa lotaa dib zdoo me bnalo me Dios.

⁵ Scaque Enoc, ne dib zdoo me bnalo me Dios, gane gute me, zomban me zeynie Dios me gbaa, choot gondraa me. Zeene bii zomban me lo guidzliu, blu Dios ne rdziladz Dios zha mban me. ⁶ Sac zha ne rnalod Dios dib zdoo, grielod gban zho zigne rdziladz Dios. Zha ne racladz gbig zho lo Dios, none dib zdoo

zho gliladz zho ne nli no me, ni gliladz zho ne nli rcaania me zha ne nli¹⁴paa rio liaadz rbig lo me.

⁷Zig nac Noé, ne dib zdo me bnalo me Dios, gane bliladz me xtiidz Dios zeene rēb Dios lo me pe nac ncuane zi-aadyob gac; bin me diidz bzaa me tib barcw nroob, ni len barcw co bio me gza xpēd me ni tsiel me, blaa zho lo guielnē co. Ni ne sca bnalo me Dios, gane ible zgaa me grē minē gdeed Dios lo grē zha ne biaanmbele lo Dios; laa grē zha ntseeb co, ib bnalod zho Dios, gane sca bnitlo zho.

⁸Zig nac Abraham, ne dib zdo me bnalo me Dios, gane zeene bredz Dios me ycaania me zaatne gdeed Dios lo me, binga me diidz briece me zie me, niicle ne nan¹⁵d me zha nac dan co. ⁹Ni ne sca rnalo me Dios, gane niicle bdzi¹⁶n me lo liu co, laa me wbanse ga zig tib menzit. Lega nacse len grē yu mantiad bio me grop me Isaac, scaquegaa Jacob; sac ye grop zha co biaan diidz nacchen liu co. ¹⁰Scase bio Abraham ga, sac nanpaa me no tib guiedz ndzon ne bzaa Dios, ni ga nac zaatne gdeed Dios gdzin me.

¹¹Scaque Sar, wnaa ne goc tsiel Abraham, ne dib zdo me bnalo me Dios gane gop me mēd, niicle ne nacd me wnaa ne gap mēd, ni lala gol-le me; laa me gop win, sac zeene rēb Dios lo me laa me yquianie win, dib zdo me bliladz me ible zun Dios minē bnee me ga. ¹²Ye Abraham, mengol-le me, men ne yquianiedraa mēd nac me, ni zeene laa Sar gop mēd co, miech guizhiu ne briequia lo dii co; pale mel ne ndziib gbaa, yuzh ne ndxie¹³gaa ro nisdoo.

¹³Gza zha ne blozh goquiet nu, gardaque ygaa zho grē minē bnee Dios gdeed me lo zho, laa zho gut; zeene bii zomban zho lo guidzliu rii, dib zdo zho bnalo zho me gane bliladz zho ne ible zgaa zhow, rzac zho zig nac zeene ranle zhow. Bien zho ne tib ziaadtedse zho lo

guidzliu rii, nacse zho zig tib menzit. ¹⁴Ni ne sca bien zho tib ziaadtedse zho lo guidzliu rii, ga rlu ne dzigora¹⁵ gdzin zho zaatne gacpaa ladz zho. ¹⁵Sac telne niend zho ne scaw, znuse mbire zho ney zho zaatne briece zho ga. ¹⁶Tibaque laa guic zho güeynie ne ib zdzi¹⁷n zho zaatne gacpaa ladz zho gbaa; gacxe waa, rto-ladzd Dios ne nac me Dios ne riladz zho, laa me bzhixcu¹⁸aaale guiedz ne gac ladz zho ga.

¹⁷Zeene been Dios Abraham prueb dien pe nli rnalo Abraham me, rēb me cogon Abraham xpēd Abraham Isaac; ne dib zdo Abraham rnalo me Dios gane niicle tibaque mēd ga lo me, per bleeladz me mēd co, laa me niutle win niac win gon. ¹⁸Ni laa xtiidz Dios nac ne win gunctal lo xti me! ¹⁹Laa me niut win, sac nanpaa ne nroob poder ne rap Dios, telne niet win nrieelo mbeeban Dios win; ni nligaa rriequia gut win ga ni biire brie²⁰eban win stib.

²⁰Niiclegaa Isaac, ne dib zdo me bnalo me Dios, gane zeene b²¹ab me gunlay Dios grop xpēd me, Jacob ni Esaú, bzeet me zha gac lo xquielmban zho.

²¹Scaque Jacob, ne dib zdo me bnalo me Dios, gane niicle laa me nole guet me b²²ab me gunlay Dios grop xpēd-bgui José, bzeet me zha gunlay Dios zho; mengol-le nac me, yagale zhoob me per tibaque rleynie me Dios.

²²Scaque José, ne dib zdo me bnalo me Dios, gane zeene laa me merle guet bzeet me ne ib zdzi²³n dze griece zha Israel Egipt; haxta psan me diidz güey zho xtsit me zeene laa zho griece ga.

²³Zig nac pxoz Moisés, xniaa Moisés, ne dib zdo me bnalo me Dios, gane bloolan me mēd niow ye²⁴n co lidz me tson mē; ib bdziebd me minē bnabey rey Egipt.

²⁴Niiclegaa Moisés, ne dib zdo me bnalo me Dios, gane zeene laa me broob

bdeetraa me diidz niunbey zho me zig xpëedmiag rey; ²⁵ laa ne niaan me lidz rey nleynie me grë ncuaañe niunctal xtoł me, mazd bleeladz me me psacsi zho me grë menladz me. ²⁶ Bien me ne nonguielraaw ted me guielnë zig pteed zho Jesús, lëdle niaannie me grë ncuaañe non ne no Egipt; sacne mine mazdraa nonie guic me nac guielnzaac ne gdeed Dios lo me.

²⁷ Ne sca rnalò me Dios, gane bdziebd me xquielđox rey, tiblique been me guic me brieem Egipt; sac nanpaa me niicle rand me Dios, per Dios nancnie me. ²⁸ Ne scaque rnalò me Dios, gane bnabey me been zha Israel lni Pascw, ni bnabey me bdiaab xchen carner yeen grëse ro lidz zho, zeena guete xpëed glo zho wdze co.

²⁹ Grë zha Israel co, ne dib zdoo zho bnalò zho Dios gane wbiig lo Nisdoo Nizhnie, bzhial tib nëz mbidz bded zho; laa zeene gocladz grë xmenguiib rey Egipt nded zho, znuse bdzieel lo nisdoo co stib, grëse zho gut. ³⁰ Ne scaque dib zdoo zho bnalò zho Dios, gane bliaal biedz nroob ne ndze igo guiedz Jericó, zeene bza gadz ngbidz noyecw zho igo biedz co.

³¹ Zig nac Rahab, wnaa ro nëz ne bio guiedz Jericó, ne dib zdoo me bnalò me Dios, gane peet gocd me dze ne bnitlo grëse menladz me, sacne bnalod zho Dios; me ga bdeed zaatne blëz zha ne glòle pxeel zha Israel güey wleets ga.

³² Ni noragaa zha ne sca dib zdoo bnalò Dios, haxta tiemple ygaad gzet naa zho. Zig nac Gedeón, zig nac Barac, Sansón, Jefté, zig nac David, zig nac Samuel, ni grëragaa zha ne biadteed xtiidz Dios lo miech. ³³ Ne sca dib zdoo zho bnalò zho Dios, no zho beenchen grë guiedz nroob, no zho bnabey grë guiedz zigne nonguiela, no zho gonlo grë mine bzeet Dios gdeed me lo zho, no zho role meedz bdedlaa zho; ³⁴ no zho lo beldox bio zho ni peet gocd zho, no zho lo spadle bded-

laa zho, no zho gzhe gzhele rac zho per bdaan zho; no zho biablòle lo dił ni biire pcaa zho fuerz stib, haxta benxoon zho zha zit ne nodilnie zho. ³⁵ Grë men wnaa, no zho gonlo brieegan menlidz zho.

Nzian grë zha ne sca bnalò Dios, no zho psacsixuu miech zho, per ib bdeete zho diidz niun zho mine racladz miech, mazd bleeladz zho zho beet miech zho; sac nanle zho mazdraa ndzon guielmban ne yгаа zho zeene laa zho grieegan.

³⁶ Nogaa zho bgaa beennguzee miech zho, bdiñ zho zho, bzoob zho zho lo caden, ni bloo zho zho ladzguuib; ³⁷ no zho bdeedquie miech zho haxta gut zho, no zho bgaa bloosier miech zho, no zho bgaa gut zho lo spad. Nogaa zho mbanse rac, pquianguzhoon zho lo miech, nëzrii nëzrec zie zho, mbanse rac zho guieñd pe gow zho, guieñd xab zho, tib lëse guid mëcwxiil, tib lëse guid chiv nriel zho.

³⁸ Miech wen nac zho, ni rieguiald grë miech guidzliu rii guiaadban zha co lo zho, per scataa bded zho. Niapse grë dan bidz, grë dan gui, bio zho; zaatne blëz zho grë len blë, zaatne blëz zho grë len bliee.

³⁹ Ni golgacnan ganle, niicle nli biannziuu zho lo Dios ne sca dib zdoo zho bnalò zho me, per gardaque yгаа zho guielnzaac ne psan me diidz ga yгаа zho; ⁴⁰ sacne laa Dios racladz tipse ygaanie ne zho guielnzaac ne psanle me diidz gneedz me lo ne niina, sac min co nac mine mazdraa nroob.

Choot gbiched lo Jesús

12 Nziandox grë zha ne sca dib zdoo bnalò Dios. Ni niina, grëse zha co laa zho ndxiewi lo ne; sac rrieequia tib lo prueb no ne noquiaa ne corr. Gacxe waa, golgotsaa csaan grë ncuaañe runc-tal xtoł ne, zeena ycadraaw parne grieelo tiblique dzio ne nëz gdziñ ne zaatne no gdziñ ne. ² Tibaque golgotsaa guionie guic ne laa ne gdziñ lo Jesús ga, men

ne zo lo ne grëse ne ne rnalò ne Dios, ni me lozh gzodziits ne. Tel me gon, nicle ne nroob psacsi miech me, haxta lo cruz pquiaa zho me, per tibaque güeynie guic me nroobraa nac guielbley ne gan me zeene lozh ga. Ncuaañe mbeeguielto ga zeene sca quia me lo cruz, per pto-ladlz me.

Ni nligaa, zig nac niina cue Dios nëz derech ga zob me gbaa.

³ Golguien sca, zeene racmban zdoo to, zeene racladz guiaan zdoo to, ib gdeete to diidz; golsoladz ganle, zha pxecw Jesús bded me grëtaa minë pteed grë miech ngoopdol co me. ⁴ Parga nli, në noded to noxco to gunctalde to xtol to, per gard guiab ne yгаа to ne gut miech to. ⁵ Golsoladz ganle zha rnee Dios lo grë zha ne nac xpëed me. Znu raquiet lo Xtiidz me, zaatne rnee:

Xin, zeene rso Dios diidz lo luu gundraa luu grë ncuaañe nonguield, none sac zdoo luuw;
niicle zeene gactoxгаа me lo luu, gacmband luu.

⁶ Sac gon zha ne sca rso me diidz lo, ga rlu ne rleynie me zho;
zha ne ractoxгаа me lo, ga rlu ne nli xpëed me nac zho.

⁷ Golguien sca, gacmbande to tel pe caxtigw ne cteed Dios to. Golgan ganle, niicxe miech na, ractox zho lo xpëed zho zeene rond win diidz. ⁸ Nana, tel ib peet glisquidгаа me lo to, gase dzigo rlu ne led xpëete me nac to; sac gon, zha ne nac xpëed me, rlisqui me zeene rond zho xtiidz me. ⁹ Golsoladz ganle, zeene rac ne mëedlas rlisqui pxoz ne zeene rdzi-uun ne ncuaañe nonguield; scagaa ne, rien ne ne me rnabey lo ne. Nana, ¿pe lel Pxoz ne dzigo men ne zob gbaa gnabeyd me ne? Ni none gon dzion ne xtiidz me, zeena yгаа ne guielmban. ¹⁰ Got-saa gwi ne ganle, zig nac pxoz ne, rquia me rlisqui me zeene rdzi-uun ne ncuaañe nonguield, sac racladz me zaacse gban

ne, ni chop tsonaque dze nac lo guielmban rii; sangue Dios gon, laa me noseed ne par gac ne tib miech mbe zdoo, zig me; ni lëe min co nonraa. ¹¹ Parga nli, tsod zha ne gley zeene noded zho caxtigw, sinque në rzac zhow; per zeene rded ga, zha ne rienpaa rquiina haxta wen riaan zdoo zho, sac rseed zho zaacse rban zho.

Nodne gbiche miech lo Dios

¹² Nana sca, telne bdzagle to, golgun ndip nia to, golgun ndip ni to stib, ¹³ zaacse golsë, tib nëz goltso zeena gziaab-nëzde to; dzigo scagaa zrielo gacnie to zha ne lega noyobe.

¹⁴ Goltsoxco niowse golbannie samiech to, ib gunctalde to xtol to; sac zha ne mbed zdoo, grieelod gdzin zho lo Dios. ¹⁵ Tibaque golteedlolsa zha ne nacgrë to, golguien ganle racladz Dios gacnie me to, napaa na lel nozozit to lo me. Sac zha ne rzozit lo Dios, zeene laa minë nac zho rzhoooben, nzian zdoo zha ne rsan zho, rlozh ga grëse zha co runctal xtol. ¹⁶ Ib gunde to grë ncuaañe tsod zdoo Dios, ib quitniede to guielnzaac ne bneedz Dios lo to; gunde to zigne been Esaú, tel Esaú, por tib plat nis scuaan psaan me guielnzaac ne bgaa me ne nac me mëedglo; ¹⁷ ni nanwen to ganle, zeene laa me gocladz nab pxoz me niunlay Dios me zig mëedglo, brielodraaw. Dzigoraa rquia zdoo me, haxta roon me rnab me yгаа me guielnzaac co stib, per pe xtsiinraaw.

¹⁸ Golguien sca ganle, nroob nac guielnzaac ne bneedz Dios lo to niina! Led yede to ndzin pa tib cho gui, zig bdzin xmengol to cho Gui Sinaí padzeela. Grë xmengol to, zeene ndxie zho zhan Gui Sinaí, beldox ne gon zho rso guic gui co, ni goc tib ncow, lala rio bi ratsie nguzi ni rree me; ¹⁹ ni lala nguiedz rcuedz trompet, ni nguiedz zëeb tsi Dios rnee me lo zho. Zeene

gon zho scataa nguiedz rnee me, bdzieb zho; dzigo bnaab zho lo me gneedraa me. ²⁰ Bdzieb zho bin zho rëb me, zha ne tsep cho gui co none gdeedquie zho zho, gliz lanzgaa zho zho haxta guet zho; scaque grë ma. ²¹ Ncuuaane gdziebdoo ne gon zho ga; haxta Moisés rzhidz lo dzeb co.

²² Sangue to, rrieequia haxta Jerusalén, zaatne no Dios nguiamban gbaa bdziin to, zaatne ndxie grë anjl guizhiu ne roolnie Dios; ²³ zaatne ndxie grë zha ne gloopaa bzëëb xnëz me, grë zha ne zhooble lë gbaa ga. Laa to bdziinle lo Dios, men ne run guielwxtis; zaatne ndxie grë zha ne psanmbe Dios biaan zho zig tib zha ne peet xtold. ²⁴ Laa to bdziinle lo Jesús, men ne rdziinnie miech lo Dios niina ne laa Dios psan stib xtiidz me; laa to bdziinle zaatne rrieequia bliaal xchen Jesús len yadoo gbaa, lëë ren co mazdraa non lëdle xchen Abel.

²⁵ Min co nagon, golguien golgun mine rnabey Dios to. Golsoladz ganle, zha bnitlo grë zhagol ne sca ib bind xtiidz me, ni tib miechse pteed xtiidz me lo zho. ¿Pe lel na dzigo ne mezhal quianee lo ne? Ib diedlaad ne gon telne dziind ne mine rnabey me. ²⁶ Zeene bnee me lo grë zhagol co, haxta beencxidz me guidzliu, ni rnee me: “Zbire naa guncxidz naa guidzliu stib, haxta ye gbaa guncxidz naa.” ²⁷ Gase na ganle rlu, lo grëse ncuuaane bzaa me zdziin ne laa me csiniw, dzigo laaw nitlo; lozh ga, guiaan mine gdzindraa dze nitlo; ²⁸ ni ga nagon gneedz me gbiaaz ne. Gacxe waa, gogotsaa dziuun ne mine rnabey me, gogotsaa gdeed ne xquizh lo me, guien ne men nroob nac me; ni scagaa me zley me. ²⁹ Golguien ganle, tel me ne nac me Dios ne rililadz ne, nac me zig nac tib bel-dox ne peet rdedlaad lo.

Golban zigne racladz Dios

13 Bets, bzian, golleynie grë zha ne nacgrë to, golguien ganle tibaque men ne nac Pxoaz to. ² Goldeed zaatne cuëz grë menzit ne zo nëz. Blac zha ne sca bdeed lidz blëz zha ne zo nëz, no hor biend zho haxta xanjl Dios blëz lidz zho. ³ Golsiegan grë zha ne nioogyu ladzguiib, goltso xliaadz zho zig nac zeene ye to nogrë zho ga. Golsacnie grë zha ne nosacsi miech, nanle to ganle zha rzac ne zeene no ne tib lo guielnë.

⁴ To ne nac to zha ne ptsieelniale, sacde to guieltsieel zig beelze pe wguit, ib yquidiede to tsieel to; sac zha ne yquiangob tib zha ne nonguield tsonie zho o yquiangobgaa zho tib zha ne nole tsieel, ib tedsod zunquizh Dios zho dol co.

⁵ Tsienalde to loxaque dien zha gunlo to dimi; sinque golley totsaque no mine yquiin to. Golsoladz ganle, led znu rnee Dios lo ne: “Tibaque gacnie naa to, ib csaand naa to.” ⁶ Gacxe waa, nod pe nacne ctseb zhgab ne, none tibaque dzionie guic ne dzieets ne:

Dios nac men ne nacnie naa, ¿pe nac nadien gdzieeb naa?

¿Peet grielod gun miech naa!

⁷ Golsoladz zha goc men ne bzo lo to pseed to Xtiidz Dios, ni dib zdoo to glnalo Dios zigne bnalo me Dios.

⁸ Golguien ganle, gdziind dze ne gdzëë Jesús, zigne goc me padzeela, scaque nac me niina, ni scaquegaa gac me grëtaa len iz ne guiaadraa. ⁹ Ib gliladzde to grë wseed ne ziaadnie stib miech sca, wseed ne ni nacdraa Xtiidz Jesús. Diosse nac men ne lozh gzodziits ne lo mine rililadz ne; nacda por tsienal to dien pe gow to, pegaa gowde to; sac zha ne zienal min co, paat yquiinda lo zho. ¹⁰ Grëse zha ne guiab tsienal mine rnabey ley parne ycaania Dios zho, tib ladle rsan zho mine been Jesús ga. Rrieequia no tib lo pcoog,

ni nese zrieelo yquii gon ne ndziib lo co; laa grë pxoz ne ziana mine rnabey ley, grieelod yquii zho gon co.

¹¹ Glo, zeene ret ma ne riogon lo Dios, rlozhse rielaal pxoz nroob xchen ma zaatne Ndadoo parne guiooglo lo xtol menguedz, dzigo rienie zho xcuerp ma ro guiedz, ga rzëëg zhow. ¹² Scaque Jesús, zeene bzhiiee xchen me psanmbe me miech lo dol; ro guiedz ga güeysacsi zho me gut me. ¹³ Scagaa ne niina, golgotsaa griee ne lo grë ncuaane lo guidzliu rii, golgotsaa cueeladz ne ne guional ne zhiits Jesús dzian ne grë guielnë, telne no dzian new. ¹⁴ Benque ndion ne ganle, nacd lo guidzliu rii zaatne gbiaazpaa ne, sinque laa ne zional yгаа ne zaatne naraa gneedz Dios gbiaaz ne.

¹⁵ Laa ne ndionle ganle, Jesús nac men ne gunctsin ne lo Dios; gacxe waa, golgotsaa gleynie ne Dios, golgotsaa gdeed ne xquizh lo me. Lëë min co gac zig tib gon ne gdeed ne lo me. ¹⁶ Goltsoxco golgun grë ncuaane yquii lo samiech to, ncuaane rgaa lo to, goldeed palala lo grë zha ne guiend pe yquii; sac rrieequia lëë stib gon ga gdeed to lo Dios, ni mincogaa rleynie me.

¹⁷ Golgon xtiidz zha ne zo lo to noseed to Xtiidz Dios, golguien zha rnabey lo to, sac gon zha quianap to ni zha gdeed cuent lo Dios zha pqianap zho to. None gon to xtiidz zho, zeena ine gley zho yquiaanap zho to; sac gon, telne lel no-goguielnë to zho, lëda ga gun to.

¹⁸ Golnab lo Dios gacniën me no tibaque znu dzioxco no dziuun no mine racladz me, me nan ganle mbe zdoo no, mbe xquielrien no. ¹⁹ Ni mine rsopaa naa diidz lo to, golsoladz golnab lo Dios gneedz me diidz gbiire guialniob naa i, guialgan naa to.

²⁰ Jesús nac men ne quianappaa ne, zig rquianap baxtor xpëcwxiil zho; me gut bzhiiee xchen me zeene psan Dios diidz stib zha gdziñ miech lo me; ni diidz cosi gdzindraa dze ne gdzëew.

Dios men ne bleeban Jesús, men ne racniën miech peet zhgab rtsebd zho, ²¹ me gneedz guielbiini lo to grielo to gun to mine rnabey me. Jesús sca golnalo, zeena grielo gban to zigne rdziladz Dios. Dios nac men ne rieguial dziuunnon ne, zigtaa niinaw, zigtagaa grëraa len izdoo ne guiaada. Scaw nagon.

²² Bets, bzian, laa naa rnab lo to ib glëed guic to, golcaania palalse diidz ne pso naa lo to nu.

²³ Racladz naa gacnan to ganle, laa bets ne Timoté briele ladzguiib; telne zlansonioib me lo naa nu, grop no me guiaad lo to i.

²⁴ Golsiguiel goldeed tib zhibdiuzh naa lo grë zha ne zo lo to i, ni lo grëragaa zha ne nacgrë to ngab to lo Dios. Ye grë zha ne no nëz Italia nu, laa zho rxeel zhibdiuzh zho lo to.

²⁵ Guiaannie Dios to sca. Me glu ganle pa lotaa noxco me to.

GUTS NE PQUIAA

SANTIAGW

1 ¡Diuzh to grëse to!

¹ Naa nac Santiagw, tib zha ne quiayun xtsiin Dios, tib zha ne quiayun xtsiin Jesús, meñ ndzon ne rnabey. Laa naa rquiaabdiuzh to grëse to ne nac to zha ne ziaad lo xtii Israel, tel pa lotaa nac guidzliu ne no to.

² Bets, bzian, ndal ncuaañe rded ne parne glu dien pe nli dib zdoo ne rnalo ne Dios. Tel pe nactaa ncuaañe noded to i, ib gacbande to, sinque golley. ³ Sac gon, zeene squi ran ne grë pe guielñe, ga rseed ne tibiladz rac ne tel petaa noded ne. ⁴ Golseed sca tibiladz golgac. ¡Ib guiaand zdoo to tel petaa nac guielñe ne gan to! Sac zeene sca cseed to gan to guielñe, zac to tib zha ne dziits so lo Xti-idz Dios, tib zha ndzinli, tib zha ne ib peet gdziebd.

⁵ Zha ne racladz yгаа guielbiini co, zac gnab zhow lo Dios, ni mesi gon zdeed mew; sac guielbiini ne gnabtaa ne lo me zneedz mew. Led yed me yca, led yed me glisqui pe nacne pe gnab ne lo me. ⁶⁻⁸ Lëëraasi dib zdoo ne none gnab new, nodne gacchop guic ne; sac zha ne racchop guic, gdziñd dze yгаа zho mine rnab zho. Nac zho, tib dze dib zdoo zho riladz zho zгаа zho mine rnab zho, stib-gaa dze na riladzdraa zhow, ib ractiblid guic zho; masaque nac zho zig nac grë mtsiin ne rbib lo nisdoo, sac tel mtsiin co loxaque nëzrii nëzrec zienie mew.

⁹ No zha bets ne, zha bzian ne, quianied zho ncuaañe yquiin zho, par miech peet nond zho; per none gon ine gley zho sac nroob non zho lo Dios. ¹⁰⁻¹¹ Scagaa zha ne rapchen, none ine gley zho niina ne biaanwin zho, sac nëz lo Dios grë ncuaañe rap zho nonda. None guien zho niicle ne nroob rapchen zho, zeene

laa zho gbi lo guidzliu rii nuque guiaañ grë ncuaañe rap zho. Masaque nacse zho zig nac guieñ grë guizh ye, tel guiee cow, zhixtsëese ngbidz rcuiidz guizh ne zoba lo, rlozh ga rliaalgaw, gataa rnitlo xquielniowa.

¹² Dichos zha ne ib rrozite lo Dios niicle no nzian ncuaañe rcheep zho gunc-tal zho xtol zho, per rund zhow; sac zha cosi zгаа zho tib guielmban ne gdziñd dze lozh, guielmban ne bneele Dios gdeed me lo grëse zha ne rleynie me. ¹³ Zeene sca no ncuaañe rcheep ne gunc-tal ne xtol ne, guiabd ne togo Dios noquiil ne gun new; sac gon led yed Dios rzoobladz ncuaañe ndzinlid, ni niicle rquildgaa me miech gun zhow. ¹⁴⁻¹⁵ Grë ncuaañe ndzinlid ne rzoobladz ne, grë ncuaañ yozh ne rionie guic ne, min co nac mine rquiil ne. Lëëw nac mine rcheep ne runc-tal ne xtol ne, ni ndionle ne ganle, lëë gdib mine gdeed dol lo miech nac guielñedox ne yгаа zho.

¹⁶ Bets, bzian, gac-wete to sca. ¹⁷ Golguien ganle, ncuaañe rquiin, ncuaañe ndzinli, min co nac mine rneedz Dios. Tibaque nac me, led yed me rdzëë par guiab ne meque rnabey rac guielntseeb. Me nac tib biini ne gdziñd dze guiuu, ni tib lë guielcow guieñd zaatne no me. ¹⁸ Zdoo me gola bneedz me tib guielmban ndzon lo ne niina ne laa bliladz Xtiidz me, masaque rriequia ne nac mëëdglo lo me.

Nacda yquiaadiagse miech Xtiidz Dios

¹⁹ Bets, bzian, ne nac to zha ne rleynie naa: Golgacnan ganle, ne ne nac ne zha ne no xnëz Dios, none dzioxcoraa ne yquiaadiag ne, zeene gnee ne none guien ne pa lotaa gnee ne, ni gund ne ne rmadse pew laa ne glëële. ²⁰ Sac gon, zeene rlëë ne, grieelod gun ne ncuaañe rdziladz Dios. ²¹ Golguien sca, golsaan grëtaa ncuaañe ndzinlid ne ziyun to,

golbiche lo grē guiełntseeb ne znutaa quiayac niina. Ine ndooladz golgac, golleynie Xtiidz Dios, diidz ndzon ne pseedle to; sac gon lëew rlu zha laa to lo dol.

²² Per guiabde to togo loxaque yquiaadiagse to Xtiidz Dios lëew ga; sinque ib none gban to mine rquiaadiag to, sac tel ib gbande tow lëeque to noquidie to ga. ²³ Sac zha ne rquiaadiag Xtiidz Dios, ni rband zhow, rzac zho zig rzac ne zeene rwi ne lo ne lo quiewan. ²⁴ Sac zeene nowi ne lo quiewan, hor cose ran ne zha rac ne; zeene laa ne rbiche low rsoladzdraa ne zha rac lo ne. ²⁵ Sangue zha ne rquiaadiag Diidz Ndzon ne rlu zha laa miech ga, ni zigne rquiaadiagse zhow scasaque rioxco zho rban zhow, zha cosi ib zunlay Dios zho lo grëtaa ncuane gun zho.

²⁶ Gacxe waa, zha ne rnee xnëz Dios no zho ni rgobeyd zho pe rnee zho, lëeque zha noquidie zho ga, ga rlu nlid zianal zho mine rnabey Dios.

²⁷ Sac gon, par Dios men ne nac Pxoze ne, zha ne no xnëz me none tsie zho tsiegun zho xyudar grë mëëdbziab, tsiegun zho xyudar grë wnaa ne ret tsieel, ni tsoxco zho zaacse gban zho, ib tsienald zho ncuane ndzinlid ne run grëraa miech.

Lëda ga run zha ne rbe

2 Bets, bzian, gunde to ne ncuese lo miech ne gnee to, sac zha ne sca run, zha dien guiab zho xnëz Jesús no zho. ²⁻³ Ron naa, zeene rlanso tib zha ricw zaatne rcaalsa to i, nacw zho xab niazh zho, no grë xnil or zho nia zho, lëëled rio to dien pa lo wenraa sob zho; laa zeene rlanso tib zha mban beelze nac xab yeen, rnee to lo zho: “Ise bzo, telne racladzgaaluu sob luu, lo liuse i bzob.” ⁴ ¿Pe sca na rac zha ne no xnëz Jesús? Zha ne gon sca run, ga rlu zho niapse guiełntseeb no guic zho.

⁵ Lëda ga gon bets, lëda ga gon bzian. Golgacnan ganle, ible Dios ble miech ne peet rapd lo guidzliu rii, zeena dib zdoo zho gnalo zho me, zeena yгаа zho zaatne bneele me gdeed me cuëz zha ne noxco rleynie me. Gotsaa gwi ne sca ganle, zha ricw nac zho nëz lo Dios; ⁶ laa to gon, no to rlozhd gzhidznie to zho. ¿Pe ib riende to, grë zha ricw co nac zha ne rsacsi to? Rgobniu zho to, riezo zho to lo wxtis; ⁷ haxta rdzibdee zho Jesús, men ndzon ne nacnie to niina.

⁸ Ib none gban ne zigne rnabey Xley Dios, lo xley me zhubnee: “Bleynie samiech luu, zigne rleynie luu luu.” ⁹ Golguien gon, dol i noyun to squi rbe to dien cho nac zha ricw, chogaa nac zha mban; sac Xley Dios i quiaguiits to. ¹⁰ Golgacnan ganle, zha ne rguiits tibaque xley Dios, niicle maase zianal zho grëraaw, laa zho beenctal-le xtol zho ga, rzacaque zho zig zha ne noguiits grëw. ¹¹ Sac tibaque men ne psana grësew. Gacxe waa, tel zha ne zianal mine rnee: “Gute luu samiech luu”, per rguiits zho mine rnee: “Yquiangobd luu zha ne led tsieeld luu”, laa zho beenctal-le xtol zho ga. ¹² Niowse sca golgac, niicle zeene gneegaa tow, niowse golnee; sac gon, dzin dze cxobdol ne dien pe wban ne zigne rnabey Jesús, te wband new ye. ¹³ Grë zha ne ni lalnu rquiad zdoo samiech, gal dze co scaque ni lalnu yquiad zdoo Dios zho; sangue zha ne rquia zdoo samiech, ible zdedlaa zho lo guiełnëdox ne cxeel me.

Zha ne rnalo Dios none glu zhow

¹⁴ Bets, bzian, ¿pa dien rquiin guiab ne dib zdoo ne rnalo ne Dios, xnëz me no ne, ni tel rund ne xyudar samiech ne? ¿Niacxe scase laa Dios csilaale ne? ¹⁵ Gzoob ne no zha ne nacgrë to i, yase tib bets tow, tib bziangaa tow, ranlo to guiełnd xab zho, niicle quianied zho ncuane gow zho; ¹⁶ ni guiab to lo zho:

“Csacsid luu luu, got xabnal luu, dow ncuuane racladz luu”, per loxaque didz sca guiab to, ni gdeete to ncuuane run falt lo zho. ¿Pa dien yquini diidz co? ¹⁷ Scadaa nagon paat rquiinda guiab ne rnalo ne Dios, ni tel rund ne mine rieguial ne gun ne. ¹⁸ Gacxe waa, zha ne rnalo Dios ni run zho mine rieguial zho, no zho gnè lèda i run zha ne mee lèëlew ga totsaque gnalo ne Dios. Ni rap zho rson, sac grielod glu ne rnalo ne me, telne rund ne mine rieguial ne.

¹⁹ Nli wena run zha ne riladz tibaque Dios no, per grielod guiab zho lèëlew ga, sac gon zig nac mendox ye ma riladz tibaque Dios no, per led por mincod laa ma lo guielne ne cxeel me, sinque haxta rdzieb ma me. ²⁰ Nadzpa n xen zha ne sca rzac, pe ni lalnu riend zho paat rquiinda guiab zho riladz zho Dios ni telne rund zho mine rieguial zho. ²¹ Golgan ganle, zig nac pxozgol ne Abraham, porne been me mine rieguial me gane pcaania Dios me zig tib zha ne peet xtol. Led rsoladz to ganle, zeene rëb Dios lo me tsielogon me xpëed me, güey me zaatne pxeel Dios me. ²² Gotsaa gwi ne ganle, zeene been Abraham mine bnabey Dios me ga, ga blu ne nli rnalo me Dios, ni hor co mazdraa dib zdoo me bnalo me Dios. ²³ Lo Xtiidz Dios zhobnee ne scataa dib zdoo Abraham bnalo me Dios, gane pcaania Dios me zig tib zha ne peet xtol; zëeb diidz, tib zha ndzieeldiiz Dios goc me.

²⁴ Golgacnan sca ganle, led loxaque gililadzse miech Dios, laa me ycaaniale zho; sinque none glu zho nli riladz zho me, gun zho mine rnabey me zho. ²⁵ Golsoladz ganle, scaque wnaa ro nëz ne brielë Rahab, por been me xyudar samiech me, gane pcaania Dios me zig tib zha ne peet xtol; sac zeene gon me noxtseeb zha ne pxeel Josué zie wleets ga, bdeed me zaatne biolan zho, ni blu me stib nëz ne wbire zho, bgaad zho.

²⁶ Gase na ganle rlu, paat rquiinda guiab ne riladz ne Dios ni tel rund ne mine rieguial ne, nacse ne dzigo zig tib xcuerp ngutoo, tel cuerp cow, ¿pa dien yquina?

Ncuuane run ludz miech

3 Bets, bzian, guiabde to lega tso to glisqui to ncuuane run stib miech, sac tsod zha ne demaste wen lo guidzliu rii. Zha ne sca run, rzac zho zha so cseed zho miech, per gacnan zho ganle zha ne rseed miech, mazdraa nroob ncuuane tsasqui lo zho gal dze ne laa zho gacredz lo Dios.

² Grëse ne nzian mod ne rxin ne lo samiech ne. Tel niaca mine no tib zha ne grielo ycuëez ludz pa lotaa gnee zho, zha cosi cxind zho, haxta xcuerp zho zrieelo zho gnabey zhow. ³ Gotsaa gwi ne ganle zig nac guay, con tib lë win guiib ne rgo miech ro ma rrieelo rnabey zho ma, rienie zho ma nëz ne racladztaa zho. ⁴ Scaque barcw, niicle ne nrooba, no hor rriee medox lo nis rcheepa, per con tib lë yag lag win ne rsëe miecha, rrieelo rienie zhow nëz ne racladztaa zho. ⁵ Scapaa nagon nac ludz ne; niicle ne winsew, per nroob guielqui ne runa. jRan to ganle tib bzhiil yeense name rzobgui dan! ⁶ Ni tel ludz ne gon, rrieequia tib bel ga naca. Tib lë win xcuerp ne naca, per guielqui nroob ne runa, runctala xtol miech. Gun ne cuent tib lë gui ne brieë gabil naca; ni dipse lo xquielmban miech noxtseeb zho low.

⁷ Golwi ganle, rrieelo miech runndoo zho grë ma ne rsiibe, grë ma ne rzëlen liu, haxta grë ma ntseeb, haxta grë ma ne no nisdoo, rnabey zho ma. ⁸ Per guient zha ne gon grielo gnabey ludz; ncuuane ntseeb naca, choot grielod gnabeya; masaque laaw no par gnitlow miech, zigne run grë guizh ncuuan. ⁹ Lëew name rquini ne roolnie ne Dios men ne nac Pxoz ne, ni rlozh ga lëëquew rdzibdee ne samiech ne, ni lalnu riend ne me bzaa

zho, biaan zho zigne rlu me. ¹⁰ ¿Pe ga nadien, ro ne roolnie ne Dios, ni roque ne rgodee ne samiech ne?

¹¹ Bets, bzian, led scada gon. Zig nacse tib zhlian, ¿niacxe zaatne rlanaque nis nex gaque rlan nis yuzed? ¹² Tib yag nex-gaaw, ¿niacxe rquia xnex yag oliv lo yag guigw, yquiaagaa guigw lo lbë uv? Nanle to ganle racd min co.

Zha ne nixbiini

¹³ Lo grë zha ne nacgrë to i, tel no zha ne rzac zha nixbiini nac zho, none glu zhow ine zaacse gbannie zho samiech zho, gac zho tib miech ndooladz zig none gac tib zha nixbiini. ¹⁴ Per tel tibaque në rac zdoo zho ran zho zha ne stib noded, tibaque noguib zho csanwin zho samiech zho; gacnan zho ganle, led scad rac zha nixbiini. Ni lalnu rieguaid tso zho csannziuu zho zho. ¹⁵ Led scad nac guielbiini ne rdeed Dios, sinque lëë zhiwseed mendox ga, lëë min co zienal grëraa miech guidzliu. ¹⁶ Zeene sca në rac zdoo miech ran zho cho stib noded, zeene sca tibaque no zho dien zha guianglaa zho lo samiech zho, loxaque dil, loxaque grë guieintseeb rzobni zho ga. ¹⁷ Zha ne nli rap guielbiini ne rdeed Dios, rund zho min co, laa zho zienal:

ndzinlise gban zho,
rleynied zho dil,
rguib zho zaacse rnee zho lo miech,
wen rac zho lo grëse miech,
rquia zdoo zho samiech zho,
rund zho cue zho zha ne mazdraa gacnie zho,

ncuaane run zho dib zdoo zho run zhow,
niapse ncuane ndzinli rioxco zho.

¹⁸ Zha ne sca rleynied dil, rioxco zho rnee zho lo miech tipse gac zho, tipse gnee zho; scagaa rdziñ dze ne ran zho zeene laa grë miech co rac tib miech wen.

Zha ne rleynie guieintseeb

4 Ne squi tibaque rlëëlsa to, tibaque quiadil to, lëë min qui gon riegat por grë guieintseeb ne rio guic to. ² Rio to riogui to ncuane grielod yquianie to, rlozh ga, haxta rut to samiech to parne yquianie tow. Në rac zdoo to ran to cho zha quianie ncuane quianiede to, zeene ran to rrieelod yquianie tow laa to rlëënie zho, haxta rdilnie to zho. Rrieelod yquianie to ncuane racladz to, sacne rnabde tow lo Dios. ³ Niicle tel rnanbgaa tow lo me, rneedzd mew, sacne laa guic to zienie yquianie tow loxaque par gdeedguxt zdoo to, gdeedguxt xcuerp to.

⁴ ¿Que tal ntseeb to! ¿Pe ib riende to, Dios gon rlëënie to zeene squi rio to rleynie to grë guieintseeb? Sac miech ne squitaa rleynie guieintseeb, lo Dios ga racntseeb zho. ⁵ Golgan ganle, zha rnee lo Xtiedz Dios: “Espiritu Sant, men ne pxeel Dios nacie ne, rleynie me ne, ni racladz me zhaa ncuane gleynie ne laa ne gleynie ne me.”

⁶ Ni tel Dios gon, noxco me ne, ib zanie me ne griee ne lo guieintseeb; sca rnee lo Xtiedz me, zaatne rnee: “Zacnie Dios grë zha ndooladz, sangue grë zha niats, rdzigiend me zho.”

⁷ Golguien sca, ine ndooladz golgac, golgon mine rnabey Dios. Gdeetraa to didz yquiel mendox to, sca golgun zeena zhal ma gbiche ma lo to. ⁸ Dib zdoo to golsëeb xnëz Dios, zeena scagaa me zanie me to. Goltsoxco guiaanmbe to lo grëtaa xtol to, golnab lo me csanmbe me zdoo to, mese gnalo to, gacchopdraa guic to. ⁹ ¿Golguien ganle, ndzinlid i squi mban to! ¿Mban golgac, goltso guielnë, golgoon, laa ne tso to gzhidz to, laa ne tso to gley to! ¹⁰ ¿Ndoooladz golgac lo Dios, zeena cuee me to lo grë ncuane nac to, csanglaa me to!

¹¹ Bets, bzian, ib gneenēde to zha ne nacgrē to. Zha ne mneenē bets zho, bzian zho, beḷ zho, ni rdziibdoḷ zho zho, Xley Dios ga rguuits zho. Laa ne so zho gacladz zho zha guṅ guieḷwxtis, mazd tsoxco zho gban zho zigne rnabey ley. ¹² Goḷguien ganḷe, Dios psanḷ ley, ni mese rieguialḷ guṅ guieḷwxtis, me nanḷ zho cuibdoḷ, chogaa csilaa me; per to nadien, ¿cho nac to par gdziibdoḷ to samiech to?

¹³ Togaa ne nac to zha ne rnee: “Na gzhe widz dienḷ pa tib guiedz ne guioo ne, guibiaaz ne ga tib iz, ga dziuunḷ ne wzī dziuunḷ ne wto, dziuunḷo ne dimi”, goḷquiaadiag mine gne naa lo to ganḷe.

¹⁴ Ne sca rnee to, ḷpe wen wen nanḷ to dienḷ yo to gzhe widz co! ¿Pe ranḷe to lega nacse xquieḷmban ne zigne nac xcow las ne rbe raḷ sil? Zhisaque rbew, zeene rlozh ga rludraa dienḷ yow. ¹⁵ Mazd goḷguiab: “Teḷne zneedz Dios diidz gbanraa ne, minḷ rii, minḷ rii dziuunḷ ne.” ¹⁶ Led tsode tibaque guieḷniats qui zienie guic to, goḷguienḷ guieḷntseeb ga runḷ zha ne rac niats. ¹⁷ Ni goḷsoladza ganḷe: Grēse zha ne nanḷpaa pe nac ncuaaneḷ ndzinli ne no guṅ zho ni runḷ zhow, xtoḷ zho ga runḷctal zho.

Zha ricw ne zienalḷ guieḷntseeb

5 ḷGrē zha ne rapchenḷ, zha ne zienalḷ loxaque guieḷntseeb, goḷquiaadiaga ganḷe! Goḷgoon, goḷquiaadan redz niina, sac goṅ nroob nac guieḷnē ne ganḷ to. ² Grē ncuaaneḷ beenḷo to i, peet nonda, lega naca zig nac grē ncuaaneḷ biodzle; grē xab to i, rriequia ncuaaneḷ dowle mxīla. ³ Grē guiiḷ or, grē guiiḷ plat ne squitaa quianie to, rriequia noloozhle bioochena; ni scadaa goṅ nitlo to, masaque gac to zig tib ncuaaneḷ riab lo gui.

Laa to beenḷo grētaa dimi qui, rzac to lēew yquiin to leṅ dze ne ziaad, ni nanḷe to goṅ laa dze ne nitlo to ziaadyoble. ⁴ Lēē grē dimi qui goṅ zēēb to lo

grē zha ne quia xtsiinḷ to, noquidie to zho rguizhde to xtse zho. Per goḷgacnaṅa ganḷe, grēse redz ne rquiaa zho zeene mban rac zho squi rsacsi to zho, laa Dios binlew. ⁵ Lo grētaa iz ne mban to lo guidzliu rii, loxaque grē ncuaaneḷ gdeed guxt zdoo to, grē ncuaaneḷ gdeed guxt xcuerp to noxco to, ncuaaneḷ yozh ne riabtaa guic to laa to runḷa, ib riēnde to laa dze ne nitlo to ziaadgaxle. ḷLēē to noyūn xcuent ma ne noro par guet ma! ⁶ Pe zhistaa guieḷntseeb ne quaiyūnḷ to, haxta zha ne peet xtoḷd, zha ne nanḷd glis nia lo miech, rquiaqui to zho ncuaaneḷ runḷd zho, rnabey to ret zho.

Nodne guieed zha ne rnalḷo Dios

⁷ Bets, bzian, sanḷgue to goṅ tiblīque goḷgac haxta ganḷ to gdziinḷ dze ne laa Jesús guiaad stib, teḷ petaa runḷ miech to peet tsienied guic to. Goḷgac zig zha ne ran, teḷ zha cow, zeene rlozh rlaalḷ zho bni liu, tiblīque rac zho gdipse leṅ mēē guie, rquiambēz zho haxta rdziinḷ dze ne rlaap zho. ⁸ Tiblīque sca goḷgac. ḷIb guiaand zdoo to, sac goṅ zhile gdziinḷ dze ne laa menḷ ndzon ne rnabey ne guiaad stib!

⁹ Ib tsode to guieednie to grē zha ne nacgrē to, zeena gunctalde to xtoḷ to; sac zhile gdziinḷ dze ne laa menḷ ne no guṅ guieḷwxtis guiaad. ¹⁰ Goḷsoladz ganḷe, grē zha ne biadteed xtiidz Dios padzeela, niicle nroob guieḷnē goṅ zho, per tiblīque goc zho. ¹¹ Zig nac Job, nanḷaxe to ganḷe zha nactaa guieḷnē ne goṅ Job, per ib bieete me, ni blozhse goṅ me guieḷnē co nroobraa guieḷnzaac ne bdeed Dios lo me. Ga rlu ganḷe, zha ne sca rdeed me diidz ranḷ guieḷnē, led lega ranḷd zhow; sac nquialadz me miech, rquia zdoo me zho. Dichos grē zha ne sca nac.

¹² Bets, bzian, zeene tsiegala glu to didzli rnee to, tsode to gzeet to gbaa, gzeetgaa to guidzliu par gliladz miech

xtiidz to; guiab to: “Lëpaa gbaa qui”, “lëpaa guidzliu rii”, dien peragaa gzeet to. Tib diidz ne nliw, golguiab: “Nliw”, tib diidz ne nliwgaaw, golguiab: “Nliw”, zeena guntalde to xtol to; sac gon zha ne runctal xtol, ible zгаа zho guielnë ne csiaab Dios.

¹³Lo grë to, zha ne no pe tib lo guielnëw, gnab zho lo Dios gacnien me zho. Zha ne no pe tib guielbleya, goolnie zho me. ¹⁴Zha ne rzacnëgaaw, gnabey zho gacredz bla zha ne zo lo to, zha co quëëb nceit guic zho gnab zho lo Dios guiac zho. ¹⁵Telne dib zdoos zha co gnab zhow lo Dios, zunguiac Dios zha rzacnë co. Zlische me zho lo xquielguidz zho, ni tel por pe falt ne beengaa zho lo me sca rzacnë zho, zun me zhow perdon.

¹⁶Gacxe waa, tib tib to zeene run to pe tib falt, yqueetsde tow, golzodi-idza lo zha ne nacgrë to, lozhse ga

golnab lo Dios gon me to perdon, zeena guiaanmbe to lo me. Sac tib zha ne biaanwenle nëz lo Dios, zeene sca pe rnab zho lo me run mew, niicle ncuaane mazdraa ngana. ¹⁷Golsoladz Lí ganle, men ne biadteed xtiidz Dios lo miech padzeela, samiechaque new, per dib zdoos me bnalo me Dios. Tib dze bnab me lo Dios csiaabd Dios nisguie, ni scase goca, dipse len tson iz grol ni tib lab nis guie biabd; ¹⁸haxta bnabraa me lo Dios guiaba stib, dzigoraa biaba, laa guidzliu biire bdeed guielnzaac.

¹⁹Bets, bzian, tel cho tib zha ne nacgrë to i sozit lo Xtiidz Dios, ni grieelo cho tib to ctsire zho nëz yozh ne zie zho ga; ²⁰golgacnan ganle, lадzniale guielgut ga rsilaa zho zho, grëse xtol zha co zun Dios zhow perdon.

Santiagw

GUITS NE GLO PQUIAA

PEDR

1 Bets, bzian, j̄diuzh to gr̄ese to!
¹ Naa nac Pedr, tib zha ne rxeel Jesús nonee Xtiidz Ndzon me lo miech. Laa naa rxel̄ tib guits rii ziaad lo to gr̄ese to ne nac to zha Israel, no to stib ladz ben̄: zig nac n̄z Pont, n̄z Galás, n̄z Capadós, n̄z Asia ni n̄z Bitin.

² Dios men̄ ne nac Pxoꝝ ne, ible me booblo to mazd padzeela, sac nan̄le me laa to gac xp̄eed me. Bdzin̄ dze, zeene laa me pxeel̄ Esp̄ritu Sant bleextso to laa to ngab xn̄z me, zeena gban to zigne rnabey me, ni lozh csaꝝmbe Jesús to; sac ible min̄ co nacne bzhiee xchen me. Dios glu gan̄le pa lotaa noxco me to, zeena peet zhgab ctsebde to.

³ Xquizh xquiel̄nzaac Dios, Pxoꝝ Jesús men̄ ndzon ne rnabey ne, sac gon̄ pquia zdoo me ne ptsëe me lo xquiel̄mban ne, rriequia gol ne stib. Xquizh me blee-ban me Jesús, sac gon̄ ga rlu ib zgaa ne guiel̄nzaac nroob ne no diidz gneedz me lo ne, ⁴ guiel̄nzaac cosí ncuaaꝝne mbe naca, nacda ncuaaꝝne nitlo, nacda ncuaaꝝne gdzëelo, ni gbaa ga quianie mew.

⁵ Ne squi dib zdoo to rnalo to me niina, gane quianap me to con gr̄etaa poder ne rap me, parne ygaa to guiel̄nzaac co. Zeene laa dze co gdzin̄, zan̄lo to gan̄le zeene laa me ycaania to.

⁶ Gacxe waa ine nley golgac. Nli zan̄ to gr̄e pe guiel̄në, per ncuaaꝝne tib rded ga. ⁷ Ib none gan̄ to gr̄e guiel̄në, parne ga glu dien̄ pe nli dib zdoo to rnalo to Dios. Zig nac guuib or, parne glu dien̄ pe nli ora, none teda lo gui; scaquegaa to, none gan̄ to guiel̄në parne glu to nli dib zdoo to rnalo to Dios; ni zig nac or, ncuaaꝝne rnitlo ga. Gr̄ese zha ne tibaque gnalo me, niicle mazdraa guiel̄në ne gan̄

zho, gal̄ dze ne guiaad Jesús stib, ine zunnon Jesús zho, sanglaa me zho, zley me gan̄ me zho, sac blu zho nli dib zdoo zho rnalo zho me. ⁸ Me i squitaa rleynie to, me i squitaa rnalo to, niicle ne gon̄de to me, niicle ne ran̄de to me. Tib guiel̄b-ley nrooba lo to, tib guiel̄bley ndzona, nacda ncuaaꝝne grieelo gnee to zha naca; ⁹ sac gon̄, ne squi dib zdoo to rnalo to me, ib scaania me to.

¹⁰ Gr̄e zha ne biadteed Xtiidz Dios lo miech padzeela, bzeet zho laa Dios glu gan̄le pa lotaa noxco me ne, laa me csilaa ne lo dol̄; per ib biend̄ zho dien̄ zhapaa gun̄ me. ¹¹ Zeene bdeed zhiEsp̄ritu Jesús guiel̄biini lo zho bzeet zho ne ib laa Dios cxeel̄ me, pe nac guiel̄në ne ted me, ni pe nac guiel̄ndzon ne guiaadnie me; go-cladz zho niacnan̄ zho dien̄ cho nac men̄ co, pa hor gac min̄ co. ¹² Nacne blu Dios lo zho gocnan̄ zho nacda ncuaaꝝne gac len̄ dze co, sinque haxta nele ygaa dziana. Sanguie niina, nan̄wen to gan̄le laa gr̄e min̄ co gocle, lëe diidz cub co i gocnan̄ to niina, gbaa biet Esp̄ritu Sant bdeed me guiel̄biini lo zha ne biadneew lo to. j̄Ncuaaꝝne ndzona, haxta gr̄e an̄j̄l racladz tebaa zha gacnan̄raa zho dien̄ zha naca!

None gban ne zigne racladz Dios

¹³ Gol̄quix biini xquiel̄rien to sca. Tiblique gol̄gun̄ guic to ne laa to ygaa gr̄etaa min̄e ral zdoo Dios gneedz me lo to, zeene laa Jesús guiaad stib. ¹⁴ Zig gr̄e mëed ne ron xtiidz pxoꝝ, sca nguzobdiidz gol̄gac lo Dios; gundraa to gr̄e ncuaaꝝn̄ ndzinlid ne been̄ to zeene gard gunbey to me ga. ¹⁵ Goltsoxco gol̄ban zigne racladz me, zeena ine mbe guiaan̄ to lo dol̄; sac gon̄ tel̄ me, men̄ mbe nac me, nacd me men̄ ne rdziguien dol̄. ¹⁶ Zigne zhobneeque lo Xtiidz me, za-atne rnee: “None guiaan̄mbe to lo dol̄, sac gon̄ men̄ mbe nac naa.” ¹⁷ Pxoꝝ to nac me, me rnalo to, nan̄le to zeene laa me gun̄ guiel̄wxtis, led yed me cue; min̄e

been tib tib miech, zunquish me zhow. Golguien sca, golgon xtiidz me gzataa dze ne gbanse to lo guidzliu rii.

¹⁸ Golsoladz me blee to lo grë wseed ndzinlid ne psan grë xmengol to; nanwen to gozh briece to ga; per pquiind me ncuane rnitlo zig nac pe dimi or, pe dimi plat; ¹⁹ sinque laa me pquiin xchen ndzon Jesús. Ren ne bzhiee goc zig tib gon, zigne rgogon miech carner yeen ne mazdraa niow, carner yeen ne mazdraa ndaan parne guiaanwen zho lo Dios. ²⁰ Padzeelale, haxta zeene gard cue guidzliu bzo Dios me gac me gon co, ni nligaa zeene laa dze co bdzin laa me bjaad, biadsanwen me to lo Dios; laa Dios been min co sacne rleynie me to. ²¹ Gacxe waa, zrieelo dib zdoo to gnalo to Dios, mese none gliladz to. Me nac men ne bleeban Jesús, blu me ne men non nac Jesús.

²² Ni niina ne laa to mban zigne nac Xtiidz Dios, mine nac diidzli, laa zdoo to bjaanmele lo dol; nasi zrieelo gleynie to zha ne nacgrë to. Dib zdoo to sca golleynie zho, ²³ golguien ganle, tib guielmban cuble rap to niina, rriequia gol to stib; per nacdraaw zigne gol to glo, sinque lëe guielmban qui bgaa to zeene bliladz to Xtiidz Dios, diidz ne rneedz guielmban, diidz ne gdzind dze nitlo. ²⁴ Zigne zhobneeque low, zaatne rnee: Grëse ne nac ne miech, zdzin dze ne lozh ne,

lega nase ne zig nac grë guizhye, grë xquielndaan ne, lega nacsew zig nac guieen guizh co.

Sac tel guizhyew, zeene laaw rbidz, laa guieena rliaa laque;

²⁵ sangue Xtiidz Dios, gdzind dze ne nitlow.

Ni lëe diidz co ga gon biadseed zho to, lëew rlu zha laa miech lo grë xtol zho.

2 Nana sca: gundraa to grë guielntseeb,

yquidiedraa to samiech to, gundraa to ne laglaase glu to guielwen, gacnëd zdoo to gan to cho zha stib noded,

gzhixcuaadraa to diidzguizh.

² Sinque Xtiidz Dios goltsoxco, zeena lozh tsotibli guic to dziits so to low. Zig rzac mëdyeen ne wriin ral, nidzpaar dziladz win guie win; scadaa golsac Xtiidz me, zeena ygaade to grë guielndox ne csiaab me. ³ Laa to gonle ganle zha wentaa zdoo me, Xtiidz me sca goltsoxco.

Jesús nac zig tib quie mban

⁴ Golbig lo Jesús, golgan ganle lëe me nac zig tib quie ne rio squin yu, per tib quie mban. Ib bleynied miech me, sangue Dios, men non, men nziuu nac me lo me. ⁵ Golbig lo me sca, zeena ye to gac quie mban ne tsaa xyadoo me. To gac grë pxoz ne nlipaa mbe zdoo, gun to dziin len yadoo co; golban zigne rdziladz Dios, zeena guielmban co gac zig tib gon ne gdeed to lo me, ne nac to zha ne ngab lo Jesús. ⁶ Zigne zhobneeque lo Xtiidz Dios, zaatne znu rnee:

Men ne bzo naa cxel naa Jerusalén, me gac zig tib quie nroob ne gnaaz dziits xyadoo naa, ni lëe yadoo co nac grë zha ne ngab lo naa.

Men non nac me, ni grëse zha ne gnalo me, ible csaand naa zho.

⁷ Ne nligaa tib men non nac me lo ne, sangue grë zha ne riladzd me cholze miech rzoob zho me; zigne zhobneeque lo Xtiidz Dios, zaatne rnee:

Quie ne sca bron zho tib lad zeene quiazaa zho yu,

laaw bron zho sac rzac zho paat rquiinda,

ni niina lëepaaw nac quie ne nlibdziits xcoc yu.

⁸ Ni ziaad stib zaatne znu rnee:

Quie co griel ni miech, quie co gon zho.

Grëse zha ne nêd gliladz Xtiidz me zatne rnee cho nac me, scapaa sac zho me, ni ib zhubneele ne min co yгаа zho.

⁹Sangue to, lo Diosle ngab to, me ble to, zigne rnee lo Xtiidz me: tole nac zhipxoz me, tole nac zha non ne quaiyun xtsiin me; miech ne mbele lo dol nac to lo me, mele rnabey to sac me bredz to laa to brieel lo guielcow bzëeb to lo xbiini ndzon me; zeena gnee to lo miech ganle zha nactaa grë ncuaañe run me. ¹⁰Glo peet nonde to, sangue niina non to sac gon lo me ngab to; glo nande to pa lotaa rquia zdoo me to, sangue niina rley to ran to ganle squitaa rquia zdoo me to.

Tibaque golgun mine racladz Dios

¹¹Bets, bzian, rleyne naa to. Ndion ne ganle, nacse xquielmban ne lo guidzliu rii zig zha ne tibrded stib ladz ben; gane rso naa diidz lo to, ib gzoobladzde to gun to grë ncuaañe ndzinlid ne racladz xcuerp to; sac min co rsacsi xalm miech. ¹²Golguien zaacse golgac lo grëraa zha ne gard gunbey Dios; niicle ne gneenë zho to niina, sac zho to zig cho grë zha ntseeb, per zeene gan zho ne ndzinli nac grë ncuaañe run to, haxta zleyne zho Dios gal dze ne laa Jesús guiaadgun guielwxtis.

¹³Golgon xtiidz grëse men ne nac wxtis lo guidzliu rii, sac sca rdziladz Dios: zigtaa presidenta, ne nac me zha nonraa, ¹⁴zigtagaa grë zha ne nacie me dziina, sac zha run guielwxtis, rdeed zho caxtigw ne rieguial grë zha ntseeb, ni scagaa runnon zho grë miech ne run ncuaañe rquiin. ¹⁵Ible laa Dios racladz zaacse gac to, zeena grë zha nxen, grë zha yozh ne rienp pe rnee, haxta ni ro zho tsod pe gneenë zho to.

¹⁶Gollu ne peet lo ngadoodraa to, per guiabde to ne peet lo ngadoodraa to laa to gun grë ncuaañe ndzinlid ne gacladztaa to. Led scada gon, mine racladz Dios

min co golgun, gollu mele rnabey to niina.

¹⁷Zaacse golgac lo grë samiech to, golguien cho lo zo to. Golleyne grë zha ne nacgrë to, ndooladz golgac lo Dios, golguien ne men ro nac me; ni scagaa golgon xtiidz grë zha ne nac wxtis nroob.

¹⁸Bets, bzian, to ne nac to zha ne quia xtsiin ben, golgon mine rnabey men ne rree to; tel zhataa nac zho, zigtaa men wena, zigtagaa men ne ntseeba. ¹⁹¡Nley golgac, goldeed xquizh lo Dios, tel porne noyun to mine rnabey me, laa zho rsacsi to! ²⁰Sac gon, telne nosacsi zho to por xquielntseeb to, niicle paraa cxcw to paat yquiinda; sangue tel rxcw to nosacsi miech to porne noyun to ncuaañe rdziladz Dios, dzigosi zleyne me to. ²¹Golgacan ganle, ible none ted to min co ne nac to zha ne ngab lo Dios; sac gon, niicxe Jesús, blactaa guielnë ne bded me bdiizh me xtol ne. Glo me sca bded, nana negaa ible none sca dieed ne. ²²Tel me ni tib dol beenp me, ni tib miech pquidied me. ²³Niicle zeene blooredz zho lo me, ible ptsired me lo diidz co; niicle zeene quiasacsile zho me, ib gocntseebd me lo zho; sinque grësew psan me ladznia Dios, men co gun guielwxtis zigne no gaca.

²⁴Masaque Jesús bgaadz grëse xtol ne, blactaa psacsi zho me pquia me lo cruz bdiizh mew; laa me been min co, zeena grieelo griee ne ladznia dol, gban ne zigne rdziladz Dios. Ne scataa psacsi zho xcuerp me, ga bi me grëse xquielnë ne. ²⁵Glo lega nac to zig nac grë mëcwxiiil ne zonziaab, sangue niina mele quianap to. Me nac tib baxtor ne rleyneppaa to.

Zha gban zha ne ptsieelniale

3¹⁻²Bzian, to ne nac to men wnaa ne ptsieelniale, golgon xtiidz tsiel to. Niicle tel nêd zho gliladz zho Xtiidz Dios, per zeene gan zho ne nligaa ndooladz nac to, ine ndzinli rac to, haxta zhal zho

laa zho yquiabladz gliladz zhow. Yqui-indraa ne goon chopaa yquia gneew lo zho. ³Golguien sca, tsoode to ne goon dien pa xixcuaraa to par glunio w to lo miech; dieen pa xixcuaraa guitsguic to, dieen pe bguiaa or ne yquia diag to, dieen pe grë guuib or tso yan to, tso nia to, dieen pe lar niazh ne gacwraa to. Tsienalde to grë guielniow co, sac gon ncuuan laglaase ga; ⁴sinque none xixcuua zdoo to, gac to tib zha tibliladz, tib zha ne ndooladz. Lëë guielniow co nac minë niowraa nëz lo Dios, ni min co gdzind dze nitlo. ⁵Lëë guielniow co bioxco grë men wnaa ne biaadban padzeela, zha ne brieë lo dol wban zho zigne racladz Dios; tel zha, dib zdoo zho bnalo zho Dios, ni bin zho xtiidz tsiel zho. ⁶Zig nac Sar, sca goc me, bin me xtiidz tsiel me Abraham, haxta rëb me masaque Abraham nac men ne rnabey me. Ni sca-gaa to, telne tsoxco to xixcuua to, zac to zig goc Sar, dzigosi laa to gac zig xpëëd me; haxta ni tsoxtseebde to pe glisqui tsiel to lo to.

⁷Scaquegaa to bets, ne nac to zha ne ptsieelniale, goltsocxo tsoguc to zha nac tsiel to. Golgan me zigne nonguiela gan to me, golguien ganle nda men wnaa; ni lala, non me lo Dios, sac gon ye me ygaa guielmban ne psan Dios diidz gneedz me lo to. Sca golban, zeena scagaa zeene gnab to lo Dios, squiaadiag me xtiidz to.

⁸Nana sca, tipse golgac grë to. Ine niowse golleynie zha ne nacgrë to, miech wen, miech ndooladz golgac. ⁹Zha ne gacntseeb lo to, gunde to ne yeque to gacntseeb lo zho; zha ne coredzgaa lo to, gunde to ne yeque to coredz lo zho; sinque mazd golnab lo Dios gunlay me zho, zeena scagaa to, zunlay me to; sac gon, ible min co bredz me to. ¹⁰Zigne zhubneeque lo Xtiidz me, zaatne rnee:

Zha ne racladz ine gley zho ne laa zho mban, wen ted zho len ngbidz ne gban zho,

none tsoxco zho ycuëëz zho ro zho, gneenëdraa zho, yquidiedraa zho;

¹¹none csaan zho grëtaa guielntseeb, niapse ncuuan wen tsoxco zho gun zho,

yguib zho cewen miech, niicle zhagaa wen gac zho lo grëse miech.

¹²Sac grë zha ne sca wen rac nëz lo Dios, tibaque quianap me zho, ni rquiaadiag me xtiidz zho tel pe rnab zho lo me;

sangue grë zha ntseeb, ni lalnu rdzigu-iend me ncuane run zho.

Dichos zha ne mban rded lo samiech

¹³Golguien sca, ncuane yquini golgun; scagaa tsod pe nacne ctsidil miech to. ¹⁴Laa telne ncuane yquiinaquegaa noyun to, ni laa miech rtsidil to, idichos to ga! Ib gdziebde to grë miech guidzliu, niicle peraa gnë zho gun zho to. ¹⁵Tibliladz golgac, tibaque golgunnon Jesús men nroob ne rnabey ne, tibaque golconie Xtiidz Dios guic to, zeena nanle to pe guiab to lo zha ne gnabdiidz dien zha nacne rnalo to Jesús; ine niowse golgac, diidz ndooladz golnee lo zho.

¹⁶Zaacse sca golban, zeena grë zha ne rneenë to porne nac to zha ne no xnëz Jesús, dzin tib dze ne ctoladz zho, zeene guien zho lega bnexuu zho to. ¹⁷Wen zie zha ne ran guielnë, telne Dios rnabey gan zhow zeene noyun zho ncuuan wen; lëdle gan zhow por xquielntseeb zho.

¹⁸Golgan ganle niicxe Jesús, zha nactaa grë guielnë ne gon me. Niicle ne ni tib dol beend me, per haxta beet miech me bdiizh me grëse xtol ne nac ne miech ntseeb, psanwen me ne lo Dios. Nli gut xcuerp me, per zhiespirtu me gutew; ¹⁹gane güeyted me zaatne niogyu zhiespirtu grë zha ne wban padzeela, güeynee me lo zho. ²⁰Lëë grë zha co ib bzhiguield niladz Xtiidz Dios, niicle ne dipse len dze ne nozaa Noë

barcw nroob co pquiambëz Dios niacwen zho. Nanlaxe to ganle, xonaque nac zha ne bdedlaa lo nis co. ²¹ (Lega rriequia goc nis co zig nis ne rrobnis ne. Zeene rrobnis ne, ga rlu ne laa ne briele ladznia dol, ygaadraa ne guieinë-dox ne tsieguial zha ngoopdol, sac gon por mincopaa gut Jesús ni brieaban me; ni guiabd ne togo nis co rsanmbe ne lo xtol ne, sinque ga rxobnen ne ne laa ne rnab lo Dios ctsëë me lo xquielmban ne.) ²² Sangue niina gbaa ga no Jesús, ga zob me cue Dios nëz derech, grëse anjl non, grëse zha non ne no gbaa, rquitsgzhib zho lo me ni run zho miñe rnabey me zho.

4 Golguien ganle, zha nactaa grë guieinë ne bded Jesús bdiizh me xtol ne; nana sca, scaque to gdziebde to golcueladz to gan to guieinë. Ib rquii guieinë, sac zha ne no tib lo guieinë, rioguid zho grë ncuaañe gunctal xtol zho, ² zëëb rguib zho gban zho zigne racladz Dios. ³ Grëtaa ncuaañe ndzinlid ne run grëraa miech, golguiaanladza. Golguiaanladz zeene scataa ptsieelsa to zho, bzudz to, lega dowcho, lega gocho to nziu, haxta bionie to zha ne nacd tsiel to; bio to lo grë lni, bleynie to grë mdio.

⁴ Grë zha co, rien naa rlëë zho ran zho rtsieelsadraa to zho lo grë ncuaañe ndzinlid co, gane haxta rneenë zho to. ⁵ Per golsaan zho, benque zha quizha zeene gacredz zho lo men ne guiaadgun guielwxtis, gal dze ne gdeed me miñe tsieguial tib tib miech, zigtaa zha mbana, zigtagaa zha ne gutlew. ⁶ Sac niicle zha ne gutlew, no zho gocnappaa zho zha nac Xtiidz Dios zeene bzomban zho. Ible rquiiñpaa Xtiidz me, sac zha ne rquiaadiaga, niicle ne zetaque zho, per nëz lo Dios mban zhiespíritu zho.

Golgacnie zha ne nacgrë to

⁷ Zhile gdziñ gdze ne laa grë ncuaañe rac lo guidzliu rii nitlo; golquix biini zacse golban, tibaque golzodiidznie Dios. ⁸ Ine golleynie grë zha ne nacgrë to, sac zeene nlipaa rleynie ne samiech ne, tel pe falt ne guntaa zho zrieelo cteed new zdoo ne. ⁹ Zha ne guiaad lidz to, goldeed zaatne cuëz zho; ine golcuëzlo zho, guieedniede to zho.

¹⁰ Tib tib to bneedzse Dios tib guielbiini lo to. ¡Golquiina sca, golgunlsa xyudar zha ne nacgrë to! Ib ga rquii guielbiini co bneedz mew lo to.

¹¹ Zha ne rseed miech Xtiidz Dios, none gnee zhow zigne racladz me. Zha ne rungaa pe stib xtsiin Dios, ib yquiad zdoo zho none gun zhow dib nacse guielndaan ne rdeed Dios lo zho. Ncuaañe guntaa to, goltsienie guic to ne laaw gun to par csannon to lë Dios. Ga glu ne xtsiin Jesús quiayun to, men ndzon ne rnabey, men ne gdzind dze gdzëë. Sca rieguiala.

¹² Bets, bzian, ne nligaa rleynie naa to. Golsoladz sca, tel pe guieinëtaa gan to porne no to xnëz Jesús, peet tsienied guic to, sac ib scale no gaca. ¹³ Mazd ine golley; sac gon ye Jesús sca gon guieinë, ni scagaa nroob guielbley ne tso to gal dze ne glu ganle zha nactaa guieindzon ne rap me. ¹⁴ Zeene rgodee miech to, rquiaago zho to loxaque ne no to xnëz Jesús, nley golgac; wen zie to ga, sac gon zhiEspíritu Dios nacnie to.

¹⁵ Guieitow sca csacsi miech to, telne bgaa to laa to beet, laa to wban, laa to bzëëb lo cuent ne rieguialdraa to, pe stib guieintseeb ne noyunragaa to. ¹⁶ Sangue telne rsacsi zho to loxaque ne no to xnëz Jesús, led guieitod ga. Laa ne ctoladz to, ¡goldeed xquizh lo Dios, sac gon tib guieinzaac nroob bgaa to ngab to lo me! ¹⁷ Golgacnan ganle, grëse ne ne nac ne zha ne ngab lo Dios, len dze rii laa ne

csilo dzian guielnë. Nana, telne ye zha ne ngab lo me ted guielnë, ¿zha naczhe mine ted grëraa zha ne nëd gliladz Xtiidz me, gal dze ne laa me gun guielwxtis? ¹⁸ Zigne zhubneeque lo Xtiidz me, zaatne rnee: “Niicle zha ne wenle nëz lo Dios, nroobaque nac guielnë ne ran zho haxta gdziñ dze ne ycaania me zho, ¿pe lelgue grë zha ne dzigo racntseeb lo me?” ¹⁹ Gacxe nagon waa, niicle tel pe nactaa guielnë ne gnabey Dios ted to, tibaque golban zigne rnabey me, golsan xquielmban to ladznia me; sac gon me nac men ne rneedz xquielmban to, ni mesi ib csaand me to.

Golgon xtiidz zha ne rnabey lo to

5 Laa niina nagon, laa naa cso choplan diidz lo to, ne nac to zha ne rnabey lo grë zha ne no xnëz Jesús. Ye naa, dziin co nac naa, naa nac tib zha ne gonpaa zha psacsi zho Jesús, ni nannpaa naa zгаа naa lo guielndzon ne no me, zaatne rnabey me, gal dze ne laa me guiaad.

² Rso naa diidz lo to gon, zaacse golquianap grë zha ne bgaa to no-quianap to. Dib zdoo to golgun dziin qui, sac sca racladz Dios, ib tsienied guic to guiab to dien zha lega cob to dimi lo zho. ³ Gunde to ne gnabey to zho zig cho xmoz to, sinque zaacse gologac lo zho, zeena lo to cseed zho zaacse gban zho. ⁴ Scagaa, zeene laa men nroob ne quianap ne guiaad, zгаа to lo guielndzon ne gneedz me, lugar co gac tib premio ne gdziñd dze lozh lo to.

⁵ To ne nac to zha nguieg, golgon xtiidz grë zha ne zo rnabey lo to. Tib tib to, golgon xtiidz zha ne nacgrë to, sac gon: “Grë zha niats, rdziguiend Dios zho, sangue grë zha ndooladz, racnien me zho.” ⁶ Telne guiaanwin to lo men ro ne

nac Dios, ine ndooladz gac to lo me, scagaa me zunnon me to zeene laa dze co gdziñ. ⁷ Tel pe nactaa grë zhizhgab to, grë xliaadz to, ladznia me golsana, sac gon me quianap to, noxco me to.

⁸ iNsin golso lo mendox, sac gon tibaque quianañ ma gnitlo ma ne! Masaque rac ma zig rac grë meedz ne rgobeedz quiaguib ma ne gow. ⁹ Dziits golso gdeete to diidz yquuil ma to. Tibaque dib zdoo to golnalo Dios. Nanle to ganle dipse lo guidzliu, zha ne notaa xnëz me, scaque quiaaded zho. ¹⁰ Tel pe nactaa guielnë ne noyan to, ible csaand Dios to sacne rleyniedox me to, zeene laa dze co gza, hor co laa me gzhixcuaaraa lo xquielmban to, gzodziits me to, guntibli me guic to. Me nac men ne bredz ne ygaa ne lo guielndzon ne no me grop me Jesús, guielndzon ne gdziñd dze nitlo. ¹¹ Mese nac men ne rnabey grëtaa ncuaane no, ni gdziñd dze ne gdzëë me. Nligaa sca nac me.

¹² Laa naa rxel guits rii lo bets ne Silas, ziaadnie mew lo to, bets ne rne naa me, sac nligaa dib zdoo me rleynie me Dios. Mine rne naa lo to lo guits rii, laaw rne naa sac racladz naa guien to ganle pa lotaa noxco Dios to, pa lotaa rleynie me to; zeena tiblque gac to gbichede to lo me.

¹³ Grëse zha ne rililadz Jesús Babiloin nu, zha ne bzooblo Dios gac xpëed me zigne bzoobloque me to, laa zho rxeel bdiuzh lo to; scaque Marcw, men ne rzaac naa nu zig tib xpëed naa, ye me laa me rquiaabdiuzh to. ¹⁴ Laa naa rnab lo to, golquiaabdiuzh grëse zha ne nacgrë to, ine golxen nia zho.

Dios gacnien to peet zhgab ctsebde to, nac to zha ne no xnëz Jesús.

Pedr

BROP GUITS NE PQUIAA

PEDR

1 Bets, bzian, ¡diuzh to grëse to!
¹Naa nac Simón Pedr, tib ngundziin win ne pxeel Jesús nonee Xtiidz Ndzon me lo miech. Laa naa rquia guits rii rxeel naa lo to, ne nac to zha ne squitaa ndzonse dib zdoo rnalomeñ nroob ne zob gbaa, zigne rnaloque no me. Xquizh Jesús meñ ne rsilaa miech, meñ ne nac Dios ne riladz ne, sac gon me gocnien to squi rnalomeñ niina; sac mesi mine nonguiel gac, min co run me.

²Zigse zie dze, goltsoxco lozh gunbey to zha nac Dios, zha nac Jesús meñ ne rnabey ne, zeena scagaa zig zie dze zunlayraa me to, zacnienraa me to, parne peet zhgab ctsebdet. ³Sac zeene gunbey to zha nacraa me, con grëtaa poder ne rap me, zneedz me guielbiini lo to parne tibaque gban to zigne racladz me, tibaque gleynie to me. ¡Gotsaa gwi ne ganle zha nactaa ncuaañe ro, ncuaañe gzee zdoo ne been me parne gbig ne lo me! ⁴Ni psan me diidz pe nac grë ncuaañe ndzon ne gneedz me lo ne. Psan me diidz, ib laa me cuee ne lo grëtaa guielyozh ne rac lo guidzliu rii, parne gac ne tib miech mbe zigne nac me.

⁵⁻⁷Nli laa to rnalole Dios, per parne ygaa to min co, none tsoxco to: zaacse golban, goltsoxco guien to zha nac Dios, golseed gnabey to xcuerp to, guieete to, tibaque goltsoxco golgun mine racladz Dios, ine niowse golbannie grë zha ne nacgrë to, golsac zho zig tib menlidz to; golleynie samiech to.

⁸Nana, telne tsoxco to znu gban to, dzigosi mazdraa tsoguic to mine racladz

Dios, dzigosi zlu run to mine rnabey Jesús meñ ndzon ne rnabey ne, led lox- aque runbeydse to me. ⁹Sac zha ne tsox- coda, rrieequia rchool lo zho ga, rriee- quia rcowle guic zho ga, sac gon rso- ladzd zho zha nactaa lo grë dol ne blec Dios zho.

¹⁰Bets, bzian, golguien sca, niina ne laa Dios bzooble to, laa me bredzle to ngab to lo me, goltsoxco sca golban, parne guiabde to lo dol stib. ¹¹Niicle par gdzingaa to zaatne rnabey Jesús, meñ ne psilaa ne lo dol, meñ ne rnabey ne, tso- d pe yca lo to, ine nzhial nëz zaatne ted to gdzin to ga.

¹²Nli nanle to grë mine rne naa nu, nli dziitsle zo to lo Xtiidz Dios, per ib none guncsoladz naa tow. ¹³⁻¹⁴Laa Jesús meñ ndzon ne rnabey ne, blule lo naa zhile gdzin dze ne laa naa gbi lo guidzliu rii, gane niina laga bii mban naa rgobey naa ible nonguiela znu cso naa diidz lo to; ¹⁵zeena niicle wBILE naa lo guidzliuw, tibaque csoladz tow.

Gonpaa Pedr Jesús

¹⁶Grëse mine bnee no lo to zeene pseed no to zha nactaa poder ne rap Jesús, ni zha guiaad me stib, guiabde to togo bod guicse no biaba. Led scada gon, tel naa grop lo naa gon naa xquielndzon me ¹⁷⁻¹⁸guic gui ne scataa pxobnen Dios ne meñ non, meñ ro nac me. Binpaa naa zëeb tsi Dios gbaa hor co, në me: "Lëë Xpëed naa i gon, rleynie naa me, nziuu me lo naa."

¹⁹Ga nagon rlu ne diidzli nac grë mine bzeet grë zha ne biadteed Xtiidz Dios lo miech padzeela; gacxe waa, zig nac to ible nonguiel guien to zha naca. Masaque lëew quiazini lo to niina, zig rziini tib biini guieel, haxta riini liu zeene laa Mel Ngol rlan; ni lëë Mel Ngol co nac Jesús. ²⁰Per scagaa, racladz naa gacnan to ganle, grielod ne lega tel zha guiaabtaa guic miech, guiab zho sca nac

mine bzeet zha ne biadteed Xtiidz Dios, ²¹ sac gon tel zha co, bneed zho ncuaañe biaabtaa guic zho; sinque laa zho bnee mine bnabey Dios psiaab Espiritu Sant guic zho.

Zha ne rquidie

(Judaz 4-13)

2 Grè zha ne biadteed Xtiidz Dios padzeela, mine bnabey me zho min co bnee zho; per brieequiaque zha ne pquidie rëb zho Dios pxeel zho, ni nlida. Ni scaquegaa niina, grè zha ne rseed to, zriequia zha ne yquidie lad co. Dzega dzega csilo zho glu zho grè zhiwseed yozh zho, ib gunbeydraa zho men ndzon ne rnabey ne, men ne psilaa zho lo xtol zho; per nand zho zha nactaa guielndox ne yгаа zho, tibaque zeene guien zho laa zho nole lo caxtigw co.

²Ndal miech ne griequia tsienal grè ncuaañ yozh ne gun zho, niapse por zha laa grëraa miech csilo gneenë Xtiidz Dios. ³Zha yozha, laa zho tsienal loxaque dien zha gunlo zho dimi, zguib zho yquidie zho to gdeed to dimi lo zho. Per ib tedsod zguizh zho min co, sac bzeetle Dios ganle zha nactaa lo guielndox ne yгаа zho; ⁴sac Diossi gon, mine run grè zha ntseeb, csand mew scase. Golgan ganle, niicxe grè anjl ne sca been falt lo me, gondzed me zho, bleegazh me zho gbaa, bnabey me bioogyu zho tib lo ncowdoo, ga nioogyu zho nieeda gal dze ne laa me gunquizh zho mine been zho. ⁵Padzeela zeene wban Noé, grè miech ntseeb ne bnëd nion xtiidz me niicle ne bneepaa Noé lo zho, scaque gondzed me zho, psiaab me tib guiedox bnitlo zho grëse zho; loxaque Noé ni zgadz menlidz Noé psilaa me lo nis co; sac wban Noé zigne racladz me. ⁶Scaque len dze ne wban Lot, bdziguiend me grè miech yozh ne bio guiedz Sodom ni guiedz Gomorr, blaal me gui grop guiedz co, bnitlo me zho grëse zho,

xquidiese biaan. Laa me been min co, zeena ga gan grëraa zha ntseeb ganle pe nac mine tsieguial zho telne csaand zho xquielntseeb zho. ⁷⁻⁸Lotse psilaa me, sac bioxco Lot mine rnabey me. Gapaa no Lot, ranpaa me zha run grè miech co; haxta mban rac zdoo me, ran me gzataa dze loxaque grè guielyozh noyun zho. ⁹Gase na ganle rlu ib rsaand Dios zha ne rnalopaa me, rsaand me guiab zho lo dol; ni scagaa grè zha ne rsaand guielntseeb, ib tedsod zho lo guielndox ne teed me zho gal dze ne laa me gun guielwxtis.

¹⁰iZig nac zha ne guiaadquidie to ga, mincopaa yгаа zho! Ni lalnu gandzed Dios zho; sac gon, laa zho zienal loxaque grè guielyozh ne gdeed guxt xcuerp zho. Miech nad, miech niats nac zho, rzhidznie zho mine rnabey Dios, ni lalnu dzeb guien lo zho rdzibdee zho grè men non ne no gbaa. ¹¹Per ni grè anjl, niicle ne zha nroob nac anjl, niicle ne rap anjl poder, per rdzind anjl lo Dios gdzibdee anjl zho. ¹²Per zha, lo xquielyozh zho ga, haxta ncuaañe rien zho zha nac, rdzibdee zho. Lëëdaa grè ma nac zho, tel ma laa ma ralse par yгаа ma nitlo ma; guienndraa xquielrien zho, ncuaañe racladztaa zho run zho. Per zdziñ dze ne nitlo zho, zigne rnitlodaque grè ma, ¹³por grëtaa guielntseeb, grëtaa guielyozh ne squitaa rley zho run zho haxta zobna ngbidz.

Miech mbixladza, miech ngubeeguieltow, rquiaalose zho miech wen nac zho zeene riaadsobnie zho to lo zhilni to. ¹⁴Wnaa ne gantaa zho, pe na gzoobladz zho tsonie zho wnaa co, tibaque quiayunctal zho xtol zho. Rio zho rquiil zho grè zha ne gard sodzits lo Xtiidz Dios; rienle zho zha gla zho ncuaañe rquiin lo zho. Miech ndzibdeele nac zho, ¹⁵sac laa zho psaanle xnëz Dios, nëz ne nitlole zho no zho; lëë zho run xcuent Balam, xpëed men ne lë Beor. Tel Balam, haxta mine nonguiel-

draa been me par gun me gan dimi; ¹⁶per bdzin tib dze zeene laa Dios blisqui lo me grëtaa ncuane quiayun me ga. (Bnabey Dios lëëque xpurr Balam bnee, dzigora a bien Balam psaan me xquieyozh me ga.)

¹⁷Masaque nac zho zig nac grë bzie ne bidzle nis, zig nacgaa xcow bidz ne nëzrii nëzrec zienie me; ni lalnu paat rquiind zho. ¡Laa zho nole guey zho lo guieycowdoo ne rieguial zho, zaatne gdzindraa dze grieë zho!

¹⁸Niats rzë xtiidz zho, per ncuane paat rquiind rnee zho. Miñe mazdraa mban run zho, rio zho lëëque lo grë guieyozh ne rdeed guxt xcuerp zho rquiil zho grë zha ne pense brieë lo dol, rlozh ga rbiire riab zha co lo grë dol co stib. ¹⁹Rnee zho zac tel zhataa gban ne, nodne gnabey xley Dios ne. Rzac zho na choot rnabeyd zho, ni riend zho dol quianabey lo zho; sac grëse zha ne gacdraa csaan tel pe grë guieyozh ne run zho, lëële grë ncuane co rnabey lo zho. ²⁰Tib zha ne sca brieële lo grëtaa ncuane ndzinlid ne no lo guidzliu rii (porne bliladz zho Jesús, men ndzon ne rnabey, men ne rsilaa miech lo dol), ni gbiireque zho gdeed zho diidz guiab zho low gnabeya zho, mban gon tsie zho; sac dzigole mazdraa mban guiaan zho. ²¹Lëda ga gon, telne gocnanle zho zha racladz Dios gban zho, ni lozh ga csañ zho xtiidz me tib lad, gbiire zho tso zho lo grë ncuane yozh ne been zho glo. Nroobdox caxtigw ne gan zha co, mazd zhi miñe ygaa zha ne gocnand zha nac xtiidz me. ²²Zha copaa nagon run miñe rnee diidz ne znu rëb: “Nandraaque mëcw, ncuane bdzible ma rbiire ma row maw”; ni stib miñe znu rnee: “Ngut-szhe, rlozhle raz ma nis mbe, ni rlozh ga riegaaque ma lo nis ben.”

¿Zha nacne gard guiaad Jesús?

3 Bets, bzian, golgan ganle lëële guits rii raca chop xixel naa. Gropse low, rso naa diidz lo to tsoxco to zaacse gban to, ine niini gac guic to. ²Golsoladz ganle, zha nac grëse miñe bnee grë zha ne biadteed xtiidz Dios padzeela; golsoladz zha nac grë miñe rnabey Jesús, miñe biadseed no to. (Jesús, men ndzon ne rnabey ne, men ne psilaa ne lo grëtaa xtol ne.)

³Racladz naa gacnan to ganle, len dze ne ziaadyob guiaad Jesús, zrieëquia zha ne gzhidznie xtiidz me, csilo zho gun zho grëtaa guieyozh ne gzoobladz zho; ⁴guiab zho: “¡Pe gliladz ne nazho guiaad Jesús! Telne nli rëb me laa me guiaad, ¿yo me na? Grë xmengol ne, zha ne scataa pquiambëz me, laa zho gutle, ¿cho na zho guiaad? Znutaque nac lo guidzliu wlal ne brew.”

⁵⁻⁶Squiaalo zho rsoladzd zho zha bnitlole guidzliu tib vuelt, ni zhagaa nitlo miñe no niina. Wen wen nan zho ganle zha bnabey Dios biao guidzliu, me bnabey brieew lo nis, ni masaque lo nis now; mincuxe waa nis bnitlow glo. ⁷Scaque, nacle xtiidz Dios, zigtaa gbaaw, zigtaa guidzliu ne no niinaw, laaw nitlo, per lo guile nitlow; ni lo gui co nagon ygaa grëse zha ne run guieyntseeb ted zho caxtigw.

⁸⁻⁹Zha ne rzac quiaayanladz Jesús didz ne psan me ga, per led quiaayanladz mew; sinque laa me quiambëz tebaa grëse miech gac-wen lo me. Laa me racladz, grëse zho csaan xquieyntseeb zho, zeena ni tib zho nitlod. Bets, bzian, nanle to ganle led yed me ngab xtse. Sac tel me, ncuane gun ne tib milraa iz, tib dzeque gun mew; nroob rzac ne tib mil iz, per par me rzacse mew, lal ne rzac ne tib dze. ¹⁰Ib laa me no guiaad, per choot nand dien pa horpaa guiaad me; laa me guiaad zig rzëëbse tib ngbaan yu,

tibaque zeene gan miech laa me ziaadde. Grëse ncuuane no, hor co laaw lozh; bidox ne gdzieb ne tso zeene laa gbaa nitlo; grë mel ne ndziib gbaa, masaque gazbel ma; haxta guidzliu, dib nacsew laaw tsec.

¹¹ Scataa nagon nitlo guidzliu rii, ni grëraa ncuuane rdzian ne niina, jgolguien sca gołban zigne racladz men ndzon ne rnabey ne, gunctaldraa to xtol to! ¹² Tibaque gołconie guic to ne ib laa me no guiaad; tibaque ndzinli gołban, gollu ne quiambëz to gdziinniob dze ne sca gazbel grë ncuuane ran ne gbaa, dze ne sca tib guiaalse grë ncuuane niaaw. ¹³ Horco nagon laa ne dzian tib gbaa cub, laa ne dzian tib guidzliu cub ne psanle me diidz ygaa ne; zaatne tsodraa guiełntseeb.

¹⁴ Bets, bzian, nligaa gołtsoxco ndzinli gołban, gunctalde to xtol to; niowse gołbannie samiech to, zeena gal dze ne laa Jesús guiaad, ine gleyne me to gan me mban to zigne racladz me. ¹⁵ Golsoladz ganle, porne quiambëz me gbig grëraa miech lo me csilaa me zho lo dol, min co gane gard guiaad me.

Ye bets ne Pabl, men ne nziuu lo ne, lo grë guiełbiini ne rdeed Dios lo me rquiaa me grë guits ne zixeel me, zineele me lo to grë mine none naa nu. ¹⁶ Parga nli no mine rnee me ga, nagan guien ne zha naca; grë zha ne rdziinpaa racladz ctsëe Xtiidz Dios, zeene laa zho rneew, laa zho rneelew zigne racladz zho; zigne runaque zho grëraa mine zhobnee lo Xtiidz Dios. Zha ne sca run, lëëque zha noguib nitlo zho ga.

¹⁷ Laa naa rzet grë min rii lo to nu, zeena nsin so to, ib gdeete to diidz cho grë zha ntseeb ne sca nac guiaadquidie to, yquuil zho to csaan to mine nac didzli, csaan to nëz ne ziele to i. ¹⁸ Goltsoxco zig zie dze guienraa to pa lotaa rleyne Dios to, ni guienraa to cho nac Jesús, men ndzon ne rnabey ne, men ne psilaa ne lo dol.

Me nac men non, me nac men nziuu, ible me rieguial gunnon miech, zigtaa ninaw, zigtagaa grë izdoe ne ziaadraaw. Sca rieguiala.

Pedr

GUITS NE GLO PQUIAA

JUAN

1 ¡Diuzh to!

Laa naa gzodiidznie to ganle cho nac Jesús.

¹Jesús nac Diidz Ndzon ne rdeed guielmban. Notaque me, nole me zeene bre guidzliu. Bdzin dze biaad me lo guidzliu; grop diag no bdzion no grē mine bnee me, grop lo no bdzion no grē mine been me; sac bdzionpaa no zha rac me, zha rnee me, haxta bzhieen no nia me.

²Ni niina laa no quianee lo miech ganle cho nac me; golgacnan ganle, me rneedz tib guielmban ne gdzind dze lozh. Zaatne no Dios men ne nac Pxoze ne, ga no me; zeene biaad me lo guidzliu dzigo bdziunbey no me. ³Gacxe waa, mine rnee no lo to led lega rneed now; nozhal bdziona, nozhal bdziona. Laaw rnee no lo to, zeena tipse gac ne grē ne, gacnie to no zigne nacie Dios no (men ne nac Pxoze ne), zigne nacie Jesús no, men ne nac Xpēed me. ⁴Laa naa rnee grē min rii lo to lo guits ne rxel naa nu, zeena zigne nonley zdoo no scaquegaa to tsonley zdoo to.

⁵Znu nac mine bdzion no pseed Jesús miech, rēb me: Nac Dios zig nac tib biini, ni tib lē guielcow guien d zaatne no me; laa grē dol, masaque naca zig nac guielcow. Ni mincoque gon rnee no lo to. ⁶Gacxe waa, telne rnee ne naciele ne me, ni rlozh ga tibaque lo guielcow co no ne, rquidie ne ga dzigo. ⁷Telne nlipaa mban ne lo xbiini me, zigne mban Jesús lo biini co, dzigosi haxta tipse nac ne grē ne; ni scagaa, xchen Jesús nac mine csanmbe ne lo grētaa xtol ne.

⁸Nana tel guiab ne: Tel naa ib peet dol rapd naa. Lēēque ne noquidie ne ga, rneelid ne ga zha nac ne. ⁹Sanguete telne cxobdol ne grēse xtol ne lo Dios, ible ted-

sod silaa me ne lo grētaa dol co, sanmbe me ne lo grētaa guielntseeb ne zidziun ne; sac ible laa Jesús gut par csanmbe me ne. ¹⁰Telne sca guiab ne rapd ne dol, rriequia dzigo rzoob ne Dios zig tib men ne rquidie; sac tel me, nanpaa me grēse ne miech ngoopdol nac ne.

2 Xin yeena, laa naa rso diidz lo to: Gunctaldras to xtol to; telne nangaa new cho tib to zha been pe tib dol, golsoladz ganle no tib men ne quianab lo Dios men ne nac Pxoze ne yquia zdoo me ne, lēē men co nac Jesús, lo me golbig (tel me ni tib dol rapd me). ²Sac me bded grētaa guielnē ne rigoual ne ndieed ne por grētaa xtol ne, psanwen me ne lo Dios; me goc zig tib gon ne pcaania Dios gozh grēse xtol ne, ni xtol grēraa miech ne ndxie dibdoose lo guidzliu.

Golleynie samiech to

³Golgona ganle: Telne run ne grēse mine rnabey Dios, gase rien ne ne nli xnēz me no ne. ⁴Laa tel zha ne rnee: “Xnēz me no naa”, ni rlozh ga rund zho grē mine rnabey me, rquidie zho ga. ⁵Sac zha ne nli rleyne Dios, rioxco zho rban zho zigne nac xtiidz me; ni tel ne, ndion ne ganle nli xnēz me no ne.

⁶Gacxe nagon waa, zha ne rnee xnēz me no zho, ib none zaacse gban zho, zigne wban Jesús zeene biaad me lo guidzliu.

⁷Bets, bzian, golgacnan ganle, none gleynie to samiech to. Guiabde to togo ncub mine rne naa lo to nu gun to, laa naa rzet mine binle to glo zeene psilo pquiaadiag to Xtiidz Dios. Niicle ne padzeelale zhobneew, niicle ne pquiaadiagle tow, ⁸per rriequia ncuba niina; sac gon zeene biaad Jesús, me blu ganle zha none gleynie ne samiech ne. Ni scagaa niina ne laa to zienala, laa to noriee lo guielcow ne no to glo, laa to nozēēb nēz lo xbiini Dios.

⁹Ga nagon, tel zha ne rnee lo biini co mban zho ni rlëenie zho samiech zho, rquidie zho ga; bii lo guielcow ga mban zho. ¹⁰Zha ne rleynie samiech, zha cosi nli lo biini co mban zho, noxtseebd lega tsobe zho, sac ranpaa zho pa lo zie zho; ¹¹sangue zha ne rlëenie samiech, lo guielcow ga no zho. Masaque nac zho zig zha ne rold lo, niicle zha riend dien pa nêz tsie zho, sac guielcow co quiantse lo zho.

¹²Xin yeena, laa naa rne grë min rii lo to, sac gon, tel to laa Jesús bdiizhle tel pe nactaa grë xtol to. ¹³To ne nac to dad, laa naa rxel diidz rii lo to, porne nac to zha ne riladzle Jesús, nanle to ganle notaque me, nole me zeene bre guidzliu. Togaa ne nac to zha nguieg, laaw rxel naa lo to, sacne nligaa dziits zo to, rriielodraa mendox yquii ma to. To ne nac to mëedlas, xin yeena laa naa rxel diidz rii lo to, porne nac to zha ne nole xnêz Dios men ne nac Pxoz ne.

¹⁴Nana sca, zigtaa tow ne nac to dad ne runbeyle Dios; zigtagaa tow ne nac to zha nguieg, ne nataa ndip ndaan to laa to pcaaniale Xtiidz Dios dib zdoo to, ne nac to zha ne lëbdraa mendox yquii, ¹⁵golguien, gleyniede to grë ncuane rap to, gleyniede to grë ncuaan ndzinlid ne rac lo guidzliu rii. Zha ne rleynie grë ncuaan co, nliid rleynie zho Dios men ne nac Pxoz ne; ¹⁶sac grëse ncuane rac lo guidzliu rii (zig nac zha ne ziana ncuane gdeedguxt xcuerp, zha ne rzoobladz yquianie ncuane rdziladzta, zha ne racniats lo samiech), grëse ncuaan co led Diosd rnabeya, sinque lëe mine rzona grëraa miech lo guidzliu ga. ¹⁷Ni na tel zig nac guidzliu, zig zie dze laaw quialozh grëw grë ncuane rleynie miech low; sangue zha ne mban zigne rnabey Dios, laa zho bgaale tib guielmban ne gdzind dze lozh.

Zha ne rlëenie Jesús

¹⁸Xin yeena, zhile gdzin dze ne laa guidzliu nitlo. Led binle to ganle ib zrieequia tib zha ne glëenie zhiwseed Jesús, ni nligaa miina len dze rii ndal-le zaatne norieequia grë zha ne rsilo quiatidil Xtiidz me; gane ndion no ne laa dze co ziaadgaxle. ¹⁹Nli ladaque zha ne nacgrë ne briece grë zha co, per nliid nacniepaa zho ne; sac tel niaca mine nliipaa nacie zho ne, nriextsod zho. Ga nagon blu zho ne nliid nacgrë zho ne.

²⁰Sangue to, nacte to zig nac grë zha co, sac nacie Espiritu Sant to, bneedz me guielbiini lo to runbey to mine nac diidzli. ²¹Guits ne rxel naa lo to nu, nacda par cseed naa to mine nac diidzli, sac runbeyle tow ni haxta rien to pa min nac guielwquidie; sinque laaw ziaad lo to par gacnan to ganle zha nac zha ne noquidie i.

²²Grë zha ne rnee i nliid lëe Men ne zëëble diidz cxeel Dios lo guidzliu ga nac Jesús, noquidie zho miech ga. Ni zha ne sca run, rlëenie zho me ga; ni ne sca riladzd zho cho nac me, yele Pxoz me ga riladzd zho. ²³Sac zha ne rlëenie men ne nac Xpëed Dios, ga rlu ne nliid riladz zho cho nac Dios; sangue zha ne rxobnen cho nac Xpëed me, zha cosi nli riladz zho cho nac me. ²⁴Laa naa rso didz lo to sca: Goltswana grë mine pseed to zeene glopaa psilo biladz to Xtiidz Dios, zeena zigtaa Dios, zigtagaa Xpëed mew, tibaque gbannie to me. ²⁵Golso-ladz ganle, laa Jesús psanle diidz ne ib zgaa ne tib guielmban ne gdzind dze lozh; lëe guielmban co yгаа grëse zha ne nacie me.

²⁶Laa naa rzet min rii lo to, sac ne squi no grë zha ne ziaad racladz yquidie to. ²⁷Sangue to laa Jesús pxeelle Espiritu Sant nacie to, rquiind ne goon choraa cseed to; sac Espiritu Santzhal rneedz guielbiini lo to rien to zha nac grëraa

ncuaane no gacnan to, ni mesi gon mine nac diidzli min co rseed me to, led yed me rquidie. Golguien sca, Jesús golbannie, golbannie me zigne noseed Espíritu Sant to.

Zha ne nac xpëed Dios

²⁸ Xin yeena, nanle to sca sozite to lo Jesús, sinque tibaque golgacnie me; zeena ine tibiladz gac to gal dze ne laa me guiaad. Sac zha ne sozit lo me gban zho zigne gacladztaa zho, zeene laa me guiaad mban gac zho; sac guielto ne guiaan zho lo me. ²⁹ Nanle to ganle, mesi zigne riegual gac guielwxtis sca run mew; gacxe waa, grëse zha ne nac xpëed me ible zdeed me mine riegual zho.

3 Golwi ganle pa lotaa rleynie Dios ne, laa me rneedz diidz laa ne gac mëed lo me. ¡Ni nligaa tel ne, xpëedle me nac ne! Grëraa miech riladz zhow, sacne runbeyd zho cho nac me.

² Bets, bzian, ne nligaa xpëedle Dios nac ne. Nli ndiond ne niina dien zha glu ne gal dze ne laa Jesús guiaad, per mine ndionpaa ne, zeene gal dze co laa ne gac zigne nacpaa me; ni dzigosi laa ne dzian me grop lo ne. ³ Ni grëse zha ne zienie guic yгаа guielnzaac co, tibaque rioxco zho zig zie dze nosaan zho ncuane runctal xtol zho, sac tel Jesús randzed me dol.

⁴ Grë zha ne runctal xtol, xley Dios ga rguits zho, sac grëse dol ne runtaa miech ga rlu ganle ne rond zho mine rnabey me. ⁵ Per nanle to ganle, laa Jesús biaad lo guidzliu, biaadsilaa me miech lo grëtaa xtol zho; ni mesi ni tib dol rapd me. ⁶ Gacxe waa, zha ne nlipaa nacnie me, zienaldraa zho ncuane gunctal xtol zho; laa grë zha ne tibaque noyunctal xtol, gase rlu ne gard guien zho cho nac me, gard gunbey zho me.

⁷ Xin yeena, ib gliladzde to mine rnee zha ne racladz guiaadquidie to. Golgan ganle, zha ne mban zigne rdziladz Dios,

lëe zha co nli mbe zdo, zigne men mbe nac Dios; ⁸ sangue grë zha ne tibaque quiayunctal xtol, xnëz mendox ga ngab zho; sac tel mendox, desde padzeela tibaque guielntseeb quiayun ma. Ni min co nagon nacne biaadpaa Xpëed Dios lo guidzliu, biaadnitlo me grëtaa ncuane run ma. ⁹ Zha ne nac xpëed Dios, rdeetraa zho diidz gunctal zho xtol zho, sacne laa guic zho zienie gban zho zigne racladz Espíritu Sant, men ne nacnie zho; rienle zho nodne gunctal zho xtol zho, sac laa zho nacle xpëed Dios.

¹⁰ Nienenpaa cho nac xpëed Dios, chogaa nac xpëed mendox, sac grëse zha ne run guielntseeb, grëse zha ne rleynie samiech, led xpëete Dios nac zho; ¹¹ sac gon, desde dze ne psilo biladz to Xtidz Dios, bingazh to ib none gleynie ne samiech ne. ¹² Zig nac Caín, xnëz mendox ngab Caín, gane beet me bets me loxaque ne ndzinli mban bets me, laa me niapse guielntseeb run me. Ib gunde to mine been Caín. ¹³ Gacxe waa, bets, bzian, zeene gan to laa grëraa miech rlëenie to, ib tsode to zhgab guiab to pe nacne sca run zho. ¹⁴ Sangue ne rleynie ne samiech ne, gane ndion ne noxtseebdraa ne guioo ne gabil, laa ne bgaale tib guielmban ndzon ne gdzindraa dze lozh; sac zha ne rleynie samiech, nëz ne nitlo zho ga zie zho. ¹⁵ Grë zha ne sca rlëenie samiech, rriequia rut zho ga, ni nanle to ganle zha ne rut samiech, gard yгаа zho guielmban ndzon ne gdzind dze lozh ga. ¹⁶ Ndion ne zha gleynie ne samiech ne, sac Jesús zhal blu zhaw zeene sca bleeladz me me gut me bdiizh me xtol ne. Gacxe waa, zha ne nlipaa rleynie samiech, none cueeladz zho zho, cueeladz zho ncuane rap zho, gacnie zho samiech zho. ¹⁷ Gzoob ne, tib zha ne rnee xnëz Dios no zho, nroob rapchen zho, ranlo zho rcaalsad pe yquiin tib zha ne nacgrë zho, per ib rdeete zho palal pe yquiin zha co. ¿Niacxe na nli rleynie

zha co samiech zho ga? ¹⁸ Xin yeena, gol-gacnan sca ganle, led loxaque diidzde, led loxaque laglaadse gnee ne rleynie ne samiech ne; sinque none glu ne nli rleynie ne zho.

¹⁹ Sca nagon none dziuun ne, dzigo niicle new ndionpaa ne nli xnëz Dios no ne, ni scagaa tsod pe nacne pe dzeb tsonie zdoe ne zeene laa ne gbig lo me. ²⁰ Tel zha ne rdzieb zdoe, sac rien zho noyund zho mine rnabey Dios, ib tedsod zlisqui Diosa lo zho; sac tel me grësew nan me. ²¹ Xin yeena, laa zha ne desde zdoe zho nan zho noguitsd zho mine rnabey me, scagaa tibliladzse gbig zho lo me; ²² hor cosi ncuane gnabtaa zho lo me squiaadiag mew, sacne mban zho zigne rnabey me, ni noxco zho noyun zho ncuane rdziladz me. ²³ Ni lëe min rii rnabey me: Grëse miech, none dib zdoe zho gliladz zho Jesús men ne nac Xpëed me, ni gleynie zho samiech zho zigne psanle me diidz ga. ²⁴ Grë zha ne ron diidz run min co, ga rlu ne nlipaa mbannie zho me, ni scagaa me mbannie me zho. Ni ndion ne ganle, ib nli mbannie me ne, sac pxeel me Espiritu Sant nacie ne.

4 Bets, bzian, zha ne gnë zhiEspiritu Dios nacie zho, goon ye zho quia-nee Xtiidz me lo miech; ib gunde to ne lëelëd gliladz to xtiidz zho, sinque golwigazh dien pe nli zhiEspiritu Dios nacie zho. Sac ndal grë zha ne quianzë lo guidzliu, rquidie zho rnee zho Xtiidz Dios noteed zho. ² Parne guien to dien pe nli zhiEspiritu Dios nacie zho, golwi dien zha rzac zho Jesús: Tel zha ne rliadz ne nli zig tib miech goc me biaad me lo guidzliu, ga rlu ne nli zhiEspiritu Dios nacie zho. ³ Laa tel rliadz zho ne nli sca biaad me, nli dzigo zhiEspiritu Dios nacie zho; sinque lëele espiritu ne rtsidil Jesús ga nacie zho. Laa to binle ganle ib laa espiritu co guiaad; ni lëele

espiritu ntseeb co nacie grë zha ne squi quianzë lo guidzliu niina.

⁴ Xin yeena, sangue to xnëzle Dios ngab to, yquidiedraa zha co to, sac gon mazdraa nroob poder rap men ne nacie to, lëdle espiritu ne nacie grë zha ne sca zienal grë wseed yozh ne no lo guidzliu. ⁵ Grë zha co, ncuane rac lo guidzliu rii nonie guic zho; gacxe waa, niapse lëew mee zho, ni gagaa grëque zha ne rleynie grë ncuane co, zha co rliadz zhiwseed zho. ⁶ Sangue ne xnëz Dios no ne. Ni scagaa zha ne runbey Dios, zha co rquiaadiag mine rnee ne; laa grë zha ne runbeyd me, rquiaadiagd zhow. Gase na ganle rlu cho zha nacie zhiEspiritu Dios, ni cho zhagaa nacie espiritu ne ziaadquidie miech.

Rleynie Dios miech

⁷ Bets, bzian, golgotsaa gleynie ne samiech ne, sac gon, tel Dios grëse ne rleynie me ne. Gacxe waa, zha ne rlu nli rleynie zho samiech zho, gase rlu ne nli xpëed Dios nac zho, nli runbey zho me. ⁸ Laa grë zha ne rleynie samiech, runbeyd zho Dios ga gane sca run zho; sac gon ib Dios rneedz guielbiini lo ne gleynie ne samiech ne. ⁹ Gotsaa gwi ne ganle, pa lotaa rleynie me ne: Tibpaa Xpëed me, ni pxeel me me biaadtizh me xtol ne, zeena ygaa ne tib guielmban ndzon ne gdzind dze lozh. ¹⁰ Led guiabd ne togo glo miech bleynie Dios gane rleynie me zho niina; led scada, sinque ible zdoe me gola rleynie me ne. Ne nligaa gotsaa gwi ne ganle zha pxeel me Xpëed me, goc me zig tib gon ne gozh grëse xtol ne. Ga nagon rlu pa lotaa rleynie Dios ne.

¹¹ Bets, bzian, zigne scataa rleynie Dios ne, scaquegaa ne nagon none gleynie ne samiech ne. ¹² Gard tso tib zha ne gan Dios, per zha ne rleynie samiech, me ga nacie zho; ni zigse zie dze dib zdooraa zho rleynie zho samiech zho.

¹³ Me nac meṅ ne pxeel zhiEspíritu me nacie no, parne glu nacie me no, ni scagaa no nacie no me. ¹⁴ Ni stiba, grop lo no bdzion no biaad Xpëed me biaad-silaa me miech lo dol; ni miṅ co nonee no lo miech niina. ¹⁵ Grëse zha ne rliladz Xpëed Dios nac Jesús, ni rnee zhow lo miech, ga rlu ne nacie Dios zho, ni scagaa zha nacie zho me.

¹⁶ Ndion ne ganle nli rleyniedox Dios ne, sac riennpaa ne rleynie me ne, ni rliladz ne zeene rnee me pa lotaa rleynie me ne. Ible niaa me par gleynie me, me rdeed guielbiini lo miech gleynie zho samiech zho, zigne rleynie me zho; gacxe waa, zha ne rleynie samiech, ga rlu nacie zho Dios, ni scagaa me nacie me zho. ¹⁷ Zig nac ne, niina ne laa ne naciele Jesús, zig zie dze laa ne lozh cseed gleynie ne me, ni gleynie ne samiech ne zigne racladz me; ni scagaa tsod pe nacie ctoladz ne, pe nacie gdzieb ne gdziṅ dze ne laa me guṅ xquielwxtis me; sinque haxta gley ne dzian ne me gal dze co. ¹⁸ Nod pe nacie gdzieb ne me, sac gon ndion ne pa lotaa rleynie me ne. Led yedraa niina pe dzeb ne dzio ne, sac grëse dzeb rbiche zeene rien ne rleynie me ne. Zha ne rdzieb, zienie guic zho pe nac grë guielnë ne gan zho, ga rlu zho gard guien zho ne rleynie me zho, ni gardgaa guien zho gleynie zho me.

¹⁹ Gotsaa guien sca ganle, nli laa ne rleynie Dios, laa ne rleynie samiech ne, per glo me blu ganle pa lotaa rleynie me ne. ²⁰ Tel zha ne rnee, rleynie zho Dios, ni rlozh ga rlëenie zho samiech zho, rquidie zho ga. Sac gon, tel nand zho gleynie zho samiech zho, zha ne ranlopaa zho, ¿pe lel Dios dzigo gliladz ne nli rleynie zho, ni nac me meṅ ne rand zho? ²¹ Sac gon, znu nac xtiidz Jesús: Zha ne rleynie Dios, zigne rleynie zho me, scaque none gleynie zho samiech zho. Ni miṅ rii rnabey me dziuun ne.

Zac csaan ne ncuaaṅe runctal xtol ne

5¹⁻² Grëse zha ne dib zdoo rliladz ne ible lëe Meṅ ne zëëble diidz cxeel Dios lo guidzliu ga nac Jesús, grëse zha co xpëed Dios nac zho.

Grëse zha co, par guien ne dien pe nli rleynie ne zho, none guien ne dien pe nli rleynie ne Dios, dien pe nli run ne miṅe rnabey me. Nac cuent rii, zig nac tib yu miech, zha ne rleynie pxoz mëed, scaquegaa rleynie zho mëed. ³ Sac zeene rleynie ne Dios, zuṅ ne grëse miṅe rnabey me. Ni grë miṅe rnabey Dios, nacda ncuaaṅe guiab ne grieelod guṅ ne; ⁴ sac grëse zha ne nacle xpëed Dios, totsaque rnalo zho ne Jesús guṅ xyudar zho, gacwetraade zho lo grë ncuaaṅe gunctal xtol zho. ⁵ Golgacnan sca: zha ne dib zdoo rliladz Xpëed Dios nac Jesús, zrieelo zho csaan zho grëtaa ncuaaṅe runctal xtol zho.

⁶ Tel ne, ndion ne ni rliladz ne ganle nli Xpëed Dios nac Jesús, sac zeene biaad me horne norobnis me, horne nolozh me, ga blu ganle cho nac me. Ni ye Espíritu Sant nolu ganle ne scaw, ni miṅe rnee me diidzliw.

⁷⁻⁸ Gotsaa gwi sca ganle, tson mod rlu cho nac Jesús: Tiba por miṅe nolu Espíritu Sant, stiba por miṅe blu zeene norobnis me, ni stiba por miṅe blu zeene nolozh me. Zigtaa miṅe nolu Espíritu Santa, zigtaa zeene brobnis mew, zigtaa zeene nolozh mew, blu ganle Xpëed Dios nac me. ⁹ Miṅe rnee Dios, none gliladz new. Xtiidz samiech ne name rliladz ne, ¿pe lel miṅe rnee Dios dzigo gliladz ne? ¹⁰ Zha ne gliladz miṅe rnee Dios, rriequia rzoob zho me ga zig tib zha ne rquidie; sangue zha ne gliladz miṅe rnee me, zien zho ganle nli Xpëed me nac Jesús. ¹¹ Laa me bneele ganle: zha ne gnalo Xpëed me, zгаа zho tib guielmban ndzon ne gdziṅd dze lozh; sac Xpëedse me rdeed guielmban co.

¹² Gacxe waa, zha ne rnalod Xpëed me, laa zho bgaale guielmban ndzon co; sangue zha ne rnalod Xpëed me, gard yгаа zhow.

**Bgaale to guielmban
ne gdzind dze lozh**

¹³ To ne nac to zha ne rnalole Xpëed Dios, laa naa rzet min rii lo to zeena gacnan to ganle laa to bgaale guielmban ne gdzindraa dze lozh ga. ¹⁴ Ni scagaa, ndionpaa ne rquiaadiag Dios xtiidz ne, zeene ncuaane rio zdoo me rnab ne lo me; ¹⁵ ni zigne ndion ne rquiaadiag me xtiidz ne, scaquegaa none gliladz ne ib zneedz me ncuaane rnab ne.

¹⁶ Zig nac zeene gan to cho tib zha ne nacgre to been pe tib dol, ni rlu nacda dol ne gnitlo zho, zac gnab to lo Dios gun me zho perdon; ni gacnan to ganle, ible zun me zho perdon. Sac gon no dol ne rnitlo, ni zha ne gun dol co, nodne

gnab to lo Dios gun me zho perdon. ¹⁷ Nli grese guielntseeb dol naca, per no mine rnitlod miech. ¹⁸ Ni ndion ne ganle, zha ne nacle xpëed Dios rundraa zho ne lega gunctal zho xtol zho; sac Jesús men ne nac Xpëed Dios, men co quianap zho, grieelodraa lega pe gun mendox zho.

¹⁹ Zig nac ne, ndionpaa ne xnëz Dios no ne. Nli ndalraa zha ne zienal ncuaane rnabey mendox, ²⁰ sangue ne, laa Xpëed Dios biaad bdixbiini me xquielrien ne bdziuunbey ne men ne nacpaa Dios. Ni-inasi laa ne ngable lo men ne nacpaa Dios ga, ni lëë me ga nac Jesús. Me nac Dios nguiamban, ni me nac men ne rdeed guielmban ndzon ne gdzind dze lozh.

²¹ Xin yeena, golguien Diosse nac men ne gleynie to; gunde to ne lel gre ncuaane no lo guidzliu rii gleynie to, laa ne gleynie to Dios.

Juan

BROP GUITS NE PQUIAA

JUAN

1 ¡Diuzh to grëse to!

¹ Laa tib zhagol rii rxeel tib guits rii ziaad lo to i, ne nac to zha ne no xnëz Jesús. Dios bzooblo to, bredz me to ne laa to ngab xnëz me.

Ne nlipaa rleynie naa to gon, ni led naadsegaa, sinque ye grëraa zha ne runbey diidzli ne nac Xtiidz Dios. ²Rleynie no to sacne tibaque nac diidzli ne riladz ne, ni tsod dze ne csaan new.

³Dios ni Jesús men ne nac Xpëed me, me glu ganle pa lotaa noxco me to, zeena peet tsienied guic to, ni yquia zdo me to; ni zunpaa mew, sac rleyniedox me to.

⁴Ne nlipaa gon bleydoo naa zeene gon naa nzian zha ne nocaania Xtiidz Dios i, noxco zho mban zho zigne nacpaa diidzli; zigne rnabey Dios men ne nac Pxoze ne.

⁵Bets, bzian, laa naa rnab lo to, golgotsaa gleynie ne samiech ne. Guiabd ne togo ncub mine rne naa lo to nu gun to; sac gon, lëëquew ga bdzion ne zeene psilo bliladz ne Xtiidz Dios. ⁶Telne nli rleynie ne Dios, dzigo none gban ne zigne rnabey me; gacxe waa, none niowse gban ne, ine gleynie ne samiech ne, sac gon min co rnabey me.

⁷Ndal zha ne quianzë lo guidzliu niina, noquidie zho miech, rnee zho nlid goc Jesús zig tib miech zeene biaad me lo guidzliu. Nsin golso lo zho, sac gon notsidil zho mine nac diidzli ga, rlëenie zho Jesús ga sca run zho. ⁸Golguien, ib gdeete to diidz guiaadquidie zho to, zeena dziin ne quiayun to i gacda zhlëse. Goltsoxco tiblrique golgac, zeena ygaa to grëtaa guielnzaac ne no gneedz Dios lo to. ⁹Sac gon, zha ne csaan mine nacpaa zhiwseed Jesús, led xnëzdraa Dios ga no zho; ni scagaa, zha ne zienalpaaw zigne naca, zha cosi xnëz Dios ga, xnëz Xpëed me Jesús ga no zho. ¹⁰Gacxe waa, zha ne guiaad lo to i ni tel ziaadnied zho wseed ne nacpaa Xtiidz Jesús, ycaaniade to zho. Ib gdeete to lidz to cuëz zho, ib tsode to gnee to pe diidz ne csannziuu to zho; ¹¹sac telne sca gun to, rriequia yele to rleynie grë zhiwseed yozh zho ga.

¹²Ndal grë ncuane no gne naa lo to, per racladzd naa gzet naaw lo guits rii. Laa guic naa no guialgan naa to i, dzigo mazd hor co naazhal gnew lo to; zeena nroob guielbley ne dzio ne grë ne.

¹³Grë zha rii, zha ne bzooblo Dios bredz me zigne bredzaque me to bzëeb to xnëz me, laa zho rxeel bdiuzh lo to grëse to.

Juan

BION GUITS NE PQUIAA

JUAN

1 ¡Diuzh bets!

¹ Laa zha gol rii, pquiaa tib guits rii ziaad lo luu i gon Gay, ne nac luu tib zha ne nziuu lo naa.

² Bets, mab naa lo Dios zigne squi wen mban luu nêz lo me, scaque zaacse griecquia grêtaa ncuaañe gun luu, ni gneedz me guieñdaan lo luu. ³ Ne nlipaa bley naa, zeñe biaad bla zha bets ne nu, bzodiidz zho lo naa squitaa ndzinli mban luu, tibaque noxco luu zienal luu miñe nac diidzli. ⁴ Ne nligaa, nodraa pe stib conley zdoo naa zigne rleytaa naa zeñe ron naa ine niowse mban grê zha ne biane naa xtiidz Dios lo, zienal zho miñe nac diidzli.

⁵ Bets, ziyon naa squitaa tibaque noxco luu run luu xyudar grê zha ne nacgrê ne, ni mazdraa zeñe nac zho zha ne ziaad stib guiedz. ¡Wen ga! ⁶ Squi ndxie grêraa zha ne riladz Jesús, rzodiidz zho squitaa nquialadz luu zho. Bzhiguiel sca, bioxco tibaque squi been xyudar zho zeña grieelo gdziñ zho zaatne no tsie zho. Sca rdziladz Dios. ⁷ Sac gon, niapse porne rleynie zho Dios, laa zho brie ziegun zho xtsiñ Jesús, ni ib rziguiel zho ycaania zho ncuaañe rdeed grê miech ne riladzd Xtiidz Dios. ⁸ Miñ co nagon, ib none ne yquiambiaazlo zho, ne none gdeed ncuaañe yquiin zho, zeña dziuun ne xyudar zho ygaaz Xtiidz Dios.

⁹ Pxelle naa tib guits lo grêse zha ne no xnêz Dios i, per zig nac Diótrefes gon, men ne racladz so gnabey lo to i, rond me miñe rnee no. ¹⁰ Gacxe na, telne laa naa guial i, dzigo laa naa glisqui lo me dien pe nacne quiañeñe me no.

Ni tebaa mincose, na haxta run me ib rbêzlod me grê zha bets, zha bzian ne rlanso i; niicle rdeetegaa me diidz cho gdeed zaatne cuêz zho. Zha ne rund miñe racladz me, rbee me zho lad grê zha ne nacgrê zho.

¹¹ Bets, sangue luu gon ib tsienald luu miñe run grê zha ne sca run guieñtseeb, sinque bioxco güeynal ncuaañe ndzinli. Sac gon, zha ne run niapse ncuaañe ndzinli, xnêz Dios no zho; laa grê zha ne run ncuaañe ntseeb, gard sëeb zho xnêz Dios.

¹² Zig nac Demetr, grêse miech rnee ganle zaacse mban Demetr. Ni rlugaa nliw, sac gon tibaque zienal me miñe nac diidzli. Niicle nogaaw, mincoque rnee no, ni nan luu ganle led yed no rquidie.

¹³ Ndalraa ncuaañe no gne naa lo luu, per racladzd naa gzodiidz naaw lo luu lo guits rii; ¹⁴ sac laa guic naa no guialgan niob naa luu i, dzigo hor co ziodiidz ne grop ne.

¹⁵ Guiaannie Dios luu sca; peet tsienied guic luu. Grêse xamigw luu zha ne runbey luu nu, laa zho rxeel bdiuzh lo luu. Scagaa bzhiguiel bdeed tib zhibdiuzh naa lo tib tib zha ne nac xamigw ne nêz qui.

Juan

GUTS NE PQUIAA

JUDAS

1 Naa nac Judas, bets Santiagw; xtsiin Jesús quiayun naa.

Laa naa rxel guts rii lo to, grëse to ne nac to zha ne bredz Dios bzëëb xnëz me. Ne nligaa nquialadz me to, ni haxta quiapan Jesús to.

² Dios glu ganle pa lotaa rquia zdoo me to, pa lotaa rleynie me to, ni pa lotaa noxco me to zeena peet tsienied guic to.

³ Bets, bzian, mine gocladz naa nzet naa nu ganle zha nactaa mine been Dios psilaa me ne lo xtol ne; per na rgobey naa nonguielraaw cso naa diidz lo to, ib gandzede to grë zha ne rtsidil mine riladz ne. Dios bneedz diidz gocndion new, ne nac ne zha ne brieë lo dol bzi-aab ne xnëz me. ⁴ Sac gon, blalaa zha ne rquiaalo riladz Dios, nguets zhli-aan laa zho bzëëb lad to i. Miech yozha, niapse lo dol no zho, rnee zho zac gun ne ncuaane guiaabta guic ne, sac nquialadz Dios ne; ib riladzd zho Jesús, Men ro, Men nroob ne rnabey ne. Padzee-lale goquiet, ne grëse miech ne sca nac, lëëque lo xtol zho nitlo zho.

⁵ Golsoladz ganle zha bzhaac grë zha ne gocntseeb lo Dios padzeela. Niicle ne nanle tow, per laaw gzet naa lo to nu, zeena csoladz tow: Zeene psilaa Dios grëse menladz ne lo guielnë ne noded zho Egipt ga, zha ne brieëquia ib bnëd niunbey me, ib gondzed me zho, bnitlo me zho. ⁶ Scaque grë anjl ne biche lo me, psaan zho dziin ne pso me zho; bdziguiend me zho, laa me nsioogyu zho tib lo guielcowdoo, ga quiadoo zho haxta gdzin dze ne laa me gun guielwx-tis. ⁷ Rsoladz to ganle zha goc guiedz Sodom, guiedz Gomorr, ni grëraa guiedz las ne bre gax ga. Grë miech ne bio grë guiedz co, laa zho güeynal mine nac-

draa guieltsieel, tel chotaa pquiagob zho, bionie zho haxta grë mrazh; grëse zho, lo gui ga bnitlo zho. Ga rlu ganle, grëse zha ne csaand xquielntseeb, no tib lo guidox ne gdzind dze guiuu, ni ga nitlo zho. ⁸ Ni zha ne gon blanso lo to i, scadaa run zho; sac tel zha, niapse guielyozh zienal zho, laa zho nosanbeed xcuerp zho, ib rond zho mine rnee zha ne rnabey, haxta rdzibdee zho grë men non ne no gbaa. ⁹ Per ni anjl Miguel, anjl rnabey ne bdilnie mendox zeene güeyla me xcuerp Moisés, ib beend me ndziibdee me mendox; lëë gdib rëb me: “;Dios nac men ne gunquizh luu mine run luu i!”

¹⁰ Laa grë zha qui, haxta grë ncuaane run Dios, ncuaane ni rioguicd zho zha nac, laa zho rdzibdeew; masaque mban zho zigne mban grë ma, laa zho run ncuaane rdeedtaa guxt xcuerp zho; lëëque zha nonitlo zho ga. ¹¹ ;Probsaxe zho! Sac gon, nëz ne zey Caín ga zienal zho. Lo guielblë dimi, laa zho brieë xnëz Dios zigne brieë Balam; ni zigne gut Coré zeene gocntseeb me lo Moisés, scaque nitlo zho.

¹² Zeene riaad zho lo guielwagw ne run to, loxaque rzhidznie zho, loxaque runnguzee zho, rzob zho rlozhd gowcho zho, zieniedraa guic zho dien chora no gow; ni lalnu guielto guieñd lo zho. Nëzrii nëzrec quianzë zho, masaque nac zho zig nac xcow ne ziaadnied nisguie, loxaque nëzrii nëzrec rienie mew; zig nac tib yag bgoöl ne guieñd nex lo, len dze ne no yquia nex low. Laa zho bnitlolle ga, masaque nac zho zig tib yag bidz ne bliaadzle dib lo; sac tel yag bidza, gdzindraa dze ne yguiaw. ¹³ Zigne nëzrii nëzrec rchoon nisdoo grë mtsiin beed ne ndziib low, scadaa nëzrii nëzrec nolu grë ncuaane mbeeguelto ne quiayun zho. Laa zho ziele nëz lo guielcowdoo ne rieguial zho, zaatne gdzindraa dze griee zho; zig tib mel gbaa ne bnitnëzle, laa ma nonziaabse lo guielcow.

¹⁴Lëële zha qui ga bzeet Enoc (men ne briequia lo dii ne rac xoop xtii Adán), zeene psiaab Dios guic me, rëb me: “Golwi ganle laa Dios ziaad, pe zhi-daa grë anjl ne ziaadnie me, ¹⁵ziaadgun me guielwxtis. Grëse miech ntseeb, laa me gunquizh zho grëtaa dol ne been zho, grëtaa diidz dox ne brieer zho zho bneenë zho me.” ¹⁶Ni nligaa sca nac grë zha qui, ib nod ncuuaane tso zho conform, tibaque wlisqui no zho; laa zho zienal grëtaa guielyozh, ncuuaane racladztaa xcuerp zho. Rto zho guieldzin, rlozhd dieen pa rac zho, rio zho pe diidz wen ne rnee zho lo miech, loxaque ne dien zha yquidie zho miech, gun zho mine racladz zho.

Laa naa rso diidz lo to

¹⁷Sangué to bets, bzian, golsoladz mine bnee grë zha ne pxeel Jesús bnee Xtiidz me, zeene biadseed zho to; ¹⁸led znu rnee zho: “Zeene zhile gdzin dze ne laa guidzliu rii nitlo, zriequia grë miech ntseeb ne gzhidznie zhiwseed Jesús, laa zho gban zigne nactaa grë zhgab yozh ne guiab guic zho.” ¹⁹Ni nligaa ran to niina ganle sca quiayaca, lëë grë zha co i squi nogodil grë zha ne no xnëz Jesús. Nac-nied zho Espiritu Sant, gane niapse grë ncuuaane dol ne racladz xcuerp zho, min co run zho.

²⁰Bets, bzian, golguien sca tibaque dziits golso lo Xtiidz Dios mine riladz to. Golzodiidznie Dios, zigne csiaab Espiritu Sant zdoo to. ²¹Sozite to lo Dios, golguien ganle zha rleynietaa me to; golquiambëz dzian ne gal dze ne yгаа ne guielmban ne gdzind dze lozh, mine ndionpaa ne gneedz Jesús men ne rnabey ne, porne rquia zdoo me ne.

²²Tel cho zha ne racchop guic lo Xtiidz Dios, golnee lo zho biire sodziits zho stib. ²³Zha ne bii no lo dol, golnee lo zho guien zho csaan zhow; golcuae zho lo gui ne noxtseeb zho yгаа zho ga; sca-gaa grëraa miech, golquia zdoo zho, per ib cxende to lo zho. Ni lalnu gdziguiende to grë dol ne run zho, golsaca zig rzac to tib ncuuaane rbixnë zdoo to ran to.

^{24–25}Tibaque Dios no, me psilaa ne lo dol, ni megaa csilaa grëraa miech. Men nroob nac me, ni zrieelo gacnie me to guiabde to ladznia dol stib; zeena ine mbe to, ine rley to laa me gdzinnie to zaatne nac lo guelndzondoo ne no me. Niina ne laa ne rdziuunbeyle Jesús, zrieelo dzioolnie ne me, mese nac men nroob, men ndzon, men ne rap guielrnabey. Tibaque nac me, niicle mazd glow, niicle niinaw, ni gdzind dze ne gdzëë me.

Judas

MINE BDEED DIOS DIIDZ

GOŃ JUAN

1 Nu raquiet grē ncuaañe ziaadyoble gac. Dios bnabey Jesús glu mew lo grē zha ne no xnēz me. Nacne pxeel Jesús tib xanjł me biaad biaadluw lo ngundziin win ne nac naa nu, parne sca gacnañ zhow. ²Grēse miñe goñ naa, grēse miñe bin naa ga, laaw gne naa zigne goñse naaw, zigne binse naaw. ¡Diidzliw! ³Dichos grē zha ne glab lo guits rii, ni dichos grē zha ne yquiaadiag grē miñe zhubnee low nu, ycaania zhow ni gliladz zhow; sac goñ xtiidz Diosa, ni laa dze ne gac grē miñe rzeeta nu, ziaadgaxle.

⁴Naa nac Juan, laa naa rquia guits rii rxel naa ziaad lo to i, ne nac to zha ne ngab xnēz Jesús, zigne nose to gza gadz guiedz ne ndxie nēz Asia i.

Dios meñ ne no padzeela, meñ ne no niina, meñ ne nacle diidz guiaad, me gacniē to lo grē zhizhgab to, me cchoobladz zdo to peet tsienied guic to; me ni Espiritu ne zo lo me zaatne nac lo xcan ndzon ne zob me; Espiritu ne rlu zha nac gadz guielbiini ne rap me; ⁵ni Jesús meñ ne rnee niapse diidzli, meñ ne glopaa brieēban lo guielgut, meñ ne rnabey lo grēse zha non ne rnabey lo guidzliu.

¡Gotsaa dziuunnon ne Jesús! Sac goñ pa lotaa rleynie me ne, bleeladz me me bzhiee xchen me psanmbe me ne lo grētaa xtol ne, ⁶tibaque been me ne, psannon me ne; bzooblo me ne gac ne pxoz ne guñ dziin lo Dios meñ ne nac Pxoz me. ¡Mese nac meñ ne rap guielndzon, mese rap grētaa guielrnabey! ¡Tsođ cho stib zig me, ni gdziñd dze ne nitlo xquielrnabey me! Sca nac me.

⁷¡Bii zanaque to ganle zeene laa Jesús ziad-zēēb lo xcw! Grēse miech zañ zho

me, zig nac zha ne sca bdiñ me, zha ne sca bliz lanz cue me, zañlo zho me; dib-doo guidzliu, hor co mbanse gac miech, haxta zoon zho, haxta zdzieb zho. Ible sca none gaca.

⁸Znu rnee Dios, meñ nroob ne rap grēse guielrnabey: “Grēse ncuaañe no-taa, naa psilow ni naa csiaala; naa nac zigne nac letr “a” ni letr “z” lo grēse letr, “a” rsilow, “z” riala, zigne nac naa niina sca goc naa padzeela, ni scaque gac naa zeene laa naa guiał stib.”

Goñ Juan Jesús

⁹Naa nac bets to Juan, tibaque nac ne niina grē ne, sac ye naa no xnēz Jesús; ye naa nodeed grē guielnē ne noded to. Zigne rneedz me paciēns lo to lēb to lo grētaa guielnē ne no gan to, scaque racniē me naa; ni ye naa gdziñ lo me, zaatne no gdziñ to.

Sodiidz naa lo to ganle zha bzhaac naa. Lēētaaque no naa lo guidzliu win ne lē Patmos, ga ngoguiu zho naa loxaque ne noseed naa miech Xtiidz Dios, miñe biaadlu Jesús zeene biaad me lo guidzliu. ¹⁰Tib dze, lēētaque nacie Espiritu Sant naa nozodiidznie naa Dios, tibaque zeene nguiedz zēēb tib tsi meñ co, pale tsi tib trompet; ¹¹nē me lo naa:

—Grētaa ncuaañe rañ luu nu niina, pquiaaaw tib lo guits pxeela lo grēse zha ne ngab lo naa, grē zha ne no gza gadz guiedz rii nēz Asia: Efés, Smirn, Pérgamo, Tiatir, Sardis, Filadelf, ni Laodicé.

¹²Ptsire lo naa ni naa gwi naa dien cho ga sca rnee lo naa. Zeene bui naa, goñ naa gadz candeler niaa niapse guiib or. ¹³Glowtaa lo gza candeler co zo tib mgui zigne rlu miech lo guidzliu rii, nacw me tib lar nool rdziña haxta yañ ni me, ni ndxie tib cinch niaa niapse guiib or ngali ro zdo me. ¹⁴İne bie rna guitsguic me, zootle zhiil nquits, zoot-gaa luu guieg, masaque riaazbel bzi-aalo me. ¹⁵Ni mew, masaque rquiabniw

zigne rquiabni guuib brons zeene rlozh riaaⁿmbew, zeene rrieen^zgaaw lo gui; tsi mew, masaque rio bi rnee me zig rio bi grē guibee nroob ne zhoob naal nis. ¹⁶Nia me mine nēz derech, nzhen me gadz mel gbaa; ni zob tib spad ro me, zigtaa nēz zhits spad cow zigtaa nēz low, gropse nēza ndox. Masaque biinidoo ne rreee lo me, zigne rlu lo ngbidz zeene lega recye lo ngbidz.

¹⁷Zeene gon naa me, mbe biaab naa zhan ni me zig tib zha ne gutle. Dzigo blis me nia derech me pxobnia me guic naa, nē me lo naa:

—¡Gdziebd luu! Naa psilo ni naa csi-aal, naa psan grētaa ncuaaⁿe no, ni naa gnitlow; ¹⁸ni mban naa. Nli gut naa per briebaan naa, mban naa niina, ni gdzindraa dze ne guet naa; lадznia naa no guielgut. ¡Gdziebd luu sca! ¹⁹Grēse ncuaaⁿe noyan luu nu niina, pquiaaw lo guits grēsew, niicle mine noyaclew, mine naragaa gaca. ²⁰Znu gon nac mine blozh gon luu ga: gadz mel gbaa ne gon luu nzheen naa ga con nia derech naa, tib tib mel co nac tib tib zha ne quianap yadoo ne no gza guiedz co; laa gza gadz candler co, nac tib tib yadoo co.

Diidz ne bnee Jesús lo zha Efés

2 Blozh ga nē me lo naa:
—Mine gni naa lo luu nu niina, pquiaaw pxeela Efés, lo zha ne quianap grē zha ne ngab xnēz naa ga, gudz lo zho: “Znu nac xtiidz men ne nzhen gza gadz mel gbaa co, men ne zodeed vuelt lo gza gadz candler ne niaa niapse guuib or ga, rnee me:

²’Nan naa zha mban to, nan naa pa lotaa noxco to run to xtsin naa, ni naclede to zha ne lega znuse guiaan zdoos; stiba, ib randzede to grē zha ntseeb. Grē zha ne ziyaad i rnee zho Dios pxeel zho ziadnee zho xtiidz me, per pquia to been to zho prueb, haxta gocnan to rquidie zho. ³Nan naa zha nactaa guielnē ne noded

to loxaque ne riladz to naa; per niicle scaw tibaque dziits zo to, ib riaand zdoos to.

⁴’Loxaque naca no tib ncuaaⁿe glisqui naa lo to: ¡Rleyniedraa to naa niina, zigne rleynietaa to naa glo, zeene glopaa bliladz to xtidz naa! ⁵Gołsoladz pa lo pxin to. Gołbiire gołgac stib zigne nac to glo zeene psilo bliladz to xtidz naa; sac gon, telne gac-wende to, ible zial naa i zialtichee naa xcandler to zaatne zow.

⁶’Nli rleyniedraa to naa scataa, per rley naa ran naa ib rdziguiende to grē ncuaaⁿe ndzinlid ne run zha Nicolaít, sac tel naa, ni lalnu ib rdziguiend naa ncuaaⁿe run zho.

⁷’Zha ne rioguicle godiidz rii, yquiaadiag zho ganle zha rnee Espiritu Sant lo grē zha ne no xnēz naa, rnee me: Grēse zha ne gdeete diidz gac-wet zho lo ncuaaⁿe guncal xtol zho, zha co yгаа gow xnex yag ne rdeed guielmban ga, mine zob len huert ndzon ne rap Dios ga.”

Diidz ne bnee Jesús lo zha Smirn

⁸Blozh ga nē me lo naa:

—Pquiaa mine gni naa lo luu nu, pxeela Smirn, lo zha ne quianap grē zha ne ngab xnēz naa ga, gudz lo zho: “Znu nac xtiidz men ne psilo grētaa ncuaaⁿe no, men ne csiaala, men ne gut ga ni brieaban me, rnee me:

⁹’Ran naa zha nactaa grē guielnē ne noded to. Ran naa mban rac to guient grē ncuaaⁿe yquini to (nligaa peet rapde to lo guidzliu, per guielnzaac ne bgaa to i ngab to lo Dios, nroob nona). Ran naa, grē zha ne rnee i xpēed Dios zho sac zhasi zha Israel nac zho, no zho rneenē zho to; per nliid gon xpēed Dios nac zho, sac zhiwseed mendox zienał zho.

¹⁰’Nroob grē guielnē ne ziaadyob gan to, per gdziebde to. Squil men-dox miech, gnab zho tso to ladzguuib; ga nagon glu to dien pe nli dib zdoos

to rliładz to naa. Nli nzianlaa to guiab ladzguiib, per tib tsiise ngbidz sca yquiaanał zho to. Laga mban to lo guidzliu sca, ible csaande to zhiwseed naa, zeena ycaania to guielmban ndzon ne gnedz naa lo to.

¹¹ 'Zha ne rioguicle godiidz rii, yquiaadiag zho ganle zha rnee Espiritu Sant lo zha ne no xněz naa, rnee me: Zha ne tiblque tsoxco gun mine rnabey Dios, led yedraa zha co tsoxtseeb guey gabil."

Diidz ne bnee Jesús lo zha Pérgamo

¹² Blozh ga, nèque me lo naa:

—Mīne gni naa lo luu nu, pquiaaw pxeela Pérgamo, lo zha ne quianap grē zha ne ngab xněz naa ga, gudz lo zho: "Znu nac xtiidz men ne nzobro tib spad lots ne ndox gropse něz, rnee me:

¹³ 'Nanpaa naa masaque mendox rnabey lad guiedz ne no to i, per ran naa tiblque dib zdoo to rnalo to naa, niicle gon to zha psacsi zho Antip, beet zho me i, men ne scataa bioxco bnee xtidz naa lo miech.

¹⁴ 'Per no chop ncuane gon glisqui naa lo to: Lēda i run to randze to grē zha ne squi run zigne been Balam, men ne pquiil Balac bloo Balac guic grē zha Israel beenctal zho xtoł zho, dow zho xpēel grē ma ne biogon lo mdio, ni pquiangob zho zha ne led tsiield zho. ¹⁵ Lēē tiba ga, laa stiba, randze to zha ne bii zianał zhiwseed yozh zha nicolaít; tel naa, ni lalnu rdziguiend naa wseed co.

¹⁶ 'Laa naa rso diidz lo to: golnab perdon, ni golnee lo grē zha co csaan zho grē ncuane ndzinlid ne run zho; sac gon, telne gond zho diidz, ible zial naa zialtīlnie naa zho con spad ne zob ro naa nu.

¹⁷ 'Zha ne rioguicle godiidz rii, yquiaadiag zho ganle zha rnee Espiritu Sant lo grē zha ne no xněz naa, rnee me: Zha ne gdeete diidz lo grē ncuane gunctal xtoł zho, zded naa guielwagw ne rap naa

gbaa yquiin zho; ni zded naa tibga quie nquits lo zho, lo quie co quia lē cub zho, ni zhase gacnan zha nac lē co zho."

Diidz ne bnee Jesús lo zha Tiatir

¹⁸ Blozh min co, nē me:

—Ye lo zha ne quianap zha ne no xněz naa guiedz Tiatir, pxeel diidz rii, gudz lo zho: "Znu nac xtiidz Xpēed Dios, men ne masaque riaazbel bziaalo, men ne masaque rquiabni ni zigne rquiabni guiib brons ne tibaque riar; rnee me:

¹⁹ 'Nan naa grēse zha mban to; ran naa pa lotaa rleynie to naa, dib zdoo to rliładz to cho nac naa, noxco to quiaayun to xtsin naa, tiblque rac to dziits zo to lo xtidz naa; ran naa noxcoraa to quiaayun to xtsin naa niina.

²⁰ 'Per no tib ncuane no glisqui naa lo to: lēda i gon run to randze to wnaa ne lē Jezabel i, rnee me Dios rsiaab guic me grē ncuane rnee me, per nlida; sac gon, loxaque noquidie me grē zha ne no xněz naa, noquiil me zho rquiangob zho grē zha ne led tsiield zho, ni row zho xpēel grē ma ne riogon lo mdio. ²¹ Blactaale pquiambēz naa nab me perdon, ntsēē me lo xquielmban me; per nēd me csaan me grē guielyozh ne run me i.

²² 'Gacnan to sca ganle, laa naa gnabey glan me tib guielguidzdox, tsiechedraa me lo caxtigw co; scaque grēse zha ne zianał zhiwseed me, nroob guielnē ne gnabey naa ted zho, tel laa zho csaand grē guielyozh co. ²³ Ni haxta zut naa zho, zeena sca gan grēse miech ne no xněz naa ganle, naasi nan naa pe rza guic miech, pe rza zdoo zho; gacxe waa, tel pe ncuane run zho, zdedse naa mine rieguial zho tib tib zho.

²⁴ 'Sangue to grē to zha ne zianał guielyozh ne rlu wnaa qui (wseed ne rnee zho i rdeed nroob guielbiini, per nanđ zho gon zhiwseed mendoxa), peet glisquidraa naa lo to. ²⁵ Per none gon tiblque golgac, zeena ine dib zdoo to

malo to naa gaḷ dze ne laa naa guiaḷ stib. ²⁶⁻²⁸ Sac gon, grēse zha ne gdeete diidz lo grē ncuaaṅe gunctal xtoḷ zho, sinque tibaque tsoxco zho gban zho zigne rnabey naa, haxta gdziṅ dze ne nitlo guidzliu, zded naa tib mel gbaa lo zho, mel ne rlan raḷ sil, ni so naa zho gnabey zho grē guiedz. Naa gded guieḷrnabey co lo zho, zigne bneedz Pxoz naaw lo naa; ni lalnu yquiad zdoo zho, grēse miech ntseeb, zunquizh zho zho grētaa guieḷntseeb ne been zho.

²⁹ Grēse zha ne rioguicle godiidz rii, yquiaadiag zho ganḷe zha rnee Espiritu Sant lo grē zha ne no xnēz naa!”

Diidz ne bnee Jesús lo zha Sardis

3 Blozh ga, nē me: —Miṅe gni naa lo luu nu, pquiaaw pxeela guiedz Sardis, lo zha ne quianap grē zha ne ngab xnēz naa, gudz lo zho: “Znu nac xtiidz men ne nzen gadz mel gbaa, men ne nacie zhiEspiritu Dios, Espiritu ne rdeed gadz guieḷbiini, rnee me:

’Nan naa gon pe nac grē ncuaaṅe run to, niicle zēēb diidz mban to, per par naa miech gutle nac to. ² Golcuae zhimcaalo to sca! Golsodziits lo spalalse xtiidz naa miṅe rsoladz to, sac gon zhile laa to lozh guiaanladza. Ne nligaa, ran naa quiayunde to xtsiin Dios zig none gaca. ³ Golsoladz ganḷe zha nac grē wseed ne gocnan to, grē wseed ne bin to; dzigo goltsienala, ni golinab lo Dios gun me to perdon. Sac gon, telne tsienalde tow, zeene laa naa guiaḷ, lega nacle zeene gan to laa naa zole lo to; zig rzac zha ne rzēēb ngbaan lidz.

⁴ Sca nac to, per lo to i gon no bla zha ne bii mbe zdoo, sac zienald zho grē ncuaaṅe run to; rrieequia rdeete zho diidz guiacbeed xab nquits zho ga. Ni zha co nagon rieguiaḷ sēnal zhits naa, sac gop zho xab zho cuidad.

⁵ Golgona ganḷe, grēse zha ne gdeete diidz lo grē ncuaaṅe gunctal xtoḷ zho,

scaania zho tib lar nquitsbie gacw zho; lē zhow, lēē quialew lo guits ne quia lē grē zha ne yгаа tib guieḷmban ndzon ga; haxta zanie naa zho lo Pxoz naa ni lo grē xanjḷ me, guieḷp naa: Lēē zha rii gon no xnēz naa.

⁶ Zha ne rioguicle grē godiidz rii, yquiaadiag zho ganḷe zha rnee Espiritu Sant lo grē zha ne ngab xnēz naa.”

Diidz ne bnee Jesús lo zha Filadelf

⁷ Blozh ga nē me:

—Miṅe gni naa niina, pquiaaw pxeela guiedz Filadelf, lo zha ne quianap grē zha ne ngab xnēz naa, gudz lo zho: “Men mbe ne rapd ni tib dol, men ne rnee niapse diidzli, men ne rnabey zigne bnabey rey David; zaatne rxal me, tsod zha ne grieelo csiooga, zaatne csiooggaa mew, tsod zha ne grieelo cxala; znu nac xtiidz me, rnee me lo to:

⁸ Nan naa grēse zha mban to; niicle ne squi bii nsis rac to, per rioxco to ron to xtidz naa, ni rqueetsde to ne nli rliladz to naa. Gacxe waa, rrieequia laa naa rxal tib puert ted to, ni choot grielod csioog puert co. ⁹ Bii zan to ganḷe, zeene laa naa cxel gza zha ne ngab lo mendox i, guiaad zho guiadquitsgzhizh zho lo to, zha ne noquidie i rnee zho xnēz naa no zho. Ga gan zho ganḷe nli rleynie naa to. ¹⁰ Ne squi tiblque rac to ron to xtidz naa, peet güeynied guic to niicle pquianal miech to, ible squianaap naa to, ganḷe to guieḷnēdox ne gan grē miech ne ndxie lo guidzliu.

¹¹ Golsoladza ganḷe, merle guiaḷ naa. Golguieṅ csaande to xtidz naa mine nanḷe to, zeena tsod stib zha ne ctiche miṅe rieguiaḷ to gnedz naa lo to. ¹² Grēse zha ne gdeete diidz lo grē ncuaaṅe gunctal xtoḷ zho, so naa zho gac zho zig grē pilar nroob ne zo len xyadoo ro Dios, ni gdzindraa dze ne grieese zho ga; cho pilar co, ga yquia naa lē Dios, ga yquia naa tib lē cub naa. Laa zho ngable guiedz ne rn-

abey Dios ga; lëë guiedz co nac Jerusalén cub ne gnabey me guiet gbaa.

¹³’Zha ne rioguicle godiidz rii, yquiaa-diag zho ganle zha rnee Espíritu Sant lo grë zha ne no xnëz naa.”

Diidz ne bnee Jesús lo zha Laodicé

¹⁴Ni në me:

—Mìne gni naa niina, pquiaaw pxeela guiedz Laodicé, lo zha ne quianap grë zha ne ngab xnëz naa ga, gudz lo zho: “Mèn ne rnee niapse diidzli, mèn ne run grëse mìne rnabey Dios, mèn ne bzo Dios psan grëse ncuane no, znu nac xtiidz me, rnee me lo to:

¹⁵’Nan naa grëse zha mban to. Ran naa noxcode to grë mine rnabey naa to, ni niicle rsaandgaa tow; nac to zig nac tib ncuane loxaque ndzëyopse, niicle niagda ni niicle nlëedgaa. ¡Tebaa nac to zig tib nis yag, zig tib nis lëëgaa! ¹⁶Per na gon ne squi nac to zig tib nis ndzëyopse, ni lalnu rdziguiend naa ncuane run to. ¡Zhile gon laa to gunctisib naa!

¹⁷’Rnee to grëse ncuane rquiin to laaw quianiele to, ible peet liaadz rac-draa lo to, ìni riende to gon ni lalnu peet nonde to! To nac miech ne mazdraa mban, peet rapde to, ni lar ne ctse lad to guiend, rriequia haxta ni lo to roldraa.

¹⁸Laa naa rso diidz lo to: Telne racladz to nlipaa gapchen to, goltè lo naa, naa cto guuib or ne mazdraa wen lo to; xab tow, naa cto lar ne mazdraa nquits gacw to, zeena ctoladzniedraa to to ne squi guiend pe ctse lad to; haxta nis rmed ne tso bziaalo to, naa gnedza, zeena gbiire gan to stib.

¹⁹’Grë zha ne rleynie naa, rlisqui naa grë ncuane nonguield ne run zho, rteed naa zho tib caxtigw parne cseed zho ndzinli gban zho; gacxe waa gol-gac ndzinli stib, goltsoxco mìne rnabey naa. ²⁰Laa naa quiambëz to gon gbiire gbig to lo naa. Rriequia ro lidz to zo naa, quiabedz naa to. Zha ne yquiabladz

cxal ro lidz sëëb naa, zdeed naa, ni haxta sobnie naa zho diowxtsee no grop no. ²¹Grëse zha ne gdeete diidz lo grë ncuane gunctal xtol zho, zded naa diidz sob zho cue naa, zaatne sob naa gnabey naa; zigne zoob naa cue Pxoze naa niina nonabey no; sac tel naa, bdeze naa diidz niun naa mìne rnabey mendox.

²²’Zha ne rioguicle godiidz rii, yquiaa-diag zho ganle zha rnee Espíritu Sant lo grë zha ne no xnëz naa.”

Rooline zho Dios gbaa

4 Zeene bui naa stib, gon naa laa tib puert quia zhan gbaa, nzhialse puert co. Horco biire bin naa tsi mèn ne bnee lo naa ga glo, mèn ne nac tsi ga zig tsi tib trompet, në me:

—Biep, dë nu ganle, zeena glu naa lo luu zha nac grë ncuane ziaadyob gac.

²Zigne sca në me, hor co blu Espíritu Sant lo naa, gon naa laa tib xcan zo gbaa, tib xcan ne rzob mèn ne rnabeya. Lo xcan co, ga zob tib mèn co, ³masaque rbebni me zigne rbebni quie ne rnee zho jasp, quie ne rneegaa zho cornalin. Igose xcan co quia tib guitye, rbebniw zigne rbebni quie ne rnee zho smerald; ⁴ni zo zgalptap xcan igow, tibga mengol zob tib tib lo xcan co, dib nquitsbiese rna xab me, ni zob tibga coron or guic me. ⁵⁻⁶Masaque riab belye, ratsie rnee nguizi, ni zëëb tsi miech zaatne zo xcan ne riaan glowtaa ga. Zaatne nac delant lo xcan co, masaque rluw zig rlu lo nisdoon ni rbebela zig rbebel quie zed; ni noquia gadz biini nroob ga, lëë gadz biini co nac gadz guielbiini ne rap Dios.

Igo xcan co, ga zo tap bult mban, tibgaw zo tib nëz; nëz low, nëz zhitsaquew zob bziaalow. ⁷Tiba rlu zig rlu meedz, stiba rlu zig rlu tib ngon yeen; laa schop mìne riaan ga, tiba rac lo zig rac lo miech, laa stiba rlu zig rlu tib msi nroob ne quiasiibe. ⁸Tib tiba zob xoopga xiila,

ndziib bziaalow zhits xiila, len xiila ne;
tibaque nguiedz zëeb tsiw, rmeew;
¡Men ndzondoo nac Dios!
¡Men nabay nac me, nroob poder ne rap
me!

Notaque me, me ga no padzeela, me no
niina, ni lëëque me ga no guiaad.

⁹Gza tap bult mban co, roolniew men
ne zob lo xcan ro, (men ne gdzind dze
guet) rsannona me, ni rdeeda xquidz lo
me. Zigse sca run gza bult co, ¹⁰scasaque
gza galptap mengol ne zob ga, rquiits-
gzhib me lo men ne zob lo xcan ro co,
gzase me, rgob me xcoron me rguix mew
nëz lo men ne zob lo xcan co, ni rnee me:

¹¹Luu nac xDios no, luu nac men ne n-
abay no.

Luuse nac men ne rieguial dziuunnon no,
ni gnee no grë diidz ndzon lo luu.

Nroob poder ne rap luu, sac grëtaa
ncuaane no, luu bzaaw;

laaw biao sac ible sca gocladz luu, ni
laaw niaagaa niina, sac ible sca
racladz luu.

Tib guits ne nzhidoo gadz lë cint

5 Zeene bui naa stib, gonpaa naa men
ne zob lo xcan ro co, nose tib guits
nroob nia derech me. Gropse nëz guits
co quia, ndibëdsew, nzhidoo gaw gadz lë
cint. ²Ni gon naa tib anjl, tib men macis
rlu me, nguiedz zëeb tsi me, bnabdiidz
me rëb me:

—¿Cho rieguial chug cint ne nzhidoo
guits qui, cxal zho low?

³Ni tib choot pxald lo guits co, ni-
icle gbaaw niicle lo guidzliuw, niicle
zhan guidzliugaaw, brieequiad tib zha
ne nchug cint co, nwi zho lo guits co.

⁴Mban goc naa, psilo naa nguiedz
roon naa, gon naa sca brieequiad tib zha
ne rieguial nxal lo guits co, nlab zho low.

⁵Dzigo bnee tib mengol ne zo gax lo
xcan co, në me lo naa:

—Goond luu. Lëz ganle, men ne brie-
quia lo xtii Judá, lo xtii rey David, me

cchug gza gadz cint ne nzhidoo guits
qui, me cxal low. Ible me rieguiala, sac
gon psiaablo me grëse zha ne rlëë lo me;
rrieequia nac me zig tib meedz.

⁶Horco bui naa zaatne nac lo xcan ro
co, gon naa glowtaa lo gza bult mban
co ni lo gza mengol co, ga zo tib Carner
yeen. Rlupaa zha psacsi zho ma, zeene
beet zho ma. Zob gadz zhoz ma, ni zob
gadz bziaalo ma, rrieequia gza gadz bzi-
aalo ma ga, min co nac gadz guielbiini
ne rdeed zhiEspíritu Dios.

⁷Dzigo wbig men ne nac Carner yeen
co, bnaaz me guits ne no nia derech men
ne zob lo xcan ro co. ⁸Zigne bnaaz me
guits co, laa gza bult mban co, ni gza
galptap mengol co pquiitsgzhib lo me.
Tib tib mengol co nzhense me tib arp ni
tib ptsigui or, rso tib gox ndzon len pt-
sigui co (rrieequia gox co nac grë diidz
ndzon ne rnee grë zha ne no xnëz Dios
zeene rzodiidznie zho me).

⁹Dzigo psilo gza mengol co biil me tib
cant cub. Znu rnee lo cant co:

¡Ible luu rieguial ycaania guits qui, luu
rieguial chug gza cint ne nzhidoo
i!

Sac luu bded grëtaa guielnë co psacsi zho
luu, haxta bzhiee xchen luu;

sca psilaa luu grëlose dii miech,
tel pa guiedztaa nac zho, tel pa diidztaa

rnee zho, tel pa naciontaa ngab zho.

¹⁰Laa luu bzhii no grë no gac no tib
guiedz cub,

guiedz ne gnabay Dios;
no gac pxoz ne gun dziin lo me,

masaque tipse gban no zeene gnabay me

lo guidzliu.

¹¹Zeene bui naa, gon naa anjl guizhiu
ne ndxie zaatne zo xcan ro co, led zha
ne grielod glab new. ¹²Nguiedz zëeb

tsi zho grë zho gza bult mban co, ni grë
mengol co, rnee zho:

¡Men non nac men ne nac Carner yeen
ne squi rlu beet zho!

Me rieguiaḷ gnabey, meḅ ro nac me,
choot grielod csiaablo me.

Ladznia me no grëse guielnzaac, me rap
grëtaa guielrien,

Meḅ ndzon nac me, me none dziuunnon
ne, me none dzioolnie ne.

¹³Horco grëse miech, grëse ma, grëse
ncuaane bzaa Dios, zigtaa gbaaw, zigta-
gaa lo guidzliuw; zigtaa zhan guidzliuw,
zigtagaa lo nisdoow; nguiedz zëëb tsi
zho, rnee zho:

¡Nliw, meḅ ne zob lo xcan ro qui, ni meḅ
ne nac Carner yeen qui,

ible rieguiaḷ dziuunnon ne grop me!

¡Me rnabey, lo me none gnee ne grëtaa
diidz ndzon;

nadzew, gzhew, ni grëragaa izdoo ne
ziaadraaw!

¹⁴Pquiab gza tap bult co, rëb zho:

—¡Scaw, sca no gaca!

Dzigo gzase mengol co, laa zho pqui-
itsgzhib lo meḅ ne zob lo xcan ro co;
psilo zho rnee zho grë diidz ndzon lo me.

Gza gadz sell co

6 Blozh ga, gonpaa naa zeene laa meḅ
ne nac Carner yeen co pchug primer
cint ne nzhidoo guits co. Horco laa tib
bult mban co bnee; masaque nac tsiw zig
rio bi rnee nguzi, nëw lo naa:

—¡Dë ganle gwi luu!

²Dzigo wbig naa, gon naa tib guay
nquits. Zhits guay co zob tib meḅ co
nzhen me tib yag arcw ne rquiaa zho
flech; blozhse pcaania me tib coron ne
rzob guic zha rnabey, dzigo laa me briece.
Ine zob nzë me lad guay co, laa me zie
ziegun me gan lo grë zha ne rlëë lo me.

³Blozh ga, laa meḅ ne nac Carner yeen
co pchug stib cint ne nzhidoo guits co.
Dzigo bredz stib bult co naa.

⁴Dzigo bia naa, gon naa laa stib guay
nizhnie briece, zob stib meḅ co lad ma.
Blozhse pcaania me tib spad nroob, ni
pcaa me diidzbey tsielodil me miech lo

guidzliu, zeena gutlsa zho; laa me briece
ga, laa me zie.

⁵Zeene laa meḅ ne nac Carner yeen
co pchug bion cint ne nzhidoo guits co,
dzigo bredz stib bult co naa, nëw lo naa:
—¡Dë ganle gwi luu!

Dzigo gon naa tib guay ngas, scasaque
zob stib meḅ co lad ma, nzhen me tib
zhiguiib. ⁶Ni groḷtaa zaatne zo gza bult
mban co, zëëb tsi tib meḅ co, rnee me:

—Tib kiltaa zhoxtil gon ycaa zha ne
gun dziin tib dze; tel zhoḅgaaw, tson-
taa kila ycaa zho; sangue nceit ni vin ib
ygaald luuw.

⁷Laa zeene goc cint co tap ziechug
meḅ ne nac Carner yeen co, dzigo laa stib
bult mban co bredz naa.

⁸Horco, zeene bui naa, gon naa tib
guay nguets; lad guay co zob tib zha co lë
Guieḷgut; zhiits co nal stib zho lë Gabil.
Lo tap lal ne nlë miech ne ndxie lo guid-
zliu, pcaa grop zha co diidzbey tsiegut
zho tib lal grë miech co; zha ne guet
lo dil, zha ne guet lo gbin, zha ne guet
lo guielguidz, zha ne guetgaa lo grë ma
ntseeb.

⁹Dzigo pchug meḅ ne nac Carner yeen
co stib cint co, goca gaay. Horco, zaatne
nac zhan mezh ne nac mezh lo pcoog,
ga gon naa grëse zha ne psacsi miech,
beet miech zho loxaque ne bnee zho Xti-
idz Dios, ni dib zdoo zho bililadz zhow.

¹⁰Nguiedz zëëb tsi zho rnee zho:

—Luu ne nac luu meḅ nroob ne rn-
abey, luu ne nac luu meḅ ne rnee niapse
diidzli, ¿pa hor dzigo cuedz luu grë
miech ne ndxie lo guidzliu, zha ne scataa
psacsi no? ¿Pa hor gunquizh luu zho grë-
taa mine been zho ga?

¹¹Dzigo bdeed me lar nquits got zho;
rëb me lo zho no cuëz zho zniip, sac
grëraa zha ne nacgrë zho ngab zho lo
Jesús, no spalal zha ne naraa csacsi
miech zigne psacsi miech zho; haxta gza
zho dzigo laa me gun guielwxtis.

¹²Blozhse ga, laa Carner yeen co pchug stib cint co, goca xoop; hor co laa tib zhodox bni. Gonpaa naa zeene laa lo ngbidz pcow, zig nac zeen tib lar ngas pquia lo ngbidz; laa mëë zig rludaa ren, sca nizhnie rlu lo mëë; ¹³grë mel ne ndziib gbaa, masaque bliaal ma lo guidzliu zig rliaal grë guigw yeen zeene rriee medox. ¹⁴Znuse bdibëd gbaa, goca zigne racse grë guits ne rdibëd; grë gui, grë guidzliu win ne no lo nisdoo, nëzrii nëzrec biaana. ¹⁵Dzigo grëse zha ne nac zha rnabey lo guidzliu, grë zha ne nac zha non, grë zha ne rapchen, grë zha nroob ne rnabey lo menguiib, grë zha nroob ne non xtiidz, ni grëragaa miech, niicle grë zha ne run xtsiin beña, niicle grëgaa zha ne run xtsiin zhala, grëse zho biolan, zha ne biolan len grë bliee, zha ne biolangaa len grëraa quie ne no dan; ¹⁶nguedz roptsie zho mee zho lo grë gui co, lo grë quie co:

—¡Golliaal lad no, golcolan no, zeena gandraa men ne zob lo xcan ro co no! ¡Golcolan no, zeena dziand no grëtaa guielnë ne cxeel men ne nac Carner yeen co! ¹⁷¡Sac nasi laa dze ro co bdzin! ¡Laa guielnëdcox co nagon ziaadle! ¡Ncuuane lëëbd no low!

Zha ne pcuue lo grëse zha Israel

7 Bded ga, gon naa tap anjl. Lo gza tap lad guidzliu, tibga anjl co zo tib lad nocuëz me me. Wdzeepaaw, per ni tib zhiblag yag rmidraa, niicle lo nisdoo dzese biaca; sac ni palal rrieedraa me lo guidzliu.

²Tibaque zeene brieequia stib anjl nëz ne rlan ngbidz, neyse me xsell Dios; nguedz bnee me lo gza tap anjl co (anjl ne pcaa diidzbey ga gun guielqui lo guidzliu ni lo nisdoo) rëb me:

³—¡Golcuëz zniip! Gunde to guielqui lo guidzliu niina, niicle lo nisdoo, niclegaa grë yaga; sac naraa lozh guio-

quiaa no xsell xDios ne quia grë zha ne run xtsiin me.

⁴⁻⁸Zeene blozh pquia sell co quia grë miech co, bin naa lo grë zha ne ziaad lo xtii zha Israel, rga zho tib gayoo choop-tap mil:

Tsiipchop mil zha xtii Judá, tsiipchop mil zha xtii Rubén, tsiipchop mil zha xtii Gad, tsiipchop mil zha xtii Aser, tsiipchop mil zha xtii Neftalí, tsiipchop mil zha xtii Manasés, tsiipchop mil zha xtii Simeón, tsiipchop mil zha xtii Leví, tsiipchop mil zha xtii Isacar, tsiipchop mil zha xtii José, tsiipchop mil zha xtii Benjamín.

⁹Zeene bui naa zaatne zo xcan ro co, zaatne zo men ne nac Carner yeen co, miech guizhiu ne gon naa ndxie ga; grë lose dii miech ne ndxie dib lo guidzliuw. Ne nligaa miech guizhiuw, led miech ne lëbd ne glab new; grëse zho niapse lar nquits nacw zho, ni no tiblëga zin nguia nia zho; ¹⁰nguedz zëëb tsi zho, mee zho:

Dios, men ne rdziuunbey ne, men ne zob lo xcan ro qui, me nac men ne psilaa ne lo grëtaa xtol ne;

me ni men ne nac Carner yeen qui.

¹¹Horco grëse anjl ne ndxie igo xcan ro co, igo zaatne zob grë mengol co, ni zo gza tap bult mban co; grëse zho laa zho pquitsgzhib nëz lo xcan co, haxta bzooblo zho lo liu, rdeed zho xquizh lo Dios ¹²nee zho:

¡Scaw! Luu none dzioolnie no, none tibaque gneedz no xquizh lo luu, luu rieguial dziuunnon no; sac luu nac xDios no.

Luu nac nac men ne rienraa, men ne rap poder;

gacxe waa luu none ycaania grëse diidz ndzon,

gzataa dze, niicle nadzew, gzhew, ni grëragaa izdoo ne ziaada. ¡Sca none gaca!

¹³ Dzigo bnabdiidz tib mengol co, në me lo naa:

—¿Pe nan̄ luu sca cho nac grë zha ne nacw lar nquits qui? ¿Pe nan̄ luu pa nëz ziaad zho?

¹⁴ Dzigo rep naa lo me:

—Nan̄ naaw. Bzhiguieł bnëw lo naa. Nëchaa me:

—Lëë grë zha qui gon̄ bded grëtaa guiełnëdox ne goc lo guidzliu. Laa zho nacw lar nquits qui, sac wbig zho lo Jesús psan̄mbe xchen me zho lo dol̄.

¹⁵ Gacxe waa squitaa ndzon ndxie zho gax lo zhixcan ro Dios, dze guieel quiay-oołnie zho me len̄ xyadoo ro me. Me nac men̄ ne quianap zho grëse zho; ¹⁶ led yedraa niina guet gbin zho, guet nisgaa zho; led yedraa niina ctsuu ngbidz zho, sonëëggaa zho. ¹⁷ Men̄ ne nac Carner yeen̄ ne zo delant lo xcan ro qui, me gdeed ncuaane gow zho, ni zigne rienie baxtor xpëcwxiil zho ro guiuu, sca zienie me zho zaatne quiada nis ne rdeed guiełmban. Led yedraa niina goon zho.

8 Laa zeene laa men̄ ne nac Carner yeen̄ co pchug stib cint ne nzhidoo guits co, cint ne naca gadz ga, dzese biac gbaa; xtselaa sca biac dze gbaa.

² Blozh ga, gon̄ naa zeene pcaania gadz anjl ne rzo lo Dios, tibga trompet. ³ Ni brieequia stib anjl nzhën tib ptsigui niaa niapse guiib or. Zigne bdziñ me, bzo me delant lo xcan ro co, zaatne zo mezh or ne nac lo pcoog; ga pcaania me nroob yaal parne ctsieel mew grë diidz ne rnee grë miech ne no xnëz Dios zeene rzodidznie zho Dios. ⁴ Dzigo bzëëg anjl co yaal co, tipse goc gox co grëw xtiidz grë zha ne no xnëz Dios, laaw bdziñ lo Dios. ⁵ Blozh ga, ptop me grë gui ne ndziib lo pcoog co bloo mew len̄ ptsigui ne nzhën me ga, blaal̄ mew lo guidzliu; dzigo psilo

masaque rnee nguzi, rio bi, riab belye ne, ni bni tib zhodox.

Pcuedz gadz anjl trompet

⁶ Horco laa gza gadz anjl ne pcaania gza gadz trompet co, laa zho nsinle nzhen̄a, parne ycuedz zhow.

⁷ Zeene laa tib anjl co pcuedz zhitrompet zho, hor co psilo bliaal̄ guieque lo guidzliu ni bliaal̄ guilëë notsa ren. Gzoob ne telne glë guidzliu tson̄ lal, dzigo masaque tib lala bnitlo, bnitlo grëse yag, grëse lo guizh nguia ne no low.

⁸ Blozh ga, zeene laa stib anjl co pcuedz xquiib, hor co biab tib ncuaan̄ co nisdoo, masaque rluw zig rlu tib gui nroob ne quiayazbel. Gzoob ne tel̄ glë nisdoo tson̄ lal, bnitlo tib lala, bialow niapse ren zeene laa ncuaan̄ co biab low. ⁹ Bnitlo grëse ma, grëse guizh ne no lo tib lalga nis co, haxta grë barcw ne no low bnitlo.

¹⁰ Loxaque blozh goc min̄ co, laa stib anjl co pcuedzaque xquiib zho, hor co laa tib mel nroob bringaa gbaa, masaque rso ma bel zig razbel tib lë guier, biab ma lo guidzliu. Lo grë guiubee, lo grë zhlian ne no lo guidzliu, lo tson̄ lal ne gzoob ne naca, pxin̄ ma tib lala. ¹¹ Grëse nis co goc nlayag, ndal miech ne gut low. Nacne bleelë zho mel co Nlayag.

¹² Zeene laa stib anjl co pcuedz xquiib goc zho tap, hor co zigtaa lo ngbidza, zigtagaa lo mëëw, biuu tib niaza, schop niazaquew biaan̄ rziini; grë mel ne ndziib gbaa, gzoob ne lo tson̄ lal ne nac ma, hor co biuu tib lal ma. Rlupaa lega net net rquiaa ngbidz; zaatne nacgaa guieel, ni palal peet rlud.

¹³ Laa naa nowi, tibaque zeene gon̄ naa laa tib anjl bded grołtaa zhan gbaa, haxta rlupaa rio bi zie me lo me, nguiedz zëëb tsi me rnee me:

—¡Probsaxe grë miech ne ndxie lo guidzliu! Sac ncuaane ntseebraa gac,

zeene laa stson anjl qui ycuudz xquiib me.

9¹⁻² Zeene laa anjl ne nac zho gaay ga pcuedz xquiib, hor co gon naa laa anjl ne briece gbaa padzeela ga pcaania tib liow, pxal zho ro tib guierdoo ro. Zeene laa ro guieer co bzhial, per nli goxdoo ne briece ga, tib psioogsew zhan gbaa, per ni palal rludraa lo ngbidz. ³ Lo gox co, ga briece tiblo metso bliaal, bioogse ma gdipse lo guidzliu, grëse ma zob xcots ma, zig zob xcots meegu. ⁴ Nacle diidz, peet gund ma grë guizh nguia, grë yag ne zëeb lo guidzliu, sinque laa ma tsie tsiesacsi ma grëse miech ne quiad xbey Dios quia. ⁵ Yoobdox ne yquia zaatne yquiaaxcots ma, zigne rquia yoob zaatne rquiaaxcots meegu; per gute ma zho, loxaque sca csacsi ma zho dipse len gaay mëë. ⁶ Len dze co, haxta zhal miech yguib zho dien zha guet zho, per grieelod guet zho; soobladznë zho, tebaa zha gdzin guielgut lo zho, per leļ sozita.

⁷ Masaque rac grë metso co zig rac grë guay ne tsienie zho lo dil. Rac lo ma zig rac lo miech, ni zob tib ncuaan co guic ma, rluw zig rlu tib coron or; ⁸ zëeb guitsguic ma zig zëeb guitsguic men wnaa, ni zëeb lay ma zig zëeb lay grë meedz. ⁹ Dipse lad ma ntse tib ncuaan co, rluw zig rlu guuib; rio bi rzedz lo xiil ma, pale bi ne rio zeene rded tib dzoon carret ne rgob guay, zie lo dil.

¹⁰ Lëëdaa meegu, sca zob xcots grë metso co lo xcol ma, mine yquiaaxcots ma miech dipse len gaay mëë co. ¹¹ Lëë grë metso co pxeel anjl dox ne rnabey guierdoo co, anjl ne rnee zha Israel Abadón, laa xtiidz zha Gres rnee zho ma Apolión. (Nac diidz co, zig rnee ne xtiitsë ne: Zha ne rnitlo.)

¹² Lëë tib guielnë ne gan miech ga, per bii ziaad schopa.

¹³ Gon naa zeene laa anjl ne nac zho xoop ga pcuedz xquiib, hor co bin naa

zëeb tsi tib men co lo mezh or ne nac lo pcoog ne zo lo Dios ga. ¹⁴ Zëeb tsi men co rnee me lo anjl ne blozh pcuedz xquiib ga:

—Güey, güeyxadz gza tap anjl dox ne quiadoo ro guiubee nroob ne nac guiubee Eufrates.

¹⁵ Ible bzole gza tap anjl dox co par gun ma guielqui zeene laa dze co, laa hor co gdzin; dzigo nac ne hor co laa ma blaa, parne tsiegun ma miech. Gzoob ne telne gac miech ne ndxie lo guidzliu tson tant, masaque tib tant zho gnitlo ma. ¹⁶ Bin naa chop gayoo millon zhaguiib ne gacnie ma, niapse guay sob grë zhaguiib co; masaque ma gnabey lo zho.

¹⁷ Gonpaa naa zha rlu grë zhaguiib co zob zho lad grë guay co. Grëse zho quiantse tib lë guuib gdipse zdoo zho; masaque tson color rbeew, rbeew color nizhnie, color nguia gbaa, ni color guts. Laa grë guay co, niaa guic ma zig niaa guic meedz, masaque rriece bel, rriece gox, rriece zufr ro ma; ¹⁸ lo gza ncuaan ne sca rriece ro ma, min co beet lalga miech co.

¹⁹ Lala rap grë guay co xquielntseeb ma ga nëz ro ma, ni rapaque maw nëz lo xcol ma; masaque nac xcol ma zig nac grë meel dox, rias xcol ma rquiaa maw lad miech.

²⁰ Niicle scataa nzian miech ne gut, zha ne biaan ib bdziebd zho. Tibaque laa zho no ziegan zho mendox, ziegan zho grë zhimdio zho, mdio ne niaa guuib or, mdio ne niaa guuib plat, mdio ne niaa guuib brons, mdio ne niaa quie, mdio ne niaagaa yag; ncuaane randa, ncuaane ronda, ncuaane rzëda, per laa zho no tibaque ziegan zhow. ²¹ Laa zho no quiajut zho samiech zho, quianab zho pe sac samiech zho, quiangob zho zha ne led tsieeld zho, tibaque quianab zho, jni palal zienied guic zho csaan zho grë guielntseeb co gbig zho lo Dios!

Anjl ne nzhen tib libr win

10 Blozh ga, gon naa biet tib anjl gbaa, rlupaa tib anjl nona, masaque no me tib lo xcow, ni quia tib guitye glaa guic me. Biinidoo ne rrieo lo me, lëëdaa lo ngbidz; scasaque ni me, masaque riaazbela. ²Nzhen me tib libr win, nzhialse lo libr co.

Bdzin me lo guidzliu, bzo me ni derech me lo nisdoo, laa min revés bzo me lo guidzliu. ³Ga zo me pquiaa me tib redz nroob, lëëdaa zeene rgobeedz tib meedz; loxaque blozh pquiaa me redz co, zeene laa gadz nguzi bnee, pquiab lo redz ne pquiaa me ga.

⁴Laa naa zale yquia naa mine bnee gza nguzi co, tibaque bin naa tsi tib men co gbaa, në me lo naa:

—iCoo, yquiaad luu mine bnee gza nguzi qui! Sac nodne gacnan miecha.

⁵Dzigo gon naa blis anjl co nia derech me nëz gbaa, ⁶bzeet me Dios (men ne gdzind dze guet, men ne bzaa gbaa, bzaa guidzliu, bzaa nisdoo, ni grëtaa ncuane no low), rëb me:

—Dios zobwi ganle, nasi gon laa dze co bdzin. ⁷Grëse mine bnee me lo zha ne biadteed xtiidz me, laaw gac niina zeene laa stib anjl qui ycuedz xquiib zho. Grëse mine no guic me gun me ni gonañd miecha, niina laa zho gana.

⁸Dzigo wbiire bnee men ne zëëb tsi gbaa ga, në me lo naa:

—Güey, bnaaz libr win ne nzhen anjl ne squi zo i.

⁹Nacne bia naa lo anjl co, rep naa lo me gneedz me libr win co, dzigo nëchaa me lo naa:

—Ledaaw nu, per lëëraasi none gow luuw. Zeene laa luu noyowa, nex sac luuw; per zeene gdzina zdoo luu, laaw gacnla.

¹⁰Dzigo bnaz naa libr win co nia me, dow naaw. Nligaa nex rdioowa now ro naa, per zeene laaw bdzin zdoo naa,

beennew. ¹¹Blozh ga, nëchaa men ne bin naa tsi glo ga:

—Naraa gon none gnee luu ganle zha nac ncuane ted grëraa miech, zigtaa zha ne no guiedz wina, zha ne no guiedz nrooba, zha ne rnabeygaaw.

11 Dzigo biaad tib men co bneedz me tib yag ne rbix lo naa, rgaaw zig tib metr, bnabey me naa ctix naa xyadoo Dios, ctix naa zaatne nac lo pcoog, ni glab naa dien palal miech ne rie yadoo co riegan zho Dios. Pso me didz lo naa, në me:

²—Lëëraasi ctiixd luu nëz ley, sac laa lugar co nole lадznia zha zit; zha gnabeya, zha gnabey guiedz ndzon ne nacchen Dios i; dipse len tson iz grol ne ziaad nu, gun zhow zigne gacladzttaa zho. ³Gane len dze riique laa naa cxel chop zha ne runbepaa cho nac naa, tib lar beelze gacw zho, zig racwxab zha ne no guielnë; dipse len tson iz grol co gnee zho ganle pe nac grë ncuane ziaadyob gan miech.

⁴Lëë zha co nac grop zhan yag oliv ni grop biini ne raquietle lo Xtiidz Dios ga zo lo Dios (men ne nac bizhuan guidzliu). ⁵Zeene laa grop zha co bdzin, choot brieelod lega nsacsi zho, sac grëse zha ne wbig gocntseeb lo zho, tib biecase zha co lo bel ne brieer ro zho. ⁶Bdeed Dios poder lo zho ycuëez zho nisguie, zrieelo gnabey zho guiabda dipse len dze ne nonee zho lo miech ga, haxta zrieelo gnabey zho tsaalo nis gaca ren; ni horne gacladzttaa zho, zrieelo ndalraa grë guielzi ne gnabey zho gan miech.

⁷Zeene bzase dze ne bnee zho lo miech ga, hor co laa tib madzabdoobrieer len guierdoo co; ntseeb rac ma lo zho. Mbe blëbd zho lo ma, beet ma zho. ⁸⁻⁹Tson ngbidz grol goot xcuerp zho grol len guiedz ro co, guiedz ntseeb co. Pale Sodom, pale Egipt, sac gon guiedz coque, ga pquiaa miech men ne rnabey zho lo cruz. Ib bdeete miech

diidz ngeets zho, grëse miech ne no dib lo guidzliu gon sca nix zho ga; ¹⁰dipse lo guidzliu, masaque tib guie|b-leydoo ne bio miech gza dze co, gon zho laa grop zha co gut, sac nroob benneed zho miech. Lo guie|bley co, haxta bioxco miech pe ncuaa|ne bgadlsa zho lo samiech zho.

¹¹Zeene blozh tson ngbidz grol co, tibaque zeene laa zhiEspiritu Dios bdeed guie|mban lo grop zha co stib, laa zho guche ga; grëse miech ne ndxie lo guidzliu, zeene gon zhow, per nli bdzieb zho, rdzieldraa zho zha gun zho. ¹²Horco nguiedz zëeb tib tsi men co gbaa, bredz me grop zha co. Gonlo grë miech ne rlëe ran zho ga, masaque no zho tib lo xcow, laa zho bzoquia gbaa; ¹³loxaque laa zho bzoquia gbaa, zeene laa tib zho-dox bni. Gzoob ne telne nlë guiedz ro co tsii tant, tib tanta bnitlo lo zho co; gut gadz mil miech. Grëraa zha ne bi-aan, mazdraa bdzieb zho, lo dzeb co laa zho psilo roolnie zho Dios.

¹⁴Sca gan miech stib guie|në co. Lëe bropa ga, per znusaque guiaad stiba. ¹⁵Sac loxaque blozh ga, zeene gon naa laa stib anjl ne nac zho gadz ga, pcuedzlaque xquib; hor co nzian tsi men co zëeb gbaa, nguiedz rnee me: Nasi nagon, laa Dios gnabey grëse guiedz ne ndxie lo guidzliu, grop me Men ne pxeel me ga.

Mele gnabeya, grëtaa len izdoo ne ziaad.

¹⁶Psiloque gza gal|tpa mengol ne zob lo xcan ne zo lo Dios ga, pquiitsgzhib zho lo me, haxta bzooblo zho lo liu, rdeed zho xquizh lo me, ¹⁷nee zho:

Xquizh xquie|nzaac luu, sac nasi laa luu glu men nroob nac luu, laa luu csilo gnabey.

Luutaque nac men ne mazdraa nroob.

¹⁸Grëse guiedz, briequia zha ne gocntseeb lo luu;

per nasi laa dze bdzin, laa luu glugaa xquie|blëe luu lo zho.

Grëse zha ne gutle, niina laa luu gdeed mine rieguial zho tib tib zho.

Grë zha ne been xtsiin luu, pteed zho xtidz luu lo miech, grë zha ne ngab lo luu, zha ne runnon lë luu,

zigtaa zha gola, zigtagaa zha wina, niina laa luu gdeed zhipremio zho; zha ne na loxaquegaa guie|ntseeb been, niinataa laa luu gnitlo zho.

¹⁹Loxaque blozh sca bnee gza mengol co, zeene laa yadoo ne no Dios gbaa bzhial, nieenpaa guin ne notsow quie lag ne pquia diidz ne psan me lo miech. Horco psilo bliaal tib guiequiedox, loxaque nëzrii nëzrec riab belye, ni rio bi ratsie nguzi; guiequiedox co nolial, zeene laa tib zhodox bnique.

12 Horco gon naa blu tib ncuaa|ne gzee zdoo ne zhan gbaa. Ga briequia tib wnaa, masaque igose me riab tib biini, zig riab xbiini ngbidz, ni zob tib coron guic me, quia tsiipchop mel cho coron co; ngali ni me zob mëe. ²Rlupaa zoney me mëed, rquiaadan me redz, laa me rquiale yoob ne gap me xpëed me.

³Tibaque briequia tib ma ngol, dipse ma rna nizhnie, niaa ma zigne niaa ngutsiets; zob gadz guic ma, ni tsii zhoz ma, tibga coron zob tib tib guic ma. ⁴Znuse bzieecw ma xcol ma, blaal ma palal mel gbaa lo guidzliu; gzoob ne nlë mel tson tant, masaque tib tant mel co blaal ma. Wbig ma lo wnaa co, quiambëz ma gal xpëed me, parne gow ma win.

⁵Per zigne gol mëed co, znuse bdzin win nëz lo Dios, zaatne zob me rnabey me; tib mëedbguiw, nacle diidz tib men ndip xtiidz gac win, win gac men ne gnabey grëse guiedz ne ndxie lo guidzliu. ⁶Horcogazhaquew bzhoon wnaa co ga, laa me zie tib dan zit, zaatne psanle

Dios diidz gan zho me dipse len tson iz groļ.

⁷Nacne bio tib diļ gbaa. Psilo anjl Miguel, grē me grēraa anjl ne nacnie me, bdiļnie me ma ngol co grē ma xanjl dox ma; ⁸per blēbd ma, beņcxoon zho ma gbaa. ⁹Lēē ma ngol co ga nac meel dox ne notaque padzeela, lēē meņdox ga, lēē Satanās ga, ma ne scataa tibaque noquidie miech; hor co laa zho bzonēz ma nēz lo guidzliu, grē xanjl dox ma.

¹⁰Dzigo bin naa, nguiedz zēēb tib tsi meņ co gbaa, rnee me:

¡Lēēw nagon!

¡Nasi laa dze ne ycaaniapaa Dios zha ne ngab lo me, laa dze co bdzin!

Nasi laa me blu poder ne rap me, nasi laa Men ne pxeel me lo guidzliu ga gnabey lo grēse zha ne ngab lo me.

¡Laa me beņcxoonle meņdox!

Ma ne scataa dze guieel nolisqui dien pe run zho,

nac zho zha ne nacgrē ne.

¹¹Peet brieelod ma niun ma zho, sac niapse meņ ne nac Carner yeen ne gut lo cruz ga bnalo zho;

ni lalnu ib bdziebd zho, bnee zho lo miech cho nac me,

bleeladz zho xquielmban zho, no zho haxta beet miech zho.

¹²¡Gacxe waa tib guielbley nroob ne rac gbaa niina!

¡Grēse to ne nac to zha ne no gbaa, golley!

¡Per probsaxe grē zha ne no lo guidzliu, sac laa meņdox co tsiesacsi zho!

Ntseeb rac ma laa ma zie nēz co, rien ma riaandraa nroob dze ne sonlaa ma.

¹³Zeene gon ma sca bzonēz zho ma lo guidzliu, dzigo ptsidiļ ma wnaa ne gop mēēdbgui co. ¹⁴Nacne bzoob zho chop xiiļ me, lēēdaa xiiļ msidoo; par grieelo xoon me lo ma, guey me dan zit ne nole diidz gan zho me dipse len tson iz groļ co. ¹⁵Gocladz ma nsiloow ma

me, blee ma tib nis naal ro ma, pale tib guiubee ro, ¹⁶per psaand guidzliu me, znuse bzhial low psi grēse nis naal co.

¹⁷Horco mazdraa blēēnie ma me, psilo ma noguib ma zha csacsi ma grēraa zha ne ziaad lo xtii me. Lēē grē zha co zienal miņe rnabey Dios, ni rdziebd zho rlu zho xnēz Jesús no zho. ¹⁸Nacne güey ma, bzo ma ro nisdoo.

Brieequia chop ma ntseeb

13 Tibaque zeene gon naa laa tib ma nroob brieequia lo nisdoo co, ntseeb niaa ma. Ncuaaņe gdzieb ne rlu ma, gadzraa guic ma zob ni zob tsii zhoz ma; tibga coron zob tib tib zhoz ma. Gzase guic ma quia diidznē ne rneenē ma Dios. ²Rna ma zig rna grē meedz rabon, per ni ma niaa zig niaa ni os, laa ro ma niaa zig niaa ro meedz. Dzigo bzo ma nizhnie co ma guiaan ma xlugar ma co, male gnabey.

³No tib guic ma no tib mdel nroob, rlu mer niet ma zeene sca goc guic co ma. Miņ co gon miech, grēse zho psilo zho rleynie zho ma, miņe rnabeytaa ma zho, run zhow. ⁴Horco grēse zho rleynie zho ma nizhnie co, rquiitsgzhib zho lo ma, rdeed zho xquizh lo ma bzo ma ma ntseeb co; scasaque rquiitsgzhib zho lo ma ntseeb co, rnee zho:

—¡Tsodraa stib zha zig luu! ¿Cho dien grieelo tilnie luu?

⁵Dzigo rēb ma nizhnie co lo ma gnee ma grē diidz dox, grē diidznē, gneenē ma Dios; bdeed ma co diidz gnabey ma lo guidzliu dipse len tson iz groļ. ⁶Nacne psilo ma rneenē ma Dios, rdzibdee ma me, rdzibdee ma grē zha no gbaa ne. ⁷Grē zha ne no lo guidzliu, zha ne ngab xnēz Dios, bdeed me diidz psacsi ma zho, haxta beet ma zho; masaque ma bnabey grēse miech ne ndxie lo guidzliu. ⁸Laa grēraa miech, güey zho güeygan zho ma, lēē grē zha co quiad lē lo xlibr meņ ne nac Carner yeen ne gut ga. Haxta zeene

biaa guidzliu no libr co, lo co quia lë grëse zha ne ygaa guielmban ne gdzind dze lozh.

⁹Lo grë to ne nac to zha ne rnalo Dios, zha ne no liaadz minë none naa nu, golquiaadiag minë gne naa nu ganle: ¹⁰Zha ne gnaaz to co zho to ladzguuib, yeque zho zio zho ladzguuib; zha ne csac-sigaa to, tel zha gut zho to, scaque gut miech zho. Gacmbande to sca, sac gon ga glu to nli rnalo to Dios, nli zlëb to tel pe nactaa guielnë ne gan to.

¹¹Blozh ga, gon naa brieequia stib ma nroob lo guidzliu, scaque ntseeb niaa ma, zob chop zhoz ma zig zob zhoz carner, per ncuane gdzieb ne zeene laa ma roptsie. ¹²Ye ma rap ma poder, squi zo ma ne no mdel nroob co guic rnabey ma tel zha racladz ma; bnabey ma yquitsgzhib grëse miech lo ma co. ¹³Ncuane gzee zdoo miech run ma, haxta brieelo bnabey ma biet gui gbaa bliaala lo guidzliu. ¹⁴Ne scataa grë ncuane ro ne rrieelo ma run ma, pquidie ma miech, bnabey ma zho bzaa zho tib mdio zig niaada ma ne bdedlaa lo guielgut ga, ma ne scataa nat guic ga bga.

¹⁵Blozh ga, bdeed ma xquielmban mdio co, parne grieelo gneew. Bnabey ma guet grëse zha ne soliaadz yquitsgzhib low, ¹⁶ni bnabey ma grëse miech güey zho tib bey, yase yquaw nia derech zho, yquiaagaaw quia zho; grëse zho zig-taa zha gola, zigtagaa zha lasa, zigtaa zha ne rapchena, zigtagaa zha ne peet rapda, zigtaa zha ne run xtsiin bena, zigtagaa zha ne choot rnabeyda. ¹⁷Zha ne tsod bey co, grielod gun zho wzi niicle grielodgaa cto zho; sac bey co rlu cho nac zha ne ngab lo ma, lë lë ma ga, lëë número co rlu zha lë ma. ¹⁸Tib lë miech nac número co; xoop gayoo tsongal xoop naca. Zha ne ligier, zha ne niini, zien zho cho nac ma co.

Biil tib gayoo chooptap mil zho

14 Tibaque zeene gon naa laa men ne nac Xcarner yeen Dios ga zo guic Gui Sión, miech guizhiu ne zonie me ga; lëë grë zha co nac tib gayoo chooptap mil zha ne quia lë me guic ga, grop me Pxoze me. ²Horco bin naa tib bi nroob gbaa, zig rio bi rrieengaa tib nis naal tib ro quie, zig ratsiegaa grë nguzidox, ni bin naa ndal tsi zha co zëeb noyool zho tib cant, rlu niapse arp noyoolnie zho cant co. ³Tib cant cuba, laa zho noyoola lo men ne zob lo xcan ro co, zaatne zo gza tap bult mban co, zaatne zob grë mengol co. Loxaque tib gayoo chooptap mil zha ne pcuee lad grë miech guidzliu ga, zha cose brieelo pquiab lo cant co. ⁴Sac zha co ib beenctald xtol, rrieequia nac zho zig tib wnaa ne bgaald mgui; tibaque zo zho lo Men ne nac Carner yeen co, zaatne zietaa me. Masaque nac zho lo Dios, ni lo men ne nac Carner co, zig tib nex ne gloopa riet riogon lo me. ⁵Biod dze ne nquidie zho, mbe zdoo zho, mbe lo zho nëz lo me.

⁶Horco brieequia tib anjl nosiibe zhan gbaa, ney me Diidz Ndzon ne rdeed guielmban, diidz ne gdzind dze nitlo ga; laa me ziaad par gnee mew lo grëse miech ne ndxie dipse lo guidzliu. ⁷Nguedz zëeb tsi me, rnee me:

—¡Golguien golgon minë rnabey Dios, ine golleynie me, sac gon laa dze ne gun me guielwxtis bdzinle! Ine golquitsgzhib lo me, golgan ganle me bzaa gbaa, me bzaa guidzliu, me bzaa nisdoo, me psan grëse zaatne rlan nis.

⁸Zhits anjl co nal stib anjl, nguedz rnee me:

—¡Nasi laa guiedz Babiloin nitlo! ¡Guiedz nroob ne scataa pquiil grëraa guiedz, been grë menguedz co ncuane ndzab ne beena, pxina guic zho!

⁹Zhiits co nalaque stib anjl, scaque nguedz zëeb tsi me, rnee me:

—¡Grëse zha ne yquitsgzhìb lo ma ntseeb ne brieequia lo nisdoo ga, yquitsgzhìb zho lo mdio ne niaa zig niaa ma ga, gdeedgaa zho diidz yquia xbey ma nia zho, yquiaagaaw quia zho, ¹⁰ib tedsod ye zho ygaa lo grëtaa guiełnëdox ne csiaab Dios! Squi zobwi grë xanjł me, squi zobwi Meñ ne nac Xcarner yeen me, laa zho guey lo guidox ne rieguiał zho, zaatne tibaque quiayazbel tìblo ncuaane rtsuu lë zufr. ¹¹Dze guieel cso laan ne tsec guidox co, ni palal gapd zho descans ga; sac sca pquitsgzhìb zho lo ma ntseeb co, pquitsgzhìb zho lo mdio ne niaa zig niaa ma ga, ni pquia zho xbey ma. ¹²¡Ga naganle gan grë zha ne ngab lo Dios, zha ne mban zigne rnabey me, zha ne tìblique zienal zhiwseed Jesús, zeena gacmband zho niicle tel pe nactaa grë guiełnë ne noyan zho!

¹³Dzigo bin naa zëeb tib tsi meñ co gbaa, në me:

—Pquiaa mine gni naa nu.

Nëchaa me:

—Dichos grëse zha ne rnalo Jesús, niicle niinaga guet zho.

Pquiabaque Espiritu Sant, rnee me:

—Nligaa dichos zho, sac grë guiełnë ne bded zho, nataa laaw blozh; nasi laa zho ygaa guiełnzaac nroob ne gdeed Dios lo zho, porne wban zho zigne rnabey me.

¹⁴Zeene bui naa stib, dzigo laa naa gonle tib xcow nquits; lo xcow co zob tib meñ co, rlu me zig rlu Meñ ne pxeel Dios ga biaad lo guidzliu. Zob tib coron or guic me, ni nzhen me tib yaguiits nroob.

¹⁵Dzigo briece tib anjl len yadoo ro ne zob gbaa, nguiedz bnee me rëb me lo meñ ne zob lo xcow co:

—¡Niinaga blooyaguiits grë zhob ne squitaa zëeb lo guidzliu! ¡Sac gon gollew, laa dze ne tsasa bdzìnl!

¹⁶Dzigo pteed meñ co yaguiits dipse lo guidzliu, ptop me grëse zhob co.

¹⁷Blozh ga, briece stib anjl len yadoo ro co nzhen me tib guieb hoz, rlupaa per nli ndox low.

¹⁸Loxaque briece anjl co, laa anjl ne quianap gui ne ndziib lo pcoog brieceque; nguiedz bnee me rëb me lo anjl ne nzhen hoz ga:

—¡Niinaga pchug grëse mzhiig uv ne squitaa zëeb lo guidzliu, sac gon laaw gule!

^{19–20}Horco znuse pteed anjl co hoz lo guidzliu, pchug me grëse mzhiig uv co, güeycodzëe mew tib len pil nroob ne zob tib lad ro guiedz. Ga güeyzëeni zho grë uv co, ptaadz zhow; dzigo ren naaldox ne briece zhan pil co, masaque lal ne rzëni miech xoop ngbidz, lal ga wbiig lo ren co igo pil co; tel niaca mine sëeb tib guay low, zdzina haxta zhan cho ro ma. Rriecequia sca nagon gac mine gnabey Dios ted grë zha ntseeb.

15 Tibaque zeene gon naa, ncuaane ro, ncuaane gzee zdoo ne goc gbaa. Briecequia gadz anjl, tib tib anjl co tibga guiełnë guiaadnie me ted grë miech ne ndxie lo guidzliu; guiełnë co lozh cueezhian Dios miech.

²Dzigo gax lo naa gon naa tib dzoon miech, masaque rquiabni, masaque rna gui zaatne zo zho, nëzrii nëzrec rac lo co, pale lo nisdoo. Lëe grë zha co been gan, pquitsgzhìbd zho lo ma ntseeb co, pquitsgzhìbd zho lo zhimdio ma, niicle biodgaa zho xbey ma. Grëse zho tibga xarp Dios nzhen zho, ³quiayool zho zig biil grë zha ne psilaa Moisés Egipt. Rley zho, sac niina laa Xcarner yeen Dios psilaa zho lo ma ntseeb co; rnee zho:

Dios, luu ne nac luu meñ ne grësew rrieelo run,

ncuaane nroob, ncuaane gzee zdoo miech, nac grë ncuaane run luu.

Luu nac meñ ne rnabey,

lo grëse zha ne ngab lo luu, niapse didzli rnee luu, niapse mine nonguiel rnabey luu.

⁴ ¿Zha rna zha ne dien̄ gdzieebd luu?
 ¿Zha rna zha ne gleyd gool̄nie luu?
 Sac luuse nac men̄ mbe zdoo, men̄ ne ni
 tib dol̄ rapd.
 Grëse guiedz ne ndxie lo guidzliu,
 zriee miech guiaad zho yquitsgzhib zho
 lo luu;
 sac nasi laa luu blu zha run̄ luu
 guiel̄wxtis.

Gadz anjl ne pxeel̄ guiel̄në lo guidzliu

⁵ Horco gon̄ naa bzhiäl zaatne nac Lu-
 gar Nda len̄ xyadoo Dios gbaa, ⁶ ga briece
 gza gadz anjl ne guiaadnie guiel̄në ne no
 guiaad lo guidzliu ga. Ine nquitsbie rna
 xab gza anjl co, haxta rzëög lada, ndx-
 iega tib cinch or haxta ncaan̄ len̄ zhicw
 me.

⁷ Dzigo wbig tib bult mban co, bdeeda
 tibga cop nroob niaa niapse guiib or lo
 tib tib anjl co; len̄ cop co ga nodzë grëse
 guiel̄në ne nac xquiel̄blëë Dios, men̄ ne
 gdzind̄ dze guet. ⁸ Horco grëse xquiel̄nd-
 zon Dios, grëse poder ne rap me, biodzë
 len̄ yadoo co, rluw zig rlu tib gox; choot
 brieelodraa nzëëb len̄ yadoo co, haxta
 blozh gon̄ miech gza gadz guiel̄në ne
 güeynie gza anjl co.

16 Dzigo bin naa nguiedz zëëb tsi
 men̄ co len̄ yadoo ro co, bnee me
 lo gza gadz anjl co, rëb me:

—Gol̄tsie, gol̄tsiexiee gza guiel̄në ne
 nac xian Dios i lo guidzliu.

² Dzigo briece tib anjl co, güey me,
 güeylaat me xcop me lo guidzliu, hor
 co grëse zha ne noquitsgzhib lo zhim-
 dio ma ntseeb co, zha ne quia xbey ma
 ga, psilo biaal̄ dipse lad zo, yoobdox ne
 rquia zho.

³ Güeyaque stib anjl co, bdzin̄ me blaat
 me xcop me lo nisdoo, zeene laa ncaan̄
 co bzhiie lo nisdoo, grëse nis co bialo
 ren ctoo; ni stib ma ne no low biaan̄draa.

⁴ Laa min̄ co bded, zeene laa stib anjl
 ne rac zho bion̄ ga güey, güeylaat me
 xcop me grëse guiubee, grëse zaatne rda

nis; nacne grëse nis co bialo ren. ⁵ Dzigo
 bin naa tsi anjl ne rnabey nis, rëb me lo
 Dios:

—Dios, ible riegual̄ mine been̄ luu i;
 luu ne nac luu men̄ mbe ne ni tib dol̄
 rapd, men̄ ne tibaque nac, men̄ ne gdz-
 ind̄ dze gdzëë. Lëëw i been̄ luu, squi
 beenquizh luu grë miech qui mine zëëb
 zho, ⁶ sac gon̄ blactaa grë zha ne ngab lo
 luu, blactaa grë zha ne biadteed xtiidz
 luu psacsi zho, pxiee zho xchen grë zha
 co. Min̄ qui rquiin zho, guie zho grë ren
 qui na.

⁷ Zëëbaque tsi stib men̄ co zaatne nac
 lo pcoog len̄ yadoo co, rnee me:

—¡Dios, luu ne nac luu men̄ ne
 nroob ne grësew rrieelo run̄, nligaa ible
 riegual̄a squi beenquizh luu grë zha qui
 mine been̄ zho!

⁸ Blozh ga, briece stib anjl ne rac zho
 tap ga, güey me güeylaat me xcop me
 lo ngbidz, hor co gocnlëëraa xbiini ng-
 bidz, ptsuuw miech. ⁹ Niicle scale nodzu
 grë miech co, per ib biablod zho, laa ne
 nsaan zho xquiel̄ntseeb zho, nleynie zho
 Dios, le! psilo zho rneenë zho me, pe
 nacne noxeel̄ me grë guiel̄në co.

¹⁰ Zeene briece stib anjl co, güey me
 güeylaat me xcop me zaatne zobnabey
 ma ntseeb ne brieequia lo nisdoo ga,
 dzigo znuse goc tib ncowdoo grëse
 guiedz ne rnabey ma. Lo yoobdox ne
 rquia grë miech co, haxta rowye zho ludz
 zho; ¹¹ per niicle scaw, ib psand zho
 xquiel̄ntseeb zho, le! psilo zho rneenë
 zho Dios, pe nacne scataa rquia zho
 yoob, pe nacne scataa quiayaal̄ gdib lad
 zho.

¹² Zeene laa anjl ne rac zho koop ga
 güey, güeylaat me xcop me len̄ guiubee
 Eufrates, hor cogazh wbidz nis naal ne
 zhoob guiubee ro co. Nacne bio nëz
 ted grë men̄ ne zobnabey grë guiedz ne
 ndxie nëz ne rlan ngbidz.

¹³ Horco gon̄ naa tson̄ me yozh, niaaw
 zig niaa mbiich, tiba briece ro ma ngol

nizhnie co, tiba brieë ro ma ntseeb ne brieëquia lo nisdoo ga, laa stiba brieë ro zha ne noteed xtiidz ma ntseeb co. ¹⁴Chen mendox nac gza me co, runa grë ncuaañe nroob ne rzee zdoo miech; dzigo güeya güeyzodiidzniew grëse zha rnabey ne no dipse lo guidzliu, parne tipse gac zho tilnie zho men ro ne nac Dios, gal dze ro ne gdeed me minë rieguiäl tib tib miech.

¹⁵Tibaque zeene laa men ne rnabey ne ga bnee, në me:

—Zhile gon laa naa guial. Nsin sca golso, sac zigne racnand bizhuan yu pa hor sëëb ngbaan yu, scaque gacnande to pa horpaa guial naa. Dichos zha ne yquiambëz naa, ine mbe xab zho nacw zhow; sac gon mban tsie zho telne scase zo zho zeene laa naa glanso, ni lala tib guieltoдох ga grieëquia zho.

¹⁶Dzigo pcaalsa grë zha rnabey co grë xmenguiib zho, zaatne rnee zha Israel Armagedón.

¹⁷Horco güey anjl ne nac zho gadz ga güeylaat me xcop me lo me ne rrieë lo guidzliu; dzigo bnee tib men co zaatne nac lo zhixcan Dios len yadoo gbaa ga, nguiedz zëëb tsi me rnee me:

—¡Nasi nagon ledaaw blozh bza!

¹⁸Dzigo psilo nëzrii nëzrec riab belye, loxaque bi rio ratsie nguzi. Lo belye co, lo bidox co, laa tib zhodox psiloque bni; waltaa ne ndxie miech lo guidzliu, gard gni tib zhodox zig min co. ¹⁹Grë guiedz ne ndxie lo guidzliu, per ni rludraa zha niaaw; zig nac guiedz nroob ne nac Babiloin ga, haxta tson lë goca. Horco beenquizh Dios zha Babiloin, grëtaa guielntseeb ne zëëb zho; psiaabzi me zho por grëtaa zhian ne pquiaa zho me. ²⁰Grëse guidzliu win ne no lo nisdoo, rludraa dien yow; grë gui glaa, loxaque nëzrii nëzrec bliaala. ²¹Min co blozh, zeene psilo bliaal tib guiequiedox lad grë miech co, tib tib guiequie co nëw maase

choo kil. Gon zho scataa noyab guiequie co, laa zho noque rdzibdee zho Dios.

Zob tib wnaa yozh lad tib ma ntseeb

17 Lo gza gadz anjl ne sca blaat grë guielnë co lo guidzliu, lad co brieë tib me biaad, në me lo naa:

—Dë ganle, zeena glu naa lo luu zha nactaa caxtigw ne ygaa wnaa yozh ne ran luu squi zob lo grëse nis ne no lo guidzliu. ²Lëë wnaa qui pxin guic grëse miech ne no lo guidzliu güeynal zho grëtaa guielyozh ne been me; haxta grë zha rnabey, güeynal min co.

³Sca nolu Espiritu Sant grë ncuaan co lo naa, dzigo güeynie anjl co naa tib dan zit. Ga gon naa laa wnaa co zoble lad tib ma nroob, ntseeb niaa ma co, zob gadzraa guic ma ni zob tsii zhoz ma; gdipse ma rna nizhnie, gdipse lad ma quia grë diidz ntseeb ne rneenë ma Dios.

⁴Glaa glaa zhits ma ntseeb co zob wnaa co, masaque nizhnie nlaan, nizhnie ren rna xab me, loxaque grë guiib or, grë quie rbebni, grë quie perl, ngalguiee lad lar co. No tib cop nroob niaa me, niaaw niapse guiib or, rrieëquia leen co nodzë grëtaa guielntseeb, grëtaa guielyozh ne run me. ⁵Ni quia bla lan diidz quia me, rneew: “Lëë guiedz nroob ne nac Babiloin nu, guiedz ne nac xniaa grëse wnaa yozh, guiedz ne nac xniaa grëse zha ne run ncuaañe mbixladz.” Lëë lë me ga, hor coraa bzhoobnen zha nac lë me. ⁶Dze rwi naa lo me, dzigo gon naa rac me zig rac zha ne rzudz. Nziandox zha ne no xnëz Jesús beet me, rrieëquia grëtaa ren ne pxieë me ga sca noyun me. Bzee zdoo naa, ni bdzieëb naa gon naa zha rac wnaa co. ⁷Dzigo nëchaa anjl co lo naa:

—¿Pe nacne rdzieëb luu? Na ganle gni naa lo luu cho nac wnaa co, cho nac ma ne sca zob me lad ga. ⁸Padzeela no ma ntseeb co, guienä ma niinapaa, per zhile laa ma grieë len guierdoo ne nio-

ogyu ma, laa ma griee ga parne diunavez nitlo ma; grë zha ne quiad lë lo libr ne zhobnee cho nac zha ne yгаа guielmban ga, seedox zdoo zho zeene gan zho laa ma grieequia stib, sac tibaque nan zho gutle ma. ⁹ Wen wen pquiaadiaga ganle: gza gadz guic ma ga, rrieequia lëew nac gza gadz gui win ne zob wnaa co zobnabey me. ¹⁰ Ni rrieequiaque lëe gadz zha ne rnabey ga: gaay zho bnabeyle, tib zho quianabey niina, laa stib zho naraa gnabey; per zeene laa zha co guiaad, zhis dze ne gnabey zho. ¹¹ Lozhse gnabey zha co, laa ma gnabeyaque, ma gac zha rnabey co xon, niicle ne yele ma ga goc zha co gadz; gataa laa ma nitlo.

¹² Zhoz ma, rrieequia lëe stii zha ne gnabey ga, gzase zha co naraa gnabey zho, tipse ycaania zho guielrnabey gza zho ma. Zhisaque dze sca gnabey zho, ¹³ dzigo laa gza tsii zha co guiaan diidz gzo zho ma, ma gac zha nroob lo zho. ¹⁴ Zacnie zho ma, grëse zho tsie tsietilnie zho Xcarner yeen Dios, per znuse gun men ne nac Carner yeen co gan lo zho; sac me nac men ne rnabey lo grëse zha ne rnabey, lo grëse zha ne non. Grëse zha ne tsienal zhits me, tsietilnie zho ma co, lëe grë zha co nac zha ne bzooblo Dios bredz me zho bgab zho xnëz me, ni ib psaand zho me.

¹⁵ Blozh ga, nëchaa anjl co lo naa:

—Lo grëtaa nis ne gon luu sca zob wnaa yozh co, rrieequia lëe nis co nac grëse guiedz, grëse dii miech ne ndxie lo guidzliu. ¹⁶ Per zdzin dze lëeque ma ntseeb co, tilnie wnaa co, grë ma gza tsii zha ne rrieequia nac zhoz ma ga; zlëeniedox zho wnaa co, sanwin zho me, haxta xab me cuee zho, znitlo zho me, sëeg zho me lo gui. ¹⁷ Ib Dios csiaab guic zho gnitlo zho wnaa co, ni meque csiaab guic zho gzo zho ma co gac ma zha ne gnabey lo zho; laa me gun min co, parne grieequia grëse mine bneele me no gac. ¹⁸ Laa wnaa co, rrieequia me nac guiedz

ro ne rnabey lo grëse guiedz ne ndxie lo guidzliu.

18 Blozh ga, gon naa laa stib anjl ziad-zëeb gbaa, rlu tib anjl nona, dipse lo guidzliu biab biinidoo ne ziaadnie me, ² nguedz zëeb tsi me rnee me:

—iNasi laa guiedz nroob ne nac Babiloin ga nitlo! iLoxaque mendox yquianzë ga, loxaque grë ma guix, loxaque grë ma mbixladz cuew! ³ Laaw nitlo, sac noquila grëse miech ne ndxie lo guidzliu, grëse zha ne rnabey, quiaayun zho grëtaa guielyozh ne runa. Lo grëtaa guielyozh co quiaayun ricwa grëse zha ne run wto; quiaxin grë ncuuan co zho, masaque quiaayuna zho zig run nziu.

⁴ Dzigo zëeb stib tsi men co gbaa, rnee me:

—iGrëse to ne nac to miech ne ngab xnëz naa, golgon diidz, golriee guiedz qui! Ib gunde to dol ne quiaayuna; zeena ygaade to grëtaa guielnë ne ygaaw, ⁵ sac nroobdox nac grë dol ne quiaayuna, telne niaca ncuane cue monton, rrieequia haxta gbaale rdzin guic monton co; gane ib tedsod zunquizh Diosa grëtaa guielntseeb co.

⁶ Gacxe na grëse mine beena miech, mincoque saca. Grëse tel zha psacsiv miech, chop lalga mine teda. ⁷ Zigne squitaa now lo grëtaa ncuane racladza; scagaa na guielnedox ne gana, haxta goona lo grëtaa guielnë co. Niats raca rneew: “Naa rnabey. Nacd naa cho zha ne zotib, zig rzac grë wnaa viud; naasi gdzind dze ne tso naa guielnë.”

⁸ Nli squitaa niats raca, per zeene guiaba lадznia guielgut, ladznia gbin, ladznia grëraa guielnë ne gana, tib dzeque lozha. Ni lozh ga, haxta zeca lo gui; min co gnabey Dios teda. iMe nac men ro ne gunquizha grëtaa mine beena! ⁹ Grë zha ne rnabey grë guiedz, zha ne scataa bley been grë guielyozh ne runa; zeene gan zho goxdoo ne rso noyeca, mban gac zho, zoon zho zio zho

xquielnëw. ¹⁰Zdzieb zho gan zho grë-
taa guielnë ne nodeda ga, lo dzeb co, ni
lalnu gbigd zho. Lëë gdib so zho goptsie
zho, guiab zho: “;Probsaxe luu Babiloin,
guedz nroob, guiedz non nac luu! ;Pa
briee guielnë qui squi znuse nitlo luu!”

¹¹Grë zha ne run wto dipse lo guid-
zliu, ye zho zio zho xquielnëw, mban
gac zho guieñdraa cho si lo zho. ¹²Sac
masaque lëëw rzi:

guiib or,
guiib plat,
grë quie non,
grë perl,
grë lar niazh,
grë lar sed,
grë lar nizhnie nlaan,
grë yag ne nex rlaa,
grë ncuaañe niaa marfil,
grë ncuaañe niaa grë yag wen,
grë ncuaañe niaa guiib,
grë ncuaañe niaa brons,
grë ncuaañe niaa quie mármol,
¹³grë blad canel,
grë guizh scuaan,
grë yaal ne ndzon rlaa,
grë guizh, grë nceit ne nex rlaa,
grë nziu,
grë nceit,
grë zhobxtil,
grë rin niazh,
grë ma ne rey yo,
grë mëcwxil,
grë carret,
haxta grë miech ne runzhoo dziin lo
samiech.

¹⁴’Zrieequia zha ne guiab lo guiedz co:
“;Bdzinaque dze ne blozh luu, pa sërää
scataa yquianie luu grë ncuaañe rdzi-
ladz luu! ;Grëtaa ncuaañ niazh, grëtaa
ncuaañe rap luu, gdziñdraa dze ne gbi-
ire gan luuw!”

¹⁵Grë zha ne run wto ga, zha ne
scataa gocricw lo grë wto ne been zho
guiedz co, dzieb zho, zit so zho gan
zho grëtaa guielnë ne nodeda. Zio zho

xquielnëw, haxta zoon zho ¹⁶⁻¹⁷guiab
zho: “;Probsaxe guiedz ro qui, squi znuse
bnitlow! Biopaa dze gocnona, masaque
goca zig tib wnaa ne racw grë lar niazh,
grë lar nizhnie nlaan; wnaa ne rna grë
guiib or, grë quie non, grë quie perl, rio
yan, rio yan nia.”

’Grë zha ne rnabey barcw, grë zha
ne rsëëw, zha ne no leña, ni grëragaa
zha ne run dziin lo nisdoo, zit so zho
gan zho tsec guiedz co; ¹⁸zeene gan zho
goxdoo ne rso noyeca, ziab zho: “;Zha
rnaraa dze ne dzian ne stib guiedz nroob
zig guiedz qui?” ¹⁹Mban gac zho, zio
zho xquielnëw, zoon zho, squiaadan zho
redz, guiab zho: “;Probsaxe guiedz ro qui
squi znuse bnitlow! Lo grëtaa dimi ne
pquianiew, blactaa beenricwa ne grë ne
grëraa zha ne run dziin rii.”

²⁰’Sca nagon nitlo guiedz co. Grëse to
ne nac to zha ne no gbaa, grëse to ne nac
to zha ne ngab lo naa, grëse to ne nac
to zha ne pxel naa güeynee xtidz naa,
zha ne güeyteed xtidz naa, zeene gan
to laa guiedz co nonitlo, golley, sac gon
ga gunquizh Dios miech ne no ga grëtaa
mine been zho to.

²¹Zeene blozh bnee men co, dzigo gon
naa tib anjl, rlu tib anjl macisa, znuse
blis me tib quie nroob, niaaw zig niaa
quie molin zhobxtil dipse gan bron mew
lo nisdoo; blozhse bron mew, nëchaa
me:

—Squi nagon nitlo guiedz ro ne nac
Babiloin ga, gdziñdraa dze ne gbiire
gan miecha. ²²Masaque nroobladzdo
ne raca niina, loxaque di noyac grë ro
xnëza, zaatne noyool zho vihuel, zaatne
noyool zho bzie, zaatne nocuedzga zho
trompet, nëzrii nëzrec rac miech zie zho
lo xtsiin zho, loxaque lo grë quie molin
rzedz nozoo zho zhob; per gal dze co
grësew lozh. ²³Squitaa biini ne rquiaw
niina, squitaa tibaque quiayac guiełt-
sieela, per gal dze co ncowse gnaw, pa
sërää gac lniw. Laaw nitlo, sac blactaa

noyungüeta miech ne no grëraa guiedz ne ndxie lo guidzliu lo grë zhiwseed mendox; pe zhidaa noyunricwa grë zha ne run wto por grë wseed co;²⁴ pe zhidaa miech zëëba. Nzian zha ne ngab lo Dios, nzian zha ne riadteed xtiidz me, rnabeya ret zho.

19 Zeene blozh ga, bin naa zëëb ndal tsi men co nëz gbaa, rlu miech guizhiuw, nguiedz rnee zho:

¡Zha ndzontaa xDios ne! Me nac men ne rsilaa miech, parne ygaad zho lo caxtigw.

Me nac men ne rap poder,
me nac men ne rieguial dziuunnon ne;
²sac gon mesi run me guielwxtis zigne no gaca.

Gacxe waa, sca gunquizh me guiedz qui grëtaa guielyozh ne noyuna, grëtaa xchen zha ne ngab lo me, zha ne bnabeya gut;

rrieequia naca zig tib wnaa yozh,
quiayungüeta miech quiayunctal zho xtol zho.

³Blozh ga, biire bin naa tsi zho, rnee zho:

¡Zha ndzontaa Dios! ¡Min qui nagon rieguiala, gdzind dze ne lozh csow gox!

⁴Horco laa gza galptap mengol co, ni gza tap bult mban co pquitsgzhib lo Dios lo xcan ne zob me ga, haxta bzooblo zho lo liu, beennon zho me, rnee zho: “¡Nliw! ¡Luuse nac men ne ndzon!”

⁵Zëëbaque stib tsi men co zaatne nac lo xcan co, rnee me:

¡Grëse to ne nac to zha ne quiayun dziin lo me,

zha ne rien men non nac me,
zigtaa zha wina, zigtagaa zha nona, golgoolnie me!

⁶Dzigo wbiire bin naa tsi grë miech guizhiu co nëz gbaa, rio bi zëëb tsi zho, pale zeene rio bi nisdoo, zeene riogaa bi rnee grë nguzidox, rnee zho:

¡Golgotsaa dzioolnie ne me!

¡Me nac xDios ne, me nac men noob ne rnabey!

⁷Golgotsaa gley ne, golgotsaa dziuunnon ne me,

sac gon laa dze bdziñ laa Carner yeen ne nac Xpëed me ga ctsieelnia;

grë zha ne ngab lo me,

zha ne rrieequia nac ndzooop ne ctsieelnia Carner yeen co, laa zho nacwxable.

⁸Masaque rlu zho zig tib ndzooop ne ctsieelnia,

ine nquitsbie, ine rbebni lar niazh ne nacw zho;

me bdeed diidz got zho lar co,
ga rlu ganle mban zho zigne racladz me.

⁹Dzigo rneechaa anjl ne sca bron quie co lo nis:

—Wen zie grë zha ne bredz Dios tsie lo xquieltsieel men ne nac Carner yeen co.

Bnabey me naa pquia naa diidz co, blozhse ga, nëchaa me lo naa:

—Xtiidz Dios ga gon, me rneew.

¹⁰Horco pquitsgzhib naa lo anjl co ni naa gunnon naa me, per bzhiguield me.

—¡Coo! —në me lo naa—. ¡Guso! Gocnan ganle ye naa tib ngundziinse nac naa lo Dios, nac naa zigne nacaque luu grë luu grëraa zha ne squi noxco zienal mine nac zhiwseed Jesús. Dios none gunnon luu, sac gon tib ngundziinse nac naa bzet naa min co, lëë gdib bne naa ganle zha nac xtiidz Jesús.

¹¹Dzigo hor co gon naa bzhial zhan gbaa, ga briequia tib men co zob me lad tib guay nquits, zëëb diidz niapse diidzli rnee me, sac run me guielwxtis zigne no gaca, ni rdilnie me zha ne rieguial tilnie me. ¹²Masaque rbebel bziaalo me, nzian xcuaa coron zob guic me, ni quia stib lë me quia me, loxaque mese nan dien zha nac lë co me. ¹³Rnadraa xab me di ren, lëë me ga rnee zho: Xtiidz Dios. ¹⁴Ndal grë menguiib ne no gbaa nal zhits me, ye zho niapse guay nquits zob zho; niapse

lar niazh nacw zho, ine nquitsbie rna grë lar co. ¹⁵Rlu choot grielod gacndaan lo me, masaque zob tib spad lots ro me, laa me nzobro spad co parne tilnie me grë guiedz ne gacntseeb lo me. Masaque me gnabey grëse guiedz, ndip gac xti-idz me, ni tib choot quitsd mine gnabey me; zeene laa me gunquizh miech grë xquieIntseeb zho, cxeel me zhian ne csi-aab Dios yгаа zho, zuñ me zho zigne ruñ miech uv zeene rzëni zhow. ¹⁶Lad lar ne nacw me ga, ni tib cho cor me, ga quia cho nac me, rneew: “LËË MEN RII NON-RAA LO GRËSE ZHA NON, ME RNABEY LO GRËSE ZHA NE RNABEY.”

¹⁷Blozh ga gon naa zo tib anjl lo ng-bidz, nguiedz zëeb tsi me rbedz me grëse maxiil ne row grë magut, rnee me:

—¡Ligier golcaalsa! ¡Goltë zeena yquiu to guielwagw ne gneedz Dios lo to niina! ¹⁸Goltë zeena gow to grë zha ne rnabey grë guiedz, grë zha ne rnabey lo menguiib, grë zhaguiib ne zëeb diidz nac zha valor; goltë gow to grë guay, gow to grë zha ne rzob lad ma. Goltë gow to grëse miech, zigtaa zha ne runcunzhoo miech dziina, zigtagaa zha ne choot rnabeyda, zigtaa grë zha ne nac zha nona, zigtagaa grë zha wina.

¹⁹Dzigo gon naa ma nroob ne brieequia lo nisdoo ga, ma ne scataa ntseeb rlu ga, psilo ma ptop ma grëse zha ne rnabey grë guiedz ne ndxie lo guidzliu. Pcaalsa zho grë xmenguiib zho, zha guizhiuw, laa zho brie zietilnie zho men ne zob lad guay nquits co grë xmenguiib me. ²⁰Lo dil co, ga bgaa ma nroob co, ni bgaa zha ne pteed xtiidz ma lo miech; zha ne scataa squi zo ma been zho grë milagr co pquidie zho miech, bio guic zho bio zho xbey ma, ni beennon zho mdio ne rlu zig rlu ma ga. Zigtaa maw, zigtaa zha ne pteed xtiidz ma ga, nguia mban zho laa zho biab tib lo guidox za-atne noyec zufr. ²¹Laa grëraa zha ne scataa gocnie ma ga, grëse zho gut lo

spad ne nzobro men ne zob lad guay nquits co, hor co bdzinbe grëse maxiil ne row magut, güeytow ma grëse ngutoo co haxta biel ma.

Bnabey Jesús tib mil iz

20 Blozh ga, tibaque zeene gon naa laa tib anjl biet gbaa, nzhen me tib liow, ni nzhen me tib caden. ²Dzigo bnaaz me ma ngol ne rna nizhnie ga, meel ne notaque padzeela ga, ma ne nac mendox ga, ma ne nac Satanás ga, bzoob me ma caden co; ³con liow ne nzhen me ga pxal me tib ro guierdoo, psëeb me ma len guierdoo co. Blozh ga dziits dziits psioog mew, zeena grielod gree ma tsiequidieraa ma miech.

Ga tsogyu ma dipse len tib mil iz, lozhse tib mil iz co ible laa ma no griee ga, sonlaa ma zniip.

⁴Horco gon naa laa grë zha ne bzo Dios cobey pe nac xtol tib tib miech, laa zho bzob lo xcan ne rieguial sob zho. Gonaque naa xalm grë zha ne psacsi miech, bga zho yan zho, beet zho zho loxaque ne no zho xnëz Jesús ni bnee zho xtiidz me lo miech; gon naa grë zha ne bzhiguield nquitsgzhil lo ma ngol ne brieequia lo nisdoo ga, bzhiguield zho niunnon zho mdio ne rlu zig rlu ma, nicle bzhiguield zho nio zho xbey ma. Gon naa brieegan zho grëse zho, par gbannie zho Jesús, gnabey me grë me zho dipse len tib mil iz.

⁵Lëë grë zha co nac miech ne glopaa grieegan, laa grëraa mengut, zha co grieegan zeene laa tib mil iz co gza. ⁶Dichos grë zha ne glo grieegan ga; lo Diosle ngab zho ga, noxtseebdraa zho guey zho gabil, masaque lo Dios, lo Jesús gun zho dziin, gac zho zig tib pxoz lo me; tipse gnabey me grë me zho len tib mil iz co.

⁷Zeene blozh tib mil iz co, dzigo gon naa laa mendox brie zaatne niogyu ma ga, ⁸güey ma güeyquidie ma zha Gog, güeyquidie ma zha Magog, grëse

guiedz ne ndxie lo guidzliu güeyquidie ma miech, tipse been ma zho grëse zho parne tilnie zho Dios. Miech guizhiuw, miech ne lëb ne glab new, gun ne cuent yuzh ne ndxie ro nisdoo, ⁹ntseeb rac zho, grëse zho laa zho bdziñ zaatne ndxie guiedz ne rleynie Dios, zaatne no grë zha ne ngab lo me ga; per zeene laa zho ndxiele igo guiedz co parne gnitlo zhow, hor co bnabey Dios bliaal gui lad zho, bzëega zho grëse zho. ¹⁰Laa men-dox, bnabey me bgaa ma bey ma lo guidox ne nac gabil, zaatne nole ma ngol ne sca brieequia lo nisdoo, grop ma co zha ne pteed xtiidz ma ga. Lo guidoxa, niapse zufr noyec lugar co, ga tsu ma dze guieel, gdzindraa dze ne gree ma ga; caxtigwdox ne ted ma.

Beenquizh Dios miech mine been zho

¹¹Blozh ga, gon naa tib men co zob me tib lo xcan ro, dib nquitsbiese rna xcan co. Zigtaa guidzliu, zigtaa gbaaw, zeene gona me znuse bichew, per bdziel pa niolana lo me. ¹²Grëse zha ne brieeband glo ga, zigtaa zha nona, zigtaa zha wina, laa zho bdziñ lo me. Laa zho ndxie ga, zeene laa lo bla libr co bzhial, ni bzhialaque lo mine quia lë zha ne bgaa guielmban cub ne rdeed Dios ga; hor co bgaase zho mine rieguial zho tib tib zho tel zha zhobnee lo libr co wban zho. ¹³Grëse zha ne biaan len nisdoo, blieequia nisdoo zho, grë zha ne bioliu blieequia baa zho; grëse zho blieequia guielgut zho. ¹⁴⁻¹⁵Blozh ga, zigtaa guielguta, zigtaa zha ne quiad lë len libr ne no lë zha ne bgaa guielmban ga, laa zho biobe lo guidox ne nac gabil; lëe guielgut brop ga.

21 Dzigo gon naa tib bgaa cub, ni tib guidzliu cub; sac zigtaa bgaa ne rdziunbey ne, zigtaa guidzliuw, zigtagaa nisdoo grësew bnitlo. ²Grop lo naa gon naa laa Jerusalén, guiedz ne nacchen Dios ga, ziad-zëeb zhan bgaa

brieew zaatne zob me; tib guiedz cuba. Tib guiedz nzhixcuaa naca, pale tib ndzooop nguieg dze ne rtsieelna zho. ³Dzigo bin naa nguiedz zëeb tib tsi men co zaatne nac lo xcan ro ne zo bgaa ga, rnee me:

—Nasi nagon laa Dios cuëz lo miech, nasi laa me gbannie zho; zanlo zho me, peet gunfaltraade lo zho. ⁴Led yedraa niina pa glunë zho, led yedraa niina tsoxtseeb zho lo guielgut, led yedraa niina mban gac zho cuedz zho dien cho gun xyudar zho, led yedraa niina goon zho; grëse nis ne zo lo zho zeene biin zho, niina laa me gunmbew. Grëse ncuaan co, gdzindraa dze gan zhow.

⁵Zëeb tsi men ne zob lo xcan co, rnee me:

—Grëse ncuaane no niina ncuble naca, ni naa beencuba.

Blozh ga, nëchaa me lo naa:

—Grëse diidz ne gni naa lo luu nu niina gon, pquiaaw, ib none gacnan miecha, sac ncuaane no gaca. ⁶¡Lëew nagon, grëse mine no gac, laaw blozh ben naa! ¡Naa psilow, ni naa psiaala, naa nac zigne nac letr “a” ni letr “z” lo grëse letr, “a” rsilow “z” riala!

¡Zha ne në rnab zhis, naa gded nis ne rdeed guielmban guie zho, ygad naa nis co lo zho, peet gacnonda! ⁷Ni gol-gacnan ganle, grëse zha ne gdeete didz lo grë ncuaane gunctal xtol zho, ible zгаа zho grë guielnzaac ne noyaquiet nu, naazhal gbannie zho peet gunfalte lo zho, masaque tib mëed gac zho lo naa. ⁸Sangue grë zha ne rdzieb gban zigne rnabey naa, grë zha ne rbiche lo naa, grë zha ne run grë ncuaan mbixladz, grë zha ne rut samiech, grë zha ne rionie zha ne led tsieeld zho, grë zha ne rleynie guielbruj, grë zha ne rleynie grë mdio, grë zha ne tibaque noquidie samiech, grëse zha co mine yгаа zho nac lo guidox ne noyec zufr ga; lëe guielgut brop ga.

Guiedz ne gdziñ zha ne ngab lo Dios

⁹Lo gza gadz anjl ne bzhen cop ne bio grë guielnë ne gon miech ga, biaadgax tib me lo naa në me:

—Dë ganle zeena gan luu ndzoop nguieg ne gac tsiel men ne nac Xcarner yeen Dios i.

¹⁰Blozh ga, dzigo güeynie anjl co naa tib guic gui nroob, tib guic gui glaa, ga gon naa guiedz Jerusalén stib, guiedz ne nacchen Dios ga, gonpaa naa bieta zaatne zob Dios, laaw ziad-zëeb gbaa.

¹¹Masaque rbebela guielndzon ne rap me, lëëdaa grë quie niazh ne lë jasp, ni roļ rñaw lëëdaa grë vidr. ¹²Rna tib biedz nroob, tib biedz glaa ndze igow, quia tsiipchop puert cho biedz co, tibga anjl zo quianap tib tib ro puert co, tib tib puert co neysew tib lë mengoldoo ne goc xpëed Israel. ¹³Tson puert co quia nëz ya, tsona quia nëz quiet, tsona quia ngali nëz ne rlan ngbidz, stsona quia ngali nëz ne rzëeb ngbidz. ¹⁴Lo tsiipchop quie nroob ne zob biedz co, tibga lë xpoxtl men ne nac Xcarner yeen Dios ga quia lo co.

¹⁵⁻¹⁶Rlupaa cuadrad niaa guiedz co; dzigo gon naa no tib bar ne rbix nia anjl co, niaaw niapse guiib or, psilo me ptiix me guiedz co, ptiix me biedz ne ndze igow ga, ni ptiix me xpuerta. Zeene blozh ptiix mew, tib tib nëza no gaay gayoo choo kilómetro, lal ne rzëni miech tsiipchop ngbidz; lal ne zioola lalga nzhen, ni lalgaque glaaw; ¹⁷laa xquielnaal biedz co nzhen lal ne rgaa tsiipchop docen dzit nia ne; ptiix mew zigne rtiixaque ne nac ne miech.

¹⁸Niapse guiib or niaa guiedz co, zigne rne naa ga, roļ rñaw lëëdaa vidr. ¹⁹⁻²⁰Biedz ne ndze igow ga, niapse quie niazh ne lë jasp niaaw; scaque gza tsiipchop quie ne naaz biedz co, niapse quie niazh ngalguieew:

tiba ngalguiee quie niazh ne lë jasp,

tiba ngalguiee quie niazh ne lë zafir,
tiba ngalguiee quie niazh ne lë ágata,
tiba ngalguiee quie niazh ne lë smerald,
tiba ngalguiee quie niazh ne lë ónice,
tiba ngalguiee quie niazh ne lë cornalin,
tiba ngalguiee quie niazh ne lë crisólito,
tiba ngalguiee quie niazh ne lë beril,
tiba ngalguiee quie niazh ne lë topás,
tiba ngalguiee quie niazh ne lë crisoprás,
tiba ngalguiee quie niazh ne lë jacint,
tiba ngalguiee quie niazh ne lë amatist.

²¹Gza tsiipchop puert ne quiaw ga, tibga quie perl niaa tib tib puert co; nëzyu ne rded groļ guiedz co, niapse guiib or ni-aaw, masaque mbe roļ rñaw.

²²Ni tib yadoo gond naa, sac dipse lad guiedz co rleynie zho Dios, rleynie zho men ne nac Xcarner yeen me. ²³Led yedraa ga rquiin xbiini ngbidz, rquiin xbiini mëë, sac masaque xquielndzon me, ni xquielndzon men ne nac Xcarner yeen me ga nac biini.

²⁴Grëse miech ne ngab lo me, ine gziini biini co lo zho së zho lad guiedz co; zha ne bnabey grë guiedz ne bre lo guidzliu, bio dze zha goc zha non, per zeene gdziñ zho ga ye zho zunnon zho me. ²⁵Led yedraa ga ycow liu, tibaque niini gnaw, tibaque gzhal gza xpuerta.

²⁶Grëse ncuane mbe ne gocnon lo grë guiedz ne bre lo guidzliu, laaw gdziñ ga; ²⁷sangue grë ncuane mbixladz gdzinda ga. Zig nac grë miech ne run grë guielntseeb, grë zha ne tibaque noquidie, gdziñd zhow; loxaque zha ne zhoob lë len xlibr men ne nac Carner yeen co (libr ne no lë zha ne yгаа guielmban cub ne gdeed Dios ga), zha cose gdzina.

22 Blozh ga, blu anjl co tib guiubee lo naa, në me zha ne guie nis co, zgaa zho guielmban; mbe roļ rñaw, haxta rbebel low. Merse zhan xcan ne zob Dios ni zhan xcan ne zob men ne nac Carner yeen co, ga rriee guiubee co, ²rdeda groļtaa nëzyu ne rded len guiedz co. Gropse nëz ro guiubee co zëeb yag

ne rdeed guielmban, gzobse mēē rquia nex low, tsiipchop vult rdeeda nex tib len iz, haxta ye zhiblaga rquiin grē zha ne no ga, parne sacnēd zho. ³Led yedraa ga no ncuaane ndziibdee, ga zo zhixcan Dios ni zo zhixcan men ne nac Carner yeen co; grēse miech ne ngab lo me, rleynie zho me runnon zho me. ⁴Ranlo zho me, grēse zho quia lē me quia zho. ⁵Led yedraa ga yquiin zho pe gziini lo zho, yquiingaa zho xbiini ngbidz, sac Dioszhal rziini lo zho, led yed ga ycow liu; ga gban zho gdzindraa dze ne greece zho ga.

Ile ziaad Jesús

⁶Dzigo nēchaa anjl co lo naa:

—Grēse ncuaane quiayan luu nu, ible ncuaane no gaca. Bui ganle Dios men ne rdeed guielbiini lo grē zha ne rieteed xti-idz me lo miech, rnee zho ncuaane naraa gac, mezhal pxeel xanjl me ziadnee lo luu, zeena gacnan grēse zha ne ngab lo me ziaadyoble gac grē ncuaan rii. ⁷Ible nacle xtiidz men ne rnabey ne, zhile laa me guiaad. ¡Dichos grē zha ne gliladz grē mine noxobnen Dios nu!

⁸Grop lo naa gon naa grē ncuaan rii, naazhal bin znu bnee anjl co. Nacne pquiitsgzhib naa lo me ni naa gunnon naa me; ⁹dzigo nēchaa me lo naa:

—Guso i, rieguiald gunnon luu naa, laa naa nile lo luu ye naa tib ngundziinse nac naa lo Dios, nac naa zigne nacaque luu grē luu grē zha ne noteed xtiidz men ne rnabey ne lo miech, ni grēraa zha ne gliladz mine noxobnen me nu. Me none gunnon luu.

¹⁰Blozh ga, nēchaa me:

—Bien, grēse mine quiayan luu nu, yqueetsd luuw, sac zhile gdzin dze ne gaca. ¹¹Lo spalalse dze ne riaan niina, grē zha ne noyun guielntseeb, telne racladz zho mazdraa guielntseeb ne gun zho, maase gun zhow; zha ne rungaa guielyozh, telne mincota rleynie zho,

maase gunraa zhow. Sanguē grē zha ne noxco gun mine rnabey Dios, none tsoxcoraa zhow; zha ne ngablegaa lo me, none gunraa zho mine racladz me, gbiched zho lo me.

¹²Horco bin naa tsi men ne nac Carner yeen co, nē me:

—Psoladza sca gon, ible zialniob naa; zeene laa naa guial, hor co gded naa mine rieguial tib tib miech, tel zha wban zho. ¹³Notaque naa, zig nac grē ncuaan rii naa psilow ni naa csiaala; nac naa zig nac letr “a” ni letr “z” lo grē letr, “a” rsilow, “z” riala. ¹⁴Dichos grē zha ne noxco guiaanmbe zho nēz lo Dios, sac rrieequia xab zho ga nosanmbe zho, parne grieelo ted zho ro puert ne quia guiedz cub ne nac Jerusalén ga; gdzin zho ga ine gow zho xnex yag ne rdeed guielmban ga. ¹⁵Sanguē grē miech ne racntseeb lo Dios, zha ne rleynie guielbruj, zha ne rionie zha ne led tsieeld, zha ne rut samiech, zha ne rleynie grē mdio, zha ne loxaque noquidie samiech, ni tib zha co grielod ted ro puert co. ¹⁶Naa gon nac Jesús, naa pxel xanjl naa ziaadlu grē ncuaan rii lo luu, zeena grēse zha ne no xnēz naa gacnaa. Naa ga brieequia lo xti rey David, per naa psan grēse xmengol me. Rrieequia naa nac mel ngol ne rziini ral sil.

¹⁷Zigtaa Espiritu Sant, zigtaa grē zha ne no xnēz me, zha ne rrieequia gac tsieel me ga, laa zho quiambēz me; niicle zha ne gacnragaa laa me no guiaad, none yquiambēz zho me. Zha ne nē rnab zhis, telne gacladz zho zac gbig zho lo me, me gdeed nis ne rdeed guielmban guie zho; ygad me nis co lo zho, peet gacnonda.

¹⁸Grēse zha ne gon grē mine pxobnen Dios nu, laa naa rso diidz lo zho: Gneed zho ncuaane nacda, sac zha ne gdziibraa diidz zeene gnee zhow, sca-gaa me, lo grē guielnē ne raquiet nu yгаа miech, zdziibraa me mine yгаа

zho; ¹⁹zha ne ctichegaa palala zeene gnee zhow, scaque stiche me lë zho lo libr ne zhobnee cho nac zha ne ygaa guielmban ne gdeed me, grielodraa gdziñ zho guiedz ne blozh goquiet nu, ygaadraa zho yquiin zho xnex yag ne rdeed guielmban ga.

²⁰Men ne blozh bnee lo naa ga, ible ziaadniob me rnee me. Gacxe waa, dib zdoo naa laa naa rne lo me nu:

—¡Scaw gon Jesús! ¡Dë, laa no quiambiaaz luu!

²¹Me nac men ne gacniën to grëse to, me gunlay to.

Juan